

**Tuhun Tsaa
tsa Nacoo
Jutu Mañi yo
Jesucristo
tsi yo**

EL NUEVO TESTAMENTO
Mixteco de San Juan Colorado



La Liga Bíblica

Las Sagradas Escrituras para Todos

El Nuevo Testamento
en el mixteco de San Juan Colorado

La Liga Bíblica 1994 5C primera edición

La Liga Bíblica 2008 versión electrónica

Publicado por

© La Liga Bíblica 2008

Se permite copiar, distribuir y comunicar públicamente la obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

Aclaraciones sobre el alfabeto mixteco de San Juan Colorado

La mayoría de los sonidos del mixteco son semejantes a los del español y se escriben con las mismas letras; sin embargo; existen algunas letras en mixteco que no existen en español y otras que se usan de una manera diferente. A continuación se presentan estas letras:

La **ï** se pronuncia como en las siguientes palabras:

nombre **sivï** animal **quiti** ratón **tiñi**

La **n** final de una palabra en mixteco no tiene la misma función que la **n** en español; se usa para indicar la nasalización de las vocales que le preceden, como en las siguientes palabras:

árbol **yutun** diferente **siin** negro **tuun**

La **h** en mixteco no se usa de la misma forma que en el español. Se usa en palabras como las siguientes:

casa **vehe** oído **soho** palabra **tuhun**
chico **luhlu** rana **sahva** grande **cahnu**

La **x** se pronuncia como en las siguientes palabras:

bravo **xaan** anillo **xehe** dulce **vixi**

La **ts** se pronuncia como en las siguientes palabras:

comal **tsiyo** semilla **tsiti** diez **utsi**

(Algunas personas pronuncian la **ts** como la **ch** del español.)

La **ty** se pronuncia como en las siguientes palabras:

teja **tyiyo** pesado **tyaca** machete **mityi**

(Algunas personas pronuncian la **ty** como la **ch** del español.)

La **ny** se pronuncia como en las siguientes palabras:

Dios **Nyoo** mamey **nyica** nopal **vihnya**

El acento (´) y el subrayar (_) una letra se usan para poder distinguir el tiempo de los verbos. Siempre se escriben en la última vocal de la palabra.

tiempo presente

hay **iyó**
dice él **catyí ra**
ve él **nyehé ra**

tiempo pasado

hubo **tsicoo**
dijo él **catyi ra**
vió él **nyehę ra**

Una orden se indica subrayando (_) la primera vocal de la palabra.

¡mira! **nyehe** ¡ven! **naha**
¡canta! **cata** ¡corre! **cunu**

Las siguientes palabras interrogativas llevan acento:

¿Qué? **náa**
¿Quién? **yóo**
¿Cuál? **ndáa**
¿Cómo? **nácaa**

Tabla de Libros

I. Libru tsa tsahá cuenda tandihí tsa javahá ra Jesucristo:

San Mateo	1
San Marcos	65
San Lucas	106
San Juan	173

II. Libru tsa tsahá cuenda tandihí tyiñu tsa javahá ra tava tyiñu ra Jesús:

Los Hechos	221
----------------------	-----

III. Carta tsa tyinyaá tsa cuenda nyivi yihí tuhun Nyoo:

Romanos	283
1 Corintios	308
2 Corintios	331
Gálatas	348
Efesios	357
Filipenses	366
Colosenses	373
1 Tesalonicenses	379
2 Tesalonicenses	385
1 Timoteo	388
2 Timoteo	395
Tito	400
Filemón	403
Hebreos	405
Santiago	424
1 Pedro	430
2 Pedro	437
1 Juan	441
2 Juan	448
3 Juan	449
Judas	450

IV. Libru tsa tsahá cuenda tsa cua cuvi ityi nuu:

Apocalipsis	453
-----------------------	-----

Tuhun Nyoo Tsa Tyaa Ra Mateo

Nyivi ra Jesucristo tsa tsicoo tsa
ndi cumañi ca cacu ra

(Lc. 3:23-38)

1 ¹ Ihya nyecú tandihi sivi nyivi
ra Jesucristo tsa tsicoo tsa ndi
cumañi ca cacu ra. Nyivi ra David
tan nyivi ra Abraham cuvī tsi ra.

² Sehe ra Abraham cuvī tsi ra
Isaac, tan sehe ra Isaac cuvī tsi ra
Jacob. Tan sehe ra Jacob cuvī tsi ra
Judá tsihin tandihi ra yañi ra. ³ Tan
ra Fares tsihin ra Zara sehe ra Judá
tsihin ña Tamar cuvī tsi ra naha. Tan
sehe ra Fares cuvī tsi ra Esrom, ra
cuvī jutu ra Aram. ⁴ Tan sehe ra
Aram cuvī tsi ra Aminadab, jutu ra
Naasón. Tan sehe ra Naasón cuvī tsi
ra Salmón. ⁵ Tan ra Booz, sehe ra
Salmón tsihin ña Rahab cuvī tsi ra.
Tan sehe ra Booz tsihin ña Rut cuvī
tsi ra Obed, jutu ra Isaí. ⁶ Tan ra
David, ra cuvī rey, sehe ra Isaí cuvī
tsi ra. Tan sehe ra rey David tsihin
ñaha tsa cuvī ñasihi ra Urías cuvī tsi
ra Salomón.

⁷ Tan sehe ra Salomón cuvī tsi ra
Roboam, ra cuvī jutu ra Abías. Tan
sehe ra Abías cuvī tsi ra Aza. ⁸ Tan
sehe ra Aza cuvī tsi ra Josafat, ra cuvī
jutu ra Joram. Tan sehe ra Joram
cuvī tsi ra Uzías. ⁹ Tan sehe ra Uzías
cuvī tsi ra Jotam, ra cuvī jutu ra
Acáz. Tan sehe ra Acáz cuvī tsi ra
Ezequías. ¹⁰ Tan sehe ra Ezequías
cuvī tsi ra Manasés, ra cuvī jutu ra
Amón. Tan sehe ra Amón cuvī tsi ra
Josías. ¹¹ Tan sehe ra Josías cuvī tsi
ra Jeconías tsihin tandihi ra yañi ra.
Tsicoo ra naha quivi tñin ra ñuu
Babilonia naha ra tsi nyivi Israel, tsa
cua cuhun ñi cuvi ñi musu ra ñuu
Babilonia can naha ra.

¹² Tsa yaha can, tan tsicoo sehe ra
Jeconías, tan ra ican cuvī ra Salatiel,
jutu ra Zorobabel. ¹³ Tan sehe ra
Zorobabel cuvī tsi ra Abiud, ra cuvī
jutu ra Eliaquim. Tan sehe ra Eliaquim
cuvī tsi ra Azor. ¹⁴ Tan sehe ra Azor
cuvī tsi ra Sadoc, ra cuvī jutu ra
Aquim. Tan sehe ra Aquim cuvī tsi ra
Eliud. ¹⁵ Tan sehe ra Eliud cuvī tsi ra
Eleazar, ra cuvī jutu ra Matán. Tan
sehe ra Matán cuvī tsi ra Jacob.

¹⁶ Tan ra Jacob cuvī jutu ra José, yñ
ña María. Juvín ña cuvī sihi ra Jesús
ra cuvī Cristo, o cuñí tsi catyí, ra tsa
jaquitsi Nyoo tyin quihí ndaha tsi yo.

¹⁷ Tacan tsicoo utsi cumi taahan
tata ra Abraham nda cuanda cacu ra
David. Tan ra David, tsicoo utsi cumi
tata ra nda cuanda quivi tñin ra ñuu
Babilonia naha ra tsi nyivi Israel. Tan
nda cuanda quivi can tsicoo utsi cumi
ca tata ñi nda cuanda quivi cacu ra
Cristo.

Nu cacu ra Jesucristo

(Lc. 2:1-7)

¹⁸ Tyehen cuvī tan cacu ra
Jesucristo: tsa yaha cunda tyiñu tsa
cua tindaha ña María tsihin ra José.
Tan tsa ndi cumañi ca naquihin ra tsi
ña, ñihí sehe ña tsa cuenda Tatyí li
Nyoo. ¹⁹ Tan ra José, ra cua cuvi yñ
ña, vaha xaan iñi ra. Ña cuñí ra cuhva
ra ticanuu tsi ña. Yacan cuenda tsica
iñi ra tsa nacao xeehe ra tsi ña tan ña
cua tindaha ca ra tsihin ña. ²⁰ Tan
tsitsi tsa tsicá iñi ra yacan, quituvi iin
ángel Jutu Mañi yo nuu ra nu quixí
ra. Tan nyehe ra ñumaahna, tan catyí
ángel can tsihin ra:

—José, tata ra David, ña caca iñi
un quihin un tsi ña María cuvi ña
ñasihi un, tyin sehe ña tsa cua cacu,

sehe Tatyí li Nyoo cuví tsi. **21** Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

22 Tacan cuví tyin tacan tan cundaa tsa cahān ra cuví ndusu yuhu Jutu Mañi yo tahān tsanaha.

23 Tan catyí ra tyehen:

Ñaha yoco tsa ñaha ca coo yii, cua cuhun sehe ña.

Tan cua coo iin sehe ña. Tan cua cunañi ra: Emanuel.

Tan sivi can cuñí tsi catyí: “Nyoo iyó ra tsihin yo.”

24 Tan tsa ndoto ra José, javahā ra tumaa catyí ángel can tsihin ra. Quihīn ra tsi ña María tyin cuví ña ñasihi ra. **25** Maa tyin ña quixi ra tsihin ña nda cuanda tsa yahā cacu sehe ña. Tan jacunañi ra tsi lee can: Jesús.

Nu cuahán ra tsitó xaan, ra cuví rey, cua nyehe ra naha nu cacu ra Jesús

2 **1** Cacū ra Jesús ñuu Belén tsa canyí nu cuví Judea. Tan quivi can ra cuví rey Judea nañí ra Herodes. Tacan tan tsaq juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuví ra naha. **2** Tsiqā tuhun ra naha tsi nyivi tan catyí ra naha:

—¿Nu maa nyí ra cuví rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacū ra ityi ihya. Tan vatsí ndi vatsí jacahnu ndi tsi ra —catyí ra naha.

3 Quivi tsa tsito ra rey Herodes tsa cahān ra can naha ra, tuñu xaan cuñí ra cuví. Tacan tucu tandihi nyivi ñuu Jerusalén can. **4** Tacan tan canā ra Herodes tsi tandihi ra jutu tsa cuví ityi nuu tsihin ra cuví jutu tan tsihin tandihi ra cuví maestro cuenda ley vehe ñuhu naha ra. Tan tsiqā tuhun ra tsi ra naha numaa nda taahán tsi cacu ra Cristo. **5** Tan nacahān ra can

naha ra tan catyí ra naha:

—Ñuu Belén tsa canyí Judea, ndacan taahán tsi cacu ra tyin tyehen tyaq ra cuví ndusu yuhu Nyoo nu tutu tahān tsanaha:

6 Tan yooho Belén ñavin iin ñuu luhlu ñi cuví un tsa nuu tandihi maa ñuu tsa cayucú Judá

tyin nuu yooho cua quita ra cua quihí ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

7 Tacan tan canā xeehe ra Herodes tsi ra tsitó xaan can naha ra, tan tsiqā tuhun ra tsi ra naha náa quivi tan náa hora quituvi tiñuu can. **8** Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyí tuhun ndo tsihin yu, tyin cuhun ndihi yu cujacahnu yu tsi ra —catyí ra Herodes tsihin ra naha.

9 Tsa tsíñi ra tsa tsitó xaan can naha ra tsa cahān ra Herodes, tan quihīn ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsiquiñi tsi maa maa siqui nu canyí ra lee can. **10** Tan tsa nyehe ra tsitó xaan can naha ra tyin tsiquiñi tiñuu can, siñ xaan cuñí ra naha. **11** Tan quihvi ra naha tsitsi vehe nu canyí lee can. Tan nyehe ra naha tsi ra tsihin ña María, sihi ra. Tan tsiquiñi tsiti ra naha tyin jacahnu ra naha tsi lee can. Tacan tan nuñā ra naha yuhu caja tsa ndahá ra naha. Tan tava ra naha regalo tsa cuví xuhun cuaan, tan cutu vixi, tan ndutya tami tsa nañí mirra. Tan tsaha ra naha tsi lee can. **12** Tsa yahā tsa nyehe ra naha tsi ra Jesús tan cuanuhū ra naha. Tan tsa cuanuhū ra naha nyehe ra naha ñumaahna tan

catyí tsi tyin ña taahán tsi cuhun ra naha cucatyí tuhun ra naha tsihin ra Herodes. Yacan cuenda siin ityi cuanuhu ra naha.

Nu tsinu xeehe ra José tan ña María tsihin lee sehe ñi nda Egipto

13 Tsa yahá cuahán ra tsa tsitó xaan can naha ra, tacan tan iin ángel Jutu Mañi yo quituvi nuu ra José tsitsi ñumaahna. Tan catyí ángel can tsihin ra:

—Ndúvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahni ra tsi ra —catyí ángel can tsihin ra José.

14 Tacan tan nduvita ra José tsacuaa can. Tan quihin ra tsi lee can tsihin sihi tsi. Tan cuahán ñi nda Egipto. 15 Ndacan tsicoo ñi nda cuanda tsa tsihi ra Herodes. Tacan cuvi tyin cunda tsa cahan ra cuvi ndusu yuhu Jutu Mañi yo tahan tsanaha jahá Nyoo. Tyehen catyi ra: “Nda Egipto cana yu tsi Sehe yu”, catyi ra.

Nu tava tyiñu ra Herodes na cahni ra naha tsi ra nyihi

16 Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra tan tsa tuvi iñi ra Herodes tyin ra tsitó xaan can naha ra jandavi ñaha ra naha tsi ra, tan nduxaan xaan ra. Tan tava tyiñu ra na cahni andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacu nda cuanda ra nyihi tsa uvi cuiya. Tacan javaha ra tyin tsicá iñi ra tyin tacan cuiya ra Jesús tumaa catyi ra tsitó xaan can naha ra tsihin ra. 17 Tacan cuvi tyin cunda tsa cahan Nyoo tan tyaa ra Jeremías, ra cuvi ndusu yuhu ra tahan tsanaha. Tyaa ra tyehen:

18 Tsiñi yo iin ndusu ñuu Ramá,

tsacú tsa nyivi, tan iyo taahán ñi.

Juvin ñi nyivi cuvi tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yahá tsihi sehe ñi, catyí tsi nu tutu Nyoo.

19 Maa tyin tsa yahá tsa tsihi ra Herodes, tacan tan quituvi nyico iin ángel Jutu Mañi yo nuu ra José nu quixi ra nda Egipto. Tan catyí ra tsihin ra:

20 —Ndúvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahni tsi ra lee ihya.

21 Tacan tan nduvita ra José, tan quihin ra tsi lee can tan tsihin sihi ra. Tan cuanuhu ñi nda Israel. 22 Maa tyin quivi tsito ra José tyin ra Arquelao, sehe ra Herodes, cuvi ra rey nda Judea, nayuhvi ra tan ña cuñi ra cuhun ra ndacan. Tan cuanuhu ñi nda Galilea tyin tacan jacoto Nyoo tsi ra tsitsi ñumaahna. 23 Tsa tsa ñi ican, tan cuahán ñi nda ñuu Nazaret, cua coo ñi. Tan ican tsicoo ñi. Tacan cuvi tyin cunda tsa cahan ra cuvi ndusu yuhu Nyoo tahan tsanaha. Tyin catyi ra naha tyin ra Jesús ra ñuu Nazaret cua cuvi ra.

Nu cahan ra Juan tuhun Nyoo tsihin nyivi

(Mt. 1:1-8; Lc. 3:1-9, 15-17; Jn. 1:19-28)

3 Quivi tsa ndi iyó ñi ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quitsaha caahan ra tuhun Nyoo tsihin nyivi tsa tsaá nu nyií ra. 2 Tan catyi ra:

—Ndú uvi iñi ndo cuatyí ndo tyin tsa cuñi tsa quivi cundaca ñaha Nyoo tsi yo.

3 Juvin ra Juan cuvi ra tsa cahan ra Isaías ra cuvi ndusu yuhu Nyoo

tahan tsanaha. Tan tyaa ra tsa tsaha
Nyoo tsi ra tyehen:

Cua tyaa soho yo ndusu ra nu
caná tsa ra nu tsiqui tan
catyí ra:

“Nuña ndo iin ityi cuiti.

Tan natyiso vaha ndo tsi ndo
tyin tsa vatsi Jutu Mañi yo,”
catyí tuhun tsa tyaa ra Isaías.

4 Tan ra Juan nditsí ra jahma tsinu
tsihin ixi camellu. Tan cinturón ra,
ñiñi cuví tsi. Tan tica xama tsatsí ra
tan tsihí ra ndutya ñuñu. 5 Quitsi
nyivi ñuu Jerusalén tan tandihí ñuu
tsa cayucú Judea, tan nyivi tsa iyó
yatyin ñi ityi yutya cahnu Jordán
can; quitsi tya soho ñi tuhun caahán
ra. 6 Tan tsa yaha nahma ñi cuatyí ñi,
ra Juan jacoondutya ra tsi ñi yutya
cahnu Jordán ican.

7 Maa tyin nyehe ra Juan tyin
cuaha xaan ra fariseo, ra tsa tyaá
yahvi xaan ley vehe ñuhu, tan cuaha
xaan ra saduceo, quitsi ra naha tyin
coondutya ra naha. Tan catyí ra
tsihin ra naha:

—iNyoo, tumaa tata coo xaan
cuví ndo! ¿A cuñi maa ndo tyin tsihin
tsa coondutya ñi ndo tan ña cua tatsi
tuñi ca Nyoo tsi ndo? Ña cuví.

8 Nasama ndo cuhva iyó ndo, na
nyehe yo tyin tsa ndu uvi ñi ndo
cuatyí ndo nuu Nyoo. 9 Maa tyin ña
nduyaa ndo tan catyí ndo tyin nyivi
tata ra Abraham cuví ndo. Tyin vasu
tsihin yuu ihya, Nyoo cuví jananduvi
ra nyivi ra Abraham. 10 Tsa ndatú
yatsa Nyoo tsi tandihí ndo tsa cuví
ndo tumaa yutun tsa ña tsahá tsiti
vaha. Cua tyahnya tun tan cua cayu
tun, tacan cua javaha Nyoo tsihin
ndo —catyí ra Juan—. 11 Tsa nditsa
tyin yuhu jacoondutya yu tsi nyivi
tsihin ndutya, tan cuví tsi iin seña
tyin tsa ndu uvi ñi ñi cuatyí ñi. Maa
tyin tsa yaha jacoondutya yu tsi ñi
tsihin ndutya, vatsi inga ra cua
jacoondutya tsi ñi tsihin Tatyí Ii

Nyoo tan tsihin ñuhu ihñi. Iyó ca
tunyee ñi Nyoo tsi maa ra tan ñavin
ca yuhu. Tan ndi tsa cuiso yu nditsan
ra tan nduve yahvi nyaá yu, tyin maa
ra cahnu ca cuví ra. 12 Tan ra ican
ndahá ra pala tyin cua jandava ra
trigu. Cua tava sin ra trigu vaha,
tan cua natyihí vaha ra itsi. Tan cua
cahmi ra tsahan tsa quita tsihin trigu
can tsihin ñuhu tsa ña cua ndahva
maa —catyí ra Juan.

Nu tsicoondutya ra Jesús

(Mr. 1:9-11; Lc. 3:21-22)

13 Tacan tan quita ra Jesús Galilea
tan tsa ra yutya cahnu Jordán nu nyí
ra Juan, tyin cuñi ra tsa jacoondutya
ra Juan tsi ra. 14 Tsa jihna ñi ña cuñi
ra Juan jacoondutya ra tsi ra, tan
quitsaha catyí ra tsihin ra:

—Cuñi un tsa jacoondutya yu tsi
un, maa tyin ña taahán tsi tsa
jacoondutya yu tsi un. Maa un taahán
tsi jacoondutya tsi yu —catyí ra.

15 Maa tyin ra Jesús catyí ra tsihin
ra:

—Tsa vityin, na cuvi tsi cuhva
catyí yu tsihin un. Tyin cuñi tsi tsa
javaha yo tandihí tsa vaha tsa cuñi
Nyoo —catyí ra tsihin ra Juan.

Tacan tan ndo ra Juan vaha.

16 Tsa yaha tsicoondutya ra Jesús
tan quita ra tsitsi ndutya. Tan nuña
andivi, tan ra Jesús nyehe ra vatsi
nuú Tatyí Ii Nyoo, tumaa iin paloma.
Tan tsa tsi siqui ra. 17 Tacan tan
cahan iin ndusu ityi andivi, tan catyí
tsi tyehen:

—Ra ihya cuví Sehe yu, tan cuñi
xaan yu tsi ra. Tan sii xaan cuñi yu
tsihin ra —catyí ndusu can.

Nu nducu cuhva nu ña vaha tsi ra Jesús

(Mr. 1:12-13; Lc. 4:1-13)

4¹ Tacan tan tsindaca Tatyí Ii
Nyoo tsi ra Jesús iin nu tsiqui,
tyin cua nducu cuhva nu ña vaha tsi ra.

2 Tsiçoq nyitya ra uvi xico nduvi tan uvi xico tsacuaa. Tsa yahā can tan quitsi socó tsi ra. 3 Tacan tan natuhvā nu ña vaha nu nyaá ra, tyin cuñi nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahān tsihin yuu ihya, na nanduvi tsi paan —catyí nu ña vaha tsihin ra Jesús.

4 Maa tyin ra Jesús nacahān ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihi tuhun caahān Nyoo” —catyí ra Jesús tsihin nu ña vaha.

5 Tacan tan quihin nu ña vaha tsi ra. Tan cuahān ra tsihin nu nda ñuu ii Jerusalén. Tan jandaq nu tsi ra jiñi vehe ñuhu cahnu. 6 Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

7 Tan nacahān ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

8 Tacan tan quihin nu ña vaha tsi ra inga tsaha, tan cuahān ra tsihin nu iin jiñi yucu sucun. Tan janahā nu tandihi tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi. 9 Tan catyí nu tsihin ra:

—Yuhu cuhva yu tandihi maa tsa janahā yu tsi un, tatun yooho tan cuiñi tsiti un nuu yu tan jacahnu un tsi yu.

10 Tacan tan nacahān ra Jesús tan

catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

11 Tacan tan cuahān nu ña vaha, tan ndoq ra Jesús. Tan tsaa ángel tan jatyinyee ra naha tsi ra.

Nu quitsahā caahān ra Jesús tuhun Nyoo tsihin nyivi tsa iyó ñuu tsa cayucú Galilea

(Mr. 1:14-15; Lc. 4:14-15)

12 Quivi tsa tsito ra Jesús tyin ra Juan nyii ra vehe caa, cuahān ra nda Galilea. 13 Maa tyin ña ndoq ra ñuu Nazaret, nu tsahnū ra. Cuahān ra cua coo ra nda ñuu Capernaum, iin ñuu tsa canyii yatyin ñi yuhu miñi, nu ñuhu ra Neftalí yatyin ñuhu ra Zabolón. 14 Tacan tan cundaq tsa cahān ra Isaías, ra cuví ndusu yuhu Nyoo, tahān tsanaha. Tan catyí ra:

15Ñuhu ra Zabolón tan ñuhu ra

Neftalí

tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

16Nyivi iyó nu naa, ñi iyó nu iyó tixahñu tuhun tsihi,

nyehé ñi iin ñuhū nditsin tsa jandunditsín nu yucú ñi, catyí ra Isaías.

17 Nda cuanda quivi can, tan quitsahā caahān ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñi tsaa quivi cundaca ñaha Nyoo tsi ndo —catyí ra Jesús tsihin nyivi.

Nu canā ra Jesús tsi cumi taahan ra tsa tñín tyaca

(Mr. 1:16-20; Lc. 5:1-11)

18 Ra Jesús tsicá ra yuhu miñi tsa nañi Ndu tyaca Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra

Andrés. Ra tíñ tyaca cuví ra naha. Tan cañi ra naha traya ra naha nu ndutya. **19** Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tíñ ndo tyaca, tacan cua ñihi ndo nyivi cua cuví nyivi Nyoo —catyí ra Jesús tsihin ra naha.

20 Juvín ñi cuhva can nacoꝝ ra naha traya can, tan cuahán ra naha tsihin ra Jesús.

21 Luxu ñi tsicá ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cañá ra Jesús tsi ra naha. **22** Juvín ñi cuhva can tan nacoꝝ ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyivi jacuahá ra Jesús

(Lc. 6:17-19)

23 Cuahán ra Jesús tsicá ra tandíhi ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyivi cuuhví tsihin tandíhi ñi nuu cuehe tsa yihí tsi ñi. **24** Tacan tan tsitō tandíhi nyivi ñuu cuenda Siria tuhun ra Jesús. Tan tsindacá ñi tandíhi nyivi cuuhví tsi ra: juhva ñi yihí tatyí ña vaha. Tan yihí ñi tsiihí naaha ñi. Tan yihí ñi ndohó ñi cuehe xii. Tan janduvahá ra Jesús tsi tandíhi ñi. **25** Cuaha xaan nyivi nyicún tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañí Decápolis, nyivi iyó ñuu Jerusalén tan tandíhi ca ñuu tsa cayucú Judea, tan nyivi iyó inga tsiyo yutya cahnu Jordán.

Nu cahán ra Jesús tsihin nyivi nu tsiqui

(Lc. 6:20-23)

5 ¹ Nyehe ra Jesús tyin cuaha xaan nyivi, tan ndaa ra iin nuu yucu. Tan tsicunyaá ra ican. Tacan tan nyivi tsicá tsihin ra, tsinunduví ñi tsi ra. **2** Tacan tan quitsaha jacuahá ra tsi ñi tan catyí ra:

3 Nasocó Nyoo tsi tandíhi nyivi tsa tsitó tyin tsíñi ñuhu ra tsi ñi, tan tsa cuenda ñi cuví nu ndacá ñaha ra.

4 "Tan tandíhi nyivi tsa cuiihya cuñi tsa cuenda cuatyí ñi, nasocó Nyoo tsi ñi tan ña cua coo ca ñi tucuiihya iñi.

5 "Tan tandíhi nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyí Nyoo tyin cuhva ra tsi ñi.

6 "Tan tandíhi nyivi tsa cuñi xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñi maa ra.

7 "Tan tandíhi nyivi tsa cundaahví iñi tsi inga nyivi, nasocó Nyoo tsi ñi, tan cua cundaahvi iñi ra tsi ñi.

8 "Tan tandíhi nyivi tsa janduvahá Nyoo añima, nasocó ra tsi ñi, tan cua nyehe ñi tsi ra.

9 "Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyí ra tyin sehe ra cuví tsi ñi.

10 "Tan tandíhi nyivi tsa javahá cuhva cuñi Nyoo tan ndasi cuñi nyivi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra. **11** "Nasocó Nyoo tsi nyooho tsa caahán nyivi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu.

12 Cusiñi iñi ndo tun tacan javahá nyivi tsihin ndo; siñi cuñi ndo, tyin cahnu xaan tan siñi xaan caá tsa cua ñihi ndo nda gloria. Tyin juvín ñi

tacan javahá nyívi tsa ña vaha tsihin tandíhi ra cuví ndusu yuhu Nyoo tahán tsanaha.

**Tatun jandíhi yo tsa tsinú iní
yo tsi Nyoo cuví yo tumaa
ñíi tsa ndíhi tsa uhva**
(Mr. 9:50; Lc. 14:34-35)

13 'Nyooho tsa tsinú iní tsi yu, tumaa ñíi vaha cuví ndo. Maa tyin tatun ñíi, tan ndíhi tsa uhva tsi, ña cua jandu uhva ca tsi tsa catsi yo. Ña vaha ca ñíi can. Tacan tan javita yo can, tan cuañi nyívi tsata can.

**Tatun tyaá yahvi vaha yo tuhun
caahán Nyoo, cuví yo tumaa ñuhú tsa
jandunditsín nu tsicá nyívi nu naa**

14 'Nyooho cuví ndo tumaa ñuhú tsa jandunditsín nu tsicá nyívi. Iin ñuu tsa canyíi jíñi iin yucu, ña cua cuví quíhi xeehe tsi. 15 Ña tuhvá yo tyaá ñuhú tyuma, tan tyíhi xeehe yo itsi tsitsi iin caja. Tyin tuhvá yo tyaá ñuhú tan tinyíi yo itsi iin nu sucun tyin tacan tan jandunditsin tsi nu yucu yo tsitsi vehe yo. 16 Tan tacan taahán tsi jandunditsin tucu nyooho tsihin ñuhú Nyoo tsa iyó añima ndo nu tsicá nyívi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

**Nu jacuahá ra Jesús tyin ñíni xaan
javaha yo tandíhi tuhun tsa tsahá
Nyoo tsi yo tan jacuahá yo itsi tsi nyívi**

17 'Ña cuñi ndo tyin yuhu vatsí janaa yu ley tsa tsahá Nyoo tsi ra Moisés tyin tyaá ra. Tan ndi ña vatsí janaa yu tuhun tsa tyaá tandíhi ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaá yahvi yu tsa caahán ley can, tan catyí tuhun yu tsihin ndo náa cuñi tsi catyí ley can. 18 Tsa nditsa catyí yu tsihin ndo tyin tsitsi tsa ndi iyó ñuhu ñayívi tan andívi, ña cua naa ndi luxu ley tsa tyaá ra Moisés tyin tandíhi maa tsa tyaá ra naha tan cua cundaa tsi. 19 Yacan

cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyívi na javaha ñi tacan, luxu cuii ñi cua cuví ra nu ndacá ñaha Nyoo. Maa tyin ra tsa tyaá yahvi tandíhi, tan janahá ra tsi inga nyívi, cahnu xaan cua cuví ra nu ndacá ñaha Nyoo. 20 Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuví quíhvi ndo nu ndacá ñaha Nyoo.

**Nu caahán ra Jesús tsihin yo tyin ña
taahán tsi cahan yo tsi nyívi**

21 'Nyooho tsa cuaha tsaha tsiñi ndo tsa catyí Nyoo tsihin nyívi tsicoo tahán tsanaha. Catyí ra: "Ña cahñi ndo tsi nyívi, tyin tatun cahñi ndo nyívi, taahán tsi tsa cutuñi ndo." 22 Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyívi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cuhun ndo anyaya tsa cuenda cuatyí can.

23 'Tan yacan cuenda quívi cuahán un vehe ñuhu, tan ndahá un tsa cua jamañi un tsi Nyoo, tan nducuhún iní un tyin iyó tsa javahá un tsi yañi un, 24 ñacoo tsa cuahán tsihin un ityí nu altar vehe ñuhu. Tan cuhun jihna un ndacan un tucahnu iní tsi yañi un. Tacan tan cuhun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

25 'Tatun iin ra tsicán cuatyí tsaha un, tan cuahán un tsihin ra nda nu nyaá ra cumí tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumí tyiñu, tyin ra cumí tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyíhi ra naha tsi un

vehe caa. **26** Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandíhi xuhun tsa cua ndacan ra naha.

Nu caahán ra Jesús tyin ndi tsa tsicá ñi yo tsa coo inga ñaha, o inga rayí tsi yo, tan ña vaha

27 Nyooho tsa tsiñi ndo tyin catyí Nyoo tahán tsanaha tyin nyooho tsa iyó ñasiíhi, ña cua coo inga ñaha tsi ndo, tan ndi ñaha tsa iyó yí tan ña taahán tsi coo inga rayí tsi ña.

28 Maa tyin yuhu catyí yu tsihin ndo, nyooho tsa nyehé iin ñaha tan cuñí ndo coo ndo tsihin ña, tsa tsicoo cuatyí ndo.

29 Tatun tinuu cuaha un janacavá tsi un tsitsi cuatyí, vaha taxin ca tava un tinuu un tan javita un can. Tyin vaha ca quíhvi un nu ndacá ñaha Nyoo tsihin intuhun ñi tinuu un, tan ñavin ca tsa cuhun un anyaya tsihin nduvi taahan tsi. **30** O tatun iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quíhvi un nu ndacá ñaha Nyoo tsihin tsa lundu ndaha un, tan ñavin ca tsa nani un tan cuhun un anyaya.

Nu caahán ra Jesús tyin ña vaha tsa nacoo ihñi rayí tsi ñasiíhi ra

(Mt. 19:9; Mr. 10:11-12; Lc. 16:18)

31 Tan juvin ñi catyí Nyoo tsihin nyívi tsicoo tahán tsanaha tyin yóo ra nacoo ihñi ñasiíhi ra, cuñí tsi tsa cani ra tutu tsa tindahá ra tsihin ña.

32 Maa tyin catyí yu tsihin ndo tyin nduve ndatu iyó tsi rayí tsa nacoo ra ñasiíhi ra tatun ña quituvi ña tsihin inga rayí. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayí cua coo ndíhi cuatyí ña. Tan tacan ra tsa cua quihin tsi ña cua coo ndíhi cuatyí ra.

Ña cahan yo “naha Nyoo maa”

33 Tan tsiñi ndíhi ndo, tyin catyí tucu Nyoo tsihin nyívi tsicoo tahán tsanaha: “Tatun catyí ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.” **34** Maa tyin yuhu catyí yu tsihin ndo tyin ña cahan ndo “naha Nyoo maa”. Tan ña cahan ndo tuhun andívi, tyin yacan cuví nu nyaá Nyoo. **35** Tan ndi tuhun ñuhu ñayívi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca. **36** Tan ndi ña cahan ndo tuhun jíhi ndo, tyin ña cuvi janducuitsin ndo tan ndi tsa jandutuun ndo ndi intuhun ixí jíhi ndo. **37** Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyí ndo “naha Nyoo maa” nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyívi tsa ña vaha tsihin yo, na javaha yo tsa vaha tsihin ñi

(Lc. 6:29-30)

38 Tan tsiñi tucu ndo tsa catyí Nyoo tahán tsanaha: “Tatun cañi nyívi tsi ndo, tan tava ñi iin nuhu ndo, o iin tinuu ndo, taahán tsi tyin javaha ndíhi ra cumi tyíñu tacan tsihin ñi, tumaa tsa javahá ñi tsihin ndo.” **39** Maa tyin yuhu catyí yu tsihin ndo, tyin ña javaha ndo tsa ña vaha tsa javahá nyívi xaan cuñí nyehe tsi ndo. Tyin tun yóo cañi iin tsiyo nuu ndo, taahán tsi tsa cuhva ndíhi ndo inga tsiyo na cañi ndíhi ñi, tan ña cuxaan ndo tsi ñi. **40** O tatun tsicán ñi cuatyí tsaha ndo, tan cuñí ñi quihin nyaa ñi iin camisa ndo. Taahán tsi cuhva ndíhi ndo chamarra ndo tsi ñi tan ña cua cuxaan ndo tsi ñi. **41** O tatun yóo cuñí cundaca ndo ndaha tyíñu ñi iin kilómetro, taahán

tsi cundaca ndo can uvi kilómetro.
42 Tatun yóo nyívi tsicán tumañi iñi tsi ndo, cūhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyívi xaan iñi tsi yo

(Lc. 6:27-28, 32-36)

43 Tan tsiñi tucu ndo tyin catyi Nyoo tahañ tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.”

44 Maa tyin yuhu catyí yu tsihin ndo, cuñi ndo tsi nyívi xaan iñi tsi ndo. Tan javaha ndo tsa vaha tsihin nyívi caahán tsi ndo, tan tsi nyívi ña cuñi nyehe tsi ndo. Tan ndacan tahvi ndo tsi Nyoo tsa cuenda nyívi tsa caahán nyaa tsi ndo tan tsa cuenda ñi tsa jacuví tsa uhvi tsi ndo. **45** Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyívi vaha tan nyívi ña vaha. **46** Tatun nyooho tan cuñi ndo tsi nyívi vaha iñi tsi ndo tan ndasi cuñi ndo nyehe ndo tsi nyívi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quiñi xaan iyó ra can naha ra. **47** Tatun tshá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyívi, nduve tsa vaha xaan javahá ndo. Tyin juvin ñi tacan javahá nyívi tsa ña tsitó tuhun Nyoo. **48** Tumañ Jutu yo tsa nyaá gloria cuiti xaan iyó ra, tacan taahán tsi coo tucu nyooho.

Nu caahán ra Jesús nácaa javaha yo tumañi iñi

6 ¹ Jaha ndo cuenda tan ña nduyaa ndo náa tumañi iñi javaha ndo tsi nyívi. Tyin tatun javaha ndo tumañi iñi tyin nyehe nyívi, Jutu yo, ra nyaá gloria, nduve náa cua cuhva ra tsi ndo. ² Tun cua

javaha ndo tumañi iñi, ña cua jacoto ndo tsi inga nyívi tyin javahá ndo tumañi iñi. Ña javaha ndo tumañi icá ra tsa jahá tyin vaha xaan ra tan tsicá nuu ra naha nyuhvi tan tsitsi vehe ñuhu. Javahá ra naha tumañi iñi tyin na catyi nyívi tyin vaha xaan iñi ra naha. Yacan ñi ñihj ra can naha ra, tan nduve náa cua cuhva Nyoo tsi ra naha. ³ Yacan cuenda quiñi javahá ndo tumañi iñi tsi nyívi ndaahvi, ña jacoto ndo ndi tsi ra tsa vaha xaan ca iñi tsi ndo. ⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo

(Lc. 11:2-4)

⁵ Tatun cua ndacan tahvi ndo tsi Nyoo, ña javaha ndo tumañ javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyívi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyívi tyin vaha xaan ra naha. Tsa nditsa catyí yu tsihin ndo tyin yacan ñi ñihj ra naha. ⁶ Maa tyin nyooho quiñi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyívi tsi ndo. Quihví ndo tsitsi vehe ndo tan nacasi ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyívi. Tan cua cuhva ra tsa vaha tsi ndo.

⁷ Tatun cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyívi tsa ña tsitó tsi Nyoo. Cuñi maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yaha cahan ñi. ⁸ Ña javaha ndo tacan. Tyin Nyoo tsa tsitó ra náa tsiñi ñuhu tsi

ndo tsa ndi cumañi ca ndacan ndo tsi ra. ⁹ Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

¹⁰ Na quitsi tsa ndaca ñaha un nu ñuhu ñayivi ihya, tan na javaha tandihi nyivi tandihi cuhva cuñi maa un, tumaa cuví nda gloria.

¹¹ Cuhva tsa catsi ndi tahan tahan quivi.

¹² Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

¹³ Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnu tandihi nyivi tsi maa ñi un tandihi maa quivi tan na ña cundihi tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

¹⁴ Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo. ¹⁵ Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶ Tan catyí tucu ra Jesús tsihin nyivi:

—Quivi tsa iyó nyitya ndo tyin

nanducú ndo tsi Nyoo, ña cuiihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaá nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. ¹⁷ Maa tyin nyooho quivi tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tyihi ndo cuca jiñi ndo. ¹⁸ Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria

(Lc. 12:33-34)

¹⁹ Ña jacaya ndo tsa cuca tsa iyó nu ñuhu ñayivi ihya. Tyin coto tiví tsi jaha tiquixin o jaha cuxi. O cuví quihvi ñasuhu, tan suhu nu tandihi tsa jacaya ndo. ²⁰ Vaha ca jacaya ndo tsa cuca tsa iyó nda gloria. Tyin ña cua cundihi tsi ndacan. Tyin ña cuvi tiví tsi ndacan, tan nduve quití jatívi itsi, ndi nduve ñasuhu. ²¹ Tyin nu natyihí vaha ndo tsa cuca, ican cua cunyaa ndihi añima ndo.

Nu caahán ra Jesús tyin na jaha yo cuenda ñuhu nditsin tsa tyihí ra añima yo

(Lc. 11:34-36)

²² Tinuu ndo cuví ñuhú nditsin tsi ndo. Tatun vaha tinuu ndo, tanií cuñu ñuhu ndo tan iyó ñuhú nditsin. Tan tuhun ihya cuñi tsi catyi tyin tatun iyó ñuhú nditsin Nyoo añima ndo cuví ndo nyivi vaha. ²³ Maa tyin tatun ña vaha tinuu ndo, tandihi cuñu ñuhu ndo tan nyii tsi nu naa. Tan tacan tucu tatun nduve ñuhú Nyoo iyó añima ndo, cuví ndo tumaa iin ra cuaa. Nu naa cuahán ndo tan ña cuvi nyehe ndo ityi vaha tsa cuahán nu nyaá Nyoo.

**Nu caahán ra Jesús tyin ña cuvi
tyaa yahvi yo tsi Nyoo tatun
cuñí xaan ca yo xuhun**

(Lc. 16:13)

24 'Iin musu ña cuvi coo uvi
tsitoho ra. Tyin musu can cuñí ca ra
tsi iin ra tan ñavin ca tsi inga ra. Tan
tyaa yahvi ra tsi iin ra, tan ñavin ca
tsi inga ra. Tan tacan tucu nyooho,
ña cuví cuñi ndo tsi Nyoo, tan cuñi
tucu ndo xuhun.

**Nu caahán ra Jesús tyin ña caca xaan
iñi yo náa ndíhi tsa tsiñi ñuhu tsi yo**

(Lc. 12:22-31)

25 'Yacan cuenda catyí yu tsihin
ndo, tyin ña caca xaan iñi ndo nácaa
ñihi ndo tsa catsi ndo tan tsa coho
ndo. Ndi ña caca iñi ndo nácaa cua
ñihi ndo jahma ndo. Tyin nu Nyoo
nyaá yahvi ca ñayivi tsa iyó yo tan
ñavin ca tsa catsi yo. Tan nyaá yahvi
ca cuñu ñuhu yo tan ñavin ca jahma
yo. Tyin maa ra tsahá ra ñayivi iyó
yo. Tan ña yii cuhva ra inga tsa tsiñi
ñuhu tsi yo. 26 Nyehhe ndo cuhva iyó
saa. Ña tatsí ti itu. Tan ña jahá tyiñu
ti. Tan ndi ña tyihí vaha ti tsa catsi ti.
Maa tyin tsatsí ti tyin Jutu yo Nyoo
ra nyaá gloria tsahá ra tsa catsi ti
naha ti. Tan nuu Nyoo cahnu ca cuví
nyooho tan ñavin ca saa can naha ti.
27 Tan vasu ndi maa tsicá xaan iñi
ndo maa tyin ña cua cuvi jandusucun
ca ndo ndi luxu ca tsi ndo.

28 'Tan tatun ndi luxu can ña cuví
tsi ndo, ¿nácaa tsa tsicá xaan iñi ndo
tsa cuenda jahma ndo? Nyehhe ndo
nácaa iyó yutun ita tsitsi cuhu, tyin
ña jahá tyiñu tun tan ndi ña tavi tun
yuhva. 29 Maa tyin catyí yu tsihin
ndo tyin ndi ra cuví rey Salomón
tsihin tandíhi tsa cuca ra, tan ña
tsinditsi ra jahma sii ca caá tan ñavin
ca tsa jacunditsí Nyoo tsi yutun ita
can. 30 Tatun tacan ñi jacunditsí
Nyoo tsi yutun ita tsa iyó tsitsi cuhu
vityin, tan tyaan cua cuví tun nducu
tan cayu tun. ¿A ña cua jatinyee

cua ca ra tsi ndo? Tyin nyooho
cahnu ca cuví ndo nuu ra tan ñavin
ca yutun ita can. Maa tyin maa ndo
ña tsinú vaha iñi ndo tsi ra. 31 Yacan
cuenda ña cua caca xaan iñi yo tan
catyí yo: “¿Náa cua catsi yo, o náa
cua coho yo, o nácaa cua ñihi yo
jahma cunditsi yo?” 32 Tyin nyivi tsa
ña tsitó tsi Nyoo tsicá xaan iñi ñi
yacan. Maa tyin nyooho ña caca iñi
ndo yacan tyin iyó Jutu yo Nyoo, ra
nyaá gloria. Tan tsitó ra náa ndíhi tsa
tsiñi ñuhu tsi ndo. 33 Yacan cuenda,
caca iñi ndo maa ñi maa tuhun Nyoo.
Tan nanducu jihna ndo nácaa
nacuhva cuenda ndo tsi ndo tsi ra na
cundaca ñaha ra tsi ndo, tan na coo
tsa vaha ra tsi ndo. Tyin tacan tan
cua ñihi ndo tandíhi tsa tsiñi ñuhu tsi
ndo. 34 Jahá cuenda Nyoo tsi ndo
vityin tan ityaan. Yacan ña caca iñi
ndo tsa tsiñi ñuhu tsi ndo ityaan.
Caca iñi ndo tan nyehhe ndo nácaa
yahá ndo quivi vityin jahá Nyoo.

Ña cahan yo tsa caá inga nyivi

(Lc. 6:37-38, 41-42)

7 ¹ Ña cahan ndo tsa caá inga
nyivi, tacan tan Nyoo ña cua
cahan ra tsa caá ndo. ² Tyin tumaa
caahán ndo tsa caá inga nyivi, tacan
cua javaha Nyoo tsihin ndo. Tan
tumaa tsa javahá ndo tsihin inga
nyivi, juvin ñi tacan cua javaha Nyoo
tsihin ndo. ³ ¿Nacaa tyin nyehé un
tsahan luhlu tsa nyii tinuu yañi un,
tan ña jahá un cuenda yutun cahnu
tsa nyii tinuu maa un? ⁴ Tatun tinuu
maa un nyii iin yutun cahnu, ¿nácaa
cuví catyi un tsihin ra yañi un:
“Ñaha, na tava yu tsahan luhlu tsa
nyii tinuu un”? ⁵ ¿Yooho tsa jahá tyin
vaha xaan un! Tava jihna yutun
cahnu tsa nyii tinuu un. Tyin tacan
tan cuví nyehhe vaha un tsahan luhlu
tsa cua tava un tinuu yañi un.

⁶ 'Ña jañihi ndo cahan ndo tuhun
Nyoo tsihin nyivi ña cuñi coto tyin
coto cañi ñi tsi ndo. Tyin cuví ñi

tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo

(Lc. 11:9-13; 6:31)

7 'Ndacan ndo tsa tsiñi ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. 8 Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

9 'Tacan tucu nyooho tsihin sehe ndo. Tshahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? 10 O tatun tsicán tsi tyaca, ¿a cua cuhva ndo iin coo itsi? 11 Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

12 'Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsahá Nyoo tsi ra Moisés tan tacan tucu nyaá nu tandihi libru tsa tyaq ra cuvi ndusu yuhu Nyoo tahañ tsanaha.

Yuvehe tihin tan ityi cuiñi tsa cuahán nu nyaá Nyoo

(Lc. 13:24)

13 'Nducu ndo cuhva quiñvi ndo yuvehe tihin. Tyin quiñhin yuvehe, tan quiñhin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can. 14 Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

Tsihin tsa javahá nyivi, tan nacotó yo tatun nyivi vaha, a nyivi ña vaha cuvi ñi

(Lc. 6:43-44)

15 'Jaha ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuvi ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuvi ra naha. Maa tyin tumaa quiñi xaan cuvi ra naha. 16 Nyooho cuvi nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuvi ra naha. Tyin iin tinyata ña cua cuhva tun mangu, tan ndi iñu nduhva ña cuvi cuhva tsi yucu vixi. 17 Tan tacan tucu tandihi yutun vaha. Tshahá tun tsiti vaha. Tan tandihi yutun ña vaha, tsahá tun tsiti ña vaha. 18 Tyin yutun vaha, ña cuvi cuhva tun tsiti ña vaha. Tan ndi yutun ña vaha ña cuvi cuhva tun tsiti vaha. 19 Tan tandihi yutun tsa ña tsahá tsiti vaha, cahnya yo tsi tun. Tan cayu tun. 20 Tan tacan tsihin tsa javahá nyivi, cuvi nacoto ndo tsi ñi tatun nyivi vaha o nyivi ña vaha cuvi ñi.

Nu catyí ra Jesús tyin ña tandihi nyivi tan cua quiñvi ñi nu ndacá ñaha Nyoo

(Lc. 13:25-27)

21 'Ña tandihi nyivi tsa catyí tsihin yu: "Jutu Mañi yu, Jutu Mañi yu", cua quiñvi ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juvin ñi can cua quiñvi nu ndacá ñaha ra. 22 Quiñvi tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: "Jutu Mañi yu, nyuhu cahan ndi tuhun cun tsihin nyivi. Tan tsihin sivi un tavañ ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sivi un", cua catyí ñi tsihin yu. 23 Tacan tan yuhu cua catyí yu tsihin ñi: "Ña nacotó yu tsi nyooho. Çatsiyo nyaha ndo nu nyaá yu tandihi

nyooho tsa javahá maa maa ñi tsa ña vaha”, cua catyi yu tsihin ñi.

Nu caahán ra Jesús nácaa cua cacu nyivi tsa tyaá yahvi tuhun caahán ra, tan nyivi tsa ña tyaá yahvi tsa caahán ra, ña cua cacu ñi

(Lc. 6:47-49; Mr. 1:22)

24 Tacan catyí yu tsihin ndo, tyin nyivi tsa tsiñí tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava.

25 Tan quitsahá cuún ñihi savi. Tan cuaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. 26 Maa tyin nyivi tsa tsiñí tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyiti. 27 Tan quitsahá cuún ñihi savi. Tan cuaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduvá tsi tan cunaá tsi —catyí ra Jesús tsihin ñi tsa nyicún tsi ra.

28 Cuhva tsa ndihí cahán ra Jesús tsihin ñi, iyo xaan cuñi ñi tsihin tsa caahán ra, 29 tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

Nu janduvahá ra Jesús tsi iin ra ndohó cuehe tyaahyú

(Mr. 1:40-45; Lc. 5:12-16)

8 Cuhva tsa nuu ra Jesús yucu can, cuaha xaan nyivi nyicún tsi ra. 2 Tan tsaá iin ra ndohó cuehe tyaahyú, tan tsi cuiñi tsi ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

3 Tacan tan tyiso ndaha ra Jesús jiñi ra cuuhví can, tan catyí ra tsihin ra: —Cuñi yu janduvaha yu tsi un.

Cua nduvaha un vityin —catyí ra.

Tan iin yaha ñi nduvahá ra.

4 Tacan tan catyí ra Jesús tsihin ra:

—Jihna, coto ñahñi catyi tuhun un tsihin nyivi. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuví tsi iin tsa ndaa tsi ra jutu can tan tsi nyivi tyin tsa nduvahá un.

Nu janduvahá ra Jesús tsi musu iin ra cuví capitán

(Lc. 7:1-10)

5 Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyí ra Jesús tan caahán ndaahvi ra tsihin ra, 6 tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxii ra, tan yaha xaan cuhva cuñi ra.

7 Tan catyí ra Jesús tsihin ra:

—Cuhun maa yu tan kujanduvaha yu tsi ra —catyí ra tsihin ra.

8 Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahán ñi un tan musu yu cua nduvaha ra. 9 Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

10 Tan tsa tsiñi ra Jesús tsa cahán ra can, tan iyo xaan cuñi ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. 11 Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyiso

ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. **12** Tan nyivi tsa taahán tsi cahun gloriá, ña cua cahun ñi, tyin cua cahun ñi nu naa. Tan cua vacu tsa ñi tan catsan ña cua cuvi nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyivi nyicún tsi ra.

13 Tacan tan catyí ra tsihin ra capitán can:

—Cuaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvahá musu ra.

Nu janduvahá ra Jesús tsi tyiso ra Pedro

(Mr. 1:29-31; Lc. 4:38-39)

14 Tsa yahá can, tan cuahán ra Jesús yuvehe ra Pedro. Tan nyehe ra tsi ña tyiso ra, canyí ña nu tsito tyin yihí cahñi tsi ña. **15** Tan tññ ra ndaha ña, tan iin yaha ñi quitá cahñi tsi ña. Tan nduvitá ña, tan quitsahá nanducú ña tsa catsi ra naha.

Nu cuaha xaan nyivi cuuhví janduvahá ra Jesús

(Mr. 1:32-34; Lc. 4:40-41)

16 Tan tsa cunaaha, cuaha xaan nyivi yihí tatyí ña vaha tsindacá nyivi tsi ra Jesús. Tan tsihin intuhun ñi tuhun cahñ ra Jesús tan quitá tatyí ña vaha tsi ñi. Tan tandihí ñi cuuhví iin yaha ñi nduvahá ñi. **17** Tacan cuvi tyin tacan tan cundaá tsa cahñ Jutu Mañi yo tsihin yuhu ra Isaías, ra cuvi ndusu yuhu ra tahñ tsanaha. Tan catyí ra tyehen: “Maa ra quihñ ra cuehe tsa yihí tsi yo, tan quihñ nyaa ra tsa uhvi tsi yo.”

Nyivi tsa cuñi quihvi cuenda ra Jesús

(Lc. 9:57-62)

18 Tan tsa nyehe ra Jesús tyin cuaha xaan nyivi tsinú nduvi nu nyii

ra, catyí ra tsihin ra tsicá tsihin ra tyin cua yaha ra naha inga tsiyo miñi. **19** Tacan tan tsaá iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunyicun yu tsi un tandihí ñi ityi nu cuahán un

—catyí ra.

20 Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayi tsa quee nda gloria, nduve nu maa cunyanaa luxu jiñi yu iyó —catyí ra.

21 Inga ra tsa tsicá tsihin ra nacahñ ra tsihin ra:

—Taa, cuhva na cahun jihna yu cucutsi yu tsi jutu yu, —catyí ra.

22 Tan catyí ra Jesús tsihin ra:

—Ñaha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi —catyí ra.

Nu jacutaxín ra Jesús tatyí xaan nu miñi

(Mr. 4:35-41; Lc. 8:22-25)

23 Tacan tan quihví ra tsitsi yutun ndoo tan ra tsicá tsihin ra cuahán ra naha tsihin ra. **24** Tan ñihi xaan quitsahá yihí tatyí nu miñi can, tan cuaha xaan ndutya quihví tsitsi yutun ndoo ra naha. Maa tyin ra Jesús quixí ra. **25** Tan ra tsicá tsihin ra jandoto ra naha tsi ra, tan catyí ra naha:

—¡Jutu Mañi yu, jacacu tsi yo, tyin cuñi cunaa yo!

26 Tan catyí ra Jesús tsihin ra naha:

—¿Nacuenda yuuhví xaan ndo? ¡Nyooho tsa luxu xaan tsinú iñi tsi yu! —catyí ra Jesús.

Tacan tan nduvitá ra tan cahñ ra tsihin tatyí tan tsihin ndutya, tan cutaxín tsi. **27** Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

Nu nduvahá uvi ra ñuu Gadara ra yihí tatyí ña vaha naha ra

(Mr. 5:1-20; Lc. 8:26-39)

28 Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can. 29 Tan caná tsaá ra naha, tan catyí ra naha:

—¿Náa cuñi un tsihin ndi, yooho Jesús Sehe Nyoo? ¿A vatsi un vatsi janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

30 Tan yatyin ñi can yucú cuaha quini tsatsi ti naha ti. 31 Tan catyí nu tatyí ña vaha can tsihin ra Jesús:

—Tatun cua tava un tsi ndi, cūhva tsa quihvi ndi tsitsi quini can naha ti —catyí nu tatyí ña vaha can nahnu.

32 —Vaha. Quihvi ndo —catyí ra Jesús.

Tan quitá nu tatyí ña vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

33 Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihi tsa cuví tsi ra tsa yihí tatyí ña vaha can naha ra. 34 Tacan tan tandihi nyivi ñuu can, tsahan ñi tsinyehé ñi tsi ra Jesús, tan cahán ndaahvi ñi tsihin ra na quita ra ñuu can.

Nu janduvahá ra Jesús tsi iin ra xii

(Mr. 2:1-12; Lc. 5:17-26)

9¹ Tacan tan quihvi ra Jesús tsitsi iin yutun ndoo tan yahá ra miñi, tan tsaá ra nda ñuu nu iyó ra. 2 Nu nyii ra ican, tsindaca nyivi tsi iin ra cuuhví tsa ña cuví nacanda tyin nduxij ra, tan canyíi ra nu tsito. Tan tsa nyehé ra Jesús tyin tsinú xaan iñi ñi tsi ra, quitsaha caahán ra tsihin ra

cuuhví can:

—Jandu iin iñi un, sehe yu, tyin tsa tsioco tucahnu iñi cuatyí un —catyí ra Jesús tsihin ra.

3 Tacan tan quitsahá tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsioco cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

4 Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha? 5 Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan çaça un”? 6 Vityin cua janaha yu tsi ndo tyin yuhu Rayii tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan cuanuhu nda yuvehe un —catyí ra.

7 Tacan tan nduvitá ra tan cuanuhu ra nda yuvehe ra. 8 Tan nyivi tsa nyehé tsa cuví, nayuhvi xaan ñi. Tan quitsahá jacahnú ñi tsi Nyoo tyin tsahá ra tunyee iñi tsi nyivi.

Nu caná ra Jesús tsi ra Mateo

(Mr. 2:13-17; Lc. 5:27-32)

9 Yaha can tan quitá ra Jesús ican. Tan nyehé ra tsi iin ra tsa nañi Mateo, nyaá ra naquihín ra xuhun tsa tyahvi nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvitá ra Mateo tan cuahán ra tsihin ra Jesús.

10 Tacan tan cuví tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaá, tan tsihin inga ca ra iyó cuatyí

naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra. **11** Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

12 Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi. **13** Cuaahan ndo tan cūtuhva ndo cuhva catyí nu tutu Nyoo, nu catyí tan tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatinyee yu tsi nyivi tsa tsicá iñi tyin vaha ñi, vatsí yu jatinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyivi tsi ra Jesús tatun taahán tsi tsa coo nyitya ñi

(Mr. 2:18-20; Lc. 5:33-35)

14 Tacan tan ra nyicún tsi ra Juan, ra jacoondutya tsi nyivi, natuhva ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

15 Tan nacahan ra Jesús tan catyí ra:

—¿A cuví cunyeu cuihya nyivi yucú vico tindaha tun nyí ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsa tsa jacuahá ra tsi ñi

(Mr. 2:21-22; Lc. 5:36-39)

16 Ña tuhvá nyivi naquicú iin jahma tuuhu tsihin iin jahma tsa, tyin cua nandiyi nu naquicú ñi tsihin tsa tsa can, tan cua tyahnya tsi inga tsaha. **17** Tan tacan tucu, ña cuví tyihí nyivi vinu tsa tsitsi ñi tsaahnu tyin tatun tacan javaha ñi, cua tyahnya ñi can, tan cua tiví vinu can tan cua tiví ndihí tucu ñi can. Yacan cuenda taahán tsi tyihí yo vinu tsa tsitsi ñi tsa. Tyin tacan tan ña tyahnya ñi can tan ndi vinu can ña tiví tsi.

Nu nduvahá ñaha sehe ra Jairo tan ñaha tsa tñin jahma ra Jesús

(Mr. 5:21-43; Lc. 8:40-56)

18 Tsitsi tsa caahán ra Jesús tuhun ihya, tsaq iin ra cumí tyiñu cuenda vehe ñuhu nyivi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

19 Nduvita ra Jesús tsihin ra tsicá tsihin ra tan cuahán ra naha tsihin ra.

20 Tacan tan iin ñaha cuuhví natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún ñiñi ña. Tan tyanaa ña ndaha ña jahma ra, **21** tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

22 Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduní iñi un, xihi, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuún ñiñi ña.

23 Yaha can tan tsaq ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi

ra naha tsi ndiyi can. Tan nyivi tsa yucú can iyo xaan tsacú ñi. **24** Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahān ra tacan quitsahā tsacú naaha ñi. **25** Tan ra Jesús tavā ra tsi ñi ityi tsata vehe. Tacan tan quihvi ra tsitsi vehe nu canyí ñaha can, tan tiñ ra ndaha ñaha luhlu can, tan nduvita ña. **26** Tan tandihi nyivi iyó ityi ñuu can tsito ñi tsa nandoto ñaha luhlu can.

Nu janduvahā ra Jesús tsi uvi taahan ra cuaa

27 Tsa quitā ra Jesús ican, tan uvi taahan ra cuaa nycún tsi ra, caná tsa ra naha tan catyí ra naha:

—¡Cundahvi iñi tsi ndi, yooho ra cuví tata ra David! —catyí ra naha.

28 Tan tsa yahā quihvi ra Jesús tsitsi vehe, ra cuaa can, natuhvā ra naha nu nyaá ra, tan maa ra Jesús quitsahā tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahān ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

29 Tacan tan tyanaā ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

30 Tan nduvahā tinuu ra naha. Tan catyí ra Jesús tsihin ra naha:

—Coto ñahñi catyi tuhun ndo tsihin ndi intuhun nyivi.

31 Maa tyin cuahān ra naha tan quitsahā catyí tuhun ra naha tsa javahā ra Jesús tsihin ra naha tsihin tandihi nyivi iyó ityi ñuu can.

Nu janduvahā ra Jesús tsi iin ra ñiñhí

32 Tsa cuahān ra naha, juhva nyivi tsindacā ñi tsi iin ra ñiñhí tsa yihí

tatyí ña vaha nu nyí ra Jesús. **33** Tan tsa tavā ra Jesús tatyí ña vaha can, tacan tan nacahān ra can. Tan iyo xaan cuñi nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tavá tatyí ña vaha tsi nyivi —catyí ñi.

34 Maa tyin ra cuví fariseo naha ra, catyí ra naha:

—Ra ihya tavá ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

Nu caahán ra Jesús tyin ña cuaha maa nyivi jahá tyiñu cuenda Nyoo iyó

35 Ra Jesús tsahān ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi. **36** Tan tsa nyehé ra tsi nyivi, cundaahvi xaan iñi ra nyehe ra tsi ñi, tyin nyehé ñi tundoho tan iyó ñi tucuihya iñi, tumaa mbee ticatyí tsa nduve tsitoho iyó.

37 Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha. **38** Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

Nu nacatsi ra Jesús tsa utsi uvi ra cuaca tyiñu ra

(Mr. 3:13-19; Lc. 6:12-16)

10 **1** Tacan tan canā ra Jesús tsi tsa utsi uvi ra tsicá tsihin ra tan tsahā ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhvi náa ndiñi ca nu cuehe tan tsa uhvi.

2 Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; **3** tan ra Felipe; ra Bartolomé; ra Tomás; tan

ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo; ⁴ tan ra Simón ra nyíi cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo

(Mr. 6:7-13; Lc. 9:1-6)

⁵ Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cūhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria. ⁶ Cuaahan ndo nu yucú mbee tsa tsinaa tsa cuví nyivi Israel. ⁷ Cuaahan ndo cua cahan ndo tyin tsa tsaa quivi tsa cua cundaca ñaha Nyoo tsi nyivi. ⁸ Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

⁹ Ña cūiso ndo xuhun; ndi xuhun cuaan, ndi xuhun cuitsin, ndi xuhun cuaaha. ¹⁰ Tan ña cūiso ndo ndi yunu tsa cuenda tsa caca ityi ndo. Intuhun ñi camisa tsa nditsín ndo cuhun tsihin ndo. Tan ña cūiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹ Tatun tsaa ndo iin ñuu cahnu o iin ñuu luhlu, nducu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can. ¹² Tatun cua quihvi ndo iin vehe, cūhva ndo nacumi tsi nyivi iyó yuvehe can. Tan catyi ndo tsihin ñi: “Na coo tsa vaha Nyoo añima ndo”. ¹³ Tan tatun nyivi iyó yuvehe can tan nacotó ñi tyin

tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can. ¹⁴ Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi. ¹⁵ Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyí tuhun tsi náa ndihi tundoho cua nyehe nyivi tsicá tyiñu Nyoo

¹⁶ ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti. ¹⁷ Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. ¹⁸ Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. ¹⁹ Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsaa cuhva tsa cua cahan ndo, Nyoo cua cuhva ra tuhun cahan ndo. ²⁰ Tyin ñavin maa ndo cua cahan, tyin maa Tatyí Ii Jutu yo Nyoo tsa iyó añima ndo cua cuhva ra tsa cahan ndo.

²¹ Yihí rayi cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi. ²² Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun

ña jandihí ndo tsa tsinú íñi ndo tsi yu, tacan tan cua cacu ndo. **23** Tatun nyaa ndaha ñi tsi ndo iin ñuu, cūhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cūhun ndo tandihí ñuu nu iyó nyivi Israel tan cua quitsi nyico yuhu, Rayii tsa quee nda gloria.

24 'Tin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra. **25** Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

¿Yóo tsii taahán tsi nayuhvi yo, a tsii nyivi o tsii Nyoo?

(Lc. 12:2-7)

26 'Yacan cuenda ña nayuhvi ndo tsi nyivi, tyin nduve tsa nyíi xeehe tsa ña cua quituvi. Tan nduve tsa xeehe tsa ña cua coto nyivi. **27** Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe cāna tsaa ndo can, na coto tandihí nyivi. **28** Ña nayuhvi ndo tsi nyivi tsahñi cuñu ñuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan añima ndo tsitsi anyaya.

29 'Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cūhva maa Nyoo Jutu yo. **30** Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahvi ra intuhun intuhun tsi. **31** Yacan cuenda ña nayuhvi ndo. Nyoooho, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyivi

(Lc. 12:8-9)

32 'Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi. **33** Maa tyin nyivi cua tyihi xeehe tsi yu nuu inga nyivi, tacan tucu yuhu cua tyihi xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cañi tahan nyivi tsihin tahan ñi

(Lc. 12:51-53; 14:26-27)

34 'Ña cuñi ndo tyin yuhu vatsí cūhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. **35** Tyin yihi ñi cua tsinu íñi ñi tsi yu, maa tyin inga ñi ña cua tsinu íñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña. **36** Tan yacan cuenda juvin ñi maa nyivi vehe ndo cua cuxaan íñi tsi ndo.

37 'Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yí ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu. **38** Tan nyivi tsa ña cuñi nyehe tundoho tan ndi ña cuñi ñi cūhva ñi ñayivi iyó ñi tsa cuenda yu, ña taahán tsi cuví ñi nyivi cuenda yu. **39** Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cūhva ñayivi iyó ñi tsa cuenda yu, cua ñihi ñi ñayivi nyito coo ñi.

Nu caahán ra Jesús nácaa cua ñihi yo tsa vaha Nyoo

(Mr. 9:41)

40 'Nyivi tsa naquihín cuenda tsi nyoooho, tsi yuhu naquihín cuenda ñi,

tan ñi naquihín cuenda tsi yuhu, quihín cuenda ñi tsi ra tsa jaquitsi tsi yu. **41** Nyivi naquihín cuenda tsi iin ra cuví ndusu yuhu Nyoo tyin Nyoo jaquitsi tsi ra, cua ñihi ndihi ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi. **42** Tan yóo nyivi tsa kuhva intuhun vasu ndutya vitsin coho nyivi tsa nyicún tsi yu, cua ñihi ndihi ñi tsa cua kuhva Nyoo tsi ñi tsa nyicún tsi yu —catyí ra Jesús.

Nu jacuhun ra Juan tsi ra tsicá tsihin ra nu nyí ra Jesús

(Lc. 7:18-35)

11 ¹ Tsa ndihi cahan ra Jesús tsihin tsa utsi uvi ra tsicá tsihin ra, tacan tan quitá ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

² Tan ra Juan nyí ra vehe caa quivi can, tan ñihi tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyí ra. ³ Tan catyí ra naha tsihin ra:

—¿A juvin yooho cuví ra Cristo tsa nyaá tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

⁴ Nacahan ra Jesús tan catyí ra:

—Cuaahan ndo tan catyi tuhun ndo tsihin ra Juan tandihi tsa nyehé ndo, tan tsa tsini ndo. ⁵ Tan catyi ndo tsihin ra: nyivi cuaa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacuñi ñi, tan nandotó nyivi tsa tsa tsihi, tan nyivi ndaahvi tsini ñi tuhun Nyoo nácaa cua cacu ñi.

⁶ Tan catyi ndo tsihin ra tyin sii xaan cua cuví tsi nyivi tsa nyicún tsi

yu tun ña ndu uvi ñi ñi —catyí ra Jesús tsihin ra naha.

⁷ Tsa cuahán ra naha, tan quitsaha caahán ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvá tatyí? ⁸ ¿O náa cuví tsa tsinyehé ndo? ¿A iin ra nditsi jahma vaha cua nyehe ndo? Ñavin. Tyin tsitó ndo tyin ra nditsi jahma vaha, iyó ra vehe ra cuví rey. ⁹ ¿A ña tsahan ndo tsinyehé ndo tsi iin ra cuví ndusu yuhu Nyoo? Juvin. Tyin ra ican cahnu ca cuví ra tan ñavin ca tandihi ra cuví ndusu yuhu Nyoo. ¹⁰ Juvin ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cahun yu.

Tyin natyiso vaha ra ityi nu cua cahun un.

¹¹ Tsa nditsa catyí yu tsihin ndo, tyin tsitsi tsa tandihi nyivi tsa tsicoo tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo ñaha, vasu ra lihli ñi cuví ra, cahnu ca ra cuví ra tan ñavin ca ra Juan.

¹² Nda cuanda quivi tsa tsaá ra Juan tan nda vityin, nyivi ñihi ñi, nducú xaan ñi kuhva ñihi ñi tsa cundaca ñaha Nyoo tsi ñi. ¹³ Ra Moisés cahan ra tuhun nácaa cua cundaca ñaha Nyoo tsi nyivi, tan tacan tucu tandihi ra cuví ndusu yuhu Nyoo. Tacan tan quitsi ra Juan jacotó ra tsi nyivi tyin tsa tsaá quivi tsa cua cundaca ñaha Nyoo. ¹⁴ Tan ra Juan cuví ra Elías ra tsa nyaá tsa cua quitsi, tun nyooho tan cuñi ndo tsinu ñi ndo tsa caahán yu.

¹⁵ Nyooho tsa iyó soho, tyaa soho ndo tsa caahán yu.

16 '¿Náa tsihin jandu inducu yu tsi nyooho, nyivi tsa iyó quivi ihya?

Tumaa ra nyihi cuví nyooho. Tyin ra nyihi jasiqui nuyahvi. Caná tsa tahan ra naha tan catyí ra naha:

17 “Tiví ndi tiyoo tan ña tsañi ndo yaa. Tan tsita ndi yaa cuiihya, tan ña tsacu ndo”, catyí ra nyihi. Tan tacan cuví nyooho tyin ndi intuhun cuhva ña taahán iñi ndo. 18 Tyin ra Juan, ra jacoondutyá, quitsi ra tan ña tsatsi vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra. 19 Yahá can tan tsaá tucu yuhu Rayi tsa quee nda gloria. Tan tsatsí yu tan tsihí yu. Tan catyí ndo tyin tsatsí xaan yu tan tsihí xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahán ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

Nyivi ña cuñi naquihin cuenda tuhun caahán ra Jesús cua nyehe ñi tundoho
(Lc. 10:13-15)

20 Tacan tan quitsahá caahán ra Jesús tsihin nyivi tandihi ñuu nu javahá ra cuaha tsa iyo, tyin ña nasamá ñi cuhva iyó ñi, tan catyí ra:

21 —iNdahvi nyooho, nyivi ñuu Corazin! iNdahvi nyooho nyivi ñuu Betsaida! Tyin nyehé ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuiihya iñi tan cua coso ñi nyaa nuu ñi: tyin ndu uvi iñi ñi cuatyí ñi. 22 Maa tyin catyí yu tsihin ndo tyin ñihi ca cua tatsi tuñi Nyoo

tsi ndo tan ñavin ca ñi ñuu Tiro tan ñi ñuu Sidón. 23 Tan nyooho nyivi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin. 24 Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyooho tan ñavin ca nyivi ñuu Sodoma.

“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo
(Lc. 10:21-22)

25 Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsi un tuhun ihya nuu ra nyihi. 26 Tacan Tyaa, tyin tacan cuñi maa un —catyí ra Jesús.

27 Tacan tan catyí tucu ra tsihin nyivi:

—Jutu yu nacuhvá cuenda ra tandihi tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñi yu tsa nacoto tsi Jutu yu, cua janaha yu tsi ra tsi ñi. 28 Tandihi nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo. 29 Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo. 30 Ña yí tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigu

(Mr. 2:23-28; Lc. 6:1-5)

12 ¹ Iin quivi quitatú nyivi, yaha ra Jesús mahñu nu iyó tsa tatsi nyivi. Tan tsaꝯ soco tsi ra tsicá tsihin ra. Tan quitsaha tuhún ra naha yoco trigu can tan tsatsí ra naha.

² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javaha ra David tsihin ra cutahan tsihin ra quivi tsa tsaꝯ soco tsi ra naha?

⁴ Quihvi ra tsitsi vehe Nyoo, quihin ra paan ii, tan tsatsi ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. ⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can.

⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. ⁷ Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñi ca yu javaha ndo cuví tsa cundaahvi iñi ndo nyehe ndo tsi nyivi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyivi tsa nduve cuatyí. ⁸ Yuhu, Rayii tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

Nu janduvaha ra Jesús tsi iin ra na ityi ndaha

(Mr. 3:1-6; Lc. 6:6-11)

⁹ Tacan tan quitá ra Jesús ican, tan cuahán ra vehe ñuhu. ¹⁰ Tan ican nyii iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyivi cuuhví quivi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quivi quitatú yo, a ña cua cuhun ndo tan tava ndo tsi ti? ¹² Tan ¿a ña nyaá yahvi ca iin nyivi tan ñavin ca mbee? Yacan cuenda taahán tsi javaha yo tsa vaha quivi quitatú yo —catyí ra.

¹³ Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo. ¹⁴ Tacan tan quitá ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tahan tsanaha

¹⁵ Tsa tsito ra Jesús tyin nducú ra naha tsi ra, quitá ra ican. Tan cuaha nyivi tsinyicun tsi ra. Tan maa ra janduvaha ra tsi tandihi ñi cuuhví.

¹⁶ Tan catyí ra tsihin ñi tyin na ña catyí tuhun ñi yóo ra cuví ra.

¹⁷ Tacan cuví tyin tacan cahan ra Isaías, ra cuví ndusu yuhu Nyoo tahan tsanaha. Tan tyehen tyaa ra tuhun Nyoo:

¹⁸ Ra ihya cuví musu yu, ra tsa nacatsi vaha yu.

Cuñi xaan yu tsi ra, tan sii xaan cuñi yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyivi tsa ñavin nyivi Israel cuví, nácaa cua janduvaha yu tsi ñi nuu yu.

19 Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

20 Tan ndi intuhun ndoo yacua, tan ña cua cahnu ndihi ra. Tan ndi ña cua ndahva ndihi ra tiñuhu lihli nu caná luxu yuhma.

Nda cuanda coto tandihi nyivi tyin maa ra cuví ra ndacá ñaha tsi ñi.

21 Tan tandihi nyivi, tan cua cuita iñi ñi tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mr. 3:20-30; Lc. 11:14-23; 12:10)

22 Tacan tan tsindacá nyivi tsi iin ra yihí tatyí ña vaha nu nyíí ra Jesús, cuaa ra tan ñihi ra. Tan ra Jesús janduvahá ra tsi ra. Tacan tan nacahan ra, tan nanyehé ra. 23 Iyo xaan cuñí tandihi nyivi, tan catyí ñi:

—¿A ñavin ra ihya cuví tata ra rey David? —catyí ñi.

24 Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

25 Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihí tyiñu tsa ndacá ñaha ra naha. Tan tatun iin ñuu o tandihi nyivi iin vehe tan cusiin ñi, tacan tan cua tiví nu yucú ñi. 26 Tan tacan tucu tatun nu ña vaha tan tava nu juvin ñi tahan maa nu, cuñí tsi catyí tyin ña iin ñi

cuví nahnu, tan cundihí tunyee iñi tsa iyó tsi nahnu. 27 Tan nyooho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo.

28 Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyí yacan tyin nditsa tyin tsa tsa cuhva ndacá ñaha Nyoo nu yucú ndo.

29 "Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihi tsa iyó tsi ra.

30 "Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyeé tsi yu tsa caahán yu tuhun Nyoo tsihin nyivi, cuñí tsi catyí tyin ña tsahá ñi tsa coto nyivi tuhun caahán yu.

31 "Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi. 32 Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

Tsihin tsa javahá nyivi tan nacoto yo tsi ñi tatun vaha ñi a ña vaha ñi

(Lc. 6:43-45)

33 "Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti

tun. **34** ¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. **35** Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. **36** Tan yuhu catyí yu tsihin ndo tyin quivi cua tatsi tuñi Nyoo tsi tandihi nyivi, cua cuhva cuenda ñi tandihi tuhun tsa ña vaha cahán ñi. **37** Tyin tsa cuenda tsa caahán ndo, tan cua catyí Nyoo tun vaha ndo o ña vaha ndo.

Nyivi ña vaha, tsa iyo ñi cuñí ñi nyehe ñi

(Mr. 8:12; Lc. 11:29-32)

38 Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

39 Tan nacahán ra Jesús tan catyí ra:

—Nyivi ña vaha tan nyivi tsa nycún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahán tsanaha.

40 Tyin tumaa tsinyii ra Jonás tsitsi tyaca cahnu uñi quivi tan uñi tsacuaa, tacan cua cunyii yuhu Rayii tsa quee nda gloria tsitsi ñuhu uñi quivi tan uñi tsacuaa. **41** Tan quivi cua tatsi tuñi Nyoo tsi tandihi nyivi, cua nduvita nyivi tsicoo ñuu Nínive tahán tsanaha tan cua catyí ñi na tatsi tuñi Nyoo tsi nyooho nyivi tsa iyó vityin. Tan cua catyí ñi tyin cua cunaa ndo, tyin maa ñi tsa cuví ñi ñuu Nínive, nasamá ñi cuhva iyó ñi quivi cahán ra Jonás tuhun Nyoo tsihin ñi. Tan ihya nyii ra cahnu ca cuví tan ñavin ca ra Jonás. Tan ña cuñí ndo tyaa soho ndo tsa caahán

yu, **42** Tan tacan tucu ñaha tsa tsindacá ñaha ityi Sur, cua nduvita ña quivi cua cutuñi nyivi tan cua catyí ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahán ra Salomón. Tan vityin cahnu ca ra caahán tsihin ndo tan ñavin ca ra Salomón.

Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo

(Lc. 11:24-26)

43 Tatun iin nu tatyí ña vaha quita nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu:

44 “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndii xaan, tan yoñi iyó, tan sii xaan caá. **45** Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyivi quini iyó —catyí ra Jesús.

Nu tsahá cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñí Nyoo

(Mr. 3:31-35; Lc. 8:19-21)

46 Ndi caahán ca ra Jesús tsihin nyivi, tan tsaa sihi ra tan yañi ra, tan nyecú ñi ityi tsata vehe, tan cuñí ñi cahán ñi tsihin ra. **47** Tacan tan jacoto iin ra tsi ra Jesús, tan catyí ra: —Sihí un tsihin ra yañi un naha ra nyecú ñi tsata vehe. Tan cuñí ñi cahán ñi tsihin un.

48 Tan nacahán ra Jesús tan catyí ra tsihin ra can:

—¿Yóo cuví sihi yu tan yóo cuví

yañi yu? —catyí ra.

49 Tacan tan janahā ndaha ra nu nycéu ra tsicá tsihin ra, tan catyí ra:

—Ra ihya naha ra cuví sihi yu tan yañi yu. 50 Tyin tandihi nyivi tsa javahá cuhva cuñi Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

Nu caahán ra Jesús tyin tumaa iin ra tatsí, tacan cuví ra caahán tuhun Nyoo

(Mr. 4:1-9; Lc. 8:4-8)

13 1 Quivi can quitā ra Jesús vehe nu nyíi ra tan cuahán ra, tsicunyaā ra yuhu miñi. 2 Tan cuaha xaan nyivi ndu iijn nu nyaá ra, yacan cuenda quihvi ra tsitsi iin yutun ndoo tan tsinyaā ra. Tan tandihi nyivi ndoo ñi yuhu ndutya. 3 Tacan tan quitsahā jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitā iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra. 4 Tan cuhva tsa quitā ra tsiti can, cucoyo juhva tsi yuhu ityi. Tan quitsi saa tan tsatsi ti tsiti can. 5 Tan juhva ca tsiti can cucoyo tyañu yuu nu ña cuaha nyahyu yihí. Tan ican canā tsiti can tsa numi ñi tyin ña cuaha nyahyu yihí tyañu yuu can. 6 Maa tyin cuhva tsa canā ñicanyii, numi ñi na ityi tsi, tyin ña cunu yihí yoho tsaha tsi. 7 Juhva ca tsiti can cucoyo tyañu iñu. Tan quivi canā trigu can tsahnū tsi iin caa ñi tsihin iñu can, tan iñu can numi xaan ca tsahnū tsi tan tsahnū tsi trigu can. 8 Maa tyin juhva ca tsiti can cucoyo nu ñuhu vaha. Tan quivi tsahnū tsi, vaha xaan tsahā tsi tsiti. Tyin tsa iin tsiti can, cientu tsiti quitā tsihin tsi. Tan inga tsiti can, uñi xico, tan inga tsi oco utsi tsiti tsahā tsi. 9 ¡Tatun nyaá soho ndo, tyā soho ndo tuhun caahán yu! —catyí ra Jesús.

Nu catyí tuhun ra Jesús nacuenta jacuahá ra tsi nyivi tan ña catyí tuhun catsi ra tsihin ñi

(Mr. 4:10-12; Lc. 8:9-10)

10 Tacan tan natuhva ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenta tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

11 Tan nacahan ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsahā Nyoo tsi nyooho. 12 Tyin tandihi nyivi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñi ñi javaha ñi, cua quihin nya ndihi yu tsa luxu ñi tsa tsitó ñi.

13 Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can. 14 Tyin tacan tan cundaa tsa cahan ra Isaías ra cuví ndusu yuhu Nyoo tahanan tsanaha, tan catyí ra:

Tsa nditsa tyin nyooho tsiñi ndo tuhun yu, maa tyin ña cutuñi iñi ndo.

Cua nyehe ndo tsa javahá yu, tan ña cua cutuñi iñi ndo.

15 Tyin tsa ndundava xaan añima nyivi ihya, tan ña catsi vaha tsiñi ñi. tan ndasí tinuu ñi, na ña cua nyehe ñi tsihin tinuu ñi, tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

16 'Maa tyin siñ xaan cuví tsi

nyooho, tyin nyehé ndo tsihin tinuu ndo, tan tsiñí ndo tsihin soho ndo.

17 Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyívi vaha, cuñí ñi nyehe ñi tsa nyehé nyooho tsa javahá yu, maa tyin ña nyehe ñi. Tan cuñí ñi tyaa soho ñi tandíhi tsa tsiñí nyooho vityin, maa tyin ña tsiñí ñi.

Nu catyí tuhun ra Jesús tsa cuñí tsi catyí cuhva tsa cahān ra tsihin nyívi tsa cuenda ra tatsi can

(Mr. 4:13-20; Lc. 8:11-15)

18 Tyaa soho ndo tsa cuñí tsi catyí cuhva tsa cahān yu tsa cuenda ra tsa tatsí tsiti trigu can: 19 Nyívi tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quítsi nu ña vaha tan quihñ nyaa nu tuhun Nyoo tsa iyó añima ñi. 20 Tan tumaa nu cucoyo tsiti can tyañu yuu, juvin ñi nyívi tsa tsiñí tuhun Nyoo cuví can. Tan sñi xaan naquihñ vaha ñi itsi juhva ñi quívi. 21 Tyin nduve ñuhu cunu ican, yacan cuenda can tsiti can, maa tyin ña cuví cuhun yoho tsi. Tan tacan cuví nyívi can. Juhva ñi quívi tsinú iñi ñi. Maa tyin quívi tsa quítsahá nyehe ñi tundoho, tan caahán ndasi nyívi tsata ñi tsa cuenda tuhun Nyoo, tacan tan jandíhi ñi tsa tsinú iñi ñi. 22 Tan tumaa nu cucoyo tsiti can tsitsi iñu, juvin ñi nyívi tsa tsiñí tuhun Nyoo cuví can. Tsiñí ñi, maa tyin ña cuñí ñi javaha ñi tumaa tsiñí ñi. Tyin tyaa xaan ca iñi ñi tundoho ñayívi tan ñavin ca tuhun Nyoo. Tan nyiyo ca iñi ñi tsa cuca. Tan tandíhi tuhun can jatyañú tsi tsi ñi, tan cuví ñi tumaa yutun tsa ña tsahá tsiti. 23 Tan ñuhu vaha nu cucoyo tsiti can, yacan cuví inga nyívi tsa tsiñí tuhun Nyoo, tan cutuñí iñi ñi, tan javahá ñi tandíhi tuhun caahán ra. Yíhi ñi cuví ñi tumaa tsiti tsa can tan tsahá tsi iin cientu tsiti, tan inga ñi cuví ñi tumaa

tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

Nu caahán ra Jesús nácaa cuahán tuhun trigu tan cuhu ña vaha

24 Tan cahān tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyívi cuví tsi tumaa iin ra tsa tatsí tsiti trigu nu ñuhu ra. 25 Tan cuhva tsa quixí tandíhi ra jahá tyiñu naha ra, quihví iin ra xaan iñi tsi ra jatsii can, tan quití ra tsiti cuhu ña vaha, tan cuahán ra. 26 Tan quívi can tsiti trigu can, tan can yoco tsi, can ndíhi tucu cuhu ña vaha can.

27 Tacan tan ra cuví musu can naha ra, tsahān ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsí ndí, ¿tan nacuenta tyin can cuhu ña vaha can?” catyí ra naha. 28 Tan nacahān ra can tan catyí ra: “Iyó iin ra xaan iñi tsi yu javahá tsehe, tun cuvi.” Tacan tan musu can, catyí ra naha tsihin tsitoho ra: “¿A cuñí un tyin cuhun ndi tan tuhun ndi cuhu ña vaha can?” 29 Tan tsitoho ra naha catyí ra: “Ña tuhun ndo, tyin coto tuhun ndíhi ndo trigu can. 30 Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu.”

Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo

(Mr. 4:30-32; Lc. 13:18-19)

31 Tacan tan cahān ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyívi cuví tsi tumaa iin tsiti mostaza tsa tatsí iin ra nu ñuhu ra. 32 Tyin tsiti

can lihli ñi tsi tan ñavin ca tandihi ca tsiti. Maa tyin quivi tsahnü tsi cuví tsi iin yutun. Tan quitsi saa, tan javahá ti taca ti soco tun —catyí ra Jesús.

Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo

(Lc. 13:20-21)

33 Tan cahán ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

Nu catyi tuhun ra Jesús nacuenda jacuahá ra tsi nyivi tsihin cuhva

(Mr. 4:33-34)

34 Tandihí tuhun can cahán ra Jesús tsihin nyivi tsihin cuhva. Tan tandihí tsa cahán ra tsihin ñi ña cahán catsi maa ra, maa ñi maa tsihin cuhva cahán ra. **35** Tacan cuví tyin tacan tan cundaa tsa cahán Jutu Mañi yo tsihin yuhu ra cuví ndusu yuhu ra tahán tsanaha tan tyaa ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javahá Nyoo ñuhu ñayivi.

Nu caahán ra Jesús náa cuñí tsi catyí cuhu ña vaha tsa caná tsihin tsiti trigu can

36 Tacan tan jacunuhü ra Jesús tsi nyivi, tan quihvi ra tsitsi vehe nu nyíi ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyí tuhun tsihin ndi náa cuñí tsi catyí tsa cahán un tsihin nyivi tsa cuenda cuhu ña vaha tan trigu can.

37 Tacan tan quitsaha catyí ra Jesús tsihin ra naha:

—Ra tsa tatsi tsiti trigu can cuví

yuhu Rayii tsa quee nda gloria.

38 Tan ñuhu can cuví nyivi iyó nu ñuhu ñayivi. Tan tsiti trigu can cuví nyivi tsa ndacá ñaha Nyoo. Tan cuhu ña vaha can cuví nyivi tsa nyicún tsi nu ña vaha. **39** Tan nu tsa tatsi cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñí tsi catyí quivi cua cundihi ñuhu ñayivi. Tan ra tsa cua naquihin tsiti can, cuví ra ángel naha ra.

40 Tumaa jataca ra naha cuhu ña vaha can tyin cayu tsi, tacan cua cuví quivi cua cundihi ñayivi. **41** Yuhu Rayii tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí. **42** Tan cua tyihi ra naha tsi ñi tsitsi ono nu cayú ñuhu. Tan ican cua vacu tsa ñi tan cahyu ña cua cuví nuhu ñi. **43** Nyooho tan nyivi javahá cuhva cuñí Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

Xuhun cuaan tsa yihí xeehe

44 Tsa ndacá ñaha Nyoo tsi nyivi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaha, tan sii xaan cuñí ra cuanuhu ra tan xico ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

Iin cuhva tsa cahán ra Jesús cuenda iin yuu xiñu tsa yahvi xaan nyaá

45 Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra, **46** tan tsa ñihí ra iin tsa yahvi xaan nyaá, xico ra tandihí maa tsa cumí ra, tan jata ra yuu xiñu vaha can.

Nu caahán ra Jesús iin cuhva cuenda traya

47 Tan juvin ñi cuví tucu tsa ndacá ñaha Nyoo tsi nyívi tumaa iin traya tsa cañí ra naha nu ndutya ñuhu, tan ñihí ra naha tandíhi nuu tyaca. 48 Tan tsa tsitü traya can tsihin tyaca, tavá ra naha traya can nu ityi. Tan ican nacatsí ra naha tsi ti, naquihín vaha ra naha quiti vaha tsitsi iin tyaca, tan javitá ra naha quiti ña vaha can. 49 Tan tacan cua cuvi quívi naa ñayívi, cua quitsi ángel, quitsi tava sñn ra naha tsi nyívi vaha tan nyívi ña vaha. 50 Tan cua tyihi ra naha tsi nyívi ña vaha can anyaya nu cayú ñuhü, nu cua vacu tsa ñi tan cahyu ña cua cuvi nuhu ñi.

Nu caahán ra Jesús tyin vaha tuhun tsahnu Nyoo tan tuhun tsa Nyoo

51 Tacan tan ra Jesús tsicá tuhun ra tsi ra tsicá tsihin ra, tan catyí ra tsihin ra naha:

—¿A cutuñi ñi ndo tandíhi tsa cahán yu?

Tan nacahán ra naha tan catyí ra naha:

—Cutuñi ñi ndi, Jutu Mañi yu.

52 Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndíhi ra nácaa ndacá ñaha Nyoo tsihin tandíhi tuhun tsa tsa caahán yu, cua cuvi ra tumaa iin ra jatsii vehe tan cua jacuaha ra nduvi taahan tuhun vaha can tsi nyívi —catyí ra Jesús.

Nu tsinuhü ra Jesús ñuu Nazaret nu tsahnü ra

(Mr. 6:1-6; Lc. 4:16-30)

53 Tsa ndíhi cahán ra Jesús cuhva ihya tan quita ra cuahán ra. 54 Tan tsaá nyico ra ñuu ra. Tan quitsaha jacuaha ra tsitsi vehe ñuhu ñuu can. Tan iyo cuñi nyívi tan catyí ñi:

—¿Nu maa tahan cutuhvá ra ihya

tsa tsitó xaan ra? ¿Tan nácaa cuví javaha ra tsa iyo? 55 Tyin sehe ra tahví yutun can cuví tsi ra. Tan ña María cuví síhi ra. Tan yañi ra cuví tsi ra Jacobo, ra José, ra Simón tan ra Judas. 56 Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhvá ra tandíhi tsa tsitó ra? —catyí ñi.

57 Tan yacan cuenda ña cuñi ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandíhi nyívi tandíhi ñi ityi jahá ñi tsa ñayívi tsi ra ndusu yuhu Nyoo, maa tyin nyívi ñuu ra ña tyaá yahvi ñi tsi ra tan ndi nyívi vehe ra —catyí ra Jesús.

58 Tan ña cuaha tsa iyo javaha ra ñuu ra tsa cuenda tyin ña tsinú ñi ñi tsi ra.

Nu catyí tsi nácaa tsihi ra Juan, ra jacoondutyá tsi nyívi

(Mr. 6:14-29; Lc. 9:7-9)

14 1 Quívi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús. 2 Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin nandoto nyico ra. Yacan cuenda iyó tunyee ñi tsi ra tsa javahá ra tsa iyo.

3-4 Tacan catyí ra tyin juvin ñi maa ra tavá tyiñu tyin tñn ra naha tsi ra Juan. Tan cuhñi ra naha tsi ra tsihin cadena, tan tyihi ra naha tsi ra vehe caa. Tacan javahá ra Herodes tyin xaan cuñi ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasíhi ra Felipe, yañi ra.

5 Yacan cuenda ra Herodes cuñi ra cahñi ra tsi ra Juan, maa tyin yuuhví ra tsi nyívi, tyin tandíhi ñi tsinú ñi ñi tyin ra Juan, ndusu yuhu Nyoo cuví ra. 6 Tan iin quívi iyó vico ra Herodes, tan sehe ña Herodías

quitsahā tsañí ña yaa nu yucú ñi vico can. Tan tahañ xaan iñi ra Herodes.

7 Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

8 Tacan tan natyuhū sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyivi, tsi yu nu iin coho —catyí ña.

9 Tsa tsiñi ra rey Herodes tsa cahan ña, nducuihya cuñi ra. Maa tyin tsa cuenda tsa cahan ra tyin tandihi tsa cua ndacan ña tan cua cuhva ra, yacan cuenda ña cuvi jandavi ñaha ra tyin tandihi nyivi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho. 10 Tan tava tyiñu ra na cucahnya ra naha jucun ra Juan nu nyí ra vehe caa. 11 Tacan tan tsindacā ra naha jiñi ra Juan tsi ña, nyí tsi nu iin coho. Tan tsahā ra naha tsi ñaha tyuvaa can. Tan maa ña nacuhva cuenda ña tsi sihi ña.

12 Tacan tan tsaā ra nyicun tsi ra Juan naha ra tan naquihin ra naha cuñu ñuhu ra, tan tyihí ra naha tsitsi ñuhu. Yahā can tan tsahan ra naha tsijacotō ra naha tsi ra Jesús.

Nu jacatsi ra Jesús tsi uhun mil rayi

(Mr. 6:30-44; Lc. 9:10-17; Jn. 6:1-14)

13 Tsa tsito ra Jesús tsa tahañ ra Juan, quihin ra iin yutun ndoo, tan cuahán intuhun ñi maa ra nu taxin caa. Tan tsa tsito nyivi, quitā ñi ñuu ñi, tan cuahán tsihin tsaha ñi nu nyí ra. 14 Tsa quitā ra Jesús tsitsi yutun ndoo can, tan nyehe ra tyin cuaha xaan nyivi nyicun tsi ra. Tan cundaahvi iñi ra nyehe ra tsi ñi. Tan janduvahā ra tsi nyivi cuuhvi tsa tsaā tsihin ñi. 15 Tan tsa cuñi cuaā, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca cahan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

16 Tan ra Jesús catyí ra:

—Nduve náa nducu ñi cuhun ñi. Cuhva nyoocho tsa catsi ñi.

17 Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

18 Tan catyí ra Jesús:

—Ndaça ndo can tsi yu.

19 Tacan tan catyí ra tsihin nyivi tyin na cunyecū ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo tan tsahnū cuatyí ra paan can. Tan tsahā ra tsi ra tsicá tsihin ra, na tsatsa ra naha tsi nyivi can. 20 Tan tandihi nyivi tsatsi ñi tan ndaha vaha iñi ñi. Yahā can tan ndoo ca tsa ñahñu, tan jacutū ra naha utsi uvi tyica tsihin tsa ñahñu ican. 21 Tan tsa tandihi ñi tsa tsatsi can, quitā maa tumaa uhun mil tsa maa ñi maa rayi. Tan siin maa ñiñaha tan tsa nyihi.

Nu tsicá ra Jesús nu ndutya

(Mr. 6:45-52; Jn. 6:16-21)

22 Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. 23 Tsa yahā tsa jacunuhū ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyí ra can tan cuaā. 24 Tan tsitsi tsa tsicán tahvi ra tsi Nyoo, yutun ndoo can tsa cuahán cui tsi nda mahñu miñi. Tan ndutya miñi can cañi tsi tsi yutun

ndoo can tsa cuenda tyin ñihi xaan yihí tatyí nu cuahán ra naha. **25** Tan tsa cua tuvi cuahán ndíhi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. **26** Tan cuhva tsa nyehe ra naha tsi ra, tsicá ra nu ndutya can, nayuhví xaan ra naha. Tan caná tsaa ra naha, tan catyí ra naha:

—¡Jihna ndo xin. Tatyí vatsí can!

27 Maa tyin nacahan ra Jesús tsihin ra naha, tan catyí ra:

—¡Ña nayuhvi ndo tyin maa yu cuví! —catyí ra.

28 Tacan tan nacahan ra Pedro tan catyí ra:

—Jutu Mañi yu, tatun maa un vatsí juven, cūhva tsa quitsi ndíhi yu nu vatsí un.

29 Tan ra Jesús catyí ra tsihin ra:

—Ñaha jiin.

Tacan tan quitā ra Pedro tsitsi yutun ndoo can, tan quitsahā tsicá ra nu ndutya tan cuahán ra nda nu vatsí ra Jesús. **30** Maa tyin cuhva tsa tuví iñi ra tyin ñihi xaan quitsahā yihí tatyí, nayuhví xaan ra, tacan tan quitsahā cuñí nyee ra, tan quitsahā caná tsaa ra tan catyí ra:

—¡Jācacu tsi yu, Jutu Mañi yu!

31 Tan iin yaha ñi tñin ra Jesús ndaha ra, tan catyí ra tsihin ra:

—¿Nacuenda tsa nayuhví un, yooho tsa luxu xaan tsinú iñi tsi yu? —catyí ra Jesús tsihin ra.

32 Tan cuhva tsa quihví ra naha tsitsi yutun ndoo can, cutaxin tatyí can. **33** Tacan tan ra yucú tsitsi yutun ndoo can tsicuiñí tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

Nu janduvahā ra Jesús tsi nyivi cuuhví tsa iyó Genesaret

(Mr. 6:53-56)

34 Tsa yahā sava ra naha miñi can, tsaā ra naha ñuhu Genesaret. **35** Tan cuhva tsa nacoto nyivi iyó ican tsi ra

Jesús tyin juven ra cuví, jacoto ñi tsi tandíhi nyivi iyó taniñ cahnu can. Tan tsindacā ñi tandíhi nyivi cuuhví nu nyíi ra. **36** Tan caahán ndaahvi ñi tsihin ra, na cuhva ra tsa tñin ñi vasu luxu jahma ra. Tan tandíhi ñi tsa tñin jahma ra, nduvahā ñi.

Tsa jatíví tsi nyivi nuu Nyoo

(Mr. 7:1-23)

15 ¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyíi ra Jesús tan tsicā tuhun ra naha tsi ra, tan catyí ra naha:

2 —¿Nacuenda ña javahá ra tsicá tsihin un naha ra cuhva nacoq tsii tsahnu yo?, tyin catyí ra ican naha ra tyin iyó iin cuhva ndoo ndaha yo tsa ndí cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

3 Tan tsicā tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaá yahvi ndo tsa caahán Nyoo? **4** Tyin Nyoo catyí ra: “Tyāa yahvi ndo tsi jutu ndo tan tsi sihi ndo, tyin tandíhi nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo. **5** Maa tyin nyoocho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatinyee yu tsi un tyin tsa tsahā yu tandíhi tsa iyó tsi yu tsi Nyoo.” **6** Tatun tsa catyí ndo yacan, ña cuñí tsi tsa jatinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo. **7** ¡Nyoocho cuñí ndo tyin vaha xaan ndo, maa tyin ña nditsa ndo! Nditsa tsa cahan ra Isafas, ra cuví ndusu yuhu Nyoo, siqui ndo jahā Nyoo. Tan catyí ra tyehen:

8 Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi.

9 Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

10 Tacan tan caná ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi ñi ndo.

11 Tyin nyivi tsa tiví nuu Nyoo, ñavin tsa quihví yuhu ñi jatíví tsi ñi. Tyin tiví ñi jahá tsa quitá yuhu ñi.

12 Tacan tan natuhvá ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñi ra naha tsa tsiñi ra naha tsa cahán un.

13 Tan maa ra Jesús nacahán ra tan catyí ra:

—Tandihí yutun tsa ña tatsi Jutu yu, ra nyaá gloria, cua tuhun ra nda cuanda yoho tun. 14 Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

15 Tacan tan quitsahá catyí ra Pedro tsihin ra Jesús:

—Catyí tuhun tsihin ndi náa cuñi tsi catyí tsa cahán un ña.

16 Tacan tan ra Jesús catyí ra tsihin ra naha:

—Ndi nyooho tan ña cutuñi ndihí ñi ndo. 17 ¿A ña cutuñi ñi ndo tyin tsa tsatsí yo, tsitsi yo cuahán tsi? Yahá can tan cua quita nyico tsi.

18 Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi.

19 Tyin tsa caquiñi tsicá ñi ñi tsitsi

añima ñi quitá can, tan cuñi ñi cahñi ñi nyivi. Cuñi ñi suhu ñi. Yihí nyivi caahán ñi cuendu, o jacuñi nyaa ñi tsi inga ca nyivi. Yihí ra cuñi ra coo inga ñaha ra, o ñiñaha iyó yihí tsicá nuu ñi tsihin inga rayihí. Yihí ra tsicoó ra tsihin ñaha tan ña tindaha ra tsihin ña. Tan yihí rayihí quixí ra tsihin juven ñi maa rayihí. Tan ñiñaha yihí ñi quixí ñi tsihin juven ñi maa ñaha. Tan tandihí ca maa tsa caquiñi tsa javahá ñi tsihin cuñu ñuhu ñi.

20 Yacan cuví tsa jatíví tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

Nu tsinu ñi iin ñaha inga ñuu tsi ra Jesús

(Mr. 7:24-30)

21 Quitá ra Jesús ñuu can tan cuahán ra ityi ñuu Tiro tan Sidón.

22 Tan ityi can iyó iin ñaha Canaán. Tan tsa nyehé ña tsi ra Jesús natuhvá ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi ñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

23 Maa tyin tumaa tsa ña tsiñi ñi ra Jesús jahá ra tsi ra tan ña nacahán ra tsa iin yaha ñi. Tacan tan natuhvá ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsa ña tsata yo.

24 Tacan tan catyí ra Jesús tsihin ra naha:

—Vatsí yu jahá Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

25 Tan ñaha can natuhvá ña nu nyaá ra tan tsicuiñi tsiti ña nuu ra, tan catyí ña tsihin ra:

—Jutu Mañi yu, ¡jatyinyee tsi yu!

26 Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

27 Maa tyin ña ndasi cuñí ña tsa cahān ra, tan catyí ña tsihin ra:

—Nditsa, Jutu Mañi yu. Maa tyin nda cuando ina tan tsatsí tì títsehe tsa cucoyo xuu mesa tsitoho tì —catyí ña.

28 Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuvì maa cuhva tsicá iñi un.

Tan juvin ñi cuhva can tan nduvahā sehe ña.

Nu cuaha xaan nyivi cuuhví janduvahā ra Jesús

29 Tsa yahā yacan tan ra Jesús cuahán ra ityí yuhu miñi Galilea, tan ndaḡ ra iin jiñi yucu tan ican tsinyaa ra. 30 Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquín nyecu ñi tsi tandiñi ñi cuuhví can nu nyaá ra Jesús. Tan janduvahā ra tsi ñi. 31 Tan iyo xaan cuñí nyivi can nyehé ñi tyin nacahān ñi ñiñi tan nduvahā ñi lundu, tan nacacá ñi coxo, tan nanyehé ñi cuaa. Tan quitsahā jacahnu xaan ñi tsi Nyoo ñi, tsa cuvì ñi nyivi Israel.

Nu tsahá ra Jesús tsa catsi cumi mil rayi

(Mr. 8:1-10)

32 Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityí cuanuhú ñi

—catyí ra Jesús.

33 Tacan tan ra tsicá tsihin ra catyí ra naha tsihin ra:

—¿Tan numaa cua ñiñi yo tsa catsi nyivi cuaha ihya, tyin ihya nduve nyivi iyó?

34 Tacan tan ra Jesús tsicā tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

35 Tan catyí ra tsihin nyivi na cunyecu ñi nu ñuhu. 36 Tacan tan quihñ ra tsa utsa paan can tan tyaca can, tan nacuhvā ra tyahvi nyoo tsi Nyoo. Tan quitsahā tsahnú cuatyí ra paan tsihin tyaca, tan tsahā ra tsi ra tsicá tsihin ra tyin na tsatsa ra naha tsi nyivi. 37 Tandihñ ñi tsatsj ñi, tan ndahā vaha iñi ñi. Tan tsa ndihñ tsatsj ñi tan naquihñ ra naha tsa ñahñu tsa ndoo can tan quitā utsa tyica cuvì tsi. 38 Tan ra tsa tsatsj can naha ra quitā maa cumi mil ra naha tan siñ maa ñiñaha tan tsa nyihi. 39 Yahā can tan jacunuhū ra tsi ñi, tan quihvñ ra tsitsi yutun ndoo, tan cuahán ra ityí Magdala.

Ra cuvì fariseo naha ra tan ra cuvì saduceo naha ra tsicán ra naha tsi ra Jesús na javaha ra iin tsa iyo

(Mr. 8:11-13; Lc. 12:54-56)

16 ¹ Tacan tan ra fariseo naha ra tan ra saduceo naha ra tsahān ra naha nu nyii ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo. ² Maa tyin nacahān ra Jesús tan catyí ra tsihin ra naha:

—Tsa cueñi, tuhvā ndo catyí: “Siñ xaan caa ityaan cua cuvì tyin cuaaha xaan nu vico”. ³ Tan tsa tuvi catyí tucu ndo tyin ña siñ maa caa cua cuvì, tyin iñi naaha xaan tan cuaaha xaan vico, catyí ndo. ¿Nacuenda tyin tsitó

tucu ndo yacan tan tsa cuví vityin ña cuví nacoto ndo, nyooho ra jandaví ñaha? **4** Nyívi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya

(Mr. 8:14-21)

5 Cuhva tsa yahá ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. **6** Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

7 Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

8 Tan tsa tuví iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

9 ¿A ñaha ca cutuñi iñi ndo? ¿A ña nducuhún iñi ndo quiñi tsa jacatsi yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can? **10** ¿A tsa naá ndihi tucu iñi ndo quiñi tsa jacatsi yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan?

11 ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

12 Tacan tan cutuñi iñi ra naha tyin ñavin tsa cuenda yutsan iya paan

can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo

(Mr. 8:27-30; Lc. 9:18-21)

13 Cuhva tsa tsaa ra Jesús ityi ñuu Cesarea Filipino, tsicá tuhun ra tsi ra tsicá tsihin ra tan catyí ra:

—¿Naa catyí nyivi? ¿Yoo ra cuví yu, Rayii tsa quee nda gloria? —catyí ra.

14 Tan nacahan ra naha tan catyí ra naha:

—Yihí nyivi catyí ñi tyin ra Juan ra jacoondutyá tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

15 Tacan tan catyí ra tsihin ra naha:

—Tan nyooho, ¿yoo ra cuví yu, catyí ndo?

16 Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

17 Tan nacahan ra Jesús tan catyí ra:

—Siñ xaan cuví tsi yooho, Simón, sehe ra Jonás, tyin ñavin nyivi janaha tuhun ihya tsi un, tyin maa Jutu yu, ra nyaá gloria janaha tsi un. **18** Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi. **19** Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jaha Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

20 Tacan tan catyí ra Jesús tsihin ra tsicá tsihin ra tyin ña cahan ra

naha tsihin nyivi tun juvin ra cuví ra Cristo ra tsa quee nu nyaá Nyoo.

Nu caahán ra Jesús tyin cua cahñi nyivi tsi ra

(Mr. 8:31-9:1; Lc. 9:22-27)

21 Nda quivi can quitsaha catyí ra Jesús tsihin ra tsicá tsihin ra, tyin cuñí tsi tsa cahun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha. 22 Tacan tan quihin ra Pedro tsi ra tan quitá siin ra tsihin ra tan quitsaha caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

23 Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuihna! Tyin cuñí un casi un tsi yu. Tyin yooho ña tsicá iñi un cuhva cuñí Nyoo, tyin cuhva cuñí nyivi tsicá iñi un —catyí ra.

24 Tacan tan ra Jesús catyí ra tsihin ra tsicá tsihin ra:

—Tatun ndáa nyooho cuñí cunycun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunycun ndo tsi yu. 25 Tan nyooho tsa ña cuñí nyehe tundoho, tan ña cuñí ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo. 26 Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun añima ndo tan ña

cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo. 27 Tyin yuhu, Rayii tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo. 28 Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

Nu nyehe uñi taahán ra tsicá tsihin ra Jesús nácaa tsa sii caá xiñu ra Jesús nu ndacá ñaha ra nda gloria

(Mr. 9:2-13; Lc. 9:28-36)

17 1 Tan tsa yaha iñu quivi, tan quihin ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha. 2 Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu. 3 Tacan tan nyehe ra naha tsi ra Moisés tan ra Elías, natuhún ra naha tsihin ra Jesús. 4 Tan quitsaha caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñí un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

5 Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasí tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra. Tyaa yahvi ndo tsa caahán ra —catyí ndusu can.

6 Tsa tsiñi ra tsicá tsihin ra Jesús

tuhun ihya, tsicava_v tsihin nuu ra naha nda nu ñuhu, tyin nayuhvi_v xaan ra naha. ⁷ Tacan tan natuhva_v ra Jesús nu cayucú ra naha, tan tñin ra tsi ra naha, tan catyí ra:

—Nduvita ndo, tan ña nayuhvi ndo.

⁸ Tan cuhva tsa nanyehē ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehe_v ndo ihya tsihin nyivi. Tsa yaha tsa cúu Rayñi tsa quee_v nda gloria tan nandoto ra, tacan tan cua cahan ndo can —catyí ra.

¹⁰ Tacan tan tsicā tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan_v ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihí. ¹² Maa tyin yuhu catyí yu tsihin ndo tyin tsa yaha_v quitsi ra Elías, tan ña nacoto_v nyivi tsi ra, tan javaha_v ñi tsihin ra tandihí cuhva cuñi maa ñi. Tan tacan tucu yuhu, Rayñi tsa quee_v nda gloria, cua janyehe ñi tundoho tsi yu —catyí ra tsihin ra naha.

¹³ Tacan tan cutuñi_v iñi ra naha tyin tuhun ra Juan, ra jacoondutya, caahán ra Jesús.

Nu janduvaha_v ra Jesús tsi iin ra luhlu tsa tsiihí naaha jahá tatyí ña vaha

(Mr. 9:14-29; Lc. 9:37-43)

¹⁴ Cuhva tsa tsaq_v ra naha nu yucú nyivi, natuhva_v iin ra tan tsicuiñi_v tsiti ra nuu ra Jesús, tan catyí ra tsihin ra:

¹⁵ —Tata, cundaahvi_v iñi tsi sehe yu, tyin yihí cuehe tsiihí naaha tsi ra, tan tuhvá ra nduva ndasava, tan

cuhva xaan tundoho nyehé ra jahá cuehe can. Tan yihí tsaha nduvá ra nu ñuhu_v tan cayú ra, tan nduvá tucu ra nu yihí ndutya. ¹⁶ Tan tsindaca_v yu tsi ra tsi ra tsicá tsihin un, maa tyin ña cuvi_v janduvaha_v ra naha tsi ra —catyí ra.

¹⁷ Tan nacahan_v ra Jesús tan catyí ra:

—¿Nyooho, nyivi tsa ña tsinú iñi cuví ndo! ¿Tan caquiñi_v ndo! ¿Ndáa nda quivi_v cua cunyii yu tsihin ndo? ¿Tan ndáa nda quivi_v cua cunyeē iñi yu tsihin ndo, tyin nyooho ña tsinú vaha maa iñi ndo tsi yu? Tñdaca ndo tsi ra luhlu tsi yu —catyí ra.

¹⁸ Tacan tan tava_v ra Jesús tsi nu tatyí ña vaha can, tan quitā nu tsi ra luhlu can. Tan juvin ñi cuhva can nduvaha_v ra.

¹⁹ Tsa yaha_v can tan tsicā tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuvi_v tava ndi tatyí ña vaha can?

²⁰ Tan ra Jesús nacahan_v ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuvi javaha ndo tatun nditsa tsa tsinú iñi ndo tsi yu. ²¹ Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaha cahan_v ra Jesús tsa cua cahñi nyivi tsi ra

(Mr. 9:30-32; Lc. 9:43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayñi tsa quee_v nda gloria, iin ra cua nacuhva cuenda ra tsi yu tsi ra xaan iñi tsi yu naha ra. ²³ Tan cua cahñi ra naha tsi yu. Maa tyin tsa

tsinu uñi quivi tan cua nandoto yu
—catyí ra.

Tsa tsiñi ra naha tuhun ihya,
cuihya xaan cuñi ra naha cuvi.

**Nu tyahví ra naha cuenda tsa nduvaha
vehe ñuhu cahnu**

24 Cuhva tsa tsaq ra Jesús tan ra
tsicá tsihin ra ñuu Capernaum, ra
tavá xuhun cuenda vehe ñuhu naha
ra, tsahan ra naha tsinyehe ra naha
nu nyí ra Pedro tan tsicá tuhun ra
naha tsi ra tan catyí ra naha:

—¿A ña tuhvá ra jacuahá tsi ndo
tyahví xuhun tsa cuenda vehe ñuhu
cahnu? —catyí ra naha tsihin ra
Pedro.

25 Tan nacahan ra Pedro tan catyí
ra:

—Tuhvá ra.

Tan tsa quihví ra Pedro tsitsi vehe
nu iyó ra naha, jihna ca ra Jesús
nacahan tan catyí ra:

—¿Nacaa cuñi yooho, Simón?

¿Yóo tsi quihín ra cuví rey tsa iyó nu
ñuhu ñayivi ihya yahvi? ¿A tsi nyivi
ñuu maa ra o tsi inga nyivi?

26 Nacahan ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña
taahán tsi tyahví ñi. 27 Maa tyin ña
cuñi yo tsa cahan ra naha siqui yo,
yacan cuenda vaha ca tsa cuhun un
yuhu miñi can, tan jacuhun un yiqui
tucu un tsitsi ndutya. Tan tyaca tsa
cua ñihi un tsa jihna ñi, tsitsi yuhu ti
cua ñihi un xuhun. Tan tsihin yacan
ñi cua tyahvi un tsa cuenda yo
—catyí ra Jesús tsihin ra Pedro.

**Nu janaha ra Jesús yóo ra cahnu
ca cuví nuu tandihi nyivi tsa
ndacá ñaha Nyoo**

(Mr. 9:33-37; Lc. 9:46-48)

18 1 Quivi can natuhvā ra tsicá
tsihin ra Jesús nu nyaá ra, tan
tsicá tuhun ra naha tsi ra tan catyí ra
naha:

—¿Yóo ra cahnu ca cuví nu ndacá
ñaha Nyoo?

2 Tacan tan ra Jesús cana ra tsi iin
ra luhlu, tan tyaa ra tsi ra mahñu ra
naha. 3 Tan catyí ra:

—Tsa nditsa catyí yu tsihin ndo,
tyin tatun nyooho tan ña cua nasama
ndo cuhva iyó ndo tan ña janduluhlu
ndo tsi ndo tumaa ra nyihi, ña cua
cuví quihvi ndo nu ndacá ñaha Nyoo.
4 Tyin ra tsa cahnu ca cuví nuu Nyoo,
juvin ra cuví ra tsa janduluhlu tsi,
tumaa ra luhlu ihya. 5 Nyivi tsa
naquihín tsi iin nyivi tumaa ra luhlu
ihya, tyin tsinú ñi ñi tsi yu, yuhu
naquihín cuenda ñi.

**Nu caahán ra Jesús tsihin yo nácaa
jaha cuenda yo tsi yo coto javaha
yo tsa ña vaha**

(Mt. 5:29-30; Mr. 9:42-48; Lc. 17:1-2)

6 7 Tatun yóo nyivi natyuhú tsi iin
nyivi tsa ñaha ca tsinú vaha ñi tsi
yu, na javaha ñi tsa caquiñi, vaha ca
na cunuhñi iin yuu yoso vee jucun ñi
natyuhú can, tan cujanehñi nyivi tsi
ñi nu cunu ndutya ñuhu. 7 7 Ndahvi
nyivi ñuu ñayivi, tyin tacan iyó tsa
jativí tsi ñi! 7 Tan ndahvi tucu ra
ndaahvi tsa jativí tsi ñi!

8 8 Yacan cuenda tatun ndaha un o
tsaha un javahá tsa ña vaha, cahnya
can tan javita un. Tyin vaha ca quihvi
un nu coo un tsihin Nyoo tsihin tsa
lundu ndaha un o lundu tsaha un, tan
ñavin ca tsa naniñ un tan jacuhun
Nyoo tsi un nu cayú ñuhu tsa ña cua
ndahva maa. 9 9 Tun javahá un tsa ña
vaha jahá tinuu un, tava can tan
javita un. Tyin vaha ca quihvi un nu
coo un tsihin Nyoo tsihin intuhun
tinuu un, tan ñavin ca tsa jacuhun
Nyoo tsi un tsihin nduvi tinuu un nu
cayú ñuhu tsitsi anyaya.

**Nu cahān ra Jesús tyin tumaa mbee
tsa cunaq, tacan cuví yo**

(Lc. 15:3-7)

10 10 Ña caca ñi ndo tyin ra nyihi

cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. **11** Tyin yuhu, Rayi tsa quee nda gloria, vatsí jacacu yu tsi nyivi tsa cuanaa.

12 ¿Nacaa cuñi nyooho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cahun ra cunanducu ra tsi quití tsa cuanaa can? **13** Tan tatun nañihi ra tsi ti, tsa nditsa tyin sñi ca cua cuñi ra tsihin quití can, tan ñavin ca tsihin tsa cumi xico tsahun cumi quití tsa ña tsinaa. **14** Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

**Nacaa taahán tsi jahá tahanan yo
tucahnu iñi tsi yo**

(Lc. 17:3)

15 Tatun ra yañi un tan javahá ra tsa ña vaha tsi un, çahan tsihin intuhun ñi maa ra tan çatyí un tsihin ra tyin ña vaha cuhva javahá ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can. **16** Maa tyin tatun ña tyaa yahvi ra tsi un, tacan tan çana un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can. **17** Tatun ña tyaa yahvi ra ndi maa tsi ra tsa tsahan tsihin un naha ra, tacan tan çahan tsihin tandíhi nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

18 Tsa nditsa catyí yu tsihin ndo, tyin tandíhi tsa cuhñi ndo ihya nu ñuhu ñayivi, tsa nuuhñi tsi jahá maa Nyoo nda gloria. Tan tandíhi tsa

ndatsi ndo ihya nu ñuhu ñayivi, tsa ndatsi maa Nyoo nda gloria.

19 Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahanan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo. **20** Tyin nu yucú uvi o uñi nyivi tan jacahnú ñi tsi yu, ican nyaá yu mahñu ñi —catyí ra Jesús.

21 Tacan tan tsahan ra Pedro tsindacá tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

22 Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

**Nu çahan ra Jesús iin cuhva cuenda
iin ra tsa ña cuñi jaha tucahnu iñi**

23 Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandíhi musu ra tyin cua nyehe ra nácaa nyaá cuenda ra naha tsi ra. **24** Tan cuhva tsa quitsaha natavá ra cuenda, tan tsindacá ra tsi iin musu tsa cuaha millón pesu nyaá cuenda tsi ra. **25** Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasiñi ra, tan tsihin sehe ra tan tandíhi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.” **26** Tacan tan musu can tsicuiñi tsiti ra nuu tsitoho ra, tan çahan ndaahvi ra tsihin ra, tan catyí ra: “Tata, jaha tumañi iñi, çuatu un luxu, tan tyahvi yu tandíhi tsa nyaá cuenda yu tsi un nda ñihi yu xuhun”, catyí ra. **27** Tan cundahvi iñi tsitoho ra tsi ra, tan jahá ra tucahnu iñi tsi ra, tan

janaa ra tandihi tsa nyaá cuenda ra, tan jandoo nuña ra tsi ra. **28** Maa tyin cuhva tsa quita musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tiin ra tsi ra can, tan quitsaha tñn ra jucun ra, tan catyí ra tsihin ra:

“Tyahvi tsa nyaá cuenda un tsi yu.”

29 Tacan tan tsicuiñi tsiti ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra.

30 Maa tyin maa ra ña cuñi ra cuatu ra, tan tsahān ra tsityihí ra tsi ra can vehe caa nda cuanda tsa tyahvi ra tsa nyaá cuenda ra tsi ra. **31** Tsa nyehe inga ca musu tsa javaha ra, cuiihya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javaha ra can. **32** Tacan tan tsitoho ra can tava tyiñu ra na quitsi ra can. Tan tsa tsaā ra, tan catyí ra tsihin ra: “Musu ña vaha cuví un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu. **33** Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra.

34 Tan cuxaān xaan tsitoho ra, tan tava tyiñu ra na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

35 Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyoocho tatun ña jaha ndo tucahnu iñi tsi nyivi ndo tsihin tsa ñi iñi añima ndo.

Nu caahán ra Jesús tyin ña vaha tsa nacoo ihñi rayi tsi ñasihi ra

(Mr. 10:1-12; Lc. 16:18)

19 ¹ Tsa yahā tsa cahān ra Jesús tuhun ihya, tan quita ra cuenda Galilea can, tan cuahán ra

cuenda Judea inga tsiyo yutya cahnu Jordán, ityi nu caná ñicanyii.

2 Cuaha xaan nyivi tsinyicun tsi ra, tan janduvaha ra tsi nyivi cuuhví.

3 Tacan tan juhva ra fariseo naha ra natuhva ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra. Tan tsica tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsaha ña tsi ra?

4 Tan nacahān ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javaha tsi ndo nda quivi jihna ñi, javaha ra rayi tan ñaha? **5** Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.”

6 Yacan cuenda, ñavin ca uvi taahan ñi, maa tyin nduvi ñi intuhun ña nyivi cuví ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

7 Tacan tan tsica tuhun ra naha tsi ra Jesús tan catyí ra naha:

—¿Nacuenda tsa tyaā ra Moisés tyin cuví can iin rayi tutu cuenda ley ra tan nacoo ra ñasihi ra?

8 Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsaha ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoo nyivi. **9** Yuhu catyí yu tsihin ndo tyehen: Ra tsa nacoo ñasihi, tan ñavin tsa cuenda tsa quituvi ña tsihin inga rayi, tan tindaha ra tsihin inga ñaha, tsicoó cuatyí ra nuu Nyoo. Tan ra tsa tindaha tsihin ñaha tsa nacoo rayi can, juvin ñi tsicoó tucu cuatyí ra can —catyí ra.

10 Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayi̯i tsihin ñasi̯i ra, vaha ca ña tindaha yo.

11 Tan ra Jesús catyí ra tsihin ra naha:

—Ña tandi̯i nyivi̯i cuví naquihin cuenda tuhun ihya. Maa tyin nyivi̯i tsa tsaha̯ Nyoo cuví naquihin cuenda ñi can. 12 Tsa ña tindaha nyivi̯i, cuaha ñi cuenda cuví tsi. Yi̯hí ñi ña cuñí ñi tindaha ñi tyin iin cuhva caa maa ñi nda cacu̯ ñi. Tan inga ñi ña cuñí ñi tindaha ñi tyin tsa nducapun ñi jaha̯ nyivi̯i. Tan yi̯hí ñi ña tindaha ñi tsa cuenda tsa cuñí ñi javaha ñi maa ñi maa tyi̯ñu Nyoo, na nducuaha ca añima tsa ndacá ñaha Nyoo. Tandihí nyivi̯i tsa cuví javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10:13-16; Lc. 18:15-17)

13 Tacan tan quitsi̯ ndaca nyivi̯i juhva tsa nyihi tsi ra Jesús tyin na tyiso ndaha ra ji̯ñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsaha̯ caahán ra naha tsi nyivi̯i tsa cuahán tsihin tsa nyihi can. 14 Maa tyin ra Jesús catyí ra:

—Ja̯ña ndo tsi tsa nyihi na quitsi̯ maa tsi naha tsi nu nyaá yu. Tan ña casi̯ ndo. Tyin nyivi̯i ndacá ñaha Nyoo cuví ñi tumaa tsa nyihi ihya —catyí ra.

15 Tacan tan tyiso̯ ndaha ra ji̯ñi tsi naha tsi. Yahá can tan cuahán ra.

**Nu tsaha̯ ra Jesús cuhva tyin yii
xaan nacuhva cuenda iin ra
cuca tsi ra tsi Nyoo**

(Mr. 10:17-31; Lc. 18:18-30)

16 Iin ra tyuvaa tsaha̯n ra tsindaca̯ tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayivi̯i nyito tsa ña cua naa maa?

17 Tan ra Jesús catyí ra tsihin ra:

—¿Nacuenda catyí un tyin ra vaha

cuví yu? Intuhun ñi maa Nyoo cuví ra vaha. Tan tsa catyí un tyin vaha yu, nacotó un tyin Nyoo cuví yu, Maa tyin tatun cuñí un coo un ñayivi̯i tsa ña cua naa maa, javaha tandihí tuhun tsa tsaha̯ Nyoo tyin javaha yo —catyí ra tsihin ra.

18 Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cañi̯ un nyivi̯i. Ña coo inga ñaha tsi un. Ña suhu un tsa tsii nyivi̯i. Ña cahan un cuendu siqui̯ nyivi̯i.

19 Tyaa yahvi tsi jutu un tan tsi sihi un. Tan cuñi̯ tsi nyivi̯i, tumaa tsa cuñi̯ un tsi maa un.

20 Tan ra tyuvaa can, catyí ra tsihin ra:

—Tandi̯i maa yacan tan tyaa yahvi yu nda tahan luhlu yu tan nda cuanda vityin. ¿Náa ca cumañi̯ tsi yu?

21 Tan ra Jesús catyí ra tsihin ra:

—Tatun cuñi̯ un tsa iin ndaha ñi cuvi un iin ra cuiti̯ nuu Nyoo, cuaahan tan xico un tsa iyó tsi un, tan cuhva un tsi nyivi̯i ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

22 Maa tyin cuhva tsa tsiñi̯ ra tyuvaa can tsa cahan ra Jesús tsihin ra, cuihaya xaan cuñi̯ ra cuví tan cuanuhu̯ ra tyin cuca xaan ra.

23 Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yii xaan tan cuví nacuhva cuenda nyivi̯i cuca tsi ñi na cundaca ñaha Nyoo tsi ñi. 24 Catyí yu tsihin ndo inga tsaha, tyin vasu yii xaan yaha iin camellu xuu iin yi̯qui̯ tucu, maa tyin yii xaan ca tsa quihvi̯i iin nyivi̯i cuca nu ndacá ñaha Nyoo —catyí ra Jesús.

25 Tsa tsiñi̯ ra tsicá tsihin ra Jesús tsa cahan ra, iyo xaan cuñi̯ ra naha, tan quitsaha̯ tsicá tuhun tahan ra naha, tan catyí ra naha:

—Tun tacan, yoñi̯ cua cuví cacu

26 Tacan tan nanyehę ra Jesús nu nyecú ra naha tan catyí ra:

—Nyivi ña cuví javaha ñi yacan, maa tyin Nyoo cuví javaha ra tandihi.

27 Tacan tan quitsaha caahán ra Pedro tsihin ra:

—Jutu Mañi yu, nyuhu tandihi maa tsa iyó tsi ndi nacoq ndi tan nyicún ndi tsi un. ¿Náa cua ñihi ndi? —catyí ra tsihin ra.

28 Tan nacahan ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihi tsa iyó, yacan cuví quivi cua cunyaa yuhu Rayi tsa queę nda gloria nu tyayu sií xaan caá tan cua cundaca ñaha yu. Tan nyoocho tsa nyicún tsi yu, cua cunyecu ndihi ndo nu utsi uvi taahan tyayu sií caá. Tan cua cundaca ñaha ndo tsi tandihi nyivi cuví tata tsa utsi uvi taahan sehe ra Israel. 29 Tan tandihi nyoocho tan tandihi inga nyivi tsa nacoq vehe, o yañi ñi, o kuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siquí can, tan cua ñihi tucu ñi ñayivi nyito tsa ña cua naa maa coo ñi. 30 Cuaha xaan nyivi cuahán ityi nuu vityin, ñi ican cua cuhun nu ndihi ña. Tan cuaha xaan nyivi cuahán nu ndihi vityin, ñi ican cua cuhun ityi nuu.

Nu jacuahę ra Jesús iin kuhva cuenda ra jahá tyiñu

20 1 Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jaha tyiñu nu tyiñu jahá ra. 2 Tan ndoo ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra. 3 Yahę can tan cuahán ra inga tsaha kuhva caa iin tsa tuvi. Tan nyehe ra tsi juhva ca ra yucú taxin nuyahvi can.

4 Tan catyí ra tsihin ra naha:

“Cuaahan ndihi tucu nyoocho jaha tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihi tucu ra can naha ra. 5 Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu. 6 Yahę can tan quita nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” 7 Tan nacahan ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihi ndo jaha tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra.

8 Tan kuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihi naha ra, tan nu cua ndihi tan tyahvi un tsi ra tsa quihvi tsa jihna ñi naha ra”, catyí ra. 9 Tacan tan tsaę ra tsa quihvi caa uhun tsa tseñi can naha ra. Tan intuhun intuhun ra naha quihin ra naha yahvi nanñi iin quivi. 10 Yahę can, tan kuhva tsa tsaę tsi tsi ra tsa quihvi tsa jihna ñi can naha ra, cuñí maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihin ra naha. 11 Tan kuhva tsa quihin ra naha, quitsaha caahán ra naha tsi tsitoho tyiñu can. 12 Tan catyí ra naha: “Ra tsa tsaę nu ndihi ihya naha ra, intuhun ñi hora jaha tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jaha tyiñu ndi nu ihñi”, catyí ra naha. 13 Maa tyin nacahan tsitoho tyiñu can, tan catyí ra tsihin iin ra can: “¡Tsa!, nduve tsa

ña vaha javaha yu tsihin un. ¿A ñavin yahvi tsa iin quivi ndoo yo tuhun tyin cua tyahvi yu tsi un? **14** Quihin yahvi un, tan cūanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihi iin ñi cuhva tsa tyahvi yu tsi yooho? **15** ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha ñi yu tsihin inga ra can naha ra?” catyí ra. **16** Tacan nyivi quihvi nu ndihi, cuhun ñi ityi nuu. Tan nyivi cuahán ityi nuu, nda nu ndihi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

**Inga tsaha jacotó ra Jesús cuhva
cua cahñi nyivi tsi ra**

(Mr. 10:32-34; Lc. 18:31-34)

17 Cuhva tsa cuñi cuhun ra Jesús nda ñuu Jerusalén, cana siin ra tsi tsa utsi uvi ra tsicá tsihin ra tan catyí ra tsihin ra naha:

18 —Nyehe ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyí ra naha tyin taahán tsi cúu yu. **19** Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyí ra Jesús tsihin ra naha.

**Nu tsicán sihi ra Jacobo tan ra Juan
iin tumañi ñi tsi ra Jesús**

(Mr. 10:35-45)

20 Tacan tan ñasihi ra Zebedeo natuhva ña nu nyí ra Jesús tsihin nduvi sehe ña, ra Jacobo tan ra Juan. Tan tsicuiñi tsi ña nuu ra tyin cua ndacan ña iin tumañi ñi tsi ra.

21 Tan tsicá tuhun ra Jesús tsi ña tan

catyí ra:

—¿Náa cuñi un?

Tan catyí ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

22 Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsihi tumaa cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

23 Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsihi tumaa cuhun yuhu tuhun tsihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

24 Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra. **25** Maa tyin cana ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. **26** Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihi nyooho. **27** Tan ndaa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha. **28** Tumaa yuhu, Rayi tsa quee nda gloria, ña vatsí yu tyin jatyinyee nyivi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayivi yu tsa cuenda ñi.

Tyin tsihin yacan cua tyahvi yu cuatyí tandíhi ñi.

Nu janduvahā ra Jesús tsi uvi taahan ra cuaa

(Mr. 10:46-52; Lc. 18:35-43)

29 Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyívi cuahán cua nyicun tsi ra naha. 30 Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsahā caná tsa ra naha. Tan catyí ra naha:

—¡Jutu Mañi yu, tata ra David, cundaahvi iñi tsi ndi! —catyí ra naha.

31 Tan nyívi quitsahā caahán ñi tsihin ra naha na casi ra naha yuhu ra naha. Maa tyin ñihi ca canā tsa ra naha:

—¡Jutu Mañi yu, tata ra David, cundaahvi iñi tsi ndi!

32 Tacan tan tsicuñi ra Jesús tan canā ra tsi nduvi taahan ra cuaa can, tan tsicā tuhun ra tsi ra naha tan catyí ra:

—¿Náa cuñi ndo javaha yu tsi ndo?

33 Tan nacahān ra naha tan catyí ra naha:

—Jutu Mañi yu, jananyehe tsi ndi.

34 Tacan tan cundaahvi iñi ra Jesús tsi ra naha, tan tñi ra tinuu ra naha. Tan iin yaha ñi nanyehe ra naha, tan cuiti cuanyicún ndíhi ra naha tsi ra Jesús.

Nu cuahán ra Jesús ñuu Jerusalén

(Mr. 11:1-11; Lc. 19:28-40; Jn. 12:12-19)

21 1 Tsa cua tsa ra naha ñuu Jerusalén, tan tsaā ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra.

2 Tan catyí ra tsihin ra naha:

—Cuaahan ndo ñuu tsa canyí ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndaṭsi ndo tsi ti, tan

quitsi ndaca ndo tsi ti naha ti tsi yu.

3 Tan tatun yóo tsicá tuhun tsi ndo:

“¿Náa cuú ndo tsi ti naha ti?”, tan catyí ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyí ndo tsihin ñi —catyí ra.

4 Tacan cuví tyin cundaa tsa cahan ra cuví ndusu yuhu Jutu Mañi yo tahañ tsanaha nu catyí ra tyehen:

5 Cahan ndo tsihin nyívi ñuu Sión:

“Nyehe ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quití tsa tuhvá nyisó carga”, catyí ra cuví ndusu yuhu Nyoo can.

6 Tacan tan cuahán ra tsicá tsihin ra Jesús, tan javahā ra naha tumaa tsa cahan ra tsihin ra naha. 7 Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaā ra Jesús tsi ti. 8 Tan cuaha xaan nyívi tsaquín ñi jahma ñi nu ñuhu ityi nu cuahán ra, tan inga ñi tsahnya ñi ndaha yutun tsaquín ñi tsitsi ityi. 9 Tan nyívi tsa cuahán ityi nuu tan ityi tsata, quitsahā caná tsa ñi tan catyí ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

10 Cuhva tsa tsaā ra Jesús ñuu Jerusalén can, tandíhi maa nyívi ñuu quitsahā cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

11 Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

Nu tavaḡ ra Jesús tsi nyivi xicó tsitsi vehe ñuhu cahnu

(Mr. 11:15-19; Lc. 19:45-48; Jn. 2:13-22)

12 Yahaḡ can tan quihviḡ ra Jesús tsitsi vehe ñuhu cahnu Nyoo. Tan tavaḡ ra tsi tandiḡi nyivi jatá tan xicó ican. Tan janduvavaḡ ra mesa nu nasamá ñi xuhun. Tan janduvavaḡ ra tyayu nu xicó ñi paloma. 13 Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooḡo jananduviviḡ ndo vehe ihya, vehe ñasuhu —catyí ra tsihin ñi.

14 Tan tsa tsitḡo juhva ra cuaa tan ra coxo naha ra tyin nyíi ra Jesús tsitsi vehe ñuhu cahnu, quihviḡ ra naha tan janduvahaḡ ra Jesús tsi ra naha. 15 Tan nyeheḡ ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahaḡ ra Jesús tsa iyo. Tan tsiñiḡ ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¿Cahnu xaan cuví ra cuví tata ra rey David! —catyí tsi naha tsi.

Tacan tan cuxaḡan ra naha tsa tsiñiḡ ra naha tsa caahán tsa nyihi can.

16 Tan catyí ra naha tsihin ra Jesús:

—¿A tsiñiḡ un tsa caahán tsa nyihi can?

Tan nacahaḡan ra Jesús tan catyí ra:

—Tsiñiḡ yu. Maa tyin ¿a ñaha ca cahvi nyooḡo nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sñi xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

17 Tacan tan nacoḡo ra tsi ra naha, tan quitḡa ra ñuu can cuahán ra ñuu Betania. Tan ican ndoḡo ra tsacuaa can.

Nu cahḡan ra Jesús tsi yutun higo tsa ña tsahá tsiti

(Mr. 11:12-14, 20-26)

18 Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaḡ soco tsi ra. 19 Tan nyeheḡ ra nyaá iin yutun higo yatyin ñi yuhu ityi can. Tan natuhvaḡ ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¿Ndi inga tsaha ña cua cuhva ca un tsiti!

Tan juven ñi cuhva can na ityi tun. 20 Tan tsa nyeheḡ ra tsicá tsihin ra tsa javahaḡ ra tsi tun, iyo xaan cuñiḡ ra naha, tan tsicḡa tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

21 Tan nacahaḡan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahaḡ yu tsihin yutun higo ihya ñi cuví javaha tucu nyooḡo, tyin cuví ndiḡi tucu catyí ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi. 22 Tan tandiḡi tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñiḡi ndo —catyí ra Jesús.

Nu tsicḡa tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi

(Mr. 11:27-33; Lc. 20:1-8)

23 Yahaḡ can tan quihviḡ ra Jesús tsitsi vehe ñuhu cahnu, tan tsitsi tsa jacuahá ra ican, natuhvaḡ ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicḡa tuhun ra naha tsi ra tan catyí ra naha:

—¿Yóo tavaḡ tyiñu tsi un tsa javahaḡ un tyehen? —catyí ra naha.

24-25 Tan nacahaḡan ra Jesús tan

catyí ra:

—Yuhu tucu cuñí yu ndaca tuhun yu tsi nyooho. ¿Yóo jaquitsí tsi ra Juan tyin jacoondutya ra tsi nyivi? ¿A Nyoo jaquitsí tsi ra, o nyivi? Tatun catyí tuhun ndo tsihin yu, cua catyí tuhun tucu yuhu tsihin ndo yóo tava tyiñu tsi yu tsa javahá yu tyeheh —catyí ra Jesús tsihin ra naha.

Tacan tan ra ican naha ra quitsahá caahán yuhu tahan ra naha, tan catyí ra naha:

—Tatun catyí yo tyin Nyoo jaquitsí tsi ra Juan, cua catyí ra tsihin yo: “Tun tacan, ¿nacuenda ña tsinú iñi ndo tsi ra?” **26** Tan tatun catyí yo tyin nyivi jaquitsí tsi ra, yuuhví yo coto cuxaan nyivi tsi yo, tyin tandíhi ñi tsinú iñi ñi tyin ra Juan, cuenda Nyoo cahán ra —catyí ra naha.

27 Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyí tuhun yu tsihin ndo yóo tava tyiñu tsi yu.

Nu caahán ra Jesús iin cuhva cuenda uvi taahan sehe iin rayíi

28 Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayíi, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.” **29** Tan nacahan sehe ra tan catyí ra: “¡Ña cahun yu!” Maa tyin yahá can tan nasamā cuhva tsicá iñi ra tan tsahan ra tsijahá tyiñu ra. **30** Yahá can tan jutu ra cahán ra tsihin inga sehe ra. Tan catyí tucu ra tsihin ra na cahun ra cujaha tyiñu ra. Tan ra ican numi ñi quihín ra tyiñu tan catyí ra: “Vaha, tyaa, cahun maa yu.” Maa tyin ña tsahan ra. **31** Tsitsi tsa nduvi taahan ra can naha ra, ¿ndáa ra javahá tsa cahán jutu ra? —catyí ra Jesús.

Tan nacahan ra naha tan catyí ra naha:

—Ra tsa cahán ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tava xuhun cuenda ra ndacá ñaha tan ñi sií iñi caca nuu, jihna ca ñi cua quihví nu ndacá ñaha Nyoo tan ñavin ca nyooho. **32** Tyin ra Juan, ra jacoondutya tsi nyivi, quitsí ra jacuahá ra tsi ndo nácaa taahán tsi coo cuiti ndo, tan nyooho ña tsinú iñi ndo tsi ra. Maa tyin ra tava xuhun naha ra tan ñi sií iñi caca nuu tsinú iñi ñi tsi ra. Tan nyooho vasu ndi maa nyehe ndo yacan, maa tyin ña nasamā ndo cuhva iyó ndo, tan ña tsinú iñi ndo tsi ra.

Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra

(Mr. 12:1-12; Lc. 20:9-19)

33 Tyaa soho ndo inga cuhva ihya: Tsicoo iin rayíi, tan iyó ñuhu ra. Tan tatsí ra yoho yucu vixi tsa nañi uvas, tan tyihí ra cora. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin cuví jaha cuenda ra tandíhi.

Yahá can tan tsahá nuu ra ñuhu can tsi juhva ra cua jaha tyiñu naha ra, tan cuahán ra inga ñuu. **34** Tan tsa tsaá quivi tsa iyó uvas can, jacuhún ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra. **35** Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. **36** Tacan tan tsa inga tsaha, cuaha ca musu jacuhún tsitoho cora can tan ñavin ca tsa jihna ñi. Maa tyin tumaa tsa javahá ra naha tsihin ra tsa tsahan jihna naha ra, tacan ñi javahá nyico

ra naha tsihin ra ihya naha ra.

37 Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra.

38 Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihi tsa iyó ihya. Na cahni yo tsi ra tan ndoo maa yo tsihin cora ihya”, catyí ra naha.

39 Tacan tan tijn ra naha tsi ra, tan tava ra naha tsi ra ityi tsata cora can, tan tsahni ra naha tsi ra —catyí ra Jesús.

40 Tacan tan tsica tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

41 Tan nacahan ra naha tan catyí ra naha:

—Ña cua cuatu ra, tyin cua cahni ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahan tsi tsi ra cuví tsitoho cora can.

42 Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyehen?

Yuu tsa javita ihni ra javaha vehe,

Yacan cuví yuu tsa ñiñi ca.

Jutu yo Nyoo cuví ra tsa javaha tandihi can.

Tan iyo xaan cuñi yo nyehé yo, catyí tsi.

43 Yacan cuenda catyí yu tsihin ndo tyin ña cua cuhva Nyoo cahun ndo nu ndacá ñaha ra. Tan cua cuhva ra tsi nyivi tsa javahá cuhva cuñi ra tyin nditsa tsahá ñi tsi ñi cundaca ñaha ra. 44 Tan tsa cuenda yuu can, yoo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yoo nyivi, cua taxin nyihi ñi —catyí ra Jesús.

45 Cuhva tsa tuví ñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahān ra Jesús cuhva ihya, 46 cuñi ra naha tijn ra naha tsi ra, maa tyin yuuhví ra naha tsi nyivi tyin tsinú ñi ñi tyin ra Jesús caahán ra cuenda Nyoo.

Nu cahān ra Jesús iin cuhva cuenda vico tindaha

(Lc. 14:15-24)

22 ¹ Quitsaha caahán ra Jesús tsihin nyivi inga tsaha tsihin cuhva, tan catyí ra:

² —Tsa ndacá ñaha Nyoo tsi nyivi cuví tsi tumaa iin rey tsa javaha iin vico tsa cuenda tsa cua tindaha sehe ra. ³ Tan jacuhun ra tsi musu ra na cucana ra naha tsi nyivi tsa jacoto ra tyin cahun ñi, maa tyin ñi ican, ña cuñi ñi cahun ñi. ⁴ Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahni yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra. ⁵ Maa tyin ñi ican ña tyaa yahvi ñi tsa cahān ra. Iin ra tsahan ra nu iyó cora ra, inga ra tsahan ra nu jahá tyiñu ra. ⁶ Tan inga ra naha tijn ra naha tsi musu rey can naha ra tan cañi xaan ra naha tsi ra naha nda cuanda tsahni ra naha tsi ra naha. ⁷ Tacan tan ra rey can cuxaan xaan ra, tan jacuhun ra tsi andarū ra na cucahni ra naha tsi ra tsa tsahni tsi musu can naha ra, tan cahmi ra naha ñuu ra naha. ⁸ Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi cana yu, ña taahan tsi tsa quitsi ñi. ⁹ Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can. ¹⁰ Musu can cuahán ra naha tandihí ñi ityi, tan jandu iin ra naha tsi tandihí nyivi nañihí ra

naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

11 Tacan tan quihvi ra rey can cua nyehe ra tsi tandihi nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsí. 12 Tan catyí ra rey tsihin ra: “Tsa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can. 13 Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. 14 Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

Nu caahan ra Jesús tsa cuenda tsa tyahví nyivi xuhun tsi ra ndacá ñaha nda ñuu Roma

(Mr. 12:13-17; Lc. 20:20-26)

15 Tacan tan cuahán ra fariseo naha ra tan ndoq ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra. 16 Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahan un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi. 17 ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

18 Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsí yu? 19 Janaha jihna ndo iin xuhun tsa tuhvá yo

tyahví tsi ra ndacá ñaha tsi yu —catyí ra.

Tan tsindaca ra naha iin xuhun tsa nañi denario tsi ra. 20 Tan tsa nyehe ra Jesús xuhun can, tsica tuhun ra tsi ra naha tan catyí ra:

—¿Yoo nuu tan yoo sivi nyaá ihya?

21 Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

22 Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

Nu cuñi ra cuví saduceo naha ra jandavi ñaha ra naha tsi ra Jesús

(Mr. 12:18-27; Lc. 20:27-40)

23 Juvín ñi quivi can juhva ra cuví saduceo naha ra tsahan ra naha nu nyii ra Jesús. Tan ra cuví saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsica tuhun ra naha tsi ra Jesús, tan catyí ra naha:

24 —Maestro, ra Moisés catyí ra tyin tatun iin ra tindaha tan tsihi ra tan ña tsicoq sehe ra, taahan tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi. 25 Vaha. Tun iin ra tan iyó utsa sehe yii ra, tan ra tsa jihna ñi tindaha ra. Tan nduve sehe ra tsicoq tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi. 26 Tan juvin ñi tsihi ndihi ra can. Tan ndoq ñaha can tsihin ra tsa tsinu uñi, maa tyin juvin ñi tacan tahan ndihi ra. Tan inducu ñi tahan tandihi tsa utsa ra naha. 27 Tan nu ndihi ña tsihi ndihi maa ñaha can. 28 Tatun nditsa tsa cua nandoto nyivi tsihi, ¿ndaa tsa utsa taahan ra can naha ra cua cuvi

yii ña? Tyin tandihi maa ra naha tindaha tsihin ña —catyí ra naha.

29 Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo. 30 Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuví ñi tumaa cuví ángel tsa iyó gloria.

31 Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

32“Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añaima ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuví ra, tyin Nyoo cuví ra Nyoo cuenda nyivi nyito —catyí ra.

33 Tan tsa tsiñi nyivi tsa caahán ra Jesús, iyo xaan cuñi ñi.

Ley tsa ñiñi ca tsa tsaha Nyoo

(Mr. 12:28-34)

34 Tsa tsitó ra fariseo naha ra tyin ra Jesús tyasi ra yuhu ra saduceo naha ra, ndu iin ra naha. 35 Tan iin ra tsa nyii tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsica tuhun ra tsi ra, tan catyí ra:

36 —Maestro, ¿ndáa ley cuví tsa ñiñi ca?

37 Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa ñi iñi un tan tsihin tsa ñi iñi añaima un, tan tsihin tandihi tsa tsiñi tuñi jiñi un.” 38 Ley ihya cuví tsa ñiñi ca, tan tsa jihna ñi taahán tsi javaha yo. 39 Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi

tyehen: “Cuñi tsi nyivi tahan un tumaa cuñi un tsi maa un.” 40 Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahá Nyoo, tan tandihi tuhun tsa jacuahá ra cuví ndusu yuhu Nyoo tahan tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12:35-37; Lc. 20:41-44)

41 Tsitsi tsa ndi yucú ra fariseo naha ra nu ndu iin ra naha, 42 ra Jesús tsica tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahan ra naha tan catyí ra naha:

—Tata ra David cuví ra.

43 Tacan tan ra Jesús catyí ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

44 Nyoo cahán tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

45 ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

46 Tan yoñi maa cuví nacahan nu cahán ra ndi intuhun maa tuhun. Tan nda quivi can, yoñi ca maa cuñi nducu tuhun tsi ra.

Nu caahán ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra (Mr. 12:38-40; Lc. 11:37-54; 20:45-47)

23 1 Tacan tan ra Jesús catyí ra tsihin tandihi nyivi, tan tsihin ra tsicá tsihin ra:

2 —Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaa ra Moisés. 3 Yacan cuenda tyaa yahvi ndo tsa caahán ra naha tan javaha ndo tandíhi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha.

4 Janducuahá ca ra naha ley tsa tsaha Nyoo tahan tsanaha. Tan cuñí ra naha tsa javaha nyivi tandíhi can. Maa tyin ña cunyeer ñi javahá ñi tandíhi can, tan ndí maa ra naha tan ña cuñí ra naha javaha ra naha can. 5 Tyin maa ra naha tyaa ra naha caja ñii nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandíhi can tyin na nyehe nyivi tyin vaha xaan ca ra naha. 6 Tan nu vaha ca, cuñí ra naha cunyeecu ra naha nu iyó vico tan catsi ra naha. Tan nu vaha ca cuñí ra naha cunyeecu ra naha tsitsi vehe ñuhu. 7 Tan nu tsicá nuu ra naha cuñí ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñí tucu ra naha tsa catyi ñi “maestro” tsihin ra naha.

8 Maa tyin nyoocho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyí tsihin ndo, tan tandíhi ca maa ra naha yañi ndo cuví tsi ra naha. 9 Tan ña cahan ndo Jutu ndo tsihin ndí intuhun rayii ñuu ñayivi ihya, tyin intuhun ñi ra nyaá gloria cuví Jutu ndo. 10 Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. 11 Ra tsa jahá tyiñu tyiñu tandíhi ca ra naha, ra ican cuví ra cahnu ca nu yucú ndo. 12 Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi

ra cua nducahnu ra jaha Nyoo.

13 'iNdahvi nyoocho ra cuví maestro cuenda ley vehe ñuhu tan nyoocho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuvi quihvi nyivi. Tan ndí maa ndo ña quihvi ndo, tan ndí ña tsahá ndo tsa quihvi nyivi tsa cuñí quihvi.

14 'iNdahvi nyoocho ra cuví maestro cuenda ley tan nyoocho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahvi tsa tsihi yii tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

15 'iNdahvi nyoocho ra maestro cuenda ley vehe ñuhu tan nyoocho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñí ndo nañihi ndo vasu intuhun nyivi cunyicun tsi ndo. Tatun tsa quihvi ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

16 'iNdahvi nyoocho ra ndaahvi! Tyin cuñí ndo jaquihin ityi ndo tsi nyivi, ¡maa tyin cuaa ndo! Caahán ndo tyin yóo nyivi cua cahan “Naha Nyoo” tsa cuenda vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo. 17 ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu íi tsi xuhun cuaan can? 18 Tan juvin ñi catyí tucu ndo tyin yóo nyivi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuvi tsi ñi tun ña tyaa yahvi ñi

tsa cahan ñi. Maa tyin tun cua cahan ñi “Naha Nyoo” tsa cuenda tsa jamañi ñi nu altar, tacan tan taahán tsi javaha ñi tsa cahan ñi, catyí ndo. **19** ¡Soho xaan ndo tan cuaa ndo!

¿Ndáa tsa cahnu ca cuví? ¿A tsa jamañi ndo nu altar can, o maa altar tsa jandu íi tsa jamañi ndo? **20** Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndíhi ñi tsa cuenda tandíhi tsa yosó nu altar can. **21** Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

22 Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

23 ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaá yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandíhi nyívi, tsa cundaahvi íni yo tsi ñi, tsa tsinú íni yo tsi Nyoo tan ña nacoo yo tsi ra. Cuñí tsi javaha ndo tandíhi can, tan ña cua jandíhi ndo tsa cuhva ndo diezmo can. **24** Nyooho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyíhi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

25 ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan

coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá íni ndo tsa coo cuaha ndaha tyiñu ndo.

26 ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndíhi ityi tsata.

27 ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandíhi nuu tsa caquiñi.

28 Tacan cuví nyooho, tyin cuñí nyívi tyin vaha xaan íni ndo, maa tyin añima ndo ican quitá tsa jandaví ñaha ndo tan tandíhi tsa caquiñi ndo.

29 ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuí ndo ñaña ra cuví ndusu yuhu Nyoo, tan nacahyi ndo ñaña nyívi vaha tsicoo tahan tsanaha.

30 Tacan tan catyí ndo: “Tun tsatyin tsicoo yo quívi tsicoo tsi tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo.

31 ¡Tsihin yacan ñi tan nacotó ndo tyin cuví ndo tata nyívi tsahñi tsi ra cuví ndusu yuhu Nyoo! **32** ¡Yacan vityin nyehe maa ndo na jaha ndo, javaha ndíhi ndo tsa javaha tsi tsaahnu ndo, tun cuñí ndo!

33 ¡Nyooho nyívi caquiñi cuví ndo, tan nyívi cuví tata coo! ¿Nacaa cua cacu ndo tan ña cua cuhun ndo anyaya? Ña cua cuví. **34** Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha

nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. **35** Yacan cuenda, tsata nyooho cua cunyaa cuatyí tsa cuenda tandihi ra vaha tsa tsahñi tsi tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo. **36** Tsa nditsa catyí yu tsihin ndo, tyin tandihi cuatyí can cua coso siqui nyooho, nyivi tsa iyó vityin —catyí ra Jesús tsihin ra naha.

Nu nducuihya cuñi ra Jesús nyehé ra tsi nyivi ñuu Jerusalén

(Lc. 13:34-35)

37 ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuvi ndusu yuhu Nyoo. Tan cañi ndo yuu tsi tandihi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi sihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo. **38** Nyehe ndo vityin, tyin tsa nacoq ihñi Nyoo tsi ndo. **39** Tan catyí yu tsihin ndo, tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan cuvi ra vatsi tsihin sivi Nyoo Jutu yo —catyí ra Jesús.

Nu caahán ra Jesús tyin cua tani vehe ñuhu cahnu

(Mr. 13:1-2; Lc. 21:5-6)

24 ¹ Quita ra Jesús tsitsi vehe ñuhu cahnu can, tan tsa cuñi cahun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra. ² Maa tyin nacahan ra Jesús tan catyí ra:

—¿A nyehé ndo tandihi tsa iyó ihya? Tsa nditsa catyí yu tsihin ndo, tyin ihya ndi intuhun ca yuu tan ña

cua coso tsata inga tsi. Tandihí maa can tan cua tani —catyí ra.

Nu caahán ra Jesús náa cua cuvi tsa ndi cumañi ca naa ñuhu ñayivi

(Mr. 13:3-23; Lc. 21:7-24; 17:22-24)

3 Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñi ndi tsa catyí tuhun un tsihin ndi, ama cua cuvi tandihi tsa cahán un. ¿Naca tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

4 Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo. **5** Tyin cuaha xaan ra cua quitsi, tan cua cutyiñu ra naha sivi yu, tan cua catyí ra naha: “Yuhu cuvi ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha. **6** Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi. **7** Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. **8** Tandihí yacan cua cuvi nu ndi cua quitsaha nyehe nyivi tundoho.

9 Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihi nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu. **10** Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. **11** Tan cuaha xaan ra caahán cuendu cua coo, tan cua catyí ra naha tyin cuenda Nyoo caahán ra naha.

Tan cuaha xaan nyivi cua jandavi ñaha ra naha. **12** Tan cuaha xaan tsa caquiñi cua coo. Yacan cuenda cua jandihî ñi tsa cuñî tahan ñi tsi ñi.

13 Maa tyin nyivi tsa tsinú iñi tsi yu nda cuanda nu ndihî, tan ña cua ndu uvi iñi ñi, cua cacu ñi. **14** Tan tanîi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihî ñuu tuhun vaha ihya, tacan tan cua naa ñayivi.

15 'Ra Daniel, ra cuvî ndusu yuhu Nyoo, tyaá ra nu tutu Nyoo tyin coo tsa cua janducaquiñî, tsa cua jativi. Quivi tsa cua nyehe ndo can tsitsi vehe ñuhu Nu Ii, (nyooho tsa cahví, na cutuñi iñi ndo). **16** Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu.

17 Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. **18** Tan nyivi yucú tsitsi cuhu ña cua cunuhu jihna ñi cunaquihin ñi jahma ñi. **19** ¡Ndahvi ñiñaha tsa ñuhu sehe quivi can! O tatun iyó sehe ñi tsa tyaxín, ¡ndahvi ñi can! **20** Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo. **21** Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha. **22** Tyin tatun ña cua janducuiti Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñî ra tsi nyivi nacatsî maa ra.

23 'Tatun yóo cua cahan tsihin ndo: "Jihna ndo, ihya nyaá ra Cristo" o "Nyehe ndo, ndacan nyaá ra Cristo", ña tsînu iñi ndo. **24** Tyin cua quitsi ra jandavi ñaha naha ra tan cua catyi ra naha tyin ra Cristo cuvî ra naha. Cua catyi ra naha tyin ndusu yuhu Nyoo cuvî ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda

cuanda nyivi tsa nacatsî maa Nyoo tun tsatyin cuvi jaha ra naha.

25 Vaha tyin tsa tsitó ndo vityin ihya, jaha ndo cuenda tsi ndo quivi can.

26 Yacan cuenda tatun catyi nyivi tsihin ndo: "Nyehe ndo, va ra Cristo nyii nu tsiqui can", Ña cûhun ndo. O tatun catyi ñi tsihin ndo: "Nyehe ndo, nyii ra tsitsi cuarto ihya", ña tsînu iñi ndo. **27** Tyin tumaa tsa cañî tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayîi tsa quee nda gloria.

28 Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

Nacaa cua quitsi Rayîi tsa quee nda gloria inga tsaha

(Mr. 13:24-37; Lc. 21:25-33; 17:26-30, 34-36)

29 'Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihî tsa iyó andivi cua nacanda.

30 Tacan tan cua quituvi seña ityi andivi tyin vatsî yuhu Rayîi tsa quee nda gloria. Cua quitsi yu nu vico ityi andivi tsihin tunyee iñi cahnu tan tsihin tsa cahnu cuvî Nyoo. Tan tandihî nyivi iyó nu ñuhu ñayivi, cua vacu tsa xaan ñi tsa cua nyehe ñi tsi yu. **31** Tan cuaha ángel cuenda yu cua jaquitsi yu tyin ñihi cua tivî ra naha cutu tan cua jandu iin ra naha tsi nyivi nacatsî maa Nyoo. Cua quita ñi tanîi cahnu nu ñuhu ñayivi, nda cuanda nu ndihî ñuhu ñayivi tan nda cuanda nu ndihî andivi.

32 'Cutuñi iñi ndo iin cuhva yutun tsa nañî higo: Tatun tsa yutya soco tun, tan tsa caná ndaha yutya tun, nyooho tsitó ndo tyin tsa cua coo tsiti tun. **33** Tan juvin ñi tacan, tatun tsa cuvî tandihî yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuvî tsi.

34 Tsa nditsa catyí yu tsihin ndo tyin tandihí yacan cua cuvi jihna, tsa ndi cumañi ca cúu nyívi iyó nu ñuhu ñayívi. 35 Tan coo quívi cua cunaa andívi tan tsihin ñuhu ñayívi, maa tyin tuhun caahán yuhu, ña cua cundihí tsi tyin cua cundaa tandihí tsi.

36 'Maa tyin quívi tan hora tsa cua cuvi yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

37 'Tumaa cuví quívi tsa tsicoo ra Noé, tacan cua cuví quívi tsa cua quítsi nyico yuhu Rayíi tsa quee nda gloria. 38 Quívi tsa ndi cumañi ca cuun savi xaan, nyívi can, tsatsí ñi, tsihí ñi, tindahá ñi, tan tsahá ñi tsi sehe síihí ñi tindaha nda cuanda quívi quíhví ra Noé tsitsi yutun ndoo. 39 Tan sana íñi ñi tan tsaq savi tan tañi tandihí ñi. Tan tacan sana íñi ñi tan cua tahan tsi quívi quítsi nyico yuhu Rayíi tsa quee nda gloria.

40 Tan tatun yucú uvi taahan rayíi tsitsi cuhu quívi can, intuhun ñi ra cua quihín yu, tan cua nacoo yu tsi inga ra. 41 Tan quívi can uvi taahan ñaha cua nyico ñi. Intuhun ña cua naquihín yu, tan inga ña cua ndoo ña. 42 Cúatu vaha ndo tyin ña tsitó ndo náa hora cua quítsi ra ndacá ñaha tsi ndo. 43 Tan coto ndo tuhun ihya tyin tatun iin tsitoho vehe tan tsitó ra náa cuhva cua quíhví ñasuhu tsitsi vehe ra, cua cuatu vaha ra tan ña cua cuhva ra tsa quíhví ñasuhu can. 44 Yacan cuenda nyooho, cúatu vaha ndo. Tyin sana íñi ndo, tan cua quítsi nyico yuhu Rayíi tsa quee nda gloria.

Musu vaha tan musu ña vaha

(Lc. 12:41-48)

45 'Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihí ca musu. 46 Tan síi xaan cuñí

ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihí tsa taahán tsi ica ra. 47 Tan tsa nditsa catyí yu tsihin ndo, tyin tsitoho ra cua nacuhva ra tandihí cuii tsa cumí ra, cua quíhví ndaha ra, tyin vaha tyaá yahvi ra tsihin tyiñu jahá ra. 48 Maa tyin iin musu ña vaha tsicá íñi ra tyin cua cucuee tsitoho ra. 49 Tacan tan quítsaha cañi ra tsi inga musu, tan tsatsí ra tan tsihí ra nyixi tsihin ra tsiñi naha ra. 50 Tacan tan sana íñi ra tan cua tsa tsitoho ra quívi tsa ña ndatú ra tsi ra, tan hora tsa ña tsitó ra. 51 Tacan tan tsitoho ra ñihí xaan cua tatsi tuñi ra tsi ra tumaa tuhvá maa ra icá tsihin nyívi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuvi nuhu ra tsa nyehé ra tundoho.

Nu cahán ra Jesús iin cuhva cuenda utsi taahan ñaha yoco

25 ¹ 'Tsa ndacá ñaha Nyoo tsi nyívi cuví tsi tumaa utsi taahan ñaha yoco tsa quihín lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha. ² Uhun taahan ñi, soho xaan ñuhú íñi ñi, tan inga uhun taahan ñi can catsi xaan tsicá íñi ñi. ³ Ñi tsa soho ñuhú íñi can, nyisó ñi lámpara ñi maa tyin ña quihín ñi juhva ca acetye tsa natyihi ñi tsitsi lámpara ñi tatun ndihí tsi. ⁴ Tan ñi tsa catsi tsicá íñi can, nyisó síin ñi inga yutyi acetye tsa cua natyihi ñi tsitsi lámpara can tatun ndihí acetye tsa yihí tsitsi lámpara can. ⁵ Tan ra tsa cua tindaha can cucueé xaan ra, tacan tan tiin ñumaahna tsi tandihí ñi, tan quixí ñi. ⁶ Tacan tan maa ñuu tsiñi ñi iin ndusu tsa catyí tyehen: "¡Tsa vatsí ra tsa cua tindaha! ¡Quita ndo, jatahan ndo tsi ra!" ⁷ Tandihí ñi can nduvitá ñi tan quítsaha janduvahá ñi lámpara ñi. ⁸ Tacan tan

quitsahā caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñi ndahva lámpara ndi”, catyí ñi. ⁹ Maa tyin ñi yoco tsa catsi tsicá iñi can nacahan ñi tyehen: “Ña cua kuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo cujata ndo nu cuyahví tsi.” ¹⁰ Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaa ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundaşi yuvehe can. ¹¹ Yahā can tan tsaa nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quihví ndi!”, catyí ñi. ¹² Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

¹³ Tacan tan quitsahā caahán ra Jesús:

—Cyatú vaha ndo, tyin ña tsitó ndo ndáa quiví tan náa hora cua quitsi nyico yuhu Rayi tsa quee nda gloria.

Nu caahán ra Jesús tsihin yo na jaha tyiñu yo tsihin tsa tsahā Nyoo tsi yo

(Lc. 19:11-27)

¹⁴ Tsa ndacá ñaha Nyoo tsi nyivi cuví tsi tumaa iin rayi tsa nyaá cua quita cuhun inga ñuu nu cañi. Tan canā ra tsi musu ra, tan tsahā cuenda ra xuhun ra tsi ra naha tyin jaha cuenda ra naha.

¹⁵ Iin ra tsahā ra uhun mil xuhun, tan inga ra tsahā ra uvi mil xuhun, tan inga ra tsahā ra iin mil. Tsahā ra tsi intuhun intuhun ra nácaa kuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra. ¹⁶ Musu tsa quihñin uhun mil xuhun can, ñihi jahā tyiñu ra tsihin xuhun can, tan jahā canaa ra inga uhun mil ca siqui tsi. ¹⁷ Tan

juvin ñi tacan tucu ra tsa quihñin uvi mil can, jahā canaa ra uvi mil ca tsihin xuhun can. ¹⁸ Maa tyin ra tsa quihñin intuhun ñi mil can, tsahan ra tan tsatyā ra iin yavi tsitsi ñuhu tan tyihí xeehe ra xuhun tsitoho ra.

¹⁹ Cuaha quivi yahā tan tsaa nyico tsitoho musu can. Tan quitsahā natavá cuenda ra tsihin intuhun intuhun ra naha. ²⁰ Jihna ca ra tsa quihñin uhun mil xuhun can tsaa, tan nacuhvā cuenda ra uhun mil ca siqui can, tan catyí ra: “Taa, uhun mil tsahā un tsi yu, juhun inga uhun mil ihya tsa jahā canaa yu siqui tsi.”

²¹ Tan tsitoho ra catyí ra tsihin ra: “Vaha. Iin musu vaha xaan cuví un. Tan javahā un tandihi tsa cahān yu tsihin un. Luxu ñi xuhun tsahā yu tsi un tan vaha xaan tsatyñu un itsi. Vityin cuaha ca cua kuhva cuenda yu tsi un. Quihví nu vaha ihya, tan sii cuñi un tsihin yu.” ²² Yahā can tan tsaa musu tsa quihñin uvi mil xuhun can, tan catyí ra: “Taa, uvi mil ñi tsahā un tsi yu, juhun uvi mil ca ihya tsa jahā canaa yu siqui tsi.” ²³ Tan catyí tsitoho ra tsihin ra: “Vaha. Iin musu vaha xaan cuví un, tan javahā un tandihi tsa cahān yu tsihin un. Luxu ñi xuhun tsahā yu tsi un tan vaha xaan tsatyñu un itsi. Vityin cuaha ca cua kuhva cuenda yu tsi un. Quihví nu vaha ihya, tan sii cuñi un tsihin yu”, catyí ra. ²⁴ Tan kuhva tsa tsaa musu tsa quihñin intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihín un xuhun nu ña jahá tyiñu un, tan cuñi un naquihin un cosecha nu ña tatsi un. ²⁵ Yacan cuenda nayuhví yu tan tsahan yu tan tyihí xeehe yu xuhun un tsitsi ñuhu. Juhun xuhun ihya tsa tsahā un tsi yu”, catyí ra. ²⁶ Tacan tan nacahan tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihín yu nu ña jahā tyiñu yu, tan

quihín yu cosecha nu ña tatsí yu, 27 ¿nácaa tyin ña tsityihí un xuhun yu nu banco? Tun tsatyin tacan javahá un, tsa cua quitsi nyico yu cuvi naquihin yu xuhun can tsihin xuhun síqui tsa jahá canaa tsi”, catyí ra. 28 Tacan tan quitsahá caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cūhva ndo tsi ra tsa ndahá utsi mil. 29 Tyin nyívi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyívi tsa ña cuñí jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndíhi yu. 30 Tan musu tsa ña tsiñí ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaa ra, tan cahyu ña cua cuvi nuhu ra tsihin tsa nyehé ra tundoho.”

Nu cahan ra Jesús tyin cua cutuñi tandíhi nyívi

31 'Quívi cua quitsi nyico yuhu Rayí tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu sí caá tan cua cundaca ñaha yu. 32 Tandíhi cuii nyívi iyó naní cahnú nu ñuhu ñayívi cua nataca ñi nuu yu. Tan cua natava síin yu tsi intuhun intuhun ñi, tumaa ra jahá cuenda mbee tavá síin ra tsi mbee ticatyí tan tavá síin tucu ra tsi mbee chivo. 33 Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu. 34 Tacan tan yuhu tsa cuví yu Rey cua catyí yu tsihin nyívi nyecú tsiyo cuaha yu: “Ñaha nyooho nyívi tsa nasoco Jutu yu. Na quihin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quívi javahá ra ñuhu ñayívi. 35 Tyin quívi tsisoco yu, nyooho tsahá ndo tsa tsatsí yu. Quívi na ityi íñi yu, tsahá ndo ndutya tsihí yu. Tan quívi tsicá nuu yu cuví

yu ra inga ñuu, tsahá ndo nu quixí yu. 36 Quívi cumañí jahma yu, tsahá ndo jahma tsinditsí yu. Quívi cuhví yu, tsinyehé ndo nu canyí yu. Tan quívi tsinyí yu vehe caa, tsinyehé ndo nu nyí yu”. Tacan cua cahan yu tsihin ñi. 37 Tan ñi tsa vaha íñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehé ndi tsisoco un, tan tsahá ndi tsa tsatsí un? ¿Ama nyehé ndi na ityi íñi un tan tsahá ndi tsa tsihí un? 38 ¿Ama nyehé ndi tsi un tsicá nuu un cuví un ra inga ñuu tan tsahá ndi vehe nu quixí un? ¿Ama cumañí jahma un, tan tsahá ndi jahma tsinditsí un? 39 ¿Ama nyehé ndi cuhví un, o tsinyí un vehe caa, tan tsahan ndi tsinyehé ndi tsi un?” cua catyí ñi. 40 Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandíhi tumañi íñi tsa javahá ndo tsi ra ndaahvi, ra yañi yu, tsi yuhu javahá ndo tumañi íñi”, cua catyí yu tsihin ñi.

41 'Tacan tan yuhu tsa cuví Rey cua cahan yu tsihin nyívi tsa yucú tsiyo satyin yu tyehen: “Catsiyo ndo nuu yu, nyooho, nyívi taahán tsi cuhun anyaya. Cuaahan ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan tatyí ña vaha cuenda nu. 42 Tyin tsisoco yu tan nyooho ña tsahá ndo tsa catsi yu. Na ityi íñi yu tan ña tsahá ndo ndutya coho yu. 43 Tsicá nuu yu cuví yu iin ra inga ñuu, tan ña tsahá ndo nu cusu yu. Cumañí jahma yu tan ña tsahá ndo jahma cunditsi yu. Nacuhví yu tan tsinyí yu vehe caa, maa tyin ña tsahan ndo tsinyehé ndo tsi yu nu tsinyí yu”, cua catyí yu tsihin ñi. 44 Tacan tan cua catyí ñi tsihin yu: “Jutu Mañi yu, ¿ama nyehé ndi tsisoco un, o na ityi íñi un, o tsicá nuu un cuví un ra inga ñuu, o nduve jahma un, o nacuhví un, o tsinyí un vehe caa, tan ña jatyinyee ndi tsi un?” cua catyí ñi. 45 Tan yuhu tsa cuví yu Rey cua catyí

yu tsihin ñi: “Tsa nditsa caahán yu tsihin ndo tyin tandihí maa tsa ña javahá ndo tsihin nyivi ndaahvi ihya, ña javahá ndihí ndo tsihin yu, cuví can”, cua catyi yu tsihin ñi. **46** Tacan tan ñi can cua cuhun ñi nu cayú ñuhu tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

Nu nducú ra mandoñi naha ra cuhva nácaa tan tiin ra naha tsi ra Jesús

(Mr. 14:1-2; Lc. 22:1-2; Jn. 11:45-53)

26 ¹ Cuhva tsa ndihí cahán ra Jesús tandihí tuhun can, tan quitsahá catyí ra tsihin ra tsicá tsihin ra:

² —Nyooho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayí tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyí ra.

³ Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu. ⁴ Tan jandaá ra naha tyiñu nácaa cua jandavi ñaha ra naha tsi ra Jesús tan tiin ra naha tsi ra tan cahñi ra naha tsi ra. ⁵ Tan catyí ra naha:

—Ña cua cahñi yo tsi ra quivi maa vico, coto nduvaa xaan nyivi —catyí ra naha.

Nu tyosó iin ñaha ndutya tami jiñi ra Jesús

(Mr. 14:3-9; Jn. 12:1-8)

⁶ Ra Jesús nyíi ra ñuu Betania, vehe ra Simón, ra tsa yihí cuehe tyaahyu. ⁷ Tan natuhvá iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyosó ña ndutya can jiñi ra. ⁸ Tsa nyehé ra tsicá tsihin ra,

nduxaán ra naha tan catyí ra naha:

—¿Nacuenda jativi ña ndutya tami can? ⁹ Vaha ca tun tsatyin xico ña can, tan ñihi cuaha ña xuhun tsihin can. Tan cuví jatinyee ña tsi nyivi ndaahvi tsihin xuhun can —catyí ra naha.

¹⁰ Tan tsa tsiñj ra Jesús tsa caahán ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

¹¹ Tyin nyivi ndaahvi tandihí ñi quivi cua coo ñi tsihin ndo, maa tyin yuhu, ña naha ca cua cunyi yu tsihin ndo.

¹² Tyosó ña ndutya tami siqui cuñu ñuhu yu, tyin janduvahá ña itsi tyin cua cuhun tsi tsitsi ñuhu. ¹³ Tsa nditsa catyí yu tsihin ndo, tyin tandihí ñi nu cua cahan nyivi tuhun Nyoo tanií cahnu ñuhu ñayivi, cua nacatyí tuhun tucu ñi tsa javahá ñaha ihya, na nducuhun iñi nyivi tsi ña —catyí ra Jesús.

Nu xico ra Judas Iscariote tsi ra Jesús

(Mr. 14:10-11; Lc. 22:3-6)

¹⁴ Tacan tan iin ra tsicá tsihin ra Jesús, ra tsa nañí Judas Iscariote, tsaahán ra tsicahán ra tsihin ra jutu tsa cuví ityi nuu naha ra. ¹⁵ Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ra ndo?

Tacan tan ra jutu can naha ra tsaahá ra naha oco utsi xuhun cuitsin tsi ra. ¹⁶ Tan nda quivi can tan quitsahá nducú ra Judas cuhva cua nacuhva cuenda ra tsi ra Jesús tsi ra jutu can naha ra.

Nu cuxiñj ra Jesús tsihin ra tsicá tsihin ra

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Quivi jihna ñi tsa quitsahá vico nu tsatsí nyivi paan tsa nduve yutsan

iya yihí, ra tsicá tsihin ra Jesús natuhvā ra naha nu nyaá ra tan quitsahā tsicá tuhun ra naha tsi ra tan catyí ra naha:

—¿Numaa cuñí un tsa cujanduvaha ndi tsa cuxiñi un cuenda vico pascua ihya?

18 Tan catyí ra Jesús tsihin ra naha:

—Cuaahan ndo tsitsi ñuu nda vehe rayii ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyí ndo tsihin ra —catyí ra Jesús.

19 Tacan tan javahā ra naha cuhva cahān ra Jesús tsihin ra naha. Tan janduvahā ra naha tsa cuxiñi ra naha vico pascua can.

20 Tsa cunaaha tan tsicunyaā ra Jesús nu mesa tsihin tandihi utsi uvi ra tsicá tsihin ra. **21** Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

22 Tan nducuihya xaan cuñí ra naha, tan quitsahā tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

23 Tan nacahān ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu. **24** Yuhu, Rayii tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacū ra —catyí ra Jesús.

25 Tacan tan nacahān ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahān ra Jesús, tan catyí ra:

—Juvín un.

26 Tsitsi tsa tsatsí ra naha, ra Jesús quihñ ra paan tan nacuhvā ra tyahvi

nyoo tsi Nyoo, tan tsahnū sava ra, tan tsahā ra tsi ra tsicá tsihin ra, tan catyí ra tsihin ra naha:

—Catsi ndo. Paan ihya cuví tumaa cuñu ñuhu yu.

27 Yahā can tan quihñ tucu ra vasu vinu, tan nacuhvā ra tyahvi nyoo tsi Nyoo, tan jayahā ra tsi tandihi ra naha tan catyí ra:

—Coho tandihi ndo vinu ihya.

28 Tyin cuví tsi tumaa ñiñi yu. Tan tsihin ñiñi yu cua cundaa tyiñu tsa ndoo Nyoo tsihin ndo, tyin cua cati ñiñi yu tsa cuenda tsa vaha tsi nyivi cuaha, tyin tsihin ñiñi yu cua coo tucahnu iñi cuatyí ñi. **29** Tan catyí yu tsihin ndo, tyin ña cua coho ca yu tahan vinu tsa cuví ndutya uvas ihya, nda cuanda tsa coho yu vinu tsaa tsihin ndo nda nu ndacá ñaha Jutu yu gloria —catyí ra.

Nu cahān ra Jesús tyin cua cahān ra Pedro tyin ña nacotó ra tsi ra

(Mr. 14:26-31; Lc. 22:31-34;
Jn. 13:36-38)

30 Tsa yahā tsa tsitā ra naha iin yaa Nyoo, tan cuahán ra naha yucu Olivo. **31** Tacan tan quitsahā caahán ra Jesús tsihin ra naha:

—Tandihi nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

32 Maa tyin tsa yahā nandoto yu, jihna ca yu cua cuhun Galilea, tsa ndi cumañi ca cuhun nyooho.

33 Tacan tan nacahān ra Pedro tan catyí ra:

—Vasu ndi maa tandihi ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

34 Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi

cumañi ca vacu tsitooho, uñi tsaha
cua cahan un tyin ña nacotó un tsi yu
—catyí ra Jesús.

35 Tan ra Pedro catyí ra:

—Vasu ndi maa cúu yu tsihin un,
maa tyin ña cua catyí yu tyin ña
nacotó yu tsi un —catyí ra.

Tan juvin ñi tacan catyí tandihí ca
ra tsicá tsihin ra.

**Nu tsicān tahvi ra Jesús tsi Nyoo
nda Getsemaní**

(Mr. 14:32-42; Lc. 22:39-46)

36 Tacan tan tsaq ra Jesús tsihin ra
tsicá tsihin ra iin nu iyó cuaha yutun
nu nañi Getsemaní, tan catyí ra tsihin
ra naha:

—Cunyecu ndo ihya tsitsi tsa
cuahán yu ndacan cua ndacan tahvi
yu.

37 Tan quihín ra tsi ra Pedro tan
nduvi sehe ra Zebedeo cuahán tsihin
ra. Tan quitsi tucuihya iñi cahnu tsi
ra, tan tsa tuñu cuñi ra. **38** Tacan tan
catyí ra tsihin ra naha:

—Cahnu xaan tucuihya iñi nyaá
añima yu, nda cuanda cuñi cahñi ña
can tsi yu. Ndo ndo ihya tan coo
nyito ndo tsihin yu —catyí ra.

39 Tacan tan cuahán ra Jesús luxu
ca ityi nuu tan tsicuiñi tsiiti ra tan
tsaquín ra nuu ra nda nu ñuhu, tan
tsicān tahvi ra tsi Nyoo tan catyí ra:

—Tyaa, tun tsatyin cuvi jatsiyo
nyaha un tundoho ihya siqui yu, vaha
xaan. Maa tyin na ña cuvi cuhva cuñi
maa yu, tan na cuvi cuhva cuñi maa
un —catyí ra.

40 Tacan tan tsaq ra nu yucú ra
tsicá tsihin ra, tan nyehe ra tyin quixí
ra naha. Tan catyí ra tsihin ra Pedro:

—¿A ña cuvi coo nyito ndo tsihin
yu vasu tan intuhun hora? **41** Coo
nyito ndo, tan ndācan tahvi ndo tsi
Nyoo; tacan tan ña cua javaha ndo
cuhva cuñi nu ña vaha. Tsa nditsa
tyin añima ndo, cuñi xaan tsi nanducu
tsi tsi Nyoo, maa tyin cuñu ñuhu ndo
cuví tsa vita cuñi —catyí ra Jesús.

42 Tan tsa tsahan ra tsa tsinu uvi
tsaha, tsicān tahvi ra tyehen:

—Tyaa, tatun ña cuvi tsa jatsiyo
nyaha un tundoho ihya siqui yu, na
cuví cuhva cuñi maa un —catyí ra.

43 Tacan tan tsaq ra inga tsaha tan
nyehe ra tyin quixí nyico ra tsicá
tsihin ra, tyin tsicundasí maa tinuu ra
naha tsihin tsa cuñi xaan ra naha
cusu ra naha. **44** Tacan tan nacoq ra
tsi ra naha, tan cuahán ra tsa tsinu
uñi tsaha cua ndacan tahvi ra. Tan
tsicān tahvi ra tsi Nyoo juvin ñi maa
tsihin tuhun tsa tsa yahā cahan ra.

45 Tacan tan tsaq nyico ra nu yucú ra
tsicá tsihin ra, tan catyí ra tsihin ra
naha:

—Vityin cusu ndo tan quitatu ndo.
Tyin tsa tsaq cuhva tsa cua nacuhva
cuenda ra can tsi Rayiñ tsa queq nda
gloria tsi ra iyó cuatyí naha ra.

46 Ndqvita ndo, cohon ndo. Tyin tsa
vatsí ra tsa xico tsi yu —catyí ra
Jesús.

**Nu tsahā cuenda ra Judas tsi ra Jesús
tsi nu xaan iñi tsi ra nahnu**

(Mr. 14:43-50; Lc. 22:47-53; Jn. 18:2-11)

47 Ndi caahán ca ra Jesús yacan,
tan tsaq ra Judas, ra tsa cuví iin ra
tsicá tsihin ra Jesús. Tan tsihin ra
Judas tsaq tucu cuaha xaan nyivi
ndahá mityi tan yutun jacuhun ra
cuví jutu tsa cuví ityi nuu naha ra tan
ra cuví mandoñi nyivi Israel naha ra.

48 Tan ra Judas, ra tsa tsahá cuenda
tsi ra Jesús, tsa yahā tsahā ra iin seña
tsi ra can naha ra, tyin coto ra naha
yóo cua tiin ra naha. Tyin tsa yahā
cahan ra tsihin ra naha:

—Ra tsa cua tyayuhu yu, ra ican
cuví ra tsa cua tiin ndo.

49 Tacan tan natuhva ra Judas nu
nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

50 Tacan tan nacahan ra Jesús tan
catyí ra tsihin ra:

—¿Náa tyiñu vatsí un ñih?

Tacan tan natuhvā ra can naha ra tan tñn ra naha tsi ra Jesús.

51 Tacan tan iin ra cutahán tsihin ra Jesús, tava ra mityi tan tsahnyā ra soho musu jutu tsaahnu tsa cuví ityi nuu. 52 Tan catyí ra Jesús tsihin ra:

—Natyíhi mityi un tsitsi vena un.

Tyin tandíhi nyívi tsa cañi tahan tsihin mityi, juven ñi tsihin mityi cua cúu ñi. 53 ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

54 Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

55 Tacan tan catyí ra Jesús tsihin tandíhi nyívi:

—¿A vatsí tñn ndo tsi yu tumaa cua tñn ndo iin ñasuhu? tyin ndahá ndo mityi tan yutun. Tandíhi quívi tsinyí yu jacuahā yu tsi ndo tsitsi vehe ñuhu cahnu, tan ña tñn ndo tsi yu. 56 Tandíhi yacan cuví tyin tacan tan cundaa cūhva catyí tuhun Nyoo, tsa tyaā ra cuví ndusu yuhu Nyoo tahān tsanaha.

Tacan tan tandíhi ra tsicá tsihin ra, tsinū ra naha. Tan ndoq intuhun ña maa ra.

Nu tsicā tuhun ra mandoñi naha ra tsi ra Jesús tatun Sehe Nyoo cuví tsi ra

(Mr. 14:53-65; Lc. 22:54-55, 63-71; Jn. 18:12-14, 19-24)

57 Tan ra tsa tñn tsi ra Jesús, tsindacā ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. 58 Tan ra Pedro cuahán ra tsata ra naha, tan tsaā ra nda nuquehe vehe ra Caifás can. Tan quíhvī ra tan ndoq ra nyíi ra tsihin vitya can naha ra, tyin cua nyehe ra nácaa cua quita tuhun can.

59 Ra jutu tsa cuví ityi nuu naha

ra, tan ra mandoñi naha ra, tan tandíhi ra cumí tyiñu naha ra, nducū ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra. 60 Maa tyin ña ñihī maa ra naha cuatyí tyaa ra naha siqui ra, vasu ndi maa cuaha nyívi tsahān ñi tsicahān ñi cuendu siqui ra. Tan nu ndíhi tuhun, tsaā uvi ca tsa ndaa tsa caahán cuendu. 61 Tan catyí ra naha:

—Ra ihya, catyí ra tyin cuví cani ra vehe ñuhu cahnu Nyoo, tan tsitsi tsa uñi quívi cua janduvita ra tsi inga tsaha —catyí ra naha.

62 Tacan tan ra jutu tsa cuví ityi nuu can, nduvitā ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

63 Maa tyin ra Jesús ña nacahān ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

64 Tan catyí ra Jesús tsihin ra:

—Juvén yu cuví. Tan catyí tucu yu tsihin ndo, tyin cua nyehe ndo tsi yuhu, Rayíi tsa quee nda gloria, cunyaa yu xiin cuaha Nyoo ra iyó tandíhi tunyee iñi, tan cua nyehe ndo nu cua quitsi yu nu vico ityi andívi inga tsaha —catyí ra.

65 Tacan tan ra jutu tsaahnu tsa cuví ityi nuu can tsahnyā ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandíhi ca ra naha:

—Ra ihya tsicoq cuatyí ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra. 66 ¿Náa catyí ndo vityin?

Tan nacahān ra naha tan catyí ra naha:

—Iyó cuatyí ra, yacan taahán tsi

tša cúu ra.

67 Tacan tan tiv̄i s̄i ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui. 68 Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

Nu cah̄an ra Pedro tyin ña nacotó ra tsi ra Jesús

(Mr. 14:66-72; Lc. 22:56-62; Jn. 18:15-18, 25-27)

69 Tsitsi tsa ndi nyíi ra Pedro nuquehe ityi tsata vehe can, tan iin ñaha tsa cuví musu jutu can, natuhv̄a ña nu nyaá ra tan catyí ña tsihin ra:

—Yooho tucu tsic̄a un tsihin ra Jesús, ra Galilea can.

70 Tan ra Pedro catyí ra nuu tandih̄i nyiv̄i yucú can:

—Ña tsic̄a yu tsihin ra can. Ña tsitó yu náa caahán un.

71 Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsic̄a ndih̄i tucu ra ihya tsihin ra Jesús, ra ñuu Nazaret —catyí ña.

72 Tan inga tsaha tyih̄i xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

73 Tañi cuui ca, tan ra yucú can natuhv̄a ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

74 Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvín ñi cuhva can navacú tsitooho. 75 Tacan tan nducuhun iñi ra Pedro tsa cah̄an ra Jesús tsihin ra: “Tsa ndi cumañi ca vacu tsitooho,

yooho tsa yah̄a cah̄an un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quit̄a ra ican, tan tsacú xaan ra tsa cuiihya cuñi ra tsa javah̄a ra tacan.

Nu nacuhv̄a cuenda ra naha tsi ra Jesús tsi ra Pilato

(Mr. 15:1; Lc. 23:1-2; Jn. 18:28-32)

27 ¹ Tan tsa tuv̄i inga quiv̄i, tandih̄i ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. ² Tan nuuhñi ra jah̄a ra naha. Tan tsah̄an ra naha tsinacuhv̄a cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsih̄i ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uv̄i iñi ra tsa javah̄a ra, tan nacuhv̄a ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. ⁴ Tan catyí ra: —Tsicoo cuatyí yu, tyin tsah̄a cuenda yu tsi iin ra nduve cuatyí na cúu ra.

Tan nacah̄an ra naha tan catyí ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quit̄a ra cuahán ra tsityih̄i ra yoho jucun ra tan ticaa ra tsi ra iin nu yutun, tan tsih̄i ra.

⁶ Ra cuví ityi nuu tsihin jutu can naha ra naquih̄in ra naha xuhun can tan catyí ra naha:

—Ña cuví tyih̄i yo xuhun ihya tsitsi caja nu yih̄i xuhun tsa tsah̄a nyiv̄i tsi Nyoo tyin xuhun tsa cuyahv̄i ra tsa cua cati niñi cuví can.

⁷ Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi

nyivi inga ñuu tun tsihi ñi ñuu can. **8** Yacan cuenda nañi ñuhu can nda cuanda vityin “Ñuhu Cuenda Tsa Tsati Nini Nyivi”. **9** Tacan cuvi tyin cunda tsa tyaq ra Jeremias, ra cuvi ndusu yuhu Nyoo tahan tsanaha nu catyí tsi tyehen: “Juvín ñi maa ra naha quihin nyico tsa oco utsi xuhun cuitsin, tsa jata ra naha tsi ra Cristo. **10** Tan tsihin can, jata ra naha ñuhu tsa nañi ‘Ñuhu Ra Javaha Quisi’, tacan catyí Jutu Mañi yo tsihin yu”, catyí tsi.

**Nu nyehe ra Pilato tyin nduve
cuatyí ra Jesús**

(Mr. 15:2-5; Lc. 23:3-5; Jn. 18:33-38)

11 Tsindaca ra mandoñi can naha ra tsi ra Jesús nuu ra ndaca ñaha, tan ra can tsica tuhun ra tsi ra, tan catyí ra:

—¿A yooho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

12 Tan cuhva tsa tyaq ra jutu can naha ra tan ra mandoñi naha ra cuatyí siqui ra, ña nacahan maa ra.

13 Tacan tan catyí ra Pilato tsihin ra:

—¿A ña tsiñi un tandihi tsa caahan ra naha siqui un?

14 Maa tyin ra Jesús ña nacahan maa ra. Tan iyo xaan cuñi ra ndaca ñaha can tyin ña nacahan ra.

**Nu cahan ra cumí tyiñu tyin taahan
tsi cúu ra Jesús**

(Mr. 15:6-20; Lc. 23:13-25;
Jn. 18:38-19:16)

15 Tan vico pascua tuhvá ra ndaca ñaha jañá intuhun ra yucú vehe caa. Ndáa ra tsa nacatsi maa nyivi, juvín ra cua quita nuña. **16** Tan quivi can nyíi iin ra tsa nañi Barrabás vehe caa. Tan tandihi nyivi tsitó tuhun ra. **17** Tan cuhva tsa ndu iñ nyivi, ra Pilato tsica tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

18 Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsaha cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihi ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús. **21** Tacan tan ra ndaca ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahan ñi, tan catyí ñi:

—Jaña tsi ra Barrabás.

22 Tan ra Pilato tsica tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañi Cristo ihya?

Tandihi ñi nacahan ñi tan catyí ñi:

—¿Tyaa tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javaha ra? Maa tyin maa ñi cana tsaa ñi inga tsaha tan catyí ñi:

—¿Tyaa tsi ra nu cruu na cúu ra!

24 Tsa nyehe ra Pilato tyin ña cuvi jaha ra tsi nyivi, tyin ñihi xaan cuvaá jahá ñi. Tacan tan tsican ra ndutya, tan nacatya ra ndaha ra nuu nyivi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

25 Tan tandihi nyivi nacahan ñi, tan catyí ñi:

—Na ndoo maa tsi siqui ndi tan

siq̄i sehe ndi.

26 Tacan tan ra Pilato jañā ra tsi ra Barrabás, tan tava tyiñu ra na ndoho ra Jesús, tan nacuhvā cuenda ra tsi ra tsi ra andaru naha ra na cúu ra nu cruu.

27 Tacan tan ra andaru cuenda ra Pilato, ra ndacá ñaha can tsindacā ra naha tsi ra Jesús nda vehe tyiñu ra Pilato, tan jandu iin ra naha tsi tandih̄i ca andaru nu nyaá ra.

28 Tacan tan tava ra naha jahma ra tan jacunditsi ra naha iin jahma cuaaha tsi ra. 29 Tan tyih̄i ra naha iin corona tsa tsinū tsihin iñu jiñi ra. Tan tsahā ra naha iin yutun tatun na cundaha ra tsihin ndaha cuaha ra. Tacan tan tsi cuiñi tsiti ra naha nuu ra, tan tsacu nducu ra naha tsi ra tan catyí ra naha:

—¡Nacumi tsi un, yooho Rey cuenda nyivi Israel!

30 Tan tiv̄i sīi ra naha tsi ra. Tan quih̄in ra naha yutun tatun can tan cañi ra naha jiñi ra. 31 Tsa yahā tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

Nu tyaā ra naha tsi ra Jesús nu cruu

(Mr. 15:21-32; Lc. 23:26-43;

Jn. 19:17-27)

32 Tsa quitā ra naha ican, tahān ra naha tsi iin ra ñuu Cirene, tsa nañi Simón. Tan jañiñi ra naha tsi ra na cuišo ra cruu ra Jesús.

33 Tan tsaā ra naha iin nu nañi Gólgota, tan cuñi tsi catyí “Yiq̄i Jiñi Ndiȳi”. 34 Tan ican tsahā ra naha vinu nasacā tsihin ndutya uva xaan coho ra Jesús. Tan tsa yahā tsa tsih̄i ra luxu can, ña cuñi ca ra coho ra. 35 Tan tsa yahā tsa tyaā ra naha tsi ra nu cruu, tacan tan ra andaru can quih̄in ra naha jahma ra tan tava cuenda ra naha tyin cua nyehe ra

naha ndáa ra jaha canaa intuhun intuhun jahma ra. Tacan cuv̄i tyin cundaā tuhun tsa tyaā iin ra cuv̄i ndusu yuhu Nyoo tahān tsanaha nu catyí tsi tyehen: “Tava cuenda ra naha tan tsatsā ra naha jahma yu”, catyí tsi. 36 Tacan tan tsinyecu ra naha ican tyin jaha cuenda ra naha tsi ra. 37 Tan ityi jiñi ra tyaā ra naha letra tsa catyí nacuenda cua cúu ra. Tan catyí tsi tyehen: “Ra ihya cuv̄i ra Jesús, rey cuenda nyivi ñuu Israel.”

38 Tan tyaā tucu ra naha uvi taahan ra suhu tsihin ra nu uvi taahan ca cruu. Iin ra tyaā ra naha xiin cuaha ra, tan inga ra xiin satyin ra. 39 Tan nyivi tsa yahá ican, caahán ñi tsi ra, tan javicó ñi jiñi ñi tsa tsacú nducu ñi tsi ra. 40 Tan catyí ñi tsihin ra:

—¡Yooho tsa cahān un tyin cua can̄i un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juven, tatun nditsa tyin Sehe Nyoo cuv̄i tsi un! —catyí ñi tsihin ra.

41 Tan juven ñi tacan tsacú nducu ra jutu tsa cuv̄i ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

42 —Jacacu ra tsi inga nyivi, maa tyin ña cuv̄i jacacu ra tsi maa ra. Tun nditsa tyin Rey cuenda nyivi Israel cuv̄i ra, na nuu ra nu cruu can, tan cua tsinu iñi yo tsi ra. 43 Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyí ra tsihin yo tyin Sehe Nyoo cuv̄i tsi ra.

44 Tan nda cuanda nu ñasuhu nahnu tsa nyaá nu cruu xiin ra tan tsacu nducu ndih̄i nahnu tsi ra.

Nu tsihi ra Jesús

(Mr. 15:33-41; Lc. 23:44-49;
Jn. 19:28-30)

45 Tacan tan ndunaq tanih cahnu ñuhu ñayivi tsa ora tan nda cuanda caa uñi tsa tseñi. 46 Tan juvin ñi cuhva can, ñihi xaan cana tsa ra Jesús. Tan catyí ra:

—Elí, Elí, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu?

47 Juhva ra yucú can naha ra, tsiñi ra naha tsa cahān ra, tan catyí ra naha:

—Ra Elías, ra cuvī ndusu yuhu Nyoo tsanaha, caná tsa ra.

48 Tan juvin ñi cuhva can, cuahán iin ra cua quihin ra iin yahma cuhva caá catyí, tan jatyi ra tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra.

49 Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

50 Inga tsaha cana tsa ñihi ra Jesús, tacan tan tsihi ra. 51 Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvi cuatyí cava nahnu. 52 Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi. 53 Tan tsa yaha nandoto ra Jesús quita ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi. 54 Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taan, tan tsa nyehe ra naha inga ca tsa cuvī. Tan catyí ra naha:

—Nditsa nditsa cuii, tyin Sehe Nyoo cuvī tsi ra ihya.

55 Cuaha ñiña tsa tsinyicun tsi ra Jesús nda Galilea tan jatyinyee ñi

tsi ra, yucú ñi nyehé ñi ndasava.

56 Tan juhva ñi ican cuvī ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

Nu tsicutsi ra naha tsi ra Jesús

(Mr. 15:42-47; Lc. 23:50-56;
Jn. 19:38-42)

57 Cuhva tsa cuñi cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús. 58 Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra. 59 Tacan tan quihin ra José cuñu ñuhu ra, tan cava nuu ra iin jahma cuitsin vaha tsi ra. 60 Tan tyihī ra cuñu ñuhu ra Jesús tsitsi iin ñaña tsa tsa cuvī iin yavi yuu tsa tava tyiñu ra tsatyā ra naha. Tan tsa yaha tsa nacasī ra yuhu ñaña can tsihin iin yuu cahnu, tan cuahán ra. 61 Tan ña María tsa quee Magdala, tan inga ña María, ndoo ñi yucú ñi yuhu ñaña can.

Nu jahá cuenda ra andaru ñaña ra Jesús

62 Tan tsa inga quivi, quivi quitatú nyivi cuvī can, tan ra jutu tsa cuvī ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. 63 Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahan nyito ra tyin tsa yaha tsa uñi quivi tsa cua cúu ra tan cua nandoto ra. 64 Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cuhun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuvī, yaha ca cuhva cua cuvī tan ñavin ca tsa jihna ñi —catyí ra naha.

65 Tan ra Pilato catyí ra:

—Quihin ndo andaru ihya.

Cuaahan ndo, tan jaha cuenda vaha ndo ñaña can, nácaa cunyee maa ndo jaha cuenda ndo —catyí ra.

66 Tacan tan cuahán ra naha, tan jaha cuenda vaha ra naha ñaña can, tan tyaá ra naha iin tsa tyaá ra naha tsata yuu tsa ndasí can tyin tatun nacanda yuu can coto ra naha. Tan nacoó ra naha tsi ra andaru jahá cuenda ra naha ican.

Nu nandotoꝝ ra Jesús

(Mr. 16:1-8; Lc. 24:1-12; Jn. 20:1-10)

28 ¹ Tsa yaha quívi tsa quitatú nyívi, cuhva tsa cuñí cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña. ² Tan ñihi xaan taan tyin quítsi iin ángel Jutu Mañi yo quee ra andívi, tan tsaá ra nu ñaña can. Tan jatsiyo ra yuu tsa ndasí yuhu can, tan tsiunyaá ra tsata can. ³ Tan xiñu xaan ra, tumaa tsa cañi tatsa. Tan cuitsin xaan jahma ra. ⁴ Cuhva tsa nyehé ra andaru can naha ra tsi ra, nayuhvi xaan ra naha tan quitsaha níhi ra naha, tan nda cuanda tsihi naaha ra naha tsihin tsa yuhví ra naha. ⁵ Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo. ⁶ Yoñi ca ra nyii ihya, tyin tsa nandotoꝝ ra, tumaa catyí ra. Naha ndo tan nyehé ndo nu tinyi ra naha tsi ra. ⁷ Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandotoꝝ ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

⁸ Tacan tan numi ñi quitá ñi nu ñaña can. Yuuhví ñi, tan si xaan cuñi tucu ñi. Tan tsinú xaan ñi cuahán ñi cua catyí tuhun ñi tsihin ra tsica

tsihin ra Jesús. ⁹ Tan cuhva can quituvi ra Jesús nuu ñi tan tsaha ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jacahnú ñi tsi ra, tan tsiconuti nyaa ñi tsaha ra. ¹⁰ Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jaha cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra. ¹² Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra.

¹³ Tan catyí ra naha tsihin ra naha: —Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihin ra naha cuñu ñuhu ra. ¹⁴ Tan tatun cua coto ra ndacá ñaha tuhun ihya, cua nyehé maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. ¹⁵ Tacan tan quihin ra andaru can xuhun can, tan cuahán ra naha cuajavahá ra naha cuhva catyí ra naha tsihin ra naha. Tan nda quívi vityin tan tacan caahán nyívi ñuu Israel.

Nu tava tyiñu ra Jesús tsi ra tsicá tyiñu ra

(Mr. 16:14-18; Lc. 24:36-49; Jn. 20:19-23)

¹⁶ Tan tacan, tandihi tsa utsi iin ra tsica tsihin ra, cuahán ra naha nda Galilea nda yucu nu catyí maa ra Jesús tsihin ra naha tyin cuhun ra

naha. **17** Tan cuhva tsa nyehe ra naha tsi ra Jesús, jacahn̄u ra naha tsi ra, maa tyin juhva ra naha uvi ñi tsicá iñi ra naha. **18** Tacan tan natuhv̄a ra Jesús nu nyecú ra naha tan catyí ra tsihin ra naha:

—Nyoo tsahā ra tsa cundaca ñaha yuhu tandīhi and̄ivi tan nu ñuhu ñayivi ihya. **19** Yacan cuenda, c̄uaahan ndo tandīhi nu iyó nyivi, tandīhi ñi ñuu, tan çatyí ndo tsihin ñi

na cunycun ñi tsi yu. Tan j̄acoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyí li ra. **20** Tan j̄acuaha ndo tsi ñi na tyaa yahvi ñi tandīhi tsa catyí yu tyin javaha ndo. Tan coto ndo tyin yuhu cunyaa yu tsihin ndo tandīhi quivi nda cuanda naa ñayivi —catyí ra Jesucristo tsihin ra tavā tyiñu ra.

Tan na cuvi tsi tacan ñi.

Tuhun Nyoo Tsa Tyaa ra Marcos

Nu caahán ra Juan, ra jacoondutya tsi nyivi, tuhun Nyoo

(Mt. 3:1-12; Lc. 3:1-9, 15-17;
Jn. 1:19-28)

1 ¹ Tyehen quitsaha tuhun ra Jesucristo, Sehe Nyoo. ² Tsanaha ra Isaías, ra cuvî ndusu yuhu Nyoo, tyaa ra nácaa cua quitsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyivi

na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsa ra nu tsiqui, tan catyí ra:

“Nuña ndo iin ityi cuiti tan natyiso vaha ndo tsi ndo tyin tsa vatsí Jutu Mañi yo”,
catyí tuhun tsa tyaa ra Isaías.

⁴ Tacan cuvî; quitsi ra Juan nu tsiqui, tan javaha ra cuhva tyaa ra Isaías. Catyí ra tsihin nyivi tyehen: “Ndu uvi iñi ndo cuatyí ndo tan ccondutya ndo tyin tacan tan jaha Nyoo tucahnu iñi tsi ndo tsa cuenda cuatyí ndo.” ⁵ Tan tandihî nyivi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñî ñi tsa caahán ra, ndu uvî iñi ñi cuhva iyó ñi tan nahma ñi cuatyí ñi nu Nyoo. Tacan tan tsicoondutya ñi yutya Jordán.

⁶ Tan jahma ra Juan tsinû tsi tsihin ixi camellu. Tan cinturón ra cuvî ñi. Tan maa ñi tica xama tsatsí ra, tan tsihî ra ndutya ñuñu tsa iyó tsitsi cuhu. ⁷ Caahán ra tuhun Nyoo tsihin nyivi tan catyí ra:

—Tsa yatyin cuii quitsi ra tsa cahnu

ca cuvî tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuvî maa ra tan ñavin ca yuhu. ⁸ Yuhu jacoondutya yu tsi ndo tsihin ndutya ñi. Maa tyin maa ra cua jacoondutya ra tsi ndo tsihin Tatyí Ii Nyoo —catyí ra Juan.

Nu tsicoondutya ra Jesús

(Mt. 3:13-17; Lc. 3:21-22)

⁹ Quivi can quita ra Jesús ñuu Nazaret, tsa canyí Galilea, tan cuahán ra nu nyí ra Juan yutya Jordán tyin jacoondutya ra tsi ra. ¹⁰ Tsa quita ra Jesús tsitsi ndutya tsa yaha tsicoondutya ra, nuña andivi tan nyehe ra vatsí nuú Tatyí Ii Nyoo siqui ra tan caá tsi tumaa caá iin paloma. ¹¹ Tan nacahan iin ndusu ityi andivi tan catyí tsi tsihin ra tyehen:

—Yooho cuvî Sehe yu tan cuñi xaan yu tsi un. Tan sîi xaan cuñi yu nyehé yu tsi un —catyí ndusu can.

Nu nducu cuhva nu ña vaha tsi ra Jesús

(Mt. 4:1-11; Lc. 4:1-13)

¹² Tsa yaha tsa tsicoondutya ra Jesús tan tsindaca Tatyí Ii Nyoo tsi ra nu tsiqui. ¹³ Tan tsinyi ra ican uvi xico quivi nu nduve nyivi iyó, maa ñi quiti xaan iyó. Tan nducu cuhva nu ña vaha tsi ra. Yaha can tan tsaá ángel Nyoo tan jatyinyee ra naha tsi ra.

Nu quitsaha caahán ra Jesús tuhun Nyoo tsihin nyivi iyó Galilea

(Mt. 4:12-17; Lc. 4:14-15)

¹⁴ Tsa yaha tsa tyihî nyivi tsi ra Juan vehe caa, tan tsinuhû ra Jesús Galilea tan caahán ra tsihin nyivi nácaa ndaca ñaha Nyoo. ¹⁵ Tan catyí ra:

—Tsa tsaq̄ quiv̄i tsa cua cundaca ñaha Nyoo tsi nyiv̄i iyó nu ñuhu ñayiv̄i ihya. Yacan cuenda ndū uvi iñi ndo cuatyí ndo, tan ts̄inu iñi ndo tuhun tsa jacacú Nyoo tsi nyiv̄i —catyí ra Jesús.

Nu canā ra Jesús cumi taahan ra tiñ tyaca

(Mt. 4:18-22; Lc. 5:1-11)

16 Iin quiv̄i cuahán ra Jesús tsicá ra yuhu miñi tsa nañí Nduya Ñuhu Galilea. Tan nyehē ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tiñ tyaca cuv̄i ra naha. 17 Tan catyí ra Jesús tsihin ra naha:

—Ñaha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tiñ ndo tyaca ihya, tacan cua ñihi ndo nyiv̄i cua cuv̄i nyiv̄i Nyoo —catyí ra Jesús tsihin ra Simón tan tsihin ra Andrés.

18 Juv̄in ñi cuhva can tan nacoq̄ ra naha traya can, tan cuahán ra naha cuanyicún ra naha tsi ra.

19 Ña cuaha ñi tsicā ra naha, tan nyehē ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya. 20 Canā ra tsi nduvi taahan ra naha. Tan nacoq̄ ra naha tsi ra Zebedeo, jutu ra naha, tsitsi yutun ndoo can tsihin ra cuv̄i musu ra naha. Tan cuahán ra naha tsihin ra Jesús.

Nu quitā tatyí ña vaha tsi iin rayii

(Lc. 4:31-37)

21 Tsa tsaq̄ ra Jesús ñuu Capernaum tsihin ra tsicá tsihin ra, quihv̄i ra Jesús tsitsi vehe ñuhu quiv̄i quitatú nyiv̄i. Tacan tan quitsahā jacuahá ra tuhun Nyoo tsi nyiv̄i.

22 Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra. 23 Tan tsitsi vehe ñuhu can nyii iin ra yihí tatyí ña

vaha. Tan canā tsa ra tan catyí ra:

24 —¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsitó yu tyin Sehe Ii Nyoo cuv̄i un —catyí ra can tsihin ra Jesús jahā nu tatyí ña vaha can.

25 Tacan tan nduxaḡan ra Jesús tsi nu tan catyí ra tsihin nu:

—¡Ña cahan ca un! ¡Quita tsi ra ihya! —catyí ra tsihin nu.

26 Tacan tan quitsahā ñihi rayii can jahā nu. Tan ñihi xaan canā tsa ra jahā nu, tan quitā nu tsi ra.

27 Tandih̄i nyiv̄i iyo xaan cuñi ñi tan tsicá tuhun tahan ñi tsi ñi, tan catyí ñi:

—¿Náa cuv̄i tsa nyehé yo ihya? ¿Náa tuhun tsa jacuahá ra ihya? ¡Tyin iyó vaha tunyee iñi tsi ra, nda cuanda tatyí ña vaha tan tyaá yahvi tsi ra! —catyí ñi.

28 Tan numi ñi tsitó nyiv̄i iyó tandih̄i ñuu tsa cayucú Galilea tuhun ra Jesús.

Nu nduvahā tyiso ra Simón Pedro

(Mt. 8:14-15; Lc. 4:38-39)

29 Tsa ndih̄i jacuahā ra Jesús tsi nyiv̄i tsitsi vehe ñuhu, quitā ra cuahán ra vehe ra Simón tan ra Andrés. Tan cuahán ndih̄i ra Jacobo tan ra Juan tsihin ra. 30 Tan ña tyiso ra Simón cuuhv̄i ña tsihin cahñi canyii ña nu tsito. Tan catyí tuhun nyiv̄i ña tsihin ra Jesús tyin cuuhv̄i ña. 31 Tacan tan natuhvā ra Jesús yuhu tsito nu canyii ña, tiñ ra ndaha ña, tan cañih̄i ra tsi ña. Juv̄in ñi cuhva can, quitā cahñi tsi ña, tan quitsahā nanducú ña tsa catsi ra naha.

Nu cuaha xaan nyiv̄i cuuhv̄i janduvahā ra Jesús

(Mt. 8:16-17; Lc. 4:40-41)

32 Tsa tsa cuñi cuaa tsa tsa yaha tyiso ñicanyii, tandih̄i nyiv̄i cuuhv̄i tan nyiv̄i yihí tatyí ña vaha tsindaca

nyivi tsi ñi nu nyii ra Jesús. **33** Tan ndu iin tandihi nyivi ñuu can nu yucú ra naha. **34** Tan janduvahá ra tsi tandihi ñi tsa yihí siin siin cuehe, tan cuaha tatyí ña vaha tavá ra. Maa tyin ña tsahá ra tsa cahan tatyí ña vaha can, tyin tsitó nahnu yóo ra cuví ra.

Nu tsicá ra Jesús caahán ra tuhun Nyoo tandihi ñuu tsa cayucú Galilea
(Lc. 4:42-44)

35 Ra Jesús nduvitá ra tsa ndi naa ca inga quivi, quitá ra ñuu can tan cuahán ra iin nu taxín caá cuandacán tahvi ra tsi Nyoo. **36** Tsa nyehe ra Simón tyin nduve ra, tacan tan cuahán ra tsihin tandihi ca ra naha cuananducú ra naha tsi ra. **37** Tan tsa nañihí ra naha tsi ra, catyí ra naha tsihin ra:

—Tandihi nyivi tan nanducú ñi tsi un —catyí ra naha.

38 Maa tyin catyí ra tsihin ra naha: —Cohon ndo ñuu tsa cayucú yatyin ñi ihya, tyin cuñí tsi cahan ndihi yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

39 Tan tacan tsicá ra Jesús caahán ra tuhun Nyoo tsihin nyivi tsitsi vehe ñuhu tan iin tan iin ñuu tsa cayucú Galilea. Tan tavá ra tatyí ña vaha tsi nyivi.

Nu janduvahá ra Jesús tsi ra ndohó cuehe tyaahyú

(Mt. 8:1-4; Lc. 5:12-16)

40 Tsa ndi cuahán ra Jesús tsicá ra tan quitá iin ra ndohó cuehe tyaahyú tsicuiñí tsiti ra nuu ra, tan catyí ra tsihin ra:

—Tun yooho tan cuñí un, cuví janduvaha un tsi yu —catyí ra.

41 Tan cundaahví iñi ra Jesús nyehe ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvaha yu tsi un. Tan vityin tsa nduvahá un —catyí ra tsihin ra.

42 Tsa cahan ra Jesús tacan tsihin ra, juvin ñi cuhva can tan nduvahá ra. **43** Tacan tan catyí ra Jesús tyin tsa cuvi cunuhu ra, maa tyin cahan vaha xaan ra tsihin ra na javaha ra tyehen:

44 —Coto catyí tuhun un tsihin nyivi yóo janduvahá tsi un. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva tsa catyí ra Moisés tyin cuhva ndo tsa cuenda tsa nduvahá ndo tun cuhvi ndo. Yacan cua cuvi tsa ndaa tsi ra jutu tan tsi nyivi tyin tsa nduvahá un —catyí ra Jesús tsihin ra.

45 Maa tyin ra ican cuahán ra, tan quitsahá catyí tuhun ra tsihin tandihi nyivi nácaa nduvahá ra. Yacan cuenda ña cuví ca quihvi nditsin ra Jesús tsitsi ndi intuhun maa ñuu. Tan tsicá ra ityi tsata ñuu ñi nu nduve nyivi iyó, maa tyin tandihi ñi ityi tan quitá nyivi, tan tsinyehe ñi tsi ra.

Nu janduvahá ra Jesús tsi iin ra xii

(Mt. 9:1-8; Lc. 5:17-26)

2 ¹ Tsa yahá juhva quivi tan cuahán ra Jesús ñuu Capernaum inga tsaha. Tan tsa tsitō nyivi tyin tsaá nuhu ra yuvehe ra, ² iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi. ³ Tacan tan tsaá cumi taahan rayii nyisó ra naha iin ra xii. Cuñí ra naha cahun ra naha tsihin ra nda nu nyaá ra Jesús. ⁴ Maa tyin ña cuví yaha ra naha yuvehe tan cahun ra naha nu nyaá ra Jesús tyin cuaha xaan nyivi nyecú yuvehe can. Yacan cuenda ndaá ra naha jiñi vehe, tan jatsiyó ra naha juhva tyiyo ndihi cuhva nu nyaá ñi ra Jesús. Tacan tan januu ra naha tsi ra cuuhví can nu nyaá ra Jesús tsihin iin tsito. ⁵ Tsa nyehe ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jahá yu tucahnu iñi

tsi un tsa cuenda tandihî cuatyî un —catyî ra Jesús tsihin ra.

6 Tan nyecú juhva ra cuvî maestro cuenda ley vehe ñuhu naha ra ican, tacan tan quitsahâ tsicá ñîni ra naha tuhun ihya: 7 “¿Nacuenda tyin caná ñîni ra ihya caahán ra tyehen? Tan intuhun ñi maa Nyoo cuvî ra jahá tucahnu ñîni tsi yo. Tsicoo cuatyî ra nuu Nyoo tsa cuenda tsa caahán ra tacan”, cuñî ra naha, tsicá ñîni ra naha. 8 Maa tyin ra Jesús iin yaha ñîni tuvî ñîni ra cuhva tsicá ñîni ra naha. Tan catyî ra tsihin ra naha:

—¿Nacuenda tsicá ñîni ndo tacan?

9 ¿Náa yîi ca cahan yo; “Cuatyî un tsa yahâ ndatsî”, o catyî yo: “Nduvita, naquihin tsito un tan caca”?

10 Vaha. Cua janaha yu tsi ndo tyin yuhu, tsa cuvî yu Rayîi quee nda gloria, iyó ndatu tsi yu nu ñuhu ñayivî ihya tsa jaha yu tucahnu ñîni tsi nyivî tsa cuenda cuatyî ñîni —catyî ra Jesús tsihin ra naha.

Tacan tan nacahan ra tsihin ra cuuhví can:

11 —Catyî yu tsihin un; nduvita, naquihin tsito un, tan cuanuhu yuvehe un —catyî ra Jesús tsihin ra.

12 Tan iin yaha ñîni nduvitâ ra cuuhví can, naquihin ra tsito ra, tan cuanuhú ra. Tan iyo xaan cuñî tandihî maa nyivî tsa nyehe can, tan quitsahâ jacahnú ñîni tsi Nyoo, tan catyî ñîni:

—Ndi iin tsaha maa tan ñaha ca nyehe yo tsehe —catyî ñîni.

Nu canâ ra Jesús tsi ra Levî

(Mt. 9:9-13; Lc. 5:27-32)

13 Tsa yahâ yacan tan cuahán ra Jesús yuhu miñi inga tsaha. Tacan tan tsaâ cuaha nyivî nu nyiî ra, tan quitsahâ jacuahá ra tsi ñîni. 14 Tsa ndihî jacuahâ ra tsi ñîni, tan cuanuhú ra. Tan tsa cuahán ra yahâ ra nu nyaá vehe nu tyahví nyivî xuhun cuenda ra ndacá ñaha ñuu Roma, tan ican nyaá ra Levî, sehe ra Alfeo, naquihín

cuenda ra xuhun can. Nyehe ra Jesús tsi ra, tan catyî ra tsihin ra:

—Cohon tsihin yu.

Tacan tan nduvitâ ra Levî, tan cuahán ra tsihin ra.

15 Yahâ can tan cuahán ra Jesús cuacatsî ra yuvehe ra Levî tsihin ra tsicá tsihin ra. Tsinyaa ra nu mesa tan tsinyecu ndihî tucu ra tavá xuhun cuenda ra ndacá ñaha tan inga ca nyivî iyó cuatyî. Tyin cuaha xaan nyivî nyicún tsi ra. 16 Maa tyin tsa nyehe ra cuvî maestro cuenda ley vehe ñuhu tan ra cuvî fariseo naha ra tyin tsatsî ra Jesús tsihin ra tavá xuhun tan ra iyó cuatyî, catyî ra naha tsihin ra tsicá tsihin ra:

—¿Nacuenda tyin tsatsî tan tsihî ra maestro ndo tsihin ra tavá xuhun tan ra iyó cuatyî?

17 Tsa tsiñî ra Jesús tsa cahan ra naha tan catyî ra:

—Yuhu ña vatsî yu vatsî jatyinyee yu tsi nyivî cuñî tyin vaha iyó ñîni; vatsî yu vatsî jatyinyee yu tsi nyivî tsitó tyin iyó cuatyî ñîni tumaa nyivî cuuhví, tyin nyivî cuuhví tsiñî ñuhu doctor tsi ñîni. Maa tyin nyivî vaha cuñî, ña tsiñî ñuhu doctor tsi ñîni —catyî ra Jesús tsihin ra naha.

Nu tsicâ tuhun nyivî tsi ra Jesús tun taahán tsi coo nyitya ñîni

(Mt. 9:14-15; Lc. 5:33-35)

18 Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyivî nu nyiî ra Jesús, tan tsicâ tuhun ñîni tsi ra, tan catyî ñîni:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyî ñîni.

19 Nacahan ra Jesús tan catyî ra:

—¿A cuvî coo nyitya nyivî yucú nu iyó vico tindaha tun ndi nyiî ra cua tindaha tsihin ñîni? Ña cuvî coo nyitya ñîni tun ndi nyiî ra tsihin ñîni. 20 Maa

tyin coo quiví ña cua cunyii ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsaahnu tsa iyó nyiví tsihin tuhun tsaac tsa jacuahá ra tsi ñi

(Mt. 9:16-17; Lc. 5:36-39)

21 Tan catyí ra Jesús:

—Ña tuhvá nyiví natyaá jahma tsaac iin jahma tuuhu, tyin jahma tsaac can cua nandiyi can tan cua nducahnu ca nu ndata jahma tuuhu can jaha can.

22 Tacan tucu ñi ñii yihí vinu tun tyihí yo vinu tsaac tsitsi ñii tsaahnu cua ndata ñii can, tan cua cati vinu can tan cua tiví can. Yacan cuenda cuñí tsi tsa tyihí yo vinu tsaac tsitsi ñii tsaac —catyí ra Jesús.

Nu jocón ra tsicá tsihin ra Jesús yoco trigo quiví quitatú nyiví

(Mt. 12:1-8; Lc. 6:1-5)

23 Iin tsaha yahá ra Jesús tsitsi tsa tatsí nyiví tan cuví tsi quiví quitatú ñi. Tan tsa yahá ra tsicá tsihin ra quitsahá tuhún ra naha yoco trigo.

24 Tacan tan tsa nyehé ra fariseo naha ra can quitsahá caahán ra naha tsihin ra Jesús:

—¡Nyehé tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quiví ihya —catyí ra naha.

25 Tan nacahán ra Jesús tsihin ra naha:

—¿A ñaha ca cahvi ndo nu tutu nu tsahá cuenda tsi tsa javahá ra David tan ra cutahán tsihin ra quiví tsisoco ra naha? 26 Ra David quihví ra tsitsi vehe Nyoo quiví cuví ra Abiatar jutu tsaahnu cuví ityi nuu. Tan quihín ra paan ii, tsa taahán tsi catsi maa ñi maa ra jutu naha ra. Maa ra tan tandihí ra cutahán tsihin ra tsatsí ra naha paan can —catyí ra Jesús.

27 Tacan tan catyí ra Jesús tsihin ra naha:

—Nyoo javahá ra quiví quitatú yo

tyin tacan tan cuví quitatu cuñu ñuhu yo; tan ñavin maa yo tsinú tsa cuenda quiví quitatú yo. 28 Yacan cuenda yuhu tsa cuví yu Rayii quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quiví quitatú yo —catyí ra Jesús.

Nu nduvahá ra na ityi iin ndaha

(Mt. 12:9-14; Lc. 6:6-11)

3¹ Tsa quihví ra Jesús inga tsaha tsitsi vehe ñuhu, nyíi iin ra na ityi iin ndaha ican. 2 Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quiví quitatú nyiví. Tyin tun cua janduvaha ra tsi ra can, tacan tan cua cuvi tyaa ra naha cuatyí siquí ra. 3 Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

4 Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quiví quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyiví, o cahñi yo tsi ñi? —catyí ra Jesús.

Maa tyin ña nacahán ra naha.

5 Tacan tan nanyehé xaan ra Jesús nuu ra naha, tan nducuiihya cuñí ra tyin ña cuñí ra naha cutuñi ñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoq ra can ndaha ra, tan iin yaha ñi nduvahá ndaha ra.

6 Tacan tan quitá ra fariseo naha ra, tan quitsahá natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyivi cuahán cuanyehé nu nyii ra Jesús yuhu miñi

7 Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha. 8 Tsa tsito nyivi tyin nahnu xaan tsa iyo javahá ra, cuaha ñi tsahan nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihi ca ñuu tsa cayucú yatyn nu cayucú nduvi ñuu can. 9 Tsa nyehe ra Jesús tsaá nyivi, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuvi ca nyivi, cuvi quihvi ra tsitsi yutun ndoo can tyin tacan tan ña cua tindahñi ñi tsi ra. 10 Tsa cuaha xaan nyivi janduvahá ra, yacan cuenda tsahan cuaha ca nyivi cuuhví nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi. 11 Yihí ñi cuuhví can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi caná tsa nu tan catyí nu tsihin ra:

—¡Yooho cuví Sehe Nyoo!

12 Tan tandihi ñi cuhva tsa caahán tatyí ña vaha yóo ra cuví ra, tyasí ra nu cahan nu.

Nu nacatsi ra Jesús tsi utsi uvi ra caca tyiñu ra

(Mt. 10:1-4; Lc. 6:12-16)

13 Tsa yahá yacan tan ndaa ra Jesús iin yucu tan caná ra tsi ra tsa cuñi maa ra cana ra. Tacan tan cuahán ra naha nu nyii ra. 14 Tan tsitsi tsa tandihi ra tsa caná ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo. 15 Tan tsahá ra ndatu tsi ra naha tsa

janduvaha ra naha tsi nyivi cuuhví, tan tava ra naha tatyí ña vaha yihí tsi nyivi. 16 Ihya nyecú sivi ra naha: ra Simón, tsa jacunañi tucu ra Jesús Pedro; 17 tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”. 18 Tan tandihi ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cahun cuatyí siqui ñuu Roma tsa ndacá ñaha tsi ñi; 19 tan ra Judas Iscariote, tsa xico tsi ra Jesús.

Tsa yahá yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mt. 12:22-32; Lc. 11:14-23; 12:10)

20 Tan nducuahá nyivi nu yucú ra naha inga tsaha, tan nda cuanda ña cuyatyí ca ra naha catsi ra naha.

21 Tsa tsito nyivi ra Jesús tyin nyii ra ican, tsahan ñi tsiquihin ñi tsi ra tyin cunuhu ra tsihin ñi, tyin catyí nyivi tsihin ñi tyin ndusaná iñi ra.

22 Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaá ra naha nu nyii ra Jesús tan catyí ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihi tatyí ña vaha —catyí ra naha.

23 Tsa tui iñi ra Jesús tyin tacan caahán ra naha, caná ra tsi ra naha tan tsahá ra iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvín ñi maa tahan nu? Ña cuví. 24 Tyin tun ra ndacá ñaha naha ra tan cua natahvi sava ra naha, tan cua quitsaha cañi tahan ra naha, cua cundihí tsa ndacá

ñaha ra naha. **25** Tacan tucu ñi tun nyivi iyó iin caa ñi iin vehe tan cañi tahan ñi, cua cusñin ñi tan ña cua cuvi coo vaha ñi. **26** Tan tun nu ña vaha tan ndusiñ nu tan nduvita iin nu siqui inga nu, ¿náa cua tahan nahnu? Cua ndusiñ nahnu tan cua cundihi nahnu.

27 Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñí tsi cuhñi jihna ra tsi ra jatsii vehe can tan cuví quihvi ra suhu ra tsa tsii ra.

28 Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihi nuu cuatyí javahá ñi, tan tsa cuenda tucu tsa caahán ñi tsa ña vaha. **29** Maa tyin tun cahan ñi ndavaha ñi siqui Tatyí li Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

30 Tacan cañan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

Nu catyí ra Jesús tyin nyivi tyaá yahvi tuhun Nyoo, juvin ñi cuví yañi ra, tan sihi ra

(Mt. 12:46-50; Lc. 8:19-21)

31 Tacan tan tsañ sihi ra Jesús tan yañi ra nu nyíí ra, maa tyin ndoñ ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús. **32** Tan catyí nyivi nyecú naniñ canduvi xiin ra Jesús tsihin ra:

—Sihi un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

33 Maa tyin catyí ra:

—¿Yóo cuví sihi yu tan yañi yu?

34 Tacan tan nanyehé ra naniñ canduvi nu nyaá ra, tan catyí ra:

—Nyivi nyecú ihya cuví sihi yu, yañi yu tan cuhva yu. **35** Tyin tandihi nyivi javahá cuhva cuñi Nyoo, juvin ñi cuví yañi yu, cuhva yu tan sihi yu —catyí ra Jesús.

Nu caahán ra Jesús tyin ra caahán tuhun Nyoo cuví ra tumaa iin ra tatsi
(Mt. 13:1-9; Lc. 8:4-8)

4 ¹ Quitsaha jacuahá ra Jesús inga tsaha yuhu miñi. Tan cuaha xaan nyivi ndu iin nu nyíí ra. Tan tsa cuenda tsa cuaha xaan ñi cuví, quihvi ra tsitsi yutun ndoo tsa canyíí nu ndutya yuhu miñi can, tan tsinyañ ra tsitsi can. Tan ndoñ tandihi maa nyivi nu nyiti. **2** Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

3 —Tyaa soho ndo tsa cua cahan yu. Iin ra quitá ra yuvehe ra. Tan cuahán ra cua tatsi ra trigu nu ñuhu ra. **4** Tan cuhva tsa quitá ra tsiti trigu can, cucoyo juhva tsi yuhu ityi. Maa tyin quitsi saa tan tsatsi ti naha ti itsi. **5** Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi caná tsiti can tyin ña cuaha nyahyu yihí tyañu yuu can. **6** Maa tyin tsa caná ñicanyii, iin yaha ñi na ityi tsi tyin ña cunu cuahán yoho tsi. **7** Tan juhva ca tsiti can cucoyo tsi tyañu iñu. Quivi caná tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahñi can trigu can. Yacan cuenda ña tsahá trigu can tsiti. **8** Maa tyin juhva ca tsiti can cucoyo tsi nu ñuhu vaha. Caná tsi tan tsahnú tsi, tan cuaha tsiti tsahá tsi. Tyin tsa intuhun tsiti can, tsahá tsi oco utsi tsiti tsitsi yoco tsi. Tan inga tsiti can tsahá tsi uñi xico, tan inga tsi tsahá tsi iin cientu —catyí ra Jesús tsihin ñi.

9 Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyivi tsihin cuhva
(Mt. 13:10-17; Lc. 8:9-10)

10 Tsa yaha yacan tan ndoñ maa ña ra Jesús tsihin ra tsicá tsihin ra tan nyivi nyicún tsi ra. Tan tsicá tuhun ñi:

—¿Náa cuñí tsi catyí tsa cah̄an un nañi?

11 Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñí ñi cunyicun vaha ñi tsi yu.

12 Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

Nu tsahá cuenda ra Jesús tsa cuñí tsi catyí tuhun ra tatsí

(Mt. 13:18-23; Lc. 8:11-15)

13 Tan catyí ndihi ra tsihin ñi:

—Tun ña cutuñí iñi ndo tuhun cah̄an yu nañi, ndi ña cua cutuñí iñi ndo tandihi ca tsa cua jacuaha yu tsi ndo tsihin cuhva ñi. **14** Ra tatsí trigu can cuví ra caahán tuhun Nyoo.

15 Yihí nyivi cuví ñi tumaa nu cucoyoᵝ tsiti trigu yuhu ityi tyin tsiñí ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi.

16 Tan juhva nyivi cuví ñi tumaa nu cucoyoᵝ tsiti trigu tsata yuu tyin s̄i xaan cuñí ñi tsiñí ñi tuhun Nyoo juhva ñi quivi. **17** Maa tyin ña ndoó tsi añima ñi tan ña cuví cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyoᵝ tsiti tsata yuu tyin tsata yuu can luxu cuii ñi nyahyu yihí. Yacan cuenda ña tsahn̄u tsi tyin ña ñih̄i tsi nu cuhun yoho tsi. Tacan cuví nyivi can, tyin quivi vatsí tundoho siqui ñi, tan caahán nyivi tsi ñi tsa cuenda tuhun Nyoo, ndu uví iñi ñi tan jandih̄i ñi tsa tsinú iñi ñi tsi Nyoo. **18** Tan juhva nyivi cuví ñi tumaa nu cucoyoᵝ tsiti tyañu iñu tyin tsiñí ñi tuhun Nyoo,

19 maa tyin tsicá xaan iñi ñi tundoho ñayivi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñí ñi coo tandih̄i tsa iyó nu ñuhu ñayivi ihya tsi ñi. Tan tandih̄i yacan jatyañú can tsi ñi, tan cuví ñi tumaa cuví yutun tsa ña tsahaᵝ tsiti. **20** Maa tyin nyivi tsa tsiñí tuhun Nyoo tan naquihín vaha ñi itsi, tan javahá ñi tandih̄i tsa caahán tsi, juvin ñi cuví tumaa ñuhu vaha nu cucoyoᵝ tsiti can tyin tsiti tsa cucoyoᵝ can cana vaha tsi, tsahn̄u tsi, tan yih̄i tsi tsahaᵝ tsi oco utsi tsiti. Inga tsi tsahaᵝ tsi uñi xico tsiti, tan inga tsi tsahaᵝ tsi cientu tsiti.

Nu cah̄an ra Jesús tyin ña taahán tsi tyihí xeehe yo ñuhu Nyoo tsa jandunditsín añima yo coto quihin nyaa ra itsi

(Lc. 8:16-18)

21 Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyií yo can iin nu sucun tyin tacan tan janditsin can nanī tsitsi vehe. **22** Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyivi. Tyin tandih̄i maa tan cua quita nu nditsin tan coto yo can. **23** Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

24 Tan catyí tucu ra:

—Tyaa soho vaha ndo tsa caahán yu tyin tun tyaa yahvi ndo tuhun tsiñí ndo, cuaha ca tsa cua cuhva Nyoo tsi ndo. **25** Tyin nyivi tyaa soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaa soho, cua quihin nyaa ra nda cuanda tsa luxu tsa iyó tsi ñi tsa tsa yaha ñih̄i ñi.

Nu tsahá ra Jesús iin cuhva nácaa tsahnú iin tsiti

26 Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsi nyivi. 27 Tyin nyivi tatsi ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsi ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi, 28 tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsiti. 29 Tan tatun tsa tsitsa tsiti tsi, tacan tan jocón ñi itsi tyin tsa tahañ maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo

(Mt. 13:31-32; Lc. 13:18-19)

30 Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví. 31 Tyin cuví tsi tumaa iin tsiti mostaza tsa tatsi nyivi. Tsiti can cuví tsa nyihi ca tan ñavin ca tandíhi ca tsiti tsa iyó nu ñuhu ñayivi. 32 Maa tyin tsa yaha tatsi tsi, caná tsi tan nduahnú tsi, tan cuví tsi yutun tumaa nducuaya. Nduahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi

(Mt. 13:34-35)

33 Tacan jacuahá ra Jesús tsi nyivi, tsihin cuaha cuhva, ndíhi cuhva cuví cutuñi ñi ñi. 34 Tan tandíhi tsaha tsa cahán ra tsihin ñi maa ñi maa tsihin cuhva cahán ra. Maa tyin cahán catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi

(Mt. 8:23-27; Lc. 8:22-25)

35 Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

36 Tacan tan ra Jesús tan ra tsicá tsihin ra nacoó ra naha tsi nyivi tan quihví ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha. 37 Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñi cutu yutun ndoo can. 38 Tan ra Jesús canyí ra quixí ra tsa yatyin xuu yutun ndoo can, tan nyanaá iin jahma jiñi ra. Jandoto ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñi nyee yo?

39 Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxín cuí ñi cuví.

40 Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu ñi ndo? —catyí ra tsihin ra naha.

41 Maa tyin iyo xaan cuñi ra naha tsa nyehé ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

Nu nduvahá iin ra Gadara tsa yihí tatyí ña vaha

(Mt. 8:28-34; Lc. 8:26-39)

5¹ Tsaá ra naha inga tsiyo miñi nda nu ñuhu cuenda Gadara. 2 Tsa quitá ra Jesús tsitsi yutun ndoo, tan quitá iin ra yihí tatyí ña vaha nu ndaa cumi santu, tan tsaá ra nu nyaá ra. 3 Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra. 4 Cuaha xaan tsaha tsahñi nyivi tsaha ra tan ndaha

ra tsihin cadena, maa tyin tsaahnyá cuatyí ra can. Tan yoñi maa cuví cunye tsi ra. **5** Tan tsicá nuu maa ra caná tsaa ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicuehé ra tsi ra tsihin yuu. **6** Maa tyin ndi cañi ca quitá ra Jesús, tan nyehe ra can tsi ra, tan tsinú xaan ra tsahan ra, tsicuiñi tsiti ra nuu ra. **7** Tan caná tsaa ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

8 Tacan catyí nu tatyí ña vaha can tsihin ra Jesús tyin tsa yahá cahan ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

9 Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

10 Tan caahán ndaahvi nu tsihin ra Jesús na ña jacuhun cañi ra tsi nahnu.

11 Yatyin ñi yucu can yucú cuaha quini tsatsí ti naha ti. **12** Tacan tan catyí tandihi nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

13 Tacan tan tsahá ra Jesús ndatu tsi nahnu, tan quihvi nahnu tsitsi quini can. Quitá nahnu tsi ra can tan quitá tumaa uvi mil quini yucú can. Tsa quihvi nahnu tsitsi ti naha ti, quitsahá tsinú ti naha ti, tan yahá ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

14 Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun

ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihi nyivi tsa cahan ra naha tsihin, tsahan ñi tsinyehe ñi tsa cuví can. **15** Cuhva tsa tsaa ñi nu nyii ra Jesús, nayuhvi xaan ñi tsa nyehe ñi tsi ra tsa yihí tatyí ña vaha can. Nyaá taxin ra, nditsí ra jahma, tan vaha cuñi ra. **16** Tan tandihi maa nyivi tsa nyehe tsa tahan ra can tan tsa tahan quini can, catyí tuhun ñi can tsihin inga ca nyivi.

17 Tacan tan quitsahá caahán ndaahvi ñi tsihin ra Jesús, na ña ndoo ra nu ñuhu ñi.

18 Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cahun ra tsihin ra. **19** Maa tyin ña tsahá ra Jesús cahun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyí tuhun tsihin ñi tandihi tsa javahá Jutu Mañi yo Nyoo tsihin un, tan nácaa cundaahvi iñi ra tsi un.

20 Tacan tan cuanuhú ra tan quitsahá catyí tuhun ra tsihin nyivi iyó tandihi ñuu tsa cayucú Decápolis tandihi tsa javahá ra Jesús tsihin ra. Tan iyo xaan cuñi ñi.

Nu nduvahá sehe ra Jairo tan ñaha tsa tñin jahma ra Jesús

(Mt. 9:18-26; Lc. 8:40-56)

21 Tsa tsaa ra Jesús tsihin yutun ndoo nda inga tsiyo miñi can, tsaa cuaha nyivi nu tsaa ra. Tan ndoo ra yuhu miñi ican. **22** Tacan tan tsaa iin ra nyiso tyiñu vehe ñuhu, nañi ra Jairo. Cuhva tsa nyehe ra tsi ra Jesús, tsicuiñi tsiti ra nuu ra. **23** Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñi cúu cuii ña ña.

24 Tacan tan cuahán ra Jesús tsihin ra, tan cuaha xaan nyivi cuahán

cuanyicún tsi ra, nda cuanda catyihí tahan ña maa ñi. **25** Tsihin nyivi can cuahán ndihí iin ñaha cuuhví. Ñaha ihya tsa quitá maa utsi uvi cuiya ndohó ña cuehe tsa cuún niñi ña.

26 Tan cuaha xaan tundoho nyehe ña tsihin tsa cuaha doctor. Tandihí xuhun ña janaa ña tsihin ra naha, maa tyin nduve maa náa catyi janaa ña xuhun ña tyin vihi ca nduñihí cuuhvi ña.

27 Tsa tsiñi ña caahán nyivi tyin tsaq ra Jesús, natuhva ña ityi tsata ra tan tñin ña jahma ra. **28** Tyin tsicá iñi maa ña: “Tatun tñin yu vasu tan jahma ra, cua nduvaha yu”. **29** Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvaha ra tsi ña.

30 Tsa tuví iñi ra Jesús tyin nduvaha iin nyivi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsicá tuhun ra tan catyí ra:

—¿Yóo tñin jahma yu?

31 Tacan tan catyí ra tsicá tsihin ra:

—¿Nacuenda tsicá tuhun ca un: yóo tñin jahma un? tan nyehé vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

32 Maa tyin ra Jesús nanyehe ra nanñi ñi tyin cuñí ra coto ra yóo tñin jahma ra. **33** Tacan tan ñaha can tsahan ña tsicuiñi tsiti ña nuu ra Jesús tyin tsitó vaha ña tyin tsa nduvaha ña. Yuuhví ña tan niñi ña tsahan ña tsicatyí tuhun ña tandihí tsa nditsa tsihin ra. **34** Tan catyí ra Jesús tsihin ña:

—Nduvaha un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

35 Ndi caahán ca ra Jesús tan tsaq nyivi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña çahan yuhu ca un tan ña jatyañu ca un tsi ra Maestro ihya —catyí ñi tsihin ra.

36 Maa tyin ra Jesús ña tyaq yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña ngyuhvi un; tsinu iñi yooho —catyí ra tsihin ra.

37 Tan ña tsaha ra cuhun cuaha nyivi tsihin ra. Tan quihin ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra.

38 Tsa tsaq ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsa ñi.

39 Quihvi ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixí ña; ñavin tsihi ña —catyí ra tsihin ñi.

40 Maa tyin ña tsinu iñi ñi tan tsacu naaha ñi nyehé ñi tsi ra. Tacan tan tava ra tsi tandihí ñi nuquehe, tan quihin ra tsi jutu ñaha luhlu tsa tsihi can tan sihi ña tan ra tsa tsaq tsihin ra, tan quihvi tandihí ñi nu canyí ña.

41 Tan tñin ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, jndyvita!

42 Juvín ñi cuhva can tan nduvita ña, tan nacacá ña. Utsi uvi cuiya ña. Tan tsa nyehe nyivi tsa iyo tsa javaha ra Jesús, iyo xaan cuñí ñi cuví. **43** Maa tyin ra Jesús ñihi tsaha cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

Nu tsinuhv ra Jesús ñuu Nazaret nu tsahnv ra

(Mt. 13:53-58; Lc. 4:16-30)

6 ¹ Tacan tan quitá ra Jesús ican, tan cuanuhv ra nda ñuu ra. Tan ra tsicá tsihin ra cuahán ndihí ra naha tsihin ra. ² Tan tsa tahnv tsi quivi quitatú nyivi, tacan tan cuahán ra naha vehe ñuhu tan quitsaha jacuahá ra Jesús tsi nyivi. Tan cuaha ñi yucú tyaá

soho ñi tsa caahán ra. Iyo cuñí ñi tsa tsiñí ñi tsa caahán ra, tan catyí ñi:

—¿Numaa tahan cutuhva ra ihya tandíhi tsa tsitó ra? ¿Yóo tsaha tsa tsiñi tuñi iñi ra? ¿Tan nácaa cutuhva ra javahá ra tsa iyo? **3** Tan ra tahví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñí ñi tyaa yahvi ñi tsi ra.

4 Maa tyin catyí ra tsihin ñi:

—Tandíhi ñi ityi tan jahá tandíhi nyívi tsa ñayívi tsi ra cuví ndusu yuhu Nyoo, maa tyin nyívi ñuu ra, tan nyívi ra, tan nyívi vehe ra ña tyaá yahvi ñi tsi ra —catyí ra Jesús.

5 Tan tyiso ndaha ra jiñi juhva nyívi cuuhví, tan janduvahá ra tsi ñi, maa tyin ña cuví javahá ra inga ca tsa iyo. **6** Tan iyo cuñí ra tyin ña tsinú iñi ñi tsi ra. Tacan tan cuahán ra cuajacuahá ra tsi nyívi iyó tandíhi ñi ñuu nyihi tsa cayucú yatyin ñi ñuu can.

Nu jacuhun ra Jesús tsi ra tsicá tsihin ra cucahan ra naha tuhun Nyoo

(Mt. 10:5-15; Lc. 9:1-6)

7 Tsa yahá yacan tan cana ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsaha jacuhún ra uvi uvi ra naha. Tan tsaha ra ndatu tsi ra naha tsa tava ra naha tatyí ña vaha tsi nyívi. **8** Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ñi. **9** Tan cunyaa nditsan tsaha ra naha. Tan ña cundaha ra naha inga nditsi jahma, na cuhun ra naha tsihin cuhva nditsi ñi maa ra naha. **10** Tan catyí ra tsihin ra naha:

—Cuhva tsa tsaa ndo iin ñuu, quihví ndo iin vehe, tan ndoo ndo

ican nda cuanda quita ndo ñuu can.

11 Tan tatun tsaa ndo iin ñuu tan ña naquihin cuenda nyívi iyó ñuu can tsi ndo, tan ña cuñi ñi tyaa soho ñi tsa cua cahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyí ñi siquí ñi. Tsa nditsa catyí yu tsihin ndo, tyin quiví cua tatsi tuñi Nyoo tsi nyívi, ñihi ca cua tatsi tuñi ra tsi ñi can tan ñavin ca nyívi ñuu Sodoma tan ñuu Gomorra —catyí ra Jesús tsihin ra naha.

12 Tacan tan cuahán ra naha cuacahán ra naha tuhun Nyoo tsihin nyívi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo. **13** Tan cuaha ñi nyívi tava ra naha tatyí ña vaha. Tan tyihí ra naha acetye tsi nyívi cuuhví tan nduvahá ñi.

Nu tsahá cuenda tsi nácaa tsihi ra Juan, ra jacoondutyá tsi nyívi

(Mt. 14:1-12; Lc. 9:7-9)

14 Ra rey Herodes tsitó ra tsa javahá ra Jesús tyin tandíhi nyívi tan caahán ñi tsa javahá ra, tan tsicá iñi ra tyeheh:

—Ra ihya cuví ra Juan, ra jacoondutyá tsi nyívi, ra tsa tsihi. Vityin nandoto ra. Juvín ra cuví can, yacan cuenda iyó tunyee iñi tsi ra —cuñí ra Herodes, tsicá iñi ra.

15 Yihí nyívi catyí ñi:

—Ra Elías, ra cuví ndusu yuhu Nyoo tahan tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahan tsanaha naha ra —catyí ñi.

16 Tsa tsiñí ra Herodes tandíhi tsa caahán nyívi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

17 Tacan catyí ra tyin juvín ñi maa ra tava tyiñu na tyihi ra naha tsi ra Juan vehe caa tan cuhñi ra naha tsi

ra tsihin carena. Tacan javahā ra Herodes tsihin ra Juan tsacatyí ña Herodías tsa cuvī ñasihi ra Felipe yañi ra. Ra Herodes quihin ra tsi ña Herodías tyin cuvi ña ñasihi ra
18 Tan tsa tacan javahā ra, catyí ra Juan tsihin ra tyin ña vaha tsa quihin ra tsi ña Herodías tyin ñasihi yañi ra cuví ña.

19 Yacan cuenda ndasi cuñi ña Herodías nyehé ña tsi ra Juan. Cuñi ña cahñi ña tsi ra, maa tyin ña cuví,
20 tyin ña tsahá ra Herodes tyin tsitó ra tyin ra vaha cuví ra Juan tan cuiti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñi iñi ra Herodes tandihi tsa caahán ra Juan, maa tyin vaha cuñi ra tyaá soho ra tsa caahán ra. **21** Maa tyin tsa tahān tsi quivi cacū ra Herodes javahā ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quivi ihya tsican ña Herodías tsa cuñi ña tsi ra Herodes. **22** Tyin ñaha sehe ña tsahān ña tsicuañi ña yaa nu iyó vico ra Herodes. Tan tahān xaan iñi ra Herodes tan ra nyecú cuxiñi tsihin ra cuhva tsañi ña. Tacan tan catyí ra Herodes tsihin ña:

—Ndācan tsi yu náa cuñi maa un. Náa tahan ñi maa tsi cua ndacan un tsi yu cua cuhva maa yu can tsi un. **23** Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

24 Tacan tan quitā ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndācan jiñi ra Juan, ra jacoondutyā tsi nyivi tsi ra —catyí ña.

25 Tacan tan numi ñi quihví nyico ñaha tyuvaa can nu nyíí ra rey

Herodes, tan catyí ña tsihin ra:

—Cuñi yu jiñi ra Juan, ra jacoondutyā tsi nyivi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

26 Tacan tan cuihya xaan cuñi ra rey can cuví. Maa tyin tsa cuenda tsa cahān ra tyin cua cuhva maa ra tsa cua ndacan ña, ña cuñi ra jandaví ñaha ra tsi ña tyin tandihi maa nyivi yucú vico can tan tsiñi ñi tsa cahān ra, yacan cuenda tsahā ra tsa tsican ña. **27** Numi ñi tavā tyiñu ra rey can tsi iin andaru na cuquihin ra jiñi ra Juan. **28** Tsahān andaru can tsitsi vehe caa, tan tsahnya ra jucun ra Juan. Tan tsindacā ra jiñi ra Juan tsi ñaha tyuvaa can, nyíí tsi nu iin coho. Tan nacuhvā cuenda ña can tsi sihi ña.

29 Tsa tsitō ra nyicún tsi ra Juan tsa cuví, tsahān ra naha tsiquihin ra naha cuñu ñuhu ra, tan tsicutsi ra naha can.

Nu jacatsi ra Jesús uhun mil rayi
(Mt. 14:13-21; Lc. 9:10-17; Jn. 6:1-14)

30 Tsa yahā yacan tan ndu iñ ra tsicá tyiñu ra Jesús tsihin ra, tan catyí tuhun ra naha tsihin ra tandihi tsa javahā ra naha, tan tsa jacuahā ra naha nu tsahān ra naha tsicahān ra naha tuhun Nyoo tsihin nyivi. **31** Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyivi cuahán tan vatsí, tan ndi ña cuyatyí ra naha catsi ra naha jahá ñi. **32** Tacan tan quihví ra Jesús tsihin ra naha tsitsi iin yutun ndoo tan cuahán ra naha iin nu taxin caa. **33** Maa tyin cuaha xaan nyivi nyehé ñi cuahán ra naha. Tan nacotó ñi tsi ra Jesús. Tacan tan cuahán ñi tsihin tsaha ñi, quitā ñi tandihi ñi ñuu tan jihna ca ñi tsaq nu cua tsa ra Jesús. **34** Cuhva tsa tsaq ra naha, quitā ra Jesús tsitsi yutun ndoo tan

nyehē ra tyin cuaha xaan nyivi yucú ican. Tan cundaahvī iñi ra nyehē ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsahā jacuahá ra cuaha xaan tuhun vaha tsi ñi.

35 Tsa tsa cua cuiso ñicanyii, tan natuhvā ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyivi iyó yatyin ñi ihya. **36** Vaha ca jacunuhu un tsi nyivi tyin ihya nduve tsa catsi ñi. Tan na kujata ñi paan catsi ñi vehe tsa iyó tsitsi huhu ihya tan ñuu tsa cayucú yatyin ñi —catyí ra naha tsihin ra.

37 Maa tyin nacahān ra Jesús, tan catyí ra:

—Cuhva nyooho tsa catsi ñi.

Tacan tan nacahān ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

38 Tan catyí ra Jesús tsihin ra naha:

—Nyehē jihna ndo najava paan ndahá ndo —catyí ra.

Cuhva tsa tsitō ra naha najava paan ndahá ra naha, tacan tan tsicahān ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

39 Tacan tan catyí ra tsihin nyivi na cunyecu ñi nu huhu can. **40** Tan tsinyecu cuenda cientu tan cuenda uvi xico utsi ñi tsa iin huhu tsinyecu ñi. **41** Tacan tan quihñi ra Jesús tsa uhun paan can tan nduvi tyaca can. Tan nanyehē ndaa ra ityi siquí, tan nacuhvā ra tyahvi nyoo tsi Nyoo, tsa yahā tan tsahnū cuatyí ra paan can, tan tsahā ra can tsi ra tsicá tsihin ra tyin tsatsa ra naha can tsi nyivi. Tsa ndihí tsatsā ra naha paan can, tan tsatsā ndihí ra naha tyaca. **42** Tsatsi tandihí ñi tan ndahā iñi ñi. **43** Tan jacutu ra naha utsi uvi tyica tsihin

paan tan tyaca tsa ndog. **44** Tan uhun mil rayii tsatsi paan can.

Nu tsicá ra Jesús nu ndutya

(Mt. 14:22-27; Jn. 6:16-21)

45 Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan huhu cuee ñi ra naha nda ñuu Betsaida tsitsi tsa ndi jacunuhu ra tsi nyivi yuvehe ñi.

46 Tsa yahā cuanuhu nyivi, tacan tan cuahán ra Jesús cuandacán tahvi ra tsi Nyoo iin jiñi yucu. **47** Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can. **48** Tan tsa nyehē ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha. **49** Maa tyin tsa nyehē ra naha tsicá ra nu ndutya, tsicā iñi ra naha tyin tatyí cuví ra, tacan tan quitsahā caná tsa ra naha **50** tyin tandihí ra naha nyehē ra naha tsi ra tan nayuhvi ra naha. Maa tyin nacahān ra tan catyí ra tsihin ra naha: —iNa nayuhvi ndo tyin maa yu cuví!

51 Tacan tan quihvi ra tsitsi yutun ndoo nu yucú ra naha, tan tsa yahā quihvi ra, iin yaha ñi cutaxin tatyí can. Tan iyo xaan cuñi ra naha cuví **52** tyin ñaha ca cutuñi iñi ra naha tsa iyo tsa javahā ra tsihin paan, tyin ndi ndava añima ra naha.

Nu janduvahā ra Jesús nyivi cuuhví tsa iyó nduhva tsa nañi Genesaret

(Mt. 14:34-36)

53 Yahā sava ra naha nu miñi can tan tsaā ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya. **54** Cuhva tsa quita ñi ra naha tsitsi yutun ndoo can, tan nacoto

nyivi tsi ra Jesús. **55** Tacan tan tsinú xaan ñi cuahán ñi cuajacotó ñi tsi nyivi iyó nanñi cahnu ityi can tyin tsaq ra Jesús. Tan tsaq cuaha nyivi quee tandiñi ñi ñuu nu nyii ra, tan yucú nyivi cuuhví nu tsitó tsaq tsihin ñi. **56** Tan tandiñi ñi ityi nu cuahán ra tsitsi ñuu nyihi o tsitsi ñuu nahnu, o tsitsi huhu, tsaquín nyivi nyivi cuuhví yuhu ityi. Tan caahán ndaahvi ñi tsihin ra na huhva ra tiin ñi cuuhví can vasu tan yuhu jahma ra tan nduvaha ñi. Tan tandiñi maa nyivi tsa tiin jahma ra nduvaha ñi.

Tsa jatívi tsi nyivi nu Nyoo

(Mt. 15:1-20)

7 **1** Tacan tan tsaq juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús. **2** Ra ihya naha ra nyehe ra naha tyin juhva ra tsicá tsihin ra Jesús ña nacatyá ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahá ra can naha ra. **3** Tyin ra fariseo naha ra javahá ra naha tumaa catyí costumbre tsi tsaahnu ra naha tacan tucu ñi tandiñi ca nyivi Israel ña cuví catsi ñi tun ña nacatyá ñi ndaha ñi cuaha tsaha tumaa iyó maa ñi. **4** Tan tatun ña nacatyá ñi ndaha ñi tsa tsaá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatyá ñi vasu, jarra, tan tandiñi ndaha tyiñu tsa tsinú tsihin caa tsa iyó tsi ñi tan nda cuanda cama ñi. **5** Tacan tan tsicá tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra huhva nacoq tsi tsaahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

6 Tan nacahan ra Jesús, tan catyí ra:

—Nditsa tsa cahan ra Isaías, ra cuví ndusu yuhu Nyoo tuhun nyooho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi ñi ñi.

7 Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahá Nyoo, catyí ra Jesús tsihin ra naha.

8 Tyin nyooho nacoq ndo huhva caahán Nyoo, tan nyicún ndo huhva caahán nyivi ñi, tumaa tuhvá ndo nacatyá ndaha tyiñu ndo, tan inga ca tsa tuhvá ndo javahá. **9** Nyooho tyaq tsiyo ndo tuhun caahán Nyoo, tacan tan javahá ndo tuhun tsahnu tsa nacoq tsi tsaahnu ndo. **10** Tyin catyí ley Nyoo tsa tyaq ra Moisés: “Tyaq yahvi ndo tsi jutu ndo tan tsi sihi ndo, tyin tandiñi nyivi tsa cua cahan ndavaha ñi tsi jutu o tsi sihi, cua cúu ñi” catyí ley Nyoo tsa tyaq ra Moisés. **11** Maa tyin nyooho catyí ndo tyin cuví catyí iin nyivi tsihin jutu ñi o sihi ñi tyehen: “Ña cuví jatyinyee yu tsi un tyin tandiñi tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndiñi can tsaha cuenda yu tsi Nyoo.”) **12** Tan tatun catyí nyivi tacan, ña cuñí ca tsi jatyinyee ñi tsi jutu ñi o tsi sihi ñi, catyí ndo. **13** Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu huhva iyó maa ndo. Tan cuaha ca tsa tacan caá javahá ndo —catyí ra Jesús.

14 Tacan tan cana nyico ra Jesús tsi nyivi tan catyí ra tsihin ñi:

—Tyaq soho vaha tandiñi ndo tsa cua cahan yu, tan nducu ndo huhva cutuñi ñi ndo. **15** Tsa quihví yuhu nyivi, ña cuví jatívi tsi tsi ñi. Tsa jatívi tsi ñi cuví tsa quitá ñi ñi.

16 Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

17 Tsa yahá nacoq ra Jesús tsi nyívi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra. 18 Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo?

19 Tyin tsitsi yo quihví tsi tan ñavin añima yo. Yaha can tan quitá tsi tsitsi cuñu ñuhu yo —catyí ra Jesús.

Tsihin tsehe janahá ra tyin tandíhi nyayu tan vaha catsi yo itsi. 20 Tan catyí tucu ra:

—Tsa quitá añima nyívi, yacan jatívi tsi ñi. 21 Tyin tsa caquiñi tsa tsicá iñi ñi tsitsi añima ñi quitá can, tacan tan rayíi cuñí ra coo inga ñaha tsi ra, o ñiñaha cuñí ñi coo inga rayíi tsi ñi. Yihí ra tsicoó ra tsihin inga ñaha tan ña tindahá ra tsihin ña. Yíhi rayíi tsicoó ra tsihin ra ndusihi. Tan yíhi ñiñaha tsicoó ñi tsihin ñi nduyíi. Tan yihí ñi cuñi ñi cahñi ñi nyívi, 22 o cuñí ñi suhu ñi. Yihí ñi cuñí ñi coo tsa tsii inga nyívi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. 23 Tandíhi tsa ña vaha ihya, quitá can tsitsi añima nyívi, tan jatívi can tsi ñi —catyí ra Jesús tsihin ra naha.

Nu tsinu iñi iin ñaha inga ñuu tsi ra Jesús

(Mt. 15:21-28)

24 Tsa yahá yacan tan quitá ra Jesús ñuu can, tan cuahán ra ñuhu nu canyíi ñuu Tiro tan ñuu Sidón. Tsa tsaá ra ican, quihví xeehe ra tsitsi iin vehe tyin ña cuñí ra coto nyívi numaa nyíi ra. Maa tyin ña cuví cunyíi xeehe ra 25 tyin yatyi xaan tsitó síhi iin ñaha tyuvaa tsa yihí

tatyí ña vaha nu nyíi ra. Tacan tan cuahán ña nu nyíi ra. Tsa tsaá ña tan tsicuiñi tsiti ña nuu ra. 26 Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaá ña nu nyíi ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. 27 Maa tyin catyí ra Jesús tsihin ña:

—Ña cahan yuhu ca un; na catsi jihna nyívi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

28 Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú ti tan tsatsí ti titsehe tsa cucuyó xuu mesa jahá sehe tsitoho ti —catyí ña tsihin ra.

29 Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quitá tatyí ña vaha tsi sehe un. Cuanuhu vityin —catyí ra tsihin ña.

30 Tan cuhva tsa tsaá ña yuvehe ña, canyíi taxin sehe ña nu cama, tyin tsa yahá quitá tatyí ña vaha tsi ña.

Nu janduvahá ra Jesús tsi ra soho tan ñiñi

31 Quitá nyico ra Jesús ñuhu nu canyíi ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaá ra miñi Galilea. 32 Tsa tsaá ra Jesús ican, tsahan nyívi tsindacá ñi iin ra soho tsa ña cuví cahan nu nyíi ra. Cahán ndaahvi ñi tsihin ra na tyiso ra ndaha ra jiñi ra can. 33 Tacan tan quihin ra tsi ra can cuahán tsiyo tsihin ra nu nduve nyívi. Tan tyaxin ra nundaha ra tsitsi soho ra can, tan tiví síi ra, tan tiñi ra nu yaa ra can. 34 Tacan tan nanyehé ndaa ra ityi andívi. Tan ixta tatyí ra, tan catyí ra: —¡Efata! —tan tuhun ihya cuñí tsi catyí: ¡Nuña!

35 Tan tsihin can nuñā soho ra can, tan nduvahā yaa ra, tan cuvī nacahan ra. 36 Tan catyí ra Jesús tsihin ñi tyin ña cahan ñi can tsihin nyivi, maa tyin vasu ndi maa caahán ra tacan tsihin ñi, cuñihī ca ñi caahán ñi tsa javahā ra. 37 Iyo cuñí ñi tan catyí ñi:

—Tandihī tsa javahá ra tan vaha javahá ra itsi. Nyivi soho nacuñí ñi jahá ra tan nyivi ñihī nacahan ñi.

Nu tsaḥā ra Jesús tsa catsi cumi mil nyivi
(Mt. 15:32-39)

8 1 Quivi can natacā cuaha nyico nyivi nu nyí ra Jesús. Tan nduve maa tsa catsi ñi iyó. Tacan tan canā ra Jesús tsi ra tsicá tsihin ra, tan catyí ra tsihin ra naha:

2 —Ndaahvi xaan cuñí yu nyehé yu nyivi ihya, tyin tsa uñi quivi yucú ñi tsihin yo, tan nduve ca tsa catsi ñi.

3 Tyin tun jacuhun yu tsi ñi yuvehé ñi tsa ndi cumañi ca catsi ñi, cua cúu naaha ñi ityi cahun ñi, tyin yihí ñi cañi xaan quee ñi —catyí ra Jesús tsihin ra naha.

4 Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

5 Tan tsicā tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

6 Tacan tan catyí ra tsihin nyivi na cunyecu ñi nu ñuhu. Tsa yahā cahan ra yacan, tacan tan quihñ ra tsa utsa paan can, tan nacuhvā ra tyahvi nyoo tsi Nyoo tsa cuenda can. Tsahan tsahnū cuatyí ra can tan tsaḥā ra can tsi ra tsicá tsihin ra, tyin tsatsa ra naha can tsi nyivi. 7 Tan ndahá tucu ra naha juhva tyaca nyihi. Tsaḥā ndihī ra Jesús tyahvi nyoo tsi Nyoo tsa cuenda can, tacan tan tsaḥā ra can tsi ra naha tyin tsatsa ra naha tsi

nyivi. 8 Tandihī ñi tsatsí ñi, tan ndahā vaha iñi ñi. Tsa ndihī tsatsí ñi tan jacutū ra naha utsa tyica tsihin tsa ndoo. 9 Tan quitā maa cumi mil nyivi jacatsí ra. Yahā can tan jacunuhū ra tsi ñi. 10 Tsa yahā cuanuhu ñi, tacan tan quihvi ra tsihin ra tsicá tsihin ra tsitsi iin yutun ndoo. Tan cuahán ra naha ityi Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo
(Mt. 16:1-4; Lc. 12:54-56)

11 Tsaḥā ra fariseo naha ra nu nyii ra Jesús, tan quitsahā caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsí tsi ra, yacan cuenda catyí ra naha tsihin ra tyin javaha ra iin tsa iyo nyehé ra naha. 12 Tacan tan ra Jesús ñihī xaan ixtā tyi ra, tan catyí ra:

—¿Nacuenda tyin tsicán nyivi iyó vityin tsa iyo? Tsa nditsa catyí yu tsihin ndo tyin ña cua nyehé ndo ndi intuhun tsa iyo —catyí ra tsihin ra naha.

13 Tacan tan nacoḡ ra tsi ra naha, tan quihvi nyico ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya
(Mt. 16:5-12)

14 Ra tsicá tsihin ra Jesús naḡ iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can. 15 Tacan tan catyí ra Jesús tsihin ra naha:

—Jḡha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

16 Tan ra tsicá tsihin ra quitsahā natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

17 Tsa tuvı̄ iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añima ndo? 18 Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A ña nducuhún iñi ndo tsa javahá yu 19 quivı̄ tsa jacatsı̄ yu uhun mil rayı̄ tsihin uhun taahan ñi paan? ¿A ña ñuhú iñi ndo najava tyica jacutı̄ ndo tsihin tsa ndoo? —catyí ra Jesús, tsicá tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

20 Tan catyí nyico ra Jesús tsihin ra naha:

—Tan quivı̄ jacatsı̄ yu cumi mil nyı̄vi tsihin utsa taahan ñi paan, ¿najava tyica jacutı̄ ndo tsihin tsa ndoo?

Nacahan ra naha tan catyí ra naha:

—Utsa taahan tyica.

21 Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvahá ra Jesús iin ra cuaa nda ñuu Betsaida

22 Tsa yahá yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaá ra naha ican, tsindacá nyı̄vi ñuu can iin ra cuaa nu yucú ra naha. Tan cahán ndaahvi ñi tsihin ra Jesús tyin tı̄n ra tsi ra cuaa can tan janduvaha ra tsi ra. 23 Tacan tan tı̄n ra ndaha ra cuaa can, tan quihın ra tsi ra cuahán tsihin ra ityi tsata ñuu. Tyaa sı̄ ra nu ndaha ra tan tı̄n ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu. 24 Ra cuaa can nanyehe ra tan catyí ra:

—Nyehé yu juhva nyı̄vi, tan caá ñi tumaa caá yutun, maa tyin tsicá ñi —catyí ra.

25 Tacan tan tı̄n nyico ra Jesús tinuu ra inga tsaha, tan nanyehe vaha ra tan nduvahá ra. Nanyehe catsi vaha ra tandı̄hi tsa iyó. 26 Tacan tan jacunuhı̄ ra Jesús tsi ra yuvehe ra, tan catyí ra tsihin ra:

—Ña quı̄hvi un tsitsi ñuu ihya tan ña nacatyı̄ tuhun tsehe tsihin nyı̄vi —catyí ra Jesús tsihin ra.

Nu cahán ra Pedro tyin ra Jesús cuvı̄ Cristo, ra jacacú tsi yo

(Mt. 16:13-20; Lc. 9:18-21)

27 Yahá can tan cuahán ra Jesús tsihin ra tsicá tsihin ra ñuu tsa cayucú yatı̄n ñi ñuu Cesarea tsa javahá ra Felipe. Tsitsi tsa cuahán ra naha, tan tsicá tuhun ra Jesús tsi ra naha, tan catyí ra:

—¿Náa caahán nyı̄vi tuhun yu? ¿Yóo ra cuvı̄ yu catyí ñi? —catyí ra tsihin ra naha.

28 Nacahan ra naha tan catyí ra naha:

—Yihı̄ nyı̄vi catyí ñi tyin ra Juan, ra jacoondutyá tsi nyı̄vi, cuvı̄ un. Inga ñi catyí ñi tyin ra Elías. Yihı̄ ñi catyí tucu ñi tyin inga ra cuvı̄ ndusu yuhu Nyoo cuvı̄ un —catyí ra naha tsihin ra.

29 Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuvı̄ yu, cuñi ndo?

Tan nacahan ra Pedro tsihin ra:

—Yooho cuvı̄ ra Cristo, ra jacacú tsi nyı̄vi.

30 Maa tyin cahán ra Jesús tsihin tandı̄hi ra naha tyin ña cahán ra naha can tsihin ndi intuhun maa nyı̄vi.

Nu cahán ra Jesús tyin cua cúu ra

(Mt. 16:21-28; Lc. 9:22-27)

31 Tacan tan quı̄tsahá jacuahá ra tyin Rayı̄ tsa quee nda gloria cua nyehe xaan ra tundoho. Tan ña cua tsinu iñi ra mandoñi naha ra tan ra jutu cuvı̄ ityi nuu tsihin ra jutu naha ra tsi ra tan ndi ra maestro cuenda

ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyivi tsi ra maa tyin cua nandoto ra tsa tsinu uñi quivi. **32** Tacan cahān catsi ra tsihin ra naha. Tacan tan quihñ ra Pedro tsi ra cuahán tsihin ra tsata vehe tan quitsahā caahán ra tsihin ra Jesús tyin ña vaha tsa cahān ra. **33** Maa tyin ra Jesús nanyico coo ra, tan nanyehe ra nu nyecú inga ra tsicá tsihin ra. Tan quitsahā caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyivi —catyí ra Jesús tsihin ra Pedro.

34 Tacan tan canā ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyooho cuñi cunyicun tsi yu, cahnya iñi ndo nacoo ndo tsa cuñi maa ndo javaha ndo, tyin tacan tan cuvi javaha ndo cuhva cuñi Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihí quivi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu. **35** Tyin nyooho tsa ña cuñi nyehe tundoho tan cuhva ndo ñayivi ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi tsa cuenda yu tan tsa cuenda tuhun Nyoo, cua cacu ndo. **36** Tyin nduve yahvi nyaá cua ñihi ndo tandihí tsa iyó nu ñuhu ñayivi ihya tun ña cua cacu añima ndo. **37** Tyin nduve maa náa tsihin tyahvi ndo tan cuvi cacu añima ndo tan ña cunaa tsi. **38** Tyin nyivi cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyivi caquiñi tsa ña tyaá yahvi tuhun Nyoo, yuhu Rayii tsa quee nda gloria cua nducahan nuu yu nyehe yu tsi ñi quivi quitsi yu tsihin ángel cuenda Nyoo Jutu yu tan tsihin tsa sii caá ra.

9 ¹ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

Nu nyehe uñi ra tsicá tsihin ra Jesús nu nasamā cuhva caá ra

(Mt. 17:1-13; Lc. 9:28-36)

2 Tsa yahā iñu quivi, tacan tan quihñ ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasamā cuhva caá ra tan nyehe ra yucú tsihin ra can. **3** Xiñu xaan tan cuitsin xaan jahma ra cuvi tumaa cuitsin vico. Ndi intuhun maa nyivi iyó nu ñuhu ñayivi ihya tan ña cuvi janducuitsin ñi jahma tumaa cuitsin jahma ra. **4** Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra. **5** Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro. **6** Cahān ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

7 Tacan tan nuu iin vico siqui ra naha tan tyasi tsi tsi ra naha. Tan tsitsi vico can nacahān iin ndusu tan catyí tsi:

—Ra ihya cuví Sehe yu, tan cuñi xaan yu tsi ra. Tyaa yahvi ndo tsa caahán ra —catyí ndusu can.

8 Tan cuhva tsa nanyehe ra naha, nduve ca ra Elías tan ra Moisés nyaá, intuhun ña maa ra Jesús nyaá.

9 Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehe ra naha. Cuví cahan maa ra naha can nda yaha nandoto Rayii quee nda gloria, tan rayii can cuví maa ra.

10 Yacan cuenda ña cahān maa ra naha tuhun can, tan natuhún tahan ra naha náa cuñi tsi catyí tuhun tsa cua

nandoto ra. **11** Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuvī maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

12 Tan nacahan ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihī. ¿Tan náa catyí tuhun Nyoo cuenda yuhu Rayi quee nda gloria? Catyí tsi tyin cua nyehe yu tundoho, tan ña cua cuñi nyivi nyehe ñi tsi yu.

13 Maa tyin yuhu catyí yu tsihin ndo tyin tsa yahā quitsi ra Elías. Tan nyivi javahā ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvahā ra Jesús iin ra tyuvaa tsa yihí tatyí ña vaha

(Mt. 17:14-21; Lc. 9:37-43)

14 Tsa yahā yacan tan cuahán ra naha nu yucú tandihī ca ra tsicá tsihin ra naha. Tsa tsaq ra naha ican, nyehe ra naha tyin yucú cuaha nyivi naniñ canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. **15** Tsa nyehe nyivi can tsi ra Jesús, iyo xaan cuñi tandihī ñi cuvī. Tacan tan tsahan ñi nu nyaá ra tsicuhvā ñi nacumi tsi ra. **16** Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

17 Tacan tan nacahan iin ra tsa nyaá tyañu tandihī nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihī ra jahā nu. **18** Tyin tandihī ñi nu tñn tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahā cahan

yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuvī tava ra naha tsi nu —catyí ra can tsihin ra Jesús.

19 Nacahan ra Jesús tan catyí ra:

—¿Nyooho nyivi ña tsinú iñi tan caquiñi! ¿Ndáa nda quivi cua cunyii yu tsihin ndo? ¿Tan najava ca quivi cua cunyehe iñi yu nyehe yu tsi ndo tyin ña tsinú vaha iñi ndo tsi yu? Ndaca ndo tsi ra luhlu can tsi yu ihya —catyí ra.

20 Tacan tan tsindacā jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvā nu tsi ra luhlu can tan quitsahā tsicó tuvi ra nu ñuhu jahā nu. Tan quita tiñuu yuhu ra. **21** Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsahā taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra. **22** Tan cuaha tsaha tyihī tatyí ña vaha can tsi ra nu cayú ñuhu, tan nu ndutya. Cuñi nu cahñi nu tsi ra. Maa tyin tun cuvī javaha un náa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

23 Tan catyí ra Jesús tsihin ra:

—Tun tsinú iñi un, tandihī tan cua cuvī tyin tsa cuenda ra tsa tsinú iñi tandihī tan cuvī —catyí ra Jesús.

24 Tacan tan canā tsa jutu ra tan catyí ra tsihin ra Jesús:

—¿Tsinú iñi yu! ¿Jatyinyee tsi yu na tsinu ca iñi yu! —catyí ra tsihin ra.

25 Cuhva tsa nyehe ra Jesús tyin cuaha nyivi ndu iñi nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

26 Tacan tan quini xaan canā tsa

nu tatyí can tan janduvá nu tsi ra inga tsaha, tan quitá nu tsi ra. Tan jacúu naaha nu tsi ra. Tan cuñí maa nyívi tyin tsa tsihí ra. **27** Maa tyin ra Jesús tíin ra ndaha ra luhlu can, tan cañihí ra tsi ra, tan tsinyaá nyityi ra.

28 Tacan tan quihví ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

29 Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

**Nu cahán ra Jesús inga tsaha tyin
cua cahñi nyívi tsi ra**

(Mt. 17:22-23; Lc. 9:43-45)

30 Quiví tsa quitá ra Jesús ican, tan ra tsicá tsihin ra yahá ra naha ñuhú Galilea. Tan ña cuñí ra Jesús tsa coto nyívi iyó ican tyin nyí ra nu iyó ñi. **31** Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayíi tsa quee nda gloria cua nacuhva cuenda nyívi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quiví. **32** Maa tyin ra ican naha ra ña cutuñí iñi ra naha tsa caahán ra tsihin ra naha. Tan ña cuñí ra naha ndaca tuhun ra naha tsi ra tyin yuuhví ra naha.

**Nu janahá ra Jesús yóo ra cahnu
ca cuví tsitsi tsa tandíhi nyívi
tsa ndacá ñaha Nyoo**

(Mt. 18:1-5; Lc. 9:46-48)

33 Tan tsa tsaá ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicá tuhun ra.

34 Tsa cahán ra Jesús tacan, taxin ña cuví ra naha, tyin ityi vatsí ra

naha natuhun ra naha yóo ra cahnu ca cuví tsa nuu tandíhi ra naha.

35 Tacan tan tsinyaá ra Jesús tan caná ra tsi tandíhi tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñí cuvi ityi nuu, cuñí tsi cuví ndo nda nu ndíhi ña tsa nuu tandíhi ndo, tan jatyinyee ndo tsi tandíhi nyívi —catyí ra Jesús tsihin ra naha.

36 Tacan tan quihín ra iin ra luhlu tyaa ra mahñu ra naha. Tan tyihí jucun ndaha ra tsi ra luhlu can, tan catyí ra:

37 —Nyívi naquihin iin nyívi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyívi naquihin cuenda tsi yuhu, naquihin cuenda tucu ñi tsi ra tsa jaquitsí tsi yu tan ñavin maa ñi maa yu naquihin cuenda ñi.

**Nyívi tsa ña cuxaán tsi yo, juven
ñi ican jatyinyeé tsi yo**

(Mt. 10:42; Lc. 9:49-50)

38 Tacan tan catyí ra Juan tsihin ra Jesús:

—Maestro, nyehé ndi iin ra tava tatyí ña vaha tsi nyívi tsihin sívi un. Maa tyin tyasí ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

39 Maa tyin catyí ra Jesús tsihin ra:

—Ña casí ndo nu javaha nyívi tacan. Tyin ndi intuhun ñi tsa javaha tsa iyo tsihin sívi yu tan ña cua cana iñi ñi cahan ñi ndavaha ñi tsi yu. **40** Tyin nyívi tsa ña xaan iñi tsi yo, tsihin yo cutahán ñi. **41** Tan nyívi tsa cua cuhva vasu tan iin yatsin ndutyá coho ndo tyin tsinú iñi ndo tsi yu, cua cuhva Nyoo tsa cua cuhva ra tsi ñi.

**Nu tsahá cuenda ra Jesús tsi yo
nácaa jaha cuenda yo tsi yo tan
ñi javaha yo tsa ña vaha**

(Mt. 18:6-9; Lc. 17:1-2)

42 Nyívi cua natyuhu tsi iin nyívi

tsa ñaha ca tsinú vaha iñi tsi yu tyin javaha ñi tsa caquiñi, vaha ca cuhñi nyivi yuu yoso vee jucun ñi tan cujanehñi ñi tsi ñi tsitsi nu cunu ndutya ñuhu. **43** Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un. **44** Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. **45** Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu. **46** Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. **47** Tun tinuu un javahá tsa ña vaha, çasi nu javahá can tacan. Tatun ña cuví, tava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un. **48** Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. **49** Maa tyin tandihí nyivi nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñi. **50** Vaha xaan ñi. Maa tyin tun ndihí tsa uhva tsi, ña jandu uhva ca tsi tan ña cuví ca cuatyíñu nyivi itsi. Yacan cuenda nyooho, ña jandihí ndo tsa coo tuhun Nyoo añima ndo tyin cuví tsi tumaa ñi. Tyin tacan tan cuví coo taxin ndo tsihin tahan ndo.

Nu caahán ra Jesús tyin ña vaha nacoo rayiñ ñasiñi ra

(Mt. 19:1-12; Lc. 16:18)

10 **1** Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyivi nu nyii ra, tacan tan quitsaha jacuahá ra tsi ñi tumaa tuhvá maa ra javahá.

2 Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsica tuhun ra naha tsi ra tatun vaha nacoo rayiñ ñasiñi ra.

3 Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

4 Tan nacahan ra naha tan catyí ra naha:

—Ra Moisés catyí ra tyin cuví cani ndi tutu cuenda ley ndi, tacan tan cuví nacoo ndi ñasiñi ndi —catyí ra naha tsihin ra.

5 Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo. **6** Maa tyin quivi jihna ñi, quivi javaha Nyoo tandihí maa tsa iyó, catyí nu tutu ra tyin javaha ra rayiñ tan ñaha. **7** “Yacan cuenda taahán tsi nacoo rayiñ jutu ra tan sihi ra tan ndu iin ra tsihin ñasiñi ra. **8** Tan nduvi ñi cua cuví ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuví ñi.

9 Yacan cuenda, ña cuví jasiñ nyivi tsa jandu iin Nyoo —catyí ra Jesús tsihin ra naha.

10 Yaha can tan cuanuhu ra nda yuvehe, tan quitsaha nducú tuhun nyico ra tsica tsihin ra siqui tuhun can. **11** Tan catyí ra Jesús tsihin ra naha:

—Ra tsa cua nacoo ñasiñi tan quihin ra inga ñaha, cua coo cuatyí ra nu Nyoo. **12** Tacan tucu ñi ñaha:

Tun nacoo ña tsi yîi ña tan tindaha ña tsihin inga rayîi, juvin ñi cua coo tucu cuatyî ña —catyî ra Jesús.

Nu nasoco ra Jesús tsi tsa nyihi

(Mt. 19:13-15; Lc. 18:15-17)

13 Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandacá tsa nyihi. 14 Maa tyin tsa nyehe ra Jesús tsa javahá ra naha tacan, cuxaan ra tsi ra naha, tan catyî ra:

—Cuhva ndo tsa quitsi tsa nyihi nu nyaá yu. Ña casi ndo itsi naha tsi tyin nyivi ndacá ñaha Nyoo cuvî ñi tumaa cuvî tsa nyihi tyin tsinú iñi ñi tsi Nyoo. 15 Tan tsa nditsa catyî yu tsihin ndo tun ña cuíta iñi nyivi tsi Nyoo tumaa nyitá iñi iin ra luhlu tsi jutu ra, ña cua cuvî quihvi ñi nu ndacá ñaha Nyoo —catyî ra Jesús tsihin ra naha.

16 Tacan tan quihîñ ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

**Nu tsaha cuenda ra Jesús tyin yîi
xaan nacuhva cuenda iin ra cuca
tsi ra tsi Nyoo**

(Mt. 19:16-30; Lc. 18:18-30)

17 Yahá yacan tan cuahán ra Jesús. Tan tsinú xaan iin rayîi cuahán ra cuanyicún ra tsi ra. Tsa tahañ ra tsi ra, tsicuñî tsiñî ra nuu ra, tan tsicá tuhun ra tsi ra, tan catyî ra:

—Maestro, vaha xaan un. ¿Náa taahán tsi javaha yu tan cuvî coo yu ñayivi nyito tsa ña cua naa maa? —catyî ra tsihin ra Jesús.

18 Tan catyî ra Jesús tsihin ra:

—¿Nacuenda catyî un tyin ra vaha cuvî yu? Tan intuhun ñi ra vaha iyó tan ra ican cuvî Nyoo. Tan tsa catyî un tyin vaha yu, nacoó un tyin Nyoo cuvî yu. 19 Yooho tsitó un tsa catyî

Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaa yahvi tsi jutu un tan tsi sihi un” —catyî ra Jesús tsihin ra.

20 Nacahan ra tan catyî ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyî ra.

21 Tacan tan siñ cuñî ra Jesús nyehé ra tsi ra. Tan catyî ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyî ra Jesús tsihin ra.

22 Tsa tsiñî ra tyuvaa can tsa cahan ra Jesús tacan, cuiihya xaan cuñî ra cuvî, tan tsihin tucuiihya iñi cuanuhî ra yuvehe ra tyin cuca xaan ra.

23 Tacan tan nanyehé ra Jesús naniñ canduvi nu nyaá ra, tan catyî ra tsihin ra tsicá tsihin ra:

—¡Yîi xaan tan cuvî nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyî ra tsihin ra naha.

24 Tsa tsiñî ra tsicá tsihin ra tsa caahán ra, iyo xaan cuñî ra naha cuvî. Maa tyin catyî tucu ra tsihin ra naha inga tsaha:

—¡Sehe yu, nyivi tyaá xaan jiñi tandihi tsa cuca, yîi xaan tan quihvi ñi nu ndacá ñaha Nyoo! 25 Yatyi ca cuvî yaha iin camellu xuu iin yiquî tucu, tan ñavin ca tsa quihvi iin nyivi cuca nu ndacá ñaha Nyoo —catyî ra Jesús.

26 Tsa tsiñî ra naha tuhun ihya, iyo xaan cuñî ra naha cuvî, tan quitsaha tsicá tuhun tahan ra naha, tan catyî ra naha:

—Tun tacan, ¿yóo cua cacu?

—catyí ra naha.

27 Tacan tan nanyehē ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yíi.

28 Tacan tan catyí ra Pedro tsihin ra:

—Jutu Mañi yu, tandíhi maa tsa iyó tsi ndi nacoḡ ndi can tan nyicún ndi tsi un.

29 Nacahan ra Jesús tan catyí ra:

—Tsa nditsa catyí yu tsihin ndo tyin tandíhi nyooho tan tandíhi inga ca nyivi tsa cua nacoḡ vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñí Nyoo jacacu ra tsi ñi, 30 cua ñihi ñi cientu ca tsaha siqui tsa nacoḡ ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuví yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsa tsa vatsí, cua ñihi ñi ñayivi nyito tsa ña cua naa maa coo ñi. 31 Cuaha ñi nyivi cuahán ityi nuu vityin, cua cuhun ñi nda nu ndíhi ña. Tan nyivi cuahán nu ndíhi ña vityin, cuaha ñi cua cuhun ityi nuu —catyí ra Jesús.

**Nu jacotó nyico ra Jesús nácaa
cua cahñi nyivi tsi ra**

(Mt. 20:17-19; Lc. 18:31-34)

32 Tsa tsa cuñí cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandíhi nyivi tsa cuahán cuanyicún tsi ra. Iyo xaan cuñí ñi tan tsihin tsa yuuhví ñi cuahán ñi. Tacan tan tavá siñ ra tsi tsa utsi uvi ra tsicá maa tsihin ra. Tan quitsahá catyí tuhun ra tsihin ra naha tsa cua tahan ra. 33 Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyivi tsi yuhu, Rayíi quee nda gloria. Cua cuhva cuenda ñi tsi yu tsi ra

jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra. 34 Cua vacu nducu ra naha tsi yu, cua cañi ra naha tsi yu, cua tiví siñ ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

**Nu tsicán ra Jacobo tan ra Juan iin
tumañi iñi tsi ra Jesús**

(Mt. 20:20-28)

35 Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

36 Tacan tan tsicá tuhun ra Jesús tsi ra naha tan catyí ra:

—¿Náa cuñí ndo javaha yu?

37 Tan nacahan ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

38 Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

39 Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu. 40 Maa tyin tsa cunyata iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús

tsihin ra naha.

41 Tsa tsiñi tsa utsi ca ra tsicá tsihin ra Jesús yacan, cuxaan ra naha tsi ra Jacobo tan ra Juan. 42 Maa tyin cana ra Jesús tsi ra naha tan catyí ra tsihin ra naha:

—Tsa tsitó ndo tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi.

43 Maa tyin ñavin tacan taahán tsi javaha nyooho tyin ra tsa cuñi cuvi ra cahnu ityi nuu Nyoo, cuñi tsi cuvi ra musu tandihi ndo. 44 Tan nyooho tsa cuñi cuví ityi nuu, cuñi tsi cuví ndo musu tandihi ca ndo. 45 Tyin yuhu, Rayi tsa quee nda gloria, ña vatsí yu tyin cuñi yu jatyiinyee nyivi tsi yu. Yuhu vatsí yu vatsí jatyiinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

Nu jananyehę ra Jesús tsi ra Bartimeo

(Mt. 20:29-34; Lc. 18:35-43)

46 Tacan tan tsaq ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yaha ra naha nyaá iin ra cuaa nañi Bartimeo, sehe ra Timeo, tsicán ra caridaa. 47 Tan cuhva tsa tsito ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsaha caná tsa ra, tan catyí ra:

—jJesús, tata ra David, cundaahvi iñi tsi yu! —catyí ra caná tsa ra.

48 Tacan tan quitsaha cuxaan nyivi tsi ra tan catyí ñi tsihin ra na cutaxin ra, maa tyin cuñihi ca ra caná tsa ra tan catyí ra:

—jTata ra David, cundaahvi iñi tsi yu! —catyí ra.

49 Tacan tan tsiñiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Ndyvita, cohon tyin caná ra tsi un —catyí ra naha tsihin ra.

50 Tacan tan janeñi ra jahma ndasi ra nda sava. Tan cuahan ra iin yaha ñi nda nu nyaá ra Jesús.

51 Tacan tan tsicq tuhun ra Jesús tsi ra:

—¿Náa cuñi un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehę nyico yu —catyí ra.

52 Tan catyí ra Jesús tsihin ra:

—Cuanuhu. Tsa nduvaha un tyin tsinú iñi un tsi yu.

Juvin ñi cuhva can tan nanyehę ra can. Tan cueta cuahán ra cuanyicún ra tsi ra Jesús.

Nu quihvi ra Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

11 1 Tsa tsa cuñi tsa ra Jesús tan nyivi nyicún tsi ra nda ñuu Jerusalén, yatyin nu canyií ñuu Betfagé tan ñuu Betania, tan yatyin ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

2 —Cuaahan ndo ñuu tsa canyií ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihñi tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu. 3 Tatun cusana ndaca tuhun nyivi tsi ndo: “¿Nacuu ndo urru ihya?” Tacan tan catyi ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyi ndo tsihin ñi —catyí ra Jesús tsihin ra naha.

4 Tacan tan cuahán ra naha, tan tsa tsaq ra naha, nañihñi ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti. 5 Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda

ndatsí ndo urru can? —catyí ra naha tsihin ra naha.

6 Tacan tan nacahan ra naha tumaa cahān ra Jesús tsihin ra naha. Tan tsahā ra can naha ra quihin ra naha urru can. 7 Tacan tan tsindaca ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti. 8 Tan tsaquin cuaha nyivi jahma ni tsitsi ityi nu yahā ra, tan inga ni tsahnyā ni ndaha yutun tan tsaquin ni tsitsi ityi.

9 Tacan tan nyivi tsa cuahán ityi nuu ra tan ityi tsata ra, quitsahā caná tsaā ni tan catyí ni:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo! 10 ¡Na jacahnu yo tsi ra vatsí cundaca ñaha tumaa tsindaca ñaha ra David, tsii tsaahnu yo! ¡Cahnu xaan cuví ra nyaá gloria! —catyí ni.

11 Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yahā nyehe ra tandihi tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

Nu cahān ra Jesús tsi yutun higo tsa ña tsahá tsiti

(Mt. 21:18-19)

12 Tsa tuvi inga quivi tsa quitā ra Jesús tan ra tsicá tsihin ra ñuu Betania, tsaā soco tsi ra Jesús. 13 Tsa quitā ra naha ndasava nyehe ra Jesús nu nyaá iin yutun higo tsa iyó numa. Tsaahan ra tsinyehe ra tun iñi tsiti tun, maa tyin nduve tsiti tun, maa ni maa ndaha tun iñi, tyin ñaha ca tahan tsi quivi cuhva tun tsiti. 14 Tacan tan cahān ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tsihin tun.

Tan tsiñi ra tsicá tsihin ra tsa caahán ra.

Nu jacunū ra Jesús nyivi xicó nuquehe vehe ñuhu cahnu

(Mt. 21:12-17; Lc. 19:45-48; Jn. 2:13-22)

15 Tsa tsaā ra naha ñuu Jerusalén, cuahán nyico ra Jesús vehe ñuhu cahnu tan quitsahā jacunū ra nyivi xicó tan jatá tsa yucú nuquehe yuvehe ñuhu can. Janduvā ra mesa nu nyecú nyivi samá xuhun nyivi. Tan janduvā tucu ra tyayu nu nyecú nyivi xicó paloma. 16 Tan ña tsahā ca ra yaha sava ni nuquehe vehe ñuhu can tsihin ndaha tyiñu. 17 Tan quitsahā jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé naniñ nu ñuhu ñayivi tsi Nyoo”? Tan nyooho jananduvī ndo itsi vehe ñasuhu —catyí ra tsihin ni.

18 Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahā nducú ra naha cuhva cahñi ra naha tsi ra tyin yuuhvi ra naha nyehe ra naha tsi ra tsa cuenda tsa janahá ra tsi nyivi tan yuuhvi tucu ra naha tyin tsa cuaha xaan nyivi nyicún tsi ra. 19 Maa tyin tsa tsa cuñi cuaa, quitā ra Jesús ñuu can tsihin ra tsicá tsihin ra.

Nu na ityi yutun higo

(Mt. 21:20-22)

20 Tsa tuvi inga quivi, yahā nyico ra naha nu nyaá yutun higo tsa cahān ra Jesús. Tan nyehe ra naha tyin na ityi tun tan nda cuando yoho tun na ityi. 21 Tacan tan tsa nyehe ra Pedro yutun higo can, nducuhun iñi ra tsa javahā ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahān un —catyí ra.

22 Nacahan ra Jesús, tan catyí ra: —Tsiñu iñi ndo tsi Nyoo. 23 Tyin tsa nditsa catyí yu tsihin ndo tyin nyivi cua cahān tsihin yucu ihya tyehen: “Cuatsiyo ihya tan cuaahan

tsitsi ndutya ñuhu”, tan tatun tsinú iñi ñi tyin cua cundaa tsa cahān ñi tan ña uvi tsicá iñi ñi, cua cundaa tsi. **24** Yacan cuenda catyí yu tsihin ndo tyin tandihi tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihin cuenda ndo can, cua naquihin ndo can. **25** Tan tsa cua ndacan tahvi ndo tsi Nyoo, tun nducuhún iñi ndo tyin xaan cuñí ndo tsihin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo. **26** Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

Nu tsicā tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyivi
(Mt. 21:23-27; Lc. 20:1-8)

27 Tacan tan tsaā nyico ra naha ñuu Jerusalén. Tsa nyíí ra Jesús tsicá nuu ra nuquehe vehe ñuhu cahn, natuhvā ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra. **28** Tan tsicā tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

29-30 Tan nacahān ra Jesús, tan catyí ra:

—Cuñí tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsi tsi ra Juan tyin jacondutya ra tsi nyivi? ¿A Nyoo o nyivi? Tatun catyí tuhun ndo tsihin yu yóo jaquitsi tsi ra, cua catyí tuhun tucu yuhu tsihin nyooho yóo tava tyiñu tsi yu javahá yu tyehen —catyí ra Jesús tsihin ra naha.

31 Tacan tan quitsahā caahán yuhu tahan ra naha, tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo

tyehen: “Tun Nyoo jaquitsi tsi ra, ¿nacuenda ña tsinú iñi ndo tsa cahān ra?” **32** ¿A vaha tun catyí yo tyin nyivi jaquitsi tsi ra? Ña cuvi —catyí ra naha, tyin yuuhví ra naha tsi nyivi, tyin tandihi ñi tan tsinú iñi ñi tyin ndusu yuhu Nyoo cuví ra.

33 Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyí tuhun yu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

Nu caahán ra Jesús tuhun ra ña vaha jaha tyiñu

(Mt. 21:33-46; Lc. 20:9-19)

12 ¹ Tacan tan quitsahā caahán ra Jesús tsihin ra naha tsihin cuhva ihya, tan catyí ra:

—Tsicoq iin rayi tsa tatsi yoho yucu vixi tsa nañi uva, ra ican tyasi ra iin cora nani canduvi nu tatsi ra yucu vixi can. Tan javahā ra iin nu cua tava ra ndutya uvas can. Tan javahā tucu ra iin vehe sucun tyin tacan tan cuvi jaha cuenda ra nani cahn nu ndaha tyiñu ra.

² Tsa yahā yacan tan tsahā nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu. ³ Tsa tahañ tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra. ⁴ Maa tyin ra ican naha ra tñin ra naha tsi ra. Tan cañi ra naha tsi ra. Tan jacunuhū ra naha tsi ra tsihin ndaha ndi ra. ⁵ Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahān nyaa ra naha tsi ra. ⁶ Tsitoho ñuhu can jacuhun nyico ra inga musu. Tan tsahñi ra naha tsi ra.

Yahá yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

6 Tan cumañi intuhun ña ra tsa cuví jacuhun ra. Tan ra ican cuví sehe ra tsa cuñi xaan ra. Nu ndihi tuhun jacuhun ra sehe ra tyin cuñi maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñi ra. 7 Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can”, catyí ra naha. 8 Tacan tan tñin ra naha tsi ra tan tsahñi ra naha tsi ra. Tan tava ra naha cuñu ñuhu ra ityi tsata cora can —catyí ra Jesús.

9 Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can. 10 ¿A ñaha ca cahví ndo nu tutu Nyoo nu catyí tsi tyehen?

Yuu tsa javita ra javahá vehe naha ra,

yacan cuví yuu tsa tsiñi ñuhu ca.

11 Maa Nyoo Jutu yo jahá tsa cahnu ca cuví yuu ihya. Tan iyo xaan cuñi yo nyehé yo can, catyí tsi —catyí ra Jesús tsihin ra naha.

12 Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyiñu ra cuhva can. Maa tyin ña tñin ra naha tsi ra tyin yuuhví ra naha nyehe ra naha tsi nyivi. Nacoo ra naha tsi ra, tan cuahán ra naha.

Nu caahán ra Jesús siqui tuhun tsa tyahví nyivi xuhun tsi ra ñuu Roma tsa ndacá ñaha tsi nyivi Israel

(Mt. 22:15-22; Lc. 20:20-26)

13 Tacan tan jacuhun ra naha juhva ra yihi cuenda ra Herodes tan juhva ra fariseo naha ra nu nyií ra Jesús tyin nducu ra naha cuhva cahan ra Jesús iin tsa ña vaha tyin tacan tan cuvi tyaa ra naha cuatyí tsi ra. 14 Tsa tsaq ra can naha ra tan quitsahá caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñi un nyehe un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

15 Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndaca ndo iin xuhun tsi yu ihya, na nyehe yu —catyí ra.

16 Tsiñacá ra naha xuhun can tsi ra. Tsa nyehe ra can tan tsicá tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

17 Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñi ra naha tsihin tsa nacahan ra.

**Nu cuñi ra saduceo naha ra jandavi
ñaha ra naha tsi ra Jesús**

(Mt. 22:23-33; Lc. 20:27-40)

18 Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahan ra naha tyehen tan catyí ra naha tsihin ra Jesús:

19 —Maestro, ra Moisés tyaa ra nácaa taahán tsi javaha yo tatun iin rayii tsihi tan ndoq ñasihi ra tan nduve sehe ña tsicoq tsihin ra. Catyí ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi. 20 Iin tsaha iin rayii tsicoq utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoq tsihin ña, tan tsihi ra. 21 Tacan tan tindaha ra yañi ra tsa tsinu uvi tsihin ñaha tsa ndoq can. Maa tyin juvin ñi ña tsicoq sehe ra tsihin ña tan tsihi ra. Juvin ñi tacan tahan tucu ra tsa tsinu uñi. 22 Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoq sehe ra naha tsihin ña. Tan nu ndihí tuhun, tsihi ndihí maa ña. 23 Tan vityin, tun nditsa tsa cua nandoto nyivi, ¿ndáa tsa utsa taahan ra can naha ra cua cuvi yii ña quivi cua nandoto ñi? Tyin tandihí maa ra naha tan tindaha ra naha tsihin ña —catyí ra naha tsihin ra Jesús.

24 Tacan tan nacahan ra Jesús tan catyí ra tsihin ra naha:

—Caahán soho ñi maa nyooho, tyin ña tsitó ndo tsa catyí tuhun Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo. 25 Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria. 26 Tan tuhun tsa cua nandoto nyivi, ¿a ñaha ca

cahvi ndo nu libru tsa tyaa ra Moisés nu catyí tsi nácaa cahan Nyoo tsihin ra nu cayú yutun iñu? Tyin catyí ra tsihin ra tyehen: “Yuhu cuví Nyoo ra Abraham, ra Isaac, tan ra Jacob”, catyí Nyoo tsihin ra Moisés. 27 Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuví ra, tyin Nyoo cuví ra Nyoo nyivi nyito. Yacan cuenda catyí yu tyin nyooho caahán soho ñi maa ndo —catyí ra Jesús tsihin ra naha.

Ley tsa ñiñi ca tsa tsaha Nyoo

(Mt. 22:34-40)

28 Ña naha ñi tan tsaa iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsito ra tyin ra Jesús vaha nacahan ra tsihin ra naha, tsicā tuhun ra tsi ra tan catyí ra:

—Tsitsi tsa tandihí ley, ¿ndáa tsa ñiñi ca cuñi tsi javaha yo? —catyí ra.

29 Tan nacahan ra Jesús tan catyí ra:

—Ley tsa jihna ñi tan ñiñi ca cuñi tsi javaha yo tsa nuu tandihí ley, cuví ley ihya: “Nyooho nyivi Israel, tyaa soho ndo: intuhun ñi maa Nyoo Jutu yo iyó. 30 Cuñi ndo tsi Jutu Mañi yo Nyoo tsihin tsa ñi ñi ndo, tan tsihin tsa ñi ñi añima ndo, tan tsihin tandihí tsa tsiñi tuñi jiiñi ndo, tan tsihin tandihí tunyee iñi tsa iyó tsi ndo.” Ley ihya cuví tsa ñiñi ca tan tsa jihna ñi taahán tsi javaha yo. 31 Tan tsa tsinu uvi tsa yatyin inducu ñi caahán tsi tsihin tsa jihna ñi tan catyí tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyí ra Jesús.

32 Tacan tan ra maestro cuenda ley can catyí ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi

Nyoo iyó, tan nduve inga ca Nyoo iyó. **33** Tan tsa cuñí yo tsi Nyoo tsihin tsa ñi ñi yo, tan tsihin tandihi tsa tsiñi tuñi jiñi yo, tan tsihin tsa ñi ñi ñi ñi yo, tan tsihin tandihi tunyee ñi iyó tsi yo, tan tsa cuñí tahan yo tsi yo tumaa cuñí yo tsi maa yo, tandihi yacan tan cahnu ca cuví can tan ñavin ca tsa jamañi yo tsi Nyoo, tsa tsahñi yo quití tan tsahmí yo can nu altar —catyí ra maestro cuenda ley can tsihin ra Jesús.

34 Tsa nyehé ra Jesús tyin vaha nacahan ra tsihin tsa catsi jiñi ra, tan catyí ra tsihin ra:

—Luxu cuii ña tan ñihi un cuhva nácaa nacuhva cuenda un ñiima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyivi tan ña cana ca ñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tan juvin ñi cuví tucu ra tata ra David

(Mt. 22:41-46; Lc. 20:41-44)

35 Jacuahá ra Jesús tsitsi vehe ñuhu cahnu, tan catyí ra:

—¿Nacuenda tyin catyí ra maestro cuenda ley vehe ñuhu naha ra tyin tata ra David cuví ra Cristo? **36** Tan juvin ñi maa ra David catyí tuhun ra Cristo tyehen:

Nyoo cahan ra tsihin Jutu Mañi yu, tan catyí ra:

“Cunyaa xiin cuaha yu ihya nda cuanda caquin yu tsi ra xaan ñi tsi un naha ra tsaha un”, catyí ra David tahan tsanaha jahá Tatyí Ii Nyoo.

37 ¿Nacaa cuví cuú tucu ra Cristo tata ra David, tan juvin ñi maa ra David catyí tyin ra Cristo cuví Jutu Mañi ra? —catyí ra Jesús.

Tan cuaha nyivi yucú tyaá soho tsa caahán ra tan sii xaan cuñí ñi.

Nu caahán ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23:1-36; Lc. 11:37-54; 20:45-47)

38 Quitsaha jacuahá ra Jesús tan catyí ra tyehen:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahán xaan ñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva ndo nacumi tsi ra naha. **39** Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha.

40 Tan quihín nyaá ra naha vehe ñi ndaahvi tsa tsihi yí tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tuvi nyivi. Maa tyin nduve náa catyí javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

Tsa tsaha ñaha ndaahvi tsihi yí

(Lc. 21:1-4)

41 Iin tsaha nyí ra Jesús tsitsi vehe ñuhu cahnu tan nyaá ra yatyin ñi nu nyí tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun. **42** Tsitsi tsa nyaá ra ican tsaq iin ñaha ndaahvi tsihi yí, tan tyihí ña uvi taahan ñi xuhun nyihi tsa caaha xaan nyaá. **43** Tacan tan cana ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsaha ñaha ndaahvi ihya tan ñavin ca inga nyivi. **44** Tyin tsahá ñi tsa ndoo síqui xuhun ñi. Maa tyin ñaha ihya tyihí ña tandihi tsa iyó tsi ña —catyí ra Jesús.

**Nu caahán ra Jesús tyn cua tani
vehe ñuhu cahnu**

(Mt. 24:1-2; Lc. 21:5-6)

13 ¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyí ra tsihin ra:

—¡Maestro, nyehé jihna tsa sii caá yuu yihí vehe ihya! ¡Nyehé tsa nahnu vehe ihya! —catyí ra tsihin ra Jesús.

² Maa tyn nacahan ra Jesús, tan catyí ra tsihin ra:

—Nditsa nahnu vehe ihya tan sii caá tsi nyehé yo vityin. Maa tyn catyí yu tsihin un tyn coo quiví nduve ca maa náa cua ndoo ihya. Ndi intuhun yuu tan ña cua coso tahan tsi tsihin inga tsi, tyn tandihí maa tsi tan cua tani tsi —catyí ra Jesús.

**Nu tsahá cuenda ra Jesús náa cua cuvi
tsa ndi cumañi ca naa ñuhu ñayiví**

(Mt. 24:3-28; Lc. 21:7-24; 17:22-24)

³ Tacan tan cuahán ra Jesús tsihin ra tsicá tsihin ra yucu yutun Olivo tsa canyí inga tsiyo nu nditsin nyehé tsi vehe ñuhu cahnu. Tsa tsinyaq ra Jesús ican, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyí ra naha:

⁴ —Cuñí ndi tsa catyí tuhun un tsihin ndi ama cua cuvi tandihí tsa cahan un. ¿Nacaa tan coto ndi tatun tsa cuyatyn cundaa tandihí can? —catyí ra naha.

⁵ Nacahan ra Jesús tan catyí ra:

—Jaha ndo cuenda tsi ndo coto jandavi ñaha nyiví tsi ndo. ⁶ Tyn cuaha xaan nyiví cua quitsi, tan cua cuatyíñu ñi sívii yu, tan cua catyí ñi: “Yuhu cuví ra Cristo, ra tsa jaquitsí Nyoo.” Tan cuaha xaan nyiví cua jandavi ñaha ñi.

⁷ Maa tyn tun ñihi tuhun ndo tyn iyó cuatyí tan cañi tahan nyiví ityi can tan ityi ihya, ña nayuhvi ndo tyn tacan taahán maa tsi cuví tsa ndi cumañi ca naa ñuhu ñayiví. ⁸ Tyn nyiví iin ñuu cua cañi tahan ñi tsihin

nyiví inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyiví. Vasu ndi maa nyehe nyiví tundoho ihya, ña cua naa naha ñuhu ñayiví tyn ndi nyaa ca cua nyehe ñi tundoho.

⁹ Maa tyn jaha ndo cuenda tsi ndo tyn cua cuhva cuenda nyiví tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumi tyiñu tan tsi ra cuví rey tsacatyí yuhu. Tyn tacan tan cuví cahan ndo tuhun yu nuu ra naha. ¹⁰ Tyn tsa ndi cumañi ca naa ñuhu ñayiví, cuñí tsi coto tandihí nyiví inga ñuu tyn Nyoo jacacú ra tsi nyiví. ¹¹ Tan cuhva tsa cua cundaca ñi tsi ndo nuu ra cumi tyiñu naha ra, ña caca iñi ndo náa cua cahan ndo. Tyn juven ñi maa hora can tan cua cuhva Nyoo tsa cahan ndo. Tyn ñavin maa ndo cua cahan; tyn maa Tatyí li Nyoo cua cahan.

¹² Yihí ra naha cua nacuhva cuenda ra naha juven ñi maa yañi ra naha tan cua ndacan ra naha tsa cúu ra can naha ra. Yihí nyiví cua nacuhva cuenda ñi juven ñi maa sehe ñi. Tan yihí ñi cua nacuhva cuenda ñi nda cuanda jutu ñi tan síhi ñi tyn cúu ñi. ¹³ Tandihí nyiví iyó nu ñuhu ñayiví ndasi cua cuñi ñi nyehe ñi tsi ndo tsacatyí yuhu. Maa tyn nyooho tsa cua cunyeet iñi tsinú iñi tsi yu nda nu ndihí, cua cacu ndo.

¹⁴ Tandihí nyooho tsa cahví nu tutu Nyoo nu tyaq ra Daniel, ra cuví ndusu yuhu Nyoo tsa tsicoq tahan tsanaha, cuntuñi iñi ndo tyn iyó tsa janducaquiñi tan tsa jatívi. Quiví tsa nyehe ndo tyn tsa nyíi yacan nu ña taahán tsi cunyii can, nyooho nyiví iyó Judea, quita ndo ñuu ndo tan cahun ndo ityi yucu. ¹⁵ Nyooho tsa cua cuyucu jiñi vehe quiví can, cua nuu ndo, maa tyn ña cua nuu ndo tsa quihvi ndo tsitsi vehe ndo tan tava ndo tsa iyó tsi ndo. ¹⁶ Nyooho

tua cua cuyucu tsitsi cuhu, ña cua cunuhu jihna ndo cuquihin ndo jahma ndo. **17** ¡Ndahvi ñiñaha tsa ñuhú sehe quivi can! ¡Tan ndahvi ñi iyó sehe lee tsa ndi tyaxín! ¡Ndahvi ñi! **18** Ndācan tahvi ndo tsi Nyoo na ña tahan tsi cunu ndo quivi vitsin.

19 Tyin tundoho tsa cua nyehe nyivi quivi can, ñaha ca maa coo can ndaha tsinū maa ñuhu ñayivi nda cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha. **20** Tun tsatyin Jutu Mañi yo tan ña jandihí ra tsa cua nyehe yo tundoho quivi can, yoñi maa cua cacu. Maa tyin cua jandihí ra can tsa cuenda tsa cuñí ra tsi nyivi yihí cuenda ra, nyivi nacatsj vaha maa ra.

21 Tatun catyi nyivi tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu iñi ndo. **22** Tyin cua quitsi nyivi jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyivi nacatsj maa Nyoo, tatun cunyeen ñi javaha ñi tacan.

23 Maa tyin nyooho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quivi can —catyí ra Jesús.

Nu jacotoj ra Jesús nácaa cua quitsi nyico ra inga tsaha

(Mt. 24:29-35, 42-44; Lc. 21:25-36)

24 Tan catyí nyico ra Jesús tyehen: —Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi, **25** tan cua cucoyo tiñuu. Tan tandihí tsa iyó andiví tan cua nacanda tsi naha tsi. **26** Tacan tan cua nyehe ndo tsi yuhu, Rayii tsa quee nda gloria, vatsí yu nu vico tsihin tunyee iñi cahnu tan tsihin tsa cahnu cuví Nyoo. **27** Tan cuaha ángel cuenda yu

cua jaquitsi yu tyin jandu iin ra naha nyivi nacatsj maa Nyoo. Cua quita ñi nanií cahnu nu ñuhu ñayivi, nda nu ndihí ñuhu ñayivi tan nda nu ndihí andiví.

28 'Cutuñi iñi ndo cuhva iyó yutun tsa nañí higo: Tun tsa nduyutyá soco tun tan canā ndaha yutya tun, tsitó ndo tyin tsa cua quee tsiti tun. **29** Tan juvin ñi tacan, tatun tsa cuví tandihí tsa iyo tsa caahán yu tuhun tsihin ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. **30** Tsa nditsa catyí yu tsihin ndo tyin tsa ndi cumañi ca cúu nyivi iyó nu ñuhu ñayivi ihya tan cua cuvi tandihí tsa caahán yu tuhun tsihin ndo. **31** Tan coo quivi cua cundihí andiví tan cua cundihí ñuhu ñayivi, maa tyin tuhun caahán yuhu, ña cua cundihí maa tsi tyin tandihí tsi tan cua cundaa tsi.

32 'Maa tyin quivi tan hora tsa cua cuvi tandihí yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihí.

33 'Yacan cuenda coo nyito vaha ndo, tan jaha cuenda ndo tsi ndo, tan ndācan tahvi ndo tsi Nyoo, tyin ña tsitó ndo náa quivi tan náa cuhva cua quitsi nyico yu. **34** Tumaa iin rayii tsa cua cuhun nu cañi. Ra ican tsa ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra.

35 Yacan cuenda nyooho coo nyito ndo tyin ña tsitó ndo náa cuhva cua quitsi yu tsa cuví yu tumaa tsitoho vehe can, tyin cuvi quitsi yu tsa cua cunaaha, maa ñuu, o cuhva tsacú tsitooho, o tsa cua cana ñicanyii.

36 Yacan cuenda coonyito vaha ndo tan ña cusu ndo tyin sana iñi ndo tan cua quitsi yu. **37** Tsa caahán yu tsihin

nyooho, caahán tucu yu tsihin tandihí ca nyivi: Coo nyito ndo.

Nu nducu ra jutu cuví ityi nuu naha ra cuhva tiin ra naha tsi ra Jesús

(Mt. 26:1-5; Lc. 22:1-2; Jn. 11:45-53)

14 ¹ Tsa ndi cumañi uvi quivi ca tan tahan tsi vico pascua tan vico nu tuhvá nyivi tsatsí paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva tiin xeehe ra naha tsi ra Jesús tan cahñi ra naha tsi ra.

2 Maa tyin natuhun tahan ra naha tan catyí ra naha:

—Ña cua tiin naha yo tsi ra quivi maa vico tyin coto nduvaa xaan nyivi —catyí ra naha.

Nu tyihí iin ñaha ndutya tami jiñi ra Jesús

(Mt. 26:6-13; Jn. 12:1-8)

3 Tsa ndi cumañi ca tahan tsi vico can, nyíi ra Jesús ñuu Betania, vehe ra Simón, ra tsa tsindohq cuehe tyaahty. Tsitsi tsa nyaá ra Jesús tsatsí ra, tsaq iin ñaha ndahá ña iin yutyi tsa tsinu tsihin yuu tsa nañi alabastro. Tsiyu can yihí ndutya tami tsa nañi nardo. Tan yahvi xaan nyaá ndutya tami can. Nuñá ña yuhu yutyi can tan tava ña ndutya tami can tan tyihí ña can jiñi ra Jesús. **4** Maa tyin juhva ra tsa yucú ican naha ra nduxaan ra naha tan catyí ra naha:

—¿Nacuenda tyin jativi ñaha ihya ndutya tami can? **5** Tun tsatyin xico ña can, cuaha xaan xuhun cua ñihi ña tsihin can, tan cuvi jatinyee ña tsi nyivi ndaahvi tsihin xuhun can —catyí ra naha.

Tan cuxaan ra naha tsi ña.

6 Maa tyin ra Jesús catyí ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña?

Tan tsa vaha javahá ña tsihin yu.

7 Tyin nyivi ndaahvi tandihí ñi quivi cua cuyucu ñi tsihin ndo, maa tyin

yuhu, ña naha ca cunyii yu tsihin ndo.

8 Ñaha ihya javahá ña ndihí cuhva cuví ñi javahá ña. Tyihí ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi. **9** Tsa nditsa catyí yu tsihin ndo, tyin tandihí ityi nu cua cahan nyivi tuhun Nyoo naniñ cahnu nu ñuhu ñayivi, cua cahan ñi tuhun ñaha ihya tan tsa javahá ña, tyin tacan tan ña naa iñi nyivi tsi ña —catyí ra Jesús.

Nu xico ra Judas tsi ra Jesús

(Mt. 26:14-16; Lc. 22:3-6)

10 Tsa yaha yacan tan quitá iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsañan ra tsicahan ra tsihin ra jutu cuví ityi nuu naha ra, tan jandaq ra tyiñu tsihin ra naha tyin cua cuhva cuenda ra tsi ra Jesús tsi ra naha.

11 Cuhva tsa tsiñi ra naha tsa caahán ra, siñ xaan cuñi ra naha cuví, tan catyí ra naha tsihin ra tyin cuhva ra naha xuhun tsi ra. Tacan tan quitsaha nducú ra Judas cuhva cuhva cuenda ra tsi ra Jesús tsi ra naha.

Nu cuxiñi ra Jesús tsihin ra tsicá tsihin ra

(Mt. 26:17-29; Lc. 22:7-23; Jn. 13:21-30; 1 Co. 11:23-26)

12 Quivi jihna ñi tsa quitsaha vico nu tsatsí nyivi paan tsa nduve yutsan iya yihí tan quivi tuhvá ñi tsañi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

13 Tacan tan tava tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañihi ndo iin rayhi yosó soco iin quiyi ndutya. Tsa nyehe ndo tsi ra, cunanyicun ndo tsi ra. **14** Tsa tsa ndo

yuvehe nu cua quihvi ra, catyi ndo tyehen tsihin tsitoho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyi ndo. **15** Tan cua janaha ra iin cuarto cahnu nu tsinu uvi pisu tsi ndo. Tsa nduvaha maa tsitsi tsi jahá ra, Javaha ndo tsa cuxiñi yo tsitsi vehe can—catyi ra Jesús tsihin ra naha.

16 Tacan tan cuahán ra naha. Tsa tsaá ra naha tsitsi ñuu can, nañihí ra naha tandihí maa kuhva catyi ra Jesús tsihin ra naha. Tan javahá ra naha tsa cua cuxiñi ra naha cuenda vico pascua. **17** Tsa ndihí javahá ra naha tsa cua cuxiñi ra naha, tacan tan cuahán nyico ra naha nu nyíí ra Jesús. Tan tsa cunaaha, cuahán ra Jesús, cuacuxiñí ra tsihin tsa utsi uvi ra tsicá tsihin ra. **18** Tan kuhva tsa nyecú ra naha tsatsí ra naha nu mesa, tan catyi ra Jesús:

—Tsa nditsa catyi yu tsihin ndo tyin iin nyoocho tsa tsatsí tsihin yu cua xico tsi yu tsi ra xaan iñi tsi yu.

19 Tacan tan nducuihya xaan cuñi ra naha, tan quitsahá tsicá tuhun tan iin tan iin ra naha tsi ra, tan catyi ra naha:

—¿A yuhu?

Tacan tan tsicá tuhun tucu inga ra tan catyi ra:

—¿A yuhu?

20 Tan nacahan ra Jesús tan catyi ra:

—Ña tandihí ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyií paan iin ñi tsitsi coho tsihin yu. **21** Tyin yuhu, Rayi tsa quee nda gloria, cua tahan yu tumaa caahán maa nu tutu Nyoo tyin cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatyin ña cacu ra —catyi ra Jesús.

22 Tan tsitsi tsa tsatsí ra naha, tacan tan quihín ra Jesús iin paan tan nacuhvá ra tyahvi nyoo tsi Nyoo tsa cuenda can, tan tsahnú sava ra can,

tan tsahá ra can tsi ra tsicá tsihin ra, tan catyi ra:

—Catsi ndo paan ihya tyin tsehe cuví tumaa cuñu ñuhu yu —catyi ra tsihin ra naha.

23 Tsa yahá yacan quihín ndihí ra vasu nu yihí vinu. Tsa yahá tsahá ra tyahvi nyoo tsi Nyoo, tacan tan tsahá ra can tsi ra naha. Tandihí ra naha tan tsihí ra naha vinu tsa yihí tsitsi vasu can. **24** Tan catyi ra tsihin ra naha:

—Vinu ihya cuví tumaa ñiñi yu tyin tsihin ñiñi yu cua ndoo Nyoo tuhun tsaa tsihin ndo tyin cua cati ñiñi yu tsa cuenda tsa vaha tsi nyoocho tan tsa vaha tsi cuaha nyívi. **25** Tsa nditsa catyi yu tsihin ndo tyin ña cua coho ca yu vinu tsa cuví ndutya yucu vixi uva, nda cuanda coho yu vinu tsa nda nu ndacá ñaha Nyoo quivi tsa yu ndacan —catyi ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra

(Mt. 26:30-35; Lc. 22:31-34;
Jn. 13:36-38)

26 Tsa ndihí tsitá ra naha yaa Nyoo, tan cuahán ra naha yucu yutun Olivo. **27** Tacan tan catyi ra Jesús tsihin tandihí ra naha:

—Tandihí maa ndo tan cua nacoo ihñi ndo tsi yu tsa cuaa vityin tyin catyi nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyi tsi. **28** Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyoocho —catyi ra Jesús tsihin ra naha.

29 Tacan tan catyi ra Pedro tsihin ra:

—Vasu ndi maa nacoo ihñi tandihí ra naha tsi un, maa tyin yuhu ña cua nacoo ihñi maa yu tsi un —catyi ra tsihin ra Jesús.

30 Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitooho tsa tsinu uvi tsaha, uñi tsaha cua cahan un tyin ña nacotó un tsi yu —catyí ra Jesús tsihin ra Pedro.

31 Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyi yu tyin ña nacotó yu tsi un —catyí ra Pedro.

Tan juvin ñi tacan catyí tandihí ca ra naha.

Nu nyií ra Jesús Getsemaní tsicán tahvi ra tsi Nyoo

(Mt. 26:36-46; Lc. 22:39-46)

32 Tacan tan tsaq ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndqo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

33 Tan quihín ra tsi ra Pedro, ra Jacobo tan ra Juan cuahán tsihin ra. Tan tsaq tucuiihya iñi cahnu tsi ra tan tuñu cuñi ra. 34 Tan catyí ra tsihin ra naha:

—Cuiihya xaan cuñi yu; cahñi ña maa tucuiihya iñi ihya tsi yu, cuñi yu. Ndqo ndo ihya, tan ña cusu ndo —catyí ra.

35 Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaquín ra nuu ra nda nu ñuhu. Tan tsicán tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicán tahvi ra.

36 Tan tsa tsicán tahvi ra, catyí ra:

—Jutu Mañi yu, tsa cuenda yooho nduve tsa ña cuví javaha un. Tun yooho tan cuñi un cuví jatsiyo un tundoho ihya siqui yu. Maa tyin na cuvi maa cuhva cuñi maa un, tan ñavin cuhva cuñi maa yu —catyí ra Jesús tsicán tahvi ra.

37 Tacan tan cuahán ra nu nacog ra tsi uñi ra tsicá tsihin ra. Tsa tsaq ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyege iñi un coo nyito un tsihin yu ndi intuhun hora? 38 Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin añima ndo cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús tsihin ra naha.

39 Tacan tan cuahán nyico ra inga tsaha. Tan tsicán tahvi ra tsi Nyoo juvin ñi tsihin tuhun tsa cahan ra tsa jihna ñi. 40 Tacan tan tsaq nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasí maa tinuu ra naha jaha ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cahan ca ra. 41 Tan cuahán nyico ra. Tsa tsaq ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaq tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahán tsi hora tsa cua cuhva cuenda ra tsi yuhu, Rayi tsa quege nda gloria.

42 Nduvita ndo, cõhon ndo tyin tsa vatsí ra tsa xicq tsi yu —catyí ra Jesús tsihin ra naha.

Nu tsaha cuenda ra Judas tsi ra Jesús tsi nu xaan iñi tsi ra nahnu

(Mt. 26:47-56; Lc. 22:47-53; Jn. 18:2-11)

43 Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhun ra naha tsihin ra Judas, iin ra tsicá tsihin ra Jesús, tyin tiin ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaq ra Judas tsihin nyivi cuaha can. 44 Tsa ndi cumañi ca cuhun ra Judas, ra tsa xicq tsi ra Jesús, tsa

catyí maa ra tsihin nyívi náa cua javaha ra tan coto ñi ndáa ra cuví ra Jesús. Tan cahān ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jahā cuenda vaha ndo coto cunu ra —catyí ra nu quitsí tsi.

45 Tsa tsaā ra Judas nu nyíi ra Jesús natuhvā ra nu nyaá ra tan catyí ra tsihin ra:

—Maestro.

Tan tyaa yuhu ra tsi ra. 46 Tacan tan quihin ra naha tsi ra Jesús cuahán tsihin ra naha.

47 Maa tyin iin ra nyíi tsihin ra Jesús, tava ra mityi ra tan tsahnyā ra soho musu ra jutu tsaahnu cuví ityi nuu. 48 Tacan tan catyí ra Jesús tsihin ra quihin tsi ra:

—¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun. 49 Ndíhi quívi tsinyij yu jacuahā yu tsi ndo tsitsi vehe ñuhu cahnu, tan ña quihin ndo tsi yu. Tandíhi tsehe cuví tyin tacan tan cundaa tsa catyí nu tutu Nyoo —catyí ra Jesús tsihin ra naha.

50 Tacan tan tsinū tandíhi ra tsicá tsihin ra, tan ndoq intuhun ña maa ra jahā ra naha. 51 Maa tyin ndoq intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tññ ndíhi ra naha tsi ra. 52 Maa tyin nacoq ihñi ra ticatyí can tan tsinū tandíhi ra.

Nu tsicā tuhun ra mandoñi naha ra tsi ra Jesús tun juvin Sehe Nyoo tsi ra
(Mt. 26:57-68; Lc. 22:54-55, 63-71;
Jn. 18:12-14, 19-24)

53 Tacan tan tsindacā ra naha tsi ra Jesús tsi ra jutu tsaahnu cuví ityi nuu tan ndu iñ tucu tandíhi ra jutu cuví ityi nuu naha ra tan ra cuví mandoñi nyívi Israel naha ra, tan ra maestro cuenda ley vehe ñuhu naha ra. 54 Ra Pedro nyicún tsica nyicún tsica ñi ra tsi ra naha cuahán ra. Tan

tsaā ra nda nuquehe yuvehe ra jutu tsaahnu cuví ityi nuu can. Tan ndoq ra tuñú ra ñuhū tsihin ra vitya naha ra.

55 Ra cuví jutu ityi nuu naha ra, tan tandíhi ca ra cumí tyiñu naha ra nducú ra naha cuatyí tyaa ra naha siquí ra Jesús, tyin tacan tan cuví cahñi ra naha tsi ra. Maa tyin ña ñihí maa ra naha cuatyí tyaa ra naha tsi ra.

56 Cuaha xaan nyívi cahān cuendu siquí ra, maa tyin ña nacatsí tahan maa tuhun caahán ndi intuhun ñi.

57 Yihí ñi nduvitā ñi tan cahān ñi maa ñi maa cuendu siquí ra, tan catyí ñi:

58 —Nyuhu tsiññi ndi tsa cahān ra tan catyí ra tyehen: “Yuhu cua caní yu vehe ñuhu cahnu tsa javahā nyívi. Tan cua janduvita yu inga vehe ñuhu tsitsi tsa uñi quívi ñi. Maa tyin ñavin tahan vehe ñuhu tsa javahá nyívi” catyí ra —catyí ñi.

59 Vasu ndi maa tacan caahán ñi, maa tyin ña nacatsí tahan maa tsa cahān ñi.

60 Tacan tan nduvitā ra jutu tsaahnu cuví ityi nuu mahñu tandíhi ra yucú ican naha ra, tan tsicā tuhun ra tsi ra Jesús, tan catyí ra:

—¿A ña cua nacahan un nu caahán nyívi ihya? ¿A nditsa tsa caahán ñi, o ña nditsa? —catyí ra

61 Maa tyin ña nacahān maa ra Jesús tan nduve maa náa cahān ra. Tacan tan ra jutu tsaahnu cuví ityi nuu tsicā tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

62 Tan ra Jesús catyí ra tsihin ra:
—Juvín. Nyooho cua nyehe ndo tsi yuhu, Rayíi tsa quee nda gloria, nyaá yu xiin cuaha Nyoo, ra iyó tandíhi tunyee iñi, tan cua nyehe tucu ndo nu quitsí yu nu vico ityi andívi —catyí ra tsihin ra.

63 Tacan tan tsahnyā ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñí maa ra tyin

ña vaha tsa caahán ra, tan catyí ra:

—Ña tsiñí ñuhu ca tsa nducu yo tsi ra cuvi tsa ndaa. **64** Tyin tsa tsiñí maa ndo tsa cahan ra. TsiçoꝘ cuatyí ra nuu Nyoo tsihin tuhun cahan ra. ¿Náa catyí ndo vityin? —catyí ra.

Tacan tan nacahan tandíhi ra naha tan catyí ra naha tyin taahán tsi cúu ra.

65 Tacan tan quitsaha tiví sii juhva ra naha tsi ra. Tyasi ra naha nuu ra, tan cañi ra naha tsi ra tsihin tsiquí tan catyí ra naha tsihin ra:

—¿Cahan tsihin ndi yóo cañi tsi un! —catyí ra naha tsihin ra.

Tan cañi tucu ra vitya naha ra nuu ra.

Nu cahan ra Pedro tyin ña nacotó ra tsi ra Jesús

(Mt. 26:69-75; Lc. 22:56-62;
Jn. 18:15-18, 25-27)

66 Tsitsi tsa ndi nyii ra Pedro nuquehe tsata vehe ra jutu tsaahnu cuví ityi nuu, tsaá iin ñaha cuví musu ra jutu can. **67** Cuhva tsa nyehé ñaha can tsi ra Pedro nyaá ra tuñú ra ñuhu, quitsaha nyehé xaan ña tsi ra, tan catyí ña tsihin ra:

—Tsiçá tucu yooho tsihin ra Jesús, ra ñuu Nazaret can —catyí ña tsihin ra.

68 Maa tyin ra Pedro tyihí xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quitá ra ityi yuhu cora. Tan tsacu ñi tsitooho. **69** Tacan tan ñaha can nanyehé nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

70 Maa tyin tyihí xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can

cuví yooho, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

71 Tacan tan iyo xaan caahán ra Pedro, tan catyí ra:

—¿Tsitó vaha maa Nyoo tyin ña nacotó yu tsi ra tsa caahán ndo tuhun! ¿Na cahñi maa Nyoo tsi yu tun ña nditsa yu tsa caahán yu! —catyí ra.

72 Juvín ñi cuhva can navacu tsitooho tsa tsinu uvi tsaha. Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yaha cahan un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsaha ra tsacú ra.

Nu jaqueé yuhu ra Pilato tsi ra Jesús

(Mt. 27:1-2, 11-14; Lc. 23:1-5;
Jn. 18:28-38)

15 ¹ Tan tsa tuví inga quivi ndu iin ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandíhi ca ra cumí tyiñu tsa yihf ndaha tsi nyivi Israel. Nuuhñi ñi maa ra Jesús tan tsindacá ra naha tsi ra nuu ra Pilato. ² Tan tsicá tuhun ra Pilato tsi ra, tan catyí ra:

—¿A juvín un cuví rey nyivi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu cahan ra cuví jutu ityi nuu naha ra siqui ra Jesús. ⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehé, cuaha xaan cuatyí tyaá ra naha siqui un —catyí ra.

⁵ Maa tyin ra Jesús ña nacahan maa ra. Yacan cuenda ña ñihí ra Pilato náa cahan ra.

Nu tsahá ra Pilato ndatu tsa cúu ra Jesús

(Mt. 27:15-31; Lc. 23:13-25;
Jn. 18:38—19:16)

6 Vico pascua tuhvá ra Pilato nacoó nuña iin ra yucú vehe caa. Tan tava ra ndáa ra cuñí maa nyívi tyin tava ra. 7 Quívi can nyíi iin ra nañí Barrabás vehe caa, tsihin inga ca ra tsahñí nyívi nu cuvaq nyívi siquí ra ndacá ñaha. 8 Tan tsahañ nyívi tsicahañ ñi tsihin ra Pilato na jaña ra iin ra yucú vehe can tumaa tuhvá maa ra javahá. 9 Tan nacahañ ra Pilato, tan catyí ra:

—¿A cuñí ndo tsa jaña yu tsi ra cuví Rey ndo?

10 Tacan cahañ ra tyin tuví iñi ra tyin tsahá cuenda ra jutu cuví ityí nuu naha ra tsi ra Jesús tsi ra tsa cuenda tsa ndasi cuñí ra naha nyehe ra naha tsi ra tyin cuaha nyívi nyícún tsi ra. 11 Maa tyin ra jutu cuví ityí nuu can naha ra natyuhú ra naha tsi nyívi tsa cahan ñi na tava ra Pilato tsi ra Barrabás vehe caa. 12 Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacunañí ndo Rey cuenda ndo? —catyí ra tsihin ñi.

13 Tacan tan cana tsaa ñi, tan catyí ñi:

—¡Tyaa tsi ra nu cruu na cúu ra! —catyí ñi.

14 Tan catyí ra Pilato tsihin ñi:

—Maa tyin, ¿náa tsa ña vaha javahá ra? —catyí ra.

Ñi ican quitsahá caná tsaa nyico ñi tan catyí ñi:

—¡Tyaa tsi ra nu cruu na cúu ra! —catyí ñi.

15 Tacan tan tsa cuñí ra Pilato ndoo vaha ra nuu nyívi, tava ra tsi ra Barrabás vehe caa. Tsa yahá tava ra tsi ra can, tava tyíñu ra na ndoho ra Jesús. Tsa yahá ndoho ra Jesús, tan tsahá cuenda ra tsi ra tsi andaru na

ticaa ra naha tsi ra nu cruu.

16 Tacan tan tsindacá ra andaru can naha ra tsi ra nuquehe vehe tyíñu. Tan jandu iin ra naha tandíhi ca andaru. 17 Tan jacunditsí ra naha iin jahma cuaaha tuun tsi ra. Tan javahá ra naha iin corona iñu. Tan tyihí ra naha can jiñi ra. 18 Tsa yahá yacan tan quitsahá caná tsaa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yooho Rey nyívi Israel! —catyí ra naha.

19 Tan cañí ra naha jiñi ra tsihin yutun, tan tiví sii ra naha tsi ra. Tan tsicuiñí tsiti ra naha nuu ra jahá ra naha tyin jacahnú ra naha tsi ra.

20 Tsa yahá tsacu nducu ra naha tsi ra, tava ra naha jahma cuaaha tuun tsa jacunditsí ra naha tsi ra. Tacan tan jacunditsí nyico ra naha jahma maa ra tsi ra. Tan cuahán ra naha tsihin ra cuaticaá ra naha tsi ra nu cruu.

Nu tyaa ra naha tsi ra Jesús nu cruu

(Mt. 27:32-44; Lc. 23:26-43;
Jn. 19:17-27)

21 Ityí cuahán ra naha tahañ ra naha iin ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra quee ra huhu. Cuhva tsa cua yaha ra, jañiñí ra andaru naha ra tsi ra na cuiso ra cruu ra Jesús.

22 Tan tsindacá ra naha tsi ra Jesús iin nu nañí Gólgota, tan cuñí tsi catyí Yíquí Jiñi Ndiyí. 23 Tan ican jacoho ra naha vinu sacá nuu tsihin numeri tsa nañí mirra tsi ra. Maa tyin ra Jesús ña cuñí ra coho ra can.

24 Tsa yahá tyaa ra andaru naha ra tsi ra nu cruu, quihín ra naha jahma ra tan tava cuenda ra naha tyin cuñí ra naha coto ra naha yoo cua jaha canaa intuhun intuhun jahma can.

25 Tyaa ra naha tsi ra nu cruu caa iin tsa tuví. 26 Tan letra tsa tyaa ra naha jiñi cruu ra, catyí tsi nacuenda

cua cúu ra. Tan catyí tsi tyehen: “Ra ihya cuví Rey nyívi Israel.” **27** Tan tyaa ndíhi ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra. **28** Tacan cuví tan cundaq cuhva catyí nu tutu Nyoo tyehen: “Javahá nyívi tsihin ra tumaa javahá ñi tsihin ra caquiñi.” **29** Tan nyívi yahá ican jacuñi nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡Jaan! ¡Yooho tsa cahān tyin cua caní un vehe ñuhu cahnu, tan tsitsi tsa uñi quívi cua janduvaha nyico un itsi, **30** jacacu tsi un vityin tan nuu nu cruu juvin! —catyí ñi.

31 Tan juvin ñi tacan tsacú nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacu ra tsi inga ca nyívi, maa tyin ña cuví jacacu ra tsi maa ra!

32 Tun nuu ra nu cruu vityin nyehe yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyívi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacú nducu ndíhi nahnu tsi ra.

Nu tsihi ra Jesús

(Mt. 27:45-56; Lc. 23:44-49;
Jn. 19:28-30)

33 Cuhva tsa cua tahan hora, ndunaq naní cahnu nda cuanda caa uñi tsa tseñi. **34** Tan juvin ñi cuhva can cana tsaa ra Jesús tsihin tandíhi tunyee iñi ra, tan catyí ra:

—Eloi, Eloi, ¿lama sabactani?
—tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu? —catyí ra.

35 Juhva ra yucú ican naha ra tsiñi ra naha tsa cahān ra tan catyí ra naha:

—¡Jihna ndo! Caná tsaa ra tsi ra Elías, ra cuví ndusu yuhu Nyoo tahañ

tsanaha —catyí ra naha.

36 Tacan tan tsinú xaan iin ra tsiquihñ ra iin yahma tsa caá tumaa caá catyi, tan jatyiñ ra can tsihin vinu iya. Tan tyaa ra can iin nu yutun tan jatuhva ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

37 Tacan tan ñihi xaan cana tsaa ra Jesús, tan tsihi ra. **38** Tan jahma tsa ticaá tsitsi vehe ñuhu cahnu ndata sava tsi, nda siqui tan nda cuanda ityi tsaha. **39** Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa cana tsaa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

40 Tan ndasava ñi nycú tucu juhva ñiñaha nyehé ñi. Tan mahñu ñi can nyii ña María tsa queq ñuu Magdala, tan ña María sihi ra José tan ra Jacobo ra tyuvaa ca. Tan nyii tucu ña Salomé. **41** Ñiñaha ihya tsinyicun ñi tsi ra Jesús, tan jatyinyee ñi tsi ra quívi tsica nuu ra ityi Galilea. Tan yucú cuaha tucu ñiñaha inga ñuu tsa tsaa tsihin ra ñuu Jerusalén ican.

Nu tsicutsi ra naha tsi ra Jesús

(Mt. 27:57-61; Lc. 23:50-56;
Jn. 19:38-42)

42 Quívi tsa tuhvá nyívi janduvaha tsa catsi ñi cuenda inga quívi tuhvá ñi quitatu, juvin ñi tseñi can **43** tsaa ra José ra ñuu Arimatea nu nyii ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayívi. Ña nayuhvi ra tan tsahañ ra tsindacan ra cuñu ñuhu ra Jesús tsi ra Pilato. **44** Tsa tsito ra Pilato tyin tsa yaha tsihi ra Jesús, iyo xaan cuñi ra. Tacan tan cana ra tsi iin capitán tan

tsicā tuhun ra tsi ra tun nditsa tyin tsa tsihi ra Jesús. ⁴⁵ Tan tsa tsito vaha ra Pilato tyin tsa yahā tsihi ra Jesús, tava tyiñu ra na cuhva ra andaru naha ra cuñu ñuhu ra tsi ra José.

⁴⁶ Tacan tan tsijata ra José iin jahma cuitsin tsa tsinu tsihin jahma vaha tsa nañi linu, tan januu ra cuñu ñuhu ra Jesús nu cruu. Yaha can tan cava nuu ra jahma can cuñu ñuhu ra. Tacan tan tyihi ra cuñu ñuhu ra tsitsi iin ñaña tsa nyaá nduvahā tsitsi iin cava. Tan tyasi ra yuhu ñaña can tsihin iin yuu cahnu. ⁴⁷ Tan ña María, tsa quee ñuu Magdala, tan ña María, sihi ra José, tsahan ñi, tsinyehē ñi nu tinyij ra José can cuñu ñuhu ra Jesús.

Nu nandoto ra Jesús

(Mt. 28:1-10; Lc. 24:1-12; Jn. 20:1-10)

16 ¹ Tsa yahā quivi quitatú nyivi, ña María ñuu Magdala, tan ña María sihi ra Jacobo, tan ña Salomé jata ñi ndutya tami tyin cuñi ñi cahun ñi cutyihí ñi can cuñu ñuhu ra Jesús. ² Tacan tan cuahán ñi nu nyaá ñaña ra tsa cunditsin cuii ñi quivi quitsahā vitya. Tan tsaā ñi ican cuhva tsa cua canā cuii ñi ñicanyii. ³ Tan itiyi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaā ñi nyehe ñi tyin tsa catsiyo yuu cahnu tsa ndasí yuhu ñaña can. ⁵ Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsí ra jahma cuitsin cañi. Tan nayuhvi xaan ñi. ⁶ Maa tyin catyí ra tsihin ñi:

—Ña nayuhvi ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyii ihya vityin tyin tsa nandoto ra. Nyehe ndo nu tinyij ra naha tsi ra. ⁷ Cuaahan ndo tan jacoto ndo tsi ra Pedro tan tsi inga ca

ra tsicā tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

⁸ Tacan tan tsinú xaan ñi cuahán ñi, tyin nihí ñi jahá tsa yuuhví ñi. Tan ña cahan maa ñi tsa cahan ñi tsihin ndi intuhun maa nyivi tyin yuuhví xaan ñi.

Nu quituví ra Jesús nuu ña María quee ñuu Magdala

(Jn. 20:11-18)

⁹ Ra Jesús nandoto ra quivi quitsahá vitya. Tan quituví ra jihna cuii ca nuu ña María ñuu Magdala. Juvín ña cuví ña tsa tava ra utsa tatyí ña vaha. ¹⁰ Tsañan ña tsijacoto ña tsi ra tsicá tsihin ra, tyin yucú ra naha tsihin tucuiihya iñi tan tsacú ra naha. ¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

Nu quituví ra Jesús nuu uvi ra tsicā tsihin ra

(Lc. 24:13-35)

¹² Tsa yahā yacan, tan quituví ra Jesús nuu uvi ra tsa cuahán itiyi cuhu naha ra. Maa tyin siin cuhva caá ra nyehe ra naha. ¹³ Tan tsinuhū ra naha tsijacoto ra naha tsi tandihi ca ra naha. Maa tyin juvín ñi ña tsinu iñi ra naha tsa cahan ra can naha ra.

Nu tsaha ra Jesús tyiñu tsi ra tsa tsicā tsihin ra

(Mt. 28:16-20; Lc. 24:36-49;

Jn. 20:19-23)

¹⁴ Yaha yacan tan quituví ra Jesús nuu tandihi tsa utsi iin ra tsa tsicā tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahan nyivi tsa nyehe tsi ra tsa yahā nandoto ra. ¹⁵ Tan catyí ra tsihin ra naha:

—Cyaahan ndo nani cahnu nu ñuhu ñayivi, tan cahan ndo tuhun Nyoo tsihin tandihi nyivi, tan catyi ndo tsihin ñi nácaa jacacú Nyoo tsi ñi. **16** Tan nyivi tsa cua tsinu iñi tan coondutya ñi, cua cacu ñi. Maa tyin ñi tsa ña cua tsinu iñi cua ndoo cuaty ñi siqui ñi tan cua cunaa ñi. **17** Tan tandihi tsa iyo ihya cua javaha nyivi tsa cua tsinu iñi tsi yu: Tsihin sivi yu cua tava ñi taty ña vaha, tan cua cahan ñi inga yuhu tsa ña tuhvá ñi cahan. **18** Cua tiin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyivi cuuhví,

tan cua nduvaha nyivi.

Nu ndaa ra Jesús andivi

(Lc. 24.50-53)

19 Tsa ndihí cahan Jutu Mañi yo Jesús tsihin ra naha, tacan tan ndaa ra andivi, tan tsinyaa ra xiin cuaha Nyoo. **20** Tacan tan ra tsicá tsihin ra quitá ra naha tan tsahan ra naha tandihi ñi ityi tsicahan ra naha tuhun Nyoo nácaa jacacú ra tsi yo. Juvín ñi maa Jutu Mañi yo jatyinyee tsi ra naha tyin tsahá ra tsa javaha ra naha cuaha tsa iyo. Tan tsihin yacan nyehe nyivi tyin nditsa tsa caahán ra naha. Tan na cuvi tsi tacan ñi.

Tuhun Nyoo Tsa Tyaa Ra Lucas

**Nu quitsaha jacotó ra Lucas tuhun
ra Cristo tsi ra Teófilo**

1 Cuaha ñi nyivi nducy ñi cuhva tyaa ñi nuu tutu tandihi tsa cuví nu yucú ndi ihya. Tyaa ñi cuhva **2** nacatyí tuhun nyivi tsihin yo, ñi tsa nyehe tan cahān tuhun ra Jesús nda quivi jihna ñi. **3** Tan yuhu tucu tsa yaha cahví yu tan nducy tuhun vaha yu tandihi tsa cuví nda nu quitsaha. Yacan cuenda cuñí yu tyaa yu tuhun ihya tsa cuenda un, yooho Teófilo, nda nu quitsaha tan nda nu ndihi. **4** Tyin tacan tan coto un tyin nditsa tsa jacuahā nyivi tsi un.

**Nu jacotó iin ángel tsi ra Zacarías
ama cua cacu ra Juan, ra cua
jacoondutya tsi nyivi**

5 Quivi tsa cuví ra Herodes rey tanih cahnu cuenda Judea, tsicoo iin ra cuví jutu, nañí ra Zacarías. Tan yihí ra cuenda ra cuví jutu naha ra tsa nañí Abías. Tan ñasihi ra nañí ña Elisabet. Tata ra Aarón, ra cuví jutu tahān tsanaha, cuví ña. **6** Tan nduve maa cuatyí ñi nuu Nyoo. Tyin vaha xaan tyaa yahvi ñi tuhun caahān Nyoo Jutu yo. Tan yoñi maa cuví tyaa cuatyí tsi ñi. **7** Tan nduve maa sehe ñi tsicoo. Tyin ña Elisabet, ña cuví coo sehe ña. Tan tsa tsahnu xaan nduvi taahan ñi.

8 Iin quivi taahān tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. **9** Tan cuhva iyó maa ra cuví jutu naha ra, tavā ra naha suerte, ndāa ra cua tahan tsi quihvi tsitsi vehe ñuhu Jutu Nyoo, tyin cahmi ra cutu. Quivi can tahan tsi tsi ra Zacarías. **10** Tan cuaha nyivi yucú ityi tsata vehe ñuhu tsicān tahvi ñi tsi Nyoo, tsitsi tsa

tsahmí ra cutu can. **11** Tan tsitsi tsa ndi nyii ra ican tan quituvi iin ángel Jutu Nyoo nu nyii ra. Tan nyaá nyityi ángel can ityi xiin cuaha nu nyaá altar nu tsahmí ra cutu. **12** Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra. **13** Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahān un tsihin ra. Tan cua coo iin sehe ña Elisabet ñasihi un. Tan cua cunañi ra Juan. **14** Sii xaan cua cuñi un. Tan cuaha xaan nyivi cua cusii ndihi iñi quivi cua cacu ra. **15** Tyin sehe un, cahnu xaan cua cuví ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihí Tatyí Ii Nyoo tsi ra tsa ndi cumañi ca cacu ra tan tandihi tyambu tsa cua coo ra. **16** Tan cuaha xaan nyivi Israel cua cunyicun ñi tsi Jutu yo Nyoo jaha ra. **17** Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihí xaan Tatyí Ii Nyoo tsi ra. Tyin cua cuví ra tumaa ra Elías, ra cuví ndusu yuhu Nyoo tahān tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahān Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

18 Tan tsicā tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

19 Tan ángel can nacahān ra tan catyí ra:

—Yuhu Gabriel nañi yu. Tan tsicá

yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un.

20 Tan vityin cua nduñiñi un. Tyin ña tsinú iñi un tsa caahán yu tsihin un. Tan ña cua cuvi cahan un nda cuando tsa yaha cacu sehe ñasiñi un. Tan nda quivi cundaa tandiñi tsa cahan yu tsihin un —catyí ángel ican tsihin ra.

21 Tan nyivi tsa ndatú tsi ra Zacarías ityi tsata vehe ñuhu, iyo xaan cuñí ñi tyin cucuee xaan ra tsitsi vehe ñuhu can. **22** Tan cuhva tsa quita ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyin ña cuví cahan ra.

23 Tan quivi ndiñi tyiñu jahá ra Zacarías vehe ñuhu can, tan cuanuhu ra yuvehe ra. **24** Tsa yaha quivi can tan tsicuhun sehe ñasiñi ra, ña Elisabet. Tan ña quita maa ña tsata vehe tsa tandiñi tsa uhun yoo. Tan tsicá iñi ña: **25** “Tyehen javaha Jutu Mañi yu tsihin yu, tyin tacan tan ña cahan nyaa ca nyivi tsi yu”, cuñí ña tsicá iñi ña.

Nu jacoto iin ángel tsi ña María tyin cua cacu ra Jesús

26 Tsa quita iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea. **27** Tyin cahan ra tsihin iin ñaha yoco tsa nañi María. Tan tsa nyaá maa tsa cua tindaha ña tsihin ra nañi José, ra cuví tata ra rey David. **28** Tan quihví ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandiñi ca ñaha —catyí ángel ican tsihin ña.

29 Tan tsa tsiñi ña tsa cahan ra, iyo xaan cuñí ña tsa cahan ra. Tan tsicá iñi ña: “¿Nacuenda tacan caahán ra ihya nacumi tsi yo?” tsicá iñi ña.

30 Tan catyí ángel ican:

—Ña nayuhvi un, María, tyin ñihí un tumañi iñi Nyoo. **31** Vityin cua cuhun sehe un. Tan cua cunañi ra Jesús. **32** Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuví ra David, tsii tsaahnu ra. **33** Tyin cua cundaca ñaha ra tsi nyivi Israel tandiñi maa tyembu. Tan ña cua ndiñi maa tsa cundaca ñaha ra —catyí ángel can tsihin ña.

34 Tacan tan tsicá tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yí yu.

35 Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. **36** Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña. **37** Tyin Nyoo nduve tsa ña cuví jaha ra —catyí ángel tsihin ña.

38 Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyí ña Elisabet

39 Tan iin quivi can, numi ñi cuahán ña María iin ñuu tsa canyí Judea nu maa ñi maa yucu iyó.

40 Tan quihví ña tsitsi vehe ra Zacarías. Tan nacuhvá ña nacumi tsi ña Elisabet. **41** Tan tsa tsiñi ña Elisabet tsa cahan ña María, tan natuñu sehe ña tsitsi ña. Tan ñihí nyaá Tatyí Ii Nyoo tsihin ña. **42** Tan ñihí xaan nacahan ña, tan catyí ña:

—Nyoo nasocó xaan ra tsi un,

María, tan ñavin ca tandihi ca ñiñaha. Tan nasoco ra tsi sehe un. **43** ¿Tan yóo cuví yuhu? Tyin quitsi sihi Jutu Mañi yu quitsi nyehe ña nu nyaá yu. **44** Cuhva tsa tsiñi yu tsa cahan un, tan natuñu sehe yu tsitsi yu. Tyin sii xaan cuñi ra. **45** Tan sii xaan cuñi tucu maa añima un tyin tsinú iñi un. Tyin cua cuvi kuhva tsa cahan Nyoo tsihin un —catyí ña Elisabet.

46 Tan catyí ña María:

—Jacahnú yu tsi Nyoo tsihin tandihi añima yu.

47 Tan sii xaan cuñi añima yu tsihin Nyoo ra jacacú tsi yu.

48 Tyin cuví yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quivi cua cahan nyivi tyin cahnu xaan tumañi iñi ñihí yu.

49 Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sivi ra.

50 Tan ndaahvi cuñi ra tsihin tandihi nyivi tsa cua coo tan tyaa yahvi ñi tsi ra.

51 Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyivi tsa cahnu xaan tsicá iñi ñi.

52 Quinyaá ra tunyee iñi iyó tsi nu cuví rey.

Tan cua janducahnu ra tsi nyivi ndaahvi.

53 Tshá Nyoo tsa vaha tsi nyivi cuñi coto tsa vaha.

Tan nyivi cuca tsa cuñi tyin nduve tsa tsiñi ñuhu tsi ñi, tsihin ndaha ndiñi ñi, jacuhún ra tsi ñi.

54 Jatyinyeé ra tsi nyivi Israel tsa cuví ñi musu ra.

Tan ña naá iñi ra tsi ñi. Nyehé ndaahvi ra tsi ñi.

55 Tumaa kuhva catyí Nyoo tsihin ra Abraham, tsii tsaahnu yo, tan tsihin sehe ra, tacan ñi

javahá maa Nyoo —catyí ña María.

56 Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhú ña nda yuvehe ña.

Quivi cacu ra Juan, ra tsa jacoondutyá tsi nyivi

57 Tsa tsaá quivi tsa cacu sehe ña Elisabet, jacacu ña iin rayi. **58** Tan nyivi vehe ña tsihin nyivi tsa iyó yatyin ñi yuvehe ña, sii xaan cuñi ñi. Tacan tucu maa ña. Tyin vaha xaan tsa javahá Nyoo tsihin ña. **59** Tan tsa quita una quivi tsa cacu ra, tan tyaa ra naha tuñi Nyoo tsi ra tumaa kuhva iyó maa ñi. Tan cuñi ra naha tsa cunañi ra Zacarías tumaa nañi maa jutu ra. **60** Maa tyin sihi ra catyí ña: —Ña cuví. Tyin Juan cua cunañi ra.

61 Tan catyí ra naha:

—¿Nacuenda jacunañi un Juan tsi ra? Tan yoñi nyivi ndo nañi tacan —catyí ra naha.

62 Tan quitsahá tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñi ra tsa cunañi ra. **63** Tan tsican jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñi ra naha tsa tacan.

64 Juvín ñi maa hora can nacahan ra Zacarías. Tan quitsahá jacahnú ra tsi Nyoo. **65** Tan tandihi maa nyivi iyó yatyin yuvehe ñi, iyo xaan cuñi ñi cuví. Tan tandihi maa nyivi tsa iyó yucu iyó Judea ican nacatyí tuhun tahan ñi tsa cuví can. **66** Tan tandihi maa nyivi tsa tsito can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuvi ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahn̄u ra Zacarías tsi Nyoo

- 67 Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsaḥa cuenda ra tsa caahán Nyoo tsihin ra, tan catyí ra:
- 68 —Cahnu xaan ra cuví Jutu yo Nyoo cuenda yo nyiví Israel.
Tyin quitsí ra nu yucú yo, tsa cuví yo nyiví maa ra. Tan jacacú ra tsi yo.
- 69 Tan tsaḥa ra iin ra tsa cahnu xaan cuví tsi yo, ra cua jacacu tsi yo.
Tata ra David, ra tsa cuví musu Nyoo cuvi ra.
- 70 Tacan cua javaha ra, catyí Nyoo taḥan tsanaha, quiví caḥan ra cuví ndusu yuhu ra, tan catyí ra naha tyehen:
- 71 Cua jacacu Nyoo tsi yo ndaha nu xaan iñi tsi yo, tan nuu tandíhi nu tsa ndasi cuñí nyehe tsi yo.
- 72 Tan cua cundaahvi iñi ra nyehe ra tsi nyiví yo tsa tsicoḡ taḥan tsanaha.
Tan cua nducuhun iñi ra tsa caḥan ra tsihin ñi taḥan tsanaha.
- 73 Caḥan maa Nyoo tsihin ra Abraham, tsií tsaahnu yo,
- 74 tan catyí ra tyin cua jacacu ra tsi yo ndaha nu xaan iñi tsi yo.
Tyin ña cua nayuhvi ca yo jacahnu yo tsi ra.
- 75 Tan maa ra cua janaha ra cuhva coo yo.
Tan vaha cua coo yo nuu ra tan coo yo maa ñi tsa cuenda maa ra tandíhi quiví tsa cua coo yo ñayiví —catyí ra Zacarías.
- 76 Tan catyí ra Zacarías tsihin lee can:
—Sehe luhlu yu, yooho cua cuvi un ndusu yuhu Nyoo, ra nyaá gloria.
Tyin cahun un ityi nuu Jutu Mañi yo. Tan cua cahan un

tuhun ra tsihin nyiví tyin tsa cuñí quitsi ra.

- 77 Tan cua jacoto un tsi nyiví tyin cua jaha Nyoo tucahnu iñi tsi ñi.
Tacan tan cacu añima ñi.
- 78 Tyin Jutu yo Nyoo cuñí ra tsi yo. Tan cundaahví xaan iñi ra tsi yo.
Tan cua jaquitsi ra iin ra jatyinyee tsi yo. Tan cuvi ra tumaa ñuhū ñicanyii.
- 79 Tyin cua janaha ra ñuhū nditsin nu iyó nyiví nu naa, nu ndatú tuhun tsihi tsi ñi.
Cua janaha ra ityi ra tsi yo, ityi vaha —catyí ra Zacarías.
- 80 Tan ra luhlu can cua cuahnu ca ra. Ñihi xaan tsicoḡ tunyee iñi tsi ra tsihin Tatyí Ii Nyoo. Tan tsicoḡ ra iin tsiquí ndíi nda cuanda quiví tsa nacotoḡ nyiví Israel tsi ra.

Quiví cacu ra Jesús

(Mt. 1:18-25)

- 2¹ Quiví ican tsicoḡ iin ra ndacá ñaha, ra cuví rey cahnu, nañi ra Augusto. Tavá tyiñu ra tsi ra nyisó tyiñu naha ra na tyaa ra naha sivi tandíhi nyiví taniñi cahnu ñuu ñayiví.
- 2 Ihya cuví tsa jihna ñi tsinyaḡ sivi nyiví. Tan ra Cirenio cuví ra ra ndacá ñaha tandíhi ñuu nu cuví Siria.
- 3 Tan tandíhi nyiví cuanuhū ñi ñuu ñi, tyin cua ndaca ñi sivi ñi.
- 4 Yacan quee ra José ñuu Nazaret tsa canyí Galilea. Tan cuahán ra ñuu Belén tsa canyí Judea, nu cacu ra rey David, tyin tata ra David cuví ra.
- 5 Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña.
- 6 Tan tsa ndi yucú ca ñi ñuu Belén ican tan quitsaha cuuhví tsitsi ña tyin tsa cua cacu sehe ña.
- 7 Tan ican cacu sehe nuu ña. Tan cavá nuu ña jahma tsi ra. Tan nacaquin ña tsi ra tsitsi iin canuva nu tsatsí quiti itya. Tyin ña ñihí ñi iin vehe coo ñi.

Cuhva cahān ángel tsihin ra jahá cuenda mbee

8 Yatyin ñi ñuu Belén can yucú ra jahá cuenda mbee tsa tsacuaa. 9 Tan sana iñi ra naha quituvı̄ iin ángel Nyoo. Tan jandunditsın Jutu yo Nyoo taniñi cahnu nu yucú ra naha. Tan nayuhvī xaan ra naha.

10 —Ña nayuhvī ndo —catyí ángel can—. Tyin vatsı̄ cahan yu iin tsa vaha xaan tsihin ndo. Siñi xaan cua cuñı̄ tandı̄hi cuii maa nyı̄vi tsa cuenda tsi. 11 Vityin nda ñuu ra David cacı̄ iin ra cua jacacu tsi nyı̄vi. Cuvı̄ ra Cristo, ra cuvı̄ Jutu Mañi yo. 12 Tan tsihin cuhva ihya cua nacoto ndo tsi ra: cua nañihi ndo tsi ra lee ican, cavá nuu ra jahma tan canyı̄i ra tsitsi iin canuva nu tsatsı̄ quitı̄ —catyí ángel can tsihin ra jahá cuenda mbee can.

13 Tan juven ñi cuhva ican quituvı̄ cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

14 Cahnu xaan cuvı̄ Nyoo, ra nyaá gloria.

Tan nu ñuhu ñayı̄vi, na coo tsa vaha añima nyı̄vi tsa ñihı̄ tumañi iñi Nyoo, catyí ra ángel naha ra.

15 Tacan tan tsa cuanuhı̄ ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunehe yo náa cuvı̄. Tyin maa Jutu yo Nyoo jacoto tsi yo —catyí ra naha.

16 Tacan tan numi xaan cuahán ra naha, tan nañihı̄ ra naha tsi ra lee can tsihin ña María tan tsihin ra José. Tan canyı̄i ra lee can tsitsi iin canuva nu tsatsı̄ quitı̄ itya. 17 Tan cuhva tsa nyehe ra naha tsi ra, quitsahá natuhún ra naha tandı̄hi tuhun cahān ángel tsihin ra naha tsa cuenda lee ican tsihin ñi. 18 Tan tandı̄hi nyı̄vi tsa tsiñi tuhun caahán ra naha, iyo xaan cuñı̄ ñi. 19 Maa tyin ña María naquihın cuenda ña tuhun ican tsitsi añima ña,

tan tandı̄hi tuhun ican tsicá iñi ña. 20 Tan cuanuhı̄ ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandı̄hi tsa nyehe ra naha tan tsa tsiñi ra naha. Tyin cundaq cuhva tsa catyı̄ ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

21 Tsa ndu uná quı̄vi ra Jesús, tan tyaa ñi tuñi Nyoo tsi ra tyin tacan catyı̄ tuhun tsahnu maa ñi. Tan jacunañi ñi Jesús tsi ra. Juvın ñi maa sivi tsa catyı̄ ángel tsihin ña María quı̄vi tsa ndi cumañi ca cuhun ra Jesús tsitsi ña.

22 Tan tsa yahá quı̄vi cuhva catyı̄ ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacı̄ sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

23 Tacan ñi javahá ñi tyin catyı̄ ley Nyoo tyin: “Tandı̄hi sehe nuu ñi tsa cuvı̄ rayı̄i, cua tyaa cuenda ñi tsi ra ndaha Jutu yo Nyoo”, catyı̄ ley ican. 24 Tan tsahān ñi tsijamañi ñi uvi taahan quitı̄, tyin tacan catyı̄ maa ley Jutu yo Nyoo, nu catyı̄ tsi tyehen: “Cuhva ndo uvi taahan curuu a uvi taahan paloma”, catyı̄ ley can.

25 Tan quı̄vi can iyó iin ra ñuu Jerusalén nañi ra Simeón. Iin ra cuiñi xaan cuvı̄ ra, tan jacahnú ra tsi Nyoo. Ndatú ra nda cacı̄ ra cua jacacu tsi ra tsihin tandı̄hi ca nyı̄vi ñuu Israel ican. Tan nyaá Tatyı̄ Ii Nyoo tsihin ra Simeón. 26 Tan jacoto Tatyı̄ Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsı̄ Jutu yo Nyoo. 27 Tan Tatyı̄ Ii jacuhın ra tsi ra Simeón can nda vehe ñuhu. Tan juven ñi cuhva can tsaq jutu ra tan sihi ra Jesús tsihin maa ra nu cuvı̄ vehe ñuhu cahnu can, tyin javaha ñi cuhva catyı̄ maa ley. 28 Tan cuhva tsa tsaq ñi nu nyaá ra Simeón tan quihın ra Simeón tsi ra Jesús. Tan tyihı̄

jucun ndaha ra tsi ra. Tacan tan quitsahā jacahnú ra tsi Nyoo, tan catyí ra:

29—Jutu Mañi yu, vityin tsa cundaq̄ cuhva tsa catyí maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

30Tyin tsa nyehe tsihin nuu yu tsi ra cua jacacu tsi ndi.

31Tsa iyó ra ihya ityi nuu tandíhi nyívi.

32Tan cua cuví ra ñuhū tsa cua jandunditsin añima nyívi tsa ñavin nyívi Israel cuví.

Tan cahnu ca cua jaha ra tsi nyívi Israel, tsa cuví ndi nyívi cuenda maa un —catyí ra Simeón.

33 Tan ra José tsihin sihi ra Jesús, iyo xaan cuñí ñi tsa tsiñí ñi tsa cahān ra Simeón tsa cuenda lee ican.

34 Tacan tan tsicān tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyívi Israel ñuu Nyoo cua tsinu iñi tsi ra quívi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsahā ra tsi ra tan cuví ra tumaa seña tsa cuenda yo. 35 Tacan tan coto tandíhi yo náa tsicá iñi nyívi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

36 Tan ican, tsitsi vehe ñuhu cahnu can, nyíi tucu iin ñaha tsa cuví ndusu yuhu Nyoo. Nañí ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindahā ña, maa tyin utsa cuiya ñi tsicoo ña tsihin yí ña tan tsihi ra. 37 Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo,

tan tsicān tahvi ña tan iyó nyitya ña.

38 Tan juvin ñi tsa ndi nyíi ca ra José tan ña María tsihin lee ican, tan tsaa ña Ana nu yucú ñi. Tan quitsahā nacuhvá ña tyahvi nyoo tsi Nyoo.

Tan cahān ña tuhun ra Jesús tsihin tandíhi nyívi tsa yucú ican, nyívi tsa ndatú tsa cacu ñuu Jerusalén.

Nu cuanuhū ñi nda ñuu Nazaret

39 Tacan tan tsa yahā tsa javahā ñi tandíhi maa tsa taahán tsi javaha ñi cuhva catyí ley Jutu yo Nyoo, tan cuanuhū ñi nda ñuu Nazaret tsa canyíi Galilea nu cuví ñuu maa ñi. 40 Tan ra luhlu Jesús vatsí cuahnu ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahān ra luhlu Jesús tsihin ra maestro cuenda ley vehe ñuhu naha ra

41 Ra José tsihin sihi ra Jesús tuhvá ñi tsicá vico pascua nda ñuu Jerusalén ndíhi ñi cuiya. 42 Tan tsa quitā tsa utsi uvi cuiya ra Jesús, tan tsahān tandíhi ñi nda ñuu Jerusalén, cuhva tuhun tsa iyó maa ñi. 43 Tan quívi ndíhi vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jahā jutu ra tan sihi ra cuenda. 44 Tsicá iñi maa ñi tyin vatsí maa ra tyañu tandíhi nyívi ican. Tan ndíhi iin quívi tsicá ityi ñi. Tacan tan quitsahā nanducú ñi tsi ra tyañu nyívi nacotó tsi ñi. 45 Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

46 Tan tsa yahā uñi quívi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha. 47 Tan tandíhi nyívi tsiñí tsa caahán ra, iyo xaan cuñí ñi tsihin tsa tsiñi tuñi tsa iyó tsi ra, tan tsihin tsa nacyí tuhun ra. 48 Cuhva tsa nyehe jutu ra tan sihi ra

tsi ra, iyo xaan cuñi ñi, tan sihi ra
catyí ña tsihin ra:

—Sehe luhlu yu. ¿Nacuvi tyin
javahá un tyehen? Jutu un tan yuhu
tuñú xaan cuñi ndi tan nanducú xaan
ndi tsi un —catyí ña.

49 Tacan tan catyí ra Jesús:

—¿Nacuenda nanducú ndo tsi yu?
¿A ña tsitó ndo tyin ñiñi ca cuñi tsi
nyehé yu tyiñu Jutu yu? —catyí ra.

50 Maa tyin ña cutuñi iñi ñi tsa
caahán ra tsihin ñi.

51 Tacan tan cuanuhu ra tsihin ñi
nda ñuu Nazaret. Tan vaha javahá ra
tyin tyaá yahvi ra tsi ñi. Tan sihi ra
naquihin vaha ña tandihi tuhun ihya
tsitsi añima ña. 52 Tan ra Jesús cua
cuahnu ca ra tan tsaá ca tsa tsiñi tuñi
jiñi ra. Tan sihi xaan cuñi Nyoo tsihin
ra, tacan tucu nyivi, sihi xaan cuñi ñi
tsihin ra.

**Nu cahán ra Juan, ra jacoondutya tsi
nyivi, tuhun Nyoo nuu tsiqui**

(Mt. 3:1-12; Mr. 1:1-8; Jn. 1:19-28)

3 1 Tsa quitá tsahun cuiya tsa cuví
ra Tiberio rey cahnu, tan ra
Poncio Pilato ndacá ñaha Judea. Tan
ra Herodes ndacá ñaha ra Galilea.
Tan yañi ra, ra Felipe ndacá ñaha ra
Iturea tsihin Traconite. Tan ra Lisantias
ndacá ñaha ra Abilinia quivi can.

2 Tan ra Anás tsihin ra Caifás cuví ra
naha jutu tsaahnu tsa cuví ityi nuu.
Quivi can cahán Nyoo tsihin ra Juan
sehe ra Zacarías iin nu tsiqui. 3 Tan
ra Juan tsicá nuu ra tandihi ñuu tsa
cayucú yatyin ñi yutya cahnu Jordán,
caahán ra tuhun Nyoo tsihin nyivi.
Tan catyí ra tsihin ñi tyin na ndu uvi
iñi ñi cuatyí ñi tan coondutya ñi.
Tacan tan Nyoo cua jaha ra tucanhu
iñi cuatyí ñi, catyí ra. 4 Tumaa caahán
tuhun tsa nyaá nu libru tsa tyaá ra
Isafás, ra cuví ndusu yuhu Nyoo
tahán tsanaha. Tan catyí ra:

Cua tyaá soho yo ndusu ra nu
caná tsaa ra nu tsiqui tan
catyí ra:

“Nuña ndo iin ityi cuiti tan
natyiso vaha ndo tsi ndo tyin
tsa vatsi Jutu Mañi yo.

5 Tumaa tsa tahví ndo yucu tan
jandutú ndo xahva cunu,
jandoó ndo ityi yacua, tan
janduvahá ndo nu quiñi.

6 Tacan tan tandihi nyivi cua
nyehe ñi tsi ra tsa cua jaquitsi
Nyoo tyin jacacu ra tsi yo.”

Tacan tan cahán ra Juan tsihin
nyivi.

7 Tan tsa cuahán nyivi tsa cuñi ñi
jacoondutya ra tsi ñi, tan catyí ra
tsihin ñi:

—¿Nyoooho cuví ndo tumaa tata
cool! ¿A cuñi ndo tyin tsihin tsa
coondutya ñi ndo tan ña cua tatsi
tuñi ca Nyoo tsi ndo? Ña cuví.

8 Yacan nasama ndo cuhva iyó ndo,
na nyehé yo tyin tsa ndu uvi iñi ndo
cuatyí ndo nuu Nyoo. Tan ña nduyaa
ndo cahán ndo tyin nyivi tata ra
Abraham cuví ndo. Tyin cuanda
tsihin yuu ihya, Nyoo cuví jananduvi
ra iin nyivi ra Abraham. 9 Tsa ndatú
yatsa Nyoo tsi tandihi ndo tyin cuví
ndo tumaa yutun tsa ña tsahá tsiti
vaha, cua tyahnya tun tan cua cayu
tun, tacan cua javaha Nyoo tsihin
ndo —catyí ra Juan.

10 Tacan tan nducú tuhun ñi tsi ra
tan catyí ñi:

—¿Tan nácaa javaha ndi? —catyí
ñi.

11 Tacan tan nacahán ra Juan:

—Ra tsa iyó uvi taahan jahma,
taahán tsi cuhva ra intuhun tsi tsi ra
tsa nduve jahma. Tan ra tsa iyó tsa
catsi, taahán tsi cuhva ra luxu catsi ra
tsa nduve tsa catsi —catyí ra.

12 Tan tsaá tucu ra tsa tavá xuhun
cuenda ra ndacá ñaha nda ñuu Roma,
tsa cuñi ra naha coondutya ra naha.
Tan nducú tuhun ra naha tsi ra Juan:
—Maestro, ¿nácaa javaha tucu
nyuhu? —catyí ra naha.

13 Tan catyí ra Juan tsihin ra naha:
—Cuhva catyí ley ñi tava ndo

xuhun. Tan ña jandaa ca ndo yahvi.

14 Tacan tan tsicā tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoo ndo vaha tsihin yahvi ndo —catyí ra Juan.

15 Tan quivi can tandihi nyivi ndatú ñi tsi ra Cristo. Tan tsicá iñi ñi tun juvin ra Juan cuví Cristo. 16 Maa tyin ra Juan catyí ra tsihin tandihi ñi:

—Tsa nditsa tyin jacoondutyá yu tsi ndo tsihin ndutyá. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñii nditsan ra. Tan ra ican cua jacoondutyá ra tsi ndo tsihin Tatyí Ii Nyoo, tan tsihin ñuhú ihñi. 17 Tan ra ican ndahá ra pala tyin cua jandava ra trigu. Cua natava siin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

18 Tan tacan cahān ra Juan tsihin nyivi can. Tan náa ndihi ca maa kuhva cahān ra tan jacoto ra tsi ñi nácaa tsa cua quitsi Sehe Nyoo. 19 Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihin ra tsi ña Herodías, ñasihi ra Felipe, yañi ra, tsihin tsa cuenda náa ndihi tsa ña vaha javahá ra. 20 Maa tyin ña tyaa yahvi maa ra Herodes tuhun cahān ra Juan. Nu ndihi tuhun tinyij ra tsi ra Juan tsitsi vehe caa.

Nu jacoondutyā ra Juan tsi ra Jesucristo

(Mt. 3:13-17; Mr. 1:9-11)

21 Tsa ndi cumañi ca cuhun ra Juan vehe caa tan jacoondutyā ra tsi tandihi nyivi. Tan jacoondutyā ndihi

ra tsi ra Jesús. Tsa yaha tsicoondutyā ra, tsican tahvi ra tsi Nyoo, tacan tan nuñā andivi. 22 Tan nuu Tatyí Ii Nyoo siqui ra tumaa iin paloma. Tan cahān iin ndusu ityi siqui andivi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

Cuhva quitsi tata ra Jesucristo

(Mt. 1:1-17)

23 Tan tsa iyó maa tan oco utsi cuiya ra Jesús tan quitsaha jahá tyiñu ra tyiñu Nyoo. Tan tandihi nyivi cuñi maa ñi tyin sehe ra José cuví tsi ra. Tan ra José, sehe ra Elí cuví tsi ra. 24 Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. 25 Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. 26 Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra. 27 Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra. 28 Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra. 29 Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra.

Tan ra Jorim, sehe ra Matat cuvꞌ tsi ra. **30** Tan ra Matat, sehe ra Leví cuvꞌ tsi ra. Tan ra Leví, sehe ra Simeón cuvꞌ tsi ra. Tan ra Simeón, sehe ra Judá cuvꞌ tsi ra. Tan ra Judá, sehe ra José cuvꞌ tsi ra. Tan ra José, sehe ra Jonán cuvꞌ tsi ra. Tan ra Jonán, sehe ra Eliaquim cuvꞌ tsi ra. **31** Tan ra Eliaquim, sehe ra Melea cuvꞌ tsi ra. Tan ra Melea, sehe ra Mainán cuvꞌ tsi ra. Tan ra Mainán, sehe ra Matata cuvꞌ tsi ra. Tan ra Matata, sehe ra Natán cuvꞌ tsi ra. **32** Tan ra Natán, sehe ra David cuvꞌ tsi ra. Tan ra David, sehe ra Isaí cuvꞌ tsi ra. Tan ra Isaí, sehe ra Obed cuvꞌ tsi ra. Tan ra Obed, sehe ra Booz cuvꞌ tsi ra. Tan ra Booz, sehe ra Salmón cuvꞌ tsi ra. Tan ra Salmón, sehe ra Naasón cuvꞌ tsi ra. **33** Tan ra Naasón, sehe ra Aminadab cuvꞌ tsi ra. Tan ra Aminadab, sehe ra Aram cuvꞌ tsi ra. Tan ra Aram, sehe ra Esrom cuvꞌ tsi ra. Tan ra Esrom, sehe ra Fares cuvꞌ tsi ra. Tan ra Fares, sehe ra Judá cuvꞌ tsi ra. **34** Tan ra Judá, sehe ra Jacob cuvꞌ tsi ra. Tan ra Jacob, sehe ra Isaac cuvꞌ tsi ra. Tan ra Isaac, sehe ra Abraham cuvꞌ tsi ra. Tan ra Abraham, sehe ra Taré cuvꞌ tsi ra. Tan ra Taré, sehe ra Nacor cuvꞌ tsi ra. **35** Tan ra Nacor, sehe ra Serug cuvꞌ tsi ra. Tan ra Serug, sehe ra Ragau cuvꞌ tsi ra. Tan ra Ragau, sehe ra Peleg cuvꞌ tsi ra. Tan ra Peleg, sehe ra Heber cuvꞌ tsi ra. Tan ra Heber, sehe ra Sala cuvꞌ tsi ra. **36** Tan ra Sala, sehe ra Cainán cuvꞌ tsi ra. Tan ra Cainán, sehe ra Arfaxad cuvꞌ tsi ra. Tan ra Arfaxad, sehe ra Sem cuvꞌ tsi ra. Tan ra Sem, sehe ra Noé cuvꞌ tsi ra. Tan ra Noé, sehe ra Lamec cuvꞌ tsi ra. **37** Tan ra Lamec, sehe ra Matusalén cuvꞌ tsi ra. Tan ra Matusalén, sehe ra Enoc cuvꞌ tsi ra. Tan ra Enoc, sehe ra Jared cuvꞌ tsi ra. Tan ra Jared, sehe ra Mahalaleel cuvꞌ tsi ra. Tan ra Mahalaleel, sehe ra Cainán cuvꞌ tsi ra. **38** Tan ra Cainán, sehe ra Enós cuvꞌ tsi ra. Tan ra Enós,

sehe ra Set cuvꞌ tsi ra. Tan ra Set, sehe ra Adán cuvꞌ tsi ra. Tan ra Adán, sehe Nyoo cuvꞌ tsi ra.

Nu nducꞌ cuhva nu ña vaha tsi ra Jesús

(Mt. 4:1-11; Mr. 1:12-13)

4 ¹ Tan ñihi nyaá Tatyí Ii Nyoo tsihin ra Jesús tsa yaha tsicoondutyá ra, quita ra yutya Jordán tan cuanuhu ra. Tan quihín Tatyí Ii Nyoo tsi ra, tan tsahan ra iin nu cuvꞌ nu tsiquí ² nu tsinyí ra uvi xico nduvi. Tan ña tsatsí maa ra tandíhi quívi ican. Yaha can tan quítsí tsa tsisocó ra. Tan nducú cuhva nu ña vaha tsi ra. ³ Tan catyí nu tsihin ra: —Tatun juvin Sehe Nyoo cuvꞌ tsi un, cahan tsihin yuu ihya, na nanduvi tsi paan catsi un.

⁴ Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyívi coonyito ñi, tyin coonyito ñi tsihin tandíhi tuhun caahán Nyoo —catyí ra Jesús tsihin nu ña vaha.

⁵ Tacan tan quihín nu ña vaha tsi ra Jesús, cuahán ra iin jíñi yucu sucun. Tan iin yaha ñi janaha nu tandíhi tsa cuca nu ndacá ñaha nu ñuu ñayívi ihya tsi ra Jesús. ⁶ Tan catyí nu tsihin ra:

—Cuhva yu tandíhi tsa nyehé un tun cuñí un tyin maa Nyoo tsaha tsa cundaca ñaha yu tandíhi can, tan ndáa ra cuñí yu cuhva yu can, cuvꞌ tsii ra. ⁷ Tatun yoocho tan cuñí tsiti un nuu yu ihya tan jacahnu un tsi yu, tandíhi can cua cuhva yu tsi un —catyí nu ña vaha tsihin ra.

⁸ Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahán tsi javaha un.”

⁹ Tacan tan quihín nu ña vaha tsi ra Jesús inga tsaha. Tan cuahán nu

tsihin ra nda ñuu Jerusalén. Tan jandaq̄ nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuando nu ñuhu. **10** Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

11 Cua janahndi ra naha tsi un.

Tan ña cua nañi tsaha un nu yuu.

12 Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

13 Tan tsa ndih̄i nducu cuhva nu ña vaha tsi ra Jesús, tacan tan nacoq̄ nuu nu tsi ra.

Nu quitsahaq̄ caahán ra Jesús tuhun Nyoo tsihin nyivi

(Mt. 4:12-17; Mr. 1:14-15)

14 Tan tsa yahaq̄ tsa nducu cuhva nu ña vaha tsi ra Jesús tan cuanuh̄i ra nda Galilea tsihin tsa tsitú tunyee iñi Tatyí li Nyoo tsi ra. Tan tsitó nyivi tuhun ra ñi cahnu Galilea can.

15 Tan jacuah̄a ra tsi nyivi nu cuví vehe ñuhu tandih̄i ñi ñuu. Tan tandih̄i ñi jacahn̄u ñi tsi ra.

Tsa tsaq̄ nyico ra Jesús ñuu Nazaret nu tsahn̄u ra

(Mt. 13:53-58; Mr. 6:1-6)

16 Tacan tan tsaq̄ nyico ra Jesús ñuu Nazaret nu tsahn̄u ra. Tan iin quivi quitatú nyivi, quih̄vi ra tsitsi vehe ñuhu, tumaa tsa tuhvá maa ra tsicá. Tan nduvit̄a ra cua cahvi ra tuhun Nyoo. **17** Tan tsahaq̄ ra naha iin libru tsa tyaq̄ ra Isaías ra cuví ndusu yuhu Nyoo. Tan cuhva tsa nuñ̄a ra, nañih̄i ra iin nu catyí tsi:

18 Iyó Tatyí li Nyoo tsihin yu, tyin maa Nyoo tavaq̄ tyiñu tsi yu

cahan yu tuhun ra tsihin nyivi ndaahvi.

Tan janduvaha yu tsi nyivi tsa uhvi añima.

Tan maa ra tavaq̄ tyiñu tsi yu tyin jacoto yu tsi nyivi yih̄í ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyivi cuaa.

Tan cua nacoq̄ nuña yu tsi nyivi tsa iyó tundoho.

19 Tan jacoto yu tsi nyivi tyin tsa quit̄a quivi tsa nyaá Nyoo tumañi iñi tsihin ñi.

20 Tacan tan ndih̄i cahvi ra tan nacasiq̄ ra nuu libru can. Tan nacuhvaq̄ ra tsi iin ra tsa jatyinyeé tsihin tyiñu vehe ñuhu can. Tan tsinyaq̄ ra Jesús. Tacan tan tandih̄i nyivi tsa nyecú ican, ndooq̄ ñi tsa nyehé ñi tsi ra.

21 Tacan tan catyí ra tsihin ñi:

—Vityin quivi ihya tsa cundaq̄ cuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

22 Tan tandih̄i nyivi tsa nyecú can, vaha xaan cah̄an ñi tuhun ra. Tan iyo xaan cuñi ñi tsihin tandih̄i tsa vaha tsa cah̄an ra. Tacan tan quitsahaq̄ tsicá tuhun tahan ñi:

—¿A ñavin ra ihya cuví sehe ra José?

23 Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyivi, janduvaha jihna tsi maa un.” Tan cuñi tucu ndo catyí ndo: “Tandih̄i tsa javahaq̄ un ñuu Capernaum tsitó ndi, javaha ndih̄i tucu can ñuu maa un ihya.”

24 Tan cah̄an ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyivi ñuu ra naha tsi ra naha.

25 Tan tsa nditsa tyin cuaha xaan ñi ndaahvi tsa tsih̄i ȳi tsicoq̄ Israel ihya quivi tsa tavaq̄ Nyoo tyiñu tsi ra Elías,

ra cuvī ndusu yuhu ra, tan ra ican cuvī iin ra Israel ihya tsicā ra cahān ra tuhun Nyoo. Tan quivī can ña cuun maa savi uñi cuiya sasava. Tan tsicoq tama cahnu xaan. **26** Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan ra jatyinyee ra tsi iin ñaha ndaahvi tsihī yī tsa tsicoq ñuu Sarepta tsa canyī Sidón.

27 Tacan tucu quivī tsicā inga ra cuvī ndusu yuhu Nyoo cuenda nyivi Israel, ra Eliseo. Cuaha xaan ra cuuhví tsihin cuehe tyaahyú tsicoq Israel ihya, tan ndi intuhun ra naha tan ña nduvahā ra naha. Nduvahā intuhun ñi ra Naamán ra quee ñuu Siria —catyí ra Jesús.

28 Tsa yahā tsiñī ñi tandihī tuhun can, tandihī nyivi tsa yucú tsitsi vehe ñuhu can xaan xaan cuñī ñi cuvī.

29 Tan nduvitā ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñī ñi janacava ñi tsi ra ican. **30** Maa tyin ra Jesús yahā ra tyañu ñi tan cuahán ra.

**Nu quitā tatyī ña vaha tsa
yihí tsi iin rayīi**

(Mr. 1:21-28)

31 Tan cuahán ra Jesús ñuu Capernaum tsa canyī Galilea. Tan jacuahá ra tsi nyivi tsitsi vehe ñuhu tandihī sauru, quivī tuhvá nyivi quitatú. **32** Tan iyo xaan cuñī ñi tsihin tsa cahān ra. Tyin ñihi xaan cahān ra tumaa tuhvá ra cumí tyiñu caahán. **33** Tan iin quivī nyíi ra Jesús vehe ñuhu tan iin ra yihí tatyī ña vaha catyí ra caná tsaa ra jahā tatyī ña vaha can:

34 —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe li Nyoo.

35 Tacan tan nduxaan ra Jesús tsi tatyī ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyivi nduvā ra can nu ñuhu jahā tatyī ña vaha can, tan nduve ca náa javahā nu tsi ra can. Tan quitā nu cuahán nu. **36** Tandihī nyivi tsa nyehe can, iyo xaan cuñī ñi tan yuuhví ñi cuvī. Tan quitsahā tsicā tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyī ña vaha tan ñihi caahán ra, tan quitā tatyī ña vaha ican —catyí ñi.

37 Tacan tan tandihī ñi ityi quitā natuhun nyivi tuhun ra Jesús.

**Nu janduvahā ra Jesús tsi ña
tyiso ra Simón Pedro**

(Mt. 8:14-15; Mr. 1:29-31)

38 Tacan tan quitā ra Jesús tsitsi vehe ñuhu can. Tan cuahán ra vehe ra Simón. Tan nu tsaq ra can, canyí ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña. **39** Tacan tan natuhvā ra nu canyí ña tan nacañī nuu ra jiñi ra tan cahān ra tsihin cahñi can na quita tsi. Tacan tan quitā cahñi can iin yaha ñi, tan nduvitā ña can, quitsahā nanducú ña tsa catsi ra Jesús.

**Nu cuaha xaan nyivi cuuhví
janduvahā ra Jesús**

(Mt. 8:16-17; Mr. 1:32-34)

40 Tan tsa tyiso ñicanyii, tandihī nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahā ra tsi ñi. **41** Tan cuaha xaan nyivi quitā tatyī ña vaha tan canā tsaa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaan ra tsi nahnu tan ña tsahā ra tsa cahan nahnu, tyin tsitó nahnu tyin juvin ra cuví Cristo.

Nu tsicā ra Jesús caḥan ra tuhun Nyoo tandihì ñuu cayucú Galilea

(Mr. 1:35-39)

42 Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaḡ ñi nda nu nyí ra ican. Tan cuñí ñi tsa ña cuhun ca ra.

43 Tacan tan catyí ra Jesús tsihin ñi:

—Ndi cuñí ca tsi jacoto yu tsi nyivi tandihì ca ñuu nácaa tan quihvi Nyoo añima ñi tan cundaca ñaha ra tsi ñi. Tyin yacan cuenda vatsí yu nu ñuhu ñayivi ihya.

44 Tan tacan ñi tsicá ra Jesús caahán ra tuhun Nyoo vehe ñuhu tandihì ñi ñuu tsa cayucú Galilea.

Nu tsahā ra Jesús ndatu tsa cuaha xaan tyaca ñihì ra naha

(Mt 4:18-22; Mr. 1:16-20)

5¹ Iin quivi nyaá ra Jesús yuhu miñi nu cuví Genesaret. Tan tsaḡ cuaha xaan nyivi, tyin cuñí ñi tyaa soho ñi tuhun Nyoo. Tan tihin xaan nyí ra Jesús tyañu ñi. ² Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quitā ra tíñ tyaca. Tan nacatyá ra naha traya. ³ Tacan tan quihvi ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaḡ ra Jesús tsitsi yutun ndoo can. Tan quitsahā caahán ra tsihin nyivi. ⁴ Cuhva tsa ndihì caḥan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tíñ ndo tyaca.

5 Tan nacaḥan ra Simón tan catyí ra:

—Maestro, tsa jahā tyiñu xaan ndi ñiñu maa tan ndi intuhun maa tyaca ña ñihì ndi. Maa tyin tatun maa un catyí, cua jacuhun nyico ndi traya.

6 Cuhva tsa jacuhun nyico ra naha traya ra, tan cuaha xaan tyaca ñihì ra

naha. Ndihi maa traya can quitsahā tyaahnyá tsihin tsa vee tyaca can.

7 Tacan tan jandahā ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaḡ ra can naha ra. Tan jacutū ra naha nduvi taahan yutun ndoo can tsihin tyaca. Tan cuñí nyee yutun ndoo ra naha tsihin tsa tsitú tyaca. ⁸ Tsa nyehe ra Simón Pedro tsa cuví tacan, tan tsicuiñí tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

9 Tyin ra Simón tsihin tandihì ra yucú tsihin ra, nayuhvi xaan ra naha tsa cuenda tsa cuaha xaan tyaca ñihì ra naha. ¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhvi xaan ra naha. Tan ra Jesús catyí ra tsihin ra Simón:

—Ña nayuhvi un, tyin vityin tan nda nu cuahán ca tsi ityi nuu, tumaa tsa tíñ ndo tyaca ihya, tacan cua ñihì un nyivi cua cuví nyivi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tsihin ra Simón.

11 Tacan tan tavā ra naha yutun ndoo can nda nu ñuhu ityi. Tan nacoḡ ra naha tandihì tsa iyó tsi ra naha. Tan cuahán ra naha tsihin ra Jesús.

Nu janduvahā ra Jesús tsi iin ra ndohó cuehe tyaahyú

(Mt 8:1-4; Mr. 1:40-45)

12 Iin quivi nyí ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsicuiñí tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñí un, cuví janduvaha un tsi yu —catyí ra.

13 Tacan tan tyiso ndaha ra Jesús

jiñi ra cuuhví can, tan catyí ra:

—Cuñí yu janduvaha yu tsi un.

Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvaha ra.

14 Tacan tan catyí ra Jesús tsihin ra:

—Coto catyi tuhun un tsihin nyivi.

Intuhun ñi tsa cua cahan yu tsihin un, cyaahan nu nyaá ra cuví jutu.

Tan janaha tsi un tsi ra. Tan cūhva tsa taahán tsi jamañi un tumaa tsa caahán ley tsa tyaa ra Moisés, tan cua cuví tsi iin tsandaa tsi ra jutu can tan tsi nyivi tyin tsa nduvaha un —catyí ra Jesús tsihin ra.

15 Vasu ndi maa tsa ña cuñí ra

Jesús tsa coto nyivi, ñilhi ca quitá tuhun ra. Tan cuaha xaan nyivi ndu iin tyin cuñí ñi tyaa soho ñi tsa caahán ra tan janduvaha ra tsi ñi.

16 Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvaha ra Jesús tsi iin ra xii

(Mt. 9:1-8; Mr. 2:1-12)

17 Iin quivi jacuahá ra Jesús tsi

nyivi. Tan yucú juhva ra fariseo, ra tyaa yahvi xaan ley Nyoo tsa tyaa ra Moisés tsanaha. Tan yucú tucu juhva ra maestro cuenda ley vehe ñuhu ican. Quita ra naha ñuu Jerusalén, tan inga ñuu nyihi taniñ cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyivi cuuhví.

18 Tacan tan tsaá ra naha tan nyisó ra naha iin ra cuuhví tsihin cuehe xii nu tsito. Tan cuñí ra naha quihvi ra naha tsitsi vehe tan caquin ra naha tsi ra cuuhví can nu nyí ra Jesús.

19 Maa tyin ña ñilhi ra naha nu quihvi ra naha tyin tuvi xaan nyivi. Tacan tan ndaa ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nu nyí ra Jesús tyañu nu tuvi nyivi can.

20 Tan nyehé ra Jesús tyin tsinú xaan

iñi ra naha tsi ra. Tan catyí ra tsihin ra cuuhví can:

—Tsa tsicoo tucahnu iñi tsi un, tsa cuenda cuatyí un —catyí ra Jesús tsihin ra can.

21 Tacan tan ra maestro cuenda ley vehe ñuhu tsihin ra cuví fariseo, quitsaha tsicá iñi ra naha: “¿Yóo ra cuví ra ihya? Tsicoo cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoo tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñí ra naha tsicá iñi ra naha.

22 Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

23 ¿Náa tsa yii ca catyí yo? ¿A yii catyí yo: “Cuatyí un tsa yaha ndatsi”, a yii ca catyí yo tsihin iin nyivi xii: “Nduvita tan caa un”? **24** Maa tyin vityin cua janaha yu tsi ndo tyin yuhu Rayii tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

25 Tan nduvita ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo.

26 Tandihñi nyivi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9:9-13; Mr. 2:13-17)

27 Yaha can tan quita ra Jesús vehe can. Tan nanyehé ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyivi. Tan catyí ra Jesús tsihin ra:

—Cohon tsihin yu —catyí ra.

28 Tacan tan nduvita ra Leví. Tan

nacoꝝ ra tandihi tsa iyó tsi ra. Tan cuahán ra tsihin ra Jesús.

29 Tacan tan javahá ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyivi.

30 Tan ra fariseo naha ra tsihin ra cuví maestro cuenda ley vehe ñuhu naha ra, quitsahá caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

31 Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor. 32 Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janahá ra Jesús tyin tatun tsa cuahán ra cua coo nyitya nyivi nyicún tsi ra

(Mt. 9:14-15; Mr. 2:18-20)

33 Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihi quivi tsatsí ra naha tan tsihí ra naha. ¿Nacuvi? —catyí ra naha.

34 Tan nacahan ra Jesús, tan catyí ra:

—¿A cuví coonyitya nyivi yucú vico tindaha jaha ndo tatun nyii ra tsa cua tindaha tsihin ñi? Ña cuví. Tyin sih cuñí ñi, tan cuñí ñi catsí ñi. 35 Maa tyin cua quita quivi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsí tahan tuhun tsahnu tsa iyó nyivi tsihin tuhun tsaa tsa jacuahá ra

(Mt. 9:16-17; Mr. 2:21-22)

36 Tacan tan cahán tucu ra Jesús iin cuhva tsihin nyivi, tan catyí ra:

—Yoñi tsaahnyá iin jahma tsaa, tan naquicú ñi tsihin jahma tuuhu. Tyin tatun javaha ñi tacan, nandiyyi jahma tsaa can. Tan ña ndoo vaha tsi tsihin jahma tuuhu can.

37 Tan tacan tucu, ña cuví tyihi nyivi vinu tsaa tsitsi ñih tsaahnu. Tyin cua tyahnya ñih can tsihin vinu tsaa can. Tan cua tiví vinu can tan tiví ndihi tucu ñih tsaahnu can. 38 Yacan cuenda taahán tsi tyihi yo vinu tsaa tsitsi ñih tsaa. Tyin tacan tan nduvi taahan tsi tan cua jaha cuenda tahan tsi itsi. 39 Tan yoñi tsihí vinu tsahnu, tan cuñí ñi coho ñi vinu tsaa. Tyin catyí ñi, vaha ca vinu tsahnu. Vinu tsahnu can cuñí tsi catyí tyin cuví tsi cuhva iyó maa ñi.

Nu tuhun ra tsicá tsihin ra Jesús yoco itya trigu quivi quitatú nyivi

(Mt. 12:1-8; Mr. 2:23-28)

6¹ Iin quivi quitatú nyivi, yahá ra Jesús mahñu tsa tatsi nyivi. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsi ra naha tsiti can. 2 Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo? 3 Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javahá ra David tan ra cutahán tsihin ra quivi tsa tsisoco ra naha? 4 Quihví ra tsitsi vehe Nyoo. Tan quihñ ra paan tsa tyiso nyivi nuu altar Nyoo. Tan tsatsi ra. Tan tsahá ndihi ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

5 Tacan tan catyí ra Jesús:

—Rayíi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quívi quitatú yo —catyí ra.

Nu janduvahá ra Jesús tsi iin ra na ityí ndaha

(Mt. 12:9-14; Mr. 3:1-6)

6 Inga quívi quitatú nyívi quíhví ra Jesús tsitsi vehe ñuhu. Tan quitsahá jacuahá ra tsi nyívi. Tan nyehe ra tsi iin ra tsa na ityí ndaha cuaha. 7 Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quívi quitatú nyívi, tyin tacan tan cuví tyaa ra naha cuatyí tsi ra Jesús. 8 Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityí ndaha can:

—Nduvita. Cunya nyityi mahñu ra naha ihya.

Tacan tan ra na ityí ndaha can nduvita ra. Tan tsinya nyityi ra mahñu ra naha. 9 Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quívi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyívi, o cahñi ndíhi yo tsi ñi?

10 Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityí ndaha can:

—Cañihi ndaha un.

Tacan tan ra na ityí ndaha ican cañihi ra ndaha ra. Tan nduvahá ndaha ra. 11 Maa tyin ra yucú ican naha ra, cuxaṅa ra naha. Tan quitsahá tsicá tuhun tahan ra naha tsi ra naha:

—¿Nacaa javaha yo tan cuví casí yo nu caahán ra Jesús ihya? —catyí ra naha.

Nu nacatsí ra Jesús tsa utsi uvi taahan ra cua caca tyíñu ra

(Mt. 10:1-4; Mr. 3:13-19)

12 Quívi ican ndaa ra Jesús iin yucu. Tan ñíñu maa tsican tahvi ra tsi Nyoo. 13 Tan tsa tuvi, caná ra tsi tandíhi ra nyicún tsi ra. Tan nacatsí ra utsi uvi taahan ra naha. Tan jacunañi ra tsi ra naha apóstol, tan cuñí tsi catyí tsi “ra tsa tava tyíñu Nyoo”. 14 Tan ihya nyaá sivi tandíhi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; 15 ra Mateo; ra Tomás; ra Jacobo, sehe ra Alfeo; tan ra Simón ra nyanaá cuví ra cuenda partido tsa cuñí cahun cuatyí siqui ñuu Roma tsa ndacá ñaha tsi ñi; 16 tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuahá ra Jesús tsi nyívi cuaha

(Mt. 4:23-25)

17 Tacan tan nuu ra Jesús yucu ican tsihin tsa utsi uvi ra naha. Tan ndu iñ nyívi tsa nyicún tsi ra tsaha yucu can. Tan tsaá cuaha tucu nyívi quee ñuu Jerusalén tsihin tandíhi ca ñuu cayucú Judea, tsihin tucu nyívi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaá ñi tyin tyaa soho ñi tuhun caahán ra Jesús. Tan tandíhi nyívi cuuhví cuñí ñi tsa janduvaha ra tsi ñi. 18 Tan tandíhi nyívi tsa yihí tatyí ña vaha janduvahá ra tsi ñi. 19 Tan tandíhi ñi cuñí ñi tññ ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe cahṅa ra Jesús tsihin nyívi tsa naquihñi ndaahvi ra

(Mt. 5:1-12)

20 Tacan tan nanyehe ra Jesús tsi ra tsicá tsihin ra. Tan catyí ra tsihin ra naha:

—Tandíhi nyoocho tsa ndaahvi, siñ

xaan cua cuñi ndo, tyin taahán tsi cundaca ñaha Nyoo tsi ndo.

21 ⁷Tandíhi nyoooho tsa tsisocó vityin, sîi xaan cua cuñi ndo. Tyin coo quívi ña cua cusoco ca maa ndo. Tan tandíhi nyoooho tsa tsacú tsa cuiihya cuñí ndo, sîi xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sîi cuñi ndo.

22 ⁸Cusîi iñi ndo, quívi ndasi cuñi nyívi nyehe ñi tsi ndo, quívi tava ñi tsi ndo nu iyó ñi, quívi nduxaan ñi tsi ndo, quívi catyí ñi tyin nyívi ña vaha cuví ndo tyin tsinú iñi ndo tsi maa yu tsa cuví yu Rayîi quee nda gloria.

23 ⁹Sîi cuñi ndo quívi can tyin tacan tucu javahá nyívi ñi tahan tsanaha. Cuxaan ñi tsi ra cuví ndusu yuhu Nyoo. Ndava ndo tsihin tsa sîi cuñi ndo. Tyin cahnu xaan ndatu cua ñihi ndo nda gloria.

Tsehe cahan ra Jesús tsihin nyívi ña tsinú iñi tsi ra

24 ¹⁰Maa tyin ndahvi nyoooho, ñi cuca. Tyin vityin sîi xaan cuñí ndo tsihin tandíhi tsa cuca ndo. Maa tyin cua coo quívi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

25 ¹¹Tan ndahvi nyoooho tsa cuñí maa ndo tyin nduve tsa cumañi tsi ndo tsa vityin, tyin coo quívi cua cusoco ndo. Nyoooho tsa sîi cuñí vityin, ndahvi nyoooho, tyin coo quívi cua coo ndo tucuiihya iñi. Tan cua vacu xaan ndo. 26 ¹²Tan ndahvi nyoooho tsa vaha caahán nyívi tuhun ndo. Tyin tacan caa tucu nyívi tsicoq tsanaha, vaha xaan cahan ñi tuhun ra tsa cahan tsa ña nditsa tsihin ñi.

Cuñi ndo tsi nyívi xaan iñi tsi ndo

(Mt. 5:38-48; 7:12)

27 ¹³Tandíhi nyoooho tsa tsiñi tsa caahán yu, catyí yu tsihin ndo tyin: Cuñi ndo tsi nyívi xaan iñi tsi ndo. Javaha ndo tsa vaha tsihin nyívi tsa

ndasi cuñi nyehe tsi ndo. 28 ¹⁴Cahan ndo tsa vaha tsihin nyívi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyívi caahán nyaa tsi ndo. 29 ¹⁵Tatun iin ra cañi iin tsiyo nuu ndo, cûhva ndíhi ndo inga tsiyo, nacañi ndíhi maa ra. Tatun iin ra quinyaá tsaqueta nditsí ndo, cûhva ndíhi ndo camiseta ndo. 30 ¹⁶Cûhva ndo náa ndíhi tsicán nyívi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. 31 ¹⁷Tumaa cuñi ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi.

32 ¹⁸Tatun cuñi ndo tsi maa ñi maa nyívi tsa cuñi tsi ndo, nduve tsa vaha javahá ndo. Tyin tacan icá tucu nyívi quiñi iyó. 33 ¹⁹Tan tatun tsihin nyívi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyívi, nduve tsa vaha icá ndo cuví can, tyin nyívi caquiñi, tacan icá tucu ñi can. 34 ²⁰Tatun javahá ndo tumañi iñi tsi iin nyívi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyívi caquiñi, tacan icá ñi. Tatun náa tumañi iñi javahá ñi tsi nyívi vaha iñi tsi ñi, ndatú ñi tsa nacuhva tucu ñi can tumañi iñi tsi ñi. 35 ²¹Maa tyin nyoooho, cuñi ndo tsi nyívi xaan iñi tsi ndo. Tan javaha ndo tsa vaha tsihin ñi. Tan cûhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuví ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyívi tsa ña nacuhvá tyahvi nyoo tsi ra, tan tsihin nyívi caquiñi. 36 ²²Cû uhvi iñi ndo tsi nyívi, tumaa uhvi cuñi Nyoo Jutu yo nyehé ra tsi yo.

Ña cahan nyaa yo tsi inga nyívi

(Mr. 7:1-5)

37 ²³Ña cahan nyaa ndo tsi nyívi, tacan tan Nyoo ña cua cahan nyaa ra

tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo.

38 Cuhva ndo tsa tsiñi ñuhu tsi nyivi. Tacan tan cua cuhva tucu maa Nyoo tsa tsiñi ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyí ra Jesús.

39 Tan tsahã ra Jesús cuhva ihya tsi ñi, tan catyí ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva. **40** Ndi intuhun ra cutuhvá ña cua cuví coto ra tsa tsitó ra jacuahá tsi ra. Tyin ndi quitsahã cahví ra. Cua coto ra nda ndihi cahví ra.

41 ¿Nacaa tyin nyehé un tsahan luhlu tsa nyíí tinuu yañi un, tan ña jahá un cuenda yutun cahnu tsa nyíí tinuu maa un? **42** Tatun tinuu maa un nyíí iin yutun cahnu, ¿nácaa cua cuví catyi un tsihin ra yañi un: “Ñaha, na tava yu tsahan luhlu tsa nyíí tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyíí tinuu maa un. Tyin tacan tan cuví nyehe vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi

(Mt. 7:17-20; 12:34-35)

43 Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.

44 Tandihí yutun nacotó yo tsi tun tsihin tsítí tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas tsa cuví yucu vixi. **45** Tan tacan tandihí nyivi vaha, vaha caahán ñi, tyin yihí tsa vaha añima ñi. Maa tyin

nyivi ña vaha, maa ñi maa tsa ña vaha caahán ñi tyin yihí tsa caquiñi añima ñi. Tyin tsihin yuhu yo caahán yo tandihí tsa quitá tsitsi añima yo.

Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi

(Mt. 7:24-27)

46 ¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu? **47** Vityin cua catyi yu tsihin ndo yóo ndacú nyoocho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu. **48** Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tahã ra yuu. Tan tyaã ra tyihyo tsaha vehe can tsata yuu can. Tan quivi nduñihí cuún savi, ndutya can tsatyã xaan tsi tsaha vehe, maa tyin vehe can ña taní maa tsi tyin vaha xaan quitã tyihyo tsaha tsi. **49** Maa tyin nyivi tsa tsiñi tsa caahán yu tan ña javahá ñi tsa caahán yu, cuví ñi tumaa iin ra javahã vehe tan ña vaha javahã ra itsi. Tyin nduve tyihyo tsaha tsi javahã ra. Tan quivi tsã savi, tan cuñihí cuún savi, tan yahã ndutya cuaha tsaha vehe can. Tan vehe can, iin yaha ñi taní tsi —tacan catyí ra Jesús.

Nu janduvahã ra Jesús musu iin ra capitán andarú

(Mt. 8:5-13)

7 ¹ Ndiñi cahã ra Jesús tsihin nyivi, tacan tan cuanuhú ra inga tsaha nda ñuu Capernaum. ² Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra. ³ Tan tsa tsitó ra capitán can tuhun ra Jesús, tacan tan tavã tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. ⁴⁻⁵ Tacan tan tsãã ra tsahnu ican naha

ra nu nyíí ra Jesús. Tan quitsaha caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyívi cuví ra tsihin yo tsa cuví yo nyívi Israel. Nda cuanda javahá ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñí ra tyin janduvaha un tsi ra.

6 Tacan tan cuahán ra Jesús tsihin ra naha. Maa tyin tsa ndi cumañi ca tsaa ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaá ra naha nu nyíí ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra. **7** Yacan ña cana iñi ra quitsi ra nu nyíí un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra? **8** Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

9 Tsa tsiñi ra Jesús tsa cahan ra can naha ra, tan iyo xaan cuñí ra. Tan nanyehé ra tsi nyívi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

10 Tacan tan cuanuhu ra vaha iñi tsi ra capitán can naha ra. Tan tsa tsaá ra naha nda yuvehe, tan nyehe ra naha tyin tsa nduvahá musu ra.

Nu janandotó ra Jesús tsi sehe iin ñaha ndaahvi tsihi yii

11 Tsa yaha yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyívi.

12 Tacan tan cuhva tsa cua tsaa ra yatyin ñuu ican, nyehe ra tyin cuaha xaan nyívi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yii. Tan intuhun ñi maa ra cuví sehe ña, tan tsihi ra. **13** Tan tsa nyehe ra Jesús tsi ña, tan cundaahvi iñi ra nyehe ra tsi ña. Tan catyí ra tsihin ña:

—Ña vacu un.

14 Tsahan natuhva ra tan tiin ra tsatun tsa nyíí ndiyi can. Tacan tan ra nyisó tsi ndiyi can naha ra tsiñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

15 Tacan tan nduvita ndiyi can. Tan nacunyaá ra. Tacan tan quitsaha caahán ra. Tan ra Jesús nacuhva cuenda ra tsi ra tsi sihi ra. **16** Tsa nyehe ñi tsa tacan nandoto ra jahá ra Jesús tan yuhví xaan ñi, tan quitsaha jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaá nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

17 Tan tandihi maa nyívi taniñi cahnu Judea, tsito ñi tsa javahá ra Jesús.

Nu jacuhun ra Juan uvi taahan ra tsa tsicá tsihin ra nu nyíí ra Jesús

(Mt. 11:2-19)

18 Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan cana ra Juan tsi uvi taahan ra naha. **19** Tan tava tyiñu ra tsi ra naha na cuhun ra naha nu nyíí ra Jesús, tan ndaca tuhun ra naha tsi ra tatun juvin ra cuví Cristo, ra tsa

cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra. **20** Tacan tan ra tsa jacuhun ra Juan, cuahán ra naha. Tan tsaq̄ ra naha nu nyíí ra Jesús. Tan catyí ra naha:

—Ra Juan, ra jacoondutyá, tavá tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

21 Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yíhí tatyí ña vaha. Tan cuaha tucu nyívi cuaa nanyehe ñi jahá ra. **22** Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan ñacatyí tuhun ndo tsihin ra Juan tandíhi tsa nyehe ndo, tan tandíhi tsa tsiñi ndo. Tan catyí ndo tsihin ra: ra cuaa nanyehe ra, ra coxo nacacá ra, ra ndohó cuehe tyaahyú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin **23** sií xaan cuñí ñi nyicún tsi yu tun ña ndu uví iñi —catyí ra Jesús tsihin ra naha.

24 Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyívi. Tan catyí ra:

—¿Náa nyehe ndo quívi tsahan ndo nuu tsiquí ndíí ican? ¿A nyehe ndo iin ndoo tsa janduvá tatyí? **25** ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey. **26** ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo. **27** Juvín ñi tuhun ra Juan cuví tsa nyaá nuu tutu tsa tyaq̄ ra Isafías tahañ tsanaha. Tan caahán Nyoo tuhun ra tyehen:

Yuhu cua jacuhun yu iin ra cua

cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

28 Tan catyí yu tsihin ndo tyin tsitsi tsa tandíhi ra tsa cacu jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

29 Tandíhi nyívi tan ra tavá xuhun naha ra, tsa tsicoondutyá jahá ra Juan, nacoto ñi tyin cuhva javahá Nyoo, cuiti xaan tsi. **30** Maa tyin tandíhi ra fariseo tsihin ra maestro cuenda ley vehe ñuhu, ña cuñí ra naha tsa jacoondutyá ra Juan tsi ra naha, tyin ña cuñí ra naha quihin ra naha tsa tsahá Nyoo tsi ra naha —catyí ra Jesús. **31** Tan catyí tucu ra:

—¿Náa cua jandu inducu yu tsihin nyooho, nyívi iyó quívi ihya? ¿Yóo caá tumaa caá ndo? **32** Tumaa ra nyihi cuví nyooho. Tyin ra nyihi jasiquí nuyahvi. Tan caná tsa tahan ra naha, tan catyí ra naha: “Tívi ndi tiyoo tan ña tsañi ndo yaa. Tan tsitá ndi yaa cuiihya, tan ña tsacu ndo”. catyí ra nyihi. Tan tacan ñi cuví nyooho tyin ndi intuhun cuhva ña taahán iñi ndo, **33** Tyin ra Juan, ra jacoondutyá, quitsi ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yíhí tsi ra. **34** Tan quitsi tucu yuhu tan cuví yu Rayi tsa quee nda gloria. Tan tsatsí yu tan tsihí yu, Tan nyooho catyí ndo tyin tsatsí xaan yu tan tsihí xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra. **35** Maa tyin catyí yu tsihin ndo tyin tsa tsiñi tuñi Nyoo tsahá ra tsi nyívi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

**Nu nyíí ra Jesús vehe ra Simón
ra cuví fariseo**

36 Iin ra fariseo tsa nañí Simón jacotó ra tsi ra Jesús tyin cuhun ra cucatsi ra nda yuvehe ra. Tan tsaá ra Jesús vehe ra, tan tsicunyaá ra nu mesa. 37 Tacan tan iin ñaha sîi iñi ñuu ican tsitó ña tyin nyíí ra Jesús ican. Tan tsaá ña tsihin iin yutyi yuu xiñu tsitú tsi ndutya tami. 38 Tan tsinyaá ña yatyin ñi tsaha ra. Tan quitsahá tsacú ña tyin ndu uvi iñi ña cuatyí ña. Tan cuún ndutya nuu ña. Tan tsihin ndutya nuu ña nacatyá ña tsaha ra Jesús. Yaha can tan jana ityi ña tsaha ra tsihin ixi jiñi ña. Tan tyayuhú ña tsaha ra. Tacan tan tyoso ña ndutya tami ican tsata tsaha ra. 39 Tsa nyehé ra fariseo can tsa tacan ica ña, tan tsicá iñi ra: “Tatun nditsa tsa Nyoo jaquitsj tsi ra ihya, cua nacoto ra yóo ñaha tñn tsaha ra, tyin ñaha ican, ñaha iyó cuatyí cuví ña.”

40 Tacan tan ra Jesús catyí ra tsihin ra fariseo ican:

—Yoohe Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

41 Tan catyí ra Jesús tyehen tsihin ra:

—Uvi taahan rayiñ nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. 42 Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahá ra tucahnu iñi tsi nduvi taahan ra naha. Tan vityin catyí tsihin yu, yoohe Simón, ¿ndáa ra cua cuñi ca tsi ra tsa tsahá nuu xuhun ican? —catyí ra Jesús.

43 Tacan tan nacahan ra Simón, tan catyí ra:

—Ra tsa cuaha ca jahá ra tucahnu

iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

44 Tacan tan nanyehé ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsahá un ndutya tsa ndoo tsaha yu tumaa cuhva tsa iyó yo. Tan ñaha ihya nacatyá ña tsaha yu tsihin ndutya nuu ña. Tan jana ityi ña tsihin ixi jiñi ña. 45 Yoohe ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu. 46 Tan yoohe ña tyihí un acetye jiñi yu, maa tyin ñaha ihya tyihí ña ndutya tami tsaha yu. 47 Tan catyí yu tsihin un, yoohe Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

48 Tacan tan catyí ra Jesús tsihin ña can:

—Cuatyí un tsa yaha catsiyo, tyin tsa jahá Nyoo tucahnu iñi tsi un —catyí ra Jesús tsihin ña.

49 Tacan tan ra yucú tsihin ra quitsahá tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyivi.”

50 Tacan tan catyí ra Jesús tsihin ñaha ican:

—Cuaahan vityin, tsa cacú un tyin tsinu iñi un tsi yu. Cuaahan tsihin tsa vaha —catyí ra tsihin ña.

Ñiñaha tsa jatyinyeé tsi ra Jesús

8¹ Tsa yaha can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tsihin ra. 2 Tan cuahán tucu juhva ñiñaha tsa janduvahá ra: ñi cuhvi tan ñi yihí

tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvahá ña. ³ Tan cuahán tucu ña Juana, ñasihi ra Chuza, ra cumí tyiñu cuenda ra Herodes, tan ña Susana tsihin tandíhi ca ñiñaha tsa jatyinyeé tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo

(Mt. 13:1-9; Mr. 4:1-9)

⁴ Tan cuaha xaan nyivi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nycú, tan quitsahá caahán ra tsihin ñi tsihin iin cuhva tsahá cuenda ra, tan catyí ra:

⁵ —Quitá iin ra vehe ra. Cuahán ra nu iyó tyiñu jahá ra, tyin cua tatsí ra tsítí trigu nu ñuhu ra. Tan cuhva tsa tatsí ra quitá ra tsítí can, tan cucoyo juhva yuhu ityi. Tan tsáñi nyivi tsata can. Tan quítsi saa tan tsatsí t. ⁶ Tan juhva ca tsítí can cucoyo tyañu yuu. Caná tsítí ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin. ⁷ Tan juhva ca tsítí cucoyo tyañu iñu. Maa tyin quívi caná trigu iin caa ñi tsihin iñu can, iñu can tsahñi tsi trigu can. ⁸ Maa tyin juhva ca tsítí cucoyo nu ñuhu vaha. Tan quívi tsahnú tsi, vaha xaan tsahá tsi tsítí. Tyin tsa iin ñi tsítí ican, cientu tsítí quitá tsihin tsi —catyí ra Jesús.

Tan tsa yahá tsahá ra cuhva can, tan quitsahá caná tsa ra tyin na tyaa soho nyívi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacotó ra Jesús nacuenda jacuahá ra tsi nyivi tsihin cuhva caahán ra tsihin ñi

(Mt. 13:10-17; Mr. 4:10-12)

⁹ Yahá can tan ra tsicá tsihin ra, nducú tuhun ra naha tsi ra náa cuñí tsi catyí cuhva tsa cahán ra tsihin nyívi.

¹⁰ Tacan tan catyí ra tsihin ra naha:

—Tsi nyooho jacotó Nyoo tuhun xeehe, náca ndacá ñaha ra. Maa tyin tandíhi ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñí ñi maa tyin ña cua cutuñi iñi ñi náa tuhun cuví can.

Nu tsahá cuenda ra Jesús cuenda ra tsa tatsí

(Mt. 13:18-23; Mr. 4:13-20)

¹¹ 'Cuhva tsa tsahá yu tsi ñi, cuñí tsi catyí tsi tyehen: tsítí can, tuhun Nyoo cuví tsi. ¹² Tan nu cucoyo tsítí trigu ican yuhu ityi, nyívi tsa tsiñi tuhun Nyoo cuví can. Maa tyin quítsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi. ¹³ Tan nu cucoyo tsítí can tyañu yuu, juvin ñi nyívi tsa tsiñi tuhun Nyoo cuví can. Si xaan naquihin vaha ñi itsi juhva ñi quívi. Maa tyin ña yihí vaha yoho ñi, juhva ñi quívi tsinu iñi ñi, tan quívi tsa quitsahá nyehé ñi tundoho, tan jandíhi ñi tsa tsinú iñi ñi. ¹⁴ Tan nu cucoyo tsítí tyañu iñu, juvin ñi nyívi tsiñi tuhun Nyoo cuví can. Tsiñi ñi tuhun Nyoo maa tyin ña nasamá ñi cuhva iyó ñi. Tyin yihí ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi si ca cuñí ñi tsihin tsa si caá tsa iyó nu ñuhu ñayívi. Tan cuví ñi tumaa cuví yutun tsa ña tsahá tsítí. ¹⁵ Maa tyin nu cucoyo tsítí nu ñuhu vaha, yacan cuví nyívi tsa tsiñi tuhun Nyoo, tan vaha añima ñi tyin tsinú iñi ñi tsihin tani añima ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandíhi tuhun caahán ra.

Nu cahán ra Jesús tyin ña cua tyihi xeehe yo ñuhú tsa jandunditsín Nyoo añima yo coto quinyaa ra itsi

(Mr. 4:21-25)

¹⁶ 'Ndi intuhun yo ña tyaá yo ñuhú tyuma tan tyihí xeehe yo xuu

tsito a inga nu xeehe. Tyaá yo ñuhũ tyuma maa tyin tsaquín nyaa yo can iin nu sucun, tacan tan quihví nyívi tsitsi vehe maa tyin nditsin. **17** Tyin nduve iin tsa nyíi xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. **18** Yacan cuenda tyaá soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaá soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

Nu tsahá cuenda ra Jesús tyin tumaa yañi ra, tan tumaa sihi ra, tacan cuví nyívi tyaá yahvi tuhun Nyoo

(Mt. 12:46-50; Mr. 3:31-35)

19 Tacan tan tsaá sihi ra Jesús tsihin yañi ra nu nyíi ra. Maa tyin ña cuví tsaá ñi tyin tuvi xaan nyívi.

20 Tacan tan jacotó nyívi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

21 Tacan tan nacahan ra Jesús, tan catyí ra:

—Tandíhi maa nyívi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

Nu jacutaxin ra Jesús tatyí ñihi nu miñi

(Mt. 8:23-27; Mr. 4:35-41)

22 Cuví tsi iin quívi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican. **23** Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsahá tyihí tsi ndutya tsitsi yutun ndoo ican. Tan cuñí nyee yutun ndoo

can tyin cuaha xaan ndutya quihví.

24 Tacan tan jandotó ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. **25** Tacan tan catyí ra tsihin ra tsicá tsihin ra:

—¿Nacuvi yuuhví ndo? ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara

(Mt. 8:28-34; Mr. 5:1-20)

26 Tacan tan tsaá ra naha nda Gadara tsa canyí yuhu miñi ityí nuu Galilea tsa canyí inga tsiyo miñi can.

27 Tan quitá ra Jesús tsitsi yutun ndoo ican. Tan ican tsaá iin ra ñuu tsa canyí Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu.

28-29 Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyívi iyó. Ra ican tsaá ra nu nyíi ra Jesús. Tan cuhva tsa nyehe ra can tsi ra Jesús, tsicuiñi tsiti ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí

ña vaha ican tsihin ra Jesús, tyin ra Jesús tavā tyiñu ra tsi nu tsa quita nu tsi ra ndaahvi ican.

30 Tan nducy tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. Cuenda mil nahnu yihí tsi ra. 31 Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuvi maa quita nahnu. 32 Tan tsican nahnu tsi ra Jesús na cuhva ra quihvi nahnu tsitsi quini tsa yucú yuhu miñi ican tsatsi ti naha ti. Tacan tan tsaha ra Jesús ndatu tsa quihvi nahnu tsitsi quini ican naha ti. 33 Tan quita nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinu quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

34 Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahán ra naha cua nacatyí tuhun ra naha tsa cuví can tsihin nyivi nda ñuu. Tan tandihi ñi nyivi tsa nyehe ra naha, tan nacatyí tuhun ra naha tsa cuví ican. 35 Tacan tan tsahan nyivi tsinyehe ñi náa tsa cuví, tan tsa ñi nu nyii ra Jesús. Tan nañihí ñi tsi ra tsa tsa yahā quita tatyí ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jiñi ra. Tan nayuhvi xaan ñi cuví. 36 Tacan tan tandihi ñi tsa nyehe tsa cuví ican, nacatyí tuhun ñi tsihin tandihi ca nyivi nácaa quita tatyí ña vaha tsi ra ndaahvi can, tan nduvahā ra.

37-39 Tacan tan tandihi nyivi iyó Gadara can quitsahā caahán ñi tsihin ra Jesús na cunuhu ra ityi nu quee ra.

Tyin nayuhvi xaan ñi tsa javahā ra tsihin nu tatyí ña vaha ican. Tacan tan ra tsa quita nu tatyí ña vaha can nahnu, cahan ndaahvi ra tsihin ra Jesús, na cuhva ra cuhun ndihi ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihi tsa javahā Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvahā ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihi nyivi ñuu ican nácaa janduvahā ra Jesús tsi ra.

Nu nduvahā ña sehe ra Jairo tan ñaha tsa tñin jahma ra Jesús

(Mt. 9:18-26; Mr. 5:21-43)

40 Quivi tsa tsa ña Jesús inga tsaha tsa tsahan ra inga tsiyo miñi can, cuaha xaan nyivi ndatú tsi ra. Tan sii xaan cuñi ñi tyin tsa ña nyico ra. 41 Tacan tan tsa ña iin ra tsa nañi Jairo, ra cuví ityi nuu vehe ñuhu, tan tsicuiñi tsi ti ra nuu ra Jesús. Tan quitsahā caahán ndaahvi ra tsihin ra na cuhun ra vehe ra. 42 Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi. 43 Tan tsihin nyivi ican cuahán iin ñaha cuuhvi. Tsa iyó utsi uvi cuiya ndohó ña cuehe tsa cuín niñi ña. Tan tsa ndihi maa xuhun ña jana ña tsihin doctor tan ña nduvahā ña. 44 Maa tyin tsa ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuín niñi ña.

45 Tacan tan catyí ra Jesús:

—¿Yóo tñin jahma yu?

Tan tandihi ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

46 Maa tyin ra Jesús catyí ra:

—Tsitó maa yu tyin iyó iin nyivi tñin jahma yu, tyin tuví iñi yu cuahán juhva tunyee iñi tsa iyó tsi yu —catyí ra.

47 Tacan tan ñaha can nyehé ña tyin tsa tsitó ra. Tan quitsahá ñihí ña tsihin tsa yuuhví ña. Tan tsiçuññi tsiti ña nuu ra. Tan nacatyí tuhun ña tsihin ra nacuenta tñin ña jahma ra, tan nácaa nduvahá ña iin yaha ñi ican. Tan tsiñi tandihí nyivi tsa nacatyí tuhun ña. 48 Tacan tan catyí ra Jesús tsihin ña:

—Tsa nduvahá un tyin tsinú iñi un tsi yu. Cuaahan tsihin tsa vaha —catyí ra.

49 Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tsihin ra Jairo:

—Sehe un tsa yahá tsihi ña. Ña cuhva ca un tsihi tsi ra Maestro ihya —catyí ra.

50 Maa tyin tsa tsiñi ra Jesús tsa cahán ra ican, tan catyí ra tsihin ra Jairo:

—Ña nayuhvi un. Tsiñu iñi. Tan ña sehe un cua nduvaha ña —catyí ra.

51 Tan cuhva tsa tsaá ra Jesús vehe ra Jairo, ña tsahá ra quihvi nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyí ñaha luhlu tsa tsihi can. 52 Tan tandihí ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihi ña. Quixí ña —catyí ra.

53 Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña. 54 Tacan tan tñin ra Jesús ndaha ña. Tan tsaá nacahán ra tan catyí ra tsihin ña:

—Nduvita, ñaha luhlu —catyí ra.

55 Tacan tan nandoto ña. Tan iin yaha ñi nduvita ña. Tan catyí ra Jesús: —Cuhva ndo tsa catsi ña.

56 Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuví ican.

Nu tavá ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo
(Mt. 10:5-15; Mr. 6:7-13)

9¹ Caná ra Jesús tsa utsi uvi taahan ra tsicá tsihin ra. Tan tsahá ra tunyee iñi cahnu tsi ra naha tyin cuvi tava ra naha tatyí ña vaha tsi nyivi, tan cuvi janduvaha ra naha tsi nyivi cuuhví.

2 Tan tavá tyiñu ra tsi ra naha na cahan ra naha nácaa ndacá ñaha Nyoo tsi nyivi. Tan tavá tucu ra tyiñu tsi ra naha na janduvaha ra naha tsi nyivi cuuhví. 3 Tan catyí ra tsihin ra naha:

—Nduve tsa cuiso ndo ityi cahun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cahun tsihin ndo. 4 Tan ndáa cuví ñi vehe tsaá ndo, ndo ndo ican nda cuanda quita quivi tsa cahun ndo inga ñuu. 5 Tan nu ña cuñi nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi siqui ñi —catyí ra Jesús tsihin ra naha.

6 Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñi tsi tan cacu ñi. Tan janduvahá ra naha tsi nyivi cuuhví.

**Nu cuñi ra Herodes coto ra yóo ra
cuví ra tsicá nuu caahán tuhun
Nyoo tan janduvahá ra nyivi**

(Mt. 14:1-12; Mr. 6:4-29)

7 Ra Herodes, ra cuví ra ndacá ñaha taníi cahnu Galilea, ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyivi catyí ñi tyin ra Juan nandoto. 8 Tan yihí ñi catyí ñi tyin ra Elías quituvi nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto. 9 Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyivi tuhun catyí ñi tsiñi yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

**Nu tsahá ra Jesús tsa catsi
uhun mil rayii**

(Mt. 14:13-21; Mr. 6:30-44; Jn 6:1-14)

10 Tan cuhva tsa tsahá nyico ra tava tyiñu ra Jesús, tan nacatyí tuhun ra naha tsihin ra Jesús tandihi maa tsa cuví nu tsahan ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañi Betsaida. 11 Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihin cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

12 Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyií yatyin ñi ihya, tyin ihya nduve maa tsa catsi yo iyó —catyí ra naha.

13 Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihí tsa catsi tandihi nyivi ihya. Ndi maa cuhun ndi cujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

14 Tyin vasiqui quitá maa uhun mil rayii yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

15 Tacan tan tsicunyecu tandihi ñi jahá ra naha. 16 Tan quihin ra Jesús uhun taahan paan ican tsihin uvi taahan tyaca ican. Tan nanyehé ndaa ra ityi andivi, tan nacuhvá ra tyahvi nyoo tsi Nyoo tsa cuenda can. Tan tsahnyá sava ra paan tan tyaca ican. Tan tsahá ra tsi ra tsicá tsihin ra, na tsatsa ra naha can tsi nyivi. 17 Tacan tan tandihi ñi tsatsi ñi, tan ndaha vaha iñi ñi. Yahá can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

**Nu catyí ra Pedro tyin ra Jesús cuví
ra Cristo, ra jacacú tsi yo**

(Mt. 16:13-19; Mr. 8:27-29)

18 Iin quivi quitá siin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyivi tuhun yu, yóo ra cuví yu, catyí ñi?

19 Tan nacahan ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyivi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo tahañ tsanaha cuví un —catyí ra naha.

20 Tacan tan nducu tuhun ra Jesús tsi ra naha, tan catyí ra:

—Tan nyooho, ¿yóo ra cuví yuhu,

cuñí maa ndo?

Tan nacahan ra Pedro, tan catyí ra:

—Yooho cuví ra Cristo, ra tsa quee nu nyaá Nyoo.

21 Tan catyí ra Jesús tsihin ra naha tyin ña cahan ra naha can tsihin nyivi.

Nu jacoto ra Jesús nácaa cua cahñi nyivi tsi ra

(Mt. 16:20-28; Mr. 8:30-9:1)

22 Tacan tan catyí ra tsihin ra naha inga tsaha:

—Yuhu Rayi tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyí ra Jesús.

23 Tacan tan catyí ra tsihin ra naha:

—Nyooho tsa cuñi cunycun tsi yu, cahnya iñi ndo tsa cuñi maa ndo javaha ndo, tacan tan cuvi javaha ndo tsa cuñi Nyoo. Ña ndu uvi iñi ndo tsa yihí ndo cuenda yu vasu tandihi quivi nyehé ndo tundoho. Tyin yacan cuví tumaa cruu tsa taahán tsi cuiso ndo tatun cua cunycun ndo tsi yu. 24 Tan nyooho tsa ña cuñi nyehe tundoho tan ña cuñi ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi iyó ndo tsa cuenda yu, cua cacu ndo. 25 Nduve yahvi nyaá cua ñihi ndo tandihi tsa iyó nu ñuhu ñayivi ihya, tun ña cua cacu aña ndo. 26 Tyin tatun cahan nuu ndo tsa xaan cuñi nyivi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsa quivi quitsi yu inga tsaha. Tyin cua quitsi nyico yuhu Rayi tsa quee nda gloria tsihin tsa cahnú cuví yu, tan tsa cahnú cuví Nyoo Jutu yo, tan ángel tsa cuenda ra. 27 Tan tsa nditsa catyí yu tsihin ndo tyin yihí ndo tsa nyecú

ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17:1-8; Mr. 9:2-8)

28 Una quivi yahá tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra. 29 Tan tsa ndi tsicán tahvi ca ra Jesús, tan nasamá cuhva caá nuu ra tan jahma ra. Siñ xaan cuitsin tsi tan xiñu tsi. 30 Tacan tan quituvi uvi taahan ra natuhún tsihin ra, ra Moisés tan ra Elías. 31 Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra. 32 Tan vasu cuñi xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu nyaá ra Jesús tsihin ra nyecú tsihin ra. 33 Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

34 Tan tsa ndi caahán ca ra tan quitsi iin vico siquí ra naha. Tan nayuhvi xaan ra naha tsa quihvi ra naha tsitsi vico ican. 35 Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñi xaan yu tsi ra. Tyaa soho ndo tsa caahán ra —catyí ndusu ican.

36 Tan tsa yahá cahan ndusu ican, tan nanyehé ra naha tyin intuhun ña maa ra Jesús nyaá ican. Tan yofi maa tsihin cahan ra naha tsa nyehé ra naha.

Nu janduvahā ra Jesús tsi iin ra luhlu tsa yihí tatyí ña vaha

(Mt. 17:14-21; Mr. 9:14-29)

37 Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra. 38 Tacan tan cana tsa iin ra cuahan tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi.

Cundaahvi iñi tsi sehe yu. Tyin intuhun ñi maa ra cuví sehe yu.

39 Tan tuhvá tatyí ña vaha quihví tsi ra. Tan tuhvá ra caná tsa jahá nu.

Tan janduvá nu tsi ra ndasava. Tan quitá tiñuu yuhu ra. Quiñi xaan taahan ra jahá nu. Tan ña cuñi maa nu tatyí ña vaha ican jaña nu tsi ra.

40 Tsa cahān yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tava ra naha tsi nu —catyí ra.

41 Tacan tan nacahan ra Jesús tan catyí ra:

—Nyooho, nyivi ña tsinú vaha iñi.

Tan caquiñi ndo. ¿Najava taahan ca quivi cunyaa yu tsihin ndo tan cunye e iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

42 Tan cuhva tsa natuhvā ra luhlu can nu nyaá ra Jesús, tan janduvā nu tatyí ña vaha ican tsi ra ndasava. Maa tyin ra Jesús tava ra tsi nu tatyí ña vaha ican. Tan janduvahā ra tsi ra. Tacan tan nacuhvā cuenda ra tsi ra tsi jutu ra. 43 Tan tandihí nyivi, iyo xaan cuñi ñi tsa cahnu tsa javahā Nyoo nu yucú ñi.

Tsitsi tsa iyo cuñi nyivi tsa javahā ra Jesús, tan catyí ra tsihin ra tsicá tsihin ra:

Nu cahān ra Jesús inga tsaha tyin cua cahñi nyivi tsi ra

(Mt. 17:22-23; Mr. 9:30-32)

44 —Tyāa soho vaha ndo tuhun caahān yu. Tan ña naa iñi ndo. Tyin

Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

45 Maa tyin ra tsicá tsihin ra ña cutuñi iñi ra naha nacuenta cahān ra tacan. Tyin Nyoo ña tsahā ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús nāa cuví tsa caahān ra.

Nu janahā ra Jesús yóo ra tsa cahnu ca cuví nu ndacá ñaha Nyoo

(Mt. 18:1-5; Mr. 9:33-37)

46 Tacan tan ra tsicá tsihin ra quitsahā caahān yuhu tahan ra naha, ndāa ra cahnu ca cuví tsitsi tsa utsi uvi taahan ra naha. 47 Tan tsitó ra Jesús tsa tsicá iñi ra naha, tan quihin ra iin ra luhlu. 48 Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsj tsi yu, naquihín cuenda ndo. Tyin nu yucú ndo, ra tsa ña cahnu cuví, juven ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juven ñi ican jatyinyeé tsi yo

(Mr. 9:38-40)

49 Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahān ra sivi un tan tavá ra tatyí ña vaha. Maa tyin ña tsahā ca ndi javaha ra tacan. Tyin ñavin tsihin yo tsicá ra —catyí ra.

50 Tacan tan catyí ra Jesús tsihin ra:

—Ña casí ndo tsi ra. Tyin ra ican, ñavin ra xaan iñi tsi yo cuví ra, juven ra cutahān tsihin yo cuví ra —catyí ra.

Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

51 Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihin ra ityi tan cuahán ra ñuu Jerusalén.

52 Tan tavá tyiñu ra na cahun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. 53 Maa tyin nyivi Samaria ican, ña cuñi ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñi ñi nyehe ñi tsi nyivi ñuu Jerusalén. 54 Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñi un tsa ica yo tumaa icá ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñi ñi tsa ndoo yo ñuu ñi —catyí ra naha.

55 Tacan tan nyehe ra Jesús nuu ra naha. Tan cuxaan ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñi iñi ndo náa tyiñu vatsí yuhu. 56 Tyin Rayi tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Nyivi tsa cuñi quihvi cuenda ra Jesús
(Mt. 8:19-22)

57 Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñi yu cunyicun yu tsi un. Tan cahun yu tsihin un tandihi ñi ityi cahun un —catyí ra.

58 Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayi tsa quee nda gloria ndi nu cava

jiñi ra tan nduve iyó —catyí ra tsihin ra ican.

59 Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cūatu nuu tsi yu, na cahun jihna yu cucutsi yu tsi jutu yu —catyí ra.

60 Tacan tan ra Jesús nacahan ra tan catyí ra tsihin ra:

—Nacoo tsi nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cūaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

61 Tacan tan catyí inga ra tsihin ra Jesús:

—Cuñi yu cunyicun yu tsi un, tata. Maa tyin cūhva na cahun jihna yu cucahan yu tsihin nyivi vehe yu —catyí ra.

62 Tan ra Jesús catyí ra tsihin ra:

—Tumaa iin ra tahvi ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñi nyico ra tsa tsa nacoo ra, ña cuví cuhva ra tsi ra cundaca ñaha Nyoo —catyí ra Jesús tsihin ra.

Nu tavá ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

10 ¹ Tsa yaha can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cahun ra Jesús. ² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan

ndo tuhun Nyoo tsihin nyivi. **3** Tan cyaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuví quití xaan. Tyin lobo tuhvá tì tsahñí tsi mbee. Tan tacan tucu cua cuñi nyivi cahñi ñi tsi ndo. **4** Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cuhva ndo nacumi tsi ñi tan ña cucuiñi ndo natuhun ndo tsihin ñi. **5** Cuhva tsa quihvi ndo tsitsi vehe iin nyivi, cahan ndo tsihin ñi. Tan catyi ndo, na coo tsa vaha añima ñi. **6** Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yofiñi ñi vaha añima, ña cua ndoo tsa vaha tsihin ñi. **7** Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsa quivi tsa cahun ndo inga ñuu. **8** Tan nu tsa ndo iin ñuu tan vaha cahan ñi tsihin ndo, catsi ndo tandihí tsa cuhva ñi catsi ndo. **9** Tan janduvaha ndo tsi ñi cuuhví ñuu ican. Tan catyi ndo tsihin ñi: “Tsa nyanaá yatyin Nyoo, ra cuñí quihvi añima ndo cundaca ñaha ra tsi ndo.” **10** Maa tyin tatun tsa ndo iin ñuu tan ña cuñí nyivi tyaa soho ñi tsa caahán ndo, quita ndo ityi cahnu. Tan catyi ndo tsihin ñi: **11** “Nda cuanda nyaca ñuhu ñuu ndo tsa iñí tsaha ndi, tan cua naquisi ndi. Tyin cuñí tsi catyi tyin cuatyí ndo ndoó can siquí ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñí tsi tsa cundaca ñaha ra tsi ndo.” Tacan catyi ndo tsihin ñi —catyí ra Jesús tsihin ra tsa uñi xico utsi can naha ra.

12 Tan catyí tucu ra tsihin ra naha: —Quivi cua tatsi tuñi Nyoo tsi

nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoq tahañ tsanaha ñuu Sodoma, —catyí ra Jesús.

Nyivi ña tyaá soho tuhun caahán ra Jesús cua nyehe ñi tundoho

(Mt. 11:20-24)

13 Tan catyí ra Jesús:

—¡Ndahvi nyooho, nyivi ñuu Corazin! Tan ¡ndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyivi ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihaya iñi tan cunyecu ñi nu nyaa: tsa ndu uvi iñi ñi cuatyí ñi cuví can. **14** Yacan cuenda, nyooho nyivi ñuu Corazin tsihin ñuu Betsaida, ñihí ca cua tatsi tuñi Nyoo tsi ndo tan ñavin ca nyivi ñuu Tiro tan nyivi ñuu Sidón can.

15 Tan nyooho nyivi ñuu Capernaum, cuñí maa ndo tyin cundaa ndo nda cuanda andivi. Maa tyin cua nuu ndo nda cuanda nu yucú ndiyi anyaya, tyin ña tyaá yahvi ndo tuhun Nyoo —catyí ra Jesús.

16 Tan catyí ra tsihin tsa uñi xico utsi taahan ra can naha ra:

—Nyivi tsa tyaá soho tsa caahán nyooho, tsa caahán yuhu tyaá soho ñi. Tan nyivi ña tyaá soho tsa caahán nyooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

Nu tsaq nyico tsa uñi xico utsi ra tsa tsahañ tsicahañ tuhun Nyoo

17 Ihya cuví nu tsaq nyico tsa uñi xico utsi ra tsa tsahañ tsicahañ tuhun Nyoo tsihin nyivi. Tan si xaan cuñí ra naha. Tan catyí ra naha tsihin ra Jesús:

—Jutu Mañi nyuhu, nda cuanda

nu tatyí ña vaha tan tyaá yahví nahnu tsa cahān ndi tsihin sivi un —catyí ra naha.

18 Tacan tan catyí ra Jesús tsihin ra naha:

—Tacan tyin yuhu nyehē yu andivi nu canacavā nu ña vaha, nu nañi Satanás. Tumaa cañi iin tatsa savi, tacan canacavā nu. 19 Tan maa yuhu, tsahā tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo. 20 Maa tyin ña cusñi xaan iñi ndo tyin cuví tava ndo tatyí ña vaha ican. Cusñi ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa siñ cuñi ra tyin janahá Nyoo tsa vaha tsi nyivi ndaahvi
(Mt. 11:25-27; 13:16-17)

21 Tacan tan siñ xaan cuñi ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andivi tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyí ra Jesús.

22 Tan catyí ra Jesús tsihin tandihí ra naha:

—Tandihí maa tsahā Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñi Sehe Nyoo jacoto ra tsi ñi —catyí ra Jesús.

23 Tacan tan nanyehē ra nu nyecú ra tsicá tsihin ra. Tan caahán xeehe ra tsihin ra naha:

—Siñ xaan cuñi nyooho tan nyivi tsa iyó vityin tyin nyehé ndo tsa

javahá yu. 24 Tyin cuaha xaan rey tan ra cuví ndusu yuhu Nyoo tahān tsanaha, cuñi ra naha nyehe ra naha tsa nyehé nyooho vityin. Maa tyin ña nyehē ra naha. Tan cuñi ra naha tyaa soho ra naha tsa tsiñi nyooho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

Nu jacuahā ra Jesús tsi yo tyin taahán tsi jatyinyee yo tsi tandihí ñi maa nyivi

25 Tacan tan tsaa iin ra maestro cuenda ley vehe ñuhu. Tan quitsahā tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayivi nyito tsa ña cua naa maa?

26 Tacan tan nacahān ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

27 Tacan tan nacahān ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñi añima yo tan tsihin tandihí cuhva tsicá iñi yo, tan tsihin tandihí tunyee iñi tsa iyó tsi yo, tan tsihin tandihí tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

28 Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

29 Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

30 Tacan tan nacahān ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahān ra tsi nu ñasuhu nahnu. Tan suhū nahnu tandihí maa tsa nyisó ra, nda cuanda jahma ra. Tan cañi nahnu tsi ra nda

cuanda tsaqujn taxin ña nahnu tsi ra. Tan nacoq ihñi nahnu tsi ra ican.

31 Tacan tan yaha iin ra cuví jutu ityi can. Maa tyin tsa nyehe ra tsi ra canyií ican, ndasava ñi yaha tsiyo ra.

32 Tacan tan yaha tucu iin ra yihí cuenda vehe ñuhu, ra cuví tata ra Leví. Maa tyin tsa nyehe ra tsi ra canyií ican, juvin ñi ndasava yaha ra.

33 Tacan tucu iin ra Samaria yaha ra juvin ñi ityi can. Tan nyehe ra tsi ra canyií ican, tan quitsi tsa ndaahvi cuñí ra nyehé ra tsi ra. 34 Tan natuhva ra nu canyií ra, tan quitsaha tyaá ra numerí tsi ra, tyihí ra acetye tsihin vinu nu uhvi can. Tan tyaq ra iin jahma vita nu uhvi can. Yaha can tan jandaq ra tsi ra tsata burru jana ra, tan quihñ ra tsi ra, cuahán tsihin ra nu nyaá iin vehe. Tan jahq cuenda ra tsi ra. 35 Tan tsa inga quivi tsa cuñí cuhun ra Samaria. Tan tava ra uvi taahan xuhun. Tan tsaqa ra tsi ra jatsii vehe can. Tan catyí ra tsihin ra:

“Jaha cuenda vaha tsi ra ihya. Tan cuhva tsa catsi ra. Tan jata un numerí tsi ra na nduvaha ñi ra. Tatun cuñí ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

36 Nu ndihí nacatyí tuhun ra Jesús, tan nducu tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaq ndaha nu ñasuhu nahnu? —catyí ra Jesús.

37 Tacan tan catyí ra maestro ican: —Ra tsa cundaahvi iñi tsi ra —catyí ra.

Tacan tan catyí ra Jesús:

—Cuaahan tan ica tucu yooho tacan tsihin nyivi tsa nyehé tundoho —catyí ra.

Nu tsinyaq ra Jesús vehe ña Marta tsihin ña María

38 Tan quihñ ra Jesús ityi cuahán ra. Tan tsaq ra iin ñuu. Tan ican iyó

iin ñaha tsa nañí Marta. Tan tsaq ra vehe ña. Tan tsaqa ña quihvi ra tsitsi vehe ña. 39 Tan ña Marta, iyó iin tahan ña nañí María. Tan ña María tsicunyaq ña yatyin ñi tsaha ra Jesús, tyin tyaa soho ña tsa caahán ra.

40 Tan ña Marta cuaha xaan tyiñu javahá ña. Tan tsaq ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacoq ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catyí ña tsihin ra.

41 Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñí un tsihin tyiñu can. 42 Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

Nu jacuahq ra Jesús tsi ra tsicá tsihin ra nácaa ndacan tahvi ra naha tsi Nyoo
(Mt. 6:9-15; 7:7-11)

11 ¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janaha ra Juan tsi ra tsicá tsihin ra —catyí ra.

² Tacan tan catyí ra Jesús tsihin ra: —Cua cuhva yu cuhva tsi ndo nácaa. Tyehen ndacan tahvi ndo, catyi ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihí cuhva cuñí maa un, tumaa cuhva cuví nda gloria.

³ Cuhva tsa catsi ndi tan yaha ndi iin iin quivi.

4 Jaha tucahnu iñi tsi ndi tsa cuenda cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan j̄acacu tsi ndi tan ña cua cunyeer nu ña vaha tsihin ndi.

Tacan nd̄acan tahvi ndo —catyí ra Jesús.

5 Tan catyí tucu ra:

—Na catyí yo tyin iin nyoooho iyó iin ra vaha iñi tsi ndo, tan tsā ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu. 6 Tyin iin ra vaha iñi tsi yu ndi tsā ra yuvehe yu. Tan cañi xaan quee ra. Tan nduve tsa cuhva yu catsi ra.” 7 Tan nyoooho cua nacahan ndo tan catyí ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan cuhva yu tsa cuhva yu tsi un tsa vityin.” Tacan cua catyí ndo tsihin ra. 8 Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo. 9 Tan tacan tucu nyoooho tsihin Nyoo, nd̄acan ndo tsi ra. Tan cua cuhva ra tsi ndo. N̄anducu ndo tan cua ñihi ndo. J̄andatsan ndo yuvehe tan cua nuña. 10 Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

11 Tacan tucu nyoooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca.

12 Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi. 13 Nyoooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí li ra cunyaa añima ndo tun ndacan ndo tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo

(Mt. 12:22-30; Mr. 3:20-27)

14 Ra Jesús tavá ra tatyí ña vaha tsa janduñih̄i tsi iin rayi. Tsa quita nu tatyí can tsi ra can, cuví nacahan ra. Tacan tan iyo xaan cuñi nyivi tsa nyehe ñi tsa cuví. 15 Tan yih̄i ñi catyí ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandih̄i tatyí ña vaha —catyí ñi.

16 Tan yih̄i ñi cuñi ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi. 17 Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundih̄i tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tiv̄i nu yucú ñi. 18 Tan tacan tucu nu ña vaha, tatun natahvi nahnu, cua cundih̄i tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. 19 Maa tyin tun tsatyin tavá yu tsi nahnu tumaa cuhva catyí ndo, nd̄aca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyoooho soho xaan tsicá iñi ndo. 20 Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñi tsi catyí

yacan tyin nditsa tyin Nyoo, ra taahán tsi cundaca ñaha tsi nyivi, tsa tsaꞗ ra nu yucú ndo.

Nu jacuahꞗ ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

21 "Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu. 22 Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

23 Nyivi ña jahá tyiñu tsihin yu, jatíví ñi tyiñu jahá yu. Tan tatun ña caahán ñi tuhun Nyoo tsihin nyivi, tyin cunyicun ñi tsi yu; cuñí tsi catyi tsi tyin ña tsahá ñi tsa cunyicun nyivi tsi yu.

Nu jacuahꞗ ra Jesús tsi yo nácaa quihví tatyí ña vaha tsi yo inga tsaha tatun naa iñi yo

24 "Tatun iin nu tatyí ña vaha quita nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: "Cunuhu nyico yu nda vehe yu nu quee yu." 25 Tacan tan tsaꞗ nyico nu añima nu quee nu. Tan nyehé nu tyin ndíi xaan tan sñi xaan caá. 26 Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihví tandíhi nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyivi tsa nditsa iyó vaha ñi nu ñuhu ñayivi

27 Tsitsi tsa ndi caahán ca ra Jesús yacan, tan canꞗ tsaꞗ iin ñaha tsa nyí mahñu nyivi ican. Tan catyí ña:

—¡Náa tsa sñi cuñí ñaha tsa jacacu tsi un, ñaha tsa jacaxin tsi un! —catyí ña.

28 Maa tyin ra Jesús catyí ra:

—Sñi xaan ca cuñi nyivi tsa tsiñí tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyo cuñí ñi nyehe ñi

(Mt. 12:38-42; Mr. 8:12)

29 Tacan tan tsaꞗ ca nyivi nu nyíi ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahꞗ Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi.

30 Tumaa tsa janahꞗ ra Jonás tsi nyivi ñuu Nínive tahꞗn tsanaha tyin ii Nyoo, tacan tucu yuhu, Rayíi tsa quee nda gloria, janahá yu tsi nyivi tsa iyó vityin tyin ii Nyoo. 31 Quiví cua tatsi tuñi Nyoo tsi nyivi, cua nandoto ñaha cuví reina ityi sur tahꞗn tsanaha, tan cua catyí ña tyin cahun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cahꞗn ra Salomón. Tan vityin cahnu ca cuví ra nyaá tsihin ndo tan ñavin ca ra Salomón.

32 Tan quiví cua cutuñi tandíhi nyivi, cua nandoto nyivi tsicoꞗ ñuu Nínive tahꞗn tsanaha, tan cua catyí ñi tyin nyooho nyivi tsa iyó vityin cahun ndo anyaya, tyin nyivi Nínive ican, nasama ñi kuhva iyó ñi quiví cahꞗn ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janahꞗ ra Jesús tyin na jaha yo cuenda añima yo na coo tsa nditsin jahá Nyoo

(Mt. 5:15; 6:22-23)

33 'Ndi intuhun ndo tan ña tuhvá ndo tyaá ñuhu tyuma tan tyihí xeehe ndo can, a tinyí ndo can tsitsi iin caja. Tyin ñuhu can taahán tsi cunyi can nu sucun. Tyin tatun quihví nyivi

tsitsi vehe ndo, nditsin. **34** Tinuu yo, iin ñuhu nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatum iyó tsa nditsin jahá Nyoo añima yo, vaha nyivi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo. **35** Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa. **36** Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi tanií cahnu ndo. Tumaa tsa nyaá iin ñuhu tyuma jandunditsín tsi tanií cahnu ndo cuví can —catyí ra Jesús.

Nu cuxaḡan ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23:1-36; Mr. 12:38-40; Lc. 20:45-47)

37 Tsa ndihí cahḡan ra Jesús tsihin nyivi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaḡ ra Jesús vehe ra. Tan quihvḡ ra tsi cunyaḡ ra nu mesa.

38 Tacan tan ra fariseo ican iyo cuñí ra tyin ña nacatyḡ ra Jesús ndaha ra tsa ndi cumañi ca catsi ra, tumaa cuhva iyó maa ra naha. **39** Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñí nyivi tyin vaha ndo. Maa tyin xeehe ñi suhú ndo tan javahá ndo tsa ña vaha. **40** Ndava xaan iñi ndo. ¿A ña tsitó ndo tyin ra tsa javahḡ ityi tsata ndo, juvin ñi maa ra javahḡ ityi tsitsi ndo? **41** Taahán tsi javaha ndo tumañi iñi tsi nyivi ndaahvi, tan jatyinyee ndo tsi ñi tsihin tanií añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

42 ¡Ndahvi nyooho ra fariseo! tyin

nyooho, cahví ndo ndaha menta tan ndaha lura tan náa ndihi ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñí ra, tan ña jandihí ndo tsa cuhva ndo diezmo can. **43** ¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaá yahvi nyivi tsi ndo nuyahvi. **44** ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyií. Tyin tsañi nyivi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyií nu nyii ndiyi ican. Cuñí maa nyivi tyin vaha ndo, tan ña tsitó ñi tyin ña vaha añima ndo —catyí ra Jesús.

45 Tacan tan nacahḡan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nya ndihi un tsi ndi —catyí ra.

46 Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahḡ Nyoo tahḡan tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyivi can, tan maa ndo ndi luxu ña jatyinyee ndo tsi ñi. **47** ¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsahñi ra cuví tsi tsaahnu ndo tahḡan tsanaha. **48** Yacan cuñí tsi catyi tyin ndoó ndo vaha tsa javahḡ tsi tsaahnu ndo naha ra. Tyin tsi tsaahnu ndo tsahñi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha.

49 Yacan cuenda catyí Nyoo tahañ tsanaha tsihin tsa tsiñi tuñi ra tyin cua jaquitsi ra tsi ra cua cuvi ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. 50 Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandiñi ra cuvi ndusu yuhu ra tsa tsahñi tsi tsaahnu ndo naha ra nda cuanda tsinu ñuhu ñayivi tan nda cuanda vityin. 51 Nda cuanda niñi ra Abel tsa tsatí tsa tsahñi ra Caín yañi ra tsi ra, tan nda cuanda niñi ra Zacarías tsa tsahñi nyivi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyivi tsa iyó vityin tsa catyí cuatyí nyivi tsa tsicoo tahañ tsanaha. 52 ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyivi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihví inga nyivi tsa cuñi quihví —catyí ra Jesús.

53 Ndiñi cahañ ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaañ xaan ra naha tan quitsaha nducú tuhun xaan ra naha tsi ra Jesús. 54 Tyin cuñi ra naha tsa cahan ra Jesús iin tsa ña vaha, tyin tacan tan cuvi tyaa ra naha cuatyí tsi ra.

Nu jacuahá ra Jesús tyin ña cuvi tyihi xeehe yo cuatyí yo

12 1 Cuenda mil nyivi ndu iin nda cuenda catyihí tahañ ña ñi, tyin cuaha xaan ñi. Tacan tan ra Jesús cahañ jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra

naha tyin vaha ra. Maa tyin ña cuvi tyihi xeehe ra naha cuatyí ra naha.

2 Tyin nduve iin tsa yihí xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyivi. 3 Yacan cuenda, náa ndiñi tsa caahán ndo nu xeehe, cua quita tsi nu nditsin. Tan náa ndiñi tsa caahán ndo tsitsi vehe ndo, cua cana tsa nyivi jiñi vehe.

¿Yóo taahán tsi nayuhvi yo, a tsi nyivi a tsi Nyoo?

(Mt. 10:28-31)

4 Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuví javaha nu tsi yo. 5 Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

6 Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti. 7 Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

Na ña nayuhvi yo cahan yo tuhun ra Jesucristo tsihin nyivi

(Mt. 10:32-33; 12:32; 10:19-20)

8 Catyí yu tsihin ndo tyin tandiñi nyooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayií nda gloria quee yu. 9 Maa tyin nyooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo. 10 Tan vasu cuxaan nyivi tsi yuhu, Rayií tsa quee

nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí li Nyoo ña cua coo tucahnu iñi tsi ñi cuenda yacan.

11 'Quiyi tsa cua cundaca nyivi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo.

12 Tyin cuhva tsa cua nacahan ndo, cua cuhva maa Tatyí li Nyoo náa tuhun taahán tsi cahan ndo —catyí ra Jesús.

Nu tsaḥa cuenda ra Jesús tyin ña taahán tsi nyiyo iñi yo tsa cuca

13 Iin ra tsa nyí tsihin nyivi cuaha tsa ndu iin nu nyí ra Jesús, catyí ra tsihin ra Jesús:

—Maestro, caḥan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

14 Tacan tan catyí ra Jesús tsihin ra:

—¿Tsa, yóo tsaḥa tsi yu tsa cuví yu juez tan natahvi yu ndaha tyiñu ndo? —catyí ra.

15 Tan yaha can tan catyí ra nuu nyivi cuaha can:

—Jaha xaan ndo cuenda tan ña nyiyo xaan iñi ndo tyin ña tsiñi ñuhu tsa coo cuaha ndaha tyiñu yo tan coonyito yo.

16 Tacan tan tsaḥa cuenda ra Jesús iin cuhva tsi tandiḥi nyivi, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jaha tyiñu ra. 17 Tacan tan tsicá iñi ra: “¿Nacaa javaha yu? Nduve nu quiḥi tandiḥi ndaha tyiñu ihya.” 18 Tan catyí ra: “Tsa tsitó yu nácaa cua javaha yu. Cua caní yu tandiḥi yaca nyihi yu, tan cua javaha yu tsa nahnu ca, tan natyihi yu tandiḥi ndaha tyiñu can tsihin tandiḥi ca tsa iyó tsi yu tsitsi can. 19 Tacan tan cua catyí yu tsihin yu: Cuaha xaan ndaha tyiñu naquihin vaha un, tan vityin cuahán maa cuiya, quitatu, caṭsi vaha, coho vaha, tan cusii iñi.” 20 Tan Nyoo catyí ra tsihin ra can: “Ra soho, tsacuaa vityin

cua cúu un, tan tsa naquihin vaha un ¿Yóo tsii cua cuví yacan?” catyí Nyoo tsihin ra can. 21 Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndiḥi tsa tsiñi ñuhu tsi yo

(Mt. 6:25-34)

22 Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihí ndo tsa catsi ndo, tan ndi jahma tsa cunditsi ndo. 23 Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo. 24 Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsaḥa ra tsa catsi ti. Tan nuu Nyoo nyaá yahvi ca nyooho tan ñavin ca saa. 25 Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. 26 Tatun ndi luxu can tan ña cuví jahá ndo, ¿nacuenta tsa tsicá xaan iñi ndo tandiḥi ca tsa tsiñi ñuhu tsi ndo?

27 'Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandiḥi tsa cuca ra tan ña sii caá tsa tsinditsi ra tumaa tsa jacunditsi Nyoo tsi yutun ita ican. 28 Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. 29 Ña caca xaan iñi ndo tuhun tsa catsi ndo tan tsa coho ndo. 30 Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñi ñuhu tsi ndo. 31 Vaha ca tsa

nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihi tsa tsiñi ñuhu tsi ndo.

Tsa vaha tsa iyó gloria

(Mt. 6:19-21)

32 'Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra. 33 Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihi tsa vaha. Tyin yoñi yóo jativí can ndacan, ndi nu ñasuhu, tan ndi quití. 34 Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihi añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

35 'Cuatu vaha ndo tsi yu tsihin ñuhu nditsin Nyoo quivi quitsi yu inga tsaha. 36 Tan cūvi ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra. 37-38 Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. 39 Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ican tsitsi vehe ra. 40 Tan tacan cuví tucu nyooho, cuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

Musu vaha tan musu ña vaha

(Mt. 24:45-51)

41 Tacan tan quitsaha nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihi nyivi?

42 Tacan tan nacahan ra Jesús, tan catyí ra tsihin ra:

—Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihi ca musu ican. 43 Tan sii xaan cuñi musu ican tatun cuhva tsa jahá tyiñu ra, tan cua tsaa tsitoho ra. Tyin tyaá yahvi ra tandihi tsa taahán tsi ica ra. 44 Tan catyí yu tsihin ndo tyin tsa nditsa. Tyin tsitoho ra cua nacuhva ra tandihi tsa cumí ra, cua quihvi ndaha ra. Tyin vaha tyaá yahvi ra tsihin tyiñu jahá ra. 45 Maa tyin tatun tsicá iñi musu ican tyin naha xaan cuahán tsitoho ra, tan quitsaha cañi ra tsi inga musu tsa cutahán tsihin ra tan ñiñaha jahá tyiñu ican, tan ña cuñi ra jaha tyiñu ra. Tyiñu tsatsí ñi tan tyiñu tsiñi nyixi ñi iyó ra. 46 Tacan tan sana iñi ra cua tsaa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñu iñi tsa caahán ra.

47 'Tan iin musu tsa tsitó nácaa iyó tsitoho ra tan ña javahá ra cuhva cuñi tsitoho ra, cuaha xaan tundoho cua nyehe ra. 48 Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitō ra can, tan javaha ra. Tatun iin musu tan cuaha tsa tsaha tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

Nu cahān ra Jesús tyin tsacatyí ra cua cañi tahan nyívi tsihin nyívi ñi

(Mt. 10:34-36)

49 Tumaa tsa jatahán yu ñuhu nu ñuhu ñayívi, tacan cuví tyiñu vatsí yu. ¡Tan cuñí xaan yu tsa nacayu catyin ña ñuhu ihya! 50 Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndíhi tyiñu jahá yu. 51 Cuñí maa ndo tyin tsa vatsí cuhva yu tsa taxin coo ndo nu ñuhu ñayívi ihya. Maa tyin yuhu vatsí yu tyin jasiñ yu tsi ndo. 52 Tyin tsa vityin tan ityi nuu ca, uhun taahan nyívi iin vehe ñi cua cusíñ ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi. 53 Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe síhi cua cañi tahan ña tsihin sehe síhi ña. Tan ña cuví sehe síhi can cua cañi tahan ña tsihin síhi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahān ra Jesús tsihin nyívi tyin ña nacotó ñi tyin tsa tsaa Sehe Nyoo nu yucú ñi

(Mt. 16:1-4; Mr. 8:11-13)

54 Catyí tucu ra Jesús tsihin nyívi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví. 55 Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo. 56 Nyooho jahá ndo tsa tsitó xaan ndo, tan nacotó ndo tandíhi tsa cuví andívi, tan tandíhi tsa cuví nu ñuhu ñayívi ihya. Tan ¿nacuenda tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya

(Mt. 5:25-26)

57 ¿Nacuenda ña jahá ndo cuenda, ndáa tsa vaha tan ndáa tsa ña vaha?

58 Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa. 59 Tatun tacan cua cuví, catyí yu tsihin ndo tyin ña cua quita ndo nda cuanda tyahvi ndo tandíhi tsa taahán tsi tyahvi ndo —catyí ra Jesús.

Cuñí tsi tsa nasama yo cuhva iyó yo, tun ña cuñí yo cuhun yo anyaya

13 1 Tacan tan juven ñi quivi can nyecu juhva ra naha. Tan quitsahā nacatyí tuhun ra naha tsihin ra Jesús tsa javahā ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacā nuu niñi ra ican naha ra tsihin niñi quiti tsa tsijamañi ra ican naha ra. 2 Tan nacahān ra Jesús tan catyí ra tsihin ra naha:

—¿A tsicá iñi nyooho tyin cahnu xaan ca cuatyí ra Galilea ican naha ra tan ñavin ca tandíhi ca ra ñuu ra naha, tan yacan tsihi ra naha?

3 Ñavin. Tyin tatun nyooho tan ña nasama ndo cuhva iyó ndo, tacan cua cunaa ndo. 4 Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñí maa ndo? 5 Ñavin. Tyin tatun nyooho tan ña nasama ndo cuhva iyó ndo, cua cunaa ndo.

Nu tsaḥa cuenda ra Jesús iin cuhva nácaa ndatú Nyoo tsa nasama yo cuhva iyó yo

6 Tacan tan tsaḥa cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaa tun nu ñuhu ra. Tan tsaḥan ra tsinyehē ra tatun iñi tsiti tun. Tan nyehe ra tyin nduve. 7 Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsaḥá tun”, catyí ra. 8 Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú. 9 Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvaha ra Jesús tsi iin ñaha tihí tsata

10 Iin quivi tsa quitatú nyivi, jacuahá ra Jesús tsi nyivi tsitsi vehe ñuhu. 11 Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña. 12 Tacan tan nyehe ra Jesús tsi ña. Tan cana ra tsi ña. Tan quitsaha caahán ra tsihin ña, tan catyí ra:

—Tsa nduvaha un. Nduve ca cuehe ndohó un —catyí ra tsihin ña.

13 Tacan tan tyisó ra ndaha ra jiñi ña. Tan iin yaha ñi tan ndundoḡ ña. Tacan tan quitsaha jacahnú ña tsi Nyoo. 14 Maa tyin ra cuví ityi nuu vehe ñuhu, cuxaan xaan ra tsi ra. Tyin quivi quitatú janduvaha ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuví ndo numerí. Tan ña quitsi ndo

quivi quitatú yo —catyí ra.

15 Tacan tan Jutu Mañi yo Jesús catyí ra tsihin ra:

—Nyooḥo tsa jahá ndo tyin vaha ndo. ¿A ña ndatsi tucu nyooḥo quiti jana ndo tan jacohó ndo ndutya tsi ti quivi quitatú yo? 16 Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

17 Tacan tan cuhva tsa caḥan ra Jesús yacan, tandihi maa nu xaan iñi tsi ra nducahan nuu nahnu. Maa tyin tandihi ca maa nyivi sii xaan cuñi ñi tsihin tsa cañu tsa iyo javaha ra Jesús.

Nu caḥan ra Jesús tyin tumaa iin tsiti mostaza cuví tsa ndacá ñaha Nyoo tsi yo

18 Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi? 19 Tumaa iin tsiti mostaza, tacan cuví tsi. Tyin iin ra tatsi ra iin tsiti ican nu ñuhu ra, tan cana iin yutun luhlu, tan tsahnḡ tun. Tan cuví tun iin yutun cañu xaan. Tacan tan tsaḡ saa naha ti nuu yutun ican. Tan javaha ti taca ti nuu tun.

Nu caḥan ra Jesús tyin tumaa yutsan iya, tacan cuví tsa ndacá ñaha Nyoo tsi yo

(Mt. 13:33)

20 Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo?

21 Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá taniñ yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

**Yuvehe tihin tan ityi cuiñi tsa
cuahán nu nyaá Nyoo**

(Mt. 7:13-14, 21-23)

22 Ityi cuahán ra Jesús ñuu
Jerusalén caahán ra tuhun Nyoo
tsihin nyivi tandihi ñi ñuu nu yahá ra.

23 Tan iin ra tsicá tuhun ra tsi ra:

—Jutu Mañi yu, ¿a cuaha maa
nyivi cua cacu? —catyí ra.

Tacan tan nacahan ra Jesús, tan
catyí ra:

24 —Nanducu ndo cuhva quihvi ndo
yuvehe tihin. Tyin tacan cuví quihvi
ndo nu ndacá ñaha Nyoo. Tyin cuaha
xaan ndo cuiñi ndo quihvi ndo ndacan,
tan ña cuví. 25 Tyin tumaa tsitoho iin
vehe, tacan cuví Nyoo. Tan tsitoho
vehe ican cua nacasi ra yuvehe. Tacan
tan nyoocho tsa nyecú ndo ityi tsata cua
jandatsan ndo yuvehe, tan cua catyi
ndo: “Nuña yuvehe.” Tan ra ican cua
catyi ra tsihin ndo: “Ña tsitó yu ndáa
ityi quee nyoocho.” 26 Tacan tan nyoocho
cua catyi ndo: “Nyuhu tsatsi ndi tan
tsihí ndi tsihin un. Maa un jacuahá un
tuhun Nyoo tsi ndi ityi nu nyecú vehe
ndi”, cua catyi ndo tsihin ra. 27 Maa
tyin ra ican cua nacahan ra tsihin ndo
tan cua catyi ra: “Tsa catyi yu tsihin
ndo tyin ña tsitó yu ndáa ityi quee
ndo. Catsiyo nyaha ndo nu nyaá yu
tandihí nyoocho nyivi javahá tsa ña
vaha” 28 Tacan tan cua vacu ndo tan
catsan ña cua cuví nuhu ndo tsa cua
nyehe ndo tsi ra Abraham tsihin ra
Isaac tan ra Jacob, tan tsihin tandihí
ra cuví ndusu yuhu Nyoo tsa tsicoo
tahan tsanaha. Tyin nyecú ra naha nu
ndacá ñaha Nyoo. Tan nyoocho ndo
ndo ityi tsata. 29 Tan cua quitsi nyivi
ityi ndutya ñuhu, tan ityi norte, tan
ityi nu caná ñicanyii, tan ityi nu tyisó
ñicanyii. Tan cua cunyecú ñi catsi ñi
tsihin Nyoo nu ndacá ñaha ra. 30 Tan
juhva nyivi tsa cuahán ityi nuu vityin,
ñi can cuhun nu ndihí. Tan juhva
nyivi tsa cuahán nu ndihí ña, ñi can
cua cuhun ityi nuu —catyí ra.

**Nu cuihya xaan cuiñi ra Jesús nyehé
ra tsi nyivi ñuu Jerusalén**

(Mt. 23:37-39)

31 Juvín ñi maa quivi can tsaá
juhva ra fariseo. Tan catyí ra naha
tsihin ra Jesús:

—Quita ihya tyin ra Herodes cuiñi
ra cahñi ra tsi un —catyí ra naha.

32 Tan catyí ra Jesús tsihin ra naha:

—Cuaahan ndo tan cahan ndo
tsihin ra tsa cuví tumaa ñicuii, tyin
nda cuanda quita quivi tsa ndihí
tyiñu jahá yu tsa tavá yu tatyí ña
vaha tsi nyivi tan tsa janduvahá yu
tsi nyivi cuuhví tsihin cuehe, tacan
tan cundihi tyiñu jahá yu. 33 Maa
tyin nda cuanda tahan tsi tsa ndihí
maa tyiñu jahá yu, tacan tan cuhun
maa yu cua cúu yu nda ñuu Jerusalén.
Tyin ña cuví cúu iin ra cuví ndusu
yuhu Nyoo ityi tsata ñuu Jerusalén.

34 ¡Ndahvi nyoocho nyivi Jerusalén!
tyin tsañi ndo tsi ra cuví ndusu yuhu
Nyoo. Tan cañi ndo yuu tsi tandihí ra
tsa jaquitsi Nyoo nu yucú ndo. Tan
yuhu cuaha xaan tsaha cuiñi yu jaha
cuenda yu tsi ndo, tumaa jahá cuenda
iin ndivi sihi sehe ti, tan naquihín
vaha ti tsi ti naha ti tsitsi nditsin ti.
Maa tyin maa ndo ña cuiñi ndo.
35 Nyehé ndo vityin tyin tsa nacoo yu
tsi ndo. Tan catyí yu tsihin ndo tyin
ñi cua nyehe ca ndo tsi yu nda
cuanda quita quivi tsa cua catyi ndo
tyin cahnu xaan ra vatsí tsihin sivi
Nyoo Jutu yo —catyí ra Jesús.

**Nu janduvahá ra Jesús tsi iin ra cuuhví
tsa iyó cuiñu quivi quitatú nyivi**

14 ¹ Cuví tsi iin quivi quitatú
nyivi. Tan ra Jesús cuahán ra
cua catsi ra vehe iin ra cuví ityi nuu
tsihin ra fariseo naha ra. Tan juhva ca
ra fariseo ican ndatú ra naha nyehé
ra naha náa cuatyí cuví tyaa ra naha
tsi ra Jesús. ² Tacan tan yatyin ñi nuu
ra Jesús nyaá iin ra cuuhví tsa iyó
cuiñu. ³ Tan catyí ra Jesús tsihin ra
maestro cuenda ley vehe ñuhu naha

ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

4 Tacan tan tandíhi ra naha, taxin ña tsinyecu ra naha. Tacan tan tyiso ndaha ra Jesús jíhi ra cuuhví can. Tan janduvaha ra tsi ra. Tan catyí ra tsihin ra na cunuhu ra. 5 Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quiti jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

6 Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

Nu jacuahá ra Jesús tsi yo tyin ña vaha tsa cahnu jaha yo tsi yo

7 Nyehe ra Jesús tyin tandíhi ra nyecú vico ican nacatsi ra naha tyayu vaha ca cunyecu ra naha. Tacan tan tsahá cuenda ra tyehen tsi ra naha:

8 —Ndáa quivi cahun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuvi tan ñavin ca maa ndo, 9 tan coto quitsi ra tsa caná tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan cua kuhva ndo tyayu can. Tacan tan cua cunyecu ndo nu ndíhi ña.

10 Maa tyin catyí yu tsihin ndo, tyin ndáa quivi cana ra tsi ndo, cyaahan ndo, tan ñavin nu vaha cunyecu ndo. Tyin tacan tan cua quitsi maa ra tsa caná tsi ndo tan cua cahan ra tsihin ndo: “Amigos, ñaha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyivi nyecú yuhu mesa tsihin ndo. 11 Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuvi ra —catyí ra Jesús.

12 Tacan tan catyí tucu ra tsihin ra

caná tsi ra nu iyó vico can:

—Ndáa quivi coo vico vehe un, ña cua cana un tsi ra vaha íhi tsi un, ndi tsi ra yañi un, ndi tsi ra cuví nyivi un, ndi tsi nyivi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un. 13 Maa tyin catyí yu tsihin un tyin ndáa quivi coo vico vehe un, cana tsi nyivi ndaahvi, nyivi cuuhví, nyivi coxo, tan tsihin nyivi cuaa. 14 Tacan tan sií cua cuñí un, tyin ñi ican ña cua cuvi natyahvi ñi tsi un. Maa tyin cua natyahvi Nyoo tsi un quivi cua nandoto un tsihin nyivi vaha.

Nu tsahá cuenda ra Jesús iin kuhva nácaa caná ra tsi yo na quihvi yo nu ndacá ñaha Nyoo

(Mt. 22:1-10)

15 Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sií xaan cua cuñi nyivi tsa cua catsi nu ndacá ñaha Nyoo —catyí ra.

16 Tacan tan catyí ra Jesús tsihin ra: —Iin ra ican jacoq ra iin vico cahnu xaan vehe ra. Tan caná ra cuaha xaan nyivi. 17 Tacan tan tsaqá kuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahán tsi kuhva cuxiñi ñi. 18 Maa tyin tandíhi ñi ican quitsahá caahán ñi tyin ña cua cahun ñi. Tan iin ra ican catyí ra: “Ndi jatá yu iin ñuhu. Tan cuñí tsi cahun yu cunyehe yu itsi. Yacan tsicán yu na jaha ra tucahnu íhi tsi yu tyin ña cua cahun yu.”

19 Tacan tan inga ra ican catyí ra: “Ndi jatá ñi yu uhun taahan yunta. Tan cahun yu cunyehe yu tatun vaha ti naha ti. Yacan tsicán yu tumañi íhi tsi ra na jaha ra tucahnu íhi tsi yu, tyin ña cua cuvi cahun yu.” 20 Tacan tan inga tucu ra ican catyí ra: “Ndi tindahá cuii ñi yu, tan ña cua cuvi cahun yu”, catyí ra. 21 Tacan tan

musu ra ican cuanuhu ra. Tan catyí tuhun ra tandíhi tsa cuví ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandíhi maa ityi. Tan quitsi ndaca un tsi nyivi ndaahvi, nyivi cuuhví, nyivi coxo, tan tsihin nyivi cuaa”, catyí ra. **22** Tan tsa yahá tsaa nyico musu ican tan catyí ra tsihin ra tsitoho ra: “Tsa javahá yu tandíhi maa tsa cahán un tsihin yu. Tan nuña ca tsitsi vehe”, catyí ra. **23** Tacan tan tsitoho ra catyí ra tsihin ra: “Cuaahan cua nducu ca nyivi tandíhi maa ityi. Tan jañiñi un tsi ñi na quitsi ñi, tyin na cutu tsitsi vehe yu. **24** Tyin catyí yu tsihin un tyin ndi intuhun ñi tsa caná yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehé yo tatun cuenda ra Jesús yihí yo

(Mt. 10:37-38)

25 Cuaha xaan nyivi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

26 —Tandíhi nyooho tsa nyicún tsi yu, tatun cuñi ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa ndo tsa nuu yuhu, ñavin cuenda yu yihí ndo. **27** Tyin nyooho tsa ña cuñi nyehe tundoho tsa cunyicun ndo tsi yu, ña taahán tsi cuvi ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo. **28** Tyin tun cua javaha ndo iin vehe, nacañi nuu jihna ndo jiñi ndo tan tyihi tuñi iñi ndo tun quita vehe cahnu can tsihin xuhun tsa nyii tsi ndo. **29** Tyin tatun quitsahá jandaá ndo vehe ican, tan ña cuvi jandíhi ndo tyin nduve ca xuhun ndo, cua vacu nducu nyivi tsi ndo. **30** Tan cua catyí ñi: “Ra ican quitsahá javahá ra vehe ra, tan ndi ña cuví jandíhi ra can”, cua catyí ñi. **31** A tatun iin rey tan cuñi ra cañi tahan ra tsihin inga

rey ¿a ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican? **32** Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey ican, tan cua jacuhun ra tsi musu ra tyin na catyí tuhun ra naha tsihin inga rey ican na jandíhi taxin ra itsi. **33** Tan tacan cuví nyooho. Tatun ña cahnya iñi ndo tandíhi maa tsa cuñi ndo tan tandíhi tsa cumí ndo, ña cua cuvi cunyicun ndo tsi yu.

Nu jacuahá ra Jesús tyin tumaa ñii tsa ndíhi tsa uhva, tacan cuví yo tatun ndu uvi iñi yo tsa tsinú iñi yo tsi ra

(Mt. 5:13; Mr. 9:50)

34 Vaha ñii tyin jacu uhvá tsi tsa catsi yo. Maa tyin tatun ndíhi tsa uhva tsi, ña vaha ca tsi. **35** Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyí ra Jesús.

Nu jacuahá ra Jesús tyin tumaa mbee tsa cuanaá tacan cuví yo

(Mt. 18:10-14)

15 ¹ Tandíhi ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhvá ra naha nu nyii ra Jesús, tan tyaa soho ra naha tsa caahán ra. **2** Tacan tan ra fariseo naha ra tsihin ra maestro cuenda ley vehe ñuhu naha ra quitsahá caahán nyaa ra naha tsi ra Jesús, tan catyí ra naha: —Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyí ra naha.

3 Tacan tan ra Jesús tsahá cuenda ra cuhva ihya, tan catyí ra:

4 —Nyooho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandíhi ca ti, tan

cunanducu ndo tsi mbee tsa cunaa can nda cuanda tsa nañihi ndo tsi ti? **5** Tan tsa yaha nañihi ndo tsi ti, tyiso soco ndo tsi ti. Tan sii xaan cua cuñi ndo. **6** Tan tsa tsa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyí ndo tsihin ñi tyin na cusii ndihi iñi ñi tsihin ndo tyin nañihi ndo mbee jana ndo tsa tsinaa. **7** Tan catyí yu tsihin ndo, tyin tacan tucu sii xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi cuhva iyó ñi.

Ñaha tsa tsinaa xuhun tan nañihi ña

8 Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña tanií tsitsi vehe ña. Tan cua nanducu ña xuhun can nda cuanda tsa nañihi ña can. **9** Tan tsa yaha nañihi ña, cua cuhun ña cunanducu ña tsi ñi vaha iñi tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusii ndihi iñi ndo tsihin yu tyin tsa nañihi yu xuhun yu tsa tsinaa”, cua catyí ña. **10** Tan catyí yu tsihin ndo tyin tacan tucu sii cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

Nu jacuahá ra Jesús nácaa cuñi Nyoo tsi iin ra ndu uvi iñi cuatyí

11 Tacan tan tsahá cuenda ra Jesús inga cuhva ihya tan catyí ra: —Iin ra, iyó uvi taahan sehe ra. **12** Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvi sava ra tsa tsii ra tan tsahá ra tsi nduvi taahan sehe ra. **13** Tan ña cuaha ñi quivi tan ra luhlu ican xico

ra tandihi maa tsa tsahá jutu ra tsi ra. Tan jandu iin ra xuhun ra, tan quihin ra ityi, cuahán ra iin ñuu cañi xaan. Tan ndacan tsicoo ra tan janaa ra tandihi maa xuhun ra tsihin tusii iñi. Tan quiñi xaan icá ra tsicá nuu ra. **14** Tacan tan tsaa tama ityi nu iyó ra. Tan quitsahá tsisocó ra tyin tandihi xuhun ra janaa ra. **15** Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quiñi jana ra, tyin jaha cuenda ra tsi ti naha ti. **16** Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quiñi ican naha ti. Tan yoñi maa tsahá tsa catsi ra. **17** Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco. **18** Vityin cua cunuhu yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan tacan tucu nuu maa ra. **19** Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuvi tsi yo” cuñi ra tsicá iñi ra.

20 Tacan tan quihin ra ityi cuanuhü ra nda vehe jutu ra. Tan cañi ca vatsí ra tan nyehe jutu ra tsi ra, tan cundaahvi iñi ra nyehé ra tsi sehe ra. Tan tsinü xaan ra tsijatahan ra tsi ra. Tan tsinumí nyaa ra tsi ra. **21** Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra. **22** Maa tyin jutu ra tava tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihí ndo iin xehe nundaha ra. Tan tyihí ndo zapatu tsaha ra. **23** Tan cahñi ndo iin becerra tsa xaahan vaha ca, tyin catsi yo tsi ti. Tyin vityin cua coo yo vico. **24** Tyin

ra sehe yu ihya tsa tsih̄j ra cuñī maa yu, tsicā iñi yu. Cuñī maa yu tyin ña cua nyehe ca yu tsi ra, tan tsaq̄ nyico ra”, catyí jutu ra can. Tacan tan quitsahā tsicoō ñi vico. Tan sīi xaan cuñī ñi tyin tsaq̄ nuhu nyico ra.

25 Tacan tan inga sehe ra, ra tsa tsitsa, nyíi ra tsicuhu. Tan tsa cua tsaá nuhu ra nda yuvehe ra, tan tsiñī ra tyin iyó yaa. Tan tuv̄i iñi ra tyin tsañī ñi yaa. 26 Tacan tan tsa cuyatyin ra nda yuvehe ra tan canā ra tsi iin musu ra. Tan tsicā tuhun ra tsi ra can náa cuví xaan can. 27 Tacan tan musu can catyí ra: “Ra yañī un tsaq̄ nuhu ra. Tan yacan tavā jutu un tyiñu tyin na cahñī ra naha iin becerra xaahan. Tyin vaha tsaq̄ ra yañī un, tan nduve náa tahañ ra”, catyí musu can tsihin ra. 28 Tacan tan nduxaān xaan cuñī ra can. Tan ña cuñī ra quihvī ra tsitsi vehe. Tan jutu ra tsaḥān ra tsicahān ndaahvi ra tsihin ra, tyin na quihvī ra tsitsi vehe. 29 Tacan tan nacahān ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. 30 Maa tyin vityin tsaq̄ nuhu nu sehe un ihya, nu tsa janaq̄ xuhun tsihin ñaha sīi iñi. Tan tsaḥā un iin becerra quitī xaahan tsi nu”, catyí ra tsihin jutu ra. 31 Tacan tan nacahān jutu ra tan catyí ra tsihin ra: “Sehe yu, yooho tsihin maa yu nyaá un tandīhi quivī. Tan tandīhi tsa cumí yu, tsii un cuví can. 32 Tan vityin taahán tsi tyin javaha yo vico ihya, tan cusiī iñi yo. Tyin tsaq̄ nuhu ra yañī un, ra tsa tsih̄j, cuñī maa yu. Tumaa tsa nandotō nyico ra cuví can, tyin tsinaa ra, tan nañih̄j yo tsi ra inga tsaha”, catyí ra tsihin sehe ra —catyí ra Jesús.

Nu jacuahá ra Jesús tsi yo nácaa javaha yo tumañī iñi tsihin tsa iyó tsi yo

16 ¹ Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yih̄i ndaha tandīhi tyiñu jahá ra cuca can. Tan tsaḥān iin musu ra tsicatyí tuhun ra tsihin ra cuca ican, tyin ra yih̄i ndaha tyiñu ican, janaá ra tandīhi tsa iyó tsi ra. 2 Tacan tan canā ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsī nu nyaá yu. Vaha ca naçuhva cuenda un tandīhi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. 3 Tacan tan ra yih̄i ndaha tyiñu can tsicá iñi ra: “¿Nacaa cua javaha yu vityin? Tsi toho yu ña cuñī ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahán xaan nuu yu caya yu tsitsi ñuu. 4 Maa tyin tsa tsitó yu nácaa cua javaha yu, tacan tan vaha cua cuñi nyivī tsihin yu quivī tsa nduve ca tyiñu cua jaha yu, tan vaha cua tsaá yu vehe ñi”, tsicá iñi ra can. 5 Tacan tan canā ra tsi intuhun intuhun ra tsa nyaá cuenda tsi tsitoho ra. Tan catyí ra tsihin iin ra ican: “¿Náa nyaá cuenda un tsi tsitoho yu?” catyí ra. 6 Tacan tan nacahān ra ican tan catyí ra: “Yuhu nyaá cuenda yu cumi mil litru acetye.” Tacan tan ra yih̄i ndaha tyiñu ican catyí ra tsihin ra: “Quihin un inga tutu ihya. Tan tyāa un uvi mil ñi. Tan javita un tutu tsaahnu ican”, catyí ra. Tacan icā ra can, tan cuahán ra. 7 Tacan tan tsaq̄ inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahān ra ican: “Nyaá cuenda yu iin mil arroba trigu”, catyí ra. Tacan tan catyí ra yih̄i ndaha tyiñu ican: “Quihin inga tutu, tan tyāa un una cientu ñi arroba. Tan javita un tutu tsaahnu can”, catyí ra. 8 Tacan tan

tsito tsitoho ra tsa ña vaha tsa javahá ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra: —Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo aña.

9 Tan catyí yu tsihin ndo, tyin cuatyínu ndo tsa cuca tsa iyó nu ñuhu ñayivi ihya, tan jatyinyee ndo tsi nyivi. Tan quivi tsa cua ndihi tsa cuca, cua ñihi ndo coo ndo nu ña cua naa maa.

10 Tan tatum tsitó ndo cuatyínu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyínu vaha ndo itsi. Tyin tatum ña tsitó ndo cuatyínu ndo tsa luxu ñi tsa iyó tsi ndo, tacan ña cua coto tucu ndo cuatyínu ndo tatun cuaha coo tsi ndo. **11** Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo. **12** Tyin tandihi tsa iyó tsi ndo, maa Nyoo tsahá nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuvi tsii ndo.

13 Iin musu ña cuví coo uvi taahan tsitoho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaá yahvi ra tsa cahan iin ra, tan inga ra, ña cua tyaá yahvi ra tsa cahan ra can. Ña cua cuvi cuñi ndo tsi Nyoo tatun cuñi tucu ndo tsa cuca —catyí ra Jesús. **14** Tan tsa tsini ra fariseo naha ra tandihi tsa cahan ra Jesús, tacan tan quitsahá tsacú nducu ra naha tsi ra. Tyin maa ra fariseo naha ra cuñi xaan ra naha xuhun. **15** Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha aña ndo. Tandihi tsa cahnu cuñi maa nyivi, Nyoo ña cuñi ra nyehe ra yacan.

Ley Nyoo tsa tyaá ra Moisés, tan tsihin tsa ndacá ñaha Nyoo tsi yo

16 Ley tsa tsahá Nyoo tsi ra Moisés tyin tyaá ra, tan tsihin tuhun tsa tyaá ra cuví ndusu yuhu Nyoo tahañ tsanaha, yacan cuví tsa janahá ityi tsi nyivi nda cuanda quivi tsa quitsi ra Juan. Tan ra Juan quitsahá caahán ra tuhun vaha tyin tsa cuñi quitsi Nyoo tyin cua cundaca ñaha ra. Tan tandihi nyivi nducú xaan ñi cuhva tsa quihvi ñi nu ndacá ñaha ra.

17 Tan catyí yu tsihin ndo, tyin vasu cunaa andivi tan nu ñuhu ñayivi ihya, maa tyin tsa cuví ley Nyoo tsa tyaá ra Moisés, ña cua cunaa tsi tyin cua cundaa tandihi tsi.

Nu jacuahá ra Jesús tyin ña vaha tsa nacoo ihñi rayi ñasihi ra

(Mt. 19:1-12; Mr. 10:1-12)

18 Tan tatum iin rayi tan iyó ñasihi ra, tan nacoo ihñi ra tsi ña, tan tindaha ra tsihin inga ñaha, coo catyí ra nuu Nyoo. Tan tatun tindaha inga rayi tsihin ñaha tsa nacoo yii, coo tucu catyí ra can nuu Nyoo.

Nu jacuahá ra Jesús tsi nyivi cuenda ra cuca tsihin ra Lázaro

19 Tsicoq iin ra cuca. Tan vaha xaan jahma tsinditsi ra. Tan tandihi quivi iyó vico jahá ra tan tsatsi vaha ra. **20** Tan tsicoq tucu iin ra ndaahvi tsa tsinañi Lázaro. Tan ra ihya cuaha xaan ndihyi iñi tsi ra. Tan nyaá ra yuvehe ra cuca ican. **21** Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra. **22** Tan iin quivi tsihi ra ndaahvi can. Tan ángel maa Nyoo na quihin tsi ra tan tsindaca ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra. **23** Tacan tan ra cuca ican nyehé xaan ra tundo nu nyii ra anyaya. Tan

nanyehę ra nu cañi xaan nu nyaá ra Abraham tsihin ra Lázaro. **24** Tacan tan cana tsaa ra cuca can tan catyí ra: “Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya”, catyí ra. **25** Tan ra Abraham catyí ra tsihin ra: “Nduchun iñi tyin vaha xaan tsicoo un nu ñuhu ñayivi. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yooho nyehé un tundoho. **26** Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehę ña cuví cahun ra naha nu nyíi un. Tan ndi ra yucú nu nyíi un, ña cuví quitsi ra naha nyehę”, catyí ra Abraham tsihin ra cuca can. **27** Tacan tan catyí ra cuca ican: “Tyatya Abraham, jaha tumañi iñi tsi yu. Jachun tsi ra Lázaro nda vehe jutu yu. **28** Tyin iyó uhun taahan ca ra yañi yu naha ra. Tan cuñi yu tyin catyí tuhun ra Lázaro tsihin ra naha nácaa nyíi yu nyehé yu tundoho ihya, coto quitsi ndihi ra naha ihya”, catyí ra. **29** Tacan tan catyí ra Abraham: “Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahañ tsanaha. Na tyaa yahvi ra yañi un naha ra, tun cuñi ra naha”, catyí ra Abraham. **30** Tacan tan catyí ra cuca ican: “Tyatya Abraham. Ña cua tyaa yahvi ra naha. Maa tyin tatun yóo tsa nandoto, tan cahun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican. **31** Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo tahañ tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18:6-7, 21-22; Mr. 9:42)

17 ¹ Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jativi tsi nyivi. Maa tyin ndahvi ra ndaahvi tsa jativi tsi nyivi. ² Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jativi ca ra tsi nyivi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra. ⁴ Tan ndi maa javaha ra tsa ña vaha tsihin ndo utsa tsaha tsa iin quiñi, tatun tandihi tsa utsa tsaha tan catyí ra tsihin ndo tyin ndu uvi iñi ra tsa javaha ra; tandihi tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵ Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

⁶ Tan catyí ra Jesús tsihin ra naha: —Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnú tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

—Tatun iin nyooho tan iyó iin musu ndo, tan tsaa ra tsa tahañ ra tsicuhu tsijaha tyiñu ra, a tsijaha cuenda ra

quiti jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra. **8** Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyíhi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra. **9** Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tavá ndo tsi ra. **10** Tacan tucu maa ndo tsihin Nyoo. Quivi ndíhi javaha ndo tandíhi tsa cahan ra tsihin ndo, taahán tsi catyi ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tavá ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahá ra Jesús tsi utsi taahan ra ndohó cuehe tyaahyú

11 Cuahán ra Jesús ityi ñuu Jerusalén tan yahá ra nu cuví xahñu Samaria tsihin Galilea. **12** Tan nu tsaá ra iin ñuu, quitá utsi taahan ra cuuhví tsihin cuehe tyaahyú. Tan tsicuñiñi ra naha ndasava. **13** Tan caná tsaá ra naha tan catyí ra naha:

—Yooho, Maestro Jesús, cundaahvi iñi tsi ndi —catyí ra naha.

14 Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityi cuahán ra naha tan nduvahá ra naha. **15** Tacan tan tsa nyehe iin ra ican tyin tsa nduvahá ra, vatsí tsihin tsata nyico ra nu nyí ra Jesús. Tan quitsahá caná tsaá ra, jacahnú ra tsi Nyoo. **16** Tan tsa tsaá ra nu nyí ra Jesús, tsicuñiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahá ihya, ra Samaria cuví ra.

17 Tacan tan catyí ra Jesús:

—¿A ñavin utsi taahan ndo nduvahá? ¿Náa inga ñin taahan ca ra naha? **18** ¿A intuhun ñi maa ra inga ñuu ihya vatsí, vatsí jacahnú tsi

Nyoo? —catyí ra Jesús.

19 Tacan tan catyí ra tsihin ra tsa nduvahá ican:

—Nduvita, cuaahan. Nduvahá un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya

(Mt. 24:23-28, 36-41)

20 Tsiçá tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi. **21** Ña cua cuvi catyi nyivi: “Juvín ra nyí ihya, juvín ra nyí ityi ican.” Tyin Nyoo tsa tsaá ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

22 Yahá yacan tan catyí ra tsihin ra tsicá tsihin ra:

—Cua tsaá quivi tsa cua cuñi ndo nyehe ndo tsi yuhu Rayií quee nda gloria. Maa tyin ña cua nyehe ndo tsi yu. **23** Yihi ñi cua catyi ñi tsihin ndo: “Ihya nyí ra.” Inga ñi cua catyi ñi: “Ndacan nyí ra.” Maa tyin coto cuhun ndo cunyehe ndo. Tan ña cunycun ndo tsi ra can tyin ñavin yu cuví can. **24** Tyin tandíhi nyivi cua nyehe tsi yuhu, Rayií tsa quee nda gloria, quivi cua quitsi nyico yu inga tsaha. Tumaa tsa nyehé tandíhi nyivi nu cañi tatsa savi tan quituvi ñuhú tatsa can ñi canduvi andívi, tacan cua cuvi quivi cua quitsi yu inga tsaha. **25** Maa tyin cua nyehe jihna yu tundoho cahnu xaan. Tyin nyivi tsa iyó vityin, ndasi cua cuñi ñi nyehe ñi tsi yu. **26** Tumaa quivi tsa tsicoo ra Noé, tacan cua cuvi quivi cua quitsi nyico yuhu Rayií quee nda gloria.

27 Quivi tsicoo ra Noé, tsatsí nyivi. Tsihi ñi. Tindahá ñi. Tan tsahá ñi sehe sihi ñi tindaha, nda cuanda quivi quihvi ra Noé tsitsi yutun ndoo tan

cuꝝn savi xaan. Tan tandihí ñi can tsihí ñi jahá ndutya. **28** Tacan tucu cuví quiví tsicoꝝ ra Lot. Tsatsí ñi. Tsihí ñi. Jatá ñi. Xicó ñi. Tatsí ñi itu. Tan javahá ñi vehe ñi. **29** Tan quiví tsa quitá ra Lot ñuu Sodoma ican, cuꝝn ñuhu tsihin azufre tsa quee nda andívi. Tan tsahñí ñuhu can tandihí nyívi Sodoma. **30** Tacan cua cuví quiví quitsi nyico yu tsa cuví yu Rayíi quee nda gloria.

31 Tatun nyecú ndo nuquehe quiví quitsi yu, ña quihví ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo. **32** Nduꝝcuhun iñi ndo tsa tahañ ñasíhi ra Lot. **33** Tandihí nyooho tsa cuñí tsa iyó nu ñuhu ñayívi ihya, cua cunaa ndo. Tan tandihí nyooho tsa ña tyaá yahvi tsa iyó nu ñuhu ñayívi ihya, cua cacu ndo.

34 Tan catyí yu tsihin ndo tyin tsacuaa can, uvi taahan nyívi cua cava iin nu tsito. Iin ñi cua naquihin yu. Tan inga ñi cua ndoo ñi. **35** Tan uvi taahan ñiñaha, iin caa ñi cua nyico ñi quiví can. Intuhun ña cua naquihin yu. Tan inga ña cua ndoo ña. **36** Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

37 Tsa tsiñí ra naha tsa cahañ ra Jesús tacan, tsicá tuhun ra naha tsi ra:

—¿Numaa tahan cua cuvi yacan, Jutu Mañi yu? —catyí ra naha.

Tacan tan nacahañ ra Jesús, tan catyí ra:

—Nu canyíi ndiyi, ican cua nataca nditsii.

Nu jacuahá ra Jesús tyin tumaa tsa cahañ yuhu iin ñaha tsihí yíi tsihin juez, tacan taahán tsi ndacan yo tsi Nyoo

18 ¹ Tshá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihí iñi ra naha. ² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyívi tan ña tyaá yahvi ra. **3** Tan juvin ñuu ican iyó iin ñaha ndaahvi tsa tsihí yíi. Tan tsaahán ña tsicahán ña tsihin ra can, tyin tsicán ña cuatyí tsaha iin nu xaan iñi tsi ña. **4** Tan juez ican ña tyaá yahvi nu tsa caahán ña. Ña jandaá maa nu tyiñu tsicán ña. Tan tsanaha xaan tsicán ña. Tacan tan quitsahañ tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyívi, **5** maa tyin ñaha ihya tshá xaan ña tsihí tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihí tsi yu”, cuñí ra tsicá iñi ra.

6 Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatynyeꝝ ra tsi ñaha ndaahvi ican. **7** Tan vihi ca cuví Nyoo tsihin yo, ¿a ña cua jatynyee ra tsi nyívi tsa nacatsí ra tsa tsicán ñi tsi ra nduvi tan ñiñu? ¿A cuatu xaan ca ra tan jatynyee ra tsi ñi? **8** Catyí yu tsihin ndo, tyin numi ca cua jatynyee ra tsi ñi. Maa tyin quiví tsa cua quitsi nyico yu tsa cuví yu Rayíi tsa quee nda gloria, tsitó Nyoo tun nañihí ca yu tsi nyívi tsa tsinú tsa cuii iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

9 Tacan tan tsaaha cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñí ra naha nyehé ra tsi inga nyívi. Tan catyí ra:

10 —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra.

11 Tan ra fariseo ican nduvitá nyityi ra, tan quitsahá caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya. 12 Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can. 13 Tan ra tsa tavá xuhun can tsa cañi luxu nyaá ra. Tan ña caná iñi ra nanyehe ndaa ra. Tan cañi ndaha ra yiqui nyica ra tyin ndu uví iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

14 Tan catyí nyico ra Jesús tyehen: —Catyí yu tsihin ndo tyin Nyoo jahá ra tucahnu iñi tsi ra tavá xuhun ican. Janaa Nyoo cuatyí ra tan cuanuhu ra nda yuvehe ra. Maa tyin ra fariseo ican, nduve tucahnu iñi tsicoó tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

Nu nasocó ra Jesús tsi tsa nyihi

(Mt. 19:13-15; Mr. 10:13-16)

15 Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehe ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsahá ra naha cuhun tsa nyihi can. 16 Tacan tan caná ra Jesús tsi ra naha, tan catyí ra tsihin ra naha: —Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. 17 Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

Nu tsahá ra Jesús cuhva tyin yihí xaan nacuhva cuenda iin ra cuca tsi ra tsi Nyoo

(Mt. 19:16-30; Mr. 10:17-31)

18 Tacan tan iin ra tsa cuví ityi nuu cuenda vehe ñuhu tsicá tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

19 Tacan tan catyí ra Jesús tsihin ra: —¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha. 20 Yooho tsitó un tandihí tuhun tsa tsahá Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

21 Tacan tan ra ican catyí ra:

—Tandihí maa yacan tan tyaá yahvi yu nda tahán luhlu yu tan nda cuanda vityin —catyí ra.

22 Tsa tsiñi ra Jesús tsa cahán ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

23 Maa tyin tsa tsiñi ra tsa cahán ra Jesús, nducuihva xaan cuñi ra, tyin cuca xaan ra. 24 Tan tsa nyehe ra Jesús tyin nducuihva cuñi ra, tan catyí ra:

—Yihí xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi. 25 Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

26 Tan nyivi tsa tsiñi tsa cahán ra catyí ñi:

—Tatun tacan, ¿yóo cua cuví cacu? —catyí ñi.

27 Tacan tan ra Jesús catyí ra:

—Tandihî tsa ña cuvî javahá nyivî, Nyoo cuvî javahá ra tandihî —catyî ra.

28 Tacan tan ra Pedro catyî ra:

—Jutu Mañi yu, nyuhu tandihî maa tsa iyó tsi ndi nacoꝝ ndi, tan nyicún ndi tsi un —catyî ra.

29 Tacan tan catyî ra Jesús tsihin ra:

—Tsa nditsa catyî yu tsihin ndo, tyin tandihî nyooho tsa nacoꝝ vehe, a ñasihi ndo, a yañi ndo, a jutu ndo, a sehe ndo tsacatyî tsa tsahá ndo tsa cundaca ñaha Nyoo tsi ndo, **30** cuaha xaan tsa vaha cua ñihî ndo ñuu ñayivî ihya tan inga ñayivî tsa cua coo, cua ñihî ndo ñayivî tsa ña cua naa maa —catyî ra Jesús.

**Inga tsaha jacotoꝝ ra Jesús cuhva
cua cahñi nyivî tsi ra**

(Mt. 20:17-19; Mr. 10:32-34)

31 Tan cana siin ra Jesús tsi tsa utsi uvi taahan ra tsicá tsihin ra, tan catyî ra tsihin ra naha:

—Vityin cuhun yo nda ñuu Jerusalén. Tyin ndacan cua cundaa tyiñu Rayii tsa quee nda gloria: tandihî tyiñu tsa tyaꝝ ra cuvî ndusu yuhu Nyoo tahañ tsanaha. **32** Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuvî. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tivî sii ra naha nuu yu. **33** Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivî tan cua nandoto yu inga tsaha —catyî ra Jesús.

34 Maa tyin ña cutuñi iñi ra tsicá tsihin ra tsa cahañ ra, tan ndi ña tsitó ra naha náa tuhun cahañ ra tsihin ra naha. Tyin ña cuvî cutuñi iñi ra naha.

**Nu janduvahaꝝ ra Jesús iin ra
cuaa ñuu Jericó**

(Mt. 20:29-34; Mr. 10:46-52)

35 Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra. **36** Tacan tan tsiñi ra

cuvaa tsa yahá cuaha nyivî. Tan tsica tuhun ra náa cuenda ñihî xaan cuvaa.

37 Tan catyî tuhun nyivî tsihin ra tyin ra Jesús, ra ñuu Nazaret, vatsí.

38 Tacan tan quitsaha caná tsaa ra tan catyî ra:

—¡Yooho Jesús, tata ra rey David! ¡Cundaahvi iñi tsi yu! —catyî ra.

39 Tan ra tsa cuahán ityi nuu ican naha ra, catyî ra naha tsihin ra, nacasi ra yuhu ra. Maa tyin tsaa ca cana tsaa ra, tan catyî ra:

—¡Yooho, tata ra rey David! ¡Cundaahvi iñi tsi yu! —catyî ra.

40 Tacan tan tsicuiñi ra Jesús.

Tan tava tyiñu ra na cuhun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

41 —¿Náa cuñi un javaha yu tsihin un?

Tacan tan ra cuaa ican nacahañ ra, tan catyî ra:

—Jutu Mañi yu, cuñi yu nanyehe yu —catyî ra.

42 Tacan tan catyî ra Jesús tsihin ra:

—Nanyehe. Tsa nduvaha tinnu un tyin tsinú iñi un tsi yu —catyî ra.

43 Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihî nyivî tsa nyehe tsa cuvî can, jacahnú ndihî tucu maa ñi tsi Nyoo.

Nu cuahán ra Jesús vehe ra Zaqueo

19 ¹ Tacan tan quihvi ra Jesús ñuu Jericó. Tan cua yaha ra tsitsi ñuu. ² Tan ñuu can iyó iin ra cuca xaan, nañi ra Zaqueo. Tan cuvî ra ityi nuu tsihin ra tava xuhun cuenda ra ndacá ñaha nda ñuu Roma. ³ Ra ihya cuñi xaan ra nacoto ra tsi ra Jesús. Tan ña cuvî nyehe ra tsi ra tyin cuaha xaan nyivî cuahan tsihin ra. Tan maa ra ndiqui xaan ra.

⁴ Tacan tan tsinú xaan ra cuahán ra ityi nuu, tan ndaꝝ ra iin nu yutun

cahnu tsa nañi sicómoro tsa nyaá yuhu itiyi nu cua yaha ra Jesús, tan cuví nyehe ra tsi ra Jesús. **5** Tan cuhva tsa quita ra Jesús nu nyaá yutun can, nanyehé ndaa ra itiyi siqui tan nyehe ra tsi ra Zaqueo. Tan catyí ra tsihin ra:

—Zaqueo, j̄anumi n̄u un nu yutun juvin. Tyin vityin cuñi tsi tsa cuhun yu yuvehe un —catyí ra tsihin ra.

6 Tacan tan numi xaan nuu ra Zaqueo. Tan sii xaan cuñi ra. Tan quih̄in ra tsi ra Jesús cuahán tsihin ra yuvehe ra. **7** Tan tsa nyehe nyivi tsa tacan cuvi, tand̄ihi ñi quitsaha caahán nyaá ñi tsi ra Jesús. Tan catyí ñi tyin ndoó ra vehe iin ra iyó cuatyí. **8** Tan nu nyecú ra naha tsitsi vehe, ra Zaqueo tsinyaá nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhu yu tsa sii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

9 Tacan tan catyí ra Jesús:

—Vityin cacu un, tan nyivi ra Abraham cuví tsi un. Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo. **10** Tyin yuhu, Rayi tsa quee nda gloria, vatsí yu vatsí nanducu yu tan vatsí jacacu yu tsi nyivi tsa cuanaa maa —catyí ra Jesús.

Nu jacuahā ra Jesús tsi yo na jaha tyiñu yo tsihin tsa tsahā Nyoo tsi yo
(Mt. 25:14-30)

11 Tan tsitsi tsa tsiñi nyivi tsa caahán ra Jesús, tan quitsaha tsahá cuenda ra inga cuhva ihya tsi ñi. Tyin tsa cuñi tsaa ra ñuu Jerusalén. Tan nyivi cuñi maa ñi tyin tsa cua quitsaha cundaca ñaha ra ndacan. **12** Tacan tan catyí ra:

—Tsicoo iin ra cuca tan tsa cuñi cuhun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu

nyico ra ñuu ra. **13** Tsa ndi cumañi ca cuhun ra, cana ra utsi taahan musu ra. Tan tsaha cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra. **14** Maa tyin nyivi ñuu ra, ndasi cuñi ñi nyehé ñi tsi ra tan ña cuñi ñi tsa cundaca ñaha ra tsi ñi. Tan jacuhun ñi tsi ra cuhun cunycun tsi ra, tyin cahan ra naha tyin ña cuñi ñi tsa cundaca ñaha ra tsi ñi. **15** Maa tyin ra ican cuvi maa ra rey. Tacan tan tsaa nyico ra nda ñuu ra. Tan quivi tsa tsaa ra, cana ra tsi musu ra, ra tsa nacoo ra xuhun tsihin. Tyin cuñi ra coto ra nácaa xuhun jaha canaa xuhun ra tsa nacoo ra. **16** Tan tsaa iin ra ican. Tan catyí ra: “Yooho taa, jaha canaa yu utsi taahan ca siqui xuhun tsa nacoo un tsi yu”, catyí ra. **17** Tacan tan catyí ra rey can tsihin ra: “Vaha xaan. Yooho cuví musu vaha. Tyin javaha un nd̄ihi tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra.

18 Tacan tan tsaa tucu inga ra tsa tsaha ra xuhun. Tan catyí ra: “Juhun xuhun ihya. Jaha canaa yu uhun taahan ca siqui xuhun tsa nacoo un tsi yu”, catyí ra. **19** Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. **20** Tacan tan tsaa tucu inga ra can. Tan catyí ra: “Juhun xuhun tsa tsaha un tsi yu. Yuhu naquihin vaha yu itsi tsitsi pañitu. **21** Tyin yuuhvi xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsi un. Tan naquih̄in un ndaha tyiñu quita nu jaha tyiñu inga nyivi”, catyí ra can. **22** Tacan tan ra rey ican catyí ra tsihin ra: “Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquih̄in yu tsa ña tatsi yu, tan naquih̄in yu ndaha tyiñu inga

nyivi, **23** ¿nacuvi tyin ña tsityihĩ un xuhun yu banco tyin tsaá yu maa tyin tsa nandaa xuhun yu?” catyí ra rey can. **24** Tan catyí ra tsihin ra nyecú ican: “Quinyaa ndo xuhun tsa tsahá yu tsi ra ihya, tan cuhva ndo tsi ra tsa jahá canaa utsi taahan ca síqui tsa tsahá yu tsi ra”, catyí ra. **25** Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha. **26** Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahá tyiñu tsihin tsa tsahá yu tsi ra, cuaha ca cua cuhva yu tsi ra. Tan ra tsa tsahá yu luxu ñi, tan ña cuñi ra jahá tyiñu ra tsihin tsi, cua quinyaa yu tandihĩ can tsi ra. **27** Tan tandihĩ nyivi xaan iñi tsi yu, ñi tsa ña cuñi tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

Nu tsaá ra Jesús ñuu Jerusalén
(Mt. 21:1-11; Mr. 11:1-11; Jn. 12:12-19)

28 Tsa yahá cahán ra Jesús yacan, tan jañihĩ ra cuahán ra ñuu Jerusalén. **29** Tacan tan tsa cuñi tsaá ra ñuu Betfagé tsihin ñuu Betania, yatyin ñi iin yucu tsa nañi Olivo, tyin maa ñi maa yutun olivo iyó ican. Tava tyiñu ra tsi uvi taahan ra tsicá tsihin ra. **30** Tan catyí ra tsihin ra naha:

—Cyaahan ndo ñuu tsa canyíi yatyin ñi ihya. Ican cua nañihi ndo iin burru luhlu, quitĩ tsa ñaha ca quihĩ tyayu. Nuuhñi ti. Ndatsi ndo tsi ti. Tan quitsi ndaca ndo tsi ti tsi yu. **31** Tatun yóo tsicá tuhun tsi ndo: “¿Nacuenda ndatsí ndo tsi ti?” catyí ndo tsihin ñi: “Ndatsí ndi tsi ti tyin tsiñi ñuhu ti tsi ra ndacá ñaha.”

32 Tacan tan ra tsicá tsihin ra, cuahán ra naha. Tan nañihĩ ra naha tsi ti tumaa tsa cahán maa ra tsihin ra naha. **33** Tan cuhva tsa ndatsí ra naha tsi ti, tsaá tsitoho ti. Tan nducu tuhun ra can naha ra tsi ra naha tan catyí ra:

—¿Nacuenda ndatsí ndo burru ihya? —catyí ra naha. **34** Tacan tan nacahan ra can naha ra:

—Ndatsí ndi tsi ti tyin tsiñi ñuhu ti tsi ra ndacá ñaha —catyí ra naha.

35 Tacan tan quihĩn ra naha tsi ti. Tan tsindaca ra naha tsi ti nu nyíi ra Jesús. Tan tyiso ra naha jahma ra naha tsata ti. Tacan tan jandaa ra naha tsi ra Jesús tsata ti. **36** Tacan tan cuahán ra Jesús. Tan cuaha xaan nyivi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican. **37** Tsa tsa cua cuyatyin tandihĩ nyivi tan ra Jesús nu iñi nuu yucu Olivo, quitsahá caná tsaá tandihĩ ñi tsinú iñi tsi ra tsihin tsa siñi cuñi ñi. Tan jacahnú ñi tsi Nyoo tyin cuaha xaan tsa iyo javahá ra nyehe ñi. **38** Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

39 Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyivi ihya —catyí ra naha.

40 Tan nacahan ra Jesús tan catyí ra:

—Tatun nyivi ihya tan cutaxin ñi, yuu cua cana tsaá, tan cua jacahnu tsi tsi yu —catyí ra Jesús.

41 Tacan tan tsa tsaá ra Jesús yatyin ñi yuhu ñuu Jerusalén, nanyehé ra ñuu can tan quitsahá tsacú ra tsa cuiihya cuñi ra. **42** Tan catyí ra:

—Vaha xaan tun tsatyin cuvi coto ndo tan cutuñi iñi ndo nácaa ñihi ndo tsa taxin coo ánima ndo vityin ihya.

Maa tyin xeehe xaan yihĩ tsa vaha can, tan ña cuví nañihi ndo can.

43 Coo quivi cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihĩ ityi cua quitsi nahnu. Tan cañi tahan nahnu tsihin ndo. **44** Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa

yosó toto tan ña cua nacoo ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

Nu tava ra Jesús tsi nu xicó tsitsi vehe ñuhu cahnu nahnu

(Mt. 21:12-17; Mr. 11:15-19; Jn. 2:13-22)

45 Tacan tan quihví ra Jesús tsitsi cora vehe ñuhu cahnu. Tan quitsaha tava ra tandíhi nyívi xicó tan nyívi jatá tsa yucú nu quehe. 46 Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyooho jananduví ndo itsi vehe ñasuhu —catyí ra Jesús.

47 Tan tandíhi quívi tsaahán ra Jesús tsijacuahá ra tsi nyívi tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra. 48 Maa tyin ña ñihí maa ra naha nácaa javaha ra naha tyin tandíhi nyívi tan vaha tyaá soho ñi tsa caahán ra Jesús.

Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyívi

(Mt. 21:23-27; Mr. 11:27-33)

20 1 Iin quívi jacuahá ra Jesús tsi nyívi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra. 2 Tan catyí ra naha tsihin ra Jesús:

—Catyí tuhun tsihin ndi ¿yóo tava tyiñu tsi un javaha un tyiñu ihya? —catyí ra naha.

3 Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo. 4 ¿Yóo jaquitsí tsi ra Juan tyin jacoondutya ra tsi nyívi? ¿A

Nyoo jaquitsí tsi ra, a nyívi?

5 Tacan tan ra ican naha ra quitsaha caahán yuhu tahan ra naha tan catyí ra naha:

—Tun catyí yo tyin Nyoo jaquitsí tsi ra Juan, cua catyí ra tsihin yo nacuenta ña tsiñu iñi yo tsa cahan ra Juan. 6 Tun catyí tucu yo tyin nyívi jaquitsí tsi ra, tandíhi nyívi cua cahñi ñi tsi yo tsihin yuu. Tyin tandíhi ñi, tan cuñí ñi tyin ndusu yuhu Nyoo cuví ra Juan —catyí ra naha.

7 Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyívi. 8 Tacan tan ra Jesús catyí ra tsihin ra naha:

—Ndi yuhu, tan ña cua catyí tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahá ra Jesús tyin tumaa cuví juhva ra caquiñi naha ra, tacan cuví ra tsa cua cahñi tsi ra

(Mt. 21:33-44; Mr. 12:1-11)

9 Tacan tan tsaahá cuenda ra Jesús iin cuhva ihya tsi nyívi:

—Iin ra, tatsí cuaha ra nu ñuhu ra yoho tsiti yucu tsa cua cuvi vinu. Yahá can tan tsaahá nuu ra ñuhu can tsi juhva ra jahá tyiñu. Tacan tan naha cuahán ra inga ñuu. 10 Tan quívi tsa iñí tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundí ra jacunuhu ra naha tsi ra. 11 Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahan nyaa ra naha tsi ra. Tan jacunuhu ra naha tsi ra. Tan juvín ñi nduve tsa tsaahá ra naha cuiso ra cunuhu ra. 12 Tacan tan ra cuví tsitoho yoho can jacuhun nyico ra inga ra. Maa tyin juvín ñi tacan javahá nyico ra naha tsihin ra can. Tan jañicueehé ra naha tsi ra. Tan tava ra naha tsi ra.

13 'Yahā can tan catyí tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñí xaan yu. Vasiqúi cua tyaa yahvi ra naha tsi ra, tyin sehe yu cuví tsi ra”, catyí ra. 14 Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvin ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha. 15 Tacan tan tavā ra naha tsi sehe tsitoho ñuhu ican ityi tsata cora, tan tshañi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tshañi ra naha sehe ra? 16 Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuví. Tan catyí ñi:

—¿Ña cuñi Nyoo tahan yo tacan! —catyí ñi.

17 Maa tyin ra Jesús nanyehē ra nuu ñi tan catyí ra:

—Tun tacan tsicá iñi ndo ¿náa cuñí tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javahā vehe cuatyíñu ra,
yacan cuví yuu tsa tsiñi ñuhu ca.

18 Yóo nyivi cua canacava tsata yuu can, cua tahnú cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

19 Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuví iñi ra naha tyin tsa cahān ra Jesús tacan, tsi maa ra naha nañi can. Tan cuñi ra naha tiin ra naha tsi ra tyin cahñi ra naha tsi ra. Maa tyin ña tsitó maa ra naha

nácaa javaha ra naha, tyin nayuhvi ra naha tsi nyivi.

Nu jacuahā ra Jesús tsa cuenda tsa tyahvi nyivi xuhun tsi ra ndacá ñaha ñuu Roma

(Mt. 22:15-22; Mr. 12:13-17)

20 Tacan tan jacuhun ra naha tsi juhva ra nducu cuhva tsi ra Jesús. Tan jahā ra naha tyin ra vaha cuví ra naha. Tyin tacan tan coto ra naha náa tsa ña vaha cua cahan ra Jesús tan cuví tiin ra naha tsi ra. Tan cuhva cuenda ra naha tsi ra tsi ra ndacá ñaha. 21 Yacan tsicā tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un. 22 Catyí tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

23 Tan ra Jesús tuví iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu? 24 Janaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahān ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

25 Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsi maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

26 Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñi ra naha tsa nacahān ra. Tan taxin ña cuví ra naha.

Nu cuñí ra cuví saduceo naha ra jandavi ñaha ra naha tsi ra Jesús

(Mt. 22:23-33; Mr. 12:18-27)

27 Tsa yahá can tan tsaá juhva ra cuví saduceo nu nyíí ra Jesús. Maa ra naha cuví ra tsa catyí tyin ña nandoto nyívi tun tsa tsihí ñi.

28 Tacan tan catyí ra naha tsihin ra Jesús:

—Maestro, jandoo ra Moisés tyíñu ihya tyin tatun iin ra tsihí tan nandoo ñasihi ra, tatun nduve sehe ra tsicoo tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.

29 Maa tyin cuñí ndi coto ndi nácaa, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasihi ra, maa tyin nduve sehe ñi tsicoo, tan tsihí ra. 30 Tacan tan naquihin ra tsa tsinu uvi tsi ña can. Tan nduve tucu sehe ñi tsicoo. Tan tsihí tucu ra can. 31 Tan juvin ñi tacan javahá ra tsinu uñi. Tandíhi tsa utsa ra naha javahá tacan. Ndi intuhun ra tan ña tsicoo sehe ra tsihin ña. 32 Tan nu ndíhi tuhun tsihí ndíhi maa ña. 33 Tan cuñí ndi coto ndi yóo ra cua cuvi yí ña tsitsi tsa tandíhi tsa utsa taahan ra naha quívi cua nandoto nyívi —catyí ra saduceo naha ra.

34 Tacan tan nacahan ra Jesús, tan catyí ra:

—Ihya nu ñuhu ñayívi, rayíi tan ñaha tindahá ñi. 35 Maa tyin nyívi tsa nacatsí Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha. 36 Tan nduve tuhun tsiihí iyó ndacan tyin cua cuvi ñi tumaa ángel. Tan cua cuvi ñi sehe Nyoo tyin nandoto ñi. 37 Tan tsa cuenda tuhun tsa nandotó ndiyí. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyívi tsiihí cua nandoto ñi. Tyin catyí ra: “Jutu yo Nyoo cuenda ra

Abraham, tan cuenda ra Isaac, tan cuenda ra Jacob”, catyí ra Moisés.

38 Tacan catyí ra tyin Nyoo, ñavin Nyoo cuenda nyívi tsiihí cuví ra. Nyoo cuenda nyívi nyito cuví ra. Tyin tsa cuenda Nyoo tandíhi yo tan nyito añima yo vasu tsa tsihí cuñu ñuhu yo —catyí ra Jesús.

39 Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

40 Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo

(Mt. 22:41-46; Mr. 12:35-37)

41 Tacan tan tsicá tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra?

42-43 Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahán tsanaha.

44 ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23:1-36; Mr. 12:38-40, Lc. 11:37-54)

45 Tandíhi nyívi tsiñi ñi tsa cahan ra Jesús tsihin ra tsicá tsihin ra nu cahan ra tyehen:

46 —Jaha ndo cuenda tsi ndo tsihin ra maestro cuenda ley vehe

ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñí ra naha tsa cuhva nyivi yucú nuyahvi nacumi tsi ra naha tsihin tsa jaha ñi tsa ñayivi tsi ra naha. Tan nanducú ra naha tyayu vaha cunyecú ra naha tsitsi vehe ñuhu, tan nu cuahán ra naha vico. **47** Tan naha tsicán tahvi ra naha tsi Nyoo nu tuví, tsa cuñí ra naha tsa nyehe nyivi tan catyí ñi tyin vaha xaan nyivi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihi yí tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

Tsa jamañi iin ñaha ndaahvi tsa tsihi yí

(Mr. 12:41-44)

21 ¹ Tan nyehe ra Jesús tyin cuaha xaan nyivi cuca tyihí ñi xuhun tsitsi caja tsa nyí tsitsi vehe ñuhu cahnu. ² Tan nyehe tucu ra tsi iin ñaha ndaahvi tsa tsihi yí. Tan tyihí ña uvi taahan ñi xuhun nyihi. ³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can. ⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

Nu cahan ra Jesús tyin cua tani vehe ñuhu cahnu

(Mt. 24:1-2; Mr. 13:1-2)

⁵ Tacan tan juhva nyivi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyivi. Tacan tan catyí ra Jesús:

⁶ —Coo quivi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

Tsa cua cuvi tsa ndi cumañi ca naa ñuhu ñayivi

(Mt. 24:3-28; Mr. 13:3-23)

⁷ Tacan tan nducú tuhun nyivi tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Naca tan coto ndi tatun tsa cuyatyin tsa naa ñuhu ñayivi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyivi tsi ndo. Tyin cuaha xaan ra cua quitsi, tan cua cuatyí ñu ra naha sivi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñí naa ñuu ñayivi”, cua catyí ra. Maa tyin ña cunyicun ndo tsi ra naha. ⁹ Tan quivi cua ñihi tuhun ndo tyin tsa iyó cuatyí tan ñihi cañi tahan nyivi, ña nayuhvi ndo. Tyin tandihí can taahán tsi cuvi tsa jihna ñi. Maa tyin cumañi ca tsaa quivi tsa cua naa ñuhu ñayivi.

¹⁰ Tan catyí tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuatyí. ¹¹ Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyivi tsa yuuhví ityi andivi. Tan cuaha xaan tsa iyo nahnu tsa ña tuhvá nyivi nyehe tan cua nyehe ñi. ¹² Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihí ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu. ¹³ Tacan tan cuví cahan ndo tuhun yu tsihin ñi. ¹⁴ Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican. ¹⁵ Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo

tan ña cuvi jaha nahnu tsi ndo.

16 Maa tyin nyivi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuvi yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihf nyooho cua cahñi nyivi tsi ndo.

17 Tandihì nyivi tan ndasi cua cuñi ñi nyehe ñi tsi ndo tsacatyì yuhu.

18 Maa tyin ndi intuhun ixi jiñi ndo tan ña cua cunaa. **19** Tatun ña ndu uvi iñi ndo tsa nyicun ndo tsi yu, cua cacu ndo.

20 Quivi cua nyehe ndo tyin ñi canduvi yuhu ñuu Jerusalén ihya nyecú andarú, coto ndo tyin tsa cuñi naa ñuu ihya. **21** Tan nyivi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. **22** Tyin yacan cuvì quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihì cuhva catyì nu tutu Nyoo. **23** Tan ndahvi ñiñaha tsa ñuhu sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihì nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. **24** Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuvì, cua cuyucu ñi ñuu Jerusalén ihya nda cuanda quivi tsa catyì maa Nyoo.

Nacaa cua quitsi Rayiì tsa quee nda gloria inga tsaha

(Mt. 24:29-35, 42-44; Mr. 13:24-37)

25 Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. **26** Tan

cua cúu naaha ñi tsihin tsa yuuhví ñi tsa tsicá iñi ñi náa ndihì tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan. **27** Tacan tan cua nyehe ñi tsi yuhu, Rayiì tsa quee nda gloria, vatsí nuu yu tsitsi vico tsihin tunyee iñi Nyoo, tan tsihin tsa cahnu cuvì ra. **28** Tan cuhva tsa cua quitsaha yacan tan jandu iin ndo iñi ndo tan cusii iñi ndo tyin numi xaan cua cacu ndo —catyì ra.

29 Tacan tan tsaha cuenda ra Jesús iin cuhva ihya, tan catyì ra:

—Jaha ndo cuenda yutun higuera, tsihin tandihì ca yutun. **30** Tatun tsa nduyutyá numa tun tsa cuyatyin cuun savi. **31** Tan tacan tucu nyooho, tatun tsa nyehe ndo tyin tsa quitsaha cuvì tandihì tsa cahñan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

32 Maa tyin tsa nditsa catyì yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi. **33** Coo quivi cua naa andivi tan ñuhu ñayivi, maa tyin tuhun caahán yu, ña cua cundihì tsi.

34 Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo.

35 Tyin tacan cua cuvi, tandihì nyivi iyó nu ñuhu ñayivi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi. **36** Maa tyin nyooho cūatu ndo.

Ndācan tahvi ndo tsi Nyoo tandihì quivi, na jacacu ra tsi ndo. Tan ña nyehe ndo tandihì tundoho tsa cua coo. Ndācan tahvi ndo, tacan tan cua cuvi tsaa ndo nu nyaá yuhu, Rayiì tsa quee nda gloria —catyì ra Jesús.

37 Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo. 38 Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

Nu cua xico ra Judas Iscariote tsi ra Jesús

Mt. 26:1-5, 14-16; Mr. 14:1-2, 10-11; Jn. 11:45-53)

22 ¹ Tan tsa nyanaá yatyin quivi tsa cua coo vico pascua, vico nu tuhvá nyivi tsatsí paan tsa nduve yutsan iya yihí. ² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyivi.

³ Tacan tan quihví nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsi ra Jesús. ⁴ Tan nu ihya, tsahán nu tsicahán nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha. ⁵ Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas. ⁶ Tan ra Judas ndoo ra vaha. Tan quitsahá nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Tan tsaá quivi tsa cuví vico tsa tsatsí nyivi paan tsa nduve yutsan iya yihí. Tan juvin ñi quivi ican tuhvá ñi tsahñi iin mbee luhlu tsa vico pascua can. Tyin catsi ñi tsi tí. ⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹ Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo? —catyí ra naha.

¹⁰ Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihví ndo vehe nu quihví ra. ¹¹ Tan catyí ndo tsihin tsitoho vehe can: “Ra cuví Maestro, cuñi ra coto ra numaa nyaá quartu nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra.

¹² Tacan tan cua janaha ra iin quartu cahnu ityi síqui, nu tsinu uvi pisu tsi ndo. Tan tsa nduvahá maa tsi. Tan ndacan cua javaha ndo tsa cuxiñi yo —catyí ra tsihin ra naha. ¹³ Tacan tan cuahán ra naha. Tan nañihi ra naha tandihi tumaa tsa cahán ra Jesús. Tacan tan na icá vaha ra naha tsa cuxiñi ra naha cuenda vico pascua.

¹⁴ Tacan tan tsa tahán tsi cuhva tsa cuxiñi ra Jesús tsihin tandihi ra tavá tyiñu ra, tsinyecu ra naha yuhu mesa. ¹⁵ Tacan tan catyí ra Jesús:

—Cuñi xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu. ¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quihin ra iin vasu vinu. Nacuhvá ra tyahvi nyoo tsi Nyoo. Yahá can tan catyí ra tsihin ra nyecú tsihin ra:

—Quihin ndo tsehe. Tan coho ndo luxu luxu. ¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

19 Yahā can tan quih̄in ra paan, tan tsahā ra tyahvi nyoo tsi Nyoo, tan tsahnyā sava ra can. Tsahan tsahā ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua kuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

20 Tan tsa yahā cuxiñi ra naha, tacan tan quih̄in ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

21 Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. 22 Tyin yuhu, Rayī tsa queē nda gloria, cua tahan yu tumaa tsa nyaá maa tsa cua tahan yu. Maa tyin jndahvi ra tsa cua nacuhva cuenda tsi yu! —catyí ra Jesús.

23 Tacan tan ra tsicá tsihin ra Jesús quitsahā nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahān yuhu tahan ra tsicá tsihin ra Jesús, yóo ra cahnu ca cuví

24 Yahā can tan quitsahā caahán yuhu tahan ra tsicá tsihin ra Jesús, ndáa ra cahnu ca cuví. 25 Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyí nyivi tyin jatyinyeé ra naha tsi ñi. 26 Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca

ñaha ndo, cuñí tsi tsa cuví ndo musu tandīhi ndo. 27 Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

28 Maa tyin nyooho cuví ndo tsa nyecú tsihin yu tandīhi nu nyehē yu tundoho. 29 Yacan cuenda, yuhu tsahā yu iin nu cua cundaca ñaha ndo tumaa tsa tsahā Jutu yu tsa cundaca ñaha yu. 30 Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyí ra Pedro tyin ña nacoto ra tsi ra

(Mt. 26:31-35; Mr. 14:27-31;
Jn. 13:36-38)

31 Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsicān ndatu nu tsi Nyoo tsa nducu kuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. 32 Maa tyin tsicān tahvi xaan yu tsi ra tsa cuenda un, na ña jandīhi un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandīhi ra naha tsa tsinú iñi ra naha tsi yu —catyí ra Jesús tsihin ra Simón.

33 Tan ra Simón catyí ra tsihin ra: —Jutu Mañi yu, tsa ndu iin vaha iñi yu tsa cahun yu tsihin un vasu vehe caa, vasu cúu yu tsihin un —catyí ra.

34 Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñí tsa cuhva tsa cua nacuhva cuenda ra Judas tsi ra Jesús

35 Tacan tan tsicā tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quiví tsa jacuhun yu tsi ndo tsa cahān ndo tsihin nyiví, tan nduve tsa tsindaha ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quiví can? —catyí ra Jesús.

—Nduve —catyí ra naha.

36 Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo. 37 Tyin catyí yu tsihin ndo, tyin tandihí tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyiví tsi ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihí tsa catyí tsi tsa cuenda yu cua cundaa tsi —catyí ra.

38 Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

Nu tsicān tahvi ra Jesús tsi Nyoo nda Getsemaní

(Mt. 26:36-46; Mr. 14:32-42)

39 Tacan tan quitā ra Jesús vehe nu nyí ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. 40 Tan tsa tsaā ra naha ndacan, catyí ra tsihin ra naha:

—Ndaçan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

41 Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan

tsicuiñi tsi ra. Tan quitsahā caahán ra tsihin Nyoo, 42 tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuvi cuhva cuñi maa yu. Na cuvi cuhva cuñi maa un —catyí ra Jesús.

43 Tacan tan quituví iin ángel Nyoo, tyin cuhva ra tunyee iñi tsi ra Jesús. 44 Tan tsitsi tsa nyehé xaan ra Jesús tundoho tsa cuihaya xaan cuñi ra, tan ñihi ca tsicān tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñiñi.

45 Tacan tan nduvitā ra tsa ndihí cahān ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuihaya xaan cuñi ra naha, ña cunyeē iñi ra naha ñumaahna tan quixí ra naha.

46 Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndaçan tahvi ndo tsi Nyoo, tyin tacan tan ña cuvi jaha canaa nu ña vaha tsi ndo.

Nu tsahā cuenda ra Judas tsi ra Jesús tsi nu xaan iñi tsi ra

(Mt. 26:47-56; Mr. 14:43-50; Jn. 18:2-11)

47 Ndi caahán ca ra Jesús yacan, tan tsaā cuaha ra catsaā. Tan ityi nuu, vatsí nu Judas, iin ra tsicá tsihin ra Jesús. Tan natuhvā nu nu nyaá ra Jesús tyin tyayuhu nu tsi ra. 48 Tacan tan cahān ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa quee nda gloria tsi nu xaan iñi tsi yu nahanu? —catyí ra Jesús.

49 Tan ra nyecú tsihin ra Jesús quitsahā nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

50 Tacan tan iin ra can, tsahnya ra

soho tsiyo cuaha iin ra tsa cuví musu ra jutu tsaahnu tsa cuví ityi nuu.

51 Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tiin ra Jesús soho ra ican tan janduvahā ra itsi. 52 Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahan tsitiin tsi ra Jesús. Tan catyí ra Jesús tsihin ra naha:

—¿A vatsí tiin ndo tsi yu tumaa tiin ndo iin ñasuhu? tyin ndaha ndo mityi tan yutun. 53 Ndihi quivi tsinyii yu tsitsi vehe ñuhu cahnu, tan ña tiin ndo tsi yu ndacan. Maa tyin vityin tsaq cuhva tsa ndunaq tyin nu ña vaha ndacá ñaha. Yacan cuenda vatsí tiin ndo tsi yu.

Nu cahān ra Pedro tyin ña nacotó ra tsi ra Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Tacan tan tiin ra naha tsi ra Jesús. Tan tsindacā ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahān ra nyicún ra. 55 Tan tsa tsaq ra naha vehe ra jutu tsaahnu tsa cuví ityi nuu, jatahan ra tsa cuví musu naha ra ñuhū nuquehe. Tan tsinyecu ra naha tani canduvi nu cayú ñuhū can. Tan tsinyaa ndihi ra Pedro tyañu ra naha. 56 Tan tsa ndunditsín tsa cayú ñuhū ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

57 Maa tyin ra Pedro catyí ra:

—Yuhu ña nacotó yu tsi ra can.

58 Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

59 Tan tsa yahā iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

60 Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacu ñi iin tsitooho.

61 Tacan tan ra Jesús nanyehe ra nuu ra Pedro. Tan ra Pedro nducuhun iñi ra tsa cahān ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

62 Tacan tan quitā ra Pedro ityi tsata vehe. Tan tsacu xaan ra tsa cuihya cuñi ra.

Nu tsacu nducu nyaa ra naha tsi ra Jesús tan cañi ra naha tsi ra

(Mt. 26:67-68; Mr. 14:65)

63 Tacan tan ra jahá cuenda tsi ra Jesús, quitsahā tsacú nducu ra naha tsi ra. Tan cañi ra naha tsi ra.

64 Tsañi ra naha jahma nuu ra, tan quitsahā cañi ra naha nuu ra. Tan catyí ra naha tsihin ra:

—Nacoto yóo ra cañi tsi un —catyí ra naha tsihin ra.

65 Tan cuaha xaan ca maa tsa cahān nyaa ra naha tsi ra.

Nu tsicā tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26:59-66; Mr. 14:55-64; Jn. 18:19-24)

66 Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahān tsihin ra nda nu cua coo Junta Cahnu. Tan

nducū tuhun ra naha tsi ra Jesús:

67 —Cātyi tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juvin yu cuví, ña cua tsinu ñni ndo tsa cahan yu. 68 Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu.

69 Maa tyin vityin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihi tunyee ñni —catyí ra Jesús.

70 Tacan tan tandihi ra naha tsica tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

71 Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa cahan ra —catyí ra naha.

Nu nyehe ra Pilato tyin nduve cuatyí ra Jesús

(Mt. 27:1-2, 11-14; Mr. 15:1-5; Jn. 18:28-38)

23 ¹ Tacan tan nduvita tandihi ra naha. Tan tsindaça ra naha tsi ra Jesús nda nu nyaá ra Pilato, ra ndacá ñaha quee nda ñuu Roma.

² Tacan tan quitsaha tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví ra Cristo, ra tsa jaquitsi Nyoo tyin cuví ra rey —catyí ra naha tsihin ra Pilato.

³ Tacan tan ra Pilato tsica tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

⁵ Maa tyin jañihi ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyivi. Tsa jihna ñi quitsaha caahán ra tsihin nyivi iyó ñuu tsa cayucú Galilea. Tan nani ityi vatsí ra, jacuahá ra tsi nyivi. Tan vityin tsa tsaá ra Judea ihya tan juvin ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

⁶ Cuhva tsa tsiñi ra Pilato yacan, tan nducū tuhun ra tatun ra Galilea cuví ra Jesús. ⁷ Tan catyí nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyi ra ñuu Jerusalén. ⁸ Tan cuhva tsa nyehe ra Herodes tsi ra Jesús, si xaan cuñi ra. Tyin tsanaha xaan cuñi ra nyehe ra tsi ra. Tyin ñihi tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús. ⁹ Tan cuaha xaan tsa nducū tuhun ra Herodes tsi ra Jesús. Maa tyin ra Jesús ña nacahan maa ra.

¹⁰ Ican nyecú ndihi tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaá xaan ra naha cuatyí tsi ra Jesús.

¹¹ Tacan tan ra Herodes tsihin andaru cuenda ra, tsacu nducu ra naha tsi ra. Tan jacunditsi nuu ra naha iin jahma yahvi tan si caá tsi ra Jesús, tumaa caá tsa tuhvá rey tsinditsi. Tacan tan jacuhun nyico ra

Herodes tsi ra nda nu nyaá ra Pilato. **12** Tan quiví can ra Pilato tsihin ra Herodes nduvahá iyó ra naha. Tyin nu quitsí quiví, ña cuví nyehé tahan ra naha tsi ra naha.

Nu cutuñi ra Jesús tyin cua cúu ra

(Mt. 27:15-26; Mr. 15:6-15;
Jn. 18:39-19:16)

13 Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihi nyivi. **14** Tan catyí ra tsihin ñi:

—Nyooho quitsí ndaca ndo tsi ra ihya nu nyaá yu. Tan catyí ndo tyin jatíví ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahān ndo can nañihí yu. **15** Tan ndi ra Herodes tan ña nañihí ra ndi intuhun cuatyí ra. Yacan jaquitsí nyico ra tsi ra inga tsaha nu nyaá yu. Nyehē ndo tyin nduve cuatyí ra. Tan yacan ña taahán tsi tsa cúu ra. **16** Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

17 Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá. **18** Maa tyin tandihi nyivi iin caa ñi canā tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

19 Tan ra Barrabás can nyíí ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyivi. **20** Tan ra Pilato cuñi ra jaña ra tsi ra Jesús. Tan quitsahā caahán ra tsihin nyivi can inga tsaha tyin cua jaña ra tsi ra.

21 Maa tyin nyivi tsaa ca canā tsaa ñi: —¡Tyāa tsi ra nu cruu. Na cúu ra nu cruu!

22 —¿Náa tsa ña vaha javahā ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

23 Maa tyin nyivi canā tsaa ca ñi,

tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñi ñi tyin canā tsaa xaan ñi. **24** Tacan tan javahā ra Pilato cuhva cahān ñi. **25** Tan jañā ra tsi ra Barrabás, ra tsa nyíí vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

Nu tyāa ra naha tsi ra Jesús nu cruu

(Mt. 27:32-44; Mr. 15:21-32;
Jn. 19:17-27)

26 Tacan tan quihñi andaru tsi ra Jesús. Tan cuahán ra tsihin ra naha. Tan tñin tucu ra naha tsi iin ra ñuu Cirene nañí Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

27 Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuiihya cuñi ñi tsacatyí tundoho tahān ra. **28** Maa tyin ra Jesús nanyehē ra nuu ñi. Tan catyí ra tsihin ñi:

—Tandihi nyooho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo. **29** Tyin cua quitsi quiví cua nyehe xaan ndo tundoho. Tan cua cahan nyivi tsi tandihi ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundoho nyehé yo vityin”, cua catyí ñi tsihin ndo. **30** Tyin quiví can cua cuñi ñi nduva yucu tsata ñi tan quihvi xeehe ñi. **31** Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

32 Tan quihñi tucu andaru can naha ra tsi uvi taahan ra iyó cuatyí,

tyin cahñi ndihi ra naha tsi ra naha iin caa ñi tsihin ra Jesús. **33** Tacan tan tsaq̄ ra naha iin nu nañi Yiqui Jiñi Ndiyí. Tan ican tyaā ra naha tsi ra Jesús nu cruu. Tan tacan tyaā ndihi tucu ra naha tsi nduvi taahan ra iyó cuatyí can naha ra. Iin ra tyaā ra naha nuu cruu xiin cuaha ra Jesús. Tan inga ra can tyaā ra naha nuu cruu xiin satyin ra. **34** Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tavā ra naha suerte tsihin jahma ra Jesús, tyin nyehe ra naha ndáa ra cua jaha canaa jahma can. **35** Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

36 Tan juvin ñi cahān nyaá ra andaru can naha ra tsi ra. Tan natuhvā ra naha nu ticaá ra. Tan tsahā ra naha vinu iya tsihi ra. **37** Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

38 Tan jiñi cruu nu nyaá ra Jesús nyaá iin tsa tyaā ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

39 Tan iin ra tsa iyó cuatyí tsa nyaá nu cruu xiin ra Jesús, quitsahā caahán nyaa ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihi tsi nyuhu —catyí ra can.

40 Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin. **41** Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

42 Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

43 Tacan tan ra Jesús nacahān ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso nu yucú añima nyivi tsinú iñi tsi Nyoo, —catyí ra Jesús tsihin ra.

Nu tsihi ra Jesús

(Mt. 27:45-56; Mr. 15:33-41;
Jn. 19:28-30)

44 Tacan tan cuhva ora quitsahā ndunaá nu ñuhu ñayivi, nda cuanda caa uñi tsa tseñi. **45** Tyin ndunaq̄ ñicanyii. Tan jahma tsa ticaá tsitsi vehe ñuhu cahnu, ndatq̄ sava tsi. **46** Tacan tan canq̄ tsa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahān ra tacan, tan tsihi ra.

47 Tan ra cuví capitán cuenda andaru can naha ra, nyehe ra tandihi tsa cuví. Tan jacahnū ra tsi Nyoo, tan catyí ra:

—Nduve tsa cuii cuatyí ra ihya tsicoq̄ —catyí ra.

48 Tan tandihi nyivi tsa nyecú ican, nyehe ñi tsa cuví. Tan cuahán ñi tan quitsahā cañi ndaha ñi yiqui nyica ñi. Tyin tsitó ñi tyin ña vaha tsa javahā ñi tsihin ra Jesús. **49** Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cuví can.

Nu cua cutsi ra naha tsi ra Jesús

(Mt. 27:57-61; Mr. 15:42-47;
Jn. 19:38-42)

50 Tan iyó iin ra vaha, nañi ra José. ra ñuu Arimatea tsa canyíi Judea. Tan cuví ra iin ra cuví ityi nuu cuenda Junta Cahnu nyívi Israel.

51 Tan ra José can ndatú ra quívi tsa cua cundaca ñaha Nyoo. Tan ña ndoq ra vaha tsihin tsa javahá ra cutahán tsihin ra, ra cuví jutu tsa cuví ityi nuu naha ra. 52 Tacan tan tshahán ra José can tsindacán ra cuñu ñuhu ra Jesús tsi ra Pilato. 53 Tan yahá tsa januyú ra José can cuñu ñuhu ra Jesús nu cruu, cavá nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javahá nyívi tan ñaha ca quíhvi ndíyi tsitsi can. 54 Tan viernes cuví can, quívi tsa janduvahá nyívi tsa catsi ñi tsa sabaru, quívi quitatú ñi. Tan tsa cua tahan tsi quívi can.

55 Tan tandíhi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyíi cuñu ñuhu ra. 56 Tan cuanuhú ñi nda yuvehe ñi. Tan janduvahá ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quívi can tumaa catyí maa tuhun tsa tsahá cuenda Nyoo tsi yo.

Nu nandoto ra Jesús

(Mt. 28:1-10; Mr. 16:1-8; Jn. 20:1-10)

24 1 Tsa tuví tuingu quívi nu quítsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi. 2 Tan cuhva tsa tsaá ñi, nyehe ñi tyin tsa cuatsiyó yuu tsa ndasí yuhu ñaña can. 3 Tan quíhvi ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús. 4 Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituví uvi taahan rayíi nuu ñi. Tan xiñu xaan jahma nditsí ra naha. 5 Tan

tsihin tsa yuuhví ñi, tan tsaquín ñi jíñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndíyi? 6 Nduve ca ra nyíi ihya, tyin tsa nandoto ra. Ndúcuahun iñi ndo tsa cahán ra tsihin ndo quívi tsicá ra Galilea. 7 Catyí ra tyin taahán tsi nacuhva cuenda nyívi tsi ra ndaha ra iyó cuatyí naha ra. Tyin cuví ra Rayíi tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quívi cua nandoto ra. Tacan catyí ra tsihin ndo —catyí ángel can naha ra tsihin ñi.

8 Tacan tan nducuhun iñi ñi tsa cahán ra Jesús quívi can. 9 Tan cuanuhú ñi. Tan nacatyí tuhun ñi tsihin tsa utsi iin ra tsa tavá tyiñu ra Jesús tan tsihin tandíhi ca nyívi tsa tsinyicun tsi ra. 10 Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. 11 Maa tyin ra tavá tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

12 Maa tyin ra Pedro nduvitá ra tan tsinú xaan ra cuahán ra cua nyehe ra tsitsi ñaña nu tinyíi ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasí ña ra canyíi nda sava. Tacan tan cuanuhú ra yuvehe nu yucú tandíhi ca ra naha. Tan iyo xaan cuñi ra tsa cuví.

Tsa cuví ityi cuahán ñuu Emaús

(Mr. 16:12-13)

13 Juvín ñi maa quívi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén. 14 Tan cuahán ra naha tan natuhún tahan ra naha náa ndíhi tsa cuví. 15 Tan tsitsi tsa natuhún ra

naha, tan ra Jesús tahañ ra tsi ra naha ityi cuahán ra naha. **16** Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús. **17** Tacan tan nducú tuhun ra Jesús tsi ra naha:

—¿Náa natuhún xaan ndo?

¿Nacuenda cuiihya xaan cuñí ndo? —catyí ra tsihin ra naha.

18 Tan iin ra tsa nañí Cleofas nacahañ ra tan catyí ra:

—Tandihi nyivi tsitó tsa cuví ñuu Jerusalén. ¿A ra inga ñuu cuví yooho tyin ña tsító un tsa cuví? —catyí ra.

19 Tacan tan catyí ra Jesús tsihin ra naha:

—¿Náa cuví?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan tsihin tunyee iñi cahnu Nyoo javahañ ra tsa cahnu tan cahañ ra tsa vaha nuu Nyoo tan nuu tandihi nyivi. **20** Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsahañ cuenda ra naha tsi ra tsi ra ndacá ñaha cuenda ñuu Roma. Tan tsahñí ra naha tsi ra. Tan tsihi ra nu cruu. **21** Tan vityin tsa quita ñi quivi tsa cuví yacan. Tan nyuhu cuñí maa ndi tyin juvin ra cua jacacu tsi yo tsa cuví yo nyivi Israel. **22** Maa tyin vityin iyo xaan cuñí ndi tsa nacatyí juhva ñiñaha tsihin ndi. Tyin maa ñi tsahañ ñi nu ñaña ra tsa tuví. **23** Tan nduve ca cuñu ñuhu ra canyí. Tan nacatyí tuhun ndihi ñi tyin nyehé ñi uvi taahan ángel. Tan catyí ángel can naha ra tsihin ñi tyin ra Jesús nyito ra. **24** Yahañ yacan tan tsahañ tucu juhva ra cutahañ tsihin ndi tsinyehé ra naha nu ñaña. Tan nyehé ra naha tyin tsa nditsa cuví tsa cahañ ñiñaha can. Maa tyin ña nyehé ra naha tsi ra Jesús —catyí ra naha tsihin ra Jesús.

25 Tacan tan catyí ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cahañ ra cuví ndusu yuhu Nyoo tahañ tsanaha. **26** ¿A ña tsitó ndo tyin taahán tsi tsa nyehé jihna ra Cristo tundo? Yaha can tan tahan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

27 Tacan tan quitsahañ tsahá cuenda ra náca cuahán tuhun maa ra nu tutu Nyoo. Tan quitsahañ caahán ra tuhun tsa tyañ ra Moisés tahañ tsanaha. Tan yahañ can tan cahañ ra tuhun tandihi libru tsa tyañ ra cuví ndusu yuhu Nyoo.

28 Tan cuhva tsa tsañ ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

29 Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoq tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha. **30** Tan cuhva tsa tsinyañ ra yuhu mesa tsihin ra naha, quihin ra paan. Tan tsahañ ra tyahvi nyoo tsi Nyoo. Tan tsahnú sava ra, tan tsahañ ra tsi ra naha. **31** Tan iin yaha ñi nuñá nuu ra naha tan nacoto ra naha tsi ra Jesús. Maa tyin ra Jesús nañ ihñi ñi ra. **32** Tacan tan quitsahañ natuhún tahan ra naha tan catyí ra naha:

—Yacan cuenda vaha xaan cuñí añima yo tsa vatsí ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

33 Ña ndatú ca ra naha, tan cuanuhú ra naha nda ñuu Jerusalén. Tan ñihí tahan ra naha tsihin tsa utsi iin ra tsa tavañ tyiñu ra Jesús, ndu iin ra naha tsihin juhva ra nyecú tsihin ra naha. **34** Tacan tan tsa utsi iin ra can naha ra nacatyí tuhun ra naha tsihin ra tsa ndi tsañ can naha ra:

—Nditsa tyin Jutu Mañi yo

nandoto ra. Tyin ra Simón nyehe ra tsi ra —catyí ra naha.

35 Tacan tan ra tsa ndi tsaꝯ can nacatyí tuhun ndíhi ra naha nácaa natuhun ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnꝯ sava ra paan.

Nu quituví ra Jesús nu yucú ra tsicꝯ tsihin ra

(Mt. 28:16-20; Mr. 16:14-18; Jn. 20:19-23)

36 Ndi natuhún ca ra naha yacan tan quituví ra Jesús tyañu ra naha. Tan tsahꝯ ra nacumi tsi ra naha, tan catyí ra:

—Na coo tsa vaha añima ndo.

37 Tacan tan nayuhví xaan ra naha. Tan cuñí ra naha tyin tatyí ndíyi cuví can. 38 Tacan tan catyí ra Jesús tsihin ra naha:

—¿Nacuenda yuuhví xaan ndo?

¿Tan nacuenta tsicá xaan iñi ndo?

39 Nyehe ndo ndaha yu. Tan nyehe ndo tsaha yu. Tyin juvin ñi maa yu cuví. Tñin ndo tsi yu tan coto ndo. Tyin tatyí ndíyi nduve cuñu ñuhu can iyó. Tan nduve yiquí can tumaa tsa nyehé ndo tsi yuhu —catyí ra Jesús.

40 Tan cuhva tsa cahan ra yacan, tan janahꝯ ra ndaha ra tsihin tsaha ra tsi ra naha. 41 Maa tyin maa ra naha, tsa cuenda tsa iyo cuñí ra naha tan siñ cuñí ra naha, nda cuanda ña cuví ca tsinú vaha iñi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

42 Tacan tan tsahꝯ ra naha luxu tyaca tyihyo tsihin ndutya ñuñu tsi ra. 43 Tan quihin ra. Tan quitsahꝯ tsatsí ra nu nyecú ra naha. 44 Tan catyí ra tsihin ra naha:

—Tandíhi tsa tahnꝯ yu, yacan cuví

tsa catyí yu tsihin ndo quivi can. Tan catyí yu tsihin ndo tyin tacan cua cuvi, tumaa cuhva nyaá tuhun tsa tyaꝯ ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

45 Tacan tan tsahꝯ cuenda ra Jesús cuhva catyí nu tutu Nyoo. Tan cutuñi iñi tandíhi ra naha jahꝯ ra. 46 Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quivi cua nandoto ra. 47 Tan taahán tsi coto nyivi tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin sivi ra Cristo ñuu Jerusalén, yaha can tan tandíhi ca ñuu taniñ cahnu nu ñuhu ñayivi.

48 Tan catyí tucu ra Jesús tsihin ra naha:

—Tan nyoocho cuví tsandaa tsa cuenda tandíhi tsehe. 49 Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria

(Mr. 16:19-20)

50 Tacan tan ra Jesús cuahán ra tsihin tandíhi ra tsicꝯ tsihin ra nda ñuu Betania. Tan cañihí ra ndaha ra. Tan nasoco ra tsi ra naha. 51 Tan tsitsi tsa nasoco ra tsi ra naha, nandaꝯ ra andivi. 52 Tacan tan tandíhi ra naha quitsahꝯ jacahnú ra naha tsi ra. Tan siñ xaan cuñí ra naha, cuanuhu ra naha nda ñuu Jerusalén. 53 Tan tandíhi quivi tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuví tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduvj tsi iin rayii, tan rayii can cuví ra Cristo

1 ¹ Nda quivi jihna ñi, nda ndi cumañi ca coo tandihi tsa iyó, tan tsa iyó maa ra cuví Tuhun tsa Caahán Nyoo. Nyíi ra tsihin Nyoo. Tan Nyoo cuví ra. ² Tan iyó ra tsihin Nyoo nda quivi jihna ñi. ³ Tan tsihin ra, javahá Nyoo tandihi cuui maa tsa iyó. Tan nduve tsa javahá Nyoo tsa intuhun ñi maa ra. ⁴ Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhu tsa jandunditsín añaima nyivi. ⁵ Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶ Tsiicoo iin ra tsa jaquitsj Nyoo, nañi ra Juan. ⁷ Quitsj ra cuví ra tsa ndaa. Tyin cahān ra tumañi iñi cuenda ra cuví ñuhu can, tyin tacan tan tsinu iñi tandihi nyivi tsi ra. ⁸ Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra. ⁹ Tyin ñuhu nditsa can, ndi cua quitsi tsi nu ñuhu ñayivi, tan cua jandunditsín tsi añaima tandihi nyivi tsa iyó nu ñuhu ñayivi ihya.

¹⁰ Ra cuví Tuhun tsa Caahán Nyoo quitsj ra nu ñuhu ñayivi. Tan juvin ñi maa ra tsihin Jutu ra javahá ra naha ñuhu ñayivi. Maa tyin nyivi iyó nu ñuhu ñayivi ihya, ña nacoto ñi tsi ra tsa ra Cristo cuví ra. ¹¹ Quitsj ra nu iyó nyivi ñuu ra, nyivi Israel, tan ña naquihjñ vaha ñi tsi ra. ¹² Maa tyin tandihi nyivi tsa naquihjñ vaha tsi ra, tan tsinú iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo. ¹³ Juvin ñi nacacu tsaa. Maa tyin ñavin tumaa tsa cacu ñi tsa culee

ñi cuenda cuñu ñuhu ñi. Tan ndi ñavin tsa cuenda tsa cuñi iin rayii coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacu tsaa ñi jahā maa Nyoo.

¹⁴ Tan ra cuví Tuhun tsa Caahán Nyoo nanduvj ra iin rayii. Tan tsiicoo ra tsihin yo. Tan nyehē ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsiitu ra tsihin tsa nditsa tan tsa vaha. ¹⁵ Tan ra Juan can cahān ra tumañi iñi tsa cuenda ra, tan catyí ra:

—Juvin ra ihya cuví ra tsa cahān yu tuhun quivi can, tyin ra tsa vatsí ityi tsata yu, cahnu ca cuví ra tan ñavin ca maa yu. Tyin nda quivi cacu yu tan tsa iyó maa ra —catyí ra Juan.

¹⁶ Tandihi yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo. ¹⁷ Ra Moisés tsahá cuenda ra ley Nyoo tsi yo. Maa tyin ra Jesucristo tsahá ra tsa naquihñ yu tsa vaha Nyoo. Tan caahán ra tsa nditsa tsihin yo. ¹⁸ Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvin ra cuví ra tsa tsahá tsa coto yo tsi Jutu ra.

Nu caahán ra Juan, ra jacoondutyá, tumañi iñi cuenda ra Jesucristo
(Mt. 3:11-12; Mr. 1:7-8; Lc. 3:15-17)

¹⁹ Ra cuví ityi nuu tsihin nyivi Israel tsa iyó ñuu Jerusalén, tavā tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cahun ra naha nu nyíi ra Juan tan ndaca tuhun ra naha tsi ra yóo ra cuví ra. ²⁰ Tan tsiica tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua

jaquitsi Nyoo cuví yu —catyí ra tan ña tyihí xeehe ra.

21 Tacan tan tsicá tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo tahan tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicá tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

22 Tan tsicá tuhun nyico ra naha tsi ra Juan inga tsaha:

—¿Yóo ra cuví un? Tyin cuñí tsi catyí tuhun ndí tsihin ra tsa tava tyiñu tsi ndí yóo ra cuví un —catyí ra naha tsihin ra.

23 Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Ñuña ndo tsitsi añima ndo tyin tsa vatsí Jutu Mañi yo.” Tumaa cahān ra Isaías ra cuví ndusu yuhu Nyoo tuhun yu tahan tsanaha —catyí ra Juan tsihin ra naha.

24 Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan. 25 Tan tsicá tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuví tyin jacoondutyá un tsi nyivi? tan ndí ñavin ra Elías cuví un, tan ndí ñavin ra cuví ndusu yuhu Nyoo cuví un —catyí ra naha tsihin ra Juan.

26 Tan nacahan ra Juan tan catyí ra:

—Yuhu jacoondutyá yu tsi nyivi tsihin ndutya. Maa tyin mahñu ndo nyii iin ra tsa ña nacotó ndo. 27 Tan cahnu ca cuví ra can tan ñavin ca yuhu. Ña cahnu cuví yuhu ndí tsa cuví yu musu ra tan cuví ndatsi yu ñii nditsan ra —catyí ra Juan.

28 Tandihí yacan cuví nu nañí Betábara tsa canyí inga tsiyo yutya cahnu Jordán nu tsinyí ra Juan jacoondutyá ra.

Ra Jesucristo, Mbee Ticatyi Luhlu jana Nyoo

29 Tsa inga quivi nyehe ra Juan tsi ra Jesús cuahán ra nu nyii ra, tacan tan catyí ra Juan:

—Nyehe jihna ndo, ra ihya cuví Mbee Ticatyi Luhlu jana Nyoo ra tsa quihín nyaa cuatyi nyivi iyó nu ñuhu ñayivi ihya. 30 Tuhun ra cahān yu quivi catyí yu tsihin ndo tyin ityi tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoo yu. 31 Ndi yuhu tan ña nacoto yu tsi ra quivi can. Maa tyin vityin vatsí yu jacoondutyá yu tsihin ndutya tyin tacan tan nacoto nyivi Israel ñuu yu tsi ra —catyí ra Juan.

32 Tan catyí nyico ra Juan:

—Yuhu nyehe yu Tatyí Ii Nyoo tsa quitsi ityi andivi tan quitsi tsi tumaa iin paloma, tan ndoo tsi tsihin ra.

33 Yuhu ñaha ca nacoto yu yóo ra cuví ra quivi can. Maa tyin Nyoo, ra tsa tava tyiñu tsi yu jacoondutya yu tsi nyivi tsihin ndutya, catyí ra tsihin yu: “Quivi nyehe un Tatyí Ii, vatsí nuú tsi siqui iin rayii, tan ndoo tsi tsihin ra, juvin ra can cuví ra tsa cua jacoondutya tsi nyivi tsihin Tatyí Ii yu”, catyí Nyoo tsihin yu. 34 Yuhu tsa yahā nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

Ra tsa quitsaha nyicún jihna tsi ra Jesús

35 Tsa inga quivi nyii nyico ra Juan nu nyii ra tan yucú ndihí uvi taahan ra tsicá tsihin ra. 36 Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyi Luhlu jana Nyoo —catyí ra.

37 Tsa tsiñi nduvi taahan ra nyciún tsi ra Juan tsa cahān ra, tacan tan cuahan ra naha cuanyicun ra naha tsi ra Jesús. 38 Tacan tan nanyehe ra Jesús ityi tsata ra, tan nyehe ra tyin nyciún ra naha tsi ra, tan catyí ra:

—¿Náa nanducú ndo?

Tacan tan nacahān ra naha tan catyí ra naha:

—Maestro, ¿numaa iyó un?

39 Tan catyí ra Jesús tsihin ra naha: —Cōhon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaā ra naha ndacan tumaa caa cumi tsa tseñi.

40 Iin ra tsa tsiñi tsa cahān ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro.

41 Tan ra Andrés numi xaan tsinanducū ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñí tsi catyí, ra Cristo, o cuñí tucu tsi catyí, ra tsa nacatsi vaha Nyoo tyin quitsi ra cuví ra rey tsa cuenda yo.

42 Tacan tan quihin ra Andrés tsi ra Simón yañi ra cuahán tsihin ra nu nyíi ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, tumaa iin yuu cahñu.

Nu canā ra Jesús tsi ra Felipe tan ra Natanael

43 Tsa inga quivi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nycicun un tsi yu —catyí ra.

44 Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro. 45 Tacan tan tsahān ra Felipe tsinanducū ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahān tucu ra cuví ndusu yuhu Nyoo tuhun tahān tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

46 Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahān ra Felipe tan catyí ra:

—Naha tan nyehe un —catyí ra.

47 Tacan tan tsa cua cuyatyin ra Natanael nu nyíi ra Jesús. Tan nanyehe ra Jesús tyin vatsí ra, tan quitsahā catyí ra:

—¡Jihna ndo! Ihya vatsí iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

48 Tacan tan tsicā tuhun ra Natanael tsi ra:

—¿Nacaa tsa tsitó un tsi yuhu?

Tan nacahān ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyíi un tsaha yutun higo can —catyí ra Jesús tsihin ra.

49 Tacan tan quitsahā catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyívi Israel.

50 Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

51 Tan catyí ra Jesús tsihin ra naha:

—Tsa nditsa catyí yu tsihin ndo

tyin nyooho cua nyehe ndo cua nuña andivi tan cuaha xaan ángel Nyoo cua ndaa, tan cua nuu ra naha siqui yuhu Rayii tsa quee nda gloria —catyí ra Jesús tsihin ra naha.

Nu iyó vico tindaha ñuu Caná iin ñuu tsa canyii Galilea

2 ¹ Tsa yaha uñi quivi tan tsicoo iin vico tindaha ñuu Caná tsa canyii Galilea. Tan ican nyii sihi ra Jesús. ² Tan nyivi javaha vico can cana ndihi ñi tsi ra Jesús tan tsihin tandihi ra tsicá tsihin ra tyin kuhun ra naha. ³ Tacan tan cuahán ra naha. Tan tsitsi tsa yucú ra naha nu iyó vico can, tan ndihi vinu ñi javaha vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴ Tan catyí ra Jesús tsihin ña:

—¿Náa tsa ndihi iñi yo yacan, Miyán? Tyin ñaha ca tsaa hora yu —catyí ra tsihin ña.

⁵ Maa tyin sihi ra cahan ña tsihin ra tsa tyihí mesa nu iyó vico can naha ra:

—Javaha nyooho tandihi tsa cua cahan ra tsihin ndo —catyí ña tsihin ra naha.

⁶ Tan nyecú iñu quisi yuu nahnu tsa yihí ndutya tsa tuhvá ra Israel naha ra tsatyíñu nu nacatyá xaan ra naha ndaha ra naha kuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can.

⁷ Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutya —catyí ra tsihin ra naha.

Tacan tan tsitu cuii quisi can jaha ra naha. ⁸ Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan icá ra naha. ⁹ Ra cuví ityi nuu cuenda vico can tsihi ra naha

ndutya tsa nanduví vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can. ¹⁰ Tan catyí ra tsihin ra:

—Tandihí nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

¹¹ Tsa javaha ra Jesús ñuu Caná tsa canyii Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyivi. Tan ra tsicá tsihin ra tsinu iñi ra naha tsi ra tyin ra ican cuví ra tsa jaquitsi Nyoo.

¹² Tsa yaha yacan tan cuahán ra ñuu Capernaum tsihin sihi ra tan tsihin yañi ra. Tan cuahan ndihi ra tsicá tsihin ra. Tan ican tsiyucu ñi juhva quivi.

Nu jacunu ra Jesús tsi nyivi xicó nuquehe yuvehe ñuhu cahnu

(Mt. 21:12-13; Mr. 11:15-18;
Lc. 19:45-46)

¹³ Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén. ¹⁴ Tsa tsaá ra ñuu can, quihvi ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiquí, mbee ticatyí, tan paloma. Tan yucú ndihi tucu nyivi nasamá xuhun.

¹⁵ Tsa nyehe ra Jesús tandihi yacan, tacan tan javaha ra iin yoho. Tan tsihin yoho can jacunu ra tsi tandihi nyivi nuquehe vehe ñuhu iin cahnu ñi tsihin mbee tan tsihin indiquí jana ñi. Tan ñi nasamá xuhun can, jatucuatyi ra xuhun ñi nu ñuhu tan janduvá ra mesa ñi. ¹⁶ Tan catyí ra tsihin ñi xicó paloma:

—¡Tava ndo paloma can ihya! ¡Ña

javaha ndo vehe Jutu yu tumaa iin nuyahvi! —catyí ra tsihin ñi.

17 Tacan tan ra tsicá tsihin ra, nducuhun iñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun iñi ra naha.

18 Tacan tan ra cuví ityi nuu tsihin nyivi Israel quitsahá tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsahá Nyoo ndatu tsi un tsa javaha un yacan? —catyí ra naha tsihin ra.

19 Tan nacahan ra Jesús tan catyí ra:

—Caní ndo vehe ñuhu ihya, tan tsitsi tsa uñi quivi ñi tan cua janduvita nyico yu itsi inga tsaha —catyí ra tsihin ra naha.

20 Tacan tan quitsahá catyí ra nyecú ican naha ra tsihin ra:

—Uvi xico iñu cuiya jahá tyiñu ra naha tan tsinu vehe ñuhu ihya. ¡Tan yooho catyí un tyin tsitsi tsa uñi quivi ñi tan cua janduvita un itsi inga tsaha! —catyí ra naha tsihin ra.

21 Maa tyin ñavin tuhun vehe ñuhu can cahán ra Jesús, tyin cahán ra tuhun cuñu ñuhu ra. 22 Yacan cuenda tandihi ra tsicá tsihin ra nducuhun iñi ra naha yacan quivi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinu iñi ra naha tsa cahán ra Jesús tan tsa nyaá nu tutu Nyoo.

Ra Jesús tsitó ra tsa iyó añima nyivi

23 Tsitsi tsa ndi nyii ra Jesús ñuu Jerusalén, quivi iyó vico pascua, cuaha xaan nyivi quitsahá tsinú iñi tsa caahán ra tsa cuenda tsa cuaha tsa iyo javahá ra. 24 Maa tyin ra Jesús ña ñi cuñi ra nyehé ra tsi tandihi ñi tyin tsitó ra cuhva tsicá iñi ñi. 25 Ña tsiñiñuhú tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi añima yo.

Nu jacuahá ra Jesús tsi ra Nicodemo

3¹ Tsicoq iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra. 2 Ra Nicodemo ihya, tsahan ra nu nyii ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quitsi un jacuahá un tsi ndi. Tyin yoñi nyivi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

3 Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsa nyivi inga tsaha, ña cua cuví nyehe ñi nu ndacá ñaha Nyoo —catyí ra.

4 Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa ra inga tsaha? —catyí ra.

5 Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsa ñi tsihin Tatyí Ii Nyoo.

6 Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsa tsihin Tatyí Ii Nyoo, Tatyí Ii Nyoo iyó añima ñi. 7 Ña cu iyo iñi un tsa caahán yu tsehe tsihin un tyin tandihi nyivi cuñi tsi nacacu tsa ñi.

8 Tumaa tsa yihí tatyí tandihi ñi ityi tan tsiñi un cucayú vatsí tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihi nyivi nacacu tsa tsihin Tatyí Ii Nyoo —catyí ra Jesús tsihin ra.

9 Tacan tan nducu tuhun nyico ra Nicodemo tsi ra inga tsaha tan catyí ra:

—¿Nacuenda caahán un tacan? —catyí ra tsihin ra.

10 Nacahan ra Jesús tan catyí ra:

—Yooho tsa cuví un maestro

cuenda nyivi Israel, taahán tsi coto un tsehe. **11** Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahán ndi tsihin ndo.

12 Tatun ña tsinú iñi ndo tsa caahán yu tuhun nu ñuhu ñayivi ihya tsihin ndo, ¿nácaa cua tsinu iñi ndo tatun cua cahan yu tuhun gloria tsihin ndo?

13 Yoñi tsahan gloria tsinyehe nácaa iyó. Intuhun ñi maa yuhu Rayii tsa quee nda gloria nyehé yu nácaa iyó gloria, tyin ndacan quee yu.

14 Tumaa tsa ticaa ra Moisés iin coo tsa tsinú tsihin caa nu yutun iin nu tsiqui, tacan cua ticaa nyivi tsi yuhu Rayii tsa quee nda gloria nuu cruu.

15 Tacan tan tandihi nyivi tsa tsinú iñi tsi yu, ña cua cunaa ñi. Tan cua coo ñi ñayivi nyito tsa ña cua naa maa.

Nyoo cuñí xaan ra tsi tandihi nyivi

16 Nyoo cuñí xaan ra tsi tandihi nyivi iyó nu ñuhu ñayivi. Yacan cuenda tsaha ra tsa cúu Sehe mañi ra nu cruu tsa cuenda ñi. Tyin tacan tan tandihi ñi tsa tsinú iñi tsi Sehe ra, ña cunaa ñi, tan coo ñi ñayivi nyito tsa ña cua naa maa. **17** Tyin Nyoo jaquitsi ra tsi Sehe ra nu ñuhu ñayivi tyin jacacu ra tsi nyivi, tan ña jaquitsi ra tsi ra tsa jacunaa ra tsi ñi.

18 Yacan cuenda nyivi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyivi tsa ña tsinú iñi tsi yu, tsa cunaa ñi tyin ña tsinú iñi ñi tsi yu tsa cuví yu Sehe mañi Nyoo. **19** Nyivi ña tsinú iñi, tsa cunaa ñi. Tyin quivi quitsi yu jandunditsin yu nu ñuhu ñayivi, ña naquihin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi.

20 Tandihi nyivi javahá tsa ña vaha, ña taahán iñi ñi coo ñi nu nditsin, tyin ña cuñí ñi tsa quituvi tsa ña vaha javahá ñi. **21** Maa tyin nyivi taahán iñi tsa nditsa, naquitá ñi nu nditsin

tyin tacan tan nyehe nyivi tyin javahá ñi cuhva cuñí Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyivi, tuhun ra Jesús inga tsaha

22 Tsa yaha yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quivi, tyin jacoondutyá ra naha tsi nyivi. **23** Tacan tucu ra Juan nyii ra jacoondutyá ra tsi nyivi nu cuví Enón yatyin ñi nu cuví Salim, tyin ican ñuhú cuaha ndutya. Tan tsaá nyivi tan tsicoondutyá ñi. **24** Yacan javaha ra Juan tsa ndi cumañi ca quihvi ra vehe caa.

25 Tacan tan quitsaha caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyivi tsi ñi nuu Nyoo.

26 Tacan tan cuahán ra naha nu nyii ra Juan. Tan catyí ra naha tsihin ra:

—Maestro, ra tsa tsinyii tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihi ra tsi nyivi tan tandihi nyivi nyicún tsi ra —catyí ra naha tsihin ra.

27 Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyin ña tsahá Nyoo tuneey iñi ra tsi yo. **28** Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yu quivi catyí catsi yu tyin ra jaquitsi Nyoo ityi nuu ra Cristo cuví yu. **29** Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyii ra ican. Tan cusif iñi ra tsiñi ra tsa caahán ra tsa cua tindaha. Tan tacan tucu yuhu, sii cuñí yu tyin naquihín nyivi tuhun caahán ra Jesús tan nyicún ñi tsi ra. **30** Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsj ra nu ñuhu ñayivi

31 'Ra tsa quee nda gloria, cahnu ca cuví ra tan ñavin ca tandihi nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra. 32 Tan caahán ra tsa nyehé ra tan tsa tsiñí ra, maa tyin yoñi tsinú iñi tsa caahán ra. 33 Tatum yoo tan tsinú iñi yo tsa caahán ra, cua cuví yo tsa ndaa tyin Nyoo ña vatyá ra. 34 Tyin ra tsa jaquitsj Nyoo, tuhun Nyoo caahán ra tyin Nyoo ña tyihj cuhva ra Tatyí Ii ra tan tsahá ra itsi tsi ra. Tsahá ra nanñi Tatyí Ii ra tsi ra. 35 Nyoo Jutu yo cuñí ra tsi Sehe ra. Tan nacuhva cuenda ra tandihi maa tsi ra. 36 Nyivi tsa tsinú iñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñí tsinu iñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

Nu natuhun ra Jesús tshin iin ñaha Samaria

4 ¹ Tsa tsitó ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsicoondutyá. ² Maa tyin ñavin maa ra Jesús jacoondutyá tsi ñi, tyin ra tsicá tshin ra jacoondutyá tsi ñi. ³ Tan quivi tsa tsitó ra Jesús tyin tsitó ra naha yacan, quee ra Judea can tan cuanuhu ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñí tsi yaha ra ican. ⁵ Tacan tan tsaá ra iin ñuu tsa canyíí Samaria tsa nañí Sicar yatyin ñi nu cuví ñuhu ra Jacob nu tsahá ra tsi ra José sehe ra. ⁶ Ican nyaá iin soco pila tsa catyí nyivi tyin tsii ra Jacob cuví. Tsa quitá ra Jesús nu nyaá soco can tan tsinyaa ra yuhu soco can tyin tatu xaan ra tyin cañi xaan ityi tsicá ra tan maa hora cuví. ⁷⁻⁸ Ra tsicá tshin ra,

yoñi ra naha nyecú tshin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaá iin ñaha Samaria tyin cua tava ña ndutyá tsitsi soco can. Tacan tan catyí ra Jesús tshin ña:

—Cuhva luxu ndutyá coho yu —catyí ra tshin ña.

⁹ Tacan tan ñaha Samaria can catyí ña tshin ra:

—Yoocho tsa cuví un iin ra ñuu Israel, ¿nacuvi tyin tsicán un ndutyá coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tshin nyivi Samaria.)

¹⁰ Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutyá tsi un, maa un cua ndacan ndutyá tsi yu. Tan cua cuhva yu ndutyá nyito tsi un —catyí ra tshin ña.

¹¹ Tacan tan catyí ña tshin ra:

—Tatta, cunu xaan soco ihya. ¿Nacaa tava tucu un ndutyá cuhva un tsi yu? tan ndi nduve náa ndaha un ¿Nu maa cua quihin un ndutyá nyito can cuhva un coho yu? ¹² Ra Jacob tsii tsahnu yo, nacoq ra soco ihya tsi ndi. Juvín ihya tshihj maa ra ndutyá tan tshin tandihi sehe ra. Tan juvín ñi ihya tshihj tucu quití jana ra naha. ¿A cahnu ca ra cuví yoocho tan ñavin ca ra can? —catyí ña tshin ra.

¹³ Tacan tan nacahan ra Jesús tan catyí ra tshin ña:

—Tandihí nyivi tshihí ndutyá ihya, cua na ityi nyico iñi ñi. ¹⁴ Maa tyin nyivi tshihí ndutyá tsa tsahá yuhu, ña cua na ityi ca iñi ñi. Tyin ndutyá tsa tsahá yuhu cua cana tsi tsitsi añima ñi tumaa caná ndutyá iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tshin ña.

¹⁵ Tacan tan quitsahá caahán ña tshin ra:

—Yooho tatta, cūhva ndutya can coho yu na ña na ityi ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

16 Tacan tan catyí ra Jesús tsihin ña:

—Cūaahan cua quihin yïi un tan quitsi ndo —catyí ra tsihin ña.

17 Tan nacahan ña tan catyí ña:

—Nduve yïi yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yïi un iyó. **18** Tyin tsa uhun yïi un tsicoo, tan ra cumí tsi un vityin ñavin yïi un tsi ra. —catyí ra tsihin ña.

19 Tsa tsiñi ña tsa cahan ra tacan, quitsaha catyí ña tsihin ra:

—Yooho tatta, tuví iñi yu tyin ra cuví ndusu yuhu Nyoo cuví un.

20 Tsi tсахnu ndi, ra ñuu ihya naha ra, jacahnū ra naha tsi Nyoo yucu ihya. Maa tyin nyooho tsa cuví nyivi Israel catyí ndo tyin nda Jerusalén taahán tsi jacahnū yo tsi Nyoo —catyí ña tsihin ra.

21 Tacan tan nacahan ra Jesús tan catyí ra tsihin ña:

—Tsinu iñi tsa caahán yu tsihin un. Tyin vatsí hora tsa cua jacahnū ndo tsi Jutu yo Nyoo. Maa tyin ña tsiñiñuhū ca tsa quitsi ndo yucu ihya, a cuhun ndo nda Jerusalén.

22 Nyooho nyivi Samaria, ña tsitó ndo yóo jacahnū ndo. Maa tyin nyuhu tsitó ndi yóo jacahnū ndi. Tan tsitó ndi tyin cua jacacu iin ra Israel tsi nyivi jaha Nyoo. **23** Maa tyin cua tsa hora, tan hora can iyó yo vityin tyin nyivi tsa nditsa jacahnū tsi Nyoo Jutu yo, cua jacahnū ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí li Nyoo tsi ñi. Tyin Nyoo Jutu yo tacan cuñí ra javaha ñi tsa jacahnū tsi ra. **24** Tyin Nyoo Tatyí li cuví ra. Tan nyivi jacahnū tsi ra cuñí tsi jacahnū ñi tsi ra tsihin tsa nditsa tumaa jaquihín ityi maa Tatyí li tsi ñi —catyí ra tsihin ña.

25 Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quivi quitsi ra, maa ra cua nacatyí tuhun tandihí tsihin yo —catyí ña tsihin ra.

26 Tacan tan nacahan ra Jesús tan catyí ra tsihin ña:

—Ra tsa caahán un tuhun can, juvin ra caahán tsihin un —catyí ra tsihin ña.

27 Tacan tan tsaq nyico ra tsicá tsihin ra, tan iyo xaan cuñí ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñí ra, o ndaca tuhun ra naha tsi ra nacuenta natuhún ra tsihin ñaha can. **28** Tacan tan nacoo ña quiyi ña tan cuanuhu ña nda ñuu. Tan catyí ña tsihin nyivi:

29 —Cohon ndo cūnyehe ndo tsi iin ra tsa cahan tandihí cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

30 Tacan tan quitā nyivi ñuu can tan cuahán ñi cua nyehe ñi nu nyií ra Jesús. **31** Tan tsa ndi cumañi ca tsa ñi nu nyií ra, ra tsicá tsihin ra, jañiñí ra naha tsi ra na catsi ra luxu. Tan catyí ra naha tsihin ra:

—Maestro, çatsi luxu —catyí ra naha.

32 Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyooho ña tsitó ndo náa cuví can —catyí ra tsihin ra naha.

33 Tacan tan ra tsicá tsihin ra, quitsaha natuhún tahan ra naha, tan catyí ra naha:

—¿A iyó yóo quitsi quitsi ndaca tsa catsi ra? —catyí ra naha.

34 Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa javahá yu cuhva cuñí ra tsa jaquitsi tsi yu, tan javahá yu tyiñu tsaḡa ra tsi yu.

35 Nyooho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyehe ndo tyin tsa ndihi tsa tatsi ndo cuaan tan tsa nyecú vaha tsi tsa cua naquihin vaha yo itsi. 36 Ra tsa naquihin vaha can ñihí ra yahvi ra. Tan tsa naquihin vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihin cusii iñi ra naha. 37 Tan iyó iin cuhva tuhvá nyivi caahán tan catyí ñi tyin siin nyivi tatsi tan siin nyivi naquihin vaha. Tan nditsa yacan. 38 Yuhu jacuhun yu tsi ndo tyin cua cahnu ndo ñiñi tsa iyó nu ña jahá tyiñu ndo, nu jahá tyiñu inga ra. Tan nyooho cucahnu ndo tan cua naquihin vaha ndo ñiñi can —catyí ra Jesús tsihin ra naha.

39 Tan cuaha xaan nyivi ñuu Samaria can quitsahá tsinú iñi ñi tsi ra Jesús tsa cuenda tsa cahán ñaha can, tyin catyí ña: “Cahán ra tsihin yu tandihi cuhva iyó yu”, catyí ña. 40 Cuhva tsa tsaá ñi nu nyí ra Jesús, tan cahán ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quívi. 41 Tan cuaha ca nyivi quitsahá tsinú iñi ñi tsa tsiñi ñi tsa caahán ra. 42 Tacan tan quitsahá catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahán un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyivi iyó nu ñuhu ñayivi ihya —catyí ñi.

Nu janduvahá ra Jesús sehe iin ra cumí tyiñu

43 Tsa yahá uvi quívi tan quee ra Jesús nu cuví Samaria tan cuahán ra ityi nu cuví Galilea, nu cacú ra. 44 Vasu ndi maa juvin ñi maa ra cahán tyin iin ra cuví ndusu yuhu Nyoo, nyivi ñuu ra ña jahá ñi tsa ñayivi tsi

ra. 45 Tacan tan tsa tsaá ra Galilea, nyivi iyó ican, vaha caahán ñi tsihin ra, tyin tsahan ñi vico Jerusalén, tan nyehe ñi tsa vaha tsa javahá ra.

46 Tacan tan cuanuhu nyico ra Jesús nda ñuu Caná tsa canyí Galilea nu nanduví ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhví nda ñuu Capernaum. 47 Quívi tsa tsitó ra can tyin tsa tsaá nyico ra Jesús nda Galilea tsa tsahan ra nda Judea, tsahan ra tsinyehe ra tsi ra Jesús. Tan tsican ra tumañi iñi tsi ra na cuhun ra vehe ra tan janduvaha ra tsi sehe ra, tyin tsa cuñi cúu cuii ña sehe ra.

48 Tacan tan catyí ra Jesús tsihin ra: —Nyooho ña cua tsinu iñi ndo tatun ña nyehe jihna ndo tsa iyo —catyí ra tsihin ra.

49 Maa tyin ra can catyí ra tsihin ra Jesús:

—Yooho taa, çohon ñi tsihin yu tsa ndi cumañi ca cúu sehe yu —catyí ra tsihin ra Jesús.

50 Tacan tan catyí ra Jesús tsihin ra: —Cuanuhu yuvehe un. Sehe un nyito ra, tsa nduvahá ra —catyí ra tsihin ra.

Tacan tan ra can tsinu iñi ra tsa cahán ra Jesús tan cuanuhu ra. 51 Tsa tsa cuyatyin ra yuvehe ra, quita musu ra tan caahán ra naha tsihin ra: —¡Taa, sehe un nyito ra; tsa nduvahá ra!

52 Tacan tan quitsahá tsicá tuhun ra tsi ra naha náa hora quitsahá vaha cuñi ra. Tan catyí ra naha tsihin ra: —Icu cuhva caa iin tsa yahá hora quita cahñi tsi ra —catyí ra naha.

53 Tacan tan tsitó ra can, tyin hora can cahán ra Jesús tsihin ra, “Cuanuhu tyin sehe un nyito ra, tsa nduvahá ra.” Tan maa ra can tsihin tandihi nyivi ra quitsahá tsinú iñi ñi tsi ra Jesús.

54 Yacan cuví tsa iyo tsa tsinu uvi javahá ra Jesús tsa tsaá nyico ra Galilea tsa yaha tsahan ra Judea.

Nu janduvahā ra Jesús iin ra cuuhví

5 ¹ Tsa yahā can tan cuahán ra Jesús ñuu Jerusalén inga tsaha tyin nyivi ñuu Israel jacahnú ñi iin vico. ² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyin ñi nyaá iin vehe cahnu. Tan tsitsi vehe can ñuhú ndutyá. Tan tsa tsihin yuhu hebreo nañi vehe can Betesda. Tan iyó uhun corredor. ³ Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutyá can. ⁴ Tyin nda naha nda naha ñi tan nuú iin ángel tan jacandá ra ndutyá can. Tan nyivi tsa quihví jihna tsa yahā ñi nacandá ndutyá can, nduvahá ñi vasu ndi maa cuehe cahnu ndohó ñi. ⁵ Tan ican canyíi iin ra cuuhví tan tsa iyó oco tsahun uñi cuiya cuuhví ra. ⁶ Tsa nyehe ra Jesús tsi ra ican canyíi ra, tuví ñi ra tyin tsa cuaha xaan cuiya cuuhví ra. Tan tsicā tuhun ra tsi ra ndaahvi can, tan catyí ra:

—¿A cuñi un nduvaha un?

⁷ Tan ra cuuhví can nacahan ra tan catyí ra:

—Tata, yoñi maa tyihí tsi yu tsitsi ndutyá ihya tatun tsa nacandá tsi. Tyin tahán ñi tsaha tsa cuñi yu quihvi yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Nduvita, naquihin yuvi un tan çaca un —catyí ra tsihin ra.

⁹ Juvín ñi hora can tan nduvahā ra, naquihin ra yuvi ra, tan nacacā ra. Maa tyin quivi quitatú nyivi cuví quivi can. ¹⁰ Yacan ra cuví ityi nuu tsihin nyivi Israel catyí ra naha tsihin ra tsa nduvahā can:

—Quivi quitatú yo cuví vityin, yacan cuenda ña taahán tsi cuiso un yuvi un —catyí ra naha tsihin ra.

¹¹ Tan ra tsa nduvahā can nacahan ra tan catyí ra:

—Ra tsa janduvahā tsi yu, catyí ra

tsihin yu: “Naquihin yuvi un tan çaca un”, catyí ra tsihin yu.

¹² Tacan tan quitsahā tsicá tuhun ra naha tsi ra, tan catyí ra naha:

—¿Yóo ra cahan tsihin un tyin naquihin un yuvi un tan çaca un? —catyí ra naha.

¹³ Maa tyin ra tsa nduvahā can ña tsitó ra yóo janduvahā tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra. ¹⁴ Yahā can tan nañihí ra Jesús tsi ra tsa nduvahā can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahā un, ña javaha ca un tsa ña vaha, tyin coto quitsi inga tundoho cahnu ca síqui un —catyí ra tsihin ra.

¹⁵ Tacan tan tsahan ra tsicahan ra tsihin ra Israel naha ra tyin ra Jesús cuví ra janduvahā tsi ra. ¹⁶ Tsa cuenda tsa janduvahā ra Jesús tsi ra can quivi quitatú nyivi, xaan xaan cuñi ra Israel naha ra nyehe ra naha tsi ra. Tan cuñi ra naha cahñi ra naha tsi ra. ¹⁷ Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

¹⁸ Tan tsa cuenda tsa cahan ra yacan, xaan ca cuñi ra Israel can naha ra. Tan ñihi ca cuñi ra naha cahñi ra naha tsi ra tyin cuñi maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹ Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehé yu javahá Jutu yu. Tandihí tsa javahá

Jutu yu tan javahá tucu maa yu. **20** Tyin cuñí xaan ra tsi yu, tyin Sehe ra cuví tsi yu, tsa cuenda yacan janahá ra tandíhi tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can. **21** Tumaa janandotó Nyoo Jutu yu ndíyí, tan tsahá ra ñayívi coo ñi, tacan tucu yuhu tsa cuví yu Sehe ra, tsahá yu ñayívi coo nyívi cuñí maa yu cuhva yu. **22** Tacan Nyoo Jutu yu, ña jandaa ca ra cuatyí ndi intuhun nyívi tyin tsa tsahá ra ndatu tsi yuhu tsa cuví yu Sehe ra tyin jandaa yu cuatyí nyívi. **23** Tacan icá Nyoo Jutu yu tsa cuñí ra jacahnú nyívi tsi Sehe ra tumaa tsa jacahnú maa ñi tsi maa ra. Nyívi tsa ña jacahnú tsi yuhu tsa cuví yu Sehe Nyoo, ndí Jutu yu tan ña jacahnú ñi. Tyin maa ra jaquitsí tsi yu.

24 Tan tsa nditsa caahán yu tyin nyívi tyaá soho tsa caahán yu tan tsinú ñi ñi tsi ra tsa jaquitsí tsi yu, iyó ñi ñayívi nyito tsa ña cua naa maa. Tan ña cua cuhun ca ñi anyaya tsa catyí cuatyí ñi tyin tsa jacacú Nyoo tsi ñi tan ña yíhi ndaha ca tuhun tsihi tsi ñi, tan tsahá ra ñayívi nyito iyó ñi. **25** Nyívi; tumaa ndíyí cuví ñi. Tan tsa nditsa caahán yu tsihin ndo tyin vatsí quívi cua cuñi ñi ndusu Sehe Nyoo. Tan nyívi tsa cua tyaa yahvi tsa caahán ra, cua coo ñi ñayívi nyito tsa ña cua naa maa. Tan vityin cuví quívi tsa caahán yu tuhun. **26** Tyin Nyoo Jutu yu iyó ra ñayívi nyito tsa ña cua naa maa. Tan tsahá ra ndatu can tsi yuhu tsa cuví yu Sehe ra tyin cuhva yu ñayívi can coo nyívi. **27** Tan tsahá tucu Nyoo ndatu tsi yu tsa jandaa yu cuatyí nyívi, tyin Rayíi quee nda gloria cuví yu. **28** Na iyo cuñi ndo tsa caahán yu tyehen, tyin cua tsaá quívi tsa cuñi ndíyí yucú tsitsi ñaña ndusu Sehe Nyoo. **29** Tan cua quita ñi tsitsi ñaña ñi. Tacan tan nyívi tsa javahá tsa vaha cua nandoto ñi tyin coo ñi ñayívi

nyitó. Maa tyin nyívi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayívi nyito coo nyívi

30 Yuhu ña cuví javaha yu tsa javahá yu tsa intuhun ñi maa yu. Yuhu jandaá yu cuatyí nyívi tumaa cuhva tava tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñí maa yu, tyin javahá yu cuhva caahán maa Jutu yu, ra tsa jaquitsí tsi yu. **31** Tan tatun juvin ñi maa yu cuví tsa ndaa tsa cuenda yu, nduve yahvi nyaá tsa ndaa can. **32** Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. **33** Nyoooho tava tyiñu ndo na ndaca tuhun ra naha tsi ra Juan. Tan tuhun tsa cahán ra, tsa nditsa cuví tsi. **34** Maa tyin yuhu ña tsiñiñuhú tsa cuví rayíi tsa ndaa tsa cuenda yu. Maa tyin caahán yu tuhun tsa cahán ra Juan tsihin ndo tsa cuenda tsa vaha tsi maa ndo, tyin tacan tan tsinu ñi ndo tsi yu tan cacu ndo. **35** Ra Juan cuví ra tumaa iin lámpara tsa cayú tan jandunditsín tsi. Tan nyooho juhva ñi quívi cusíi ñi ndo tsihin ñuhú nditsin can. **36** Maa tyin yuhu iyó iin tsa ndaa vaha ca tsi yu tan ñavin ca tsa caahán ra Juan. Tyin tandíhi tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsí tsi yu. **37** Tacan tucu Jutu yu, ra tsa jaquitsí tsi yu, cuví ra tsa ndaa tsa cuenda yu. Nyoooho ñaha ca cuñi ndo ndusu ra, tan ndi ñaha ca nyehe ndo tsi ra. **38** Tan ña ndoó tuhun ra tsa caahán yu tsihin ndo tsitsi añima ndo tyin ña tsinú ñi ndo tyin Nyoo jaquitsí tsi yu. **39** Nyoooho tsihin cuenda xaan cahví ndo nu tutu Nyoo,

tyin cuñí maa ndo tyin nuu tsi cua ñihi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. **40** Tan nyooho ña cuñí ndo quitsi ndo nu nyaá yu tan cuhva yu ñayivi nyito coo ndo.

41 'Yuhu ña nducú yu tsa jacahnu nyivi tsi yu. **42** Tyin yuhu tsitó yu tsi ndo tan tsitó yu tyin ña cuñí ndo tsi Nyoo. **43** Yuhu vatsí yu cuenda Jutu yu tan nyooho ña naquihín ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo. **44** Nyooho ña cuví tsinu iñi ndo tsi yu tyin cuñí ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. **45** Ña caca iñi ndo tyin cua ndacan yu cuatyí tsaha ndo nuu Jutu yu. Nyooho cuñí maa ndo tyin ley tsa tyaá ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaha ndo tyin ña jacuví ndo ley tsa tyaá ra. **46** Tyin tun tsatyin nditsa tsa tsinú iñi ndo tsa cahán ra Moisés, tacan cua tsinu ndihi iñi ndo tsa caahán yuhu. Tyin tuhun yuhu cuví tsa tyaá ra. **47** Maa tyin tatun ña tsinú iñi ndo tuhun tsa tyaá ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityi nuu tsihin ra Israel naha ra.

Nu jacatsj ra Jesús uhun mil rayi

(Mt. 14:13-21; Mr. 6:30-44; Lc. 9:10-17)

6 **1** Tsa yahá yacan, tan cuahán ra Jesús inga tsiyo miñi cahnu tsa nañí Ndutya Nuhu Galilea. Tan juvin ñi nañí tucu tsi Miñi Tiberias. **2** Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví. **3** Tacan tan ra Jesús ndaa ra iin yucu tan tsinyaa ra ican tsihin ra tsicá tsihin ra. **4** Tan tsa cuyatyin cuii tahan tsi quívi vico pascua tsa jacahnú nyivi Israel.

5 Tan nyehé ra Jesús tyin cuaha xaan nyivi nyicún tsi ra, tacan tan quitsaha caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

6 Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra. **7** Tacan tan nacahán ra Felipe tan catyí ra:

—Xuhun tsa quihin yo tsa jahá tyiñu yo tsa uvi cientu quívi, ndi ña cua cutahan can jata yo luxu tsa catsi nyivi ihya —catyí ra Felipe.

8 Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

9 —Ihya nyíi iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

10 Tacan tan catyí ra Jesús tsihin ra naha:

—Cahan ndo tsihin tandihi nyivi na cunyecu ñi —catyí ra.

Tan cuaha xaan itya ican tan tsinyecu ñi, uhun mil rayi, tan siin maa ñi ñaha tsihin tsa nyihí.

11 Tacan tan quihin ra Jesús paan can tan tsa yahá tsahá ra tyahvi nyoo tsi Nyoo, tan tsahá ra can tsi ra tsicá tsihin ra. Tan ra can naha ra, tsahá ra naha can tsi tandihi nyivi tsa nyecú can. Juvin ñi tacan ica nyico ra tsihin tyaca can. Tan tsatsj ndaha iñi ñi.

12 Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

13 Naquihin vaha ra naha can, tan jacutu ra naha utsi uvi tyica tsihin tsa ñahñu tsa ndoo tsa uhun taahan paan can. **14** Tacan tan tsa yahá nyehé nyivi can tsa iyo tsa javahá ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvin ra nyaá tsa

quitsi maa nu ñuhu ñayivi ihya
—catyí ñi.

15 Maa tyin tsa tuvı iñi ra Jesús tyin cuñi ñi tsa quihin ñi tsi ra tsihin tsa ñiñi tyin cuvi ra rey cuenda ñi, tacan tan cuahán nyico ra jiñi yucu nu sucun ca tyin cunyi intuhun ñi maa ra.

Nu tsicá ra Jesús nu ndutya

(Mt. 14:22-27; Mr. 6:45-52)

16 Tsa cunaaha, nuu ra tsicá tsihin ra Jesús yuhu miñi can. 17 Tan quihvi ra naha tsitsi yutun ndoo tyin cua yaha sava ra naha mahñu miñi can tan cua tsa ra naha ñuu Capernaum. Tsa cunaaha tan ra Jesús ñaha ca maa tsa ra. 18 Tacan tan tsaq tatyí ñihi. Tan iyo nduvita ndutya miñi can. 19 Tsa tsa yaha ra naha uhun a iñu kilómetro tsihin yutun ndoo can tan nyehe ra naha vatsi ra Jesús tsicá ra nu ndutya. Tsa nyehe ra naha tyin tsa cua cuyatyin ra nu cuahán yutun ndoo can, nayuhvi xaan ra naha. 20 Maa tyin catyí ra Jesús tsihin ra naha:

—¡Maa yu cuvı, ña nayuhvi ndo!

21 Tacan tan tsaq ra naha quihvi ra Jesús tsitsi yutun ndoo can. Tan iin yaha ñi tsaq ra naha yuhu miñi nu cuahán ra naha.

Nu nanducú nyivi tsi ra Jesús

22 Tsa tuvi inga quivi tan tsito nyivi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha. 23 Maa tyin tsaq taahan ca yutun ndoo tsa quee ñuu Tiberias yatyin ñi nu nacuhva Jutu Mañi yo tyahvi nyoo tsi Nyoo tan tsatsi nyivi paan. 24 Tacan tan tsa nyehe nyivi tyin nduve ra Jesús tan ndi ra tsicá tsihin ra, quihvi ñi tsitsi yutun ndoo tsa tsaq tan cuahán ñi nda ñuu Capernaum cua nanducu ñi tsi ra.

**Ra Jesús cuvı paan tsa tsaq
ñayivi nyito coo yo**

25 Tsa tsaq ñi inga tsiyo miñi can, nañihı ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaq un ihya? —catyí ñi tsihin ra.

26 Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyoocho nanducú ndo tsi yu maa tyin ñavin cuenda tsa nyehe ndo tsa iyo tsa javaha yu. Nanducú ndo tsi yu tyin tsatsi ndo tan ndaha iñi ndo.

27 Ña jaha tyiñu ndo cuenda tunyee iñi tsa tsatsi ndo tsa cua ndihı ñi maa, jaha tyiñu ndo cuenda tunyee iñi tsa catsi ndo tsa ña cua ndihı tan tsaq tsi ñayivi nyito tsa ña cua naa maa coo ndo. Yacan cuvı tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuvı Rayi tsa quee nda gloria —catyí ra Jesús.

28 Tacan tan quitsaha tsicá tuhun ñi tsi ra tan catyí ñi:

—¿Náa taahán tsi javaha ndi tan cuvı javaha ndi cuhva cuñi Nyoo? —catyí ñi.

29 Tacan tan catyí ra Jesús tsihin ñi:

—Tsa cuñi Nyoo javaha ndo, cuvı tsa tsinu iñi ndo tsa caahán yuhu, ra tsa jaquitsi ra —catyí ra Jesús tsihin ñi.

30 Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un?

31 Tsii tsañu ndi tsatsi ñi maná nu tsiquı, tumaa tsa caahán tuhun Nyoo tyehen: “Andivi quee paan tsatsi nyivi jaha Nyoo” —catyí ñi tsihin ra Jesús.

32 Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsaq paan tsa quee

andivi tsatsi ñi, tyin maa Nyoo Jutu yu cuví ra tsahá paan nditsa tsa quee andivi. **33** Tyin paan tsa tsahá Nyoo, yacan cuví ra tsa quee andivi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

34 Tacan tan quitsaha catyí ñi tsihin ra:

—Taa, cuhva paan can catsi ndi tandihi ñi quivi —catyí ñi.

35 Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyivi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityi iñi ñi.

36 Maa tyin tumaa tsa caahán yu tsihin ndo, nyehé vaha ndo tsi yu, maa tyin ña cuñi ndo tsinu iñi ndo tyin juvin yu cuví ra tsa cuví jatyinyee tsi ndo **37** Tandihí nyivi tsa tsahá Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi. **38** Tyin yuhu tsa quee andivi; vatsí yu vatsí javahá yu cuhva cuñi ra tsa jaquitsi tsi yu. Ña vatsí yu vatsí javaha yu cuhva cuñi ñi maa yu. **39** Tan cuhva cuñi ra tsa jaquitsi tsi yu, yacan cuví tsehe: tsa ña cunaa ndi intuhun nyivi tsa tsahá ra tsi yu, tan janandoto yu tsi ñi nu cua cundihí quivi. **40** Jutu yu, ra tsa jaquitsi tsi yu, cuñi ra tyin tandihí nyivi tsa cutuñi iñi tyin Sehe Nyoo cuví tsi yu, tan tsinu iñi ñi tsa caahán yu, cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihí quivi —catyí ra Jesús tsihin ñi.

41 Tsa cuenda tsa cahán ra Jesús yacan, tan quitsaha caahán nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra. **42** Tacan tan quitsaha catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andivi quee ra? —catyí ñi.

43 Tacan tan catyí ra Jesús tsihin ñi:

—Jandihí ndo tsa caahán nyaa ndo. **44** Yoñi maa nyivi cuví quitsi quitsi nyicún tsi yu tatun ñavin Jutu yu, ra tsa jaquitsi tsi yu, caná tsi ñi. Tan cua janandoto yu tsi ñi nu cua cundihí quivi. **45** Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyivi” catyí tsi. Yacan cuenda nyivi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

46 Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra. **47** Tsa nditsa catyí yu tsihin ndo tyin nyivi tsa tsinú iñi tsa caahán yu tsa iyó ñi ñayivi nyito tsa ña cua naa maa. **48** Yuhu cuví paan tsa tsahá tsa coo nyito añima ñi. **49** Tsii tsaahnu ndo tsatsi ñi maná nu tsiqui, maa tyin juvin ñi tsihi ñi. **50** Maa tyin yuhu, tuhun paan tsa quee andivi caahán yu tsihin ndo, tyin nyivi tsa cua catsi paan can, ña cua cúu ñi. **51** Juvín ñi maa yu cuví paan nyito tsa quee andivi. Nyivi tsa cua catsi paan ihya ña cua cundihí tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihí nyivi iyó nu ñuhu ñayivi —catyí ra Jesús tsihin ñi.

52 Tacan tan nyivi Israel can quitsaha natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

53 Tan catyí ra Jesús:

—Tsa nditsa catyí yu tsihin ndo, tyin yuhu cuví Rayi tsa quee nda gloria, tan tatun nyooho tan ña cua catsi ndo cuñu ñuhu yu, tan ña coho ndo niñi yu, ña cuví coo ndo ñayivi nyitó. **54** Nyivi tsatsi cuñu ñuhu yu tan tsihi ñi niñi yu, iyó ñi ñayivi

nyito tsa ña cua naa maa. Tan yuhu cua janandoto yu tsi ñi nu cua cundihi quivi. **55** Tyin cuñu ñuhu yu yacan cuví paan tsa nditsa tsa taahán tsi catsi ñi, tan ñiñi yu cuví vinu tsa nditsa tsa taahán tsi coho ñi. **56** Nyivi tsatsí cuñu ñuhu yu tan tsihi ñi ñiñi yu, iin ñi cuví ñi tsihin yu. Tan iin ñi cuví yu tsihin ñi. **57** Jutu yu, ra tsa jaquitsi tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsí cuñu ñuhu yu, cua coo ñi tsihin tunyee iñi tsa iyó tsi yu. **58** Tuhun paan tsa quee andivi caahán yu. Paan ihya ñavin tumaa maná tsa tsatsi tsi tsaahnu yo cuví tsi, tyin juvin ñi tsihi ñi. Nyivi tsatsí paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

59 Juvín yacan jacuahá ra Jesús nu ndu iin nyivi tsitsi vehe ñuhu ñuu Capernaum.

60 Cuaha xaan nyivi nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yi xaan naquihin vaha yo itsi. Yoñi maa cua tsinu iñi tsa caahán ra —catyí ñi.

61 Tacan tan tui iñi ra Jesús tyin ña cuñi ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñi ndo tsa caahán yu ihya? **62** Tan ¿náa cua javaha ndo tatun nyehe ndo tsi yuhu Rayi tsa quee nda gloria nandaa nyico yu inga tsaha ityi nu quee yu? **63** Tatyí li Nyoo tsahá ñayivi nyito. Tan cuñu ñuhu, ña jatyinyee tsi tsa coo yo ñayivi can. Tan tsa caahán yuhu tsihin ndo, Tatyí li Nyoo cuví tsi tan tsahá tsi tsa coo nyitó añima ndo.

64 Maa tyin yihí ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsitó maa ra yóo ña cua tsinú iñi tsi ra tan yóo cua xico tsi ra. **65** Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicun

tsi yu tatun ñavin maa Nyoo Jutu yu caná tsi ñi —catyí ra Jesús.

66 Nda quivi can, tan cuaha xaan nyivi nyicún tsi ra Jesús nacoq ñi tsi ra. Tan ña tsicá ca ñi tsihin ra.

67 Tacan tan tsicá tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihi tucu nyoooho cuhun ndo? —catyí ra tsihin ra naha.

68 Maa tyin nacahan ra Simón Pedro tan catyí ra:

—Jutu Mañi yu, ¿yóo cunyicun ndi? Tan intuhun ñi maa un caahán tuhun ñayivi nyito tsa ña cua naa maa. **69** Nyuhu tsinú iñi ndi, tan tsitó ndi tyin yoooho cuví ra Cristo Sehe Nyoo nyito.

70 Tan nacahan ra Jesús tan catyí ra:

—¿A ñavin yuhu nacatsi tsi tandihi tsa utsi uvi ndo? Tan intuhun ndo yihí nu ña vaha —catyí ra.

71 Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

Nu ña tsinú iñi yañi ra Jesús tsi ra

7 ¹ Tsa yahá yacan, tan nyi ra Jesús tsicá nuu ra nu cuví Galilea. Ña cuñi ra cuhun ra nu cuví Judea tyin ra cuví ityi nuu tsihin nyivi Israel can naha ra cuñi ra naha cahñi ra naha tsi ra. ² Tan tsa cuyatyin quivi vico tsa jacahnú nyivi Israel ndihi ñi cuiya. Tan nañi tsi Vico Tyahva. ³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyivi nyicún tsi un tsa iyó ndacan nyehe ñi tyiñu javahá un.

⁴ Tyin tatun cuñi yo tsa coto nyivi tsi yo, ña javahá xeehe yo tsa javahá yo. Tan yoooho tatun nditsa tsa javahá un, javaha can nuu tandihi nyivi —catyí tandihi yañi ra.

5 Tacan catyí ra naha tyin ndi tsa cuví ra naha yañi ra tan ña tsinú ñi ra naha tsi ra. 6 Tacan tan catyí ra Jesús tsihin ra naha:

—Ñaha ca tsaa hora tsa cuhun yuhu. Maa tyin nyooho ndáa quiví ñi cuví cuhun ndo. 7 Tyin vaha cuñi nyivi nyehé ñi tsi ndo, maa tyin yuhu ndasi cuñi ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi. 8 Cuaahan nyooho vico can. Yuhu ña cuhun yu tyin ñaha ca tsaa hora tsa taahán tsi cuhun yu —catyí ra.

9 Yahá can tan ndoo ra nu cuví Galilea.

Nu nyí ra Jesús nu iyó vico Tyahva

10 Tsa yahá cuahán yañi ra Jesús vico can, tsahan cuahán ndihi ra, maa tyin cuahán xeehe ñi ra. 11 Tan ra cuví ityi nuu tsihin nyivi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyí ra can? —catyí ra naha.

12 Tan caahán nyivi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyivi”, catyí ñi.

13 Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

14 Tsa cusava iyó vico tan tsaá ra Jesús tsitsi vehe ñuhu cahnu tan quitsahá jacuaha ra tsi nyivi. 15 Tan ra cuví ityi nuu can iyó cuñi ra naha tan quitsahá natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

16 Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsi tsi yu cuví tsi. 17 Tatun yihí nyooho tsa cuñi javaha cuhva cuñi Nyoo, cua coto ndo tyin

cuenda Nyoo jacuahá yu tan ñavin tsa cuenda maa yu. 18 Nyivi tsa caahán cuenda maa ñi, caahán ñi tyin cuñi ñi tsa jacahnu nyivi tsi ñi. Maa tyin ra nducú tsa jacahnu nyivi tsi Nyoo, ra tsa jaquitsi tsi ra, ra ican caahán tsa nditsa. Tan ña jandaví ñaha ra.

19 ¿A ña nditsa tyin ra Moisés tsahá ra ley tsi ndo? Maa tyin ndi intuhun nyooho tan ña tyaá yahvi ndo ley can. ¿Nacuenda cuñi ndo cahñi ndo tsi yu? —catyí ra.

20 Tan nacahan nyivi tan catyí ñi tsihin ra:

—Tatyí ña vaha yihí tsi yooho. Yoñi cuñi cahñi tsi un —catyí ñi tsihin ra.

21 Tan catyí ra Jesús:

—Tsacatyí tsa javahá yu tsa iyo quivi quitatu yo, yacan ndasi cuñi ndo nyehé ndo tsi yu. 22 Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yí ndo. Vasu ñavin ra quitsahá tsihin tuhun can, maa tyin nyivi cuví nyivi ra ityi tsata, jihna ca ñi javahá tacan. Yacan cuenda javahá ndo can vasu taahán tsi quivi quitatu yo.

23 Tan vityin, vaha tatun tsa cuenda tsa ña cuñi ndo cumañi ndo ley ra Moisés tan javahá ndo tuhun can vasu quivi quitatú yo cuví. Maa tyin tatun tacan javahá ndo, ¿nacuenda tyin cuxaan ndo tsi yu tsa janduvahá yu tsi ra can quivi quitatú yo? 24 Ña tyaa ndo cuatyí siqui nyivi tatun ña tsitó vaha ndo náa javahá ñi. Cuaatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahán ra Jesús tuhun maa ra

25 Tacan tan juhva nyivi iyó Jerusalén, quitsahá tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra? 26 Caahán nditsin ra tsihin nyivi. Tan yoñi caahán náa caahán tsihin ra.

Vasiq̄i tsinú ndihi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsi Nyoo. 27 Yoo tsitó vaha yo nu quee ra ihya, tan quivi quitsi ra Cristo yoñi maa cua coto numaa ityi cua quee ra —catyí ñi.

28 Ra Jesús nyii ra tsitsi vehe ñuhu jacuahá ra, tan tsitó ra tsa natuhún nyivi, yacan cuenda ñihi cahān ra tan catyí ra:

—iNyooho cuñi maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsi tsi yu, ra tsa cuví tsa nditsa. Nyooho ña nacotó ndo tsi ra. 29 Yuhu nacotó yu tsi ra tyin cuenda ra vatsí yu, tan maa ra jaquitsi tsi yu —catyí ra Jesús.

30 Tacan tan cuñi ra naha tyihi ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tiñ ra naha tsi ra tsa cuenda tyin ñaha ca tahan tsi quivi tsa taahán maa tsi tiñ ra naha tsi ra.

31 Maa tyin cuaha xaan nyivi tsinu iñi tsi ra. Tan catyí ñi:

—Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhun ra cuví fariseo naha ra tsi ra vitya tyin tiñ ra naha tsi ra Jesús

32 Tsa tsiiñi ra fariseo naha ra tsa caahán nyivi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun ra naha vitya cuenda vehe ñuhu, na tiñ ra naha tsi ra Jesús. 33 Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahā can tan cuacunuhu yu nu nyaá ra tsa jaquitsi tsi yu. 34 Nyooho cua nanducu ndo tsi yu. Maa tyin ña cua nañihi ndo tsi yu. Tyin ña cua cuvi cahun ndo nu cua cunyaa yu —catyí ra Jesús.

35 Tacan tan quitsahā natuhún tahan ra cuví ityi nuu tsihin nyivi Israel naha ra:

—¿Numaa cua cahun ra ihya tsa ña cua nañihi yo tsi ra? ¿A cahun ra nu iyó ra Israel ñuu Grecia naha ra tyin jacuahā ra tsi nyivi iyó Grecia can? 36 ¿Náa cuñi tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuvi cahun ndo nu cua cunyaa yu” —tacan caahán yuhu tahan ra naha tuhun ra Jesús.

Nyivi tsinú iñi tsi Nyoo cua coo Tatyí Ii ra añima ñi

37 Quivi ndihi tsicoo vico, yacan cuví quivi tsa ñiñi ca. Tan quivi can nduvitā ra Jesús tan ñihi caahán ra tan catyí ra:

—Tatun ndáa nyooho na ityi iñi ndo, ñaha ndo tan tsinu iñi ndo tsa caahán yu. 38 Tyin nyivi tsa tsinú iñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

39 Maa tyin tsihin yacan cuñi ra catyí ra tyin ñi tsinú iñi tsi ra cua ñihi ñi Tatyí Ii Nyoo, tyin quivi can ñaha ca quitsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnu Jutu ra tsi ra.

Nu natahvj sava nyivi tsa cuenda ra Jesús

40 Juhva nyivi tsa tsiiñi yacan, catyí ñi:

—Nditsa tsa cuii tyin ra ihya cuví ndusu yuhu Nyoo tsa nyaá tsa cua quitsi —catyí ñi.

41 Tan inga ñi catyí ñi:

—Ra ican cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuvi ra Cristo? 42 Tyin nu tutu Nyoo catyí tsi tyin ra Cristo cua cuvi ra nyivi

tata ra rey David, tan ra ñuu Belén tsa canyí nu cuví Galilea cua cuvi ra, tumaa ra David —catyí ñi.

43 Tacan tan nyívi can natahví sava ñi tsa cuenda ra Jesús. 44 Yihí ñi cuñí ñi quihin ñi tsi ra tan tyihi ñi tsi ra tsitsi vehe caa. Maa tyin yoñi tñin tsi ra.

Ra cuví ityi nuu vehe ñuhu naha ra ña tsinú iñi ra naha tsi ra Jesús

45 Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuví ityi nuu tsihin ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

46 Tan catyí ra vitya can naha ra:

—¡Ndi intuhun tsaha tan yoñi tuhva caahán tumaa caahán ra can!
—catyí ra naha.

47 Tacan tan catyí ra fariseo naha ra tsihin ra vitya can naha ra:

—¿A jandaví ñaha ndihi ra can tsi nyooho? 48 Nyeghe ndo tyin ndi intuhun ra cuví ityi nuu tsihin ndi, tan ra cuví fariseo naha ra, tan ña tsinú iñi ra naha tsi ra can. 49 Maa ñi maa nyívi ña tsitó ley nyicún tsi ra. Tan ña vaha ñi nuu Nyoo —catyí ra naha.

50 Tacan tan ra Nicodemo, ra tsa tsahán nu nyí ra Jesús tsa tsacuaa, cuví ndihi tucu ra fariseo, tan catyí ra tsihin ra naha:

51 —Catyí ley tyin ña cuví tatsi tuñi yo tsi iin nyívi tatun ñaha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

52 Tacan tan nacahán ra naha tan catyí ra naha tsihin ra:

—¿A juvin ñi ra Galilea cuví ndihi tucu yooho? Cahví nu tutu Nyoo tan nyeghe un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituví tsihin rayíi tsa ñavin yíi ña cuví

53 Tacan tan cuanuhu intuhun intuhun ra naha nda yuvehe ra naha.

8¹ Maa tyin ra Jesús cuahán ra yucu Olivo. 2 Tsa cunditsin inga quívi, cuahán nyico ra Jesús inga tsaha vehe ñuhu cahnu. Tan tandihi nyívi natuhvā ñi nu nyí ra. Tan tsinyaā ra tan quitsahā caahán ra tsihin ñi. 3 Tacan tan ra jacuahá ley vehe ñuhu tan ra cuví fariseo naha ra tsaā ra naha tsihin iin ñaha iyó yíi tyin tñin ra naha tsi ña nu tsicoo cuatyí ña tsihin inga rayíi. Tan tyaa ra naha tsi ña mahñu nyívi tsa nyecú can. 4 Tan quitsahā catyí ra naha tsihin ra Jesús:

—Maestro, tñin ndi tsi ñaha ihya nu tsicoo cuatyí ña tsihin inga rayíi. 5 Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

6 Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siquí ra. Tacan tan tsinyaā tyayíi ra Jesús nu ñuhu tan quitsahā tyaa ra letra nu ñuhú tsihin nundaha ra.

7 Maa tyin nducú tuhun ca ra naha tsi ra, tacan tan nduvitā nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

8 Tan tsinyaā tyayíi nyico ra tan quitsahā jañihí ca ra tyaa ra letra nu ñuhu. 9 Tsa tsiñi ra naha tsa caahán ra tacan, tuví iñi ra naha tyin iyó tucu cuatyí maa ra naha. Tan quitsahā quitá intuhun intuhun ra naha, jihna ca ra tsahnu naha ra quitā. Cuhva tsa ndihi ra naha quitā cuahán tan ndoo intuhun ña maa ra Jesús tsihin ñaha can mahñu nu nyecú nyívi can. 10 Tacan tan

nduvitá nyityi ra Jesús tan nyehé ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaá cuatyí síqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

11 Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cyaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyivi

12 Tacan tan cahán nyico ra Jesús tsihin nyivi inga tsaha, tan catyí ra tsihin ñi:

—Yuhu cuví ra tsa jandunditsin añima nyivi iyó nu ñuhu ñayivi. Yóo nyivi tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

13 Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

14 Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi queé yu tan numaa ityi cua cuhun yu. Maa tyin nyooho ña tsitó ndo numaa ityi queé yu tan numaa ityi cua cuhun yu. 15 Nyooho yatyi xaan caahán ndo tsa caa nyivi. Maa tyin yuhu, ña caahán yu tsa caa ñi. 16 Tyin tatun cahan yu tsa caa nyivi, tsa nditsa cua cahan yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu. 17 Nu ley nyooho nyaá

tyin tatun uvi ra tsahá tsa ndaa, cuñi tsi tsinú iñi yo tsa caahán ra naha.

18 Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

19 Tacan tan tsicá tuhun ra naha tsi ra:

—¿Numaa nyíi jutu un?

Tan catyí ra Jesús:

—Nyooho ña tsitó ndo tsi yuhu.

Tan ndi Jutu yu tan ña tsitó ndo. Tun tsatyin tsitó ndo tsi yu, coto ndihí ndo tsi Jutu yu —catyí ra.

20 Tuhun ihya cahán ra Jesús tsitsi tsa jacuahá ra tsitsi vehe ñuhu cahnú, nu nyíi caja nu tyihí nyivi xuhun. Maa tyin yoñi tyihí tsi ra vehe caa, tyin ñaha ca tahan tsi quivi tsa taahán tsi cuhun ra.

“Nu cuhun yuhu ña cua cuví cuhun ndo”, catyí ra Cristo

21 Tacan tan quitsahá caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo síqui ndo. Tyin nu cua cuhun yuhu, nyooho ña cua cuví cuhun ndo —catyí ra Jesús tsihin ra naha.

22 Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuví cuhun yo nu cuahán ra —catyí ra naha.

23 Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi síqui queé yu. Nyooho cuenda ñuhu ñayivi ihya cuví ndo. Maa tyin yuhu ñavin cuenda nu ñuhu ñayivi ihya cuví yu. 24 Yacan cuenda catyí yu tsihin ndo tyin cua cúu ndo tan cua ndoo cuatyí ndo síqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí

ndo siqui ndo quivi cúu ndo —catyí ra Jesús tshin ra naha.

25 Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cuví yooho?

Nacahan ra Jesús tan catyí ra:

—Tsa yaha cahan yu tshin ndo nda quivi jihna. **26** Cuaha xaan ca tsa ndi cumañi cahan yu tshin ndo, tan ndi cumañi cahan yu cuhva iyó ndo. Maa tyin tsa caahán yu tshin nyivi iyó nu ñuhu ñayivi, cuví tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

27 Maa tyin ra Israel naha ra ña cutuñi iñi ra naha tatun tuhun Nyoo Jutu yo cahan ra tshin ra naha.

28 Yacan cuenda catyí ra tshin ra naha:

—Cua tyaa ndo tsi yuhu, ra cuví Rayi tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu. **29** Tyin Jutu yu, ra tsa jaquitsi tsi yu, nyii ra tshin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñi ra —catyí ra Jesús.

30 Tsa cahan ra Jesús yacan, cuaha xaan ra naha quitsaha tsinú iñi tsi ra.

Nyivi cuví sehe Nyoo tan nyivi javahá tsa caquiñi

31 Tacan tan catyí ra Jesús tshin nyivi Israel, tsa quitsaha tsinú iñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsa ndo cuví ndo nyivi tsa nditsa yihí cuenda yu. **32** Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

33 Tan nacahan ra naha tan catyí ra naha:

—Nyuhu nyivi tata ra Abraham cuví ndi. Ndi iin tsaha tan ñaha ca

cuví ndi musu nyivi. ¿Nacaa tsa catyí yooho tyin quita nuña ndi? —catyí ra naha tshin ra.

34 Tan catyí ra Jesús:

—Tsa nditsa catyí yu tshin ndo tyin tandihi nyivi javahá tsa caquiñi, musu cuenda tsa caquiñi cuví ñi. **35** Iin musu ña ndoo cuvi ra vehe tsitoho ra. Maa tyin ra cuví sehe tsitoho vehe can, ndoo cuvi ra vehe jutu ra. **36** Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuvi tyin ña cua cundaca ñaha ca tsa ña vaha tsi ndo. **37** Tsa tsitó yu tyin tata ra Abraham cuví ndo. Maa tyin yihí ndo cuñi ndo cahñi ndo tsi yu, tyin ña naquihín vaha ndo tsa caahán yu. **38** Yuhu caahán yu tsa janahá Jutu yu tsi yu. Tan nyooho javahá ndo tsa caahán ra cuví jutu ndo tshin ndo —catyí ra tshin ra naha.

39 Tan nacahan ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tshin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra. **40** Maa tyin nyooho, vasu caahán yu tshin ndo tsa nditsa tsa janahá Nyoo tsi yu, nyooho cuñi ndo cahñi ndo tsi yu. ¡Ra Abraham ña javahá ra tacan! **41** Nyooho javahá ndo tumaa javahá jutu ndo —catyí ra tshin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

42 Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaa yu ihya. Ña vatsí yu cuenda maa yu, tyin maa Nyoo jaquitsi tsi yu.

43 ¿Nacuenda ña cutuñi iñi ndo tsa caahán yu tshin ndo? Tsa cuenda

tyin ña cuñí ndo tyaa soho ndo tsa caahán yu. **44** Cuihna cuví jutu ndo. Tan sehe nu tsi ndo. Tan cuñí ndo javaha ndo kuhva cuñí nu. Tan nu ña vaha can cuví nu tsahñí nyívi nda quívi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyívi tyin cuñí nu tsa coo ñi kuhva iyó nu tyin vatya xaan nu. Tan jutu nyívi vatya cuví nu. **45** Tan yuhu caahán yu tsa nditsa, maa tyin nyooho ña tsinú iñi ndo tsa caahán yu. **46** ¿Ndaa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú iñi ndo tsi yu? **47** Nyívi cuenda Nyoo tyaá soho ñi tuhun caahán ra. Maa tyin nyooho ñavin nyívi cuenda Nyoo cuví ndo, yacan cuenda ña cuñí ndo tyaa soho ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

48 Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yíhí tatyí ña vaha tsi un? —catyí ra naha tsihin ra.

49 Tan nacahan ra Jesús tan catyí ra:

—Nduve tatyí ña vaha yíhí tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu. **50** Yuhu ña nducú yu tsa jacahnu nyívi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu. **51** Tsa nditsa catyí yu tyin nyívi tsa tyaá yahvi tsa caahán yu ña cua tsaa tuhun tsihí aña ñi —catyí ra Jesús tsihin ra naha.

52 Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yíhí tatyí ña vaha tsi un. Tyin ra Abraham tan tandíhi ca ra cuví ndusu yuhu Nyoo tsihi ra naha. Tan yooho catyí

un tyin nyívi tyaá yahvi tsa caahán un ña cua cúu ñi. **53** ¿A cahnu ca ra cuví yooho tan ñavin ca ra Abraham jutu yo? Maa ra tsihi ra tan tacan tucu ra cuví ndusu yuhu Nyoo. ¿Yóo ra cuví yooho cuñí maa un? —catyí ra naha tsihin ra.

54 Tan nacahan ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra. **55** Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaá yahvi yu tsa caahán ra. **56** Ra Abraham tsií tsahnu yo sií xaan cuñi ra tyin cua nyehe ra quívi cua quítsi yuhu nu ñuhu ñayívi. Nyehe ra quítsi yu tan sií xaan cuñi ra —catyí ra Jesús tsihin ra naha.

57 Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

58 Tan nacahan ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

59 Tacan tan quihín ra naha yuu tyin cua cañi ra naha tsi ra Jesús. Maa tyin iin yaha ñi quíhví xeehe ra tan yahá ra mahñu ra naha tan quita ra tsitsi vehe ñuhu can cuahán ra.

Nu janduvahá ra Jesús tsi iin ra cuaa nda cacú ra

9 ¹ Kuhva tsa yahá ra Jesús iin nu yahá ra, nyehe ra tsi iin ra cuaa nda cacú ra. ² Tan quítsahá tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacú ra? ¿A tsa cuenda cuatyí jutu ra tan sihi ra, o tsa cuenda

cuatyí maa ra? —catyí ra naha tsihin ra.

3 Tan nacahan ra Jesús tan catyí ra: —Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can. **4** Tsa tsinu cahñi, cuñi tsi tsa javaha yu tyiñu ra tsa jaquitsi tsi yu. Tyin tsa yatyin cuii cua cuaa tan ña cua cuvi ca jaha tyiñu yo. **5** Tsa ndi nyii yu nu ñuhu ñayivi ihya, ñuhu jandunditsin cuenda nyivi iyó nu ñuhu ñayivi ihya cuví yu.

6 Tsa yahá tsa cahán ra Jesús tacan, tan tiví sií ra nu ñuhu. Tan jatyií ra luxu nyahyu tsihin sií ra tan tyaá ra tinuu ra cuaa can. **7** Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñi tsi catyí: “Jacuhun Yu Tsi Un.”

Tacan tan ra cuaa can tshahán ra tsinacatya ra nuu ra. Tan cuhva tsa tsaá nyico ra, tsa nyehé ra. **8** Tacan tan nyivi iyó yatyin yuvehe ra, tan nyivi tsa nyehé tsi ra tsa ndi cuaá ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

9 Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

10 Tacan tan quitsahá tsicá tuhun ñi tsi ra:

—¿Tan nácaa tyin cuví nyehé un vityin? —catyí ñi.

11 Tan catyí ra:

—Ra tsa nañi Jesús, ra ican jatyií nyahyu tan tyaá ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tshahán yu. Tan tsa yahá nacatya yu nuu yu tan nanyehé yu —catyí ra tsihin ñi.

12 Tacan tan quitsahá tsicá tuhun ñi tsi ra:

—¿Tan numaa nyii ra can vityin?

Tan catyí ra tsihin ñi:

—Ña tsitó yu —catyí ra.

Nu janahmá ra cuví fariseo naha ra tsi ra cuaá tsa nduvahá

13 Tacan tan tsindacá ñi tsi ra tsa nduvahá can nuu ra cuví fariseo naha ra. **14** Tyin quivi tsa jatyií ra Jesús nyahyu tan janduvahá ra tsi ra can, cuví tsi quivi quitatú nyivi. **15** Yacan cuenda ra cuví fariseo naha ra tsicá tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaá ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

16 Tacan tan catyí juhva ra fariseo naha ra:

—Ra tsa javahá yacan ñavin cuenda Nyoo cuví ra, tyin ña tyaá yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javahá ra tsa iyo ihya tatun ra iyó cuatyí cuví ra?

—catyí ra naha.

Tan siin siin tsa caahán ra naha.

Tan natahvi sava ra naha. **17** Tan tsicá tuhun nyico ra naha tsi ra nduvahá can inga tsaha, tan catyí ra naha tsihin ra:

—¿Tan yooho, náa catyí un tuhun ra tsa janduvahá tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

18 Maa tyin ra cuví ityi nuu tsihin nyivi Israel ña cuñi ra naha tsinu iñi ra naha tsa cuaá ra can tan nanyehé ra. Nda cuanda caná ra naha tsi jutu ra tan tsi sihi ra. **19** Tan tsicá tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaá ra cacú ra? ¿Nacaa tsa cuví nyehé ra vityin?

—catyí ra naha.

20 Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quivi cacú ra. 21 Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahá tinuu ra. Ndāca tuhun maa ndo tsi ra. Tsa iyó tucu maa cuiya ra. Tan cuví nacatyí tuhun maa ra tsihin ndo —catyí ñi tsihin ra naha.

22 Jutu ra tan sihi ra caahán ñi tacan tsa cuenda tyin yuuhví ñi tsi ra cuví ityi nuu tsihin nyívi Israel naha ra, tyin tsa natuhun tahan ra naha tyin cua tava cuii ra naha tsi nyívi vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo. 23 Yacan cuenda catyí ñi: “Ndāca tuhun ndo tsi maa ra. Ra tsa ñihi cuví ra.”

24 Tacan tan caná nyico ra naha tsi ra tsa nduvahá can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

25 Tacan tan nacahan ra tsa nduvahá can tan catyí ra:

—Yuhu ña tsitó yu tatun ra iyó cuatyí cuví ra, a ñavin. Intuhun ñi tsa tsitó yu tyin yuhu ra cuaa cuví yu, maa tyin vityin nditsin nyehé yu —catyí ra.

26 Tan tsicá tuhun nyico ra naha tsi ra inga tsaha tan catyí ra naha:

—¿Náa icá ra tsihin un? ¿Nacaa icá ra tan nanyehé un? —catyí ra naha tsihin ra.

27 Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñi ndo tsa cahan yu inga tsaha? ¿A cuñi ndihí ndo cunyicun ndo tsi ra can?

28 Tacan tan nduxaan ra naha tsi ra, tan catyí ra naha:

—Yooho tsa yihí un cuenda ra,

maa tyin nyuhu cuenda ra Moisés ra tsa tsicoo tsa naha yihí ndi. 29 Nyuhu tsitó ndi tyin Nyoo cahan tsihin ra Moisés tahan tsa naha. Maa tyin ra can, ndi ña tsitó ndi numaa quee ra —catyí ra naha.

30 Tacan tan nacahan ra tsa nduvahá can tan catyí ra:

—¡Naa tsa iyo cahnu cuví tsehe! Nyooho ña tsitó ndo numaa quee ra, tan jananyehé ra tsi yu. 31 Tsitó vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñi ra, tyaá soho Nyoo tsa caahán ra.

32 Ndi iin tsaha tan ñaha ca cuñi yo tatun iyó iin ra jananyehé tsi iin ra cuaá nda cacú ra. 33 Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

34 Tacan tan catyí ra naha tsihin ra:

—Yooho ra iyó cuatyí cuví un nda cacú un. ¿Tan cuñi un jacuaha un tsi nyuhu? —catyí ra naha.

Tan tava cuii ra naha tsi ra vehe ñuhu.

**Nyívi tsa nduve tuhun Nyoo iyó
añima tumaa tsa cuaa ñi**

35 Tsitó ra Jesús tyin tava ra naha tsi ra tsa janduvahá ra vehe ñuhu. Tan tsa ñihí tahan ra tsihin ra tan catyí ra tsihin ra:

—¿A tsinú iñi yooho tsa caahán Rayii tsa quee nda gloria? —catyí ra tsihin ra.

36 Tan nacahan ra tan catyí ra:

—Catyí tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

37 Tan catyí ra Jesús:

—Tsa nyehé un tsi ra. Tan juvin ra natuhún tsihin un —catyí ra tsihin ra.

38 Tacan tan tsicuiñi tsiti ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

39 Tan catyí ra Jesús:

—Yuhu vatsí yu tyin catyi tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsitó tuhun Nyoo cua nanyehe ñi tyin coo tuhun Nyoo añima ñi. Tan nyivi cuñí tyin nditsin nyehe ñi, catyí ñi tyin tsitó ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

40 Tacan tan juhva ra fariseo tsa nyecú tsihin ra Jesús tsiñi ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu?

—catyí ra naha.

41 Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsitó ndo, yacan cuenda ndoó cuatyí ndo siqui ndo —catyí ra tsihin ra naha.

Mbee ticatyí jana Nyoo cuví nyivi yihí cuenda ra, tan tsitó ñi tsi ra tsa jaquitsí Nyoo tyin jahá cuenda ra tsi ñi

10 ¹ 'Caahán nyico ra Jesús tan catyí ra:

—Tsa nditsa catyí yu tsihin ndo, tatun iin ra cua quihvi tsitsi cora mbee ticatyí, tan ñavin yuhu cora quihví ra, ra ican cuví ñasuhu. ² Maa tyin ra tsa quihví ityi yuhu cora, ra jahá cuenda mbee can cuví ra. ³ Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavá ra tsi ti ityi tsata cora. ⁴ Tsa yahá tavá ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra. ⁵ Maa tyin tatun nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

⁶ Tyehen cahán ra Jesús tsihin nyivi. Maa tyin maa ñi ña cutuñi iñi ñi náa tuhun caahán ra tsa caahán ra tacan.

Ra Jesús cuví ra jahá cuenda vaha mbee ticatyí

⁷ Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihví nyivi yihí cuenda yu tan cuví ñi tumaa mbee ticatyí jana yu.

⁸ Tandihí ra tsa quitsí tsa ndi cumañi quitsi yu, ra suhu cuví ra naha. Maa tyin mbee jana yu ña tyaa yahvi ti naha ti tsa cahán ra naha. ⁹ Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cuhun ca ñi anyaya. Tan cuví ñi tumaa mbee tsa quihví tan quitá tsitsi cora can. Tan ñihí ti cuhu tsatsí ti.

¹⁰ 'Iin ra ñasuhu, vatsí ra, vatsí suhu ra, vatsí cahñi ra, vatsí jativi ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa.

¹¹ Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can. ¹² Maa tyin ra cuví musu, tatun nyehé ra vatsí lobo tsa cuví quití xaan, nacoó ra mbee jana tsitoho ra. Tan tsinú ra. Tyin ñavin jana maa ra cuví tsi ti naha ti. Tacan tan cua tiin quití xaan can tsi mbee can. Tan jacunu ti tsi mbee can ityi can tan ityi ihya. ¹³ Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

¹⁴ 'Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu, ¹⁵ tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu. ¹⁶ Iyó tucu inga mbee jana yu tsa ña yihí tsitsi cora ihya. Cuñí tsi tsa cuhun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

17 'Jutu yu cuñí ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu. 18 Yoñi cuvi quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

19 Tsa tsiñi nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahvi sava nyico ra naha inga tsaha. 20 Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

21 Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

Nu ña cuñí ra cuví ityi nuu tsihin nyivi Israel tyaa yahvi ra naha tsi ra Jesús

22 Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu. 23 Tan ra Jesús tsicá nuu ra vehe ñuhu can ityi nu nañi corredor ra Salomón.

24 Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quitsaha tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsi Nyoo? Cahan catsi tsihin ndi vityin ihya —catyí ra naha.

25 Tan catyí ra Jesús:

—Tsa yaha cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu. 26 Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu

tsihin ndo. 27 Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu.

28 Yuhu tsahá yu ñayivi nyito tsa ña cua naa maa coo ti. Tan ña cua cunaa ti. Tan ndi yoñi cuví quihin nyaá tsi ti naha ti tsitsi ndaha yu. 29 Maa Jutu yu tsaha tsi ti naha ti tsi yu. Tan cahnu ca cuví maa ra tan ñavin ca tandihi nyivi. Tan yoñi cuví quihin nyaá tsi ti tsitsi ndaha ra. 30 Yuhu tan Nyoo Jutu yu, iin ñi cuví ndi —catyí ra Jesús.

31 Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra. 32 Tan catyí ra Jesús tsihin ra naha:

—Cuaha xaan tsa vaha javaha yu nuu ndo tsihin tunyee iñi Jutu yu. ¿Tan ndaa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

33 Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javaha un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

34 Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo. 35 Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacunañi ra nyoo tsi nyivi naquihín tsa caahán ra. 36 Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu? 37 Tatun ña javahá yu tsa javahá Jutu yu, ña tsinu iñi ndo tsi yu.

38 Maa tyin tatun javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan

tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

39 Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

40 Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutya ra Juan tsa jihna, tan ndoo ra ican. **41** Cuaha nyivi tsahan tsinyehé tsi ra, tan catyí ñi:

—Nditsa, vasu ndi intuhun tsa iyo ña javaha ra Juan, maa tyin tandihi tsa cahan ra cuenda ra ihya tan nditsa —catyí ñi.

42 Tan cuaha xaan nyivi tsa iyó ityi can tsinu iñi tsa caahán ra Jesús.

Nu tsihi ra Lázaro

11 **1** Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña. **2** Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra tsihin ixi jiñi ña. **3** Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhví xaan ra.

4 Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

5 Cuñi xaan ra Jesús tsi ña Marta tan ña tahan ña, tan ra Lázaro cuhva ñi. **6** Maa tyin quivi tsa tsiñi ra tyin cuuhví ra Lázaro, ndoo ra uvi quivi ca nu nyii ra. **7** Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

8 Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenda?

9 Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhu tsa jandunditsín nu ñuhu ñayivi ihya.

10 Maa tyin tatun tsacuaa tsicá nuu ra, cuví nduva ihñi ra tyin nduve ñuhu Nyoo jandunditsín nu cuahan ra.

11 Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

12 Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

13 Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra. **14** Tacan tan cahan catsi ra Jesús tsihin ra naha:

—Ra Lázaro tsa tsihi ra. **15** Tan cusii iñi yu tyin yoñi yu nyii ndacan. Tyin tacan vaha ca tsa cuenda nyoocho na tsinu iñi ndo tsa caahán yu. Cohon ndo cunyehe yo tsi ra —catyí ra Jesús tsihin ra naha.

16 Tacan tan ra Tomás, tsa jacunañi ra naha “tñihí”, catyí ra tsihin inga ra tsicá tsihin ra Jesús:

—Cohon ndihi yo tyin cúu yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayivi nyito coo yo

17 Tsa tsaq ra Jesús Betania, ñihj tuhun ra tyin tsa cumi quivi nyii ra Lázaro tsitsi ñuhú. **18** Ñuu Betania can canyii tsi yatyin ñi nu canyii ñuu Jerusalén, tumaa iin cuhva tsa uvi

kilómetro sasava. **19** Tan cuaha ra cuví ityi nuu tsihin nyivi Israel cuahan cua nyehe nu nyíi ña Marta tan ña María cua jatyinyee ra naha tsi ñi tyin tsihi cuhva ñi. **20** Tan ñihí tuhun ña Marta tyin tsa cua tsaa ra Jesús. Tan cuahán ña cua jatahan ña tsi ra. Maa tyin ña María ndoo ña yuvehe. **21** Tan catyí ña Marta tsihin ra Jesús:

—Jutu mañi yu, tun tsatyin ihya nyii maa un, ña cua cúu cuhva yu.

22 Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

23 Tan catyí ra Jesús tsihin ña:

—Cuhva un cua nandoto ra.

24 Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

25 Tacan tan catyí ra Jesús tsihin ña:

—Yuhu cuví ra janandotó ndiyi.

Tan tsahá yu tsa coo nyitó nyivi.

Nyivi tsinú iñi tsa caahán yu, vasu tsa tsihi ñi maa tyin coo nyico ñi. **26** Tan tandihi ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahán yu ihya? —catyí ra tsihin ña.

27 Tan catyí ña:

—Tsinú iñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

Nu tsacu ra Jesús nu ñaña ra Lázaro

28 Tsa yahá tsa cahán ña Marta tacan, tan tsahan ña tsiquihin ña tsi ña María tahan ña, tan xeehe ñi cahán ña tsihin ña:

—Tsa tsaá Ra Maestro ihya. Tan caná ra tsi un —catyí ña.

29 Tsa tsiñi ña María tsa caahán ña, numi xaan ña nduvitá ña, tan cuahán ña nu nyíi ra Jesús. **30** Tan ñaha ca quihvi ra Jesús tsitsi ñuu hora can, ndi nyíi ra nu ñañihí ña Marta tsi ra. **31** Tan nda yuvehe ña María, yucú ra cuví ityi nuu tsihin

nyivi Israel jatyinyee ra naha tsi ñi. Tan nyehe ra naha tyin numi quita ña. Tan cuñi maa ra naha tyin cuahán ña nu ñaña cua vacu ña. Tan cuahán ndihi ra naha tsata ña.

32 Tan cuhva tsa tsaá ña María nu nyíi ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihi ra cuhva yu —catyí ña.

33 Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuiihya xaan cuñi ra.

34 Tan tsicá tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cohon tan nyehe un —catyí ñi tsihin ra.

35 Tan tsacu ra Jesús.

36 Tacan tan catyí ra Israel can naha ra:

—Nyehe ndo tyin yahá xaan cuñi ra tsi ra —catyí ra naha.

37 Maa tyin catyí juhva ra naha:

—Ra ihya jananyehé ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

Nu janandoto ra Jesús tsi ra Lázaro

38 Nducuiihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuví can. Tan ndasí iin yuu yuhu can.

39 Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

40 Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnú cuví Nyoo? —catyí ra tsihin ña.

41 Tacan tan jatsiyo ra naha yuu can. Tan nanyehé ndaa ra Jesús ityi andivi, tan catyí ra:

—Tyatyá, Jutu Mañi yu, tyahvi nyoo tsi un tyin tsiñi un tsa caahán yu. **42** Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

43 Tsa yahá tsa cahán ra tacan, caná tsaa ra, tan catyí ra:

—¡Lázaro, quita nu nyí un juvin!

44 Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

Nu nducú cahñi ra naha tsi ra Jesús

(Mt. 26:1-5; Mr. 14:1-2; Lc. 22:1-2)

45 Tan cuaha xaan ra cuví ityi nuu tsihin nyivi Israel tsa tsahán tsihin ña María quitsahá tsinú iñi ra naha tsa nyehé ra naha tsa javahá ra Jesús.

46 Maa tyin juhva ra naha tsahán ra naha tsijacoto ra naha tsi ra fariseo naha ra tsa javahá ra Jesús. **47** Tacan tan ra fariseo can naha ra tan ra cuví ityi nuu tsihin ra jutu naha ra jatitahán ra naha tsi ra tuhvá ndu iín naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can.

48 Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumí tyiñu nda ñuu Roma cua quitsi ra naha tan cua caní ra naha vehe ñuhu yo tan ñuu yo —catyí ra naha.

49 Maa tyin ra Caifás ra tsahnu tsa cuví ityi nuu tsihin ra jutu naha ra cuiya can, cahán ra tan catyí ra tsihin ra naha:

—Nyooho nduve maa náa tsitó ndo. **50** Ndi ña cutuñi iñi ndo tyin vaha ca tsa cúu intuhun ñi rayi tsa cuenda

tandihí nyivi ñuu, tan ñavin ca tsa cúu tandihí yo —catyí ra Caifás.

51 Ra Caifás can ñavin tsa cuñi maa ra tan caahán ra, tyin ra cuví ityi nuu tsihin tandihí jutu cuví ra cuiya can, yacan cuenda maa Nyoo jacahán tsi ra nu catyí ra tyin ra Jesús cua cúu ra tsa cuenda tandihí nyivi ñuu Israel.

52 Tan ñavin tsa cuenda maa ñi maa nyivi can, maa tyin cua jandu iin ra tsi tandihí nyivi cuví sehe Nyoo tsa iyó tandihí ca ñuu. **53** Tacan tan nda quivi can tan ra cuví ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

54 Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañi Efraín tsa canyí yatyin ñi nu tsiqui, nu cuví ñuhu ityi. Tan ndoó ra ican tsihin ra tsicá tsihin ra.

55 Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can. **56** Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñi nyooho? ¿A cua quitsi ra can vico ihya, o ña cua quitsi ra? —catyí ñi.

57 Tan ra cuví fariseo tan ra cuví ityi nuu tsihin jutu, catyí ra naha tyin tatun ndáa nyivi tsitó nu nyí ra Jesús, na catyí tuhun ñi. Tyin cuquihin ra naha tsi ra tyin cunyi ra vehe caa.

Nu tyosó ña María ndutya tami tsaha ra Jesús

(Mt. 26:6-13; Mr. 14:3-9)

12 **1** Cumañi iñu quivi ca tsa tahan tsi vico pascua, tan tsaa ra Jesús ñuu Betania nu iyó ra Lázaro, ra tsa janandoto ra. **2** Ican javahá ñi tsa cuxiñi ra Jesús. Ña Marta tyihí ña

coho nu mesa. Tan tsinyaꝯ ra Jesús nu mesa. Tan nyaá ndihí tucu ra Lázaro tsihin ra. ³ Tacan tan quihñ ña María tumaa sava litru ndutya tami tsa tsinꝯ tsihin maa ñi maa yucu tsa nañí nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahꝯ can tan jana ityi ña tsaha ra tsihin ixi jiñi ña. Nanihí cahnu maa tsitsi vehe can tsitꝯ xico ndutya tami can. ⁴ Tan ican nyíi tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsahꝯ catyí ra Judas can tsihin ñi can:

⁵ —¿Nacuenda ña xico ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyivi ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyivi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can. ⁷ Tacan tan catyí ra Jesús tsihin ra:

—Jaña tsi ña, tyin ñaha ihya javahꝯ ña tyehen tsa cuenda tsa cua quihvi cuñu ñuhu yu tsitsi ñuhu.

⁸ Nyivi ndaahvi tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

Nu nducú cahñi ndihí ra Israel naha ra tsi ra Lázaro

⁹ Cuaha xaan nyivi Israel ñihí tuhun ñi tyin ra Jesús nyíi ra Betania, tan tsahan ñi ican. Ñavin intuhun ñi ra Jesús cuñí ñi nyehe ñi tyin cuñí ndihí tucu ñi nyehe ñi tsi ra Lázaro, ra tsa janandotꝯ ra Jesús. ¹⁰ Tacan tan ra cuví ityi nuu tsihin jutu natuhun tahan ra naha tyin cua cahñi ndihí ra naha tsi ra Lázaro. ¹¹ Tyin tsa cuenda ra tan cuaha xaan nyivi

Israel quitá tsiyo ñi tan quitsahꝯ tsinú iñi ñi tsi ra Jesús.

Nu quihvi ra Jesús ñuu Jerusalén

(Mt. 21:1-11; Mr. 11:1-11; Lc. 19:28-40)

¹² Cuaha xaan nyivi tsaꝯ ñi ñuu Jerusalén tsa cuví vico pascua. Tan tsa inga quivi tsitꝯ ñi tyin ra Jesús cua tsa ra ñuu can. ¹³ Tacan tan tsahnyꝯ ñi ndaha ndicaha tan cuahán ñi cua jatahan ñi tsi ra Jesús. Tan caná tsa ñi, tan catyí ñi:

—¿Cahnu xaan cuví Nyoo! ¿Nasoco xaan Nyoo tsi ra vatsí ihya tsihin tunyee iñi Nyoo! ¿Nasoco xaan Nyoo tsi Rey cuenda yo nyivi Israel! —catyí ñi, caná tsa ñi.

¹⁴ Tan ñihí ra Jesús iin burru tan tsicoso ra tsi ti tumaa catyí maa nu tutu Nyoo tyehen:

¹⁵ Ña nayuhvi ndo nyivi ñuu Sión Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

¹⁶ Quivi can ra tsicá tsihin ra Jesús, ña cutuñí iñi ra naha tsa nyaá nu tutu Nyoo. Maa tyin tsa yahꝯ cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuii tahan ra.

¹⁷ Nyivi tsa nyehe quivi tsa canꝯ ra Jesús tsi ra Lázaro tsitsi ñaña, quivi janandotꝯ ra tsi ra, nacatyí tuhun ñi tsa nyehe ñi. ¹⁸ Yacan cuenda cuaha xaan nyivi tsijatahan tsi ra Jesús, tyin tsitꝯ ñi tsa iyo tsa javahꝯ ra. ¹⁹ Tacan tan ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihí nyivi tan cuahán ñi cuanyicún ñi tsi ra —catyí ra naha.

Nu nanducú juhva ra tsa quee Grecia tsi ra Jesús

²⁰ Yucú tucu juhva ra Grecia mahñu nyivi tsa tsahan tsijacahnꝯ vico ñuu Jerusalén. ²¹ Tacan tan

natuhva ra Grecia can naha ra nu nyaá ra Felipe, ra quee ñuu Betsaida tsa canyí Galilea, tan cahān ndaahvi ra naha tsihin ra tan catyí ra naha:

—Taa, cuñi ndi cahan ndi tsihin ra Jesús —catyí ra naha.

22 Tan tsahān ra Felipe tsicahān ra tsihin ra Andrés. Tan tsahān nduvi ra naha tsicatyí tuhun ra naha tsihin ra Jesús tyin ra Grecia can cuñi ra naha cahan ra naha tsihin ra. 23 Tan nacahān ra Jesús, tan catyí ra:

—Vityin tsa tsaa hora tsa cunuhu nyico yu nda nu quee yu, tan cua jacahnu jutu yu tsi yu, tsa cuví yu Rayi tsa quee nda gloria. 24 Tsa nditsa catyí yu tsihin ndo tyin tatun iin tsiti tan ña cua quihvi tsi ñuhū tan ña tyahyu tsi, intuhun ñi tsiti cua cuví tsi. Maa tyin tatun tyahyu tsi, ndutsaa tsi inga tsaha tan cua coo cuaha ca tsiti tsi. 25 Nyivi tsa cuñi xaan ñayivi iyó ñi, cua cunaa ñi. Maa tyin nyivi ña cuñi ñayivi iyó ñi nu ñuhu ñayivi ihya, cua ñihi ñi ñayivi nyitó tsa ña cua naa maa coo ñi. 26 Ndáa nyooho nyivi cuñi javaha tyiñu nuu yu, naha ndo quitsi nyicun ndo tsi yu. Tan nu cunyaa yu, cunyaa ndihi nyooho tsa jahá tyiñu tyiñu yu. Tyin nyivi jahá tyiñu tyiñu yu, cua jacahnu jutu yu tsi ñi.

Nu caahán ra Jesús nácaa cua cúu ra

27 Vityin tsicá xaan iñi yu. Tan ¿náa cua cahan yu? ¿A catyí yu tsihin Jutu yu na jatsiyo ra tundoho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayivi ihya. 28 Vaha ca cahan yu tsihin Jutu yu tan catyí yu: “Jutu Mañi yu, jacahnu sivi un” —catyí ra Jesús.

Tacan tan cahān iin ndusu ityi andivi tan catyí tsi tyehen:

—Tsa yaha jacahnu yu sivi yu, tan cua jacahnu nyico yu inga tsaha —catyí ndusu can.

29 Tan nyivi nyecú ican, tsiñi ñi

ndusu can, tan catyí ñi tyin savi cahān. Tan inga ñi catyí tyin iin ángel cahān tsihin ra.

30 Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahān ndusu can, tyin tsa cuenda tsa vaha tsi maa ndo cuví can. 31 Vityin cuví cuhva tsa cua tatsi tuñi Nyoo tsi nyivi iyó nu ñuhu ñayivi. Tan vityin cuví cuhva cua tava cuii Nyoo tsi nu ndacá ñaha nu ñuhu ñayivi ihya. 32 Tan cuhva tsa cua ticaa nyivi tsi yu nu cruu, yacan cuví cuhva cua ixta yu tandihi nyivi cahun ñi tsihin yu —catyí ra Jesús.

33 Caahán ra tacan tsa cuenda tsa cuñi ra cutuñi iñi ñi tyin tacan cua cúu ra. 34 Tan nacahān nyivi tan catyí ñi tsihin ra:

—Tuhvá ndi tsiñi cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyivi tsi Rayi quee nda gloria nu cruu? Tan ¿yóo ra cuví Rayi tsa quee nda gloria tsa caahán un tuhun? —catyí ñi, tsicá tuhun ñi tsi ra.

35 Tacan tan catyí ra Jesús tsihin ñi:

—Ñuhū tsa jandunditsin nu nyecú ndo, juhva ña quivi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyivi tsicá nu naa ña tsitó ñi nu maa cuahán ñi. 36 Tsjinu iñi ndo tsi yuhu ra cuví ñuhū nditsin, tsitsi tsa ndi nyí yu tsihin ndo. Tacan tan cuví ndo nyivi iyó nu nditsin.

Tsa yaha cahān ra Jesús tacan tan jatsiyo ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyivi Israel naha ra tsi ra Jesús

37 Vasu ndi maa cuaha xaan tsa iyo javahá ra Jesús nuu nyivi maa tyin ña tsinú maa iñi ñi tsa caahán ra. 38 Tyin taahán tsi tsa cuví tumaa tsa cahān ra Isaías ra cuví ndusu yuhu

Nyoo, nu cahān ra tyehen:

Jutu Mañi yu, yoñi cuñi tsinu
iñi tsa caahán ndi.

Yoñi cutuñi iñi tunyee iñi tsa
iyó tsi un, Jutu Mañi yu, catyí
ra Isaías tahān tsanaha.

39 Tsa cuenda tsa nyaá nu tutu,
yacan cuenda ña cuví tsinu iñi ñi tyin
juvin ñi tyaa nyico tucu ra Isaías
tyehen:

40 Nyoo jacuaa ra tsi ñi. Tan
jandundava ra añima ñi,
tan ña cua nyehe ñi tsihin tinuu
ñi,
tan ña cua cutuñi iñi ñi tsihin
añima ñi,
tan ndi ña cua nacuhva cuenda
ñi tsi ñi tsi ra tan janduvaha
ra tsi ñi.

41 Ra Isaías cahān ra tyehen tyin
nyehe ra tsa cahnu cuví Jutu Mañi yo
Jesús, tan cahān ra tuhun ra.

42 Cuaha xaan nyivi Israel tsinú iñi
tsi ra Jesús. Tan nda cuanda juhva ra
cuví ityi nuu naha ra. Maa tyin ña
jandunditsin ra naha tsi ra naha nuu
nyivi tyin yuuhví ra naha tsi ra cuví
fariseo naha ra. Coto tava cuii ra
can naha ra tsi ra naha vehe ñuhu.

43 Tyin cuñi ra naha nduvaha ra
naha nuu nyivi tan ñavin nuu Nyoo.

Tuhun cahān ra Jesús cua tatsi tuñi tsi nyivi

44 Ñihi caahán ra Jesús, tan catyí
ra:

—Nyivi tsa tsinú iñi tsi yu, ñavin
tsi maa ñi maa yu tsinú iñi ñi, tyin
tsinú ndihi iñi ñi tsi ra tsa jaquitsi tsi
yu. **45** Tan nyivi tsa nyehé tsi yu,
nyehé ndihi ñi tsi ra tsa jaquitsi tsi
yu. **46** Yuhu cuví tumaa ñuhu nditsin
tan vatsi yu jandunditsin yu nu ñuhu
ñayivi ihya, tyin nyivi tsinú iñi tsi yu
ña cua ndoo ñi nu naa. **47** Maa tyin
tatun yihí ndo tsiñi ndo tsa caahán
yu, tan ña javahá ndo tsa caahán yu,
ñavin yuhu tatsi tuñi tsi ndo. Tyin ña
vatsi yu nu ñuhu ñayivi ihya tyin

tatsi tuñi yu tsi nyivi. Vatsi yu tyin
vatsi jacacú yu tsi ñi. **48** Nyivi tsa ña
cuñi naquihin vaha tsa caahán yu tan
ña cuñi ñi javaha ñi tumaa cuhva
cuñi yu, iyó tsa cua tatsi tuñi tsi ñi.

Tuhun tsa caahán yu, yacan cua tatsi
tuñi tsi ñi nu cua cundihi quivi.

49 Tyin ñavin cuenda maa yu caahán
yu. Jutu yu, ra tsa jaquitsi tsi yu,
tsaha ra tyiñu tsi yu caahán ra náa
cua cahan yu tan náa cua jacuaha yu.

50 Tan tsitó yu tyin tyiñu tsa tsaha ra,
tsahá tsi ñayivi nyitó tsa ña cua naa
maa coo nyivi. Yacan cuenda, tandihi
tsa caahán yu, caahán yu cuhva catyí
maa Jutu yu tsa cahan yu.

Nu nacatyá ra Jesús tsaha ra tsicá tsihin ra

13 ¹ Tsa ndi cumañi ca iin quivi
tan tahan tsi vico pascua, tsa
tsitó maa ra Jesús tyin tsa cua tsa
hora tsa cua quita ra nu ñuhu ñayivi
ihya tan cunuhu ra nu nyaá Jutu ra.
Tacan ñi maa cuñi xaan ra tsi nyivi
cuenda ra tsa iyó nu ñuhu ñayivi
ihya. Tan vityin cua janaha ra tsi ñi
tyin cuñi xaan ra tsi ñi tyin cua cúu
ra tsa cuenda ñi.

² Tan cuxiñi ra Jesús tsihin ra tsicá
tsihin ra. Tan quihvi nu ña vaha
añima ra Judas Iscariote sehe ra
Simón tan natyuhu nu tsi ra na xico
ra tsi ra Jesús tan cuhva cuenda ra tsi
ra Jesús tsi nu xaan iñi tsi ra. ³ Maa
tyin ra Jesús tsitó ra tyin tsaha Jutu
ra tandihi tyiñu tsi ra tyin quihí
ndaha ra. Tan tsitó ra tyin nu nyaá
Nyoo quee ra tan juvin ñi ndacan cua
cunuhu nyico ra. Tan nyaá ra Jesús
cuxiñi ra. ⁴ Tacan tan nduvita ra tan
tava ra jahma tsa nditsi ra ityi tsata,
tan tsahñi ra iin toalla tsitsi ra.

⁵ Tacan tan tyihí ra ndutya tsitsi iin
tsicoho tan quitsaha nacatyá ra tsaha
ra tsicá tsihin ra. Tan jana ityi ra
tsaha ra naha tsihin toalla can.

⁶ Tan tsa cua nacatyá ra tsaha ra
Simón Pedro tan catyí ra Simón

tsihin ra:

—Jutu Mañi yu, ¿a yooho cua nacatya tsaha yu?

7 Tacan tan catyí ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quivi.

8 Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuvi un.

9 Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

10 Maa tyin catyí ra Jesús tsihin ra:

—Nyivi tsa ndi tsityi, ña cuñi tsi tsa ndoo naniñ cahnu cuñu ñuhu ñi. Tsaha ña ñi cuñi tsi ndoo, tyin tsa ndoo maa naniñ ñi. Nyooho tsa ndoo maa ndo, vasu ña tandihi ndo ndoo —catyí ra Jesús.

11 Cahán ra tsa ña tandihi ra naha ndoo tyin tsitó ra yóo cua xico tsi ra tsi nu xaan iñi tsi ra nahnu.

12 Tsa yahá nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaá nyico ra inga tsaha nu mesa tan catyí ra tsihin ra naha:

—¿A cutuñi iñi nyooho tsa javahá yu tsihin ndo? 13 Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuví yu.

14 Yuhu tsa cuví yu Ra Jacuahá tan Jutu Mañi ndo, nacatya yu tsaha ndo, tan tacan cuñi tsi tsa nacatya tahan maa ndo tsaha ndo. 15 Yuhu tsahá yu iin cuhva tsi ndo tyin javaha ndo tumaa cuhva javahá maa yu. 16 Tsa nditsa catyí yu tsihin ndo tyin ndi iin musu tan ña cahnu ca cuví ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuví ra tan ñavin ca ra tsa tavá tyiñu tsi ra.

17 Tatun cutuñi iñi ndo yacan, tan javahá ndo can, sii xaan cua coo ndo.

18 Ñavin tsa cuenda tandihi ndo caahán yu. Yuhu tsitó maa yu yóo nacatsi yu. Maa tyin cuñi tsi tsa cuvi tumaa caahán tuhun Nyoo tyehen: “Ra tsa tsatsi paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo.

19 Caahán yu tyehen tsihin ndo tsa ndi cumañi ca cuvi can tyin quivi cua cuvi yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihi tsa iyó. 20 Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuví can. Tan nyivi tsa naquihín vaha tsi yuhu, naquihín vaha ndihi ñi tsi ra tsa jaquitsi tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu

(Mt. 26:20-25; Mr. 14:17-21;

Lc. 22:21-23)

21 Tsa yahá tsa cahán ra Jesús yacan, tan quitsahá nducuihyá xaan cuñi ñanima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

22 Tacan tan ra tsicá tsihin ra, quitsahá nyehé nuu tahan ra naha, tan ña tsitó ra naha yóo tuhun caahán ra Jesús. 23 Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuví ra tsa cuñi xaan ra Jesús. 24 Tan ra Simón Pedro javahá ra seña tsi ra can, na ndaca tuhun ra yóo tuhun caahán ra Jesús. 25 Tacan tan ra ican tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoó ra cuví ra tsa caahán un tuhun?

26 Tan nacahán ra Jesús tan catyí ra:

—Cua jatyii yu luxu paan, tan ra tsa cua cuhva yu itsi, ra ican cuví ra —catyí ra.

Tacan tan quih̄n ra luxu paan tan jatyī ra, tan tsah̄ ra tsi ra Judas Iscariote, sehe ra Simón. **27** Tsa quih̄n ra Judas paan can tan quih̄vi nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

28 Maa tyin ndi intuhun ra tsa nycú nu mesa can, ña cutuñi iñi ra naha nacuenta cahan ra tacan tsihin ra can. **29** Ra Judas cuví ra yihí ndaha yit̄n nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa kujata ra tsa tsiñi ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha. **30** Tsa yah̄ quih̄n ra Judas paan can, tacan tan quit̄a ra. Tan tsacuaa cuví can.

**Tyiñu tsaa tsa tav̄a ra Jesús tsi yo:
tsa cuñi tahan yo tsi yo**

31 Tsa yah̄ tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayii tsa quē nda gloria. Tan cua nyehe ñi tsa cahnu cuví Nyoo tsa cuenda yu. **32** Tatun Rayii tsa quē nda gloria jacahnú ra tsi Nyoo, tacan tucu Nyoo cua jacahnu ra tsi ra. Tsa tsā quivi cua jacahnu ra tsi ra. **33** Sehe yu, ña naha ca cua cunyi yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuví cuhun ndo nu cua cuhun yu. **34** Tshá yu iin tyiñu tsaa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo. **35** Tatun cuñi tahan ndo tsi ndo, tandih̄ nyivi tan cua coto ñi tyin nyivi nyicún tsi yu cuví ndo.

Nu caahán ra Jesús tyin ra Pedro cua cahan ra tyin ña nacotó ra tsi ra

(Mt. 26:31-35; Mr. 14:27-31;
Lc. 22:31-34)

36 Ra Simón Pedro tsic̄a tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuvi cunyicún un tsi yu vityin. Maa tyin nu cuahán ca tsi quivi, tan cunyicun un tsi yu —catyí ra Jesús.

37 Tacan tan catyí ra Pedro tsihin ra:

—Jutu Mañi yu, ¿náca tsa ña cua cuvi cunyicun yu tsi un vityin? Tan tsa iyó vaha iñi yu tsa cuhva yu ñayivi yu tsa cuenda un —catyí ra.

38 Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsaa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

Ra Jesús cuví ityi cuhun yo nu nyaá Nyoo Jutu yo

14 ¹ Tan catyí ra Jesús: —Ña caca xaan iñi ndo. Ts̄inu iñi ndo tsi Nyoo, tan ts̄inu ndih̄i iñi ndo tsi yu. ² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyī tuhun yu tsihin ndo. Tan cua cuhun yu cua janduvaha yu iin nu coo ndo. ³ Tsa yah̄ tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu. ⁴ Nyooho tsa tsitó maa ndo nu maa cuhun yu, tan tsa tsitó ndo ityi.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿náca coto ndi ityi? —catyí ra.

⁶ Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tсахá ñayivi coo ndo. Tan tsa cuenda yuhu ñi, tan cuvi tsa ndo nu nyaá Jutu yu. **7** Tan tsa nacotó ndo tsi yu, tan tsa cuenda yacan nacotó ndihí ndo tsi Jutu yu. Nda vityin tan nu cuahán ca tsi ityi nuu, cua nacoto ndihí ndo tsi ra, tyin tsa nyehé ndo tsi ra —catyí ra Jesús.

8 Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

9 Tan nacahan ra Jesús, tan catyí ra:

—Yooho Felipe, tsa naha xaan nyí yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihí ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo?” **10** ¿A ña tsinú ñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu. **11** Tsinu ñi ndo tsi yu tyin iin ñi ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsinú ñi ndo yacan, cuví tsinu ñi ndo tsi yu tsa cuenda tyiñu Nyoo Jutu yu tsa javahá yu. **12** Tsa nditsa caahán yu tsihin ndo tyin nyivi tsinú ñi tsi yu, cua javaha ndihí ñi tsa javahá yu. Tan cahnu ca tsa cua javaha ñi, tyin yuhu cahun yu nu nyaá Nyoo Jutu yu. **13** Tan tandihí tsa cua ndacan ndo tsi jutu yu tsihin sivi yu, cua ñihi ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuví yu Sehe ra. **14** Yuhu cua javaha yu náa ndihí tsa ndacan ndo tsa cuenda yu.

Nu caahán ra Jesús tyin cuhva ra Tatyí li ra tsi yo

15 Tatun cuñí ndo tsi yu, tya yahvi ndo tsa caahán yu. **16-17** Tan

ndacan tahvi maa yu tsi Nyoo Jutu yu na jaquitsi ra iin ra cua cuhva tunyee ñi tsi ndo. Tan ra ican cuví Tatyí li Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyivi tsa taahán ca ñi tsa iyó nu ñuhu ñayivi ihya, ña cua cuvi naquihin ñi Tatyí li Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo. **18** Ña cua naco cuí yu tsi ndo. Cua quitsi nyico yu nu yucú ndo. **19** Juhva cuí ña quivi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihí ndo. **20** Quivi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo. **21** Nyivi tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuñí tsi yu. Tan ñi tsa cuñí tsi yu, Jutu yu cua cuñí ra tsi ñi. Tan cuñí ndihí tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

22 Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihí nyivi iyó nu ñuhu ñayivi?

23 Nacahan ra Jesús tan catyí ra:

—Nyivi cuñí tsi yu, javahá ñi tsa caahán yu. Tan Jutu yu cuñí ra tsi ñi. Tan quitsi ndi nu yucú ñi tan coo ndi tsihin ñi. **24** Nyivi ña cuñí tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

25 Caahán yu tandihí tuhun ihya tsihin ndo tsitsi tsa ndi nyí yu tsihin ndo. **26** Maa tyin nu cuahán ca tsi ityi nuu cua jaquitsi Jutu yu Tatyí li ra

tsihin sivi yu. Tan cua jatyinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihi tsi ndo. Tan cua janducuhun iñi ra tsi ndo tsa tsa yaha cahan yu tsihin ndo.

27 'Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña caça xaan iñi ndo tan ña nayuhvi ndo. 28 Tsiñi ndo tsa cahan yu nu catyi yu tyin cua cuhun yu tan cua quitsi nyico yu nu yucú ndo. Tatun cuñí ndo tsi yu, cua cusii iñi ndo tyin catyí yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu. 29 Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

30 Ña cuaha ca cua cahan yu tsihin ndo. Tyin vatsí nu ndacá ñaha nu ñuhu ñayivi ihya. Maa tyin ña ndacá ñaha nu tsi yu. 31 Tyin tacan tan coto nyivi iyó nu ñuhu ñayivi, tyin yuhu cuñí yu tsi Nyoo Jutu yu, tan javahá yu tyiñu tavá ra tsi yu.

'Nduvita ndo, tan cohon ndo, na cua tsiyo yo ihya.

Nu cahan ra Jesucristo tyin cuví ra tumaa yoho tsa cuví uvas

15 1 'Yuhu cuví yoho tsa cuví uvas tsa nditsa. Tsa cuví uvas cuví tsi tumaa yoho nditsaahan ndivi maa tyin yucu vixi cuví tsi. Tan Jutu yu cuví ra jahá cuenda yoho can. 2 Tsaahnyá ra soco tsa ña tsahá tsiti. Tan nacahnya ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti. 3 Tsa yaha janduvaha Jutu yu tsi nyooho tsihin tsa jacuahá yu tsi ndo. 4 Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuví cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuví javaha ndo

tsa vaha tatun ña iin ñi cuví ndo tsihin yu.

5 'Yuhu cuví yoho cahnu. Tan nyooho cuví soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuví javaha ñi tatun ña nyanaá ñi tsi yu. 6 Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmi yo.

7 'Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuví ndacan ndo náa cuñí maa ndo tsi yu, tan yuhu cua cuhva yu tsa cua ndacan ndo.

8 Tatun cuaha tsa vaha javahá ndo, jacahnú xaan ndo tsi Jutu yu cuví can. Tan tsihin yacan janahá ndo tyin cuví ndo nyivi tsa nditsa nyicún tsi yu. 9 Yuhu cuñí yu tsi ndo, tumaa tsa cuñí Jutu yu tsi yu. Ña naa iñi ndo cuhva cuñí yu tsi ndo. 10 Tatun tyaá yahvi ndo tsa caahán yu, ña cua naa iñi ndo tyin cuñí yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñí xaan ra tsi yu.

11 'Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo. 12 Tuhun tsa caahán yu tsihin ndo, yacan cuví tsehe: cuñi tahan ndo tsi ndo, tumaa tsa cuñí maa yu tsi ndo. 13 Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo. 14 Nyooho cuví ra vaha iñi tsi yu tatun javahá ndo tsa caahán yu tsihin ndo. 15 Ña caahán ca yu tyin musu yu cuví tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuví ndo, tyin tandihi tsa caahán Jutu yu tsihin yu tan jacotó yu itsi tsi ndo. 16 Ñavin nyooho nacatsi tsi yuhu tyin maa yu nacatsi tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo

cua quita vaha tsi, tumaa iin itu tsa vaha xaan cuvaha. Tan cuaha xaan niñi cua coo, tan ña cua tivi maa tsi. Tacan tan cua cuhva Jutu yu tandihi tsa ndacan ndo tsi ra tsihin sivi yu. 17 Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra

18 Tatum ndasi cuñi nyivi taahán iñi tsa iyó nu ñuhu ñayivi ihya nyehe ñi tsi ndo, coto ndo tyin jihna ca maa yu ndasi cuñi ñi nyehe ñi. 19 Tun tsatyin nyivi cuenda nu ñuhu ñayivi ihya cuví ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyooho tsa nacatsi yu tsi ndo mahñu ñi. Yacan cuenda ndasi cuñi ñi nyehe ñi tsi ndo, tyin ñavin ca nyivi cuenda nu ñuhu ñayivi ihya cuví ndo. 20 Nducuhun iñi ndo tsa cahán yu tsihin ndo, tyin ndi iin musu tan ña cahnu ca cuví ra tan ñavin ca tsitoho ra. Tatum tyaá yahvi nyivi tsa caahán yu tsihin ñi, tacan cua tyaa yahvi ndihi ñi tsa jacuahá ndo tsi ñi. Tan tatum ndasí icá ñi tsihin yu, ndasi cua ica ndihi ñi tsihin ndo. 21 Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsi tsi yu.

22 Tun tsatyin ña quitsi yu cahán yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yahá cahán yu tsihin ñi. 23 Nyivi tsa ndasi cuñi nyehé tsi yu, ndasi cuñi ndihi ñi nyehé ñi tsi Jutu yu. 24 Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasi cuñi ñi nyehé ñi tsi yu, tan tsi Jutu yu. 25 Maa tyin tandihí yacan cuví, tyin cuñi tsi cundaa tumaa cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan

ndasi cuñi ñi nyehe ñi tsi yu”, catyi tsi.

26 Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quivi cua tsa yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu. 27 Tan nyooho tucu cua cahan ndo tumañi iñi tsa cuenda yu, tyin yucú ndo tsihin yu nda quivi quitsahá jahá tyiñu yu.

16 1 Caahán yu tyehen tsihin ndo tyin tacan tan ña jandihí ndo tsa tsinú iñi ndo tsi yu. 2 Cua tava cuii nyivi tsi ndo vehe ñuhu. Tan coo quivi cua cahñi ñi tsi ndo, tan cua cuñi ñi tyin tyiñu Nyoo javahá ñi. 3 Tacan cua ica ñi tyin ña nacoto ñi tsi Jutu yu tan ndi tsi maa yu. 4 Caahán yu tsehe tsihin ndo tyin quivi tsa cua cuvi tumaa cuhva caahán yu tsihin ndo, cua nducuhun iñi ndo tyin tsa yahá cahán yu tuhun ihya tsihin ndo.

Ña cahán yu tyehen tsihin ndo nda jihna tyin ndi nyíi maa yu tsihin ndo.

Tyiñu jahá Tatyí Ii Nyoo

5 Maa tyin vityin cua cuhun yu tyin cunyaa yu tsihin ra tsa jaquitsi tsi yu. Ndi intuhun ndo tan ña tsicá tuhun ndo tsi yu nu maa cua cuhun yu. 6 Tyin tsa nducuiihya cuñi ndo tsa caahán yu tyehen tsihin ndo. 7 Caahán yu tsa nditsa tsihin ndo tyin vaha ca tsa cuhun yu cuenda tsa vaha tsi maa ndo. Tyin tatum ña cuhun yu, ña cua quitsi Tatyí Ii tsa cua cuhva tunyee iñi tsi ndo. Maa tyin tatum cuhun yu, cua jaquitsi yu tsi ra. 8 Tan quivi quitsi ra, cua jacoto ra tsi nyivi iyó nu ñuhu ñayivi ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo. 9 Cua jacoto ra tsi ñi tyin iyó cuatyí ñi tyin ña tsinú iñi ñi tsi yu.

10 Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu. 11 Tan cua coto ñi tyin cua jandaa Nyoo cuatyí ñi tyin tsa yahá cundaa cuatyí nu cuví cuihna, nu ndacá ñaha nu ñuhu ñayívi ihya.

12 Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin. 13 Quiví quitsi Tatyí li tsa caahán tsa nditsa, maa ra cua janaha tandíhi tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandíhi tsa tsiñí ra. Tan cua jacoto ra náa cua cuvi nu cuahán ca tsi ityi nuu. 14 Cua jacahnu ra tsi yu, tyin cua naquihin ra tuhun yu tan cua janaha ra can tsi ndo. 15 Tandíhi tsa iyó tsi Jutu yu, tsii maa yu cuví ndíhi can. Yacan cuenda caahán yu tyin Tatyí li cua naquihin ra tuhun yu, tan cua janaha ra tsi nyooho.

**Ra tsicá tsihin ra Jesús cuiihyá
xaan cuñí ra naha, maa tyin nu
cuahán ca tsi quívi cua cusíi iñi
ra naha, catyí ra Jesús**

16 Ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

17 Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuii ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra. 18 ¿Náa cuñi tsi catyí tsa “ña naha cuii ca” can? Ña cutuñi iñi yo náa tuhun caahán ra —catyí ra naha.

19 Tan tuví iñi ra Jesús tyin cuñi ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin

ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo?

20 Tsa nditsa caahán yu tsihin ndo tyin nyooho cua nducuiihya iñi ndo tan cua vacu ndo, maa tyin nyívi cuenda nu ñuhu ñayívi cua cusíi iñi ñi. Vasu cuiihya cuñi ndo vityin, tucuiihya iñi can cua nanduvi tsi tsa síi. 21 Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa síi cuñi ña tyin cacu iin lee sehe ña. 22 Tacan tucu nyooho vityin, cuiihya xaan cuñi ndo. Maa tyin cua nyehe nyico yu tsi ndo inga tsaha. Tacan tan cua cusíi nyico iñi añima ndo. Tan yoñi cuví quihin nyaá tsa síi can tsi ndo.

23 Quiví can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandíhi tsa ndacan ndo tsi ra tsihin sívi yu. 24 Nda vityin tan ñaha ca ndacan ndo tsa ndacan ndo tsihin sívi yu. Ndacan ndo tan cua ñihi ndo tan cusíi xaan iñi ndo.

**Ra Jesucristo cuví jaha canaa ra tsa
ña vaha iyó nu ñuhu ñayívi**

25 Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuaha yu tsi ndo, maa tyin cua catyí tuhun catsi yu tuhun Jutu yu tsihin ndo. 26 Quiví can tsihin sívi yu cua ndacan ndo tsa ndacan ndo tsi ra. Tan ña tsiñi ñuhu ca tsa cahan ndaahvi yu tsihin Jutu yu tsa cuenda ndo. 27 Tyin maa Nyoo Jutu yu cuñi ra tsi ndo. Cuñi ra tsi ndo tyin nyooho cuñi ndo tsi yu, tan tsinú iñi ndo tyin nu nyaá Nyoo quee yu. 28 Nu nyaá Jutu yu quee yu tyin quitsi yu nu ñuhu ñayívi ihya. Maa tyin vityin cua nacoo yu ñuhu ñayívi ihya tyin cua cunuhu nyico yu nu nyaá ra —catyí ra Jesús.

29 Tacan tan catyí ra tsicá tsihin ra: —Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi. 30 Vityin nyehé ndi tyin tsitó un tandíhi cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

31 Tan catyí ra Jesús:

—Tan vityin ¿a tsinú iñi ndo tsi yu? 32 Maa tyin caahán yu tsihin ndo tyin tsa vatsí hora. Tan vityin cuví hora tsa cua cuhun ndo siin siin ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu. 33 Caahán yu tandíhi tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehe ndo tundoho, maa tyin janyee ndo iñi ndo, tyin yuhu tsa jahá canaa yu tsa ña vaha tsa iyó nu ñuhu ñayivi ihya.

Nu tsicán tahvi ra Jesús tsi Nyoo tsa cuenda ra tsicá tsihin ra

17 1 Tsa yahá cahán ra Jesús yacan, nanyehé ndaa ra ityi andivi tan catyí ra:

—Jutu Mañi yu, tsa tsaá hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un. 2 Tyin tavá tyiñu un tsi yu tsa quihí ndaha yu tandíhi nyivi, tan cuhva yu ñayivi nyitó tsa ña cua naa maa tsi tandíhi nyivi tsa tsahá un tsi yu. 3 Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayivi nyitó tsa ña cua naa maa.

4 Tsa jacahnu yu tsi un nu ñuhu ñayivi ihya tan tyiñu tsa tavá tyiñu un tsi yu tsa ndíhi tsi javahá yu. 5 Tan vityin, Jutu Mañi yu, cua quitsi nuhu nyico yu nu nyaá un, tan cuñí

yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

6 Tándíhi ra tsa tsahá un tsi yu naha ra, ra tsa natavá vaha un mahñu nyivi iyó nu ñuhu ñayivi ihya, jacoto yu tsi ra naha yóo ra cuví yooho. Tsii maa un cuví tsi ra naha tan tsahá un tsi ra naha tsi yu. Tan tyaá yahvi ra naha tsa caahán un. 7 Vityin tsitó ra naha tyin tandíhi tsa tsahá un tsi yu, nu nyaá un quee tsi. 8 Tyin catyí tuhun yu tsihin ra naha tsa cahán un tsihin yu, tan naquihín vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsi tsi yu.

9 Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandíhi nyivi, maa tyin tsicán tahvi yu tsa cuenda ra tsa tsahá un tsi yu naha ra, tyin tsi maa un cuví ra naha. 10 Tandíhi nyivi tsa cuví tsii un, tsahá tucu un tsi ñi tsi yu. Tan maa ñi janahá tsa cahnu cuví yu.

11 Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyaa nyico yu tsihin un. Jahá cuenda tsi ra tsa tsahá un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yo. 12 Quivi tsinyij yu nu ñuhu ñayivi ihya tsihin ra naha, jahá cuenda yu tsi ra tsa tsahá un tsi yu naha ra tsihin tunyee iñi tsa iyó tsi un. Tan jahá cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaa, ra ican ñi cuví ra cuanaa tan quitá cuhva tumaa tsa catyí nu tutu maa un.

13 Vityin tsa cua quitsi yu nu nyaá un, maa tyin tsitsi tsa ndi nyí yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii

cuñí maa yu. **14** Yuhu cahān yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñí ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu. **15** Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jahā cuenda tsi ra naha coto náa jaha nu ña vaha tsi ra naha. **16** Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha. **17** Jacu ii tsi ra naha tsihin tsa nditsa, na javaha ra naha maa ñi maa cuhva cuñí maa un. Tyin tsa caahán un, yacan cuví tsa nditsa. **18** Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo. **19** Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

20 Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu ñi tsi yu, tsa cuenda tsa cua cahan ra ihya naha ra ityi nuu ca. **21** Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihi nyivi iyó nu ñuhu ñayivi cua tsinu ñi ñi tyin maa un jaquitsi tsi yu. **22** Yuhu tsahā yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsahā un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo. **23** Yuhu nyíi yu tsihin ñi. Tan yooho nyaá un tsihin yu tyin tacan tan iin ña nyivi cua cuví ñi. Tan coto tandihi nyivi

iyó nu ñuhu ñayivi tyin maa un jaquitsi tsi yu, tan cuñí xaan un tsi ñi nyicún tsi yo, tumaa tsa cuñí maa un tsi yu.

24 'Jutu Mañi yu, maa un tsahā tsi ñi tsi yu. Tan cuñí yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsahā un tsi yu, tyin cuñí un tsi yu nda ndi cumañi ca tsinu ñuhu ñayivi. **25** Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu. **26** Tsa cahān yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñí un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

Nu cua tyihi ra Israel naha ra tsi ra Jesús vehe caa

(Mt. 26:47-56; Mr. 14:43-50;
Lc. 22:47-53)

18 ¹ Tsa yahā tsa cahān ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra. **2** Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra. **3** Tan ican tsaā ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaā ra naha ican, nyisó ra naha mityi, tan nyisó ra naha lámpara tan ñuhu yiti. **4** Tan ra Jesús tsa tsitó maa ra tandihi tsa cua tahan ra. Quitā ra tan tsicā tuhun ra tsi ra naha:

—¿Yóo nanducú ndo? —catyí ra.

5 Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan iñi tsi ra nahnu, nyíi ndihí ra tsihin ra naha. **6** Cuhva tsa cahān ra Jesús: “Yuhu cuví”, tandihí ra naha nacacā tsata ra naha tan nduvā ra naha nu ñuhu. **7** Tacan tan tsicā tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

8 Tan catyí ra Jesús:

—Tsa cahān yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunuhun ra naha —catyí ra Jesús tsihin ra naha.

9 Yacan cahān ra Jesús tyin na cundaa tsa cahān ra nda ityi tsata ca nu catyí ra: “Ra tsa tsahā Jutu yu tsi yu, ndi intuhun ra naha tan ña tsinaá ra naha.” **10** Tacan tan tava ra Simón Pedro mityi tsa ndahá ra tan tsahnyā ra soho cuaha iin ra tsa nañí Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra.

11 Maa tyin ra Jesús catyí ra tsihin ra Pedro:

—Natyihi mityi un tsitsi vena un. Tatun Nyoo Jutu yu tan cuñí ra tsa nyehe yu tundoho, taahán tsi tsa nyehe yu can —catyí ra Jesús tsihin ra.

Nu tsindacā ra naha tsi ra Jesús nuu ra cuví ityi nuu tsihin jutu naha ra

(Mt. 26:57-58; Mr. 14:53-54; Lc. 22:54)

12 Tacan tan andaru can tsihin capitán ra naha, tan vitya cuenda vehe ñuhu naha ra, tññ ra naha tsi ra Jesús, tan tsahñí ra naha tsi ra, **13** tacan tan tsindacā ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. **14** Ra Caifás can cuví ra tsa cahān tsihin ra cuví ityi nuu tsihin nyívi Israel naha ra tyin vaha ca tsa cúu intuhun ñi rayí tsa cuenda tandihí nyívi ñuu.

Nu caahán ra Pedro tyin ña nacotó ra tsi ra Jesús

(Mt. 26:69-70; Mr. 14:66-68;

Lc. 22:55-57)

15 Ra Simón Pedro tan inga ra tsa tsicā tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihví ra can tsihin ra Jesús nuquehe ra jutu can. **16** Maa tyin ra Pedro ndoo ra ityi tsata vehe. Yacan cuenda quitā ra tsa nacotó ra jutu can, tan cahān ra tsihin ñaha tsa nyaá yuvehe can. Tan jayahā ra tsi ra Pedro ityi tsitsi nuquehe can. **17** Tacan tan ñaha tsa nyaá yuvehe can tsicā tuhun ña tsi ra Pedro, tan catyí ña:

—¿A ñavin yooho cuví iin ra tsicā tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

18 Tacan tan ra cuví musu tan ra vitya naha ra tsa yucú ican, jatahān ra naha ñuhū tyin vitsin xaan. Tan nyecú nyityi ra naha tuñu ra naha ñuhū. Tan nyíi ndihí tucu ra Pedro tuñu ra ñuhū tsihin ra naha ican.

Nu janahmā ra jutu tsaahnu tsi ra Jesús

(Mt. 26:59-66; Mr. 14:55-64;

Lc. 22:66-71)

19 Tacan tan ra jutu tsaahnu can quitsahā tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyívi. **20** Tan catyí ra Jesús tsihin ra:

—Yuhu nuu tandihí nyívi cahān yu. Tan jacuahā yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá tandihí nyívi Israel ndu iin. Tan nduve nu cahān xeehe yu. **21** ¿Nacuenda tsicá tuhun un tsi yuhu? Vaha ca ndāca tuhun un tsi nyívi tsa tsiñí tsa cahān yu, tan maa ñi cua catyí tuhun náa cahān yu

tsihin ñi tyin maa ñi tsitó náa cahan yu —catyí ra Jesús tsihin ra.

22 Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

23 Tan catyí ra Jesús:

—Tatun cahan yu iin tsa ña vaha, cahan tsihin yu nda tsa ña vaha cahan yu. Maa tyin tatun cahan yu tsa vaha, ¿nacuvi tyin cañi un tsi yu? —catyí ra Jesús tsihin ra can.

24 Yahá can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu çuiya can.

Nu caahán nyico ra Pedro inga tsaha tyin ña nacotó ra tsi ra Jesús

(Mt. 26:71-75; Mr. 14:66-72;
Lc. 22:58-62)

25 Tan nyaá nyityi ra Pedro tuñu ra ñuhü. Tan catyí ra naha tsihin ra:

—¿A ñavin yoocho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

26 Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyivi ra tsa tsahnyá ra Pedro soho, quitsahá tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

27 Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitoocho.

Nu cutuñi ra Jesús nuu ra Pilato

(Mt. 27:1-2, 11-14; Mr. 15:1-5;
Lc. 23:1-5)

28 Yahá can tan quitá ra naha tsihin ra Jesús yuvehe ra Caifás tan tsindaca ra naha tsi ra vehe tyiñu ra

ndacá ñaha. Tsa cua cunditsin tan ra Israel ña quihvi ra naha tsitsi vehe tyiñu can tyin ñavin vehe nyivi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuvi cuxiñi ñi quivi vico pascua.

29 Yacan cuenda quitá ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siqui ra ihya? —catyí ra Pilato tsihin ra cuví ityi nuu tsihin nyivi Israel naha ra.

30 Tan nacahan ra Israel naha ra tan catyí ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

31 Tacan tan catyí ra Pilato tsihin ra naha:

—Quihin ndo tsi ra, tan tatsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyivi Israel nduve ndatu iyó tsi ndi tsa cahñi ndi tsi nyivi —catyí ra naha.

32 Tacan cundaá tsa cahan ra Jesús nácaa cua cúu ra. 33 Yahá can tan quihvi nyico ra Pilato tsitsi vehe tyiñu can inga tsaha. Tan caná ra tsi ra Jesús tan tsicá tuhun ra tsi ra:

—¿A yoocho cuví rey cuenda nyivi Israel? —catyí ra tsihin ra.

34 Tan catyí ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyivi natyuhü tsi un cuhva cahan un tsihin yu? —catyí ra Jesús tsihin ra Pilato.

35 Tan catyí ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsahá cuenda tsi un tsi yu. ¿Náa javahá un? —catyí ra tsihin ra Jesús.

36 Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun

tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyí ra Jesús tsihin ra Pilato.

37 Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa caahán maa un. Yacan cuenda cacu yu tan vatsí yu nu ñuhu ñayivi ihya, tyin cahan yu tsa nditsa. Tandihí nyivi tsa tyaá yahvi tsa nditsa, tyaá soho ñi tsa caahán yu —catyí ra Jesús.

38 Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yahá tsa tsicá tuhun ra Pilato yacan, quitá ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihya.

Nu cua cahñi ra naha tsi ra Jesús

(Mt. 27:15-31; Mr. 15:6-20; Lc. 23:13-25)

39 Maa tyin nyooho iyó ndo tuhun tsa tsicán ndo na tava yu tsi iin ra nyíi vehe caa tsa iyó vico pascua ihya. ¿A cuñi ndo tava yu tsi ra tsa cuví rey cuenda ndo tsa cuví ndo nyivi Israel? —catyí ra Pilato tsihin ra naha.

40 Tacan tan quitsahá caná tsa tandihí ra naha tan catyí ra naha:

—¿Ña tava un tsi ra can! ¡Tava tsi ra Barrabás! —catyí ra naha.

Tan ra Barrabás can cuví ra iin ñasuhu.

19 ¹ Tacan tan quihin ra Pilato tsi ra Jesús tan tava tyiñu ra na cañi andaru tsi ra. ² Tan andaru can javahá ra naha iin corona iñu tan tyihí ra naha jiñi ra Jesús. Tan jacunditsí ra naha iin jahma tunduuhva tsi ra, tahan tsa tuhvá ra

cuví rey tsinditsí. ³ Tacan tan natuhvá ra naha nu nyáá ra tan caahán nyaa ra naha tsi ra, tan catyí ra naha:

—¿Nacumi tsi un yooho Rey cuenda nyivi Israel! —catyí ra naha, tan cañi ra naha nuu ra.

4 Tacan tan quitá nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

5 Tan quitá ra Jesús yihí corona iñu jiñi ra, tan nditsí ra jahma tunduuhva can. Tacan tan catyí ra Pilato tsihin ra naha:

—¿Ma ra nyaá ihya! —catyí ra tsihin ra naha.

6 Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsahá caná tsa ra naha tan catyí ra naha:

—¿Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cahñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

7 Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cúu ra tyin jahá ra tsa Sehe Nyoo cuví tsi ra —catyí ra naha.

8 Tsa tsiñi ra Pilato yacan, tan nayuhvi xaan ca ra. **9** Tan quihvi nyico ra inga tsaha tsitsi vehe tyiñu, tan tsicá tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

10 Tacan tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsitó un tyin ra cumí tyiñu cuví yu tan iyó ndatu tsi

yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

11 Tan nacahan ra Jesús tan catyí ra:

—Tun tsatyin ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

12 Tsa ndihi cahan ra Jesús yacan, tan quitsaha nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihi ra tsa caahan tyin rey cuví ra naha, ra xaan iñi tsi rey cahnu cuví ra naha —catyí ra naha.

13 Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaá ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñi tsi catyí: “Nu canyí yuu”.

14 Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

15 Maa tyin cana tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

16 Tacan tan tsaha cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihin andaru tsi ra, cuahán ra tsihin ra naha.

Nu tsihi ra Jesucristo nu cruu

(Mt. 27:32-44; Mr. 15:21-32;

Lc. 23:26-43)

17 Tan nyisó ra Jesús cruu ra, cuahán ra iin nu nañi: “Yiqui Jiñi Ndiyi”. Tan tsihin yuhu hebreo nañi tsi Gólgota. 18 Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaa ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaa ra naha tsi ra Jesús mahñu. 19 Tan tava tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.” 20 Tan cuaha nyivi Israel cahvi ñi tsa caahan can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín. 21 Yacan cuenda ra cuví ityi nuu tsihin jutu cahan ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

22 Maa tyin catyí ra Pilato:

—Tsa tsa yaha tyaa yu, nandoo maa tsi tacan —catyí ra tsihin ra naha.

23 Tsa yaha tyaa ra andaru can naha ra tsi ra Jesús nu cruu, naquihin ra naha jahma ra. Tsa cumi taahan ra naha quihin luxu luxu jahma ra. Tan ndoo jahma ra tsa quicu cañi ñi tsa tsindasi ra. 24 Tan andaru can natuhún tahan ra naha:

—Ña cua cahnya yo itsi. Jasiqui suuhva jihna yo na nyehe yo yóo cua jaha canaa jahma can —catyí ra naha.

Tacan cuví tumaa caahan nu tutu Nyoo nu catyí tsi tyehen: “Tsatsa tahan ra naha luxu luxu jahma yu tan jasiqui suuhva ra naha tsihin tsi, nyehe ra naha yóo ra jaha canaa itsi.” Tan yacan cuví tsa javaha ra andaru can naha ra.

25 Tan nyaá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasihi ra Cleofas, tan ña María quee ñuu Magdala.

26 Tan nanyehę ra Jesús tsi sihi ra, nyaá ña yatyin ñi. Tan nanyehę tucu ra tsi ra tsa tsicą tsihin ra, ra tsa cuñi xaan ra. Tan catyí ra tsihin sihi ra:

—Miya, va ra sehe un nyaá tsihin un juvin —catyí ra.

27 Tacan tan catyí ra tsihin ra tsa cuñi xaan ra:

—Tsaa, va sihi un nyaá tsihin un juvin —catyí ra tsihin ra.

Nda quivi can tan quihın ra tsi ña, cuahan tsihin ra yuvehe ra. Tan jahą cuenda ra tsi ña.

Nu tsihi ra Jesús

(Mt. 27:45-56; Mr. 15:33-41;
Lc. 23:44-49)

28 Tsa yahą yacan, tsa nyehe ra Jesús tyin tsa ndihi tyiñu jahą ra. Tacan tan catyí ra:

—Na ityi iñi yu —catyí ra.

Tan tsihin yacan cundaą tsa nyaá nu tutu Nyoo nu caahán tsi nácaa cua cúu ra.

29 Tan ican nyaá iin quiyi nu yihí vinu iya. Tacan tan jatyi ra naha tsa cuvı yahma tumaa caa catyi tsihin vinu iya can. Tan tyaą ra naha yacan nu iin yutun hisopo. Tan jandaą ra naha tan tyanaą ra naha can yuhu ra.

30 Tsihi ra Jesús vinu can tan catyí ra:

—Tsa iyó vaha tandihi vityin —catyí ra.

Tacan tan nacañi nuu ra jiñi ra tan tsihi ra.

Nu tutsi ra andaru yoco xaan yiqui naha ra Jesús

31 Tsa ndi cumañi intuhun ña quivi tan tahan tsi quivi vico cahnu pascua, tan ra cuvı ityi nuu tsihin nyivi Israel ña cuñi ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuvı tsi tsa cuenda ra naha.

Yacan cuenda tsicąn ra naha tumañi iñi tsi ra Pilato na tava tyiñu ra na cahnu andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha. 32 Tacan tan cuahán andaru nu nyecú cruu can. Tan tsahnų ra naha sihin iin ra ticaá iin tsiyo xiin ra Jesús. Tan tsahnų nyico ra naha sihin inga ra tsa ticaa inga tsiyo xiin ra. 33 Maa tyin cuhva tsa natuhvą ra naha nu ticaá ra Jesús, nyehe ra naha tyin tsa tsihi maa ra. Yacan cuenda ña tsahnų ca ra naha sihin ra.

34 Maa tyin iin andaru can tutsi ra yoco xaan yiqui naha ra Jesús. Tan quitą niñi tan ndutya. 35 Ra tsa nacytyi tuhun yacan, ra tsa nyehe vaha cuvı ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho. 36 Tacan cuvı tyin tacan tan cundaa tsa catyí tuhun Nyoo nu catyí tsi: “Ndi intuhun yiqui ra tan ña tahnú.” 37 Tan iyó inga nyico nu catyí tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

Nu quihvi ñuhu ra Jesús

(Mt. 27:57-61; Mr. 15:42-47;
Lc. 23:50-56)

38 Tsa yahą yacan, ra José ra ñuu Arimatea tsicąn ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuvı ra iin ra yihí cuenda ra Jesús vasu tsa xeehe ñi tsa cuenda tsa yuuhvi ra tsi ra cuvı ityi nuu tsihin nyivi Israel. Tacan tan tsahą ra Pilato ndatu tsi ra, tan tsahan ra José tsinaquihın ra cuñu ñuhu ra Jesús. 39 Tsahan ndihi tucu ra Nicodemo, ra tsa tsahan tsicahan tsihin ra Jesús tsa tsa cuaa. Tsaą ra tsihin ndutya tami. Tan iin ndutya tami tsa nañi mirra nasaca nuu tsihin inga tsa nañi áloe. Tan quitą tsi tumaa oco utsi kilu tsa

tandihí tsi. **40** Tacan tan ra José tsihin ra Nicodemo quihín ra naha cuñu ñuhu ra Jesús tan cava nuu ra naha tsi ra tsihin jahma cuiñi tsa tyihí ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu. **41** Yatyin nu tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsa nu ñaha ca cuyucu ndi intuhun ndiyi. **42** Ican ñi tinyii ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

Nu nandotó ra Jesús

(Mt. 28:1-10; Mr. 16:1-8; Lc. 24:1-12)

20 ¹ Tsa naa ca tsa cuvi tumingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndasí yuhu ñaña can. **2** Tacan tan tsinú xaan ña cuahán ña nu nyii ra Simón Pedro tan inga ra tsicá tsihin ra Jesús, ra tsa cuñi xaan ra Jesús. Tan catyí ña tsihin ra naha:
—Quihín nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindaca ñi itsi —catyí ña María tsihin ra Pedro tan tsihin inga ra can.

3 Tacan tan ra Pedro tan inga ra can cuahán ra naha nu ñaña. **4** Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaá nu ñaña. **5** Quitsaha nyehé ihñi ra tsitsi ñaña, tan nyehe ra jahma cuiñi tsa cava nuu cuñu ñuhu ra Jesús, canyí can. Maa tyin ña quihvi ra tsitsi ñaña. **6** Yahá can tan tsaá ndihí ra Simón Pedro tsata ra, tan ra ican quihvi ra tsitsi ñaña can. Juvín ñi nyehe ndihí ra can jahma can canyí tsi. **7** Tan juvín ñi nyehe ndihí ra tyin jahma tsa tsindasí jiñi ra Jesús, ña iin ñi nu canyí can tsihin inga jahma can, yihí tahnu can tan cayucú siin can.

8 Tacan tan quihvi ndihí inga ra tsica tsihin ra Jesús can, ra tsa tsaá tsa jihna nu ñaña can. Tan nyehe ra tsa cuvi can, tan tsinu iñi ra. **9** Tyin tsa jihna, ña cutuñi iñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra. **10** Tacan tan cuanuhu ra tsica tsihin ra Jesús nda yuvehe ra naha.

Nu quituvi ra Jesús nuu ña María quee ñuu Magdala

(Mr. 16:9-11)

11 Maa tyin tsa tsaá nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehe ihñi ña tsitsi ñaña can. **12** Tan nyehe ña uvi taahan ángel nditsi ra naha jahma cuitsin, nyecú ra naha nu tsicava cuñu ñuhu ra Jesús. Iin ra nyaá ityi nu tsicava jiñi ra, tan inga ra nyaá ityi nu tsicava tsaha ra.

13 Tan tsicá tuhun ra ángel can naha ra tsi ña tan catyí ra naha:

—¿Nacuvi tsacú xaan un?

Tan catyí ña:

—Tsacú maa yu tyin quihín nyivi tsi Jutu Mañi yu, tan ña tsitó yu nu maa tinyii ñi tsi ra —catyí ña tsihin ángel can.

14 Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña tatun ra Jesús cuvi ra. **15** Tacan tan tsicá tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñi maa ña tyin ra jahá cuenda cora yutun tata can cuvi ra. Tan catyí ña:

—Tatta, tatun yooho quihín tsi ra Jesús, cahan tsihin yu nu maa tsindaca un tsi ra, tyin cunaquihin yu tsi ra —catyí ña tsihin ra.

16 Tacan tan catyí ra Jesús tsihin ña:

—¡María! —catyí ra tsihin ña.

Tan nanyehe ña tan cahan ña tsihin ra tsihin yuhu hebreo, tan catyí ña:

—¡Raboni! —Tan cuñí tsi catyí can: “Maestro”.

17 Tan catyí ra Jesús tsihin ña:

—Ña t̃in un tsi yu, tyin ñaha ca cuhun yu nu nyaá Jutu yu. Maa tyin c̃yaahan tan cahan un tsihin tand̃ih̃i yañi yu tyin cuahan yu nu nyaá Jutu yu, tan juvin ñi Jutu nd̃ih̃i ndo cuví tsi ra. Cuahan yu nu nyaá Nyoo yu, tan juvin ñi Nyoo ndo cuví tsi ra —catyí ra Jesús tsihin ña.

18 Tacan tan tsahan ña María ñuu Magdala can tsijacoto ña tsi ra tsica tsihin ra Jesús tyin nyehe ña tsi ra tan cahan ra yacan tsihin ña.

Nu quituṽi ra Jesús nuu ra tsica tsihin ra

(Mt. 28:16-20; Mr. 16:14-18; Lc. 24:36-49)

19 Juvín ñi maa quiṽi can nu quitsaha vitya, tsa cua cuaa tan ndu iin ra tsica tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityí nuu tsihin nyiṽi Israel. Tan ra Jesús quituṽi ra tan tsinyãa nyityi ra mahñu ra naha. Tan tsah̃a ra nacumi tsi ra naha, tan catyí ra:

—Na coo tsa taxin añima ndo —catyí ra.

20 Tsa yah̃a tsa cahan ra yacan tan janah̃a ra ndaha ra tan xiin ra tsi ra naha. Tan ra ican naha ra s̃ĩi xaan cuñí ra naha tsa nyehe ra naha tsi Jutu Mañi yo. 21 Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa taṽa Jutu yu tyiñu tsi yu, tacan taṽa nyico tucu yuhu tyiñu tsi nyooho —catyí ra tsihin ra naha.

22 Tacan tan tiṽi ra tsi ra naha tan catyí ra tsihin ra naha:

—Naquihin ndo Tatyí Ii Nyoo.

23 Nyiṽi tsa jahá ndo tucahnu iñi, iyó tucahnu iñi tsi ñi. Tan nyiṽi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yah̃a nandoto ra

24 Maa tyin ra Tomás, iin rq tsica tsihin ra Jesús, ra tsa catyí ñi: “ra tinihi”, yoñi ra nyií tsihin ra naha tsa tsahan ra Jesús. 25 Yah̃a can tan nacatyí tuhun ra tsica tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yih̃i nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

26 Tsa yah̃a una quiṽi yucú nyico ra tsica tsihin ra Jesús tsitsi iin vehe. Tan nyií ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihví ra tan tsinyãa nyityi ra mahñu ra naha. Tan tsah̃a ra nacumi tsi ra naha tan catyí ra:

—Na coo tsa taxin añima ndo.

27 Tacan tan quitsah̃a catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuví un ra ndava iñi. Tsinu iñi —catyí ra Jesús tsihin ra Tomás.

28 Tacan tan nacahan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

29 Tan catyí ra Jesús tsihin ra:

—Yooho Tomás, vityin tsinú iñi un tyin nyehe un tsi yu. S̃ĩi ca cuñí nyiṽi tsa nduve tsa nyehe tan tsinú iñi ñi —catyí ra Jesús tsihin ra Tomás.

Nu jacoto ra Juan nacuenta tsiñu libru ihya

30 Cuaha ca tsa iyo javah̃a ra Jesús nuu ra tsica tsihin ra, maa tyin ña tand̃ih̃i tsi nyaá nu libru ihya.

31 Tsinyãa tsa nyaá tyin tacan tan

tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayivi nyitó tsa ña cua naa maa.

Nu quituví ra Jesús nuu utsa taahan ra tsicā tsihin ra

21 ¹ Tsa yaha can tan quituví ra Jesús nuu ra tsicā tsihin ra inga tsaha. Tyehen quituví ra yatin ñi yuhu miñi Tiberias: ² Iin ñi nu yucú ra Simón Pedro tan ra Tomás tsa nañi: “ra tñihí”, tan ra Natanael, ra ñuu Caná nu cuví Galilea. Tan yucú ndihi sehe ra Zebedeo naha ra tan uvi taahan ca ra tsicā tsihin ra Jesús. ³ Tan catyí ra Simón Pedro tsihin ra naha:

—Cuahan yu cua tñin yu tyaca —catyí ra.

Tan catyí ra naha tsihin ra:

—Cuhun ndihi ndi tsihin un —catyí ra naha.

Cuahán ra naha tan quihví ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha. ⁴ Tsa cuñi cunditsin tan quituví ra Jesús nu nyiti yuhu miñi can. Maa tyin ra tsicā tsihin ra, ña nacoto ra naha tsi ra. ⁵ Tacan tan catyí ra tsihin ra naha:

—Nyooho ra cuatyí, ¿a ñaha ca ñihi ndo tyaca?

Tan nacahan ra naha tan catyí ra naha:

—Ñaha ca ñihi ndi.

⁶ Tacan tan nacahan ra Jesús tan catyí ra:

—Cuxaxin ndo traya ndo tsiyo cuaha yutun ndoo juvin, tan cua ñihi ndo tyaca —catyí ra Jesús tsihin ra naha.

Tacan icā ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can. ⁷ Tan ra tsa cuñi xaan ra Jesús catyí ra tsihin ra Pedro:

—¡Jutu Mañi yo cuví ra! —catyí ra tsihin ra Pedro.

Tsa tsiñi ra Simón Pedro tyin Jutu

Mañi yo cuví ra, tsinditsi ra jahma ra, tyin tava ra can tsa cua tñin ra tyaca, tan quihví ra cuahán ra tsitsi ndutya can. ⁸ Tan inga ra tsa tsicā tsihin ra Jesús tsaq ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatyin ñi yuhu miñi can yucu ra naha tumaa iin cientu metru ñi. ⁹ Tsa nuu ra naha nu ñuhu, nyehe ra naha iin nu cayú tuun ñuhu. Tan canyí iin tyaca tsihin paan nuu tuun ñuhu can. ¹⁰ Tan catyí ra Jesús tsihin ra naha:

—Ndaqa ndo taahan tyaca tsa ndi tñin ndo —catyí ra Jesús tsihin ra naha.

¹¹ Tan ndaaq ra Simón Pedro nu yutun ndoo tan quitsahaq ixtá caa ra traya tyin tsitu cuii can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can. ¹² Tacan tan catyí ra Jesús tsihin ra naha:

—Ñaha ndo tyin curumusa ndo —catyí ra Jesús tsihin ra naha.

Tan ndi intuhun ra tsicā tsihin ra, ña cana iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra. ¹³ Tacan tan natuhva ra Jesús tan quihín ra paan can, tan tsaha ra tsi ra naha. Tan juvin ñi tacan icā ra tsihin tyaca.

¹⁴ Yacan cuví nu tsinu uñi tsaha quituví ra Jesús nuu ra tsicā tsihin ra tsa yahaq nandoto ra.

Nu caahan ra Jesús tsihin ra Simón Pedro

¹⁵ Tsa yaha tsa curumusa ra Jesús, tan tsicā tuhun ra tsi ra Simón Pedro: —Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana

yu —catyí ra Jesús tsihin ra Pedro.

16 Tsiçá tuhun nyico ra Jesús tsi ra inga tsaha:

—Simón sehe ra Jonás, ¿a cuñí un tsi yu? —catyí ra Jesús tsihin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñí yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu

—catyí ra Jesús tsihin ra.

17 Tan tsinu uñi tsaha tsiçá tuhun nyico ra tsi ra:

—Simón, sehe ra Jonás, ¿a cuñí un tsi yu? —catyí ra Jesús tsihin ra.

Cuhva tsa tsiçá tuhun ra tsi ra tsa tsinu uñi tsaha tatun cuñí ra tsi ra, ra Pedro nducuihya xaan cuñí ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñí yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu.

18 Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñí un cuhun un. Maa tyin tatun tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñí un cuhun un —catyí ra Jesús tsihin ra Pedro.

19 Tsa cahan ra Jesús yacan, cuñí ra cahan ra nácaa cua cúu ra Pedro tan cua jacahnu ra tsi Nyoo tacan. Yahá can tan catyí ra Jesús tsihin ra Pedro:

—¡Naha quitsi nyicun un tsi yu!
—catyí ra tsihin ra.

Nu caahán ra Juan tuhun maa ra

20 Tacan tan natsicq coo ra Pedro tan nyehe ra tyin nyicún inga ra tsa tsiçá tsihin ra Jesús tsi ra naha, ra tsa cuñí xaan ra Jesús. Juvin ra tsinyanaq tsi ra Jesús tsa cuxiñi ra quivi can. Tan tsiçá tuhun ra tsi ra tan catyí ra: “Jutu Mañi yu, ¿yoo ra cua xico tsi un?” catyí ra, tsiçá tuhun ra quivi tsa ndi cumañi ca cúu ra Jesús. **21** Cuhva tsa nyehe ra Pedro tsi ra, tsiçá tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

22 Nacahan ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náa cuenda yooho? Cohon yooho tsihin yu —catyí ra Jesús tsihin ra Pedro.

23 Tacan tan iin yaha ñi tsinu tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, ¿náa cuenda yooho?”

24 Yuhu cuví ra can, ra tsa cahan ra Jesús tuhun. Tan nyehe yu tandihi cuii maa tsa cuví tan tyaa yu nu libru ihya. Yuhu tsitó yu tyin tandihi tsa tyaa yu, tsa nditsa caahán tsi.

25 Iyó cuaha ca tsa javahá ra Jesús. Tun tsatyin tsicunya tandihi can nu libru, tsicá iñi yu tyin ndi ña cua cutahan can nani cahnú nu ñuhu ñayivi.

Tan na cuvi tsi tacan ñi.

Tyiñu Tsa Javahā Ra Apóstol: Ra Tsa Tava Tyiñu Ra Jesucristo

Nu catyí ra Jesús tyin cua quitsi Tatyí Ii Nyoo

1 Yooho Teófilo, quivi tsa jacuhun yu tutu tsa jihna ñi can tsi un, tyaā yu tandihí tsa quitsaha javahá ra Jesús tan tandihí tsa jacuahā ra nda quivi jihna ñi, **2** tan nda quivi nandaā ra andivi. Tan tsa ndi cumañi ca nandaa ra andivi, nacatsí ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra. **3** Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahān ra Jesús tsihin ra naha nácaa ndacá ñaha Nyoo tsi yo.

4 Tsa ndi nyíí ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahān yu tsihin ndo quivi can.

5 Nditsa tyin tsihin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

Nu nandaā ra Jesús andivi

6 Tsa ndu ijn ra tava tyiñu ra Jesús, tan tsicā tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña

cua cundaca ñaha ca ra ñuu Roma tsi yo? —catyí ra naha.

7 Tan nacahān ra Jesús tan catyí ra tsihin ra naha:

—Ña taahán tsi coto nyooho ndáa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi. **8** Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihí ñuu tsa cayucú Judea tan Samaria, tan nda cuanda nanñi cahnu ñuhu ñayivi —catyí ra Jesús tsihin ra naha.

9 Tan tsa yaha tsa cahān ra Jesús tuhun ihya, tan tsitsi tsa nyehé ra naha tsi ra, nandaā ra andivi, tan quihvi ra tsitsi vico. Tacan tan ña nyehe ca ra naha tsi ra. **10** Tan cuhva tsa nyehé ndaá ra naha andivi, quituvi uvi taahan ángel Nyoo tsa nditsí jahma cuitsin yatyin ñi nu nyecú ra naha. **11** Tan catyí ángel can naha ra tsihin ra tava tyiñu ra Jesús:

—Nyooho ra Galilea, ¿nacuenda nyehé ndaa xaan ndo andivi? Ra Jesús tsa nyehe ndo nandaā ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

Nu nacatsí ra tava tyiñu ra Jesús tsi ra Matías tyin jaha tyiñu ra tyiñu tsa javahā ra Judas

12 Tacan tan quita ra tava tyiñu ra Jesús nu tsiyucú ra naha yucu nu iyó yutun olivo. Tan cuanuhū ra naha ñuu Jerusalén. Tan yatyin ñi canyíí ñuu can, tumaa sava hora ñi tan tsaa yo. Tyin sava hora ñi cuví caca nyivi

quíví quitatú ñi, tyin tacan catyí maa ley tsa tyaq̄ ra Moisés. **13** Tsa tsaq̄ ra naha ñuu Jerusalén can, ndaq̄ ra naha nu tsinu uvi pisu vehe nu iyó ra naha. Tan ra tsa yucú can, cuví ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñí tsa nasama ra ndacá ñaha, tan tsihin ra Judas yañi ra Jacobo. **14** Tan tandihí ra ican naha ra ndu iín ra naha tandihí quíví tan tsicán tahvi ra naha tsi Nyoo. Tan yucú ndihí tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

15 Tan tsa tandihí nyívi tsa ndu iín quíví can quitá maa cientu oco ñi. Tacan tan nduvitá ra Pedro. Tan catyí ra tsihin ñi:

16 —Nyooho yañi, tsa nyaá tucu maa tsa tahañ ra Jesús cuhva ihya tan vityin tsa cundaq̄ tsa cahañ ra David jaha Tatyí li Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra. **17** Tan ra Judas cuví ra iin ra tsa tsinyií tsihin yo. Tan iin caa ñi jaha tyiñu ra tsihin yo. **18** Maa tyin tshahñ ra, tan jatá ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiñi ra, tan ndata tsitsi ra tan quitá tandihí tsiti ra.

19 Tan quíví tsa tsito nyívi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu cuenda tsa Tsati Niñi Nyívi. **20** Tyin nu libru Salmo catyí tsi cuenda ra Judas tyehen:

Na ndoo maa vehe ra.

Tan ña coo nyívi tsitsi vehe can. Tan catyí tucu tsi:

Inga ra cua jaha tyiñu tyiñu tsa javaha ra.

21-22 Tan vityin yucú ra tsa cutahan tsihin yo quíví tsinyií Jutu Mañi yo Jesucristo tsihin yo; nda quíví jacoondutyá ra Juan tsi ra, tan

nda quíví nandaq̄ ra cuahán ra andívi. Tan vityin ñiñi cuñí tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

23 Tacan tan cana ra naha tsi uvi taahan ra naha. Cana ra naha tsi ra José tsa nañi Barsabás, tan juvin ñi nañi tucu ra Justo; tan cana tucu ra naha tsi ra Matías. **24** Tan tsican tahvi ra naha tsi Nyoo tan catyí ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsi maa un, **25** tyin cuiso ra tyiñu tsa jacunaq̄ ra Judas tsa cuenda cuatyí ra, tan cuahán ra nu taahán maa tsi cuhun ra —catyí ra naha, tsican tahvi ra naha tsi Nyoo.

26 Tacan tan tava cuenda ra naha ndáa ra cua tahan tsi cuiso tyiñu can. Tan tahañ tsi tsi ra Matías. Ra ican cuví ra tahañ tsi cutahan tsihin tsa utsi iin ra tsa tava tyiñu ra Jesús.

Nu nuu Tatyí li Nyoo

2 ¹ Tsaq̄ quíví vico Pentecostés, tan ndu iin tandihí nyívi tsa tsinú iñi tsi ra Jesús. ² Tan sana iñi ñi tan tsiñi ñi cucayu ityi andívi. Tumaa cucayu tsa vatsi tatyí xaan. Tan iyo xaan cuví tsitsi vehe nu yucú ñi.

³ Tacan tan quituvi tumaa iin ñuhu tan tsaq̄ tsi siqui intuhun intuhun ñi. ⁴ Tan tandihí ñi tsitu ñi tsihin Tatyí li Nyoo. Tan quitsaha caahán ñi inga yuhu cuhva tsa jacahañ maa Tatyí li Nyoo tsi ñi.

⁵ Tan quíví can cuaha xaan ra ñuu Israel tsaq̄ ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihí ñuu tsa cayucú nu ñuhu ñayívi. ⁶ Tan tsa tsiñi ra can naha ra tsa iyo xaan cuví nu yucú nyívi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán

ñi jahá Tatyí li Nyoo. **7** Iyo xaan cuñí ra naha tan quitsahá natuhún tahan ra naha tan catyí ra naha:

—¿A ñavin nyívi ñuhu Galilea cuví tandíhi ñi tsa caahán ihya?

8 ¿Nacuenda tyin tsiñí yo caahán ñi cuhva caahán intuhun intuhun yo?

9 Ihya yucú yo tsa cuví yo nyívi quee Partia, Media, Elam, Mesopotamia, Judea, Capadocia, Ponto, Asia,

10 Frigia, Panfilia, Egipto, tan nyívi quee ityi nuu ca Cirene ityi Africa.

Tan yucú tucu yo tsa cuví yo nyívi ñuu Roma tan iyó yo ñuu ihya. Tan juhva yo cuví yo nyívi Israel nda quívi cacú yo. Tan inga yo cuví yo nyívi nanduví cuenda nyívi Israel tan nyicún yo ley tsa tyaa ra Moisés.

11 Iyó tucu yo tsa cuví yo nyívi quee Creta tan Arabia. Maa tyin tandíhi yo tan tsiñí yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

12 Tandíhi ra naha, iyo xaan cuñí ra naha, tan tsicá tuhun tahan ra naha tan catyí ra naha:

—¿Náa cuñí tsi catyí tandíhi tsa cuví ihya? —catyí ra naha.

13 Maa tyin inga ra jacuñí nyaa ra naha tsi ñi, tan catyí ra naha tyin tsiñí ñi.

Nu caahán ra Pedro tsihin nyívi

14 Tacan tan nduvitá ra Pedro tsihin tsa utsi iin ca ra tavá tyiñu ra Jesús. Tan ñihi cahán ra tan catyí ra:

—Nyooho yañi, tsa cuví ndo ra ñuu Israel, tan tandíhi nyooho tsa iyó ñuu Jerusalén ihya. Cuñí tsi tsa coto ndo tuhun ihya. Tan tyaa soho vaha ndo tsa cua cahan yu tsihin ndo.

15 Tyin cuñí maa ndo tyin tsiñí ndi. Maa tyin ñavin nyixi tsihi ndi, tyin ña tuhvá nyívi coho nyixi hora ihya, tyin ndi jatyaan. **16** Maa tyin tsa cuví ihya cuví tsa cahán ra Joel, ra cuví ndusu yuhu Nyoo tahán tsanaha. Tyin catyí ra:

17 Nu cua ndíhi quívi, catyí Nyoo, cua jaquitsi yu Tatyí li yu siquí tandíhi nyívi.

Tan cua cahan sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyívi tsahnu cua nyehe ñi ñumaahna jaha yu.

18 Cua jacuhun yu Tatyí li yu siquí ñi tsa jaha tyiñu tsa cuenda yu.

Tan cua cahan ñi tsa cuenda yu, catyí Nyoo.

19 Tan catyí ra tyin cua janaha ra tsa iyo cua nyehe nyívi ityi andívi.

Tan ityi nu ñuhu ñayívi cua javaha ra tsa iyo, seña niñi, seña ñuhu, tan vico yuhma.

20 Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandíhi tuhun caahán ra ihya cua cuví tsi tsa ndi cumañi ca tahan tsi quívi quitsi Jutu Mañi yo.

Tan quívi cua quitsi ra, iyo xaan cua cuví.

21 Tan tandíhi nyívi tsa tsicán tahvi tsi ra cua cacú ñi, catyí ra Joel jahá Nyoo.

22 Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsí tsi ra, tan tsa janahá Nyoo tsi yo tyin nditsa tsa nacatsí ra tsi ra, tsahá ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandíhi tsa caahán yu ihya. **23** Maa tyin quívi nacuhvá cuenda ndo tsi ra, javahá ndo tumaa cuhva tyaa maa Nyoo cuhva nda quívi jihna ñi. Tyin tsahá cuenda ndo tsi ra tsi ra caquiñi. Tan ticaá ra naha tsi ra nu cruu. Tsahñi ra naha tsi ra

jahā ndo. **24** Maa tyin Nyoo janandoto ra tsi ra. Jacacu ra tsi ra tyin ña cuvi cundaca ñaha tuhun tsihi tsi ra.

25 Tyin ra David cahān ra tuhun cahan ra Cristo tahān tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

26 Yacan cuenda sii xaan cuñí yu.

Tan jacahnú yu tsi Nyoo tsihin tsa sii cuñí yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

27 Tyin yooho, Nyoo Jutu yu, ña cua nacoo ihñi un añima yu nu yucú añima nyivi tsa tsihi, tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

28 Tan janahā un tsi yu ityi nu coo yu ñayivi ña cua naa maa.

Tan cua jacutu un tsi yu tsihin tusii iñi tyin maa un nyaá tsihin yu, catyí ra David cahān ra tsa cahān ra Cristo tahān tsanaha.

29 'Nyooho yañi, tsitó vaha yo tyin ra David tsi tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin. **30** Maa tyin ra David cuví ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata maa ra cua cuvi ra Cristo. Tan ra Cristo, cuví ra cua cundaca ñaha tumaa tsa tsindaca ñaha ra David. **31** Tan ra David tumaa tsa tyin nyehé ra tsa cua cuvi nu cuahán ca tsi ityi nuu. Tan cahān ra tuhun tsa cahān ra Cristo. Tan catyí ra tyin ña cua ndoo añima ra nu yucú añima nyivi tsa tsihi. Tan ndi ña cua tyahyu cuñu ñuhu ra, catyí ra.

32 Tan ra Jesús can janandoto Nyoo tsi ra. Tan tandihí maa ndi cuví ndi tsandaa tsa cuenda tsa nandoto ra.

33 Jutu Nyoo jacahnú ra tsi ra Jesús,

tan tsihin ndaha cuaha ra cañihí ra tsi ra nda gloria. Tan ra Jesús naquihin cuenda ra Tatyí Ii tsa catyí Jutu yo Nyoo tahān tsanaha tyin cuhva ra tsi yo. Tan yacan cuví tsa tsahā ra tsi ndi vityin. Juvín tsi cuví tsa nyehé ndo tan tsiñí ndo. **34** Tyin ñavin ra David nandaq ityi andivi. Maa tyin maa ra David cahān ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: “Cunyata xiin cuaha yu

35 tsitsi tsa cua caquin yu tsi ra xaan iñi tsi un tsaha un”, catyí ra David jahā Nyoo.

36 Tacan cahān ra Pedro tsihin ra naha, tan catyí tucu ra:

—Nyooho tan tandihí ca nyivi Israel, coto vaha ndo tyin tuhun ra Jesús, yacan cuví tsa caahán yu tsihin ndo ihya. Ticaq ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacá ñaha tsi yo jahā Nyoo —catyí ra Pedro.

37 Cuhva tsa tsiñi ra naha tsa cahān ra Pedro tuhun ihya, cuiihya xaan cuñi ra naha cuví. Tan tsica tuhun ra naha tsi ra Pedro tan tsi tandihí ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

38 Tacan tan catyí ra Pedro tsihin ra naha:

—Intuhun intuhun ndo ndu uvi iñi ndo cuatyí ndo tan nāsama ndo cuhva iyó ndo. Tan ccondutya ndo tsihin sivi ra Jesucristo. Tan cua jaha ra tucahnu iñi cuatyí ndo. Tacan tan cua cuhva Nyoo Tatyí Ii ra tsi ndo.

39 Tyin tahān tsanaha catyí Nyoo tyin cuhva ra Tatyí Ii ra tsi yo, tan tsi sehe yo, tan tsi nyivi tsa cañi iyó. Tyin tandihí nyivi tsa cua nacana Jutu Nyoo cua cuhva ra Tatyí Ii ra tsi ñi —catyí ra Pedro.

40 Tsihin tuhun ihya tan tsihin

inga ca tuhun, ra Pedro tsaḡa cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyívi caquiñi iyó nu ñuhu ñayívi ihya —catyí ra tsihin ra naha.

41 Tacan tan tandíhi ra tsa tyaa yahvi tuhun caḡan ra Pedro tsicoondutyā ra naha. Tan quitá tumaa uñi mil nyívi tsa tandíhi ñi, tan ndu iin ñi tsihin nyívi yihí cuenda ra Jesucristo. 42 Tan tandíhi quívi ndu iin tandíhi ñi, tan ñi iñi ñi tyaá soho ñi tsa jacuahá tandíhi ra tava tyiñu ra Jesucristo tsi ñi. Tan iin ñi cuví ñi tsihin tahan ñi, tan tsicán tahvi ñi tan tsatsí ñi paan tan tsihí ñi vinu tyin tacan tan ña cua naa iñi ñi tyin tsihí ra Cristo tsa cuenda cuatyí ñi.

Cuhva iyó nyívi yihí cuenda Jutu Mañi yo Jesucristo quívi can

43 Tan cuaha tsa iyo javaha tandíhi ra tsa tava tyiñu ra Jesucristo jahā Nyoo. Tan tandíhi ñi iyo cuñí ñi.

44 Tandíhi ñi yihí cuenda ra Cristo iin caa ñi iyó ñi tsihin tsa iyó tsi ñi.

45 Xicó ñi tsa iyó tsi ñi. Tan tsatsá ñi xuhun ñi tsi nyívi tahan ñi cuhva tsa tsiñí ñuhu tsi intuhun intuhun ñi.

46 Tandíhi quívi tan ndu iin ñi nda vehe ñuhu cahnu. Tan nda yuvehe ñi iin caa ñi tsatsí ñi paan tan tsihí ñi vinu. Tan siñ cuñí ñi tsatsí ñi tyin iin ñi cuví ñi. 47 Tan jacahnú ñi tsi Nyoo. Tan vaha caahán tandíhi nyívi tuhun ñi. Tan iin tan iin quívi tan nducuahá ca nyívi quíhví cuenda Jutu Mañi yo Jesús tyin jacacú ra tsi ñi.

Nu nduvahā iin ra coxo

3¹ Iin quívi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyívi Israel cuahán cuandacán tahvi tsi Nyoo. 2 Tan iin ra ndaahvi, coxo ra nda quívi cacú ra, nyaá ra

yuhu cora vehe ñuhu cahnu can tandíhi maa quívi. Tyin tsindacá ñi tsi ra na ndacan ra xuhun tsi nyívi quíhví yuhu cora can, tan nañí tsi Yuhu Cora Siñ Caá. 3 Tacan tan nyeḡe ra coxo can tsi ra Pedro tsihin ra Juan tsa cua quíhví ra naha yuhu cora can. Tan tsican ra xuhun tsi ra naha. 4 Tan nyeḡe ra Pedro tan ra Juan tsi ra. Tan ra Pedro catyí ra tsihin ra:

—Nyeḡe tsi ndi —catyí ra.

5 Tacan tan quitsaha nyehé ra coxo can tsi ra naha. Cuñí maa ra tyin iyó tsa cua cuhva ra naha tsi ra. 6 Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sívi ra Jesucristo ra ñuu Nazaret, nduvita tan caça —catyí ra Pedro tsihin ra.

7 Tacan tan tiñ ra Pedro ndaha cuaha ra tan cañihí ra tsi ra. Tan juvin ñi cuhva can nacoḡ tunyee iñi nduvi taahan tsaha ra tan jucun tsaha ra. 8 Tacan tan ra coxo can ndava ra, tan nduvitā ra tsinyaā nyityi ra. Tan quitsaha tsicá ra. Tan quíhví ra tsihin ra naha tsitsi cora vehe ñuhu can, tsicá ra, tan ndavá ra, jacahnú ra tsi Nyoo. 9 Tandíhi nyívi nyeḡe ñi tsi ra tyin tsicá ra tan jacahnú ra tsi Nyoo. 10 Tan iyo xaan cuñí ñi tan yuuhví ñi tsa cuenda tsa nduvahā ra can. Tyin nacotó ñi tsi ra. Tyin juvin ra cuví ra tsa tuhvá tsinyaá Yuhu Cora Siñ Caá can tsicán ra xuhun tsi nyívi.

Nu caahán ra Pedro tuhun ra Cristo tsihin nyívi nu cuví corredor cuenda ra Salomón

11 Ra coxo tsa nduvahā can, ña jañá maa ra tsi ra Pedro tan ra Juan. Tan tandíhi nyívi iyo cuñí ñi, tan tsinú xaan ñi tsañ ñi nu cuví corredor cuenda ra Salomón tyin cua nyeḡe ñi tsi ra coxo can tyin tsa nduvahā ra. 12 Tsa nyeḡe ra Pedro yacan, tan catyí ra tsihin nyívi can:

—Nyooho ra Israel, ¿nacuenda iyo xaan cuñí ndo? Tan ¿nacuenda nyehé xaan ndo tsi nyuhu? ¿A cuñí maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuvī janduvahā ndi tsi ra coxo ihya? **13** Nāvin maa nyuhu janduvahā tsi ra. Nyoo ra cuvī Nyoo tsii tsaahnu yo, ra Abraham, ra Isaac tan ra Jacob, ra ican jacahnū tsi Sehe ra tan tsahā ra tunyee iñi tsi ra, ra tsa tsahā cuenda ndo tsi ra Pilato, ra cumí tyiñu. Tan ra Pilato cuñī ra jaña ra tsi ra. Maa tyin nyooho ña tsahā ndo.

14 Tahān tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsahñī ndiyi. **15** Tan nyooho tsahñī ndo tsi ra tsa tsahá ñayivi nyito coo yo tsihin Nyoo. Maa tyin Nyoo Jutu yo janandotō ra tsi ra. Tan ña ndoō ra nu yucú añima nyivi tsa tsihi. Tan nyuhu cuvī ndi tsandaa tsa cuenda tsa nandotō ra. **16** Tan juvin ra Jesús cuvī ra tsa tsahā tunyee iñi tsi ra coxo ihya tan nduvahā tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvahā tsaha ra ihya, tan nacotó vaha ndo tsi ra. Tan tandihi nyooho nyehé ndo tyin nduvahā ra tsa cuenda tsa tsinú iñi ndi.

17 Tsitó yu, —catyī ra Pedro— tyin quivi tsa tsahñī ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuvī ityi nuu tsihin ndo, ña tsitó ra naha. **18** Maa tyin tacan jacuvī ndo tan cundaā tsa cahān ra cuvī ndusu yuhu Nyoo tahān tsanaha, tyin catyī ra naha tyin ra Cristo cua nyehe ra tundoho. **19** Yacan cuenda ndū uvi iñi ndo cuatyī ndo, tan nācuhva cuenda ndo añima ndo tsi Nyoo, na ndatsi cuatyī ndo. Tacan tan sīh xaan cua cuñi añima ndo jaha tunyee iñi Jutu Mañi yo. **20** Tacan tan cua jaquitsi ra tsi ra Jesús ra cuvī Cristo, na quitsi ra inga tsaha. Tyin nda quivi jihna ñi tyaā Nyoo cuhva tyin quitsi ra tsa cuenda yo.

21 Taahán tsi tsa ndoó ra Jesucristo gloria tsa vityin nda cuanda quivi cua jandutsaa Nyoo tandihi maa tsa iyó. Tumaa cuhva catyī ra cuvī ndusu yuhu Nyoo tahān tsanaha. **22** Tyin tacan catyī ra Moisés tsihin tsii tsaahnu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuvī ra. Tan cua cahan ra tuhun Nyoo tsihin ndo tumaa caahán yuhu. Tyaā yahvi ndo tandihi tsa cua cahan ra tsihin ndo.

23 Tyin tandihi nyivi tsa ña cua tyaā soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyī ra Moisés.

24 Tan tacan tucu tandihi ra cuvī ndusu yuhu Nyoo nda quivi tsicoō ra Samuel tan nda cuanda vityin, jacoto ra naha tsa cuvī vityin. **25** Tandihī tsa catyī Nyoo tyin cuhva ra tsi yo, cahān ra cuvī ndusu yuhu Nyoo tahān tsanaha. Tandihī can tsii maa ndo cuvī can. Tan tyiñu tsa ndoō Nyoo tsihin ra Abraham tsii tsaahnu yo, juvin ñi tsa cuenda maa ndo cuvī yacan. Tyin catyī Nyoo tsihin ra Abraham: “Tandihi nyivi tsa iyó nu ñihu ñayivi cua nasoco yu tsi ñi tsa cuenda nyivi tata un.” **26** Tan yacan cuenda quivi janandotō Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacoo ndo tsa caquiñi iyó ndo —catyī ra Pedro tsihin ñi.

Nu tñin ra cuvī ityi nuu vehe ñuhu cahnu naha ra tsi ra Pedro tan ra Juan

4 ¹ Ndi caahán ca ra Pedro tan ra Juan tsihin nyivi, tan tsaā ra cuvī jutu naha ra tsihin ra cuvī ityi nuu tsihin ra jahá cuenda vehe ñuhu, tan tsihin ra cuvī saduceo naha ra. **2** Nduxaan xaan ra naha tyin ra Pedro tan ra Juan jacuahá ra naha tsi nyivi tan catyī ra naha tyin nditsa tsa cua nandoto nyivi tsa tsa tsihi, tyin ra Jesús nandotō ra. **3** Tacan tan tñin ra

naha tsi nduvi taahan ra tavā tyiñu ra Jesús can naha ra. Tan tyihī ra naha tsi ra naha vehe caa. Tan ndoq ra naha nda cuanda inga quivī tyin tsa cueñi cuvī cuhva can. **4** Maa tyin cuaha ñi tsa tsiñī tuhun caahán ra Pedro quitsahā tsinú iñi ñi. Tan ndu iin ñi tsihin nyivī yihí cuenda ra Jesús. Tan tsa tandihī ñi quitá maa uhun mil cuvī tsa maa ñi maa rayihī naha ra.

5 Tsa tuvi inga quivī, nda ñuu Jerusalén ndu iin tandihī ra cumí tyiñu cuenda nyivī Israel, tan tsihin ra tsahnu, tan tsihin ra cuvī maestro cuenda ley tsa tyaa ra Moisés. **6** Tan nyíi tucu ra Anás ra jutu tsaahnu cuvī ityi nuu. Tan nyíi tucu ra Caifás, tan ra Juan, tan ra Alejandro. Tan yucú ndihī tucu tandihī rayihī tsa cuvī nyivī ra jutu tsaahnu cuvī ityi nuu. **7** Tacan tan tavā tyiñu ra naha na cuquihin ra naha tsi ra Pedro tan ra Juan. Tan tsindacā ra naha tsi ra naha nda mahñu nu yucú ra naha. Tan tsicā tuhun ra naha tsi ra naha, tan catyí ra naha:

—¿Yóo tsahā ndatu tsi ndo tsa janduvaha ndo tsi ra can? ¿Yóo tsahā tunyee iñi tsi ndo tsa javaha ndo tyehen? —catyí ra naha tsihin ra Pedro tan ra Juan.

8 Tan ra Pedro tsitú ra tsihin Tatyí li Nyoo. Tan nacahan ra tsihin ra naha:

—Nyooho ra ndacá ñaha Israel ñuu yo ihya, tan nyooho ra tsahnu. **9** Vityin tsicá tuhun ndo tsi ndi tsa cuenda tsa vaha tsa cuvī tsi ra coxo ihya, tyin cuñí ndo coto ndo nácaa nduvahā ra. **10** Yacan cuenda cua catyí tuhun ndi tsihin ndo na coto tandihī nyivī Israel. Tyin ra ihya nyaá ra nuu tandihī ndo, tyin nduvahā ra tsihin tunyee iñi tsi ra Jesucristo, ra ñuu Nazaret, ra tsa tsahā cuenda ndo na cúu ra nu cruu. Maa tyin Nyoo janandotoq ra tsi ra. **11** Tan juvin ra Jesús cuvī yuu tsa tsiñí ñuhu ca tsa ña cuñí ra javahá vehe cuatyíñu ra,

tumaa cuhva catyí nuu tutu Nyoo. Tan nyooho cuvī ra javahá vehe tan ña cuñí ndo yuu tsa tsiñí ñuhu ca can. **12** Yoñi inga ra cuvī jacacú tsi yo. Tyin intuhun ñi maa ra tsahā Nyoo tyin jacacu ra tsi yo —catyí ra Pedro tsihin ra can naha ra.

13 Tan ra cumí tyiñu can naha ra iyo xaan cuñí ra naha tsiñí ra naha tsa caahán ra Pedro tan ra Juan tyin ñi xaan iñi ra naha caahán ra naha, tan ñavin ra cahvī scuela cuvī ra naha. Tacan tan nacotoq ra naha tsi ra naha tyin ra ican naha ra cuvī ra tsa tsicā tsihin ra Jesús quivī can. **14** Tan ra tsa nduvahā can, nyaá nyityi ra tsihin ra naha. Yacan cuenda ña cuvī cahan ra cumi tyiñu can naha ra tsa ndavaha ñi siquí ra Pedro tan ra Juan. **15** Tacan tan catyí ra cumi tyiñu naha ra tsihin ra naha:

—Quita nduñi taahan nyooho tsata vehe.

Tan quitā ra naha. Tan ndoq ra cumi tyiñu can naha ra natuhún tahan ra naha. **16** Tan catyí ra naha:

—¿Náa javaha yo tsihin ra ihya naha ra? Tyin tandihī maa nyivī Jerusalén tsitó ñi tsa iyo tsa javahā ra naha. Tan ña cua cuvī catyí yo tyin ña nditsa. **17** Maa tyin ña cuñí yo tsa cuaha ca nyivī coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivī —catyí ra cumi tyiñu naha ra.

18 Tacan tan canā ra cumí tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivī. **19** Maa tyin ra Pedro tan ra Juan nacahan ra naha tan catyí ra naha:

—Tyihī tuñi ndo iñi ndo tan nyehe ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo. **20** Tyin nyuhu ña cuvī

tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyí ra naha.

21 Tacan tan tyasi nyico ra cumi tyiñu naha ra tsi ra Pedro tan ra Juan. Tan jaña ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyivi tan jacahnú ñi tsi Nyoo tsa cuenda tsa cuví can. 22 Tyin rayi ra nduvaha can, tsa yaha uvi xico cuiya ra, tan tacan cuiya tahan ra tundoho tan nduvaha ra jahá Nyoo.

Nu tsican nyivi yihí cuenda ra Cristo tunyee iñi Nyoo

23 Tan tsa quitá ra Pedro tan ra Juan, cuahán ra naha nu yucú nyivi yihí cuenda ra Jesús. Tan nacatyí tuhun ra naha tandihí tsa cahán ra tsahnu naha ra tan ra jutu tsa cuví ityi nuu naha ra tsihin ra naha.

24 Cuhva tsa tsiñi tandihí ñi, tan iin caa ñi quitsaha tsicán tahvi ñi tsi Nyoo. Tan catyí ñi:

—Jutu Mañi yu, yooho javaha un andivi tan ñuhu ñayivi. Javaha un ndutya ñuhu. Tan tandihí ca tsa iyó, maa un javaha. 25 Tan yooho tsihin Tatyí Ii un jacahan un tsi ra David tahan tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

26 Rey naha ra tan tsihin ra tsa ndacá ñaha nu ñuhu ñayivi ihya nduvita ra naha siqui un, Jutu Mañi yu, tan siqui ra Cristo, ra nyisó tyiñu maa un, catyí ra David.

27 Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahni ra naha tsi ra Jesús Sehe ii un, tsa nacatsi vaha maa un. 28 Tan tacan javaha ra naha, tumaa cuhva tsa catyí maa un tahan

tsanaha tyin cua cuví. 29 Tan vityin, Jutu Mañi yu, nyehe tyin cuñi ra naha casi ra naha tsi ndi. Tan cuhva tsa ñi coo iñi ndi tyin tyiñu maa un javahá ndi, Jutu Mañi yu. Tan na ña nayuhvi ndi cahan ndi tuhun maa un. 30 Tan tsihin tunyee iñi maa un tan cua nduvaha nyivi cuuhvi, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

31 Tan cuhva tsa ndihí tsican tahvi ñi tsi Nyoo tan tañ nu yucú ñi. Tan tandihí ñi tsitu ñi tsihin Tatyí Ii Nyoo tan cahán ñi tuhun Nyoo tsihin tsa ña yuuhvi ñi.

Nduve tsa cumañi tsi nyivi yihí cuenda ra Cristo

32 Tandihí ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihí ñi cuví can. 33 Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha. 34 Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can 35 tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiñi ñuhu tsi ñi. 36 Tacan javaha iin ra tsa nañi José. Ra ican cuví ra tata ra Leví. Tan cacu ra ñuhu Chipre tsa canyí mahnu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñi tsi catyí: ra jandu iin iñi nyivi. 37 Tan ra Bernabé can xico ra ñuhu ra. Tan tsaha ra xuhun can tsi ra tava tyiñu ra Jesús.

Cuatyí ra Ananías tsihin ña Safira

5¹ Maa tyin iin ra tsa nañi Ananías tsihin ña Safira, ñasihi ra, xico ñi iin ñuhu. 2 Tan tyihí xeehe ñi juhva

xuhun. Tacan tan ra Ananías tsindacá ra xuhun tsa ndoo ña tsi ra tavá tyiñu ra Jesús. Tan catyí ra tyin tandíhi xuhun tsa cuyahví ñuhu cuví can.

3 Tacan tan catyí ra Pedro tsihin ra:

—Yooho Ananías, ¿nacuenda tsa tsaḡa un tsa quihví nu ña vaha añima un? Tyin cuñí un jandavi ñaha un tsi Tatyí Ii Nyoo, tan catyí un tyin tandíhi xuhun tsa cuyahví ñuhu can cuví tsehe, tan ña nditsa un tyin ndoo juhva xuhun can tsi un. **4** Tsi un cuví ñuhu can, tan tsi un cuví xuhun tsa ñihí un cuenda ñuhu can. ¿Nacuenda tsa cuñí un jandavi ñaha un tsi Nyoo tan catyí un tyin tandíhi xuhun can tsaḡa un? Maa tyin ñavin tsi nyuhu jandaví ñaha un, tyin tsi maa Nyoo jandaví ñaha un —catyí ra Pedro tsihin ra Ananías.

5 Tsa tsiñí ra Ananías tuhun tsa cahān ra Pedro, nduvá ra tan tsihi ra. Tan tsa tsitō nyivi tuhun ihya tan nayuhví xaan ñi. **6** Tacan tan tsaḡ ra cuatyí naha ra tan cavá nuu ra naha jahma cuñu ñuhu ra Ananías. Tan tsaḡān ra naha tsindacá ra naha tsi ra nu ndaa cumi santu. **7** Yahḡ uñi hora tan tsaḡ ñasihi ra Ananías tan quihví ña nu yucú ra tavá tyiñu ra Jesús, tyin ña tsitó ña tsa cuví. **8** Tan quitsahá tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahví ñuhu ndo? —catyí ra Pedro tsihin ña.

Tacan tan nacahān ña tan catyí ña tsihin ra:

—Tacan ñi cuví xuhun tsa cuyahví tsi —catyí ña tsihin ra.

9 Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñí ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsaḡān tsindacá tsi yí un nu ndaa cumi santu. Tan vityin cua cundaca ndíhi ra naha tsi un —catyí ra Pedro tsihin ña Safira.

10 Tan juvin ñi cuhva can tan nduvá ña tsaha ra Pedro, tan cueta tsihi ña. Tan quihví ra cuatyí can naha ra, tan nyeḡe ra naha tyin canyí ña tsihi ña. Tan cañihí ra naha tsi ña, tan tsindacá ra naha tsi ña nu ndaa cumi sandu. Tan tinyí ra naha tsi ña xiin yí ña. **11** Tan tandíhi nyivi yihí cuenda ra Cristo, tan tandíhi nyivi tsa tsitō tuhun can, nayuhví xaan ñi.

Cuaha xaan tsa iyo tan seña javahá ra tavá tyiñu ra Jesús

12 Cuaha seña tan tsa iyo javahá ra tavá tyiñu ra Jesús nu yucú nyivi. Tan tandíhi ñi yihí cuenda ra Cristo ndu iín ñi nu cuví corredor cuenda ra Salomón. **13** Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siqui ñi yihí cuenda ra Cristo. **14** Tan cuaha xaan nyivi quitsahá tsinú iñi tsi Jutu Mañi yo Jesús, tahan ñi rayí tan ñaha. **15** Tan nda cuanda tavá ñi tsi nyivi cuuhví ityí cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra siqui ñi cua nduvaha ñi. **16** Tacan tucu nyivi iyó yatyin ñi ñuu Jerusalén can, cuandacá ñi tsi nyivi cuuhví tan nyivi tsa yihí tatyí ña vaha. Tan nduvahá tandíhi ñi.

Nu nyehé ra Pedro tan ra Juan tundoho

17 Tacan tan ra jutu tsaahnu tsa cuví ityí nuu, tan ra yihí cuenda ra cuví saduceo naha ra, ndasi cuñí ra naha nyehé ra naha tsi ra tavá tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsaḡa Nyoo tsi ra naha. **18** Tacan tan tiñ ra naha tsi ra naha. Tan tyihí ra naha tsi ra naha vehe caa. **19** Maa tyin tsa cuaa can quitsí iin ángel tsa jaquitsí Jutu Mañi yo, tan nuñá ra yuvehe caa can. Tan tavá ra tsi ra naha. Tan catyí ra tsihin ra naha:

20 —Cuaahan ndo tan cunyacu nyityi ndo vehe ñuhu cahnu. Tan nacatyí tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

21 Tsa tsiñi ra naha tsa cahān ra ángel can, tan cuahán ra naha. Tan tsa tuvi inga quivi can nañihí nyivi tsi ra naha vehe ñuhu cahnu. Tan quitsaha jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuví ityi nuu tan ra tsa yucú tsihin ra. Tan canā ra naha tsi ra cumi tyiñu cuenda nyivi Israel tyin coo ra naha junta. Tacan tan tavā tyiñu ra naha na cuquihin ra naha tsi ra tavā tyiñu ra Jesús nu yucú ra naha vehe caa can. 22 Maa tyin cuhva tsa tsaā ra vitya naha ra tsitsi vehe caa can, ña nañihí ra naha tsi ra naha. Tan cuanuhū ra naha cua nacatyí tuhun ra naha tsihin ra jutu tsaahnu tsa cuví ityi nuu. 23 Tan catyí ra naha tsihin ra:

—Ndasí yuvehe caa can tan tsaā ndi. Tan andarū, yucú ra naha yuvehe jahá cuenda ra naha. Maa tyin cuhva tsa nuñā ndi yuvehe can, yoñi maa nañihí ndi —catyí ra naha tsihin ra jutu tsaahnu tsa cuví ityi nuu.

24 Tacan tan ra jutu tsaahnu tsa cuví ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa cahān ra vitya naha ra tsihin ra naha tan iyo xaan cuñi ra naha. Tan natuhun tahan ra naha nácaa javaha ra naha tan cundihí tuhun can.

25 Tacan tan tsaā iin ra tan catyí ra:

—Ra tsa tyihí ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

26 Tacan tan ra yihí ndaha tsi ra jahá cuenda vehe ñuhu can, tsahān ra tsihin ra vitya naha ra, tan tsiquihin ra naha tsi ra tavā tyiñu ra Jesús

tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha.

27 Tsindaca ra naha tsi ra tavā tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tavā tyiñu ra Jesús:

28 —Nyuhu tsa cahān vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaa soho ndo tsa cahān ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñi ndo tyaa ndo cuatyí can siqui ndi tyin tsihi ra —catyí ra jutu tsaahnu tsa cuví ityi nuu tsihin ra naha.

29 Tacan tan nacahān ra Pedro tan inga ra tavā tyiñu ra Jesús, tan catyí ra naha:

—Taahán tsi tyaa yahvi jihna ndi tsi Nyoo tan ñavin ca tsi nyooho.

30 Nyoo cuenda tsii tsaahnu yo juvin ra janandotó tsi ra Jesús, ra tsa ticaā ndo nu cruu tan tsahñi ndo. 31 Tan ra Jesús cuví ra tsa jacahnū xaan Nyoo, tan tyaa ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo. 32 Tan nyuhu cuví ndi tsandaa tsa cuenda tandihí yacan. Tan tacan cuví tucu Tatyí li Nyoo tsa tsahā Nyoo cunyaa añima nyivi tyaa yahvi tsi ra —catyí ra Pedro tsihin ra naha.

33 Tan tsa tsiñi ra naha tsa cahān ra Pedro, nduxaan xaan ra naha. Tan cuñi ra naha cahñi ra naha tsi ra naha. 34 Maa tyin tsihin ra cumi tyiñu can naha ra nyii iin ra cuví fariseo tsa nañi Gamaliel. Tan cuví ra maestro cuenda ley Nyoo tsa tyaa ra Moisés. Tan nyivi tyaa yahvi xaan ñi tsi ra. Tan ra Gamaliel can, nduvitā nyityi ra. Tan caahán ra na quita ra tavā tyiñu ra Jesús tañi ñi. Tacan tan

quita ra naha. **35** Tan quitsaha caahán ra Gamaliel can tsihin tandíhi ca ra cumí tyiñu naha ra, tan catyí ra:

—Yoo, ra tsa ndacá ñaha tsi nyívi Israel, jaha yo cuenda tsi yo tsihin tsa cua javaha yo tsi ra ican naha ra.

36 Nducuhun iñi ndo tyin tsa iyó juhva quívi nduvita iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayi tsinyicun tsi ra. Maa tyin yaha can tsahñi nyívi tsi ra. Tan tandíhi ra tsa tsinyicun tsi ra cuanuhu ra naha ñuu ra naha. Tan tsindíhi tuhun can. **37** Yaha can tan nu cuahán ca tsi ityi nuu, quívi nacahvi ra gobiernu tsi nyívi, tan nduvita ra Judas ra ityi Galilea. Tan cuaha xaan nyívi tsinyicun tucu tsi ra can. Maa tyin juven ñi tsahñi nyívi tsi ra. Tan tandíhi ñi tsa tsinyicun tsi ra cuanuhu ñi ñuu ñi. **38** Yacan cuenda jaña yo tsi ra ihya naha ra. Tan ña cua tyihi yo tsi yo tsihin ra naha tyin tatun tuhun iin rayi ñi cuví tsa jacuahá ra naha, cua cundíhi tuhun can. **39** Maa tyin tatun nditsa tyin tuhun Nyoo cuví tsa jacuahá ra naha, ña cua cuví casi yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

40 Tandíhi ra naha ndoo ra naha vaha tsa ña cua cahñi ra naha tsi ra naha. Tacan tan cana ra naha tsi ra tava tyiñu ra Jesús. Tan catyí ra cumí tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha. **41** Tan quita ra naha nuu ra cumí tyiñu. Tan si xaan cuñi ra naha tyin tsaha Nyoo ndatu tyin nyehé ra naha tundoho tsa cuenda ra Jesús. **42** Tan ña jandíhi ra naha tsa caahán ra naha. Tan tandíhi quívi jacuahá ra naha tuhun ra Jesucristo vehe ñuhu tan vehe nyívi.

Nu nacatsí nyívi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi

6 ¹ Tan nu cuahán ca tsi quívi cuaha xaan nyívi yihí cuenda ra Cristo cuví. Tacan tan nyívi tsa caahán yuhu griego quitsaha caahán ñi siqui nyívi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandíhi quívi ña jahá vaha ra naha cuenda tsi ñi ndaahvi grecia tsa tsihi yi. ² Tacan tan tandíhi tsa utsi uvi taahan ra tava tyiñu ra Jesús jandu iin ra naha tsi tandíhi nyívi yihí cuenda ra Cristo. Tan catyí ra naha tsihin nyívi can:

—Ña vaha tsa jandíhi ndi tsa caahán ndi tuhun Nyoo tan tsa tsatsá ndi tsa catsi ndo. ³ Yacan cuenda, nyooho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí Ii Nyoo. Tan cuhva yo tyiñu ihya tsi ra naha. ⁴ Tan nyuhu cua jañihi ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

⁵ Tandíhi ñi tan ndoo ñi vaha. Tan nacatsí ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí Ii Nyoo. Tan nacatsí tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel. ⁶ Tacan tan tsindaca ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

⁷ Tan tsityá ca tuhun Nyoo. Tan nducuaha ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyívi Israel natsinú ndíhi iñi ra naha tuhun ra Cristo.

Nu tyihí ra naha tsi ra Esteban
vehe caa

8 Ra Esteban cuví ra iin ra tsa tsitú tsihin tunyee iní Nyoo. Tan vaha xaan nyívi cuví ra tyin tsitú añima ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyívi. 9 Tacan tan juhva ra tsa tsicá vehe ñuhu ñuu Israel tsa nañí Vehe Ñuhu Cuenda Nyívi Ndoó Nuña cutahan ra naha tsihin juhva ra ñuu Cirene naha ra, tan cutahan ndíhi juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tan quitsaha caahán yuhu tahan ra naha tsihin ra Esteban.

10 Maa tyin ña cuví jahá canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsahá Tatyí lí Nyoo tsi ra. 11 Tacan tan tyahví ra can naha ra tsi juhva ra na cahan ra naha cuendu siquí ra Esteban tan catyí ra naha tyin ra Esteban caahán ra ndavaha ñi siquí ra Moisés, tan siquí Nyoo. 12 Yacan cuenda tandíhi nyívi can quitsaha cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahan ra naha tsindaçá ra naha tsi ra nu ndu iín ra cumí tyiñu cuenda vehe ñuhu nyívi Israel.

13 Tan nducú ra naha tsi ra cahan cuendu siquí ra Esteban. Tan maa ra naha catyí ra naha tyehen:

—Ra Esteban ihya, ña jandíhí ra tsa caahán ra ndavaha ñi siquí vehe ñuhu yo tan siquí ley Nyoo tsa tyaa ra Moisés. 14 Tan tsiñí ndi tsa caahán ra tyin ra Jesús, ra Nazaret can, cua caní ra vehe ñuhu cahnu ihya. Tan cua nasama ra cuhva iyó yo tsa jacuahá ra Moisés tsi yo —catyí ra tsa caahán cuendu siquí ra Esteban.

15 Tacan tan ra cumí tyiñu naha ra tan ra nyecú ican nyehe ra naha tsi ra Esteban tyin tumaa caá nuu iin ángel, tacan caá nuu ra.

Nu caahán ra Esteban tuhun Nyoo
tsihin nyívi nducú cahñi tsi ra

7¹ Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siquí un?

2 Tacan tan nacahan ra Esteban tan catyí ra:

—Nyooho yañi, tan nyooho ra tsahnu, tyaa soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsi tsaahnu yo, ra Abraham, quívi nyíi ra ityi Mesopotamia tsa ndi cumañi ca cahun ra coo ra nda ñuu Harán.

3 Tan catyí ra tsihin ra: “Nacoo ñuu un, tan tsi tandíhi nyívi un. Tan cūhun cun inga ñuu tsa cua janaha yu tsi un” catyí Nyoo tsihin ra Abraham. 4 Tacan tan ra Abraham quita ra nu iyó nyívi Caldea ityi Mesopotamia, tan cuahán ra nda ñuu Harán. Tan ndacan cuví ra tsihi jutu ra. Yaha can jaquitsí Nyoo tsi ra ñuhu nu iyó yo ihya vityin. 5 Maa tyin nduve ñuhu tsahá Nyoo tsi ra quívi can. Ndi luxu maa nu cuañi ra tan ña tsahá Nyoo. Maa tyin catyí ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quívi can. 6 Tan inga tucu tuhun cahan Nyoo tsihin ra tyin nyívi tata ra cua coo ñi inga ñuu. Tan cua cuví ñi musu nyívi ñuu can. Tan maa nyívi ñuu can cua quíhi ndaha ñi tsi ñi. Tan cua nyehe ñi tundoho cumi cientu cuiya. 7 Maa tyin cahan tucu Nyoo tsihin ra tyehen: “Nyívi tata un cua nyehe ñi tundoho jaha nyívi ñuu can. Yacan cuenda yuhu cua tatsi tuñi yu tsi nyívi ñuu can. Tan tsa cua yaha yacan tan cua quita nyívi cuví tata un ñuu can tan cua quitsi ñi ihya. Tan cua jacahnu ñi tsi yu” catyí Nyoo tsihin ra Abraham.

8 'Tacan natuhun Nyoo tsihin ra. Tan ndoq ra tuhun tsihin ra. Tan Nyoo tsaha ra iin cuhva tsa cua javaha ñi coto naa iñi ñi tsa cahān ra. Tsaha cuenda ra tyin tandihi ñi sehe yii ñi tsa cua coo tan cuñi tsi cunyaa tuñi ra itsi naha tsi. Tan tsa yaha una quivi tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndihi tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaa ra tuñi can tsi intuhun intuhun sehe yii ra. Tan ra ican naha ra cuvi tsi tsaahnu yo.

9 'Tan tsa utsi iin taahan ca sehe ra Jacob ndasi cuñi ra naha nyehe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoq Nyoo tsi ra. 10 Tan jacacu ra tsi ra nu nyehé ra tundoho. Tan tsaha ra tsa nyityi jiñi ra tsi ra José. Tan tsaha ra tsa vaha coo ra nuu ra Faraón, ra cuvi rey Egipto. Tan rey can tsaha ra tsa cuvi ra José ra cumi tyiñu ñuu tsa cayucu Egipto can. Tan tsindaca ñaha ndihi tucu ra vehe maa rey.

11 'Tacan tan tsicoq tama nanih canhu ityi Egipto tan ityi Canaán. Tan nyehe xaan nyivi tundoho. Tan tandihi tsi tsaahnu yo ña ñihī ra naha tsa catsi ra naha. 12 Maa tyin quivi tsito ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahan ra naha iin tsaha. 13 Tan tsa tsinu uvi tsaha tsa tsahan ra naha, ra José jacoto ra tsi ra naha tyin yañi ra naha cuvi tsi ra. Tacan tan tsito ra Faraón yoo tata cuvi ra José. 14 Tacan tan tava tyiñu ra José na quitsi ra Jacob jutu ra, tsihin tandihi nyivi ra. Tan cuvi ñi uñi xico tsahun taahan nyivi. 15 Tan tacan cuvi tsa cuahān ra Jacob cua coo ra ñuhu Egipto can. Yaha can tan tsihī

ra ndacan. Tan tsihi ndihi tucu tandihi sehe ra, ra cuvi tsi tsaahnu yo naha ra. 16 Tacan tan tsaa quivi tsa tsindaca ñi yiqui ra Jacob tan yiqui sehe ra nda Siquem. Tan ican quihvi yiqui tandihi ra naha tsitsi ñuhu nu jata ra Abraham iin ñaña tsi sehe ra Hamor taha tsanaha.

17 'Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can cuaha xaan ñi cuvi. Tan tsa nyanaa yatyin quivi tsa cua cuhva Nyoo ñuhu tsi ñi tumaa tsa cahān catsi ra tsihin ra Abraham.

18 Tacan tan quitsaha ndaca ñaha iin rey tsa ña nacoto tsi ra José. 19 Rey can jandavi ñaha ra nyivi yo. Tan janyehe xaan ra tundoho tsi ñi, tan jañiñi ra tsi ñi na nacoq ñi tsi sehe ñi tsa ndi cacu tyin na cúu tsi. 20 Tan juvin ñi quivi can cacu ra Moisés. Tan taha xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña. 21 Yaha can ña cuvi ca tyihi xeehe sihi ra tsi ra. Tan nacoq ña tsi ra tsitsi iin tyica yuhu yutya. Tacan tan sehe sihi ra rey Egipto can nañihī ña tsi ra. Tan naquihun ña tsi ra. Tan jacuahnu ña tsi ra, tumaa tsa sehe maa ña cuvi tsi ra. 22 Yacan cutuhva ra Moisés tandihi tsa tsito ñi Egipto. Tan vaha xaan cahān ra tan vaha javaha ra jaha tunyee iñi tsa tsaha Nyoo tsi ra.

23 'Tan tsa quita uvi xico cuiya ra Moisés cuñi ra cahun ra cunyehe ra nu iyó nyivi Israel, nyivi ra. 24 Tacan tan iin quivi nyehe ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra. 25 Cuñi maa ra Moisés can tyin nyivi Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin ña tuvī iñi ñi tsa tacan cua cuvi. 26 Tacan tan tsa inga quivi can nyehe ra Moisés tsi uvi taahan ra Israel, cañi taha ra naha. Tan ra Moisés, cuñi ra tsa ña cañi taha ca

ra naha, tan quitsahā catyí ra: “Ña vaha tsa cañi un tsi ra yañi un” catyí ra tsihin ra naha. **27** Tacan tan ra tsa cañi tsi inga ra can tindahñi ra tsi ra Moisés, tan catyí ra tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi? **28** ¿A cuñi un cahñi un tsi yu tumaa tsa tsahñi un tsi ra Egipto icu?” catyí ra tsihin ra Moisés. **29** Cuhva tsa tsiñi ra Moisés tsa cahān ra can, tsinū ra. Tan cuahān ra nda ñuu Madián. Ndacan ñihī ra ñasiñi ra. Tan ndacan tsicoo uvi taahan sehe ra.

30 Yahā uvi xico cuiya. Tacan tan iin quivi tsicá nuu ra Moisés nu tsiqui yatyin yucu tsa nañi Sinaí. Tan nyehe ra cayú iin yutun iñu. Tacan tan quituvī iin ángel tsitsi ñuhu tsa cayú can. **31** Iyo xaan cuñi ra Moisés tsa nyehé ra yacan. Tan natuhvā ra nu cayú iñu can tyin nyehe vaha ra, tan tsiñi ra ndusu Jutu Mañi yo. Tan catyí ndusu can tyehen: **32** “Yuhu cuvī Nyoo cuenda tsii tsaahnu un, Nyoo cuenda ra Abraham, tan ra Isaac, tan ra Jacob” catyí ndusu can tsihin ra. Tacan tan ra Moisés quitsahā ñihī ra tsihin tsa yuuhvī ra. Tan ña canā iñi ra nanyehe ra. **33** Tan quitsahā catyí tucu Jutu Mañi yo tsihin ra: “Tava nditsan tsaha un tyin ñuhu nu tsañi un, ñuhu ii cuvī tsi. **34** Yuhu nyehé yu tandihī tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacú tsa ñi. Yacan vatsí nuú yu tyin jacacu yu tsi ñi. Naha, tyin jacahun yu tsi un nda Egipto” catyí Nyoo tsihin ra Moisés.

35 Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyí ñi tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi?” catyí ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyí ángel tsa quituvī nuu ra

nu iñu tsa cayú can. **36** Tan ra Moisés can tava tsi nyivi Israel ñuhu Egipto can tsihin tsa javahā ra tsa iyo tan seña ñuu can, tan nu yahā ñi nda nu Ndutya Ñuhu Cuaaha, tan nu tsicā nuu ñi nu tsiqui tsitsi tsa uvi xico cuiya.

37 Tan juvin ñi maa ra Moisés can cuvī ra tsa cahān tsihin nyivi Israel tan catyí ra tyehen: “Nyoo cua jaquitsi ra tsi iin ra cuvī ndusu yuhu ra tumaa jaquitsi ra tsi maa yu. Tan cua cuvi ra iin ra Israel tumaa maa yo. Tan taahān tsi tyaa yahvi yo tsi ra” catyí ra Moisés. **38** Tan maa ra Moisés can cuahān ra tsihin nyivi tsii tsaahnu yo nu tsicā nuu ñi nu tsiqui can. Tan ra ican cuvī ra tsa cahān ángel tsihin nda yucu Sinaí. Tan ra ican naquihīn cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

39 Maa tyin nyivi tsii tsaahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto. **40** Yacan cuenda kuhva tsa nyii ra Moisés yucu Sinaí, tan cahān nyivi tsihin ra Aarón tan catyí ñi: “Javaha taahan nyoo kuhun ityi nuu ndi. Tyin ña tsitó yo náa tahañ ra Moisés, ra tsa tava tsi yo Egipto” catyí ñi. **41** Tacan tan javahā ñi iin indiqui xuhun cuaan. Tan tsahñi ñi quitī tyin kuhva cuenda ñi tsi tsitoho can. Tan sii xaan cuñi ñi tsicoo ñi vico cuenda tsitoho tsa javahā ñi tsihin ndaha ñi. **42** Tacan tan Nyoo jatsiyo ra tsi ñi. Tan jañā ndaha ra tsi ñi tyin cua jacahnu ñi ñicanyii, tan yoo, tan tandihī tiñuu tsa iyó ityi andivi. Tyin tyehen tyaa ra cuvī ndusu yuhu Nyoo nu libru tahañ tsanaha:

Nyooho nyivi Israel, ¿A tsahñi ndo quitī tyin kuhva cuenda ndo tsi maa yu tsitsi tsa uvi xico cuiya tsa tsicā nuu ndo nu tsiqui? Ñavin.

43 Tyin jacahnu ndo tsi nyoo tsa nañi Moloc,

tan jacahn̄u ndihi tucu ndo tsi nyoo tsa nañí Renfán tsa caá tumaa caá iin tiñuu tsa iyó andivi.

Juvin ñi maa ndo javah̄a tsitoho can, tan jacahn̄u tucu ndo.

Yacan cuenda yuhu cua tava yu tsi ndo ñuu ndo, tan cua jacahun yu tsi ndo iin nu cañi ca ityi nuu ñuu Babilonia, catyi Nyoo tsihin ñi.

44 Nu tsica nuu tsii tsaahnu yo nu tsiqui can, tsicum̄i ra naha iin vehe ñuhu tsa tsinū tsihin ñiñi quit̄i. Tan tsitsi vehe can tsicum̄i ra naha tabla yuu tsa nyaá ley Nyoo nuu. Tan ra Moisés tavā tyiñu ra na javaha ñi vehe ñuhu can ityi tsata, tumaa cuhva janah̄a maa Nyoo tsi ra. 45 Yaha can tan ra Josué cuv̄i ra ityi nuu tsihin ñi. Tacan tan quih̄in ñi vehe ñuhu can tan vatsí ñi tsihin tsi nu iyó yo ihya vityin. Tyin Nyoo tavā ra tsi nyivi tsiocō ñuhu ihya tan nacuhvā cuenda ra ñuhu ihya tsi ñi Israel, nyivi yo. Tan tsatyin̄u ñi vehe ñuhu can nda cuanda quivi tsiocō ra rey David. 46 Tan ra rey David ñih̄i ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahn̄u ra Jacob tahan̄ tsanaha. 47 Maa tyin ra Salomón javah̄a ra vehe Nyoo. 48 Vasu ña iyó Nyoo tsitsi vehe ñuhu tsa javah̄a nyivi. Tumaa cah̄an ra cuv̄i ndusu yuhu Nyoo tahan̄ tsanaha tyehen:

49 Andivi cuv̄i tyayu nu nyaá yu ndacá ñaha yu.

Tan ñuhu ñayivi, yacan cuv̄i nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

50 ¿A ña tsitó ndo tyin maa yu javah̄a andivi tan ñuhu ñayivi? catyi ra cuv̄i ndusu

yuhu Nyoo jah̄a Nyoo.

51 'Maa tyin nyooho —catyi ra Esteban— tacan ñi tuhvá maa ndo jandavá ndo iñi ndo. Tan ña cuñi ndo naquihin ndo tuhun caahán Nyoo. Tacan ñi ña tyaá yahvi ndo tsi Tatyí Ii Nyoo. Inducu ñi caá ndo tsihin tsii tsaahnu yo. 52 Tsii tsaahnu yo cuxaan ra naha tan tsahñi ra naha tsi tandihi ra cuv̄i ndusu yuhu Nyoo tahan̄ tsanaha. Tan ra ican naha ra catyi tyin cua quitsi iin ra vaha. Tan tsa quitsi ra vityin, nyooho xicō ñaha ndo tsi ra tsi ra xaan iñi tsi ra, tan tsahñi ndo tsi ra. 53 Nyooho naquih̄in cuenda ndo ley Nyoo tsa tsah̄a ángel tsi ndo, maa tyin ña cuñi ndo tyaa yahvi ndo tsa caahán ley can —catyi ra Esteban.

Nu tsihi ra Esteban

54 Tsa tsin̄i ra cumi tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban. 55 Maa tyin ra Esteban tsitú ra tsihin Tatyí Ii Nyoo tan nanyeh̄e ra ityi andivi. Tan nyeh̄e ra tsa cahnu cuv̄i Nyoo. Tan nyeh̄e tucu ra tsi ra Jesús nyaá nyityi ra xiin cuaha Nyoo. 56 Tacan tan catyi ra Esteban:

—¡Jihna ndo! Nyehé yu andivi tan ticohó tsi. Tan nyehé yu tsi ra Jesús, Rayi tsa quee nda gloria, nyaá nyityi ra xiin cuaha Nyoo —catyi ra Esteban.

57 Maa tyin ra can naha ra tyas̄i ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñi can̄a tsa ra naha. Tan tandihi ra naha cuahán ra naha siqui ra Esteban. 58 Tacan tan tavā ra naha tsi ra yuhu ñuu. Tan tsahñi ra naha tsi ra tsihin yuu. Tan ra tsa javah̄a tsa ña vaha can naha ra, nacō ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo. 59 Tan tsitsi tsa cañi ra naha yuu tsi ra Esteban, quitsah̄a tsicán tahvi ra Esteban tsi Nyoo, tyin

tuví ñi ra tyin tsa cua cúu ra. Tan catyí ra tyehen:

—Jutu Mañi yu Jesús, ñaquihin ñi ra.

60 Yahá can, tan tsicuiñi tsiti ra, tan tsa caná tsa ra tan catyí ra:

—Jutu Mañi yu, ña tñin cuenda un cuatyí tsa javahá ra naha —catyí ra.

Tsa yahá cahan ra tacan, tan tsihi ra.

Nu tsinyaa ndaha ra Saulo tsi nyivi yihí cuenda ra Cristo

8 ¹ Tan ra Saulo ña tsinú ñi ra tsi ra Jesús, tan ndoo ra vaha tsa tsahñi ra naha tsi ra Esteban.

Tan juvin ñi quivi can quitsaha nducú xaan nyivi tsi ñi yihí cuenda ra Cristo ñuu Jerusalén tyin cahñi ñi tsi ñi. Tan tandihi ñi yihí cuenda ra Cristo tsinu ñi, cuahán ñi cua coo ñi tandihi ñuu tsa cayucú Samaria, tan tandihi ñuu tsa cayucú Judea. Maa tyin ra tava tyiñu ra Jesús ña quita ra naha. Ndoó ra naha Jerusalén. ² Tan juhva ra tsa nyicún vaha tsi Nyoo ñuu Jerusalén can, tsahan ra naha tsicutsi ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsihi ra.

³ Tan ra Saulo can quitsaha nyaá ndaha ra tsi nyivi yihí cuenda ra Cristo. Tan tsahan ra tan iin tan iin vehe ñi. Tan ixta caa ra tsi ñi, tan tsaha cuenda ra tsi ñi tyin cuhun ñi vehe caa, tahan ñi rayi tan ñaha.

Nu caahán ra Felipe tuhun ra Cristo nu cuví Samaria

⁴ Tan tandihi ñi tsa quita ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihi ñi ityi nu cuahán ñi. ⁵ Iin ra tsa nañi Felipe tsa ra iin ñuu canyií Samaria. Tan quitsaha caahán ra tuhun ra Cristo tsihin nyivi iyó ican. ⁶ Tan tandihi ñi ñi cuñi ñi tan tyaá soho ñi tsa caahán ra. Tyin nyehé ñi tsa iyo tsa javahá ra. ⁷ Tyin cuaha xaan nyivi tsa yihí tatyí ña vaha tan nduvahá ñi;

tatyí ña vaha tsa yihí tsi ñi, quita nahnu tan caná tsa nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi. ⁸ Yacan cuenda nyivi ñuu can, si xaan cuñi ñi.

⁹ Tan Samaria can iyó iin ra tasi nañi Simón. Tuhvá ra jandaví ñaha tsi nyivi. Catyí ra tyin cahnu xaan cuví ra. ¹⁰ Tandihí maa nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee ñi Nyoo iyó tsihin ra ihya —catyí ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi. ¹² Tacan tan quitsi ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsaha tsinú ñi tsi ra Cristo, rayi tan ñaha. Tan tsicoondutyá ñi. ¹³ Nda cuenda ra Simón can, tan natsinu ñi ra tsi ra Cristo, tan tsicoondutyá ra. Tan quitsaha tsicá nuu ra tsihin ra Felipe. Tan iyo xaan cuñi ra nyehé ra tsa iyo tan seña tsa javahá ra Felipe.

¹⁴ Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú ñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria. ¹⁵ Tan tsa tsa ra naha, quitsaha tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo. ¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyá ñi ñi tsihin sivi Jutu Mañi yo Jesús. ¹⁷ Tacan tan ra Pedro tan ra Juan tyiso ndaha ra naha jiñi ñi, tan naquihin ñi Tatyí Ii Nyoo. ¹⁸ Tan ra Simón can nyehé ra nu tyiso ndaha ra tava tyiñu ra Jesús jiñi ñi, tan naquihín ñi Tatyí Ii Nyoo. ¹⁹ Tan quitsaha caahán ra Simón tan catyí ra:

—¿Najava xuhun cuñi ndo tan

cuhva ndo tunyee iñi tsi yu, cuvi tyiso ndaha yu jiñi nyivi, tan naquihin ñi Tatyí li Nyoo? —catyí ra Simón tsihin ra naha.

20 Tacan tan nacahan ra Pedro tan catyí ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví. **21** Yooho, ña taahán tsi tyihi un tsi un tsihin tyiñu ihya. Tyin añima un ña vaha nuu Nyoo. **22** Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un. **23** Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsahá coto un tsa vaha —catyí ra Pedro tsihin ra Simón.

24 Tacan tan nacahan ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihi tsa caahán un tsihin yu siqui yu —catyí ra Simón tsihin ra Pedro.

25 Tsa yahá can tan ra tavá tyiñu ra Jesús tsahá cuenda ra naha tandihi tsa nyehé ra naha tsa javahá ra Cristo nu tsicá ra nu ñuhu ñayivi. Tan cahan ra naha tuhun Nyoo. Tacan tan cuanuhú ra naha nda ñuu Jerusalén. Tan tandihi ñuu tsa cayucú Samaria nu yahá ra naha jacoto ra naha nácaa javahá yo tan cacu yo.

Nu caahán ra Felipe tuhun Nyoo tsihin iin ra ñuu Etiopía

26 Tsa yahá yacan tan cahan iin ángel Nyoo tsihin ra Felipe, tan catyí ra:

—Nduvita tan cuhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahá nu tsiquí. **27** Tacan tan ra Felipe nduvita ra tan cuahán ra. Tan ityi cuahán ra ñihj tahan ra tsihin iin ra ñuu Etiopía. Tan

cuví ra can eunuco tyin ña cuví coo ñasiñi ra. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnú ra tsi Nyoo nda ñuu Jerusalén. **28** Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaa ra Isaías, ra cuví ndusu yuhu Nyoo tahan tsanaha. **29** Tacan tan Tatyí li Nyoo cahan tsihin ra Felipe: —Natuhva nu carreta can.

30 Tan cuhva tsa natuhvá ra Felipe nu carreta can, tsiñi ra tyin cahví ra Etiopía can nu libru tsa tyaa ra Isaías. Tan tsicá tuhun ra Felipe tsi ra tan catyí ra:

—¿A cutuñi iñi un tsa caahán tsi? —catyí ra.

31 Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catyí ra tsihin ra Felipe.

Tan tsican ra tsi ra Felipe na ndaa ra tan cunyaa ra tsihin ra.

32 Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvá ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti, tacan cuví ra can tyin nyehé ra tundoho tan nduve náa cahan ra.

33 Janduluhlu ra tsi ra nuu ra naha tan yoñi cuñi javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi. Tyin ña tsicoo sehe ra tan tsihi ra.

Tacan catyí tsi nu tutu tsa cahví ra can.

34 Tacan tan ra Etiopía quitsaha

cuahán tsihin ra t̄iñ ra naha ndaha ra tan tsindac̄a ra naha tsi ra ñuu Damasco. ⁹ Ican tsinyī ra uñi quiv̄i. Tan ña cuv̄i maa nanyehé ra. Tan ña tsats̄i ra, tan nduve maa náa tsih̄i ra.

¹⁰ Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cah̄an Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacah̄an ra Ananías, tan catyí ra:

—Ihya nyaá yu, Jutu Mañi yo —catyí ra tsihin ra.

¹¹ Tacan tan Jutu Mañi yo catyí ra:

—Nduvita, tan c̄uhun cun ityi cahnu tsa nañi Ndoo ñi. Tan n̄anducu un vehe ra tsa nañi Judas. Tan nd̄aca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu. ¹² Tan nyehe ra iin tsa nyehe ra, tan nyehe ra tsi yooho, Ananías, tyin tsāa un nu nyaá ra, tan tyiso ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

¹³ Tacan tan nacah̄an ra Ananías tan catyí ra:

—Jutu Mañi yo, cuaha xaan nyivi caahán ñi tsihin yu tyin nyivi yih̄i cuenda un ñuu Jerusalén cuaha xaan tsa ña vaha javah̄a ra Saulo can tsihin ñi. ¹⁴ Tan vityin vatsi ra ihya tyin tsāa ra jutu tsaahnu tsa cuv̄i ityi nuu ndatu tsi ra tsa tyihi ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

¹⁵ Maa tyin Jutu Mañi yo catyí ra tsihin ra Ananías:

—C̄uaahan tyin yuhu tsa nacats̄i vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin ñi cahan nd̄ihi ra tuhun yu tsihin nyivi Israel. ¹⁶ Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

¹⁷ Tacan tan cuahán ra Ananías vehe nu nyī ra Saulo. Tsāa ra yuvehe can tan quihv̄i ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituv̄i nuu un ityi vatsi un, ra ican jaquits̄i tsi yu tyin nanyehe un inga tsaha. Tan cua jacutu ra tsi un tsihin Tatyí li ra —catyí ra Ananías tsihin ra Saulo.

¹⁸ Tan juvin ñi cuhva can tan coyo tsa caá tumaa caa yaa tyaca tsa tyasī tinuu ra Saulo. Tacan tan cuv̄i nanyehe ra. Yah̄a can tan tsicoondutȳa ra.

¹⁹ Yah̄a can tan nacats̄i ra, tan ndunyēe cuñu ñuhu ra inga tsaha. Tan ndoo ra juhva quiv̄i tsihin nyivi tsa yih̄i cuenda ra Cristo ñuu Damasco.

Nu quitsah̄a caahán ra Saulo tuhun ra Cristo tsihin nyivi ñuu Damasco

²⁰ Tacan tan numi ñi quitsah̄a caahán ra Saulo tuhun ra Cristo tsihin nyivi tand̄ihi vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuv̄i tsi ra.

²¹ Tand̄ihi maa nyivi tsa tsiñi tsa caahán ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihya cuv̄i ra tsa tsinyāa ndaha tsi nyivi tsicán tahvi sivi ra Jesús ityi ñuu Jerusalén? ¿A ñavin juvin ra cuv̄i ra tsa vatsi t̄iñ tsi nyivi iyó ihya tyin cuhva cuenda ra tsi ñi tsi ra jutu tsa cuv̄i ityi nuu naha ra? —catyí ñi.

²² Maa tyin ra Saulo ñihi ca caahán ra tuhun ra Cristo tsihin tsa ñi iñi ra. Tan janahá ra tsi nyivi Israel tsa iyó ñuu Damasco tyin ra Jesús cuv̄i ra Cristo, tan Sehe Nyoo cuv̄i tsi ra. Tan ñi Israel ña ñih̄i ñi nácaa nacahan ñi tsihin ra.

Nu tsin̄u xeehe ra Saulo nuu ra Israel naha ra

²³ Tsa yah̄a juhva quiv̄i, tan ra Israel tsa ña tsinú iñi tsi ra Cristo

natuhun tahan ra naha tyin cua cahñi ra naha tsi ra Saulo. **24** Niñu tan nduvi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can. **25** Tacan tan nyivi tsa tsinú iñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinu ra cuahán ra.

Nu nyíí ra Saulo ñuu Jerusalén

26 Quivi tsa tsaa ra Saulo ñuu Jerusalén, cuñí ra ndu iin ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehé ñi tsi ra. Tyin ña tsinú iñi ñi tsa yihí ra cuenda ra Jesús. **27** Maa tyin iin ra tsa nañí Bernabé, quihin ra tsi ra. Tan tsaha cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyehe ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa cahán Jutu Mañi yo tsihin ra. Tan nácaa cahán ra tuhun ra Cristo tsihin tsa ña yuuhví ra nda ñuu Damasco. **28** Tacan tan ndoo ra Saulo ñuu Jerusalén tsihin nyivi tsa yihí cuenda ra Cristo. **29** Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra. **30** Maa tyin tsito ra hermano can naha ra tyin tacan tsicá iñi ra can naha ra. Yacan cuenda tsindaca ra hermano naha ra tsi ra Saulo nda ñuu Cesarea. Tacan tan jacuhun ra naha tsi ra nda Tarso, ñuu ra.

31 Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, sñi xaan cuñí ñi tyin ña cuxaán ca nyivi tsi ñi. Tan ndunyeé ca iñi ñi tsihin tunyee iñi tsi Nyoo tyin tyaá yahvi vaha ñi cuhva cahán ra, tyin yuuhví ñi coto ña cua javaha ñi cuhva cuñí

ra. Iyó ñi tsihin tsa jatyinyeé Tatyí Ii Nyoo tsi ñi. Tan nducuahá ca ñi tan iin tan iin quivi.

Nu nduvahá ra Eneas

32 Tacan cuví tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan tsahan tucu ra tsinyehé ra nu iyó nyivi yihí cuenda ra Jesucristo ñuu Lida. **33** Ican nañihí ra tsi iin ra cuuhví, nañi ra Eneas. Tan tsa una cuiya canyíí ra tan ña cuví maa nacandá ra tyin naxijí cuñu ñuhu ra. **34** Tan ra Pedro catyí ra tsihin ra: —Yooho Eneas, ra Jesucristo janduvahá ra tsi un. Nduvita tan natuvi yuvi un —catyí ra tsihin ra.

Tan juvin ñi cuhva can tan nduvita ra Eneas. **35** Tan nyehe tandihí nyivi ñuu Lida can tyin tsa nduvahá ra. Tan nyehe tucu nyivi ñuu Sarón. Tacan tan ñi can, natsinu iñi ñi tsi Jutu Mañi yo. Tan naco ñi tuhun tsahnu tsa tsinu iñi ñi nda ndi cumañi ca coto ñi tuhun ra Cristo.

Nu nandoto ña Dorcas

36 Quivi can tsicoo iin ñaha tsinú iñi tsi ra Cristo ñuu Jope. Tan nañí ña Tabita, tan tsihin yuhu griego, nañí ña Dorcas. Tan tuhvá ña javahá tsa vaha tsihin nyivi, jatyinyeé ña tsi nyivi ndaahvi. **37** Tan quivi can ña Dorcas quihin cuehe tsi ña tan tsihí ña. Tan tsa yahá jacutyí ñi tsi ña, tsicaquin ñi tsi ña tsitsi cuarto nu tsinu uvi pisu. **38** Yatyin ñi canyíí ñuu Jope tsihin ñuu Lida, nu nyíí ra Pedro. Tan nyivi tsa yihí cuenda ra Cristo ñuu Jope can tsito ñi tyin nyíí ra Pedro ñuu Lida. Tacan tan jacuhun ñi tsi uvi taahan ra na cucana ra naha tsi ra Pedro tyin na cuhan ra ñuu Jope tsa numi ñi. Tan tsaa ra naha nu nyíí ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

39 Tacan tan ra Pedro nduvitā ra tan cuahán ra tsihin ra naha. Tan cuhva tsa tsaā ra naha, tsindacā ra naha tsi ra nda cuarto nu canyii ndiyi can. Tan tandihi maa ñiñaha tsa tsihi yii natuhvā ñi tsata ra, tan tsacú tsaā ñi. Tan janahá ñi jahma tsa quicu ña Dorcas tsa tsicoo ña. 40 Tacan tan ra Pedro tavā ra tsi tandihi nyivi cuarto can. Tan tsicuiñi tsiti ra tan quitsahā tsicán tahvi ra tsi Nyoo. Tacan tan nanyehē ra tsi ñaha tsa tsihi can canyii ña. Tan quitsahā catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehē ña. Tan tsa nyehē ña tsi ra Pedro, tsinyaa ña.

41 Tacan tan ra Pedro tñin ra ndaha ña tan janduvitā ra tsi ña. Tacan tan canā ra tsi ra hermano naha ra, tan tsihin ñiñaha tsa tsihi yii. Tan nacuhvā cuenda ra tsi ña tsi ñi tyin tsa nandoto ña. 42 Yahā can tan tandihi maa nyivi ñuu Jope tsito ñi tyin nandoto ña can. Tan cuaha xaan ñi natsinu iñi tsi Jutu Mañi yo. 43 Tan ra Pedro ndoq ra juhva quivi ñuu can, nyii ra yuvehe iin ra tsa janduvitā ñii quití, nañi ra Simón.

Ra Pedro tsihin ra Cornelio

10 1 Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihi andaru tsa yihí ndaha ra can nañi tsi Italiano. 2 Tan ra Cornelio can yuuhví ra tsi Nyoo. Maa ra tan tsihin tandihi nyivi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyivi ndaahvi ñuu Israel, tan tandihi quivi tsicán tahvi ra tsi Nyoo. 3 Tan iin quivi cuhva caa uñi tsa tseñi, nyehē ra iin tsa nyehē ra. Tan ican cuví nu catsi xaan nyehē ra iin ángel tsa jacuhun Nyoo nu nyii ra, tan catyí tsi tsihin ra:

—¡Yooho Cornelio! —catyí ángel can tsihin ra.

4 Tacan tan nanyehē ra Cornelio tsi ángel can. Tan nayuhvi xaan ra. Tan quitsahā tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahā caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyeé xaan un tsi nyivi ndaahvi. 5 Tan vityin cuñi tsi tsa tava tyiñu un na cuquihin tyiñu tsi iin ra tsa nañi Simón Pedro nda ñuu Jope.

6 Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvitá ñii quití. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

7 Tsa yaha cuahán ángel can, ra Cornelio canā ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo. 8 Tandihi maa tsa cahān ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

9 Tuví inga quivi tan cuahán ra can naha ra. Tan tsa ndi cumañi ca tsaā ra naha ñuu Jope, tan ra Pedro ndaā ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. 10 Tan tsaā soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsahā nyehé ra iin tsa janahá Nyoo tsi ra.

11 Tan nyehē ra tyin ticohó andívi. Tan nyehē ra andívi tyin vatsí nuú iin jahma cahnu xaan ityi nu ñuhu. Tan tandihi tsa cumí tutun tsi nuuhñi nuuhñi ñi. 12 Tan tsitsi jahma can yihí tandihi maa nuu quití tsa cumi taahan tsaha, tan tandihi nuu coo, tan saa. 13 Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quití

ihya, tan çatsi un —catyí ndusu can tsihin ra.

14 Maa tyin ra Pedro nacahan ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quití tsa catyí ley tyin ña vaha catsi ndi —catyí ra Pedro.

15 Tacan tan quitsaha caahán nyico ndusu can tsihin ra inga tsaha:

—Ña catyí un tyin ña catsi un tsa tsa janduvaha yu —catyí ndusu can tsihin ra.

16 Uñi taahan tsaha nyehe ra yacan jahá Nyoo. Tacan tan jahma cahnu can nandaq nyico can ityi andivi. 17 Tan tsitsi tsa tsicá iñi ra Pedro náa cuñí tsi catyí tsa nyehe ra can, tsaq musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañí Simón. 18 Tan tsa tsaq ra naha ityi yuvehe tsicá tuhun ra naha tatun ican iyó iin ra tsa nañí Simón Pedro.

19 Tan ra Pedro tsicá xaan iñi ra náa cuñí tsi catyí tsa nyehe ra. Tacan tan Tatyí li Nyoo quitsaha caahán tsihin ra, tan catyí tsi:

—Nyehe Pedro, uñi taahan ra vatsí nanducú tsi un. 20 Nduvita tan cuhun cun tsihin ra naha, tan ña çaca iñi un tyin maa yu jaquitsi tsi ra ihya naha ra —catyí Tatyí li Nyoo tsihin ra Pedro.

21 Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

22 Tacan tan nacahan musu ra Cornelio tan catyí ra naha:

—Ra Cornelio, ra yihí ndaha tsi ndi, ra ican jaquitsi tsi ndi. Vaha xaan nyivi cuví ra. Tan tyaá yahvi xaan ra tsi Nyoo. Tan tandihi maa ra ñuu Israel tsa iyó ityi Judea ihya cuñí ra naha tsi ra tsa cuenda tsa vaha nyivi cuví ra. Tan iin ángel Nyoo cahan tsihin ra tyin na cana ra tsi un, tyin

cuhun un yuvehe ra tyin tacan tan tyaa soho ra tuhun tsa cua cahan un tsihin ra —catyí musu ra Cornelio tsihin ra Pedro.

23 Tacan tan tsaha ra Pedro quihvi ra naha tsitsi vehe. Tan ndoq ra naha tsihin ra tsacuaa can. Tan tsa tuvi inga quivi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

24 Tsa inga quivi tsaq ra naha nda ñuu Cesarea nu ndatú ra Cornelio tsi ra naha tsihin tandihi nyivi ra, tan tsihin tandihi ra vaha iñi tsi ra.

25 Cuhva tsa tsaq ra Pedro yuvehe ra Cornelio, quita ra Cornelio tan caahán ra tsihin ra. Tan tsicuiñi tsiti ra nuu ra Pedro tan quitsaha jacahnú ra tsi ra. 26 Maa tyin ra Pedro cañihí ra tsi ra, tan catyí ra tsihin ra:

—Nduvita tyin tahan ñi cuví yoocho cuví tucu yuhu; ñavin Nyoo cuví yu —catyí ra tsihin ra.

27 Tan tsitsi tsa caahán ra Pedro tsihin ra, tan quihvi ra tsitsi vehe tan nanyehe ra tyin cuaha xaan nyivi ndu iin tsitsi vehe can. 28 Tacan tan catyí ra Pedro tsihin ñi:

—Nyoocho tsitó ndo tyin ley nyuhu tsa cuví ndi nyivi Israel, catyí tsi tyin ña taahán tsi tsa ndu iin ndi tsihin nyivi tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janaha ra tsi yu, tan catyí ra: “Yoocho, ña çatyí un tsihin nyivi tyin ndi intuhun ñi tan ña vaha ñi” catyí Nyoo tsihin yu. 29 Yacan cuenda quivi tsa cana ndo tsi yu, numi ñi vatsí yu. Tan vityin cuñí yu coto yu nacuenta cana ndo tsi yu —catyí ra Pedro.

30 Tacan tan nacahan ra Cornelio, tan catyí ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituví iin rayi nuu yu. Nditsí ra jahma xiñu. 31 Tan catyí ra tsihin yu: “Yoocho Cornelio, Nyoo

tsiñí ra tsa tsicán tahvi un tsi ra. Tan nducuhun iñi ra tsa javahá un tyin jatyinyeé xaan un tsi nyivi ndaahvi. **32** Tava tyiñu tsi musu un na cahun ra naha nda ñuu Jope cuquihin ra naha tsi ra Simón Pedro na quitsi ra ihya. Nyii ra yuvehe ra tsa nañi Simón, iin ra tsa janduvitá ñii quiti. Tan vehe ra can nyaá tsi yatyin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyi ángel can tsihin yu. **33** Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsi un. Tan vityin tandihi yo ndu iin yo nuu Nyoo. Tan cuñi ndi tyaa soho ndi tandihi tsa catyi Jutu Mañi yo tsihin un tyin cuhva cuenda un tsi ndi —catyi ra Cornelio tsihin ra Pedro.

Nu caahán ra Pedro tuhun ra Cristo yuvehe ra Cornelio

34 Tacan tan quitsahá caahán ra Pedro tan catyi ra:

—Vityin cutuñi iñi yu tyin Nyoo cuñi ra tsi tandihi nyivi, tahañ ñi nyivi Israel, tan nyivi tsa ñavin nyivi Israel cuvi. Na tava tsiyo ra tsi ndi intuhun maa yo. **35** Tyin naquihín ra tsi yo tatun tyaa yahvi yo tsi ra, tan javahá yo tsa vaha. **36** Nyoo cahan ra tsihin nyuhu tsa cuvi ndi tata ra Israel, tan jacoto ra tyin cuvi coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihi maa yo. **37** Nyooho tsitó vaha ndo tandihi tsa cuvi ñuu nyivi Israel ñuu yu, nácaa quitsahá tsi nu cuvi Galilea tsa yahá tsa cahan ra Juan tuhun Nyoo tsihin nyivi, tan jacoondutya ra tsi ñi. **38** Tsitó ndo nácaa tsahá Nyoo tunyee iñi Tatyí Ii ra tsi ra Jesús, ra ñuu Nazaret. Tan tsica ra javahá ra tsa vaha, janduvahá ra tsi tandihi nyivi tsa nyehé tundoho jahá nu ña vaha. Tyehen javahá ra Jesús tyin Nyoo nyaá ra tsihin ra.

39 Nyuhu cuvi ndi tsandaa tsa cuenda tandihi tsa javahá ra Jesús ñuu Jerusalén tsihin tandihi ca ñuu tsa cayucú Judea. Yahá can tan ticaá ra naha tsi ra nu cruu tan tsahñi ra naha tsi ra. **40** Maa tyin tsa tsinu uñi quivi janandoto Nyoo tsi ra. Tan quituvi ra nuu ndi. **41** Ña quituvi ra nuu tandihi nyivi. Maa tyin quituvi ra nuu nyuhu tyin nacatsi ra tsi ndi nda tsanaha tyin cuvi ndi tsandaa cuenda ra. Nyuhu tsatsi ndi tan tsihi ndi tsihin ra tsa yahá tsa nandoto ra. **42** Tan tava tyiñu ra tsi ndi tyin cahan ndi tuhun ra tsihin nyivi. Tan cuvi ndi tsandaa tyin Nyoo tava tyiñu ra tsi ra Jesús tyin cuvi ra juez tsi nyivi tsa nyito tan nyivi tsa tsihi. **43** Tan tacan tucu nda tsanaha, cahan tandihi ra cuvi ndusu yuhu Nyoo tuhun ra Jesús. Tan catyi ra naha tyin tandihi nyivi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

Nu naquihín nyivi Tatyí Ii Nyoo tan ñavin nyivi Israel cuvi ñi

44 Ndi caahán ca ra Pedro tan nuu Tatyí Ii Nyoo siqui tandihi ñi tsa tyaa soho tsa caahán ra. **45** Tan ra Israel tsa yihí cuenda ra Jesús tsa tsaa tsihin ra Pedro iyo xaan cuñi ra naha tyin tsahá ndihi tucu Nyoo Tatyí Ii ra tsi nyivi tsa ñavin nyivi Israel cuvi. **46** Tyin tsiñi ra naha caahán ñi inga yuhu tan jacahnú ñi tsi Nyoo. **47** Tacan tan quitsahá caahán ra Pedro tsihin ra tsa tsaa tsihin ra: —Ña cuvi casi yo nu coondutya nyivi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyi ra tsihin ra naha.

48 Tacan tan tava tyiñu ra Pedro tsi ñi tsa ndi ñihí Tatyí Ii Nyoo na coondutya ñi tsihin sivi ra Jesucristo. Tacan tan caahán ndaahvi ñi tsihin ra Pedro na ndoo ra taahan quivi tsihin ñi.

Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

11 ¹ Ra tavá tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuanda nyivi tsa ñavin nyivi Israel cuví tan naquihín ñi tuhun Nyoo. ² Tacan tan tsaá nyico ra Pedro ñuu Jerusalén. Tan ra tsa catyí tyin tsiñí ñuhu tsa cunyaa tuñi Nyoo tsi tandihí rayii, xaan xaan cuñí ra naha nyehé ra naha tsi ra Pedro. ³ Tan catyí ra naha tsihin ra:

—¿Nacuenda tsañan un yuvehe nyivi tsa ñavin nyivi Israel cuví tan tsatsí un tsihin ñi? —catyí ra naha.

⁴ Tacan tan ra Pedro nacatyí tuhun ra nda nu quitsahá tandihí tsa cuví tsi ra, tan catyí ra:

⁵ —Yuhu nyíi yu ñuu Jope. Tan tsa tsicán tahvi yu tsi Nyoo tan nyehe yu iin tsa janahá Nyoo tsi yu tyin iin jahma cahnu quee ityi andívi. Tan tandihí tsa cumi tutun tsi nuuhñi nuuhñi ñi tan vatsí nuú tsi ityi nu ñuhu nu nyíi yu. ⁶ Tan nyehe vaha yu tsa yihí tsitsi jahma can. Tan nyehe yu quiti tsa cumi tsaha, quiti cuuhu, coo, tan saa. ⁷ Tan tsiñi yu iin ndusu tsa caahán tsihin yu: “Nduvita Pedro. Cahñi quiti ihya tan catsi un” catyí ndusu can tsihin yu. ⁸ Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.” ⁹ Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yahá janduvahá yu” catyí ndusu can tsihin yu. ¹⁰ Uñi tsaha cuví yacan. Yahá can tan nandaá nyico tandihí quiti can tsihin jahma can ityi andívi. ¹¹ Tan juvin ñi cuhva can tsaá uñi taahan ra naha yuvehe nu nyíi yu, quee ra naha ñuu Cesarea tan nanducú ra naha tsi

yu. ¹² Tan Tatyí Ii Nyoo cahan tsihin yu na cuhun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihi iñu taahan ra yañi yo ihya naha ra tsihin yu. Tan tsa tsaá ndi nda ñuu Cesarea, quihvi ndi tsitsi vehe iin ra tsa nañí Cornelio. ¹³ Tan nacatyí tuhun ra can tsihin ndi nácaa nyehe ra tsi iin ángel tsitsi vehe ra. Nyaá nyityi ángel can tan catyí ra tsihin ra tyin na jacuhun ra musu ra ñuu Jope na cucana ra naha tsi yu. ¹⁴ Tyin yuhu cua cuhva cuenda yu tsi ra nácaa cuví cacu ra tsihin tandihí nyivi ra, catyí ángel can tsihin ra, catyí ra tsihin ndi. ¹⁵ Tan javahá ra can tumaa cuhva catyí ángel can tsihin ra. Tan tsa tsaá yu yuvehe ra quitsahá caahán yu tsihin nyivi tsa ndu iin yuvehe ra. Tan quitsí Tatyí Ii Nyoo siqui ñi tumaa tsa nuu tsi siqui yo tsa jihna ñi. ¹⁶ Tacan tan nducuhun iñi yu tsa catyí Jutu Mañi yo quivi can. Tan catyí ra tyehen: “Nditsa tyin ra Juan jacoondutyá ra tsi nyivi tsihin ndutyá. Maa tyin nyoocho cua coondutyá ndo tsihin Tatyí Ii Nyoo”, catyí ra. ¹⁷ Nyoo tsahá ndihi tucu ra Tatyí Ii ra tsi ñi can tumaa tsa tsahá ra Tatyí Ii ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan çyóo ra cuví yuhu tan casi yu tsa javahá Nyoo? —catyí ra Pedro tsihin ra hermano can naha ra.

¹⁸ Tacan tan tsa tsiñi ra ñuu Jerusalén tuhun can, ña cahan ca ra naha. Tan jacahnú ra naha tsi Nyoo, tan catyí ra naha:

—Tun tacan cuví, cuñí tsi catyí tyin Nyoo tsahá ndihi tucu ra ndatu tsi nyivi tsa ñavin nyivi Israel cuví tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyí ra naha.

**Nyivi yihí cuenda ra Cristo
ñuu Antioquía**

19 Quivi tsa tsahñi ra naha tsi ra Esteban, quitsaha nyaá ndaha ra naha tsi inga ca nyivi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutya ñuhu. Tan yihí ñi tsaq ñi ñuu Antioquía. Tan tandihi ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel. 20 Tan tsihin ñi tsa cuahán can, yihí nyivi ñuhu Chipre, tan yihí tucu juhva nyivi ñuu Cirene. Tan tsa tsaq ñi ñuu Antioquía, tan quitsaha caahán ñi can tuhun ra Cristo tsihin nyivi tsa ñavin nyivi Israel cuví. Tan jacoto ñi tuhun vaha Jutu Mañi yo ra Jesús. 21 Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoq ñi tuhun tsahnu. Tan quitsaha tsínú iñi ñi tsi Jutu Mañi yo. 22 Tacan tan tsaq tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía. 23 Tan tsa tsaq ra Bernabé Antioquía can, nyehe ra nácaa nasocó Nyoo tsi ñi. Tan siñ xaan cuñí ra. Tan catyí ra tsihin ñi na cunyicun ñi tsi Jutu Mañi yo tsihin tsa ñi iñi ñi. 24 Tacan javaha ra Bernabé tyin cuví ra iin ra vaha. Tsitú ra tsihin Tatyí Ii Nyoo, tan tsínú xaan iñi ra tsi Nyoo. Yacan cuenda cuaha xaan nyivi quihví cuenda Jutu Mañi yo. 25 Tsa yaha can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindacá ra tsi ra nda ñuu Antioquía. 26 Tan tsiyucu ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuahá ra naha tuhun Nyoo. Tan juven ñi ñuu Antioquía can cuví nu quitsaha catyí nyivi tyin nyivi Cristiano cuví ñi, o ñi yihí cuenda ra Cristo.

27 Tan quivi can tsaq taahan ra

cuví ndusu yuhu Nyoo. Queq ra naha ñuu Jerusalén tan tsaq ra naha ñuu Antioquía. 28 Tan iin ra can nañi ra Agabo tsicunyaq nyityi ra tyañu nyivi yihí cuenda ra Cristo tan cahán ra tsa tsaq Tatyí Ii Nyoo tsi ra. Tan catyí ra tyin cua quitsi iin tama ñi cahnu nu ñuhu ñayivi. Tan tacan cuví quivi tsa cuví ra Claudio rey cahnu. 29 Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatyinyee ñi tsi nyivi yihí cuenda ra Cristo tsa iyó ñuu tsa cayucú Judea. 30 Tacan javaha ñi tan jacuhun ñi juhva xuhun tsi ra tsa cuví ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacá ra naha xuhun can.

**Nu tsihi ra Jacobo tan nu quihví ra
Pedro vehe caa**

12 1 Tan quivi can quitsaha nyaá ndaha ra cuví rey Herodes tsi juhva nyivi yihí cuenda ra Cristo. 2 Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi. 3 Tan nyehe ra Herodes tyin tahan xaan iñi nyivi Israel tsa javaha ra tacan, tan tava tyiñu ra tyin tñi ndihi ra naha tsi ra Pedro. Tan cuví tsi quivi vico pascua nu tuhvá nyivi tsatsí paan tsa nduve yutsan iya yihí. 4 Tsa yaha tsa tñi ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihví tucu inga cumi taahan andaru. Tan tyaa ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua. 5 Tan tacan nyíí ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyíí ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ñi iñi ñi.

Nu jacacu Nyoo tsi ra Pedro vehe caa

6 Tan tyaq ra Herodes cuhva tyin inga quivi can cua tava ra tsi ra Pedro nuu nyivi. Tan juvin ni tsacuaa can, tan ra Pedro quixi xaan ra tyañu uvi andaru can. Nuuhni ra tsihin uvi cadena. Tan yucu uvi taahan ca andaru jahá cuenda nda yuvehe.

7 Tan sana ini ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tñin ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsj cadena tsa nuuhni ndaha ra. 8 Tan ángel can catyí ra tsihin ra:

—Nacuhni vaha tsitsi un tan tyihi nditsan un tsaah un —catyí ángel can tsihin ra.

Tacan javaha ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

9 Tan ra Pedro cuahán ra cuanyicun ra tsi ángel can. Maa tyin na tsitó ra tatun tsa nditsa o tsa na nditsa cuví can, tan cuñi maa ra tyin iyó iin tsa janaha Nyoo tsi ra. 10 Maa tyin cuahán ra tsata ángel can tan yaha ra naha iin nu jahá cuenda ra andaru. Tacan tan yaha tucu ra naha inga nu jahá cuenda ra naha. Yaha can tacan tan tsaq ra naha yuvehe caa cahnu nu quitá nyivi. Tan yuvehe can nuña maa tsi. Tan quitá ra naha. Tan tsa yaha yaha ra naha iin ityi, tan nacoó ángel can tsi ra. 11 Tacan tan nacoto ra Pedro tyin nditsa, tan quitsaha tsicá ini ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacu ra tsi yu ndaha ra Herodes tan ndaha ra ñuu Israel naha ra —cuñi ra Pedro.

12 Tsicá ini ra yacan ityi cuahán

ra, tan tsaq ra yuvehe na María sihi ra Juan Marcos. Tan cuaha xaan nyivi yucu ican tsicán tahvi ni tsi Nyoo. 13 Tan tsa canj ndaha ra Pedro yuvehe nuquehe, tan quitá iin naha tyuvaa tsa nañi Rode, tsinyehe na yoo canj ndaha yuvehe can. 14 Maa tyin cuhva tsa tsiñi na ndusu ra Pedro, sihi xaan cuñi na, tan naq ini na nuña na yuvehe can, tyin tsinú na cuahán na cua cahan na tsihin nyivi tsa yucu tsitsi vehe can. Tan catyí na tyin ra Pedro nyaá ra yuvehe. 15 Tacan tan quitsaha catyí ni tsihin na:

—Ini yooho na vaha cuñi —catyí ni tsihin na.

Tan catyí na tyin nditsa tsa caahán na. Maa tyin ni can catyí ni tyin ñavin ra Pedro cuví ra, iin ángel cuenda ra cuví, catyí ni tsihin na.

16 Tan ra Pedro janihi ca ra canj ndaha ra yuvehe. Tan cuhva tsa nuña ni yuvehe tan nyehe ni tsi ra, iyo xaan cuñi ni tan nayuhvi ni. 17 Maa tyin javaha ra seña tsihin ndaha ra na cutaxin ni. Tan nacatyí tuhun ra tsihin ni nácaa tava Jutu Mañi yo tsi ra vehe caa. Tan catyí ra tsihin ni:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quitá ra tan cuahán ra.

18 Cuhva tsa cunditsin, iyo xaan cuñi ra andaru tsa jahá cuenda tsitsi vehe caa can naha ra, tyin na tsitó ra naha nácaa quitá ra Pedro. 19 Tacan tan tava tyiñu ra Herodes na cunanducu ra naha tsi ra, tan na nañihí ra naha tsi ra. Tacan tan tava tyiñu ra tsi ra naha na cahni ra naha tsi ra jahá cuenda vehe caa can naha ra. Yaha can tan quitá ra Herodes Judea can tan cuahán ra cua coo ra ñuu Cesarea.

Nu tsihi ra Herodes

20 Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñi ni tsa coo vaha

ñi tsihin ra tyin ñuu tsa ndacá ñaha ra, ican queé tsa tsatsí ñi. Tacan tan ndu iin ñi tan cuahán ñi cua cutahan ñi tsihin iin ra tsa nañí Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. **21** Tacan tan catyí ra Herodes tyin cuhun ñi nu nyaá ra iin quivi. Tan tsaa quivi can tan tsicunditsi ra jahma sii caá ra tsa jahá tyiñu ra. Tan tsicunyaá ra nu tyayu ra. Tan cahán ra tsihin ñi. **22** Tacan tan quitsaha caná tsa ñi, tan catyí ñi:

—Ra tsa caahán ihya ñavin rayii cuví ra, tyin Nyoo cuví ra —catyí ñi.

23 Tan juvin ñi cuhva can tan tñin cuehe tsi ra Herodes jahá ángel Jutu Mañi yo tyin tsaḡa ra tsa catyí nyivi tyin Nyoo cuví ra. Tan quihvi tindacu tsi ra, tan tsihi ra.

24 Maa tyin tuhun Nyoo nducuaḡa ca tsi. Tan jañihí ca nyivi caahán ñi tuhun Nyoo tandihí ñi ityi. **25** Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

Nu quitsaha tsicá ra Saulo tan ra Bernabé tyiñu Nyoo

13 ¹ Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsahnu iin nducu ñi tsihin ra Herodes tsa cuví rey ityi Galilea, tan ra Saulo. ² Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahán Tatyí Ii Nyoo tsihin ra naha:

—Tava siin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii

Nyoo can tsihin ra naha.

3 Tacan tan tsa ndihí tsicoḡ nyitya ra naha, tan tyisoḡ ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahán tsihin tahan ra naha, tsahan cuahán ra naha.

Nu caahán ra tava tyiñu ra Jesús tuhun Nyoo ñuhu Chipre

4 Yaha can tan jacuhun Tatyí Ii Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyí mahñu ndutya ñuhu. **5** Tacan tan tsaa ra naha ñuu Salamina tsa canyí yuhu ndutya ñuhu. Tan quitsaha caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha.

6 Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaa ra naha ñuu tsa nañí Pafos. Tan ican nañihí ra naha tsi iin ra ñuu Israel tsa nañí Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. **7** Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan canḡa ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra. **8** Tan ra tasi can nañí tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. **9** Tacan tan ra Saulo tsa nañí tucu Pablo, tsitú ra tsihin Tatyí Ii Nyoo. Tan ñihi xaan nanyehé ra tsi ra Elimas can. **10** Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñí un jatívi un tandihí tsa vaha. Tan tacan ñi tyasí un ityi vaha Jutu Mañi yo. **11** Tan vityin Jutu Mañi yo cua tatsi tuñi ra tsi un, tyin cua cuaa un. Tan

ña cua cuvi nyehe un ñuhu ñicanyii juhva quivi —catyí ra Pablo tsihin ra Elimas.

Tacan tan juvin ñi cuhva can cuag ra. Tan ndoo ra nu naa. Tan nducy ra iin ra tiin ndaha ra tyin ña nditsin nyehé ra. **12** Tsa nyehe ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñí ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquía tsa canyíi Pisidia

13 Ra Pablo tan ra vaha iñi tsi ra quihvi ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyíi Panfilia. Maa tyin ra Juan Marcos nacoq ihñi ra tsi ra naha tan cuanuh ra nda ñuu Jerusalén. **14** Yahá can tan quee ra naha Perge can, tan cuahán ra naha ñuu Antioquía tsa canyíi Pisidia. Ican quihvi ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecu ra naha. **15** Tacan tan quitsahá cahví nyivi nu libru ley Nyoo tsa tyaá ra Moisés. Tan cahví tucu ñi libru tsa tyaá ra cuví ndusu yuhu Nyoo tahán tsanaha. Yahá can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cuñí ra naha cahan ra naha tsihin nyivi, cuví cahan ra naha. **16** Tacan tan nduvita ra Pablo tan javahá ra iin seña tsihin ndaha ra tyin na cutaxin ñi. Tan catyí ra:

—Tyaá soho nyooho, ra ñuu Israel, tan nyooho nyivi tsa tyaá yahvi tsi Nyoo. **17** Nyoo cuenda yo, tsa cuví yo nyivi Israel, nacatsi vaha ra tsi tsii tsaahnu yo. Tan quivi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyivi ñuu can cuví ra naha, maa tyin janducuahá ra tsi ra naha. Yahá can tan tava ra tsi ra naha ityi can tsihin tunyee iñi tsa iyó tsi ra. **18** Tan cunyeé iñi Nyoo tandihí cuhva tsicoq ra naha nu tsicá

nuu ra naha nu tsiqui tsitsi tsa uvi xico cuiya. **19** Tan janaá ra utsa taahan ñuu nahnu tsa cayucú ñi cahnu Canaán, tyin tsaahá ra ñuhu can tsi tsii tsaahnu yo. **20** Yahá can tan quitsahá ndacá ñaha juez tsi nyivi can jahá Nyoo. Tumaa cumi cientu sasava cuiya tsindacá ñaha juez tsi ñi, nda cuanda quivi tsindacá ñaha ra Samuel ra cuví ndusu yuhu Nyoo tsi ñi. **21** Tacan tan maa ñi tsican ñi iin rey tsa cundaca ñaha tsi ñi. Tan Nyoo tsaahá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi. **22** Yahá can tan Nyoo tava ra tsi ra Saúl tsa cuví ra rey. Tan tsaahá ra tyiñu can tsi ra David. Tan catyí ra: “Nyhé yu tyin ra David, sehe ra Isái, cuví ra iin rayi tsa taahán iñi yu cuhva iyó. Tan cua javaha ra tandihí tsa cuñi yu” catyi Nyoo tuhun ra David. **23** Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsi tsi ra tyin jacacu ra tsi yo tsa cuví yo nyivi Israel, tumaa catyi ra tsihin tsii tsaahnu yo tahán tsanaha. **24** Tan ndi cumañi ca quitsi ra Jesús, ra Juan, ra jacoondutyá tsi nyivi, cahan ra tsihin tandihí nyivi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutyá ñi. **25** Tan tsa cua ndihí tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyi ra Juan.

26 Tan caahán ca ra Pablo tan catyí ra:

—Yañi, nyooho nyivi tata ra Abraham tan tandihí inga ndo tsa tyaá yahvi tsi Nyoo. Tsa cuenda nyooho cuví tuhun ihya tyin jacuahá

Nyoo tsi yo nácaa cacu yo. **27** Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñí iñi ñi tuhun tsa tyaá ra cuví ndusu yuhu Nyoo tahañ tsanaha, vasu jacuahá xaan ñi tuhun can tandihi quivi tsa quitatu ñi, maa tyin ña cutuñí iñi ñi. Tan quivi tsañi ñi tsi ra Jesús cuví tsi tumaa cuhva catyí ra cuví ndusu yuhu Nyoo. **28** Tyin vasu nduve cuatyí ra Jesús nañiñi ñi, maa tyin tsican ñi tsi ra Pilato na tyihi ra tyiñu tyin cahñi ra naha tsi ra Jesús. **29** Tan tsa yaha janyehé ñi tundoho tsi ra tumaa catyí maa tuhun ra nu libru, tan tsihi ra. Tacan tan januu ñi tsi ra nu cruu. Tan tsicutsí ñi tsi ra. **30** Maa tyin Nyoo janandoto ra tsi ra inga tsaha. **31** Tan tsitsi tsa cuaha quivi tan quituví ra nuu ra tsa cuahán tsihin ra quivi quita ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin. **32** Tan yacan cuenda nyuhu caahán ndi tuhun vaha tsa catyí Nyoo tsihin tsi saahnu yo tyin cuhva ra tsi yo. **33** Tyin tsa cuenda tsa vaha tsi maa yo tsa cuví yo nyivi tata ñi, javahá maa Nyoo tsa catyí ra. Tyin janandoto ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayivi coo un vityin” catyí Nyoo tsihin ra. **34** Nyoo tyaá ra cuhva tyin janandoto ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahan yu tsihin ra David tyin cua cuhva yu tsi ndo.” **35** Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi. **36** Ra David jahá tyiñu ra tsa cuenda nyivi tsa tsicoo quivi tsicoo ra, tandihi tsa catyí Nyoo tsihin ra tyin javaha ra, javahá ra. Yaha can tan tsihi ra tan tsicutsí ñi tsi ra tumaa tsicutsí ñi tsi

ra. Tan tyahyu cuñu ñuhu ra. **37** Maa tyin ra tsa janandoto Nyoo, ña tyahyu cuñu ñuhu ra. **38** Yañi, cuñi tsi tsa coto ndo tyin tsa cuenda cuatyí yo tan quitsí ra Jesús tan tsihi ra tyin jahá ra tucahnu iñi cuatyí yo. **39** Tan tsa cuenda ra Jesús jahá Nyoo tucahnu iñi tsi tandihi ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo. **40** Jaha ndo cuenda coto ndoo tsa tyaá ra cuví ndusu yuhu Nyoo siquí ndo. Tyin catyí ra naha tyehen:

41 Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cunaa ndo. Tyin yuhu cuví Nyoo, tan javahá yu iin tsa cahnu quivi tsa iyó ndo vityin. Maa tyin ña cua tsinu iñi ndo tandihi tsa javahá yuhu vasu nacatyí tuhun nyivi tsihin ndo, catyí Nyoo.

42 Ndihi cahan ra Pablo tan quita ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsaha catyí ñi tsihin ra, tyin na cahan nyico ra tuhun can tsihin ñi inga vitya quivi tsa quitatú ñi. **43** Cuhva tsa ndihi ndu iin ñi, cuaha xaan nyivi Israel tan nyivi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cuhun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

44 Tsa inga vitya quivi quitatú ñi, ndu iin nyico ñi. Tan tsa yatyin tandihi ña maa nyivi ñuu can ndu iin tsihin ñi tan tyaá soho ñi tuhun Nyoo. **45** Maa tyin cuhva tsa nyehe ra Israel naha ra, cuxaán ra naha tyin nyehé ra naha tyin cuaha nyivi nyicún tsi ra hermano can naha ra. Tan quitsaha caahán ra naha tsi ra Pablo, tan cahan ra naha ndavaha ñi siquí ra. **46** Maa tyin ra Pablo tan tsihin ra Bernabé ña yuuhví maa ra naha tan quitsaha

caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyoooho tsa cuví ndo nyívi Israel. Maa tyin ña cuñí ndo naquihin ndo tsa caahán ndi. Tan nyoooho ña cuñí ndo tsa coo ñayívi nyito tsa ña cua naa maa tsi ndo. Yacan cuenda cua cuhun ndi cucahan ndi tsihin nyívi tsa ñavin nyívi Israel cuví. **47** Tyin tacan catyí Jutu Mañi yo tsihin ndi tan catyí ra tyeheh:

Tyaq̄ yu tsi un tumaa iin ñuh̄u tsa jandunditsín nu iyó nyívi nanií cahnu nu ñuhu ñayívi. Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

48 Tsa tsíñi ra tsa ñavin ra Israel cuví naha ra, s̄ií xaan cuñí ra naha. Tan quitsah̄a catyí ra naha tyin tuhun Nyoo vaha xaan tsi. Tan natsin̄u iñi tandihi nyívi tsa nacatsi maa Nyoo, tyin coo ñi ñayívi nyito tsa ña cua naa maa. **49** Tacan tan nducuah̄a ca tuhun Nyoo tandihi ityi ñuu can. **50** Maa tyin ra Israel cah̄an ra naha tsihin juhva ñaha cuca tsa nyicún ley Nyoo tsa tyaq̄ ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsah̄a nyaá ndaha nyívi tsi ra Pablo tan ra Bernabé, nda cuanda tsa tav̄a ñi tsi ra naha ñuu can. **51** Tacan tan naquís̄i ra naha nyaca tsaha ra naha tumaa iin seña tyin ndoo cuatyí nyívi can siquí maa ñi. Tan cuahán ra naha ñuu Iconio. **52** Maa tyin ñi yih̄í cuenda ra Cristo ñuu Antioquía can s̄ií xaan cuñí ñi. Tan tsitú ñi tsihin Tatyí li Nyoo.

Nu nyíi ra Pablo tan ra Bernabé ñuu Iconio

14 ¹ Ra Pablo tan ra Bernabé yucú ra naha ñuu Iconio. Tan quih̄vi ra naha tsitsi vehe ñuhu nyívi Israel. Tan vaha xaan cah̄an ra naha

tuhun Nyoo tsihin nyívi can. Tan cuaha xaan ñi natsin̄u iñi ñi tsi ra Cristo, nyívi Israel tan nyívi tsa ñavin nyívi Israel cuví. **2** Maa tyin ra Israel tsa ña tsinú iñi tsi ra Cristo natyuh̄u ra naha tsi nyívi tsa ñavin nyívi Israel cuví tyin na caca ña vaha iñi ñi nyehe ñi tsi ra yih̄í cuenda ra Cristo. **3** Yacan cuenda ra Pablo tan ra Bernabé ndoo ra naha ican cuaha quívi. Tan tsihin tsa ñi iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsah̄a Jutu Mañi yo tunyee iñi tsi ra naha tyin javaha ra naha seña tan tsa iyo na coto nyívi tyin nditsa tsa caahán ra naha. **4** Maa tyin nyívi ñuu ña iin tsicá iñi ñi, tyin juhva ñi yih̄í cuenda ra Israel naha ra, tan juhva ñi nyicún tsi ra tav̄a tyiñu ra Jesús. **5** Tacan tan ra Israel tan ra tsa ñavin ra Israel cuví, natuh̄un tahan ra naha tsihin ra cumí tyiñu, tyin cua cahan ra naha ndavaha ñi siquí ra tav̄a tyiñu ra Jesús, tan cua cañi ra naha yuu tsi ra naha. **6** Maa tyin ra Pablo tan ra Bernabé ñih̄i tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Listra, tan nda ñuu Derbe ityi Licaonia. Tan tsic̄a nuu ra naha ityi ñuu can. **7** Tan cah̄an nyico tucu ra naha tuhun Nyoo nácaa jacacú ra tsi yo.

Nu cañi nyívi yuu tsi ra Pablo nda ñuu Listra

8 Nda Listra iyó iin rayií tsa coxo tyin nda quívi cacú ra tan ña cuví caca ra, tyin pehe nduvi taahan tsaha ra. **9** Tan ra pehe tsaha can tyaá soho ra tsa caahán ra Pablo. Tan ra Pablo, tuv̄i iñi ra tyin tsinú iñi ra can tyin cuví nduvaha ra. **10** Tacan tan ra Pablo caahán ra tsihin tsa ñihi ndusu ra, tan catyí ra:

—Nduvita tan cunyaa nyityi un

—catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsaha tsicá ra. **11** Tsa nyehé nyivi tyin javaha ra Pablo tacan, quitsaha caná tsa ñi tsihin yuhu Licaonia, tan catyí ñi:

—Ra tsa tsa nu yucú yo ihya, nyoo cuví ra naha, maa tyin tumaa caá rayi, caá ra naha —catyí ñi.

12 Tan catyí ñi tyin ra Bernabé cuví ra nyoo tsa nañi Júpiter, tan ra Pablo cuví nyoo tsa nañi Mercurio, tyin ra ican cuví ra tsa caahán. **13** Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter. Tan quitsi ndaca ra indiqui tan ita tyin maa ra tan nyivi cuñi ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñi ñi tyin nyoo cuví ra naha. **14** Maa tyin cuhva tsa tuvi iñi ra naha tsa tsicá iñi ñi, quitsaha tsahnyá ra naha jahma ra naha. Tan javaha ra naha tacan tumaa iin seña tyin ña ndoó ra naha vaha. Tan quihvi ra naha tyañu nu tuvi nyivi, tan cana tsa ra naha, **15** Tan catyí ra naha:

—Nyoo tata, ¿nácaa tsa javahá ndo tyehen? Nyuhu juvin ñi rayi ñuu ñayivi ihya cuví ndi. Tumaa cuví nyooho cuví tucu nyuhu. Tan vatsi cahan ndi tsihin ndo tyin na jaña ndo tsa javahá ndo tyehen tyin ña tsiñi ñuhu yacan tsi ndo, tan na cunycun ndo tsi Nyoo nyito. Juvin ra tsa javaha andivi tan ñuhu ñayivi. Tan javaha ra ndutya ñuhu tan tandihi maa tsa iyó tsitsi ndutya ñuhu can. **16** Tan tahañ tsanaha nda cuanda vityin, Nyoo jaña ndaha ra tsi nyivi na javaha maa ñi cuhva cuñi ñi, **17** vasu tandihi quivi jacuahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsaá ra tsa coo vaha tsa tatsí yo quivi taahán tsi. Tan tsaá ra tsa catsi yo. Tan tsaá ra tsa

cusii cuñi yo —catyí ra naha tsihin nyivi can.

18 Maa tyin vasu catyí ra naha tacan, yih xaan tan tyasi ra naha tsa cahñi ñi indiqui can, tyin cuñi ñi jacahnu ñi tsi ra naha tsihin can.

19 Tacan tan tsa juhva ra Israel, ra tsa ña tsinú iñi tsi ra Cristo, ra ñuu Antioquía, tan ra ñuu Iconio. Tan natyuhu ra naha tsi nyivi, na cañi ñi yuu tsi ra Pablo. Tan tacan javaha ñi, tan cuñi maa ñi tyin tsa tsihi ra. Tacan tan ixta caa ñi tsi ra tan tsindaca ñi tsi ra nda yuhu ñuu. **20** Maa tyin ndu iin ra yihí cuenda ra Cristo nu canyí ra Pablo. Tan nduvita nyico ra. Tan quihvi nyico ra inga tsaha tsitsi ñuu can. Tan tsa inga quivi can cuahán ra ñuu tsa nañi Derbe tan cuahán ra Bernabé tsihin ra.

21 Tan cañan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhva ñi tsi ñi tsi Nyoo. Yaha can tan cuanuhu ra naha ityi quitsi ra naha. Tan yaha nyico ra naha ñuu Litra tan ñuu Iconio inga tsaha, tan tsa nyico ra naha nda ñuu Antioquía. **22** Tan tandihi ñuu can jandu iin ra naha iñi nyivi tsa yihí cuenda ra Cristo. Tan catyí ra naha tsihin ñi na cahun ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñi yo tsa cundaca ñaha Nyoo tsi yo, cuñi tsi tsa nyehe yo tundoho. **23** Tan natyiso ra naha tsi ra cua cuvi ityi nuu tsihin nyivi tsa yihí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa cuenda ra tsa cua cuvi ityi nuu tsihin nyivi vehe ñuhu can naha ra. Yaha can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhū nyico ra Pablo tan ra Bernabé űuu Antioquía ityi Siria

24 Yahā can tan yahā ra Pablo tsihin ra Bernabé űuu tsa cayucú Pisidia, tan tsaā ra naha nda cuanda Panfilia. 25 Cahān ra naha tuhun Nyoo űuu Perge. Yahā can tan tsaān ra naha űuu Atalia. 26 Ican quihvī ra naha tsitsi iin yutun ndoo tan cuanuhū ra naha nda űuu Antioquía. Ican cuvī űuu nu natyiso űi tsi ra naha tyin cua javaha ra naha tyiñu Nyoo, tan vityin tsa tsaā nuhu ra naha. 27 Tsa tsaā nyico ra naha űuu Antioquía jandu iñn ra naha tsi nyivi yihí cuenda ra Cristo. Tan nacatyī tuhun ra naha tsihin űi tandīhi tsa javahā Nyoo tsihin ra naha, tan nácaa nuñā Jutu Mañi yo ityi tyin tsinú tucu iñi űi tsa űavin nyivi Israel cuvī. 28 Tan naha xaan ndoo ra Pablo tan ra Bernabé tsihin űi yihí cuenda ra Cristo űuu can.

Nu jandaā ra tava tyiñu ra Jesús tyiñu nda űuu Jerusalén

15 ¹ Ndi nyí ca ra Pablo tan ra Bernabé űuu Antioquía, tan tsaā taahan ra naha quee ra naha nda Judea. Tan quitsahā jacuahá ra naha tsi ra yihí cuenda ra Cristo. Tan catyí ra naha tyin cuñi tsi tsa cunyaa tuñi Nyoo tsi ra naha, tumaa cuhva catyī ra Moisés, tyin tacan tan cua cacu ra naha. 2-3 Tan űihi xaan cahān yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cahun ra naha űuu Jerusalén, cujandaa ra tyiñu can tsihin ra tava tyiñu ra Jesús tan tsihin ra cuvī ityi nuu tsihin nyivi vehe űuhu űuu Jerusalén can naha ra. Tacan tan cuahán ra naha. Tan ityi cuahán ra naha, yahā ra naha ityi Fenicia tan Samaria. Tan nacatyí tuhun ra naha tsihin nyivi yihí cuenda ra Cristo

nácaa jañá nyivi tsa űavin nyivi Israel cuvī tuhun tsañu tsa tsinū iñi űi, tyin nacuhvá cuenda űi tsi űi tsi Nyoo. Tan tandīhi ra hermano sīi xaan cuñi ra naha tsa tsito ra naha yacan.

4 Quivi tsaā ra Pablo tan ra Bernabé űuu Jerusalén, cuahán ra naha nu ndu iñn nyivi yihí cuenda ra Cristo. Tan tandīhi űi tan ra cuvī ityi nuu tsihin űi, tan tsihin ra tava tyiñu ra Jesús, tsaā űi yaha ra naha tyin nacatyí tuhun ra naha tsa javahā Nyoo tsihin ra naha. 5 Maa tyin juhva ra fariseo tsa tsinú iñi tsi ra Cristo, nduvitā ra naha tan catyí ra naha:

—Tandīhi ra tsa űavin ra Israel cuvī tan tsinú iñi ra naha tsi ra Jesús, cuñi tsi tsa cunyaa tuñi Nyoo tsi ra naha. Tan cuñi tucu tsi tsa javaha ra naha cuhva catyí ley Nyoo tsa tyaā ra Moisés —catyí ra naha.

6 Tacan tan ndu iñn ra cuvī ityi nuu tsihin űi yihí cuenda ra Cristo tan ra tava tyiñu ra Jesús tyin natuhun tahan ra naha tuhun can. 7 Tsa yahā tsa cahān yuhu xaan ra naha, tan nduvitā ra Pedro, tan catyí ra:

—Yañi, tsitó ndo tyin tsitsi tsa tandīhi yo, nacatsī Nyoo tsi yuhu ra ndaahvi quivi can, tyin cahan yu tuhun ra tsa jacacú tsi yo tsihin nyivi tsa űavin nyivi Israel cuvī, tan na tsinú iñi űi tsi Jutu Mañi yo. 8 Tan Nyoo, ra tsitó añima tandīhi nyivi, janahā ra tsi yo tyin cuñi ra tsi űi ican. Yacan cuenda tsaā ra Tatyí li ra tsi űi, tumaa tsa naquihñn tucu maa yo Tatyí li ra tahān tsanaha. 9 Nyoo inducu űi cuñi ra tsi nyivi. Yacan cuenda ña tyaá tsiyo ra tsi űi ican tan ndi tsi yoo. Janduvahá ra tsi űi tsa cuenda tsa tsinú iñi űi tsi ra tumaa maa yo. 10 Vityin ꞓnacuenda ña tsinú iñi ndo tsa javahā Nyoo tsihin űi can? Tyin ña vaha tsa tyisó yo ley Nyoo tsa tyaā ra Moisés siquí űi. Tyin ndi maa tsii tsañu yo tan ndi maa yo tan ña cuvī naquihñn vaha yo ley can. 11 űavin tacan cacú yo. Yoo tsitó yo

tyin cacú yo tsihin tumañi iñi tsa javahá Jutu Mañi yo ra Jesús tsihin yo. Tan tacan tucu ñi can —catyí ra Pedro tsihin tandíhi ra can naha ra.

12 Tacan tan taxin ñi cuví tandíhi ra naha. Tan tyaa soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javahá Nyoo nu cahán ra naha tuhun ra nu yucú nyívi tsa ñavin nyívi Israel cuví. 13 Tsa ndíhi cahán ra naha, quitsahá caahán ra Jacobo, tan catyí ra:

—Nyooho yañi, tyaa soho ndo tsa cua cahan yu tsihin ndo. 14 Tsa catyí tuhun ra Simón Pedro tsihin yo nácaa quitsahá tsahá Nyoo tumañi iñi tsi ñi tsa ñavin nyívi Israel cuví. Tyin nacatsí tucu ra tsi juhva ñi tyin cuví ñi nyívi cuenda ra. 15 Tan ndu iin tuhun ihya tsihin tuhun tsa cahán ra cuví ndusu yuhu Nyoo tahan tsanaha, tumaa cuhva nyaá maa nu tutu Nyoo nu catyí ra:

16 Yahá tandíhi tuhun ihya tan cua quitsi nyico yu nu yucú ndo.

Quívi tsa tsicoo ra David, vaha xaan jacahnú nyívi tsi yu.

Maa tyin yahá can jandíhi nyívi tsa jacahnú ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David.

Tyin cua jacahnu nyico nyívi tsi yu.

17 Tyin tacan tan cuví nanducu tandíhi inga ca nyívi tsi yu, tandíhi ñi tsa ñavin nyívi Israel cuví tan tsinú iñi tsi yu.

18 Tacan catyí Jutu Mañi yo, tan jacuahá ra tuhun ihya tsi nyívi tsicoo tahan tsanaha tan tsihin nyívi tsa iyó vityin.

19 Yacan cuenda catyí yu tyin ña vaha tsa jatyañu yo tsi nyívi tsa ñavin nyívi Israel cuví, ñi tsa nacoo tuhun tsahnu ñi tan quíhví ñi cuenda ra Cristo. Ña vaha catyí yo tyin cuñí tsi tsa tyaa yahví ñi ley tsahnu yo.

20 Vaha ñi maa tsihin tsa jacuhun yo carta tsi ñi. Tan catyí yo tsihin ñi tyin ña cua catsi ñi cuñu tsa tsahá cuenda nyívi tsi tsitoho. Tan ña cuví coo rayíi tsihin ñaha tun ña tindaha ra. Tan ndi ñiñaha ña cuví coo ñi tsihin rayíi tun ña tindaha ñi. Rayíi tsa iyó ñasíhi ña cuví coo ra tsihin inga ñaha, tacan tucu ñiñaha tsa iyó yíi, ña cuví coo ñi tsihin inga rayíi. Tan catyí tucu yo tsihin ñi quíhví cuenda ra Cristo tan ñavin nyívi Israel cuví ñi tyin ña cua catsi ñi cuñu quítí tsa tsihi tsa cava ñi jucun tatun ña tsatí ñiñi ti. Tan ña cua catsi ñi ñiñi quítí. 21 Tyin nda tyembu tsahnu tan nda cuanda vityin iyó maa ra jacuahá ley Nyoo tsa tyaa ra Moisés vehe ñuhu nyívi Israel. Tan jacuahá ra naha tuhun can tan iin tan iin ñuu, tan tahan tahan una quívi, quívi tsa quitatú ñi —catyí ra Jacobo tsihin ra naha.

22 Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandíhi ñi yíhí cuenda ra Cristo, nacatsí ñi tsi taahan ra naha. Tan yahá can tan jacuhun ñi tsi ra naha tyin cahun ra naha ñuu Antioquía tsihin ra Pablo tan ra Bernabé. Tan ra tsa natyiso ñi cuví ra: Judas tsa nañí Barsabás, tan ra Silas. Ra ican cuví iin ra tsa nyisó tyiñu vehe ñuhu nda ñuu Jerusalén. 23 Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandíhi ndi tsahá ndi nacumi tsi nyooho tsa ñavin ra Israel cuví ndo. Tyin yañi ndi cuví tsi ndo vasu ñavin nyívi Israel cuví ndo. Tandíhi nyooho tsa iyó ndo ñuu Antioquía, tan nyooho nyívi Siria, tan tsihin nyooho nyívi Cilicia, jaquitsí ndi carta ihya tsi tandíhi ñi ndo. 24 Tsitó ndi tyin quítá taahan ra ityi nu yucú ndi ihya. Tan vatsí ra naha nu yucú ndo. Maa tyin ña catyí nyuhu tyin

quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyí ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahān tsihin ra naha tyin quitsi cahan ra naha yacan tsihin ndo. **25** Yacan cuenda ndu iñi ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsi ndi tsi ra hermano ihya naha ra tsihin ra Pablo tan ra Bernabé nu yucú ndo. **26** Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahñi ñi tsi ra naha, maa tyin ña jandihí ra naha tsa jacotó ra naha tuhun Jutu Mañi yo ra Jesucristo. **27** Yacan cuenda jaquitsí ndi tsi ra Judas tan ra Silas. Tan maa ra naha cua cahan ra naha tsihin yuhu ra naha tsihin ndo, tyin cua cuhva cuenda ra naha tandihi tsa tyaa ndi nu tutu ihya. **28** Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho síqui ndo. Maa tyin ñiñi ca cuñí tsi tsa naquihin vaha ndo tuhun ihya: **29** Ña cua catsi ndo cuñu tsa tsahā cuenda nyivi tsi tsitoho. Tan ña cua catsi ndo ñiñi quití, ndi cuñu quití tsa tsihí tsa cava ñi jucun tan ña tsatí ñiñi tí. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayii. Tatun na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra naha nu carta can.

30 Tan cuahán ra tsa jacuhun ra naha, tan tsaa ra naha ñuu Antioquía. Tan jandu iñi ra naha tsi tandihi nyivi yihí cuenda ra Cristo tan nacuhva cuenda ra naha carta can. **31** Tsa cahvi ñi carta can, sii xaan cuñí ñi tyin vaha xaan caahán tsi. **32** Tan ra Judas tsihin ra Silas cuví tucu ra naha ndusu yuhu Nyoo. Tan jandu iñi ra naha iñi nyivi can tsihin tsa cahān ra naha. **33** Tan tsa yahā tsiyucu ra naha juhva quivi tan cuanuhu nyico ra naha nda nu

yucú nyivi tsa jacuhun tsi ra naha. Tan tandihi nyivi yihí cuenda ra Cristo ñuu Antioquía can catyí ñi tyin na cahun vaha ra naha. **34** Maa tyin ra Silas catyí ra tyin cua ndoo ra. **35** Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahān ra naha tuhun Jutu Mañi yo tsihin nyivi can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quitā tsiyo ra nuu ra Bernabé

36 Tan tsa yahā juhva quivi, tan cahān ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihi ñuu nu cahān yo tuhun ra, tyin nyehe yo nácaa yucú ñi —catyí ra Pablo tsihin ra.

37 Tan ra Bernabé cuñí ra tsa cahun nyico ra Juan Marcos tsihin ra naha.

38 Maa tyin ra Pablo ña taahán iñi ra tsa cahun ra Juan tsihin ra naha, tyin nacoq ihñi ra tsi ra naha nda Panfilia quivi tsa tsahān ra tsihin ra naha.

Tan ña tsahān ca ra tsjahā tyiñu ra tsihin ra naha. **39** Tan cahān yuhu tahan ra naha, tan ndusiñ ra naha.

Ra Bernabé cuahán ra tsihin ra Juan Marcos. Tan quihvi ra naha tsitsi iin yutun ndoo tan cuahán ra naha ñuhu Chipre. **40** Tan ra Pablo nacatsí ra tsi ra Silas. Tan tsa yahā tsican tahvi ra hermano naha ra tsi Nyoo tsa cuenda ra naha tyin na jatinyee Nyoo tsi ra naha, tacan tan cuahán ra naha.

41 Tan yahā ra naha ñuu tsa cayucú Siria tan Cilicia, tan jandu iñi ra naha iñi nyivi tsa yihí cuenda ra Cristo tan iin tan iin ñuu.

Nu cuahán ra Timoteo tsihin ra Pablo tan ra Silas

16 ¹ Ra Pablo tsihin ra Silas tsaa ra naha ñuu Derbe, tan ñuu Listra. Tan ican nañihí ra naha tsi iin

ra yihí cuenda ra Cristo. Nañí ra Timoteo. Tan sihi ra cuví ña iin ñaha Israel. Tan yihí ndihí ña cuenda ra Cristo. Maa tyin jutu ra, ra Grecia cuví ra. **2** Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio. **3** Tan ra Pablo cuñí ra tsa cuhun ra Timoteo tsihin ra. Tan tyaa ra naha tuñi Nyoo tsi ra Timoteo jahá ra Pablo. Tyin coto ndasi cuñi nyivi Israel nyehe ñi tsi ra. Tyin tandihí ñi tsitó ñi tyin jutu ra cuví ra ra Grecia. **4** Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahá ra tava tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha. **5** Tacan tan ndu iin iñi nyivi yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

Nu janahá Nyoo iin tsa janahá ra tsi ra Pablo cuenda iin ra Macedonia

6 Ña tsahá Tatyí li Nyoo tsa cahan ra naha tuhun Nyoo ñuu tsa cayucú Asia. Yacan cuenda yahá sava ra naha ñuhu cuenda Frigia tan Galacia. **7** Tan tsaa ra naha Misia. Tan cuñí ra naha cuhun ra naha Bitinia, maa tyin Tatyí li ra Jesucristo ña tsahá cuhun ra naha. **8** Tacan tan nda sava ñi yahá ra naha ñuu tsa cayucú Misia tan cuahán ra naha ñuu Troas tsa canyií yuhu ndutya ñuhu. **9** Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayii tsa iyó iin ñuu tsa canyií Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Ñaha ihya, tyin jatyinyee un tsi ndi” catyí ra. **10** Tan tsa nyehe ra Pablo can, yuhu ra Lucas tsihin ra Pablo tan inga ra janduvahá ndi tsi ndi tan cuahán ndi nda Macedonia can. Tyin tsitó vaha ndi

tyin Nyoo caná ra tsi ndi, tyin cahan ndi tuhun ra nácaa jacacú ra tsi yo tsihin nyivi ityi can.

Nu nyí ra Pablo tsihin ra Silas ñuu Filipos

11 Quihví ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyií mahñu ndutya ñuhu. Tan tsa inga quivi tsaa ndi ñuu Neápolis. **12** Tan ican quee ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahanu ca tsa nuu tandihí ñuu tsa cayucú Macedonia. Tan ican tsiyucu ndi taahan quivi. **13** Iin quivi tsa quitatú nyivi, tan quita ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecu ndi, tacan tan cahan ndi tuhun Nyoo tsihin ñiñaha tsa ndu iin ican. **14** Iin ñaha nañi ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduuhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñi ña tsa caahán ra Pablo. Tan Nyoo nuña ra añima ña na tyaa yahvi ña tsa caahán ra. **15** Tan tsicoondutya ña tsihin nyivi ña. Tan yahá can tan cahan ndaahvi ña tsihin ndi, tan catyí ña: —Tatun nyehé ndo tyin nditsa tsa tsinú iñi yu tsi Jutu Mañi yo, cõhon ndo, ndõõ ndo yuvehé yu —catyí ña tsihin ndi.

Tan jañiñi xaan ña tsi ndi na ndoo ndi yuvehé ña.

16 Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahán ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndihí tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. **17** Tan ñaha tyuvaa can quitsahá nyicún ña tsi ndi, nyuhu tsihin ra Pablo. Tan caná

tsaa ña tan catyí ña:

—Rayi ihya ra jahá tyiñu tyiñu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

18 Cuaha quivi javahá ñaha tyuvaa can tacan. Tacan tan ra Pablo ña cunyeē ca iñi ra, tan nanyico coo ra tan catyí ra tsihin tatyí ña vaha tsa yihí tsi ña:

—Tsihin sivi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyí ña vaha can quita nu tsi ña juvin ñi cuhva can.

19 Maa tyin tsa nyehe ra cuví tsitoho ña tyin ña cua cuvi ca jaha canaa ra naha xuhun tsihin ña, tijn ra naha tsi ra Pablo tsihin ra Silas tan tsindaca ra naha tsi ra naha nda vehe tyiñu. **20** Tan tsicān ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyivi ñuu yo tan jativí ra naha ñuu yo. **21** Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyivi cuenda ñuu Roma cuví yo —catyí ra naha.

22 Tacan tan nduxaan nyivi tsi ra Pablo tan ra Silas. Tan ra cumí tyiñu can tsahnyā ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun. **23** Tsa yahā tsa cañi xaan ra naha tsi ra Pablo tan ra Silas, tan tsindaca ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha. **24** Quihin ra cua jaha cuenda can tyiñu tan tyihí ra tsi ra naha nda tsitsi cuii vehe caa. Tan tyihí vaha ra tsaha ra naha tyañu vitu. **25** Yahā can tan maa ñuu ra Pablo tan ra Silas quitsahā tsicān tahvi ra naha tsi Nyoo. Tan quitsahā tsitá xaan ra naha cantu Nyoo. Tan ra yucú vehe caa can naha ra tyaá soho

ra naha. **26** Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñā tandihi yuvehe, tan ndatsi cadena tsa yihí tsi tandihi ra tsa yucú vehe caa can naha ra.

27 Tan tsa ndoto ra tsa jahá cuenda vehe caa can, nyehe ra tyin ticohó tandihi maa yuvehe can. Tacan tan tava ra mityi ra tyin cua cañi ra tsi ra. Tyin tsicā iñi maa ra tyin tandihi ra tsa yucú vehe caa can quita.

28 Maa tyin ra Pablo canā tsaa ra tsi ra, tan catyí ra:

—Ña cañi un tsi un, tyin tandihi ndi tan yucú ndi ihya —catyí ra tsihin ra.

29 Tacan tan ra jahá cuenda vehe caa can tsicān ra ñuhu. Tan tsinu ra quihvi ra nu yucú ra naha. Tan nihí ra tsihin tsa yuuhvi ra. Tan tsicuiñi tsiti ra nuu ra Pablo tan ra Silas.

30 Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

31 Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihi nyivi un —catyí ra naha tsihin ra jahá cuenda vehe caa can.

32 Tan cahan ra naha tuhun Jutu Mañi yo tsihin ra tan tsihin tandihi nyivi tsa yucú yuvehe ra. **33** Tan juvin ñi maa tsacuaa can ra jahá cuenda vehe caa can nacatyā ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutyā ra tsihin tandihi nyivi ra. **34** Tacan tan tsindaca ra tsi ra naha nda vehe ra. Tan tsahā ra tsa catsi ra naha. Tan maa ra tsihin nyivi ra si xaan cuñi ñi tyin tsinú iñi ñi tsi Nyoo. Tacan tan cuanuhu ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

35 Tsa tuvı inga quıvı tan tava tyiñu ra cumı tyiñu tsi ra vitya na cunyehe ra naha nu nyıı ra jahá cuenda vehe caa can, tan catyı ra naha tyin na jaña ra tsi ra Pablo tsihin ra Silas. 36 Tacan tan ra jahá cuenda vehe caa can catyı ra tsihin ra Pablo:

—Tsaq tyiñu tsi yu jahá ra cumı tyiñu, tsa jaña yu tsi ndo. Yacan cuenda vityin tsa cuvı quita ndo —catyı ra tsihin ra naha.

37 Maa tyin ra Pablo catyı ra:

—Nyuhu tsa cuvı ndi ra cuenda ñuu Roma cañı ra naha tsi ndi nu tuvi nyıvı. Tan ndi ña tatsı tuñı ra naha tsi ndi tumaa cuhva taahán tsi. Tan tyihı ra naha tsi ndi vehe caa. Tan vityin cuñı ra naha tava xeehe ra naha tsi ndi. Maa tyin ña cuñı ndi. Na quıtsı tava maa ra naha tsi ndi —catyı ra Pablo tsihin ra jahá cuenda vehe caa can.

38 Tan ra vitya nacatyı tuhun ra tsihin ra cumı tyiñu naha ra. Tan ra ıcan naha ra nayuhvı xaan ra naha tsa tsıto ra naha tyin ra cuenda ñuu Roma cuvı ra Pablo. 39 Tan tsahán ra cumı tyiñu naha ra tsindacın ra naha tucahnu iñi nuu ra Pablo tan ra Silas. Tacan tan ra cumı tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. 40 Tan tsa quıtı ra naha vehe caa can, tsahán ra naha vehe ña Lidia. Tan yahá can tan tsınyehe ra naha tsi ra hermano naha ra tan jandu iın ra naha iñi ra naha tan cuahán ra naha.

Nu quıtsahá caahán yuhu taha nyıvı ñuu Tesalónica

17 1 Nu cuahán ra Pablo tsihin ra Silas, yahá ra naha ñuu Anfıpolis, tan ñuu Apolonia. Yahá can tan tsaq ra naha ñuu Tesalónica nu nyaá iin vehe ñuhu nyıvı Israel. 2 Tan tsahán ra Pablo vehe ñuhu can, tumaa cuhva tuhvá maa ra tsahán

tan iin tan iin ñuu. Tan cahán ra tuhun Nyoo tsihin nyıvı tsicá vehe ñuhu can uñi taahan quıvı quıtıtú ñi. 3 Tan cahvı ra nu libru Nyoo tan tsahá cuenda ra tuhun ra Cristo tsi ñi nu catyı tsi tyin cua nyehe ra tundoho tan cua cúu ra. Yahá can tan cua nandoto ra. Tan catyı ra tsihin ñi:

—Ra Jesús tsa caahán yu tuhun tsihin ndo juvin ra cuvı ra Cristo.

4 Tan juhva nyıvı Israel can tsınu iñi ñi tsa caahán ra. Tan ndu iın ñi tsihin ra naha. Tan cuaha xaan nyıvı Grecia tsa tuhvá jacahnú tsi Nyoo tan natsınu ndihı iñi ñi. Tan cuaha ñiñaha cuca tsa iyó ñuu can natsınu ndihı iñi ñi tsa caahán ra tuhun ra Cristo. 5 Maa tyin ra ñuu Israel tsa ña tsınú iñi, ndası cuñı ra naha nyehé ra naha tyin cuaha xaan nyıvı nyıcún tsi ra Pablo. Tan jandu iın ra naha tsi taahan ra caquiñi tsa tsicá nuu jutsan ñi maa. Tan quıtsahá caahán yuhu taha nyıvı ñuu can jahá ra naha. Tan quıhvı ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñı ra naha tsa quita ra Pablo naha ra. Tyin ra caquiñi can cuñı ra naha nacuhva cuenda ra naha tsi ra Pablo naha ra tsi nyıvı. 6 Maa tyin tsa ña nañihı ra naha tsi ra Pablo tan ra Silas ıcan, quihın ra naha tsi ra Jasón. Tan ixtı caa ra naha tsi ra. Tan quihın ndihı ra naha tsi taahan ca ra hermano tan cuahán ra naha nuu ra cumı tyiñu ñuu can. Tan caná tsa ra caquiñi can naha ra tan catyı ra naha:

—Ra ihya naha ra cuvı ra tsicá nuu jasaná iñi tandihı nyıvı naniı cahnu ñuhu ñayıvı. Tan vityin tsaq ndihı tucu ra naha ihya. 7 Tan ra Jasón can tsahá ra yuvehe ra na cuyucu ra naha. Tan tandihı maa ra naha tan ña tyaá yahvi ra naha tsi ra cuvı rey cahnu nda ñuu Roma. Tyin catyı ra naha tyin iyó inga rey tsa nañı Jesús —catyı ra naha.

8 Tsa tsıñı nyıvı tan ra cumı tyiñu

tsa caahán ra caquiñi can naha ra quitsaha caahán yuhu tahan ñi.

9 Maa tyin ra Jasón tan inga ra naha tsaha ra naha xuhun tan jaña ra cumi tyiñu tsi ra naha.

Nu cuahán ra Pablo tsihin ra Silas ñuu Berea

10 Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaa ra naha, tsahan ra naha vehe ñuhu nyivi Israel. 11 Tan nyivi Israel tsa iyó ñuu Berea can vaha ca nyivi cuví ñi tan ñavin ca nyivi ñuu Tesalónica tyin tsihin tsa ñi ñi ñi tan naquihin ñi tuhun Nyoo. Tan tandihi quivi nanducú ñi nuu tutu Nyoo, nyehé ñi tatun nditsa tsa caahán ra Pablo.

12 Yacan cuenda cuaha xaan ñi natsinu ñi ñi tsi ra Cristo tsihin tucu nyivi Grecia tahan ñi ñiñaha cuca tan rayi naha ra. 13 Maa tyin tsa tsito ra Israel tsa iyó ñuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhu ra naha tsi nyivi Berea can. 14 Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoo ra naha ñuu Berea. 15 Tan ra tsa cuahán tsihin ra Pablo tsindaca ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahan ra Pablo tsihin ra naha, tyin na janumi ra naha tan cahun ra naha nu nyii ra.

Nu nyii ra Pablo ñuu Atenas

16 Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi aña ra tsa nyehé ra tyin cuaha xaan tsitoho iyó ñuu can. 17 Yacan cuenda cahan ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihi quivi caahán

ra tsihin nyivi tsa cuahán nuyahvi.

18 Tan ñihí tahan ra tsihin nyivi tsa cahví tuhun tsa jacuahá nyivi tsa nañi epicúreo. Tan ñihí tahan tucu ra tsihin nyivi tsa cahví tuhun tsa jacuahá nyivi tsa nañi estoico. Tan cahan ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahan ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua cúu ñi. 19 Tacan tan tsindaca ra naha tsi ra Pablo iin nu nañi Areópago, nu tuhvá ra cumi tyiñu naha ra ndu iin. Tan catyí ra naha tsihin ra:

—Cuñi ndi coto ndi tuhun tsa tsa jacuahá un. 20 Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihi tuhun ihya —catyí ra naha tsihin ra.

21 Tyin tandihi nyivi Atenas tan nyivi inga ñuu tsa iyó ican taahán xaan ñi ñi tyaa soho ñi tan nacatyí tuhun ñi náa ndihi tuhun tsa.

22 Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo. 23 Tyin tsahan yu tsinyehé yu nu tuhvá ndo ndu iin. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvin Nyoo can cuví tsa caahán yu tuhun tsihin ndo. 24 Nyoo tsa javahá ñuhu ñayivi tan tandihi tsa iyó nu ñuhu ñayivi ihya, tsii maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi. 25 Tan ña nyitá ñi

ra tsa jatyinyeé nyiví tsi ra. Tyin maa ra tsahá ñayiví coo tandíhi yo. Tan tsahá ra tatyí tsa ixtá tatyí yo. Tan maa ra tsahá tandíhi tsa tsiñí ñuhu tsi yo. **26** Javahá Nyoo tsi intuhun rayíi. Tan tsa yahá can tsicoo cuaha nyiví tata ra. Tan maa ra naha cuví tsii tsaahnu tandíhi yo. Yacan cuenda intuhun ñi ñiñí nyisó tandíhi yo. Tan tsahá Nyoo tsa coo yo nanií cahnu ñuhu ñayiví. Tsa ndí cumañi ca coo yo tan catyí ra náa cuiya coo intuhun intuhun yo nu ñuhu ñayiví ihya. Tan catyí tucu ra maa nda cua coo intuhun intuhun yo. **27** Tacan javahá ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihí yo tsi ra tyaá ra kuhva. Vasu ndí maa ña cañi nyaá ra tsihin intuhun intuhun yo. **28** Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra. **29** Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinú tsihin xuhun cuaan, a xuhun cuitsin, a tsihin yuu vaha. Tan ndí ñavin Nyoo tsa tsinú tsihin tsa tsiñituñi iñi nyiví cuví ra. **30** Tahán tsanaha Nyoo ña cuxaán ra tsi nyiví tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyiví tandíhi ñi ityi tyin na ndu uvi iñi ñi cuatyí ñi tan na nasama ñi kuhva iyó ñi. **31** Tyin tsa tyaá ra kuhva tyin cua coo iin quiví tsa cua tatsi tuñi ra tsi nyiví iyó nu ñuhu ñayiví. Tan tsa cua tsa quiví can, ra tsa nacatsí vaha maa ra cua tatsi tuñi tsi ñi jaha ra. Tan tsa janahá ra tsi yo tyin nditsa tsa ra ihya cua tatsi tuñi tsi nyiví, tyin janandoto ra tsi ra can nu tsihi ra —catyí ra Pablo.

32 Tsa tsiñí nyiví tuhun tsa nandotó nyiví tsa tsihi, yihí ñi tsacú nducu ñi, tan yihí tucu nyiví catyí ñi: —Quitsi un inga tsaha tan cahan

un tuhun ihya tsihin ndi —catyí ñi.

33 Tacan tan cuahán ra Pablo. **34** Maa tyin yihí ñi ndu iin ñi tsihin ra, tan natsinú iñi ñi tsi ra Cristo. Tan iin ra tsa natsinú iñi, nañí ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañí Dámaris natsinú ndíhi tucu iñi ña, tan tsihin inga ca ñi.

Nu nyíi ra Pablo ñuu Corinto

18 **1** Yahá can tan quita ra Pablo ñuu Atenas tan cuahán ra ñuu Corinto. **2** Tan ican nañihí ra tsi iin ra Israel tsa nañí Aquila. Tan ñuu Ponto cacú ra. Tan maa ra tsihin ñasihi ra, ña Priscila, quita ñi Italia nu tsicoo ñi, tyin ra Claudio, ra cuví rey cahnu ñuhu can, tava ra tsi tandíhi nyiví Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto. **3** Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi. **4** Tan quiví quitatú nyiví Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyiví Israel tan tsihin nyiví tsa ñavin nyiví Israel cuví. Tyin nducú ra kuhva tsa tsinu iñi ñi tsi ra Jesucristo.

5 Tan quiví tsaá ra Silas tan ra Timoteo tsa quee ra naha Macedonia, ra Pablo nacoo ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyiví Israel tyin ra Cristo, tsa ndatú xaan ñi, juvin ra cuví ra Jesús. **6** Maa tyin ñi ican xaan cuñi ñi. Tan quitsahá caahán ñi ndavaha ñi siqui Jutu Mañi yo. Tacan tan ra Pablo naquisí ra jahma ra tumaa iin seña tyin ca ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun tuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñu iñi. Vityin tan ityi

nuu ca cua cuhun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

7 Tan quitā ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra. 8 Tan iin ra tsa nañi Crispo, ra cuví ityi nu vehe ñuhu can, natsinū iñi ra tsi Jutu Mañi yo tan tacan tucu tandihi nyivi ra. Tan cuaha ca nyivi iyó ñuu Corinto can, tsa yahā tsa tsiñi ñi tsa caahán ra Pablo, natsinū iñi ñi tsi ra Jesús, tan tsicoondutyā ñi. 9 Tacan tan iin tsacuaa nyehē ra Pablo iin tsa janahā Nyoo tsi ra. Tan cahān Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandihí un tsa cahan un. 10 Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

11 Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

12 Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsicān ra naha cuatyí tsaha ra nuu ra Galión. 13 Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

14 Tacan tan cuhva tsa cua nacahan ra Pablo, tan nacahān ñi ra Galión, tan catyí ra tsihin ra Israel can naha ra:

—Nyooho ra Israel, cuví jandaa yu cuatyí ra tatun cuatyí cahnu o cuatyí ndiyi cuví. 15 Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehē maa ndo. Jandaa maa ndo tyiñu tyin yuhu ña

cuñi yu cuvi yu juez tsa cuenda tuhun ihya —catyí ra Galión can tsihin ra naha.

16 Tan tava ra tsi ra Israel naha ra nu cuví vehe tyiñu ra. 17 Tacan tan tandihí ra Grecia tiñ ra naha tsi ra Sóstenes, ra cuví ityi nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahān maa ra.

Nu cuanuhú ra Pablo ñuu Antioquía tan cuahán ra tsa tsinu uñi tsaha cua cahan ra tuhun Nyoo

18 Tan ra Pablo ndoo ra ñuu Corinto can cuaha quivi. Yahā can tan catyí ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaā ñi ñuu Cencrea. Tan ra Pablo xatyā ndii ra jiñi ra tumaa iin seña tyin tsa yahā javahā ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria. 19 Tan tsa tsaā yutun ndoo can nda ñuu Éfeso, quitā ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahān ra tsihin nyivi tsa ndu iin ican. 20 Tan cahān ndaahvi ñi tsihin ra tyin na ndoo ra taahan ca quivi tsihin ñi. Maa tyin ña cuñi ra. 21 Tan catyí ra tsihin ñi tyin tsa cuahán ra, tan catyí tucu ra tyehen:

—Cuñi tsi tsa cuhun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñi, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihvi ra tsitsi iin yutun ndoo tsa cuahán nda Siria. 22 Quivi tsa tsaā nyico ra ñuu Cesarea cuenda Siria, tsahān ra ñuu Jerusalén tsicuhvā ra nacumi tsi nyivi yihí cuenda ra Cristo tsa iyó ican. Yahā can tan cuahān nyico ra ñuu Antioquía. 23 Tan tsa yahā tsinyij ra

juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihí nyivi yihí cuenda ra Cristo.

**Nu caahán ra Apolos tuhun
Nyoo ñuu Éfeso**

24 Quivi can tsaá iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru. 25 Tan vaha xaan cutuhva ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyá ra Juan ñi tsitó ra. 26 Tan quitsahá caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tava siin ñi tsi ra tan tsahá cuenda vaha ca ñi tuhun Nyoo tsi ra. 27 Tacan tan quitsahá cuñi ra Apolos cahun ra ityi Acaya. Tan ra hermano jatyinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsaá ra. Tacan tan cuahán ra. Tan cuhva tsa tsaá ra Acaya can, jatyinyee xaan ra tsi nyivi yihí cuenda ra Cristo, ñi tsa natsinú iñi tsa cuenda tumañi iñi tsa javahá Nyoo tsi ñi. 28 Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinú iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

Nu cuahán nyico ra Pablo ñuu Éfeso

19 1 Tsitsi tsa nyíi ra Apolos ñuu Corinto, ra Pablo yaha ra ityi yucu tan tsaá ra nda ñuu Éfeso. Tan ican nañihí ra tsi taahan ra yihí cuenda ra Cristo. 2 Tan tsicá tuhun ra tsi ra naha:

—¿A naquihin ndo Tatyí Ii Nyoo quivi tsa natsinú iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

3 Tacan tan ra Pablo tsicá tuhun ra tsi ra naha:

—¿Nacaa tsicoondutyá ndo? —catyí ra.

Tan nacahan ra naha tan catyí ra naha:

—Cuhva tsa jacoondutyá ra Juan, tacan tsicoondutyá ndi —catyí ra naha.

4 Tacan tan catyí ra Pablo tsihin ra naha:

—Ra Juan jacoondutyá ra tsi nyivi tsa ndu uví iñi cuatyí. Maa tyin catyí tucu ra tsihin ñi tyin cuñi tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

5 Tsa tsiñi ra naha tsa cahan ra Pablo tuhun ihya, tacan tan tsicoondutyá ra naha inga tsaha tsihin sivi Jutu Mañi yo Jesús. 6 Tan tsa tyiso ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsahá caahán ra naha inga yuhu. Tan tsahá cuenda ra naha tuhun tsa tsahá Tatyí Ii Nyoo tsi ra naha tsi nyivi. 7 Tan tsa tandihí ra naha quitá maa utsi uvi taahan ra naha.

8 Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi iñi ra. Tan jacuahá ra tsi ñi na nacuhva ñi tsi ñi tsi Nyoo na cundaca ñaha ra tsi ñi. 9 Maa tyin yihí ñi jandava ñi añima ñi, tan ña cuñi ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyó nyaha ra nu yucú ñi. Tan tsindacá ra tsi ñi tsinú iñi tsi ra Cristo nda iin

escuela ra tsa nañi Tiranno. Tan ican caahán ra tuhun ra Cristo tsihin nyivi tandihí quivi. **10** Tan tacan ni tsicá ra tsitsi tsa uvi cuiya. Tan tandihí nyivi tsa iyó ñuu tsa cayucú Asia, tsiñi ni tuhun Jutu Mañi yo ra Jesús, tahan ni nyivi Israel tan nyivi tsa ñavin nyivi Israel cuví. **11** Tan nahnu tsa iyo javahá ra Pablo jahá Nyoo. **12** Tyin nda cuanda jahma tsa tñn ra Pablo tan tsindacá ni tsi nyivi tan quitá cuehe tsi ni, tan quitá ndihi tucu tatyí ña vaha tsi ni.

13 Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñi ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

14 Tacan javahá tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu. **15** Tan tsa cahán ra can naha ra tsihin nu tatyí ña vaha, nacahán nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan zyóo ra cuví tucu nyooho? —catyí nu tatyí ña vaha can tsihin sehe ra Esceva naha ra.

16 Tacan tan ra tsa yihí tatyí ña vaha can ndavá ra siquí ra can naha ra. Tan tsihin tsa cuaha tunyee iñi nu tatyí ña vaha can tan cuví cunyeé ra tñn tahan ra tsihin tandihí ra can naha ra. Tan tsahnyá cuatyí ra jahma ra naha. Tan jañicueehé ra tsi ra naha. Tan jacuhun tandihí ra tsi ra naha jahá nu tatyí can. **17** Tacan tan tandihí nyivi Éfeso, tahan ni nyivi Israel, tan nyivi tsa ñavin nyivi Israel cuví, tsitó ni tuhun can. Tan yuuhví xaan ni cuví. Tan jacahnú ni sivi Jutu Mañi yo Jesús.

18 Tan cuaha xaan nyivi tsa

natsiny iñi tsi ra Jesús cuahán ni cuanahmá ni cuatyí ni nuu ra tan nuu nyivi, tandihí maa tsa ña vaha tsa ica ni tahan tsanaha. **19** Tan cuaha ni tsa cahvi tuhun tasi, tsindacá ni libru ni. Tan tsahmí ni libru can nuu tandihí nyivi. Tan tavá cuenda ni nácaa yahvi libru can. Tan yahvi tsa tandihí libru can quita tsi uvi xico utsi mil xuhun cuitsin. **20** Tan tacan ni tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

21 Tan tsa yahá tuhun ihya, ra Pablo tyaa ra cuhva tsa cuhun ra ñuu tsa cayucú Macedonia tan Acaya. Yahá can tan cua cunuhu ra nda ñuu Jerusalén, tyaa ra cuhva. Tan catyí ra tyin yahá can tan cuñi tsi tsa cuhun ra nda ñuu Roma. **22** Tacan tan jacuhun ra tsi uvi taahan ra jatyinyeé tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

Nu quitsahá cuvaá nyivi Éfeso

23 Tan juvin ni quivi can quitsahá cuvaá nyivi ñuu Éfeso tsa cuenda tuhun Nyoo, **24** tyin iin ra tsa nañi Demetrio natyuhú ra tsi ni. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatyinyeé tsi ra. **25** Tan caná ra Demetrio can tsi ra tsa jahá tyiñu tsihin ra. Tan caná tucu ra tsi ra tsa jahá tyiñu iin ni tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo. **26** Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can.

Tan cuaha xaan nyivi tsinú iñi tsa caahán nu. **27** Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña. Tan tandihi nyivi ñi cahnu Asia tsihin nyivi naniñ cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

28 Tan cuhva tsa tsiñi ra naha tsa cahan ra, xaan xaan cuñi ra naha. Tan quitsahá caná tsa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

29 Tan cuvaq tandihi nyivi ñuu can. Tan tñin ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihi ñi can ixtá caa ñi tsi ra naha nda cuanda nu tuhvá ñi ndu iín. **30** Tan ra Pablo cuñi ra quihvi ra nu yucú ñi tyin cahan ra tsihin ñi. Maa tyin ra hermano ña tsahá ra naha tsa cahun ra. **31** Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tavá tyiñu ra naha tsi ra tyin ña taahán tsi tyihi ra tsi ra ican. **32** Tan nu ndu iin nyivi ican, juhva ñi caná tsa iin tuhun, tan inga ñi caná tsa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi ican. **33** Tacan tan nyivi Israel tavá tyiñu ñi tsi iin ra tsa nañi Alejandro na yaha ra ityí nuu. Tan juhva ñi tsa yucú ican, tsahá cuenda ñi tsi ra nácaa cua cahan ra. Tacan tan javahá ra seña tsihin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel. **34** Maa tyin cuhva tsa tsito

nyivi tyin ra Israel cuví ra, tandihi maa ñi caná tsa ñi. Tan tsitsi tsa uvi hora caná tsa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsa ñi.

35 Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihi nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa quee andivi tan nacava nu ñuhu ihya.

36 Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo.

37 Tyin ra tsa tsindacá ndo ihya nduve náa tsa suhu ra naha vehe ñuhu yo. Tan ndi ña caahán ra naha ndavaha ñi siqui nyoo yo. **38** Tatun ra Demetrio tan ra tsa jahá tyiñu tsihin ra, tsicán ra naha cuatyí tsa iin ra, na cahun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can. **39** Tan tatun inga tuhun tsicán ndo, cuñi tsi tsa ndaca ndo can tsi ra cumí tyiñu, tumaa cuhva catyí ley. **40** Tyin tatun coto ra ndacá ñaha tan cana ra tsi yo tsa cuenda tsa cuví ihya, tan ña cua ñihi yo tuhun cahan yo tatun ndaca tuhun ra tsi yo nacuenda cuvaá yo —catyí ra cuví secretario can.

41 Tan tsa yahá cahan ra, tacan tan catyí ra tyin na cunuhu ñi nda yuvehe ñi.

Nu yahá ra Pablo Macedonia tan cuahán nyico ra nda Grecia

20 ¹ Tsa yahá tsa cuvaq nyivi ñuu Éfeso can, caná ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee iñi tsi ñi, tyin tsa tsaá quivi tsa cua cahun ra inga ñuu.

Tan cahán ra tsihin ñi. Tacan tan cuahán ra Macedonia. **2** Tan tsahan ra tandihí ityi can tan tsihin tuhun caahán ra jandu ín ra ñi tandihí nyivi yihí cuenda ra Cristo tsa iyó ityi can. Tacan tan tsag ra ityi Grecia. **3** Tan ican ndoo ra ñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaá ñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. **4** Tan cuahán ra Sópater, ra ñuu Berea tsihin ra. Tan cuahán ndihí ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihí ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo. **5** Ra hermano ihya yahá ra naha ityi nuu tan ndatú ra naha tsi ndi nda ñuu Troas. **6** Tan nyuhu ndatú ndi nda tsa yahá vico pascua nu tuhvá nyivi Israel tsatsí paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahan ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

Nu caahán ra Pablo tuhun Nyoo ñuu Troas

7 Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun ñi ndi tyin tsihi ra Cristo tsa cuenda cuatyí yo. Tan ra Pablo caahán ra tsihin ñi, tan tahañ ñuu, tyin tsa nyaá tsa cuhun ndi inga quivi can. **8** Yucú ndi iin cuarto nu tsinu ñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú. **9** Tan iin ra tyuvaa tsa nañí Eutico nyaá ra

ventana tyaá soho ra, maa tyin ña cunyeé ñi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Quee ra nda nu tsinu ñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihi ra. **10** Tacan tan ra Pablo nuu ra tan tsag ra nu canyí ra tyuvaa can. Tan tyihí jucun ndaha ra tsi ra tyuvaa can, tan catyí ra tsihin tandihí ra hermano naha ra:

—Ña nayuhvi ndo, tyin ra ihya nyito ra —catyí ra.

11 Tacan tan ndaa nyico ra Pablo tan tsatsí ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra. **12** Tan ra tyuvaa can nandoto ra tan cuanuhu ra nda yuvehe ra. Tan si xaan cuñí ñi cuví.

Nu quita ra Pablo ñuu Troas tan cuahán ra nda ñuu Mileto

13 Nyuhu yahá ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahan ndi tsihin ra Pablo, tyin tacan jandaa maa ndi tyiñu tsihin ra, tyin maa ra cuñí ra cuhun ra ityi nu ñuhu tsihin tsaha ra. **14** Tan tsa ñihí tahan nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene. **15** Tsa quita ndi ñuu can tacan tan yahá ndi ityi nuu iin ñuhu luhlu tsa nañí Quío, canyí tsi mahñu ndutya ñuhu. Tan tsa inga quivi can tsag ndi inga ñuhu luhlu tsa nañí Samos. Yahá ndi ican tan tsag ndi ñuu Trogilio nu quitatu ndi. Tan tsa inga quivi tsag ndi nda ñuu Mileto. **16** Tacan cuví tyin ra Pablo ña cuñí ra tsa cunyi naha ra ityi Asia. Tan ña cuñí ra cuhun ra ñuu Éfeso tyin numi ñi cuñí ra tsa ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

17 Tan tsa yucú ndi ñuu Mileto, cana ra Pablo tsi ra cuví ityi nuu tsihin nyivi yihí cuenda Nyoo ñuu Éfeso. 18 Tan tsa tsaá ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaá nuu yu Asia ihya. 19 Tandíhi quivi tsa tsinyij yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuihya iñi nyehe yu. Tan cuaha tundoho quitsi síqui yu jahá nyivi Israel.

20 Maa tyin ña jandíhi yu tsa caahán yu tuhun Nyoo tsihin ndo. Tyin yacan cuví tandíhi tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iín ndo tan nda yuvehe ndo.

21 Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu iñi ñi tsi Jutu Mañi yo, ra Jesucristo. 22 Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu ndacan. 23 Maa tyin intuhun ñi tsa tsitó yu tyin tandíhi ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu. 24 Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa síi cuñi yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuahá yu tuhun vaha nácaa cuñi maa Nyoo tsi yo.

25 "Tan vityin tsitó vaha yu tyin tandíhi nyooho tsa cahan yu tuhun Nyoo tsihin ndo, ña cua nyehe ca ndo

tsi yu. 26 Yacan cuenda cuñi yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo. 27 Tyin ñiñi cuñi yu tan cahan yu tandíhi tuhun Nyoo tsihin ndo tan nduve náa tsa tyihí xeehe yu. 28 Yacan cuenda jaha cuenda ndo tsi ndo. Tan jaha cuenda ndíhi ndo tsi tandíhi nyivi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jata ra tsi ñi tsihin ñiñi ra. 29 Tan tsitó yu tyin quivi cuhun yu, cua quitsi inga ra naha. Tan cua cuñi ra naha jatívi ra naha tsi nyivi yihí cuenda Jutu Mañi yo. Tumaa lobo xaan tsa tsahíi tsi mbee, tacan cua quitsi ra can naha ra. 30 Tan juvin ñi nu yucú ndo, cua nduvita taahan ra. Tan cua jacuahá ra naha tsi ndo tuhun tsa ña nditsa tyin cunycun ndo tsi ra naha.

31 Yacan cuenda jaha vaha ndo cuenda. Ndúcuhan iñi ndo tyin tsitsi tsa uñi cuiya ña jandíhi yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñi yu, coto nacoo ihñi ndo tuhun Nyoo.

32 "Tan vityin nyooho yañi, tyaá yu tsi ndo ndaha Nyoo. Naquihin vaha ndo tandíhi tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandíhi inga nyivi tsa nacuhva cuenda tsi ñi tsi ra. 33 Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo. 34 Nyooho tsitó vaha ndo tyin jahá tyiñu xaan yu tsihin ndaha yu tan ñihí yu tsa tsiñi ñuhu tsi yu tsihin ra tsicá tsihin yu naha ra. 35 Tacan ñi janahá yu tsi ndo tyin cuñi tsi tsa jaha tyiñu ndo tan jatyinyee ndo tsi nyivi iyó náa tsa tsiñi ñuhu tsi ñi. Tan ndúcuhan iñi ndo tsa caahán Jutu Mañi yo Jesús,

nu catyí ra tyehen: “Sii ca cuñí nyívi tsa tsahá, tan ñavin ca nyívi tsa ñihí ndaahvi” catyí Jutu Mañi yo.

36 Tsa yahá tsa cahán ra Pablo tuhun ihya, tsicuiñi tsiti ra. Tan tsican tahvi ra tsihin tandihi ra naha.

37 Tan tandihi ra naha nducuihyá xaan iñi ra naha tan tsacú xaan ra naha. Tan tsinumí nyaa ra naha tsi ra. **38** Tyin ra Pablo catyí ra tyin cua cuhun ra inga ñuu tan ña cua cuhun ca ra nu yucú ra naha. Tacan tan tsindaca ra naha tsi ra nda nu quihvi ra tsitsi yutun ndoo.

Nu cuahán ra Pablo ñuu Jerusalén

21 ¹ Tacan tan nacoó ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyí mahñu ndutya ñuhu. Tan tsa inga quívi tsaá ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara. ² Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi. ³ Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yahá ñi ndi cuahán ndi ityi nu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can. ⁴ Tan tsa nañihí ndi tsi nyívi yihí cuenda Nyoo ñuu can, ndoo ndi tsihin ñi utsa quívi. Tan catyí ñi tsihin ra Pablo tyin ña taahán tsi tsa cuhun ra ñuu Jerusalén tyin tacan cahán Tatyí Ii Nyoo tsihin ñi. ⁵ Maa tyin tsa quita utsa quívi can, quita ndi ñuu can. Tan nu cua quita ndi tandihi ra hermano naha ra tsihin ñasihi ra naha tan tsihin sehe ra naha tsindaca ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñi tsiti ndi, tan tsican tahvi ndi tsi Nyoo. ⁶ Tacan tan tsinumí nyaa tahan ndi tsi ndi. Tsahan quihvi ndi

tsitsi yutun ndoo. Tan ra hermano can naha ra cuanuhu ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsahá ndi nacumi tsi nyívi yihí cuenda ra Cristo. Tan ndoo ndi tsihin ñi iin quívi. ⁸ Tan tsa inga quívi quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyívi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra. ⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi. ¹⁰ Tan tsa cuaha ñi quívi tsa yucú ndi ican, tan tsaá iin ndusu yuhu nyoo tsa quee nda Judea. Nañi ra Agabo. ¹¹ Quitsi nyehe ra nu yucú ndi. Tan quihin ra cinturón ra Pablo, tsáhñi ra tsaha ra tan ndaha ra, tan catyí ra:

—Tatyí Ii Nyoo catyí tsihin yu tyin tyehen cua cunuhni tsitoho cinturón ihya nda ñuu Jerusalén. Tan cua cuhva cuenda nyívi Israel tsi ra tsi ra inga ñuu naha ra —catyí ra Agabo.

¹² Tsa tsiñi ndi tsa caahán ra, nyuhu tan ra ñuu Cesarea naha ra caahán ndaahvi ndi tsihin ra Pablo na ña cuhun ra ñuu Jerusalén. ¹³ Maa tyin ra Pablo catyí ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhni yu, ndi maa cahni ra naha tsi yu, maa tyin cuhun yu tyiñu tsa cuenda Jutu Mañi yo Jesús —catyí ra tsihin ndi.

¹⁴ Tan tsa nyehe ndi tyin ña cuví tsa jahá ndi tsi ra, jaña ndi. Tan catyí ndi:

—Na cuvi maa cuhva cuñi Jutu Mañi yo.

¹⁵ Tsa yahá yacan na ica vahá ndi tsi ndi tan cuahán ndi nda ñuu Jerusalén. ¹⁶ Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra

ñuhu Chipre. Nañi ra Mnason. Cuaha xaan cuiya tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyií ra Jacobo

17 Tsa tsaq ndi ñuu Jerusalén, nyivi yihí cuenda ra Cristo sii xaan cuñi ñi caahán ñi tsihin ndi. 18 Tan inga quivi can cuahán ndi tsihin ra Pablo cua nyehe ndi nu nyií ra Jacobo. Tan ican yucú tucu tandihi ra cuví ityi nuu tsihin nyivi vehe ñuhu. 19 Tsaḥa ra Pablo nacumi tsi ra naha. Yahā can tan nacatyí tuhun ra tandihi nácaa tsatyíñu Nyoo tsi ra nu cahan ra tuhun Nyoo tsihin nyivi tsa ñavin nyivi Israel cuví. 20 Tsa tsiñi ra naha tuhun ihya, jacahnú ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihi ñi catyí ñi tyin taahán tsi tsa javaha yo cuhva catyí ley tsa tyaq ra Moisés. 21 Tan ñihí tuhun ñi tyin yooho jacuahá un tsi tandihi nyivi Israel tsa iyó inga ñuu tyin na ña cuita ca iñi ñi ley tsa jacuahā ra Moisés, tan catyí tucu un tsihin ñi tyin ña cuñi ca tsi tsa cunyaa tuñi Nyoo tsi sehe yii ñi, tan ndi ña cua javaha ca ñi tuhun tsahnu cuhva tsa iyó maa yo tahanan tsanaha. 22 ¿Nacaa javaha yo vityin? Tyin nyivi cua ñihi tuhun ñi tyin tsaq un ihya. 23 Vaha taxin ca tsa javaha un tsa cua cahan ndi tsihin un. Ihya iyó cumi taahan rayii tsa nyaá javaha tsa catyí ra tsihin Nyoo tyin cua javaha ra naha. 24 Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndii ra naha jiñi ra naha cuhva catyí ley. Tan tsa javaha un tacan, tan coto tandihi nyivi tyin ña nditsa tsa caahán ñi siqui un, tyin cua nyehe ñi tyin ña nacoq un ley tsa

tyaq ra Moisés. 25 Tan tsa cuenda nyivi tsa ñavin nyivi Israel cuví, tan tsinú iñi ñi tsi ra Cristo, tsa jacuhn ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyivi tsi tsitoho. Ndi ña cua catsi ñi ñiñi quiti, tan ndi cuñu quiti tsa cava ñi jucun tan ña tsati ñiñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayii —catyí ra tsahnu vehe ñuhu can naha ra tsihin ra Pablo.

Nu quitsahā caahán yuhu tahanan nyivi Israel siqui ra Pablo

26 Tacan tan tsa tuví inga quivi tan cuahán ra Pablo tsihin tandihi tsa cumi taahan ra can naha ra. Tan janduvahā ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundihí tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo. 27 Tacan tan tsa cuñi ndihí tsa utsa quivi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaq xaan tandihi nyivi jahā ra naha, tan tiñn ra naha tsi ra Pablo. 28 Tan caná tsa ra naha tan catyí ra naha:

—Nyooho nyivi Israel, jatyinyee ndo tsi ndi. Juvn ra ihya cuví ra tsa tsicá nuu tandihí ñi ityi. Tan jacuahá ra tsi tandihí nyivi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaq ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatívá ra naha —catyí ra naha caná tsa ra naha.

29 Tacan catyí ra naha tyin nda nu quitsi tsi nyehe ra naha tsi ra Pablo tsitsi ñuu, tsicá nuu ra tsihin iin ra

ñuu Éfeso tsa nañi Trófimo. Tan cuñi maa ra naha tyin ra Pablo tsindaca tsi ra tsitsi vehe ñuhu. **30** Tan tandihi nyivi ñuu quitsaha cuvaá ñi. Tan tsinú xaan ñi tsaá ñi. Tacan tan tñin ñi tsi ra Pablo. Tan ixta caa ñi tsi ra cua ndaca ñi ityi tsata vehe ñuhu, tan numi ñi nacasi ñi yuvehe ñuhu can. **31** Tsa cuñi cahñi ñi tsi ra, tan ñihí tuhun ra comandante cuenda andaru tyin tandihi nyivi ñuu Jerusalén iyo xaan caahán yuhu tahan ñi. **32** Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jaña ñi tsa cañi ñi tsi ra Pablo. **33** Tacan tan natuhva ra comandante can nu nyii ra Pablo. Tan tava tyiñu ra tsi andaru naha ra tyin na tñin ra naha tsi ra, tan na cuhñi ra naha tsi ra tsihin uvi taahan cadena. Yaha can tan tsica tuhun ra comandante can tsi ra yoo ra cuví ra, tan náa javaha ra. **34** Maa tyin nyivi siin siin tuhun caná tsaá ñi. Tan ra comandante can ña cutuñi maa iñi ra tsa cuenda tsatyin ñihi xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo nda vehe nu yucú andaru. **35** Cuhva tsa tsaá ra naha nu cuayi vehe can, tan quitsaha nducaña nyivi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra. **36** Tyin tandihi ñi nycún ñi tsi ra naha, tan caná tsaá ñi tan catyí ñi:

—¡Na cúu ra! —catyí ñi.

Nu juven ñi maa ra Pablo jacacú tsi ra nuu nyivi

37 Cuhva tsa cua tyihi ra naha tsi ra Pablo tsitsi vehe can, tan quitsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego?

38 Tun tacan caa, ñavin yooho cuví ra ñuu Egipto tsa quitsi quivi can tan jacañi tahan ra tsi nyivi siqui ra ndaca ñaha tan tava ra cumi mil ra tsahñi ndiyi tsindaca ra tsi ra naha ityi ñuhu ityi —catyí ra comandante can tsihin ra Pablo.

39 Tacan tan ra Pablo catyí ra tsihin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnu ityi Cilicia. Maa tyin jaha tumañi iñi cuhva un ndatu cahan yu luxu tsihin nyivi —catyí ra Pablo tsihin ra comandante.

40 Tacan tan tsa tsaha ra comandante can ndatu tsi ra, nduvita nyityi ra nu cuayi can tan javaha ra iin seña tyin na cutaxin ñi. Tan tsa cutaxin nyivi quitsaha caahán ra tsihin yuhu hebreo, tan catyí ra:

22 ¹ —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyivi can.

² Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacu yu ñuu Tarso tsa canyii Cilicia. Maa tyin Jerusalén ihya tsahnu yu. Tan ra Gamaliel jacuaha ra tsi yu náca tyaa yahvi yu ley tsii tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa ñi iñi yu, tumaa tsa javahá ndo vityin ihya. ⁴ Yuhu, nu quitsi tsi tsinyaa ndaha yu tsi nyivi yihf cuenda ra Cristo. Tan tsindaca yu tsi ñi tsa cúu ñi. Tan cuaha ñi rayi tan ñaha tñin yu tsa cuhun ñi tsitsi vehe caa. ⁵ Ra jutú tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra

ican naha ra tsahā tutu tsi yu tyin cuví t̄in yu tsi ra yañi yo, ra yihí cuenda ra Cristo ñuu Damasco. Tsahān yu ican tsinanducy yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi ñi nda ñuu Jerusalén ihya tyin tatsi tuñi ra tsahnu naha ra tsi ñi.

Nu nacatyí tuhun ra Pablo nácaa natsinū iñi ra tsi ra Cristo

(Hechos 9:1-19; 26:12-18)

6 'Maa tyin cuhva tsa cuahán yu ityi tsa cua tsaá yu ñuu Damasco, maa ora cuví tsi. Tan sana iñi yu tan ndunditsin tanñi cahnu nu cuahán yu jahā iin ñuhū tsa quitsi ityi andivi. 7 Tacan tan nduvā yu nu ñuhu. Yahā can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenda nyaá ndaha un tsi yu?” catyí ndusu can tsihin yu. 8 Tacan tan tsicā tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra. 9 Tandihí ra tsa cuahán tsihin yu nyehe ra naha ñuhū can, tan nayuhvi xaan ra naha. Maa tyin ña tsiñi ra naha ndusu tsa cahān tsihin yu. 10 Tacan tan quitsahā caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cūhun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu. 11 Tan cuaā yu jahā ñuhū can, yacan cuenda ra tsa cuahán tsihin yu t̄in ra naha ndaha yu tan cuahán ndi nda ñuu Damasco.

12 'Tan ican iyó iin ra tsa nañi Ananías. Tan jacahnú xaan ra tsi Nyoo cuhva catyí ley tsa tyaā ra Moisés. Tan tandihí nyivi Israel tsa iyó ñuu Damasco catyí ñi tyin vaha

xaan iñi ra. 13 Tsahān ra can tsinyehe ra tsi yu. Tan cuhva tsa tsaā ra, catyí ra tsihin yu: “Yañi Saulo, nanyehe inga tsaha” catyí ra tsihin yu. Tan juven ñi cuhva can tan nanyehe yu. Tan cuví nyehe yu tsi ra. 14 Tan catyí ra tsihin yu: “Nyoo cuenda jutu yo nacatsi ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra. 15 Tyin yooho cua cahan un tuhun ra nuu tandihí nyivi. Cua nacatyí tuhun un tsa nyehe un tan tsa tsiñi un. 16 Tan vityin, ña cuatu ca un. Nduvita tan cōndutya un. Tan ndācan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsahā Nyoo tyiñu tsi ra tyin cuhun ra inga ñuu cucahan ra tuhun ra Cristo

17 'Yahā can tan vatsi nuhu yu ñuu Jerusalén ihya tan cuhva tsa tsaā yu, tsahān yu vehe ñuhu cahnu tsindacan tahvi yu tsi Jutu Mañi yo. Tan janaha ra iin tsa nyehe yu. 18 Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyivi tuhun yu tsa cahan un” catyí ra tsihin yu. 19 Tacan tan quitsahā caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahān yu tandihí vehe ñuhu. Tan t̄in yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. 20 Tan quivi tsa tsihi ra Esteban ra tsa cahān cuenda un, yuhu nyii ndihí yu ican. Tan ndoo yu vaha tsa tsahñi ra naha tsi ra. Tan jahā cuenda yu jahma ra can naha ra” catyí yu tsihin Jutu Mañi yo. 21 Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

**Nu nyaá ra Pablo ndaha ra
comandante cuenda ñuu Roma**

22 Tyaá soho ñi yacan ña tan
quitsaha caná tsa ñi tan catyí ñi:

—¡Cahñi ndo tsi ra! Tyin ña taahán
ca tsi tsa coo ra ñayivi —catyí ñi.

23 Tan caná tsa ca ñi. Tan javicó
ñi jahma ñi. Tan javitá ñi nyahyu nu
tatyí tsa cuenda tsa xaan xaan cuñí
ñi. 24 Yacan cuenda ra comandante
can catyí ra tsihin ra andaru can naha
ra tyin na cundaca ra naha tsi ra
Pablo tsitsi vehe can. Tan catyí ra
tyin na cañi ra naha tsi ra, tyin tacan
tan cua cahan ra tsa nditsa nacuenda
tsa caná tsa nyivi tsata ra. 25 Maa
tyin tsa yahá tsañi ra naha tsi ra tan
cua cañi ra naha tsi ra, tacan tan ra
Pablo cahán ra tsihin ra capitán tsa
nyaá nyityi ican tan catyí ra:

—¿A iyó ndatu tsi nyooho tsa cañi
ndo tsi yu? Tan yuhu ra cuenda ñuu
Roma cuví yu tan inga tucu tuhun,
ñaha ca jaquee yuhu ra juez tsi yu,
tan cuñí ndo cañi ndo tsi yu —catyí
ra Pablo tsihin ra.

26 Tsa tsiñi ra capitán tsa caahán ra
Pablo, tsañan ra tsijacotó ra tsi ra cuví
comandante. Tan catyí ra tsihin ra:

—Jaha cuenda tsi un tsihin tsa
javahá un. Tyin ra can, ra ñuu Roma
cuví ra —catyí ra tsihin ra.

27 Tacan tan ra comandante can
cuahán ra nu nyí ra Pablo. Tan tsicá
tuhun ra tsi ra tatun nditsa tyin ra ñuu
Roma cuví ra. Tan ra Pablo catyí ra:

—Juvín.

28 Tacan tan catyí ra comandante
can tsihin ra:

—Yuhu cuaha xaan xuhun tyahví
yu tan cuví cuu yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu
tsa cuenda jutu yu —catyí ra.

29 Tacan tan andaru tsa cua cañi tsi
ra jatsiyó nyaha ra naha tsi ra naha
nu nyí ra Pablo. Tan nda cuanda ra
comandante tan nayuhví ra tsa cuenda

tsa tsañi ra tsi ra tsihin cadena. Tyin
tsa javahá ra tsa tacan tsihin iin ra
ñuu Roma cuatyí cuví can.

**Nu tsañan ra Pablo nu ndu iin ra
ñuu Israel naha ra**

30 Tan tsa tuví inga quivi can tan
ra comandante can cuñí ra coto ra
náa cuatyí tyaá nyivi Israel tsi ra
Pablo. Tan jañá ra tsi ra Pablo. Tan
tava tyiñu ra na ndu iin tandihi ra
jutu tsa cuví ityi nuu naha ra, tan
tsihin tandihi ra cumí tyiñu cuenda
nyivi Israel. Tacan tan tava tyiñu ra
na quita ra Pablo vehe caa tan cuhun
ra nu iyó junta can.

23¹ Tan ra Pablo nyehe ra tsi
tandihi ra tsa ndu iin can
naha ra, tan catyí ra tsihin ra naha:

—Nyooho yañi, tandihi quivi nda
cuanda vityin nducú yu cuhva javaha
yu cuhva cuñi Nyoo. Yacan cuenda
vaha cuñi yu —catyí ra Pablo.

2 Tacan tan ra Ananías, ra jutu
tsaahnu tsa yihí ndaha tsi inga ca ra
naha, tava tyiñu ra tsi ra nyecú yatyin
ñi nu nyaá ra Pablo, na cañi ndaha ra
naha yuhu ra. 3 Tan ra Pablo nacahan
ra tan catyí ra:

—¡Jihna ca tsi maa un cua cañi
Nyoo, tyin jahá xaan un tyin ra vaha
cuví un nyaá un juvin! ¿A cutuñi yu
nuu un tumaa cuhva catyí ley?

¿Nacuenda tsa tava tyiñu un na cañi
ra naha tsi yu? Tan ñavin tacan catyí
ley —catyí ra Pablo.

4 Tacan tan ra nyecú ican catyí ra
naha tsihin ra:

—Ña vaha tsa caahán un tacan
tsihin ra jutu tsaahnu tyin cahnu cuví
ra nuu Nyoo —catyí ra naha tsihin ra
Pablo.

5 Tacan tan ra Pablo catyí ra:

—Yañi, ña tsitó yu tatun ra ihya
cuví ra jutu tsaahnu. Tyin catyí tuhun
Nyoo tyin ña cahan nyaa yo tsi ra
yihí ndaha ñuu yo —catyí ra.

6 Tacan tan tuví iñi ra Pablo tyin
juhva ra cuenda junta can naha ra,

yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahān ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsí tuñí ndo tsi yu tsatyin tsinú ñi yu tyin nyivi tsa tsihi nandoto ñi —catyí ra Pablo.

7 Cuhva tsa cahān ra tuhun ihya, ra tsa cuví fariseo naha ra tan ra saduceo naha ra, quitsahā caahán yuhu tahan ra naha tan natahvi sava ra naha. 8 Tyin ra saduceo catyí ra naha tyin ña cua nandoto nyivi tsa tsihi. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú ñi ra naha tandihi tuhun ihya. 9 Tandihí ra naha quitsahā caná tsa ra naha. Tan nduvitā juhva ra cuví maestro cuenda ley tsa tyaā ra Moisés tsa cutahán tsihin ra fariseo naha ra, tan catyí ra naha:

—Nyēhe ndo, nduve tsa ña vaha javahá ra ihya, tyin tatun ángel cahān tsihin ra, jaha yo cuenda tyin ña vaha cahan yo siqui Nyoo —catyí ra naha.

10 Tsa tsiñi tandihí ra naha yacan, quitsahā nduvaá nyico ra naha. Nda cua nayuhvi ra comandante can coto cahnya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. 11 Tan tsacuaa can quituvi Jutu Mañi yo nuu ra Pablo tan catyí ra tsihin ra:

—Jandu iin ñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

**Nu ndoo ra Israel naha ra tyiñu tyin
cua cahñi ra naha tsi ra Pablo**

12 Tsa inga quivi, juhva ra Israel natuhun tahan ra naha tan ndoo ra

naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha. 13 Yaha uvi xico ra naha ndoo ra naha tyiñu ihya. 14 Tsañān ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahān ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi. 15 Tan vityin nyooho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsa ra ihya, cua cahñi ndi tsi ra —catyí ra naha tsihin ra jutu naha ra.

16 Maa tyin sehe cuhva ra Pablo tsiñi ra tsa natuhun tahan ra naha. Tan tsañān ra vehe andaru nu nyii ra Pablo tsiatyí tuhun ra tsihin ra. 17 Tacan tan ra Pablo canā ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

18 Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyii vehe caa canā ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

19 Tacan tan ra comandante tiin ra ndaha ra luhlu can tan tava siin ra tsi ra tan catyí ra tsihin ra:

—¿Náa cuñi un cahan un tsihin yu?

20 Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo. **21** Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahān ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihī maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

22 Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuñu ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañí Félix

23 Tacan tan ra comandante cana ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cuhun ndo ñuu Cesarea cuhva caa iin tsa tsacuaa. Cua cuhun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza.

24 Janduvaha ndo cuayu coso ra Pablo. Tan jaha cuenda vaha ndo tsi ra ityi cuhun ndo na tsa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

25-26 Tacan tan javahā ra iin carta cundaha ra naha nacuhva ra naha tsi ra Félix. Tan tuhun tsa tyaā ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ihya vatsí nacumi tsi un.

27 Ra Pablo ihya, tiñn ra Israel

naha ra tsi ra. Tan cuñi ra naha cahñi ra naha tsi ra. Maa tyin cuhva tsa tsitō yu tyin ra ñuu Roma cuví ra, tsahan yu tsihin andaru tan jacacu yu tsi ra. **28** Tan cuñi yu coto yu náa cuatyí tyaá nyivi tsi ra, tsindaca yu tsi ra nu iyó junta tandihī ra cuví mandoñi nyivi Israel. **29** Tan nyehe yu tyin xaan xaan cuñi nyivi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa. **30** Maa tyin ñihī tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihī ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa javahā ra.

31 Tacan tan quihñn ra naha tsi ra Pablo tumaa cuhva catyí ra Claudio tsihin ra naha, tan juvin ñi tsacuaa can tsindaca ra naha tsi ra nda ñuu Antípatris. **32-33** Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaā nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaā ra naha, nacuhva ra naha carta can tsi ra Félix, tan tsahā cuenda ndihī ra naha tsi ra Pablo tsi ra. **34** Tsa yahā tsa cahvi ra Félix carta can, quitsahā tsicá tuhun ra tsi ra Pablo nu maa cuví ñuu ra. Tan tsa tsitō ra tyin ra Cilicia cuví ra. **35** Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahañ tsanaha.

Nu cutuñí ra Pablo nuu ra Félix

24 ¹ Yahá uhun quívi tan ra Ananías, ra jutu tsaahnu tsa yihí ndaha inga ca ra jutu, tsaá ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyívi cuví ra. Tsaá ra can naha ra nuu ra Félix tyin cua ndacan ra naha cuatyí tsaha ra Pablo. ² Tacan tan tava tyiñu ra Félix na quítsi ndaca andaru tsi ra Pablo. Tacan tan quítsahá tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyívi ñuu ndi. ³ Nacuhvá xaan ndi tyahvi nyoo tsi yooho tata Félix, tyin vaha xaan iñi un. ⁴ Tan ña cuñí yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu. ⁵ Tyin tsitó ndi tyin rayi ihya ñavin ra vaha cuví ra. Tandíhi ñi ityi jacuvaá ra tsi nyívi Israel. Tan juvin ra cuví ityi nuu tsihin nyívi tsa nyicún tsi ra Jesús ra ñuu Nazaret. ⁶ Tan cuñí ra javaha ra tsa ndavaha ñi tsitsi vehe ñuhu cahnu. Tan yacan cuenda tñin ndi tsi ra, tyin tatsi tuñi ndi tsi ra tumaa cuhva catyí ley maa ndi. ⁷ Maa tyin ra Licias, ra cuví comandante ñihi xaan tyasi ra tan quihin nyaa ra tsi ra tsi ndi. ⁸ Tan catyí ra tyin tun cuñí ndi ndacan ndi cuatyí tsaha ra, cuñí tsi tsa cahan jihna ndi tsihin un. Yacan nyehé maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹ Tacan tan ra Israel tsa yucú ican, catyí ra naha tyin tandíhi maa tsa caahán ra Tértulo tan nditsa. ¹⁰ Tacan tan ra Félix janahá ndaha ra nu nyaá ra Pablo tyin nacahan ra. Tan ra Pablo quítsahá caahán ra tan catyí ra:

—Siñ xaan cuñí yu tyin nuu maa un cua cutuñi yu vityin tyin tsitó yu tyin

tsa cuaha xaan cuiya ndacá ñaha un tsi nyívi iyó ñuu ihya. ¹¹ Tatun cua nducu tuhun un, cua coto un tyin tsa iyó ñi utsi uvi quívi tsa tsañan yu ñuu Jerusalén tsijacahnú yu tsi Nyoo.

¹² Tan ña cahán yuhu tahan yu tsihin ndi intuhun nyívi. Tan ndi ña jacuvaá yu tsi ñi tsitsi vehe ñuhu cahnu. Nduve maa náa javahá yu tandíhi ca vehe ñuhu, tan ndi inga ca ityi tsitsi ñuu. ¹³ Tan cuatyí tsa tyaá ra ihya naha ra siqui yu, ña nditsa. Tyin tandíhi maa tsa caahán ra tan ñavin tsa nditsa cuví tsi. ¹⁴ Maa tyin tsa cua catyí yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnú tsi tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandíhi tsa nyaá nu libru ley tsa tyaá ra Moisés, tan tsinú iñi yu. Tan tandíhi tsa tyaá ra cuví ndusu yuhu Nyoo tan tsinú iñi yu. ¹⁵ Tan tsinú iñi yu tumaa tsa tsinú iñi ra ihya naha ra tyin nyívi tsa tsihi cua nandoto ñi inga tsaha, tahan ñi nyívi vaha tan nyívi caquiñi. ¹⁶ Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyívi.

¹⁷ Tan tsa yahá juhva cuiya tsa tsicá yu tandíhi ñi ityi, tsahan tsaá nuhu yu nda Israel ñuu yu tyin nacuhva cuenda yu xuhun tsa tsahá nyívi tsi yu tsi nyívi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. ¹⁸ Yacan javahá yu tsitsi vehe ñuhu cahnu. Tan tsa yahá tsa janduvahá yu tsi yu tumaa catyí ley ndi, tan juhva ra Israel ra tsa quee ityi Asia, nyehé ra naha tsi yu ndacan. Maa tyin nduve nyívi cuaha yucú, tan nduve náa javahá ñi. ¹⁹ Tan ra tsa nyehé tsi yu ndacan naha ra, taahán tsi tsa quítsi maa ra naha cahan ra naha náa cuví tsa javahá yu o náa cuatyí tyaá ra naha siqui yu. ²⁰ Tatun ña tacan, na

catyi tuhun ra tsa nyecú ihya naha ra tatun náa iin cuatyí yu nañihî ra naha quivî janahmâ ra cuvî ityi nuu tsihin nyivî Israel naha ra tsi yu. **21** ¿A ñavin cuenda tsatyin cahān yu iin tuhun tsihin ra tsa yucú junta can? Tan catyí yu: “¿A tatsí tuñi ndo tsi yu tsa cuenda tyin tsinú iñi yu tsa nandoto nyivî tsa tsihî?” —catyí ra Pablo.

22 Tan tsa tsiñî ra Félix tsa cahān ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyí ra.

Cahān ra tacan tyin tsitó ra nácaa cuahán tuhun nyivî nyicún tsi ra Cristo.

23 Tacan tan tavā tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyí ra, tan cahan ra naha tsihin ra.

24 Tsa yahā juhva quivî tan tsaq nyico ra Félix inga tsaha tsihin ña Drusila ñasiñhi ra. Tan ñaha Israel cuvî ña. Tan tavā tyiñu ra na quitsi ra Pablo tyin cuñí ñi tyaa soho ñi nácaa tuhun tsa tsinú iñi ra tsi ra Jesucristo.

25 Tan ra Pablo quitsahā caahán ra tuhun nácaa taahán tsi javaha yo tsa vaha cuhva cuñí Nyoo, tan ña cuvî javaha yo tsa ña vaha tsa cuñí cuñu ñuhu yo. Tan coo quivî cua tatsi tuñi Nyoo tsi tandihî nyivî. Tan ra Félix nayuhvî xaan ra, tan catyí ra tsihin ra:

—Cyaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

26 Tan ra Félix cuñí maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra. **27** Tan tsa yahā uvî cuiya, tacan tan nacosq tyiñu tsi ra Porcio Festo tyin cundaca

ñaha ra. Tyin tsa quitā ra Félix. Tan ra Félix ña cuñí ra tsa cahan nyivî Israel tsi ra, yacan cuenda nacoq ra tsi ra Pablo vehe caa.

Nu jandaá ra Festo cuatyí ra Pablo

25 **1** Tan tsa quihvî ra Festo tsa cua jaha tyiñu ra, tacan tan tsa tsinu uñi quivî quitā ra ñuu Cesarea can tan cuahán ra nda ñuu Jerusalén. **2** Tan tsa tsaq ra ñuu Jerusalén, tacan tan tsaq ra jutu tsa cuvî ityi nuu, tan ra cumí tyiñu tsa yihf ndaha tsi nyivî Israel. Tan tsicān ra naha cuatyí tsaha ra Pablo. **3** Tan tsicān ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucahñi ra naha tsi ra Pablo ityi cua quitsi ra. **4** Maa tyin ra Festo nacahān ra, tan catyí ra:

—Ra Pablo nyí ra vehe caa nda ñuu Cesarea. Tan yuhu tyaá yu cuhva tsa yatyi ñi cua cunuhu nyico yu.

5 Yacan cuenda, nyoocho tsa cuvî ndo ra cumí tyiñu ñuu ihya, cuvî cuhun ndo tsihin yu, tan ndacan ndo cuatyí tsaha ra tatun iyó tsa ña vaha javahā ra —catyí ra Festo tsihin ra naha.

6 Tacan tan ra Festo ndoo ra ñuu Jerusalén una quivî o utsi quivî ñi tan cuanuhū nyico ra nda ñuu Cesarea. Tan tsa inga quivî tsaq ra tsitsi vehe tyiñu ra tan tsinyaq ra tsa cua tatsi tuñi ra tsi ra iyó cuatyí naha ra. Tacan tan tavā tyiñu ra na quitsi ra Pablo.

7 Cuhva tsa quihvî ra Pablo, nu yucú ra naha natuhvā ra Israel tsa quee nda ñuu Jerusalén, tan quitsahā tyaá ra naha cuatyí cahnu siquî ra. Maa tyin nduve tsandaa tavā ra naha. **8** Tacan tan cahān ra Pablo tan catyí ra:

—Yuhu ndi intuhun cuatyí ñaha ca javaha yu, ndi siquî ley nyivî Israel, ndi siquî vehe ñuhu cahnu ñuu Jerusalén, ndi siquî ra cuvî rey cahnu tsa nyaá ñuu Roma —catyí ra.

9 Maa tyin ra Festo cuñí ra coo vaha ra tsihin ra Israel naha ra, yacan cuenda tsicā tuhun ra tsi ra Pablo:

—¿A cuñí un cuhun un ñuu Jerusalén tyin jandaa yu tyiñu un ndacan? —catyí ra tsihin ra.

10 Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javahā yu tsi nyivi Israel.

11 Tun tsatyin javahā yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

12 Tacan tan ra Festo, tsa yahā tsa natuhun tahan ra tsihin ra jatyinyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyí tuhun ra Festo tuhun ra Pablo tsihin ra Agripa

13 Tsa yahā juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyí ra Festo tyin cua cuhva ñi nacumi tsi ra.

14 Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoq ra tsi iin ra vehe caa ihya. 15 Tan tsa tsahan yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsicān ra naha cuatyí tsaha ra can nuu yu tyin na cuhva yu ndatu tsa cúu ra. 16 Tan yuhu catyí yu tsihin

tandihi ra naha tyin ña tuhvá ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi. 17 Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yahā tsicunyaā yu tan canā yu tsi ra can. 18 Maa tyin ra tyaá cuatyí siqui ra, nduve náa tuhun ñiñi cahan ra naha. Tsa cuñí maa yu tyin cahnu cuatyí cua tyaa ra naha siqui ra. 19 Maa tyin tuhun tsa cahan ra naha cuví tsa cuenda cuhva iyó maa ra naha cuhva tsinú iñi ra naha. Tan cahan ra naha tuhun ra tsa nañí Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra. 20 Tan tsa ña ñihí yu nácaa tatsi tuñi yu tsi ra tsa cuenda tuhun can, tsicā tuhun yu tsi ra tan catyí yu tsihin ra tatun cuñí ra cuhun ra cutuñi ra nda ñuu Jerusalén. 21 Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuanda cuvi jacuhun yu tsi ra nuu ra Augusto —catyí ra Festo tsihin ra Agripa.

22 Tacan tan ra Agripa catyí ra tsihin ra Festo:

—Cuñí tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

23 Tsa inga quivi can tan tsaa ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndihi tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo. 24 Tacan tan quitsahā catyí ra Festo:

—Yooho Rey Agripa, tan nyooho

tata, tsa yucú ndo ihya. Nyeghe ndo tsi ra ihya. Tandíhi ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandíhí ra naha tsa catyí ra naha tsihin yu tyin taahán tsi cúu ra. **25** Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. **26** Maa tyin nduve náa cuatyí ra ñañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tavá yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. **27** Tyin ña vaha tsa jacuhún yu tsi ra tatun nduve náa tuhun caahán yu náa cuatyí javahá ra.

Nu quitsahá caahán ra Pablo nuu ra rey Agripa

26 ¹ Tacan tan ra Agripa catyí ra tsihin ra Pablo:
—Cuví cahan un vityin —catyí ra tsihin ra.

Tan ra Pablo jandaá ra ndaha ra tan catyí ra tyehen:

2 —Sii xaan cuñí yu tyin cuví cahan yu nuu yooho, rey Agripa, tan cuví catyí yu tsihin un nácaa tandíhi cuatyí tsa tyaá ra Israel naha ra siquí yu. **3** Tyin yooho tsitó un tandíhi tuhun tsa iyó yo tsa cuví yo nyívi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyí tuhun ra Pablo tsihin ra Agripa nácaa ñayívi tsicoo ra tsa ndi cumañi ca quíhví ra cuenda ra Cristo

4 ¹ Tandíhi nyívi Israel tsitó ñi nácaa tsicoo yu nda ñuu yu quívi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén. **5** Cuaha xaan cuiya nacotó ñi tsi yu. Tatun

cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaa yahvi ley tsahnu yo tan ñavin ca tandíhi nyívi. **6** Tan vityin cuñí nyívi Israel tatsi tuñi ñi tsi yu tsa cuenda tyin tsinú ñi yu tsa cua janandoto Nyoo tsi nyívi tsa tsihi, tumaa catyí ra tsihin tsii tsaahnu yo naha ra tahan tsanaha. **7** Tandíhi nyívi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyívi tsa tsihi. Tan yacan cuenda ña jandíhí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaa ra Israel naha ra cuatyí siquí yu vityin, yooho rey Agripa. **8** ¿A ña tsinú ñi nyooho tyin Nyoo cua janandoto ra tsi nyívi tsa tsa tsihi?

Nu tsahá cuenda ra Pablo tsi ra Agripa cuhva tsinyaá ndaha ra tsi nyívi yihí cuenda ra Cristo

9 ¹ Tahan tsanaha juvin ñi maa yu tsicá ñi yu tyin vaha tsa tatsi tuñi yu tsi nyívi tsinú ñi tsi ra Jesús, ra ñuu Nazaret. **10** Tan tacan javahá yu nda ñuu Jerusalén tsihin ndatu tsa tsahá ra jutu tsa cuví ityi nuu naha ra. Tan cuaha nyívi tsa tsinú ñi tsi ra Cristo tyihí yu vehe caa. Tan tatun tsahíi ra naha tsi ñi, vaha xaan cuñí yu. **11** Tan cuaha xaan tundoho nyehe ñi jahá yu. Tan nducú yu cuhva jañiñi yu tsi ñi na jaña ñi tuhun tsa tsinú ñi ñi tsi ra Jesús. Tacan javahá yu tandíhi maa vehe ñuhu nyívi Israel. Javahá yu tacan tsa cuenda tsa xaan cuñí yu nyehé yu tsi ñi. Tan tandíhi inga ñuu tsahan yu tsinyaá ndaha yu tsi ñi.

Nu nacatyí tuhun nyico ra Pablo nácaa nanduví ra, ra yihí cuenda ra Cristo

(Hechos 9:1-19; 22:6-16)

12 ¹ Tan tsa cuenda yacan cuahán yu nda ñuu Damasco quívi can tyin tsahá ra jutu tsa cuví ityi nuu naha ra

ndatu tsi yu. **13** Maa tyin ityi cuahán yu kuhva ora cuví tsi, yooho Rey.

Tan quítsi ñuhŷ ityi síqui. Tan jandunditsin tsi nu cuahán yu tsihin tandíhi ra tsa cuahán tsihin yu. Maa tyin yaha ca nditsin tsi tan ñavin ca ñuhŷ ñicanyii. **14** Tacan tan tandíhi ndi nduvá ndi nu ñuhu. Tan tsiñi yu iin ndusu tsa caahán tsihin yu, tsihin yuhu yo, tan catyí tsi tsihin yu:

“Saulo, Saulo, ¿nacuenda nyaá ndaha un tsi yu? Tumaa iin quití tsañi nyaa tí tsata tsa xaan tsa jaquihín ityi ra tsi tí, tacan javahá un tyin juvin ñi tsi maa un jañicueehé un”, catyí ndusu can tsihin yu. **15** Tacan tan catyí yu: “¿Yóo yooho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un. **16** Ndúvita nyityi. Tyin quituvŷ yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca. **17** Yacan cuenda vityin jacuhún yu tsi un nu iyó nyívi tsa ñavin nyívi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyívi tsa ñavin nyívi Israel cuví. **18** Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndíhi tucu ñi tsa vaha tsa tsahá Nyoo tsi nyívi tsa nacuhvá cuenda tsi ñi tsi yu”, catyí Jutu Mañi yo tsihin yu.

19 Yacan cuenda yooho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu. **20** Tacan tan tsa jihna ñi quítsahá caahán yu tuhun ra nda ñuu Damasco. Yahá can tan cahán yu tsihin nyívi ñuu Jerusalén tan tandíhi ca ñuu tsa cayucú Judea. Tan caahán ndíhi yu tsihin nyívi tsa ñavin nyívi

Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyívi tsa tsinú iñi tsi ra Cristo. **21** Tan tsa cuenda tuhun ihya tñin ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu. **22** Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandíhi nyívi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán yu. **23** Tyin catyí ra naha tyin taahán tsi tsa cua nyehe ra Cristo tundo. Tan tsa yahá tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyívi tyin cua jacoto ra nácaa cua cacu ñi, tahan ñi nyívi Israel tan nyívi tsa ñavin nyívi Israel cuví —catyí ra Pablo.

Nu nducú ra Pablo kuhva tsa tsinu iñi ra rey Agripa tsi ra Cristo

24 Cuhva tsa catyí ra Pablo tuhun ihya, ra Festo caná tsa ra, tan catyí ra:

—¡Jiñi yooho ña vaha cuñi, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

25 Maa tyin ra Pablo catyí ra tsihin ra:

—Ñavin iñi yu ña vaha cuñi, yooho tata Festo. Tyin tsa caahán yu, maa ñi tsa ndítsa tan tsa vaha cuví tsi.

26 Ihya nyaá ra rey Agripa. Tan tsító vaha ra tuhun ihya. Yacan cuenda ña yñi caahán yu tuhun yu tsihin ndo. Tyin tsító yu tyin tsító tucu maa ra tuhun ihya, tyin ñavin tuhun xeehe cuví tsi. **27** Yooho rey Agripa, ¿a tsinú iñi un tuhun tsa tyaa ra cuví ndusu yuhu Nyoo tahañ tsanaha? Yuhu tsító yu tyin tsinú iñi un —catyí ra Pablo tsihin ra Agripa.

28 Tacan tan ra Agripa catyí ra tsihin ra:

—¿A cuñí yooho tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

29 Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndiñi tucu iñi tandiñi nyivi tsa yucú tyaa soho tsa caahán yu ihya. Intuhun ñi tsa ña cuñí yu, tsa quihí cadena ndaha ndo tumaa maa yu vityin —catyí ra Pablo.

30 Tsa yahá tsa cahan ra Pablo tuhun ihya, nduvitá rey tan ra ndacá ñaha tan ña Berenice, tan tandiñi ra yucú ican naha ra. 31 Tan tsa yahá quitá ñi, tan quitsahá natuhún tahan ñi:

—Nduve cuatyí ra ihya tsa ñihi xaan. Ña taahán tsi cúu ra. Tan ndi ña taahán tsi cunyií ca ra vehe caa —catyí ñi.

32 Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsicān ra tsa cutuñi ra nuu ra cuví rey cahnu —catyí ra.

Nu jacuhun ra Festo tsi ra Pablo nda ñuu Roma

27 ¹ Quivi tsa tyaa ra Festo tan ra Agripa cuhva tyin jacuhun ra naha tsi ndi nda ñuu Roma tsa canyí Italia, nacuhvā cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto. ² Tan cuahán ndiñi tucu ra Aristarco tsihin ndi. Ra tsa quee ñuu Tesalónica tsa canyí ityi Macedonia cuví ra. Tacan tan quihvī ndi tsitsi iin yutun ndoo tsa quee ñuu Adramitio tyin tsa yatyin cuii cuhun nyico tsi ñuu tsa cayucú Asia yatyin ñi yuhu ndutya ñuhu. ³ Tsa inga quivi tsaā ndi puerto Sidón.

Tan ra Julio vaha nyivi cuví ra tsihin ra Pablo. Tan tsahā ra tsa cuhun ra Pablo nu iyó ra vaha iñi tsi ra ñuu can tan jatinyee ra naha tsi ra.

⁴ Yahá can tan quitá ndi ñuu Sidón tan jandaa ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yahá tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can. ⁵ Tacan tan yahá sava ndi nu ndutya ñuhu ityi nuu Cilicia tan Panfilia, tan tsaā ndi iin ñuu tsa nañi Mira tsa canyí Licia. Tan quitá ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi. ⁷ Cuaha quivi tsicā ndi tyin cuee ñi cuahán ndi. Tsihin tundoho tan tsaā ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsahā tsi tsa cuhun ca ndi ityi nuu, tan yahá ndi yatyin ñi ñuu Salmón tsa canyí ñuhu Creta. Tan navico ndi ityi yuhu ñuhu Creta. ⁸ Nducū ndi cuhva tsa cuhun ndi yuhu ndutya ñuhu, maa tyin tsihin tundoho tan tsaā ndi nu nañi Buenos Puertos yatyin ñi ñuu Lasea.

⁹ Tsa cuaha xaan quivi yahá tyin cuee xaan tsicá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yahá quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsahā cuenda ra tsi ra jacacá yutun ndoo can naha ra, ¹⁰ tan catyí ra:

—Tandiñi nyoooho ra yucú ihya, tyā soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin tandiñi tsa

nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

11 Maa tyin ra capitán cuenda andaru can tyaq yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo.

12 Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyí juvin ñi ñuhu Creta ihya. Yacan cuví iin nu vaha cunyaa yutun ndoo tyin ña ñihi xaan yihí tatyí tyin ñuu can canyí tsi tsiyo cana ñicanyii —catyí ra naha.

Nu ñihi xaan yihí tatyí nu ndutya ñuhu

13 Tacan tan quitsahá yihí luxu tatyí tsa quitsí ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can. 14 Ña cuaha ñi tsicá ndi tan quitsahá yihí tatyí xaan tsa quitsí ityi norte. Tan tandahá tsi yutun ndoo inga ityi. 15 Tan ña cuví ca cuhun ndi ityi nuu ca tsa cuenda tatyí can. Tan jañá ndaha ndi na cuhun maa yutun ndoo tsihin tatyí ndáa ityi cuñí maa tsi. 16 Tan yaha ndi ityi tsata iin ñuhu luhlu tsa nañí Clauda tyin ña ñihi xaan yihí tatyí ityi can. Tan tsihin tundoho naquihín ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya. 17 Tan tsa yaha natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsahñi ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañí

tsi Sirte. Yacan cuenda januu ra naha jahma yutun ndoo can tan tsahá ra naha tsa cuhun tsi cuhva tandahá tatyí. 18 Tan tsa inga quiví juvin ñi ñihi xaan yihí tatyí. Yacan cuenda quitsahá tyihí ra naha carga tsa yihí tsitsi yutun ndoo can nuu ndutya ñuhu. 19 Tan tsa tsinu uñi quiví quihín ndi ndaha tyiñu yutun ndoo can tan tyihí ndi nu ndutya ñuhu. 20 Tan cuaha quiví ña nyehé ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaq ca ndi cuhva tsa cua cacu ndi.

21 Cuaha quiví yaha tan ña tsatsí ndi. Tacan tan catyí ra Pablo tsihin tandihí ra naha:

—Nyehe ndo, vaha ca tun tsatyin tyaq yahvi ndo tuhun tsa cahan yu quiví can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo. 22 Tan cua cunaa ndihi yutun ndoo ihya, maa tyin ña caca iñi ndo tyin ndi intuhun yo tan ña cua cúu yo. 23 Tyin Nyoo cuví ra yihí ndaha tsi yu, tan jahatyíñu yu tyiñu ra, juvin ra janahá ra iin tsa janahá tsi yu cuñi. Tan quituví iin ángel nuu yu. 24 Tan catyí ángel can tsihin yu: “Ña nayuhvi un, Pablo. Tyin cuñí tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu. 25 Yacan cuenda nyooho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuví tumaa cuhva catyí ángel can tsihin yu. 26 Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

27 Tan tsa ndihi tsahun quiví tsa tsicá ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu

cuví cuhva can tan tuvī iñi ra jacacá yutun ndoo can naha ra tyin cua tsaa ndi iin ñuhu. **28** Tacan tan tyihī cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihī cuhva ra naha inga tsaha. Tan iyó oco utsa metru. **29** Tan yuuhví ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cuhun ca tsi ityi nuu. Tan tsa cuñí ra naha tsa cunditsin. **30** Tan ra jacacá yutun ndoo can naha ra tyaq̄ ra naha cuhva cunu xeehe ra naha. Tan yacan cuenda quitsahā januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. **31** Maa tyin ra Pablo jacoto ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuvi cacu ndo —catyí ra tsihin ra naha.

32 Tacan tan andaru tsahnyā ra naha yoho yutun ndoo luhlu can. Tan jacanacavā ra naha can nu ndutya. **33** Tan tsa naa ca ra Pablo catyí ra tsihin tandihī ra naha:

—Tsa iyó utsi cumi quiví tsa ña tsatsí ndo tan ña quixí ndo. **34** Catyí yu tsihin ndo, catsi ndo vityin. Ñiñi xaan cuñí tsi tsa catsi yo tyin tacan tan ndunyeecũ ñuhu yo. Tyin cua cacu yo tan ndi intuhun ixi jiñi yo tan ña cua cunaa.

35 Tan tsa catyí ra Pablo tuhun ihya, quihīn ra iin paan tan nacuhvā ra tyahvi nyoo tsi Nyoo nuu tandihī ra naha. Tacan tan tahvī ra tan quitsahā tsatsí ra. **36** Tacan tan tandihī ra naha ndu iin ca iñi ra naha tan tsatsj̄ ndihī ra naha. **37** Tan tsa tandihī ndi tsa yucú ndi tsitsi yutun ndoo can, quitā uvi cientu uñi xico tsahun iin ndi. **38** Cuhva tsa ndihī

tsatsj̄ ra naha cuhva cuñí ra naha tan jacuhun ra naha yit̄in tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaa tsi yatyin ñi yuhu ndutya.

Nu nyeē yutun ndoo

39 Yahā can tan cunditsj̄n. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaq̄ ra naha cuhva nyehe ra naha tatun cuví jacuhun ra naha yutun ndoo ican. **40** Tsahnyā ra naha yoho tsa nuuhñi caa vee can. Tan nacoq̄ ra naha can tsitsi ndutya ñuhu. Tan jandutayā ra naha vitu tsa janavicó yutun ndoo. Tacan tan jandaq̄ ra naha jahma tsa tuhvā ticaá ityi nuu tsi. Tan quitsahā quihīn tatyí jahma can, tan jacuhún tsi yutun ndoo nda nu iyó nyiti can. **41** Tan tsaq̄ tsi nu tatahán ndutya. Tan nyeē jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsahā tahví cuatyí can tsa cuenda tsa ñihi xaan cañi ndutya ñuhu can. **42** Tacan tan andaru cuñí ra naha cahñi ra naha tsi ra cuahán cua cutuñi naha ra tyin coto cunu ra naha. **43** Maa tyin capitán andaru cuñí ra jacacu ra tsi ra Pablo. Yacan cuenda ña tsahā ra tsa cahñi ra naha tsi ra can naha ra. Tan catyí ra tyin ndáa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi. **44** Tan tandihī ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahvī cuatyí jahā ndutya ñuhu. Tan tacan cacu tandihī ndi tan quitā ndi ñuhu ityi.

Nu nyií ra Pablo ñuhu Malta

28 ¹ Cuhva tsa tsa yahā cacu ndi tan catyí nyiví iyó ñuhu can tyin nu yucú ndi can nañi tsi Malta, o Melita. ² Tan vaha xaan natuhún ñi

tsihin ndi. Tan jatahan ñi ñuhu tyin cuún savi tan vitsin xaan. Tan catyí ñi tsihin tandihí ndi, na natuhva ndi yuhu ñuhu can tyin quita tsa vitsin tsi ndi. ³ Tacan tan ra Pablo naquihín ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsí yihí ti ndaha ra, tan ticaá tsico ti ndaha ra. ⁴ Cuhva tsa nyehe nyivi ñuhu can tyin ticaá coo can ndaha ra, quitsaha natuhún tahan ñi tan catyí ñi:

—Ra ihya nyivi tsahñi ra, tun cuví, tyin vasu cacú ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyí ñi.

⁵ Maa tyin ra Pablo naquisí ra tsi coo can, tan canacava ti nu ñuhu, tan nduve náa tahan ra. ⁶ Tandihí ñi ndatú ñi náa kuhva ndaa nu tyaá ti, a náa kuhva cua cúu ra. Maa tyin tsa yaha ndatú xaan ñi, tan nyehe ñi tyin nduve maa náa tahan ra. Tacan tan nasama ñi kuhva tsicá iñi ñi, tan quitsaha catyí ñi:

—Ra ihya cuví iin nyoo —catyí ñi.

⁷ Yatyin ñi can canyí ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra. ⁸ Tan jutu ra ñihi xaan cuuhví ra tsihin cahñi tan tsa tsiyó ra. Tan tsahan ra Pablo tsinyehé ra nu canyí ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvaha ra. ⁹ Yaha can tan quitsaha tsaá cuaha nyivi cuuhví tsa iyó ñuu can. Tan nduvaha ndihí ñi. ¹⁰ Tan tandihí ñi vaha xaan tyanuú ñi tsi ndi. Tan quivi quihví ndi tsitsi iin yutun ndoo tsa cua kuhun ndi, tsaha ñi tandihí tsa cua cutyiñu ndi ityi kuhun ndi.

Nu tsaá ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quihví ndi tsitsi iin

yutun ndoo tsa quee nda ñuu Alejandría tsa canyí nu cuví Egipto. Tan ndoo tsi Malta nda yaha yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux. ¹² Tan tsaá ndi ñuu Siracusa. Tan ican ndoo ndi uñi quivi. ¹³ Tacan tan quita ndi tan cuahán ndi ityi yuhu ndutya ñuhu nda cuanda tsaá ndi ñuu Regio. Tan tsa inga quivi can ñihi xaan yihí tatyí tsa quitsí ityi sur tan tsica ndi uvi quivi tan tsaá ndi ñuu Puteoli. ¹⁴ Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma. ¹⁵ Tan nyivi yihí cuenda ra Cristo ñuu Roma can ñihí tuhun ñi tyin cua tsaá ndi. Tan tsahan ñi tsijatahan ñi tsi ndi ityi. Juhva ñi ndatú tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi, nacuhva ra tyahvi nyoo tsi Nyoo. Tan ndu iin ca iñi ra. ¹⁶ Cuhva tsa tsaá ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsaha ra can tsa coo siin ra Pablo. Tan jahá cuenda intuhun ñi andaru tsi ra.

Nu caahán ra Pablo tuhun Nyoo ñuu Roma

¹⁷ Tsa yaha uñi quivi tsa tsaá ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan kuhva tsa ndu iin ra naha, quitsaha catyí ra tsihin ra naha:

—Nyooho yañi, vasu nduve náa javaha yu tsi nyivi Israel tahan yo, tan ndi nduve náa javaha yu siquí tuhun tsahnu kuhva iyó yo, maa tyin tsaha cuenda ra Israel naha ra. Tan tsi yu tsi ra ñuu Roma naha ra. Tan tsinyiñi yu vehe caa ñuu Jerusalén ndaha ra ñuu Roma naha ra. ¹⁸ Tan tsa jaquee yuhu ra naha tsi yu, cuñi ra naha

jaña ra naha tsi yu. Tyin ña taahán tsi cúu yu tyin nduve cuatyí javaha yu. **19** Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu síqui ra naha. **20** Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhñí yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyí ra Pablo.

21 Tacan tan catyí ra Israel naha ra tsihin ra Pablo:

—Ña tsitó ndi tuhun yooho. Tan yoñi jacoto tsi ndi, ndi tsihin carta, tan ndi ra ñuu yo tsa quee nda Judea ña cahán ra naha tuhun yooho, tan nduve náa cahán ra naha síqui un. **22** Maa tyin cuñí ndi tyaa soho ndi tuhun tsicá iñi un. Tyin tsitó ndi tyin tandíhi ñi ityi tan caahán nyivi síqui tuhun tsa ihya —catyí ra Israel naha ra tsihin ra Pablo.

23 Tacan tan natuhun tahan ra naha ndaa quivi cua cuhun ra naha inga tsaha. Tsa tsaá quivi can, tsaá cuaha nyivi nu iyó ra Pablo. Tan quitsaha caahán ra nda tsa tuví tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javaha ra Pablo tyin cuñí ra tsa tsinu iñi ñi tsi ra Jesús. **24** Yihí ñi tsinú iñi ñi tsa caahán ra. Tan inga ñi ña tsinú iñi ñi. **25** Tan ña iin tsicá iñi ñi, sñin sñin tuhun caahán ñi. Tan quitsaha tsinuhú ñi. Tan ra Pablo catyí ra tsihin ñi:

—Nditsa tsa cahán Tatyí Ii Nyoo tsihin ra Isaías ra cuví ndusu yuhu ra

tahan tsanaha, tyin na cahan ra tsihin tsii tsaahnu yo. Tan catyí ra:

26 Cuaahan tan cahán un tyehen tsihin nyivi ihya:

Nyooho cua cuñi ndo tuhun

Nyoo, maa tyin ña cua cutuñi iñi ndo.

Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

27 Tyin añima ñi tsa ndundava xaan tsi.

Tsiñí ñi, maa tyin ña tyaá yahvi ñi.

Tan ndasí tinuu ñi, tyin tacan tan ña cua cuví nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñí ñi quihvi ñi tsitsi ndaha yu na janduvaha yu tsi ñi.

Tacan catyí ra Isaías jahá Tatyí Ii Nyoo tahan tsanaha.

28 'Coto vaha nyooho tyin vityin tan ityi nuu ca cuhun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi ñi. Tan maa ñi cua tyaa soho ñi —catyí ra Pablo tsihin ñi.

29 Cuhva tsa catyí ra Pablo tyehen, ra Israel cuahán ra naha juven ñi caahán yuhu tahan ra naha tsa cuenda tuhun tsa cahán ra Pablo tsihin ra naha.

30 Uvi cuiya ndoo ra Pablo vehe nu nyii ra cuenda yoo ñuu Roma can. Tan vaha caahán ra tsihin tandíhi nyivi cuahán vehe ra. **31** Tan tsihin tsa ñi iñi ra tan caahán ra tuhun nácaa ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasí nu caahán ra.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsahā tyaá ra Pablo carta

1 ¹ Yuhu ra Pablo cuví yu iin ra jahá tyiñu tyiñu ra Jesucristo. Canā Nyoo tsi yu, tan nacatsi ra tsi yu tyin caca yu jacoto yu tuhun tsa jacacú ra tsi yo tsi nyivi. ² Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaá ra naha nu tutu ra. ³ Juvín tuhun ihya caahán tyin Jutu Mañi yo Jesucristo, Sehe Nyoo, quitsi ra nu ñuhu ñayivi tan nanduví ra tumaa maa yo. Tan cuví ra tata ra rey David. ⁴ Tan Nyoo jacoto ra tsi yo tsihin Tatyí li ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. ⁵ Tan tsa cuenda ra Jesucristo tsahā Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó naniñ cahnú nu ñuhu ñayivi tsi ra tan na tyaá yahvi ñi tsi ra. ⁶ Tan juhva ñi ican cuví tucu nyooho tyin tsa nacatsi ra Jesucristo tsi ndo tyin cuvi ndo nyivi cuenda ra.

⁷ Jaquitsí yu carta ihya tsi tandihí nyooho tsa iyó ñuu Roma. Nyoo cuñí xaan ra tsi ndo tan canā ra tsi ndo tyin cuví ndo nyivi ra tan jacahnú ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

**Nu catyí ra Pablo tyin cuñí ra cuhun
ra ñuu Roma**

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyooho tyin tandihí ñi ityi caahán nyivi tyin tsinú xaan iñi ndo tsi ra Jesucristo. ⁹ Jahá

tyiñu yu tyiñu Nyoo tsihin tsa ñi iñi añima yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰ Tan tsicán yu tsi ra na cuvi cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu. ¹¹ Tyin cuñí yu jatyyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihí ca ndo tsi ra. ¹² Tsa cuñí yu cahan yu tsihin ndo cuví tuhun ihya: tsa jandú iin tahan yo iñi yo tsihin tsa tsinú iñi yo tsi ra.

¹³ Yañi, cuñí yu tsa coto ndo tyin cuaha xaan tsaha cuñí yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñí yu quitsi yu ñuu ndo tyin cuñí yu cahan ca yu tuhun Nyoo tsihin nyivi tyin tacan tan nducuaaha ca ñi tsinu iñi tsi ra, tumaa javahā yu tsihin nyivi inga ca ñuu. ¹⁴ Tyin tsa ñiñi cuñí tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho. ¹⁵ Yacan cuenda, cuñí yu cahan yu tuhun ra Cristo tsihin nyooho tsa iyó ndo Roma ihya.

Tuhun Nyoo iyó xaan tunyee iñi itsi

¹⁶ Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahan ndi tuhun ra Cristo, maa tyin vityin caahán ndihí tucu ndi tsihin

nyivi tsa ñavin nyivi Israel cuví. 17 Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvin ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyivi tsa janduvahá Nyoo añima, iyó ñi ñayivi tsa tsihin tsa tsinú iñi ñi tsi ra.”

Tandihi nyivi tan iyó cuatyí ñi

18 Nyehé yo tyin Nyoo, ra nyaá gloria, tatsí tuñi ra tsi nyivi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyivi tsa nditsa. 19 Tsitó ñi tsa iyó Nyoo tyin juvin ñi maa ra janahá can tsi ñi. 20 Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihi tsa javahá ra. Tsanaha javahá ra ñuhu ñayivi tan yacan janahá tsi yo tyin iyó Nyoo tan iyó tunyee iñi tsi ra. Nyivi tsa ña cuñí coto tsi Nyoo ña cua coo tucahnu iñi tsi ñi. 21 Vasu ndi maa tsitó ñi tsa iyó Nyoo tsihin tsa nyehé ñi tandihi tsa javahá ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayivi tyaá jiñi ñi. Tan tsa cuenda yacan ndusohó ñi. 22 Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. 23 Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyivi tuhvá tsihi, tan nda cuenda tsitoho tsa caá tumaa caá saa, tan coo, tan quití iyó cumi tsaha. 24 Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihi tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu. 25 Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa

javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuví tsi tacan.

26 Yacan cuenda jañá ndaha Nyoo tsi ñi na javaha ñi tsa tsahá ticanuu tsi ñi. Tyin nda cuenda ñiñaha tan tsicoó ñi tsihin ñi nduyii, tan ña vaha tacan. 27 Tan juvin ñi tacan javahá tucu rayii, nacoó ra naha tsa iyó ra naha tsihin ñasiihi ra naha, tan iyó ra naha tsihin ra ndusiihi naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

28 Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñí maa ñi. 29 Tyin tandihi nuu tsa ña vaha javahá ñi. Ñiñaha tsicoó ñi tsihin rayii tan ña tindahá ñi. Rayii tsicoó ra naha tsihin ñaha tan ña tindahá ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñi ñi nyivi. Cañi tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu. 30 Caahán ñi ndavaha ñi síqui inga nyivi. Ndasí cuñí ñi nyehe ñi tsi Nyoo. Caahán nyaá ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi. 31 Ña cuñí ñi cutuñi iñi ñi. Ña javahá ñi tsa catyí ñi tyin cua javaha ñi. Ña cuñí maa ñi tsi ndi intuhun nyivi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyivi. 32 Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihi ñi tsa javahá ñi can, tan tatun inga nyivi javahá tacan, sii xaan cuñí ñi.

**Tatsí tuñi Nyoo tsi nyivi maa
tyin tsihin tsa nditsa**

2 ¹ Nyooho tsa nyehé cuatyí tsa javahá inga nyivi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñi ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi. ² Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra. ³ Nyooho tsa jacutuñi tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo. ⁴ ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo. ⁵ Maa tyin nyooho jandavá xaan ndo añima ndo. Tan ña cuñi ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa. ⁶ Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. ⁷ Nyoo cua cuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñi ñi coo cuii ñi tsihin ra. Cua ñihi ñi tandihi yacan tyin nanducú ñi can. ⁸ Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha. ⁹ Cuaha xaan tundoho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví. ¹⁰ Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva

ra tsa taxin coo añima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

¹¹ Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndi intuhun yo. ¹² Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can. ¹³ Tyin nyivi tsa javahá cuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi. ¹⁴ Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi. ¹⁵ Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsiñi tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi. ¹⁶ Tacan cua cuvi quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

**Nyivi Israel nyicún ñi ley Nyoo
tsa tyaá ra Moisés**

¹⁷ Maa tyin nyooho nyivi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyivi Nyoo cuví ndo. ¹⁸ Tan tsitó ndo cuhva cuñi Nyoo tan ley can janahá tsi tsi ndo tsa nacatsí ndo tsa vaha. ¹⁹ Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsín ndo nu yucú nyivi nu naa, cuñi maa ndo. ²⁰ Tan cuñi tucu ndo tyin tsitó ndo

tandîhi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo. **21** Tatun tsitó ndo jacuahá ndo tsi inga nyivi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo? **22** Juvín ñi catyí ndo tyin ña vaha coo inga ñaha tsi iin rayîi, o inga rayîi tsi iin ñaha, ¿nacuenda tyin maa ndo javahá ndo tacan? Ndasî cuñî ndo nyehe ndo tsitoho, ¿nacuenda tyin suhú ndo ndaha tyiñu tsa iyó tsitsi vehe ñuhu can? **23** Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. **24** Yacan cuenda catyí tuhun Nyoo tyehen: “Nyivi tsa ñavin nyivi Israel cuvî, caahán ñi ndavaha ñi siquî Nyoo tsacatyî nyooho.”

25 Nditsa tyin circunción tsa cuvî tuñi Nyoo, tsa janahá tyin cuvî yo nyivi ra, cuvî jatyinyee tsi tsi ndo. Jatyinyeé tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. **26** Maa tyin rayîi tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can. **27** Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo. **28** Vasu ndi maa cuvî ndo nyivi Israel tan nyisó ndo tuñi ra, ña cuvî cuvî ndo nyivi Nyoo tun nduve ley ra iyó añima ndo. **29** Tyin nyivi iyó ley Nyoo añima, ñi ican cuvî nyivi Nyoo. Tyin maa Tatyî li Nyoo tyaá tuñi ra añima ñi, tan ñavin cuñu ñuhu ñi. Tatyî li Nyoo javahá can, ñavin ley tsa tyaá ra Moisés. Nyivi ihya cua cuvî nyivi vaha nuu Nyoo, tan ñavin nuu nyivi.

3 **1** ¿Nacaa jatyinyeé tsa cuvî yo nyivi Israel tsi yo? ¿O nácaa jatyinyeé tuñi Nyoo tsi yo? **2** Cuaha

cuhva jatyinyeé tsi tsi yo. Iin cuhva jatyinyeé tsi tsi yo tyin Nyoo tsahá ra ley maa ra tsi yo tsa cuvî yo nyivi Israel. **3** ¿Náa cua cuvî? ¿A cua jandîhi Nyoo tsa javaha ra tsa catyî ra tyin javaha ra tun juhva yoo tan ña tsinú iñi yo tsi ra? **4** ¿Ña cua jandîhi ra! Na cutuñi iñi yo tyin Nyoo ña vatyá ra. Vasu ndi maa tandîhi nyivi vatyá ñi, ra ican javahá ra tandîhi tsa caahán ra. Tyin catyí nu tutu ra tyehen:

Jutu Mañi yu, cua nyehe nyivi tyin ña vatyá un.

Tan cua coto ñi tyin nditsa tsa caahán un.

5 Tsa caquiñi tsa javahá tandîhi yoo, tsa iyó nu ñuhu ñayivi ihya, janahá tyin Nyoo vaha ra. Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuvî yo tsihin Nyoo, Tun tacan ¿a cua catyî yo tumaa catyî nyivi tyin ña vaha tsa tatsi tuñi Nyoo tsi yo tyin janahá yo tyin vaha ra? **6** Nyivi catyî ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandîhi yo.

7 Tatun javahá nyivi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyî ñi tyin ña taahán tsi, maa tyin ña nditsa. **8** Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyivi tyin Nyoo vaha ra. Yihí ñi catyî ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyî tsa caahán ñi cuendu siquî ndi.

Tandîhi yo tan iyó cuatyî yo

9 Tan nácaa ¿a vaha ca yoo tsa cuvî yo nyivi Israel tan ñavin ca inga nyivi? Ña vaha ca yo. Tyin tsa yahá janahá yu tsi ndo tyin tandîhi yo tan iyó cuatyî yo. An cuvî yo nyivi Israel, o ña cuvî yo nyivi Israel, maa tyin

ndacá ñaha cuatyí tsi yo. **10** Tacan catyí nu tutu Nyoo, nu catyí tsi tyehen:

Ndi intuhun nyívi vaha nduve iyó.

11 Nduve nyívi cuñí cutuñi ñi tuhun Nyoo.

Yoñi cuñí nanducu tsi ra.

12 Tandíhi ñi nacoq ñi tsi Nyoo, tan tandíhi ñi tan cuanaq ñi.

Ndi intuhun ñi tan ña javahá ñi tsa vaha.

13 Jucun ñi cuví tsi tumaa iin ñaña ndiyí tsa ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

14 Maa ñi tsa ndvaha ñi caahán ñi.

15 Yatyi xaan tsahñí ñi tsi tahan ñi.

16 Janyehé ñi tundoho tan tucuihya ñi tsi nyívi tsihin cuhva iyó ñi.

17 Tan ña tsitó ñi nácaa coo taxin ñi tsihin Nyoo, tan ndí tsihin nyívi.

18 Ndi ña tsicá ñi ñi tatun coo iin quívi cua tatsi tuñi Nyoo tsi ñi, catyí tuhun Nyoo nu tutu ra.

19 Tsitó yo tyin tandíhi tsa caahán ley Nyoo tsa tyaq ra Moisés, cuví tsi tsa cuenda nyívi tsa yihí ndaha ley can, tyin tacan tan ña cuví catyí ñi tyin nduve cuatyí ñi iyó. Maa tyin coto tandíhi nyívi iyó nu ñuhu ñayívi tyin cua tatsi tuñi Nyoo tsi ñi tsa cuenda cuatyí ñi. **20** Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tsa cuenda tsa tsinú ñi yo tsi Nyoo tan nduvaha yo nuu ra

21 Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuví ndusu yuhu Nyoo janahá nácaa coo vaha yo tsihin Nyoo.

22 Tyin tsa cuenda tsa tsinú ñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyívi Israel o ñavin. **23** Tandíhi yo tan iyó cuatyí yo, tan tsa cuenda yacan ña cuví quihvi yo nu ndacá ñaha Nyoo. **24** Maa tyin tsahá maa ra tsa vaha ra tsi yo, tan yacan jahá tsa naquihin cuenda ra tsi yo tumaa tsatyin vaha yo, tyin tsa yahá tyahví ra Cristo Jesús tsa cuenda cuatyí yo. Tan yacan cuenda ña tsicán ca ra yahvi tsi yo. **25** Nyoo jaquitsi ra tsi ra Cristo tyin cúu ra nu cruu tan cati ra ñiñi ra tsa cuenda cuatyí yo. Tan vityin jaha Nyoo tucahnu ñi tsi yo tatun tsinú ñi yo tsi ra Cristo. Tacan cuví, tyin nyehe nyívi tyin Nyoo javahá ra tsa vaha. Tahan tsanaha, Nyoo ña tñin cuenda ra cuatyí nyívi tsa cuenda tyin cua quitsi ra Cristo tan janaa ra cuatyí ñi. **26** Tan tacan cuví tyin vityin nyehé nyívi tyin Nyoo tacan ñi maa vaha ra, tan naquihin ra tsi tandíhi yo tsa tsinú ñi tsi ra Jesús tumaa tsatyin vaha yo.

27 ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandíhi tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú ñi yo tsi ra. **28** Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú ñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

29 ¿A Nyoo cuenda nyívi Israel ñi cuví Nyoo? ¿A ñavin juvin ñi cuví tucu ra Nyoo nyívi tsa ñavin ñi Israel cuví? Juvin ñi cuví tucu ra Nyoo ñi can. **30** Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú ñi yo tsi ra, a iyó tuñi ra cuñu ñuhu yo tumaa tsa iyó tsi tsi nyívi Israel, o nduve. **31** Tatun tacan, ¿a cuñí tsi

catyi tyin nduve ca yahvi nyaá ley tsahnu can? ¿Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

Cuhva tsicoo ra Abraham janahá tsi tsi yo nácaa nduvahá yo nuu Nyoo

4 ¹ ¿Náa catyí yo tsa cuenda ra Abraham, tsii tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra? ² Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo. ³ ¿Náa catyí nu tutu Nyoo? Catyí tsi tyin ra Abraham tsinu iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra. ⁴ Vaha, vityin cua cuhva yu iin cuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyivi cuhva maa xuhun tsi ra tun ña jahá tyiñu ra. ⁵ Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyivi iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatyin vaha yo tun tsinú iñi yo tsi ra. ⁶ Ra David cahán ra siqui tsa sií cuví tsi nyivi tsa naquihín cuenda Nyoo tumaa tsatyin vaha ñi tan ña tñn cuenda ra cuatyí tsa javahá ñi. ⁷ Tyehen catyí ra David:

Sií xaan cuví tsi nyivi tsa jahá Nyoo tucahnu iñi tsi tan ña jahá ra cuenda cuatyí ñi.

⁸ Sií xaan cuví tsi ñi tsa ña tñn cuenda Nyoo cuatyí.

⁹ ¿A cuñí maa ndo tyin tsa cuenda nyivi nyisó tuñi Nyoo ñi cuví tusii iñi ihya, o cuví tucu tsi tsa cuenda nyivi ña nyisó tuñi can? Tsa yahá catyí yo tyin Nyoo jahá ra tyin vaha ra Abraham tsa cuenda tsa tsinu iñi ra tsi ra. ¹⁰ ¿Ama javahá Nyoo yacan tsihin ra Abraham? ¿A tsa ndi cumañi

ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumañi ca. ¹¹ Yahá tsa naquihín Nyoo tsi ra Abraham tumaa tsatyin vaha ra, tacan tan tsinyaá tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinu iñi ra tsi ra. Tan tsa cuenda yacan cuví ra Abraham tumaa jutu tandihi yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo. ¹² Nditsa tyin ra Abraham cuví tucu ra jutu nyivi Israel, tandihi ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinu iñi maa ra Abraham, tsii tsahnu yo, quivi tsa ñaha ca cunyaa tuñi can tsi ra.

Tsihin tsa tsinú iñi yo ñihí yo tsa tsahá Nyoo tsi yo

¹³ Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayivi tsihin ra. Maa tyin tsa cahán Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihín ra tsi ra tumaa tsatyin vaha ra. ¹⁴ Tun tsatyin maa ñi maa nyivi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra. ¹⁵ Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihi yoo tsa cuví tata ra Abraham. Ñavin maa ñi nyivi tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihi tucu nyivi tsa ña nyitá iñi

ley, tatun tsinú ñi ñi tsi ra tumaa tsa tsinú ñi ra Abraham. Ra ihya cuví jutu tandíhi nyívi tsa tsinú ñi tsi Nyoo. **17** Tyin catyí ra nu tutu ra tyehen: “Yooho cua cuvi tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú ñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

18 Ra Abraham tsa tsahnu xaan ra quívi tsa catyí Nyoo tyin cua coo sehe ñasihi ra, tan tsitó ra tyin ña cuví ca coo sehe ñi. Maa tyin tsinú ñi ra tan ñihí ra tsa cahán Nyoo tsihin ra. Tan cuví ra jutu nyívi cuaha, tumaa cahán maa Nyoo tsihin ra: “Tyehen cua nducuaaha nyívi tata un”. **19** Vasu ndi maa tsa yatyin ña iin cientu cuiya ra Abraham, ña jandihí ra tsa tsinú ñi ra. Tahan ñi maa ra tan ña Sara ñasihi ra, ña cuvi ca coo sehe ñi, tyin tsa cuyatyin cuii cúu ñi tyin tsahnu xaan ñi. **20** Maa tyin ña ndu uví ñi ra tsa cua ñihi ra tsa catyí Nyoo tyin cuhva ra tsi ra. Tsinú ñi ra tsihin tsa ñi ñi ñi añima ra. Tan ña jandihí ra tsa nyitá ñi ra tsi Nyoo. Tan jacahnú ra tsi Nyoo, **21** tsa cuenda tyin tsitó vaha ra tyin Nyoo iyó tunyee ñi tsi ra tsa javaha ra tsa catyí ra tsihin ra. **22** Yacan cuenda Nyoo naquihín ra tsi ra tsa cuenda tsa tsinú ñi ra tsi ra.

23 Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú ñi ra tsi ra, ñavin tsa cuenda ra Abraham ñi cuví tsi, **24** tyin tsinyaá tucu tsi tsa cuenda yoo. Tyin naquihín Nyoo tsi yo tsa cuenda tsa tsinú ñi yo tsi ra, tyin juvin ra janandotó tsi ra Jesús, Jutu Mañi yo. **25** Ra Jesús quítsi ra quítsi cúu ra tsa cuenda cuatyí yo, tan nandotó ra tyin tacan tan cuvi nduvaha yo nuu Nyoo.

Tsa cua ñihi yo tsa cuenda tsa nacoq vaha yo tsihin Nyoo

5 ¹ Tsa yahá nduvaha yo nuu Nyoo tsa cuenda tsa tsinú ñi yo tsi ra. Tan vityin iyó vaha yo tsihin ra jahá Jutu Mañi yo Jesucristo. **2** Tyin tsa cuenda ra Cristo ñihí yo tsa vaha Nyoo tyin tsinú ñi yo tsi ra. Tan iin cuñí yo tyin tsa naquihín yo can. Tan sií cuñí yo tyin cua cuhva ra tsa cahnu cuvi yo tan javaha yo tsa cuñí maa ra tyin javaha yo. **3** Tan ñavin tsa cuenda yacan ñi taahán tsi cusí ñi yo, tyin taahán tucu tsi cusí ñi yo tun nyehé yo tundoho. Tyin tsitó yo tyin tun cunyee ñi yo nyehé yo tundoho, tacan cua cunyee ñi yo cuatu yo nda cuanda ñihi yo tsa cua cuhva Nyoo tsi yo. **4** Tatun cunyeé ñi yo yahá yo tandíhi tundoho, sií cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. **5** Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí li ra tsa tsahá ra coo añima yo janahá tsi tsi yo tyin cuñí xaan ra tsi yo.

6 Tsanaha yoo ña ñihí yo cuhva jacacu maa yo tsi yo. Tacan tan quívi tahán maa tsi quítsi ra Cristo, quítsi cúu ra tsa cuenda cuatyí yo. **7** Tsitó yo tyin ndi intuhun yo tan ña cana ñi yo cúu yo tsa cuenda inga nyívi, vasu ndi maa vaha ñi. Maa tyin tun vaha xaan ñi nyívi can vasiquí cahnya ñi iin yo cúu yo tsa cuenda ñi. **8** Maa tyin Nyoo jaquítsi ra tsi ra Cristo, tan yacan janahá tsi yo tyin cuñí xaan ra tsi yo. Quítsi ra quítsi cúu ra tsa cuenda yo vasu ndi maa iyó xaan cuatyí yo. **9** Tan tsa cuenda tsa tsihí ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quívi cua tatsi tuñi Nyoo tsi nyívi ña tsinú ñi tsi ra. **10** Tahán tsanaha xaan ñi yo tsi Nyoo, maa tyin vityin iyó vaha yo tsihin ra tsa

cuenda tsa tsihi ra Cristo, Sehe ra. Yacan cuenda tsa nyita vaha ini yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra. **11** Tan ñavin yacan ñi, taahán tucu tsi cusii ini yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

12 Tsanaha intuhun ñi rayii tsicoo cuatyí, tan tsa cuenda intuhun ñi ra can tsaq cuatyí nani ñuhu ñayivi tan tsicoo tuhun tsihi. Tan tuhun tsihi can nacuñā can tyin tandihi nyivi tan tsicoo cuatyí ñi. **13** Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tñn cuenda Nyoo cuatyí ñi tsa cuenda tyin nduve ley iyó.

14 Maa tyin nda cuanda quivi tsicoo ra Adán tan nda cuanda quivi tsicoo ra Moisés, tsindaca ñaha tuhun tsihi tsi tandihi nyivi tyin iyó cuatyí tandihi ñi, vasu ndi maa ña javahá ñi tumaa javahā ra Adán tsa ña tyaa yahvi ra tsa cahān Nyoo tsihin ra. Ra Adán quitsj ra tsihin cuatyí, maa tyin ra Cristo quitsj ra jacacu ra tsi yo.

15 Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyivi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahā Nyoo tsi yo, tan tsa vaha tsi tandihi nyivi cuví tsi. **16** Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñi ra yahvi tan jacacú ra tsi yo. Naquihān ra tsi yo tumaa tsatyin vaha yo, vasu ndi maa cuaha cuatyí yo tsicoo. **17** Ndi tsa tyin quitsahā ndacá ñaha tuhun tsihi tsi tandihi nyivi jahā cuatyí tsa javahā ra

can, maa tyin vityin ña cuví ca quihā ndaha can tsi ñi tsa tsa nduvahā nuu Nyoo, ñi tsa iin nyita ñi naquihān tsa vaha ra. Ñi ican iyó ñi ñayivi tsa tan yihí ndaha ñi tsi ñi tan tsi nu ña vaha jahā intuhun rayii, ra Jesucristo.

18 Nyoo tatsí tuñi ra tsi tandihi nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahā ra Jesucristo. **19** Cuñi tsi catyí tyehen: Tsa cuenda tsa ña tyaa yahvi iin rayii tsa cahān Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaa yahvi inga ra tsa cahān Nyoo. Tan ra ican cuví ra Cristo.

20 Nyoo tsahā ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu ini iyó tsi ra tsihin yo.

21 Tahān tsanaha, cuatyí yo quitsj ndaca tuhun tsihi, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

Ña cua javaha ca yo tsa caquiñi tyin cua javaha yo cuhva catyí ra Cristo

6 ¹ ¿Naa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu ini tsi ra tsihin yo? ² Ña vaha. Tyin yoo tsa tsa ndu uvi ini cuatyí tumaa tsa tsihi cuatyí yo cuví can. Tan yacan cuenda, ña cuví ca javaha yo tsa caquiñi vityin. ³ ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñi tsi catyí tyin tsa yahā tsihi yo tsihin ra. ⁴ Tsa quihví yo tsitsi ndutya tsa tsicoó ndutya yo

cuví tsi tumaa tsa tsihi yo tan quihvi ñuhu yo tsihin ra Cristo tsa tsihi ra. Tan tumaa tsa nandoto ra Cristo jaha Nyoo tsihin tunyee iñi ra, tacan nandoto tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsa tsihin ra.

5 Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandoto ra.

6 Tan tsitó yo tyin tandihi cuhva tsicoo yo tahan tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí.

7 Tyin nyivi tsa tsa yaha tsihi, ña cuví ca javaha ñi tsa caquiñi. 8 Tan yoo tsa tsa tsihi tsihin ra Cristo, nyitá iñi yo tyin cua coo yo tsihin ra. 9 Tsitó yo tyin ra Cristo nandoto ra tsa yaha tsihi ra, tan vityin ña cúu ca ra tyin nduve ca tunyee iñi iyó tsi tuhun tsihi tsa cahni can tsi ra. 10 Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo. 11 Tan tacan tucu nyooho, ña javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñi Nyoo tsihin tsa iin ñi cuví ndo tsihin ra Cristo Jesús Jutu Mañi yo.

12 Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñi tsi. 13 Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihi yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha.

14 Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin

vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

15 ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin. 16 Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuví yo nyivi vaha nuu ra. 17 Tyahvi nyoo tsi Nyoo, tyin vasu ndi maa nu quitsi tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhva ndo tsihin tsa ñi iñi añima ndo. 18 Tsa yaha ndatsi cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. 19 (Caahán yu tsihin ndo cuhva tsa ña yí ñi cutuñi iñi ndo tyin nyooho ñaha ca cutuñi vaha iñi ndo tuhun Nyoo.) Tumaa tsa tsaha cuenda ndo cuñu ñuhu ndo tsi tsa caquiñi tahan tsanaha tan javaha ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

20 Quivi tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo. 21 Maa tyin nduve náa ñihí ndo tsihin can, tan vityin cahán nuu ndo tsa cuenda tsa javaha ndo tsanaha, tyin maa ñi tuhun tsihi tsahá can. 22 Maa tyin vityin ña ndacá ñaha ca cuatyí tsi ndo tyin tsa tsaha cuenda ndo tsi ndo tsi Nyoo. Tan vaha xaan tyin maa ñi tsa cuñi Nyoo javahá ndo. Tan nu cua ndihí tuhun cua coo cuii ndo tsihin Nyoo. 23 Nyivi tsa javahá tsa caquiñi, cua cúu ñi. Maa tyin

Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

Ley tsahnu ña ndacá ñaha ca tsi tsi nyivi yihí cuenda ra Cristo

7 ¹ Yañi, nyooho tsa tsitó ley, tsító ndo tyin tsitsi tsa ndi nyito nyivi yihí ndaha ley tsi ñi. ²⁻³ Tumaa iin ñaha tsa iyó yihí, catyí ley tyin coo ña tsihin yihí ña nda cuenda cúu ra. Maa tyin juven ñi catyí tucu ley tun cúu yihí ña tan nandoo ndaahvi ña, ña cua quihí ndaha ca ley can tsi ña. Tan cuvi tindaha ña tsihin inga rayihí tan ña cua coo cuatyí ña. Maa tyin tsitsi tsa ndi iyó yihí ña, ña cuvi coo ña tsihin inga rayihí, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyooho yañi. Tsanaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayihí tsi ñasihi ra. Maa tyin vityin tsa yaha tsihi ndo tan ña ndacá ñaha ca ley can tsi ndo. Tyin vityin ndacá ñaha inga rayihí tsi ndo tan juven ra cuví ra Cristo, ra tsa nandoto jahá Nyoo. Tyehen cuvi tsehe tyin tacan tan cuatyíñu Nyoo tsi yo. ⁵ Tahan tsanaha tsicoo yo cuhva cuñi cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsaha cuñi ca yo javaha yo tsa caquiñi tsa cuñi cuñu ñuhu yo. Tan yacan tsaha tuhun tsihi tsi yo. ⁶ Maa tyin vityin ña ndacá ñaha ca ley tsahnu can tsi yo, tyin tsa yaha tsihi cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javaha ca yo tumaa javaha yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña

vaha tsi. Vaha tsi. Tyin tun tsa ña tsaha Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo. ⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsito yu ley Nyoo, quivi can quitsaha tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha. ⁹ Quivi tsa ña tsitó yu náa cuñi tsi catyí ley Nyoo tsa tyaá ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihi yu jahá cuatyí yu. ¹⁰ Catyí ley can tyin tatun tyaá yahvi nyivi itsi, cua coo cuvi ñi ñayivi nyito. Maa tyin yuhu tsihi yu nuu Nyoo jahá ley can tyin ña tyaá yahvi yu itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo.

¹¹ Cuatyí yu tsatyíñu can ley can, tan jandavi ñaha can tsi yu, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsaha maa Nyoo cuví tsi, tan tandihi tsa catyí ra tyin javaha yo, vaha tsi, tan cuiti xaan tsi. ¹³ Tan ñavin ley vaha ihya jacunaa tsi yu. Tyin tsa ña vaha tsa javaha yu, yacan jacunaa tsi yu. Yacan cuenda cunaa yu nuu Nyoo tyin ley vaha can janahá tsi yu tyin cuatyí cuví tsa javaha yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuvi cuatyí javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyí Ii Nyoo tsaha ley can, yacan cuenda vaha tsi. Maa tyin yuhu iyó cuatyí yo tyin ra ñayivi cuví yu. Javahá yu tsa caquiñi tyin maa cuatyí can ndacá

ñaha tsi yu. **15** Ña cutuñí iñi yu náa taahán yu, tyin tsa vaha tsa cuñí yu javaha yu, ña javahá yu can. Maa tyin javahá yu tsa ña vaha tsa ña cuñí yu javaha yu. **16** Tan tsa javahá yu tsa ña cuñí yu javaha yu, tsihin yacan nacotó yu tyin ley Nyoo vaha tsi. **17** Yacan cuñí tsi catyi tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha. **18** Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñí yu javaha yu tsa vaha, ña cuví javaha yu can. **19** Ña javahá yu tsa vaha tsa cuñí yu javaha yu, jañihí ca yu javaha yu tsa ña vaha tsa ña cuñí yu javaha yu. **20** Tan tatun javahá yu tsa ña cuñí yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

21 Nacotó yu tsa taahán yu: tun cuñí yu javaha yu tsa vaha, yatyi xaan ca javahá yu tsa ña vaha. **22** Tsitsi añima yu taahán xaan iñi yu ley Nyoo. **23** Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyí vehe caa. **24** ¿Ndahvi yuhu ra ndahvi! ¿Yóo cua jacacu tsi yu ndaha tsa ña vahá tsa cuñí cuñu ñuhu yu tan ña cahun yu anyaya? **25** Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñí iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñu ñuhu yu javaha yu, yacan cua quihí ndaha tsi yu.

Tatyí Ii Nyoo jatyinyeé tsi tsi yo tan cuví coo yo ñayivi tsaa

8 **1** Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi

cuhva cuñí Tatyí Ii ra. **2** Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juvin tsi tsahá ñayivi tsaa coo yo tsa cuenda tsa iin ñi cuví yo tsihin ra Cristo Jesús. **3** Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsí ra tsi Sehe ra. Cuví ra tumaa rayihí ñuu ñayivi tan tyahvi ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo. **4** Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí Ii Nyoo.

5 Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa tyin nyivi tsa iyó cuhva cuñí Tatyí Ii Nyoo tsicá iñi ñi cuhva cuñí Tatyí Ii Nyoo. **6** Nyivi tsa tsicá iñi maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí Ii ra, cua coo yo ñayivi tsaa, tan cua coo tsa taxin añima yo. **7** Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can. **8** Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

9 Maa tyin nyooho ña iyó ca ndo cuhva cuñí cuñu ñuhu ndo, tyin iin ñi cuví ndo tsihin Tatyí Ii Nyoo, tun nditsa tsa iyó Tatyí Ii Nyoo añima ndo. Nyivi tsa nduve Tatyí Ii ra Cristo iyó añima, ñavin nyivi cuenda ra Cristo cuví ñi. **10** Maa tyin tun iyó ra Cristo añima ndo, nyitó añima ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí. **11** Nyoo janandotó ra tsi ra Jesús tsa yaha tsihi ra. Tan tacan tucu nyooho, tatun

iyó Tatyí li ra añima ndo, cua janandoto ra cuñu ñuhu ndo tsihin Tatyí li ra tsa iyó añima ndo.

12 Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñu ñuhu yo.

13 Tyin tatun maa ñi maa cuhva cuñí cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí li Nyoo tan cuahán jandihí ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

14 Tyin tandihí yoo tsa javahá cuhva jaquihín ityi Tatyí li Nyoo, sehe Nyoo cuví tsi yo. 15 Nyooho ña naquihín cuenda ndo Tatyí li Nyoo tsa cundaca ñaha tsi ndo tan cuvi ndo tumaa musu. Tyin naquihín ndo Tatyí li Nyoo tsa tsahá tsa cuvi ndo sehe Nyoo. Tan juvin ñi Tatyí li Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo. 16 Tan Tatyí li ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo. 17 Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyi Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quivi cua tahan tsi, Nyoo cua jacahnu ra tsi yo iin caa ñi tsihin ra Cristo.

18 Tsitó yu tyin tundoho tsa nyehé yo vityin, luhlu cuí ñi cuví tsi tan ña cuví jandu inducu yo itsi tsihin tsa sii caá tsa cua nyehé yo quivi tahan tsi.

19 Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehé tsi naha tsi tsi nyivi cuví sehe ra. 20 Tandihí tsa javahá ra, tsa iyó nu ñuhu ñayivi tan andivi, tsa tiví tsi. Vasu ña cuñí tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyivi. Maa tyin catyi ra tyin coo quivi cua ndutsaa nyico tsi. 21 Tandihí tsa javahá Nyoo tan cua ndutsaa tsi inga

tsaha, cua quita nuña tsi tan ña cua tiví ca tsi, tyin cua nasama Nyoo cuhva caá tsi vityin. Tan sii xaan cua cuñí tsi iin caa ñi tsihin tandihí sehe Nyoo tyin ña cua tiví ca tsi. 22 Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. 23 Tacan tucu yoó tsa naquihín cuenda Tatyí li tsa tsaha jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quivi tsa nasama Nyoo cuhva iyó cuñu ñuhu yo tan nyehé tandihí tsa javahá ra tyin cuví yo sehe ra. 24 Vasu ndi maa ñaha ca ñihí yo tandihí can maa tyin tsitó yo tyin cua ñihí yo can tyin tsinú ñi yo. Tyin juvin ñi tsihin tsa tsinú ñi yo tan cacú yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo. 25 Maa tyin ndita ñi yo tsa cua ñihí yo tsa ña nyehé yo, cuñí tsi tsa cunyeé ñi yo cuatu yo can.

26 Tan juvin ñi tacan jatyinyeé Tatyí li Nyoo tsi yo tun nduve tunyeé ñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí li tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñí ñi yo. 27 Tsitó maa Nyoo náa iyó añima yo, tan tsitó ra náa tsicán Tatyí li ra, tsa cuenda yoo tsa cuví yo nyivi ra tyin tsicán tsi cuhva cuñí maa ra ndacan yo tsi ra.

Tsa cuenda ra Cristo tan cuví jaha canaa yo siqui tundoho

28 Tsitó yo tyin tandihí tundoho tsa nyehé nyivi tsa cuñí tsi Nyoo jatyinyeé can tsi ñi, tyin maa Nyoo cuví ra nacatsi tsi ñi, tumaa cuhva tyaá maa ra cuhva. 29 Tyin nda quivi jihna ñi, tan tsa tsitó Nyoo yoo nyivi cua cunyicun tsi ra. Tan tyaá ra cuhva tyin cuví ñi sehe ra tan coo ñi cuhva cuñí ra. Maa tyin ra Jesucristo cuví ra

cua cuvi ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo. **30** Tan ñi tsa tyaá Nyoo cuhva tyin cuvi ñi sehe ra, caná ra tsi ñi. Tan ñi tsa caná ra, naquihín cuenda ra tsi ñi tumaa tsatyin vaha ñi. Tan ñi tsa naquihín cuenda ra tsaḥá ra tsa cahnu cuvi ñi tsihin ra.

31 Yacan cuenda, ¿náa cua catyi yo? Tatun Nyoo tan nyaá ra tumañi iñi tsihin yo, ¿yóo cuví jaha canaa tsi yo? Yoñi. **32** Nyoo ña catyi ra tsa ña cua cuhva cuenda ra Sehe ra, tyin tsaḥá cuenda ra tsi ra tyin cúu ra tsa cuenda tandihí yo. Tun tacan tsaḥá ra Sehe ra tsa cuenda yo, ¿a ña cua cuhva ra tandihí ca tsa tsiñi ñuhu tsi yo? Cuhva ra. **33** ¿Yóo cuví xico ñaha tsi yo tsa cuví yo nyivi nacatsi Nyoo? Yoñi. Tyin Nyoo tsa naquihín cuenda ra tsi yo tumaa tsatyin vaha yo.

34 ¿Yóo cuví catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. **35** Nduve náa cuví quihin nyaa tsa cuñi xaan ra Cristo tsi yo. ¿A cuví quihin nyaa tundoho itsi, a tsihi, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsihi? Ndi intuhun tsehe tan ña cuvi quihin nyaa can tsa cuñi ra Cristo tsi yo. **36** Tumaa catyi nu tutu Nyoo tyehen:

Jutu Mañi yu, tandihí ñi quivi tan cuñi nyivi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

37 Vasu ndi maa cuaha tundoho yahá yo, maa tyin tandihí ñi tsaha tsa nyehé yo tundoho tan jahá canaa yo, tyin ra tsa cuñi xaan tsi yo jatyinyeé tsi yo.

38 Yacan cuenda tsitó vaha yo tyin nduve maa náa cuví quihin nyaa tsa cuñi xaan Nyoo tsi yo. Ndi tuhun tsihi, ndi ñayivi iyó yo, ndi ángel, ndi tatyí

ña vaha, ndi tsa cuví vityin, ndi tsa cua cuvi ityi nuu ca, ndi intuhun can tan ña cuvi jandusiñ can tsi yo tsihin Nyoo. **39** Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuví jandusiñ can tsi yo tsihin Nyoo, ra tsa cuñi xaan tsi yo tsa cuenda ra Cristo Jesús Jutu Mañi yo.

Nyoo nacatsi ra tsi nyivi Israel

9 ¹ Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityi tsa tsicá iñi yu. Yacan cuenda tsitó vaha yu tyin tsa nditsa caahán yu tun catyi yu **2** cuiihya xaan cuñi yu tan uhvi xaan cuñi añima yu **3** tsa cuenda nyivi ñuu yu, ñi Israel. Cuñi xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can. **4** Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuví ra tsi ñi, tyin tsinyaá ra tsihin ñi. Tan ndoo ra tuhun tsihin ñi, tan tsaḥá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñi ra tsa jacahnu ñi tsi ra. Tan catyi ra tsihin ñi nácaa cua javaha ra tsa vaha tsihin ñi nu cuahán ca tsi. **5** Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihí tsa iyó. ¡Na jacahnu yo tsi ra tacan ñi maa! ¡Tan na cuvi tsi tacan ñi!

6 ¿A catyi yu tyin ña javahá Nyoo tumaa cuhva catyi ra tsihin nyivi Israel taḥan tsanaha? Ñavin. Cuñi tsi coto yo tyin ña tandihí nyivi Israel tan cuví ñi nyivi Israel tsa nditsa.

7 Tan tacan tucu ña tandihí tata ra Abraham tan cuví ñi tata ra tsa nditsa. Tyin tsa caḥan Nyoo tsihin ra, caḥan tsi tuhun intuhun ñi sehe ra. Tyin catyi Nyoo tsihin ra tyehen: “Tsa cuenda ra Isaac sehe un tan cua coo

nyivi tata un.” **8** Tsehe janahá tsi yo tyin ñavin tsa cuenda tsa cuví ñi nyivi tata ra Israel tan cuví ñi nyivi Nyoo. Tyin nyivi tsa tsinú iñi tsa cahān Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahān Nyoo tsihin ra **9** Tan tyehen cahān Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyí Nyoo tsihin ra.

10 Tan ñavin yacan ñi. Tyin cahān ndihí tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuví tsií tsaahnu yo, ra Isaac. **11-12** Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca tyin ra Esaú, sehe nuu ña, cua cuví ra musu ra tsa tsinu uvi. Javahā Nyoo tacan tyin nacatsí ra tsi nyivi tsa cuñí maa ra nacatsi ra, tan ñavin tsa cuenda tsa javahá ñi. **13** Tumaa catyí ra nu tutu ra tyehen: “Cuñí ca yu tsi ra Jacob, tan ñavin ca ra Esaú.”

14 ¿Tun tacan náa cua catyí yo? ¿A catyí yo tyin ña vaha tsa javahá Nyoo? ¡Ña cuví! **15** Tyin catyí ra tsihin ra Moisés: “Cua cundaahvi iñi yu yóo nyivi cuñí maa yu cundaahvi iñi yu.” **16** Tacan javahá ra; cundaahví iñi ra tsi nyivi tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahvi iñi yóo cuñí maa ra. **17** Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaḥā yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihí nyivi yóo ra cuví yuhu”, catyí Nyoo. **18** Tan tsihin tsehe tsitó yo tyin Nyoo cundaahví iñi ra tsi nyivi cuñí maa ra. Tan jandundavá tucu ra añima nyivi cuñí maa ra jandundavá ra añima.

19 Tan vasiqúi yooḥo cua catyí un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaa Nyoo cuatyí siqúi ñi? **20** Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yooḥo tan nacahan un nu caahán Nyoo? ¿A cuví catyí iin quisi tsihin ra javahā itsi: “Ña taahán iñi yu cuhva javahā un tsi yu”? Ña cuví. **21** Tyin nyivi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñú ñi juvin ñi tsihin can javaha ñi quisi vaha tan quisi peehe.

22 Ña cuví catyí yo tyin ña vaha Nyoo tsa cuenda tsa tsatyíñú ra tsi nyivi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyivi caquiñi. **23** Javahá ra tacan tyin tacan tan coto yoo tsa cuví yo nyivi tsa cundaahvi iñi ra tyin nda tsanaha tan tsa nacatsí maa ra tsi yo tyin cuhva ra tsa cahnu cuví ra tsi yo. **24** Yacan cuenda nacatsí ra tsi yo. Tan yihí yo cuví yo nyivi Israel, tan nyivi tsa ñavin ñi Israel cuví. **25** Tumaa catyí Nyoo nu tutu tsa tyaa ra Oseas:

Nyivi tsa ñavin nyivi ñuu yu
cuví cua catyí yu tyin nyivi yu
cuví ñi.

Ñi tsa ña cuñi yu, cua cuñi yu
tsi ñi, catyí Nyoo.

26 Tan nu catyí Nyoo: “Nyooḥo ñavin nyivi yu cuví ndo.” Juvin ñi ican cua catyí ra tsihin ñi: “Yuhu cuví Nyoo nyito, tan nyooḥo cuví sehe yu.” **27** Maa tyin ra Isaías catyí ra tyehen tsa cuenda nyivi Israel: “Vasu ndi maa cuaha xaan nyivi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu. **28** Tan tsa yatyin cuii cua jandaa Jutu Mañi yo tandihí tsa cahān ra tan

cua tatsi tuñi ra tsi tandihi nyivi iyó nu ñuhu ñayivi.” ²⁹ Tumaa catyi tucu ra Isaías tahañ tsanaha:

Tun tsatyin Jutu Mañi yo, ra ndacá ñaha tandihi tsa iyó andivi, tan ña jacacu ra tsi juhva yo, tsa naa tandihi yo, Tumaa naa nyivi ñuu Sodoma tan ñuu Gomorra tahañ tsanaha.

Nyivi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyi yo? Nyivi tsa ñavin ñi Israel cuví, ña nducu ñi cuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra. ³¹ Tan nyivi Israel tsa nducú coo vaha tsihin Nyoo tsihin tsa javahá ñi cuhva catyi ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihj tsaha ñi yuu tan nduvá ñi cuví can. ³³ Yuu can caahán Nyoo tuhun nu tutu ra tan catyi ra:

Tsaquin nyaa yu iin yuu nda ñuu Sión, tan janduvá tsi tsi nyivi.

Tan yuu can cuví ra Jesucristo. Tan nyivi tsa tsinú iñi tsi ra tsa cuví yuu can, ña cua nduva ñi, catyi Nyoo nu tutu ra.

10 ¹ Yañi, tsihin tsa ñi iñi añima yu tan tsicán tahvi yu tsa cuenda nyivi Israel tyin cuñí yu tsa cacu ñi. ² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyivi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi. ⁴ Tyin ra Cristo tsa quitsj ra tan javahá ra

tandihi tsa catyi ley, tyin tacan tan tandihi nyivi tsa cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

⁵ Catyi ra Moisés tyin cuví nduvaha nyivi nuu Nyoo, tatun tyaá yahvi ñi tandihi tsa catyi ley, tyin tyaá ra tyehen: “Nyivi tsa tyaá yahvi tandihi tsa catyi ley, cua coo ñi ñayivi tsa ña cua naa maa.” ⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyi tutu ra tyehen: “Ña catyi un: ¿Yóo cundaa andivi? tyin tun cahan un tacan cuñí tsi catyi tyin januu un tsi ra Cristo nda nu ñuhu ñayivi tan jacacu ra tsi yo.” Ña cahan un tacan tyin ra Cristo tsa yahá quitsj ra. ⁷ Tan ndi ña catyi un: “Cuñí tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra. ⁸ Ña catyi un tacan tyin tyehen catyi nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu iñi ndo tyin juvin ñi tsi jacuahá tucu nyuhu. ⁹ Tatun catyi un tsihin yuhu un tyin ra Jesús cuví Jutu Mañi yo, tan tsinu iñi un tsihin añima un tyin Nyoo janandoto tsi ra tsa yahá tsihi ra, cua cacu un. ¹⁰ Tyin tsihin añima yo cuñí tsi tsinu iñi yo tsi ra Cristo tan cuví nduvaha yo nuu Nyoo, tan tsihin yuhu yo cuñí tsi catyi yo tyin tsinú iñi yo, tyin tacan tan cacu yo. ¹¹ Tuhun Nyoo catyi tsi tyehen: “Ndi intuhun nyivi tsa tsinú iñi tsi ra tan ña cua tahan ñi ticanuu.” ¹² Tyin Nyoo inducu ñi cuñí ra nyehé ra tsi nyivi Israel tan nyivi inga ñuu. Tyin intuhun ñi maa ra ndacá ñaha tsi tandihi yo. Tan nasocó ra tsi tandihi nyivi tsa tsicán tahvi tsi ra. ¹³ Tyin tyehen catyi tuhun Nyoo: “Tandihi nyivi tsa tsicán tahvi tsi Jutu Mañi yo cua cacu ñi.” ¹⁴ Maa tyin ¿náca cua ndacan tahvi ñi tsi ra tatun ñaha ca tsinu iñi ñi tsi ra?

Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi? **15** Tan ¿nácaa cuhun nyivi cahan ñi nácaa coo taxin nyivi, tatun yoñi jacuhun tsi ñi? Tumaa catyí nu tutu Nyoo: “Sii xaan cuví nu tsaa ñi caahán tuhun vaha.” **16** Maa tyin ña tandíhi nyivi tan tyaá yahvi ñi tuhun tsa jacacú Nyoo tsi yo. Tumaa catyí ra Isaías: “Jutu Mañi yu, yoñi cuñi tsinu iñi tuhun caahán ndi”, catyí ra. **17** Yacan cuenda cuñi tsi tsa tyaa soho jihna yo tuhun ra Cristo, tacan tan tsinu iñi yo tsi ra.

18 Maa tyin tsicá tucu iñi yu: ¿A ña tsiñi nyivi Israel tuhun Nyoo? ¡Tsiñi ñi! Tumaa catyí nu tutu Nyoo: Jutu Mañi yu, nyivi tsa jacotó tuhun un tsa jacotó ñi tuhun un naniñi cahnu nu ñuhu ñayivi, tan ña nacoq ihñi ñi ndi intuhun ñuu luhlu, catyí tsi nu tutu Nyoo.

19 Tan tsicá nyico tucu iñi yu: ¿A ña cutuñi iñi nyivi Israel tyin cua cacu nyivi tsa ñavin ñi Israel cuví? ¡Cutuñi iñi ñi! Tyin tsa jihna ñi ra Moisés tyaa ra tuhun cahan Nyoo tsihin ñi Israel nu tutu tyehen:

Nyoooho, ndasi cua cuñi ndo tyin cua cuhva yu tsa vaha tsi nyivi tsa ñavin nyivi ñuu yu cuví.

Tan cua cúu ndo tsihi nyehé ndo tsi ñi, catyí Nyoo.

20 Tan ra Isaías cana iñi ra cahan ra: “Nyivi tsa ña nducuy tsi Nyoo, nañihí ñi tsi ra.

Tan janaha ra tsi ra tsi ñi tsa ña tsicá tuhun tuhun ra.”

21 Tan tyaa tucu ra Isaías tuhun cahan Nyoo tsihin ñi Israel tyehen: “Tandíhi ñi quivi cana yu tsi nyivi yu, na nacuhva cuenda ñi tsi ñi tsi yu, maa tyin ña tyaa yahvi ñi. Tan jandava xaan ñi iñi ñi”, catyí Nyoo.

Nyivi Israel tsa ñihí cuhva cacu

11 ¹ ¿A ña cuñi ca Nyoo tsi nyivi Israel? Ñavin tsa ña cuñi ca ra tsi ñi, tyin juven ñi ra Israel cuví tucu yuhu. Tyin tata ra Abraham tan tata ra Benjamín cuví yu. **2** Tahan tsanaha nacatsi Nyoo tsi ñi Israel tyin cuvi ñi nyivi ra. Tan vityin ñavin tsa jatsiyó cuii ra tsi ñi. ¿A ña ñuhú iñi ndo tyin catyí nu tutu Nyoo tyin ra Elías, ra cuví ndusu yuhu Nyoo, catyí ra tyin ña vaha nyivi Israel tan tsicán tahvi ra tsi Nyoo tyehen? **3** “Jutu Mañi yu, nyivi Israel tsahñi ñi tsi ra cuví ndusu yuhu maa un naha ra, tan tsanñi ñi nu jacahnú nyivi tsi un. Tan intuhun ña maa yu ndoo, tan cuñi ndíhi ñi cahñi ñi tsi yu”, catyí ra. **4** Maa tyin nacahan Nyoo tan catyí ra tsihin ra Elías: “Ñavin maa ñi maa un ndoo. Tyin utsa mil ca nyivi naquihin vaha yu, ñi tsa ña jacahnú maa tsitoho Baal”, catyí Nyoo tsihin ra. **5** Tan juven ñi tacan vityin, ndoo juhva nyivi jacahnú tsi Nyoo. Tan tsa cuenda tsa vaha Nyoo nacatsi ra tsi ñi tyin jaha ra tucahnu iñi tsi ñi. **6** Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñi tsi catyí tyin ña jacacú ra tsi yo tsihin tsa vaha ra.

7 Tan ¿nácaa? Nyivi Israel nducuy ñi cuhva nduvaha ñi nuu Nyoo, maa tyin ña ñihí ñi cuhva. Juhva ñi ñihí ñi cuhva. Tan ñi tsa ñihí cuhva can cuví ñi tsa nacatsi maa Nyoo. Tan ñi tsa ña ñihí cuhva cacu, ndundava aña ñi. **8** Tumaa catyí nu tutu Nyoo tyehen: “Nyoo tsaha ra tsa ña cutuñi iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñi iñi ñi tsa tsiñi ñi. Tacan iyó ñi nda cuanda vityin.”

9 Tan juven ñi catyí tucu ra David tyehen:

Javahá ñi vico tan cusii iñi ñi,

maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

10 Tan cua cuaa ñi na ña nyehe ca ñi tsa nditsa.

Tan nacoso tsa vee siqui ñi, catyí ra David tuhun nyivi Israel tsa ña tsinú iñi tsi Nyoo.

Nacaa nduvahá nyivi tsa ñavin ñi Israel cuví nuu Nyoo

11 Tan vityin tsicá tuhun yu: ¿A tsa cuenda tsa ña tyaá yahvi nyivi Israel tsa cahan Nyoo, tan ndoó cuii ñi tsa ña cua cacu ñi? Ñavin tsa ndoo cuii ñi. Ndoó nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihi iñi ñi tsi Nyoo. **12** Tatun cuaha nyivi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javahá ñi Israel, cuaha ca ñi cua natsinu iñi quivi tsa cua cuvi nyico tandihi nyivi Israel nyivi Nyoo.

13 Cuñí yu cahan yu juhva tsihin nyooho tsa ñavin ñi Israel cuví. Ra Jesús tavá tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi

14 tan caahán yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiqui tacan tan natsinu ndihi iñi ñi tan cacu ñi. **15** Tyin tun tsa cuenda tsa ña natiin cuenda Nyoo tsi nyivi Israel tan nduvahá iyó nyivi inga ñuu tsihin Nyoo, quivi cua naquihin cuenda ra tsi ñi cua cuvi tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi.

16 Iin kuhva tatun vaha quitá paan tsa javahá yo tsa jihna ñi tsihin yutsan paan, vaha tandihi ca yutsan can. Tan tatun iin yoho yutun tan vaha tun, vaha tandihi ca soco tun. Tacan

tucu nyivi Israel nyaá yahvi ñi nuu Nyoo tyin tsi tsaahnu ñi yihí ra naha cuenda ra.

17 Tan nyivi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyivi tsaahnya iin soco yutun tan natyaa ñi inga soco yutun, tacan javahá Nyoo tyin jatsiyó ra tsi nyivi Israel tan tyaá ra tsi nyooho tsa cuví ndo nyivi inga ñuu. Tacan cuví tan tsaá ndo cuví ndo nyivi cuenda Nyoo tan naquihin ndo tandihi tsa vaha tsa iyó tsi ra. **18** Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

19 Vasiqui cua catyí ndo: “Juvín, maa tyin Nyoo tsahnya ra soco yutun can tan natyaa ra tsi nyuhu.”

20 Nditsa. Maa tyin jatsiyó nuu ñi ra tsi nyivi Israel tsa cuenda tsa ña tsinu iñi ñi tsi ra. Tan tyacu ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can. **21** Tyin tatun ña jahá Nyoo tucahnu iñi tsi ñi tsa cuví soco vaha can, ndi nyooho tan ña cua jaha ra tucahnu iñi tatun ña tsinú vaha iñi ndo tsi ra. **22** Nyehe ndo tyin vaha xaan iñi Nyoo, maa tyin xaan tucu ra tsihin nyivi tsa ña naquihin cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaá yahvi ndo tsa vaha tsa tsahá ra tsi yo. Tyin tatun ña tyaá yahvi ndo itsi, cua jatsiyó nyico ra tsi ndo tsaha yutun olivo ra. **23** Tyin tatun natsinu nyico iñi nyivi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha.

24 Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihin ra tsi ndo tan tyaá tahan ra tsi ndo tsihin yutun

olivo vaha tsa cumí ra. Tacan cua javaha ra quívi cua cuñi ra iin yaha ñi cua tyaa tahan nyico ra soco yutun vaha nu tsinyaḡ jihna maa tsi.

Nyivi Israel cua cacu nda nu ndihi

25 Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyivi Israel ndundava añima ñi, nda cuanda cacu tandihi nyivi inga ñuu tsa nyaa tyin cacu.

26 Tsa yaha cua cacu ñi, tacan tan cua cacu tandihi nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra.

Tan cua quihin nyaa ra cuatyí nyivi ra Jacob.

27 Tuhun ihya cuví tsa cua ndoo yu tsihin ñi quívi cua quihin nyaa yu cuatyí ñi, catyí Nyoo nu tutu ra.

28 Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahan tsanaha nacatsi Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñi ndihi ra tsi nyivi Israel tyin tata ra naha cuví tsi ñi. 29 Tyin tsa tsa tsaha Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. 30 Tsanaha nyooho ña tyaa yahvi ndo tsi Nyoo. Maa tyin vityin tyaa yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaa yahvi nyivi Israel tsi ra.

31 Nyivi Israel ña tyaa yahvi ñi tsi Nyoo vityin tumaa tsa ña tyaa yahvi nyooho tsi ra tahan tsanaha. Maa tyin cua cundaahvi iñi ra nyehe ra tsi ñi tumaa tsa cundaahví iñi ra nyehé ra tsi nyooho. 32 Yihí tsaha tandihi nyivi tan nacoó ñi tsa tyaa yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahvi iñi ra tsi tandihi yo.

33 ¡Cahnu xaan cuví tsa cuca tan tsa tsitó Nyoo tan tsa tsiñi tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quívi ña cua cutuñi iñi yo tandihi cuhva javahá ra. 34 ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi. 35 Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can. 36 Tyin tandihi maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

Na javaha yo cuhva cuñi Nyoo tsihin ñayivi iyó yo

12¹ Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra. 2 Ña cḡo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihi tsa vaha tan tsa cuiti.

3 Nyoo, tsa cuenda tsa vaha iñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihi nyooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsaha Nyoo tsi ndo iin caa ñi tsihin tsa tsinú iñi ndo tsi ra. 4 Tumaa soho yo tan tinuu yo iin ñi cuví tsi tsihin tandihi ca tahan tsi tsa iyó iin cuñu ñuhu. Tan tsa intuhun intuhun tsi siñ siñ tyiñu javahá tsi. 5 Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra

Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

6 Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñí maa ra cuhva ra tsi yo, tan na cuatyíñu yo itsi. Tatun tsahá ra tsa cuvi yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi. 7 Tatun tsahá ra ndatu tsi iin yo tsa jatyinyee yo tsi nyivi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyivi, na jacuahá yo tsi ñi tsihin tsa ñi iñi yo. 8 Tatun tsahá ra tsi inga yo tsa cuví jandu iin yo iñi nyivi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyeé yo tsi nyivi tsihin xuhun, na jatyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyivi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyeé yo tsi nyivi tsa iyó tsa tsiñí ñuhu, na jatyinyee yo tsi ñi tsihin tsa siñ cuñí yo.

Náa taahán tsi javaha nyivi yihí cuenda ra Cristo

9 Cuñi tahan ndo tsi ndo tsihin tsa ñi iñi añima ndo. Ndasi cuñi ndo nyehé ndo tsa ña vaha. Tan cuanyicun ndo tsa vaha. 10 Cuñí tsi tsa cuñi tahan yo tsi yo tumaa tsa cuñí yo tsi nyivi yo. Tan tyaa yahvi tahan ndo tsi ndo tan jaha tahan ndo tsa ñayivi tsi ndo.

11 Ndūcu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

12 Coo ndo ñayivi ihya tsihin tsa siñ, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndācan tahvi ndo tsi Nyoo iin nyita ñi.

13 Cuhva ndo tsa tsiñí ñuhu tsi nyivi yihí cuenda Nyoo tsihin ndo. Vaha tyānuu ndo tsi nyivi tsaá vehe ndo.

14 Tatun caahán nyivi ndavaha ñi tsi ndo, vaha cahan ndo tsihin ñi, tan ña cahan ndasi ndo tsi ñi. Ndācan tahvi ndo tsi Nyoo tsa cuenda ñi, na nasoco ra tsi ñi.

15 Siñ cuñi ndo tsihin nyivi siñ cuñí. Vacu ndo tsihin nyivi tsa tsacú jahá tucuihya iñi.

16 Ña cañi tahan ndo. Iin ñi cuvi ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

17 Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyivi. 18 Ndūcu ndo cuhva coo taxin ndo tsihin tandihí nyivi. 19 Yañi, cuñí yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyí Jutu Mañi yo. 20 Tan juvin ñi catyí tucu ra: “Tatun nyivi xaan iñi tsi ndo tan tsiisocó ñi, cuhva ndo tsa catsi ñi, tan tatun na ityi iñi ñi, cuhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.” 21 Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan çasi ndo nu vatsí tsa ña vaha tsihin can.

13 1 Tandihí nyivi cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumi tyiñu tan Nyoo tsahá tyiñu can tsi ra naha. Ra cumi tyiñu tsa iyó, maa Nyoo tsahá tsi ra naha tsa cuví ra naha tyiñu. 2 Yacan cuenda, nyivi tsa ña tyaá

yahvi tsi ra naha, cuñi tsi catyi tyin ña tyaá yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi. **3** Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyivi tsa javahá tsa vaha. Nyisó tyiñu ra naha tsa tatsi tuñi ra naha tsi nyivi tsa javahá tsa ña vaha. Tun ña cuñi un tsa jayuhvi ra cumi tyiñu naha ra tsi un, cōo vaha, tyin tacan tan cua nyehe ra naha tyin vaha iyó un tan vaha nyivi cuví un. **4** Tyin ra cumi tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuví nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyivi javahá tsa ña vaha, tyin tyiñu can tyaá Nyoo tsi ra naha. **5** Yacan cuenda ñiñi cuñi tsi tsa tyaá yahvi ndo tsi ra cumi tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. **6** Tan inga tuhun tsa cuenda can tyahví ndo xuhun tsa tavá ra cumi tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

7 Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaá yahvi ndo tsi nyivi tsa taahán tsi tyaá yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi. **8** Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihi tsa catyí ley Nyoo tsa tyaá ra Moisés tyin javaha yo. **9** Catyí ley Nyoo tyehen: “Tun iyó ñasihi ndo o yii ndo ña cōo inga ñaha o rayii tsi ndo. Ña cahñi ndo. Ña sūhu ndo. Ña cahan ndo cuendu

siqui ndi intuhun nyivi. Ña nyiyo iñi ndo tsa tsii inga nyivi.” Tandihí tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo. **10** Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihí tsa catyí ley Nyoo tsa tyaá ra Moisés.

11 Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra. **12** Tsa yaha tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa saha Nyoo tsi ndo; javaha ndo cuhva javahá nyivi iyó nu nditsin. **13** Cuñi tsi cuiti coo yo tyin nu nditsin Nyoo iyó yo. Tan ña cōho ndo nyixi, ña javaha ndo vico tan coho ndo nyixi. Nyooho rayii, ña caca nuu ndo tsihin ñaha. Tan nyooho ñaha ña caca nuu ndo tsihin rayii. Ña cōo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi. **14** Maa tyin cōo ndo tsihin Jutu Mañi yo Jesucristo, tumaa tsinditsí yo jahma tacan na cunditsi yo tsi ra. Tan ña caca iñi ndo javaha ndo cuhva cuñi cuñu ñuhu ndo.

Na ña cahan nyaa yo tsi nyivi

14 **1** Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi. **2** Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin

Nyoo. ³ Maa tyin ñi tsa tsatsí tandíhi can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo naquihín cuenda ra tsi ñi can. ⁴ Tan ¿yóo nyívi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yíhí nyívi jacahnú ñi iin quívi tan ñavin ca inga quívi. Tan tsa cuenda inga nyívi nduve quívi cahnu cuví tan quívi ña cahnu cuví. Inducu ñi quívi cuñí ñi, yacan cuenda intuhun intuhun maa yo tan cuñí tsi tyíhi tuñi vaha iñi yo. ⁶ Ñi tsa naquihín vaha quívi, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juven ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandíhi can, juven ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsaḥa ra tsa catsi ñi. Tan ñi tsa ña tsatsí tandíhi, ña tsatsí ñi tsa cuenda tsa jacahnú ñi tsi Jutu Mañi yo tan juven ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsiihí yo.

⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsiihí yo, tsiihí yo tsa cuenda Jutu Mañi yo tan naquihín ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsiihí yo. ⁹ Tyin ra Cristo tsihi ra tan nandoto ra tyin cundaca ñaha ra tsi nyívi nyito tan nyívi ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihin cuenda un tsi ra?, tan tsitó vaha un tyin tandíhi yo

tan cua tahan tsi quívi cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñí tsi cuñi tsiti tandíhi nyívi nuu yu.

Tandíhi ñi tan cua nacoto ñi tsi yu tsa cuví yu Nyoo.

Tan nuu tandíhi nyívi cua jacahnu ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyívi. Maa tyin nducu ndo cuhva tsa ña janacava ndo tsi ñi nu cuatyí coto jandíhi ñi tsa tsinú iñi ñi tsi ra Cristo. ¹⁴ Yuhu tsitó yo tyin cuvi catsi yo tandíhi tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandíhi, tsa cuenda maa ñi ña cuví catsi ñi can. ¹⁵ Maa tyin tatun tsa cuenda tsa tsatsí ndo tan ndasi cuñi yañi yo, ña nditsa tsa cuñi ndo tsi ra. Ña cuhva ndo tsa tivi yañi yo tsihin tsa tsatsí ndo tyin ra Cristo tsihi ra tsa cuenda ra. ¹⁶ Ña cuhva ndo tsa cahan nyívi ndavaha ñi siqui tsa tsaḥa Nyoo ndatu tyin catsi yo. ¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihi yo. Tsa ñiñi ca cuví tsa vaha iyó yo nuu ra, tan tsihin tsa siñ cuñi yo, tan taxin iyó añima yo jahá Tatyí li ra. ¹⁸ Nyívi jahá tyiñu tyiñu ra Cristo tacan, siñ cuñi Nyoo nyehé ra tsi ñi, tan tacan tucu nyívi siñ cuñi ñi nyehé ñi tsi ñi.

¹⁹ Yacan cuenda cuñi tsi jañiñi yo tsi yo tan coo vaha yo tsihin nyívi. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo. ²⁰ Ndi intuhun ndo tan ña jatívi ndo tyiñu jahá Nyoo tsitsi

añima inga nyivi tsihin tsa tsatsí ndo. Nditsa tyin tandíhi tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyivi nu cuatyí.

21 Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo.

22 Cuhva tsa tsinú iñi yo tsa cuenda tandíhi yacan ña cahan yo tuhun can tsihin inga nyivi. Na coto intuhun ñi maa yo can tsihin Nyoo. Sií xaan cuñí yo tatun ña uvi tsicá iñi yo javahá yo tsa tsahá Nyoo ndatu tyin javahá yo.

23 Maa tyin nyivi tsa tsatsí náa tsatsí, tan uvi tsicá iñi ñi, tsicoꝘ cuatyí ñi tyin ña tsinú vaha iñi ñi tyin cuví catsi ñi can. Tan tandíhi tsa javahá yo tsihin tsa ña tsinú iñi yo tyin tsahá Nyoo ndatu javaha yo can, cuatyí cuví.

Na javaha yo tsa taahán iñi nyivi yihí tuhun Nyoo tsihin yo, tan ñavin tsa taahán iñi ñi maa yo

15 ¹ Yoo tsa vaha cuanyicún tsi Nyoo, cuñí tsi tsa jatinyee yo tsi nyivi tsa ñaha ca tsinú vaha iñi tsi ra. Jatinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñí tsi tsa javaha yo cuhva taahán iñi inga nyivi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo. ³ Tyin ndi ra Cristo tan ña javaha ra cuhva taahán iñi maa ra, maa tyin tahañ ra tumaa catyí nu tutu Nyoo tyehen: “Tandíhi tsa ndavaha ñi tsa cahan nyivi siquí Nyoo, siquí ra Cristo ndoꝘ can”, catyí tsi. ⁴ Tyin tandíhi tsa tsinyaa nu tutu Nyoo tahañ tsanaha, tsinyaa tsi tsa cuenda tsa cutuhva yo itsi. Tan juvin tsi jatinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo. ⁵ Tan juvin ñi

maa ra tsahá tsa cunyeé iñi yo cuatu yo, tan tsahá ra tsa vaha cuñí añima yo. Na jatinyee ca ra tsi yo coo vaha yo tan iin ñi cuvi yo tumaa taahán iñi ra Cristo Jesús. ⁶ Tacan tan tandíhi yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo.

⁸ Tan catyí yu tsihin ndo: ra Cristo quitsí ra quitsí jatinyee ra tsi nyuhu tsa cuví nyivi Israel, tyin tacan catyí Nyoo tsihin tsi tsaahnu ndi tyin cua javaha ra. Tan tacan janaha ra Cristo tyin tandíhi tsa catyí Nyoo tyin cua javaha ra, javahá ra itsi. ⁹ Quitsí ra Cristo tyin tacan tan jacahnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandíhi nyivi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

10 Tan inga tucu nu catyí tsi tyehen: Nyooho tsa ñavin ñi Israel cuví, sií cuñi ndo tsihin ñi Israel, nyivi Nyoo.

11 Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyivi tsa ñavin ñi Israel cuví.

Cata tandíhi ndo yaa tan jacahnu ndo tsi ra.

12 Ra Isaías tyaa tucu ra nu tutu Nyoo tyehen:

Cua cacu iin ra tsa cuví tata ra Isaí.

Cua quitsí ra cua cundaca ñaha ra tsi nyivi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

13 Juvín ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusii iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

14 Yañi, tsitó vaha yu tyin nyoooho vaha iñi ndo tan cutuñi vaha iñi ndo, tan tsitó vaha ndo cuhva cuhva cuenda tahan ndo tsi ndo. 15 Maa tyin nu carta ihya ñihi xaan caahán yu siqui juhva tsa tyaá yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu 16 tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán iñi ra, tyin tsa nduvahá ñi nuu ra jahá Tatyí Ii ra.

17 Yuhu tsa tsinú iñi yu tsi ra Cristo Jesús, sii cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu. 18 Yuhu ña caná iñi yu cahan yu tsa ña javahá ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyiñu ra tsi yu tan vityin tyaá yahvi ñi tsi ra tsa cuenda tsa tsinú iñi ñi tuhun cahan yu tan nyehe ñi tsa javahá yu 19 tsihin tunyee iñi seña tan tsa iyo tsa javahá yu jahá Tatyí Ii Nyoo. Tsihin tandihí yacan cunyee cahan yu tuhun ra Cristo tan nácaa jacacú ra tsi yo tsihin nyivi. Quitsahá yu nda Jerusalén tan inga ca ñuu nda cuanda tsaá yu ñuu tsa cayucú Ilírico. 20 Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñi yu

jaha tyiñu yu nu tsa yaha cahan inga ra tuhun ra Cristo. 21 Tumaa catyí nu tutu Nyoo tyehen:

Nu nduve maa tuhun Nyoo iyó, cua tsa tuhun Nyoo tan cua cutuñi iñi nyivi iyó can itsi, catyí tsi.

Nu tyaá ra Pablo cuhva tyin cahun ra ñuu Roma

22 Yacan cuenda ña cuví quitsi yu quitsi nyehe yu nu yucú ndo, vasu ndi maa cuaha xaan tsaha cuñi yu quitsi yu. 23 Maa tyin vityin tsa ndihí jahá tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo. 24 Nyehe jihna yo tatun cuví yaha yu nu yucú ndo quivi cua cahun yu España. Tsa yaha tsa cunyi yu juhva quivi tsihin ndo, nyehe yo tatun cuví jatyinyee ndo tsi yu tan tsaá yu nu cahun yu. 25 Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan. 26 Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo. 27 Tyehen cuñi ñi javahá ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsahá ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi. 28 Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan cahun yu nda España tan cua yaha yu nu yucú ndo. 29 Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

30 Yañi, Tatyí Ii Nyoo tsahá tsa cuñi ndo tsi yu tan tsi ra Jesucristo, yacan cuenda caahán ndaahvi yu

tsihin ndo ndācan tahvi ndo tsi Nyoo tsa cuenda yu tan tsa cuenda tyiñu jahá yu. **31** Ndācan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndācan tahvi ndo tsa cuenda nyivi yihí cuenda ra Cristo ñuu Jerusalén, na tiin cuenda vaha ñi ofrenda tsa ndahá yu. **32** Tan ndācan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa sii cuñi yu tan cuví quitatu vaha yu. **33** Tan Nyoo, ra tsahá tsa taxin coo añima yo, na cunyaa ra tsihin tandihi ndo. Tan na cuvi tsi tacan.

Nu tsahá ra Pablo nacumi tsi nyivi vaha iñi tsi ra

16 **1** Jacotó yu tsi ndo tyin ña hermana Febe jatyinyeé xaan ña tsi nyivi yihí cuenda Nyoo ñuu Cencrea. **2** Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihi tsa tsiñi ñuhu tsi ña, tyin maa ña cuaha xaan nyivi jatyinyeé ña, tan nda cuanda maa yu.

3 Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús. **4** Tsahnyá iñi ñi ñayivi ñi quivi jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihi tucu nyivi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi. **5** Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinu jihna iñi tsi ra Cristo ityi Acaya. **6** Cuhva ndo nacumi tsi ña María. Jahá tyiñu xaan ña nu yucú ndo. **7** Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñú ra naha

cuenda Jutu Mañi yo tsihin tandihi ca ra jahá tyiñu cuenda Nyoo. Tan jihna ca ra naha natsinu iñi tsi ra Cristo tan ñavin ca yuhu.

8 Cuhva ndo nacumi tsi ra Amplias ra vaha iñi tsi yu cuenda Jutu Mañi yo. **9** Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. **10** Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyivi ra Aristóbulo. **11** Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo. **12** Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo. **13** Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu. **14** Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. **15** Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpas tan tsi tandihi ñi yihí cuenda Nyoo tsa yucú tsihin ñi.

16 Cuhva tahan ndo nacumi tsi ndo. Tandihi nyivi yihí cuenda ra Cristo tsa iyó ityi ihya jaquitsi ñi nacumi tsi ndo.

17 Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñi jasiin tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can. **18** Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñi maa ñi javahá ñi. Tan jandahví ñaha ñi añima nyivi ndaahvi tsihin tsa vita caahán ñi.

19 Tandihí nyívi tsitó ñi tyin tyaa yahvi ndo tsi Nyoo. Yacan cuenda sii xaan cuñí yu tsihin ndo, tan cuñí yu tsa yatyi javaha ndo tsa vaha. Maa tyin ña yatyi javaha ndo tsa ña vaha. 20 Nyoo ra iyó tandihí tsa taxin ańima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuańi ndo siqui nu. Na nasoco Jutu Mańi yo Jesucristo tsi ndo.

21 Ra Timoteo ra cutahán tsihin yu nu jahá tyińu ndi tyińu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ńuu yu can jaquitsí ra naha nacumi tsi ndo.

22 Yuhu ra Tercio javahá yu tutu ihya tsa cuenda ra Pablo, juvin ńi jaquitsí tucu yu nacumi tsi ndo tyin iin caa ńi yińi yo cuenda Jutu Mańi yo.

23 Jaquitsí tucu ra Gayo nacumi tsi ndo. Vehe ra iyó yu. Juvín ńi ihya ndú iin tandihí ńi yińi cuenda Nyoo. Ra Erasto ra cuví tesorero ńuu ihya, jaquitsí ra nacumi tsi ndo, tan yańi yo ra Cuarto tucu.

24 Na ndoo Jutu Mańi yo Jesucristo tsihin tandihí ndo. Tan na cuví tsi tacan ńi.

Nu ndihí caahán ra Pablo tan jacahnú ra tsi Nyoo

25 Tan vityin na jacahnu yo tsi Nyoo, tyin maa ra cuví ra cua cuhva tsa ndu iin ińi ańima ndo, tyin tacan tan ña jandihí ndo tsa tsinú ińi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ńi cuví tsi tsihin tuhun tsa ńuhu xeehe tahán tsanaha nda ndi cumańi ca tsinú ńuhu ńayivi. 26 Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsaha cuenda tuhun ra tahán tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyívi tyin tacan tan tsinu ińi ńi tsi ra tan tyaa yahvi ńi tsa caahán ra. 27 Intuhun ńi maa Nyoo iyó, tan iyó xaan tsa tsińi tuńi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ńi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta tsa cuenda nyivi yihí cuenda Nyoo ñuu Corinto

1 ¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo, ² jaquitsí ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduvi ndo nyivi vaha cuenda ra, tsihin tandihí nyivi tsa jacahnú tsi Jutu Mañi yo Jesucristo tandihí ñi ityi. Tyin cuví ra Nyoo cuenda ñi tan cuenda tucu maa yo. ³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añaima ndo.

Nacaa nasocó Nyoo tsi nyivi yihí cuenda ra

⁴ Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús. ⁵ Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo. ⁶ Tan tandihí tuhun ra Cristo tsa cahān ndi tsihin ndo tsa ndunditsin tsi tyin tsa nasama ndo cuhva iyó ndo. ⁷ Tan yacan cuenda nduve tsa cumañi tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo. ⁸ Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuví tyaa cuatyí tsi

ndo quivi cua quitsi Jutu Mañi yo Jesucristo. ⁹ Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

Nyivi yihí cuenda Jutu Mañi yo, ña vaha quita siin ñi

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo. ¹¹ Caahán yu tacan tsihin ndo, yañi, tyin catyí nyivi ra Cloé tsihin yu tyin iyó tsihi nu yucú ndo. ¹² Tyin nyooho siin siin cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu.” ¹³ ¿A cuñi ra Cristo tsa quita siin yo? ¿A maa yu tsihi nu cruu tsa cuenda ndo? ¿A tsicoondutya ndo tsihin sivi yu? Ñavin. ¹⁴ Tyahví nyoo tsi Nyoo tyin ra Crispo tan ra Gayo ñi jacoondutya yu tan ña jacoondutya yu tsi ndi intuhun ca nyooho, ¹⁵ yacan ña cuvi cahan ndo tyin tsicoondutya ndo tsihin sivi yu. ¹⁶ Aan, jacoondutya tucu yu tsi nyivi ra Estéfanos, maa tyin ña nducuhun iñi yu tun jacoondutya yu tsi inga ndo. ¹⁷ Tyin ra Cristo ña tava tyiñu ra tsi yu tsa jacoondutya yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya

caahán yu, tyn coto catyi nyívi tyn nduve yahvi nyaá tsa tsihí ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyívi iyó nu ñuhu ñayívi

18 Nyívi tsa cua cuhun anyaya tsiñi ñi tuhun tsa tsihí ra Cristo nu cruu, tan ña tsinú iñi ñi tsi ra, yacan cuenda cuñí maa ñi tyn nduve yahvi nyaá tsa tsihí ra. Tan tsa cuenda yoo tsa cua cacu, tunyee iñi Nyoo cuví tsa tsihí ra. 19 Tyn tacan catyí maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyí Nyoo.

20 Nduve yahvi nyaá ra tsa tsitó xaan, tan ra maestro, tan ra caahán náa ndíhi tuhun tsa iyó nu ñuhu ñayívi ihya. Tyn tsa tsiñi tuñi tsa iyó nu ñuhu ñayívi ihya, tuhun nduve yahvi nyaá nanduví can jahá Nyoo. 21 Nyoo tsihin tsa tsiñi tuñi tsa iyó tsi ra tyaá ra cuhva tyn ña cuví nacoto nyívi tsi ra tsihin tsa tsiñi tuñi tsa iyó nu ñuhu ñayívi ihya. Maa tyn tyaá tucu ra cuhva tsa jacacu ra tsi nyívi tsa tsinú iñi tuhun ra vasu ndi maa inga ca nyívi cuñí ñi tyn nduve yahvi nyaá tsi.

22 Nyívi Israel cuñí ñi nyehe ñi tsa iyó. Tan nyívi Grecia maa ñi maa tsa tsiñi tuñi tsa iyó nu ñuhu ñayívi ihya nanducú ñi. 23 Maa tyn nyuhu jacotó ndi tuhun ra Cristo, ra tsa tsihí nu cruu. Tan tsa tsiñi nyívi Israel tuhun ra ndasi xaan cuñí ñi. Tan ñi tsa ñavin ñi Israel cuví, cuñí ñi tyn nduve yahvi nyaá tsi. 24 Maa tyn tsa cuenda nyívi tsa nacatsí Nyoo, cuví ñi nyívi Israel, a nyívi Grecia, ñi ican cutuñí iñi tyn ra Cristo iyó tandíhi tunyee iñi Nyoo tsi ra, tan tsahá ra tsa cutuñí iñi ñi tsa tsiñi tuñi Nyoo. 25 Vasu ndi maa inga nyívi cuñí tyn nduve yahvi nyaá tsa tsiñi tuñi Nyoo,

maa tyn nyaá yahvi ca tsi tan ñavin ca tsa tsiñi tuñi tsa iyó nu ñuhu ñayívi ihya. Tan cuñí tucu ñi tyn ña ñiñi tunyee iñi Nyoo. Maa tyn ñiñi ca tsi tan ñavin ca tunyee iñi tsa iyó nu ñuhu ñayívi ihya. 26 Yañi, cuñí tsi tsa cutuñi iñi ndo tyn Nyoo nacatsí ra tsi ndo vasu ndi maa ña cuaha ndo cuví nyívi tsitó, tan nyívi cahnu cuví o nyívi ndacá ñaha nu ñuhu ñayívi ihya. 27 Nacatsí ra tsi nyívi tsa catyí nyívi tyn soho xaan ñi, tyn cuhva ra ticanuu tsi nyívi tsitó xaan. Tan nacatsí ra tsi nyívi nduve tunyee iñi iyó tsi tyn cuhva ra ticanuu tsi nyívi cuñí tyn iyó xaan tunyee iñi tsi ñi. 28 Tan nacatsí ra tsi nyívi ndaahvi tsa cuñí nyívi tyn ña tsiñi ñuhu ñi, tan nyívi tsa ña cuñí nyívi nyehe ñi, tan janduluhlú ra tsi nyívi jahá tyn cahnu cuví ñi. 29 Javahá ra tacan tyn tacan tan yoñi cuví nduyaa nuu ra. 30 Tan juvin ñi maa ra jandu iñi tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jatá ra tsi yo tsihin ñiñi ra, quihín nyaá ra tsi yo ndaha nu ña vaha tan cacu yo tan nduvahá yo jahá ra tan jacu íi ra tsi yo. 31 Yacan cuenda na javaha yo cuhva catyí tuhun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyn tatun cua nduyaa yo, na nduyaa yo tsihin tsa javahá Nyoo tsihin yo.”

Tuhun ra Cristo, ra tsihí nu cruu

2¹ Maa tyn yañi, quívi tsa quítsi yu cahan yu tuhun Nyoo tsihin ndo, ña cahan yu tuhun tsa tsiñi tuñi tsa iyó nu ñuhu ñayívi ihya tumaa caahán ra tsitó xaan naha ra. 2 Tyn maa ñi maa tuhun ra Jesucristo, nácaa tsihí ra nu cruu tsa cuenda cuatyí yo tyaá iñi yu tan cahan yu tsihin ndo. 3 Tan tsa tsaá yu nu yucú ndo ñiñi ñihí yu jahá tsa yuuhví yu. 4 Tan tsa cahan yu tsihin ndo, ña cahan yu tsihin tuhun síi caa tumaa caahán ra tsitó xaan naha ra. Maa

tyin tsihin tunyee iñi Tatyí li Nyoo caħan yu tsihin ndo. **5** Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

Juvin ñi maa Tatyí li Nyoo tsahá tsa nacoto yo tsi Nyoo

6 Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo **7** tsa tsicumí xeehe ra tsa ndi cumañi ca javaha ra ñuhu ñayivi ihya. Tyaq ra cuhva tsa jacacu ra tsi yo tan cunyecu cuii yo tsihin ra nda gloria. **8** Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu. **9** Maa tyin cuvi tsi tumaa catyí maa tuhun Nyoo:

Yoñi nyehe tan yoñi tsiñi tan tsicá iñi tuhun vaha tsa javaha Nyoo tsa cuenda nyivi cuñi tsi ra, catyí tsi.

10 Maa tyin Nyoo tsahá ra Tatyí li ra tsi yo tan jacotó Tatyí li ra tuhun ihya tsi yo, tan juvin ra jacotó tandihi ca tuhun xeehe tsa tsicá iñi Nyoo tsi yo.

11 Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí li Nyoo tsitó ra tsa tsicá iñi maa Nyoo. **12** Yoo ñavin tsa tsiñi tuñi tsa iyó nu ñuhu ñayivi naquihin yo, tyin naquihin yo Tatyí li Nyoo, tan juvin ra jacotó tandihi tsa ñihí yo jahá Nyoo. **13** Tan tsa caahán ndi tsihin ndo ihya, tuhun tsa jacuahá maa Tatyí li Nyoo tsi ndi cuví. Ñavin tsa cutuhva maa ndi tsihin tsa tsiñi tuñi jiñi ndi. Nacatyí tuhun ndi tsa jacuahá Tatyí li Nyoo tsi ndi tsi nyivi

tsa yihí Tatyí li Nyoo.

14 Maa tyin nyivi tsa nduve Tatyí li Nyoo iyó tsihin, ña naquihin vaha ñi tan ndi ña cutuñi iñi ñi tsa jacuahá Tatyí li Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí li Nyoo iyó tsihin ñi. **15** Maa tyin nyivi yihí Tatyí li Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuví catyí inga nyivi tatun vaha a ña vaha tsa iyó añaima ñi. **16** Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

Ña taahán tsi cunycun yo tsi iin ra yihí tuhun Nyoo tsihin yo, na cunycun yo tsi Nyoo

3 **1** Yañi, quivi tsa quiti yu nu yucú ndo ña cuví caħan yu tsihin ndo tumaa caahán yu tsihin nyivi jaquihin ityi Tatyí li Nyoo. Caħan yu tsihin ndo tumaa caahán yu tsihin nyivi ña tsitó tsi Nyoo, tyin ndi lee xaan ndo tsihin ra Cristo. **2** Caħan yu tsihin ndo tsihin tuhun tsa ña yii ñi cutuñi iñi ndo. Tumaa tsahá yo letsí coho lee tsa ñaha ca cuví catsi nyayu, tacan javaha yu tsihin ndo, tyin nyoocho ñaha ca cuví cutuñi vaha iñi ndo. ;Tan ndi vityin tan ña cutuñi iñi ndo! **3** Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihi nu yucú ndo, tan ndusiñ ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñi cuñu ñuhu ndo. **4** Tyin yihí ndo catyí ndo: “Cuenda ra Pablo yihí yu.” Tan inga ndo catyí ndo: “Cuenda ra Apolos yihí yu.” Yacan cuñi tsi catyí tyin javahá ndo tumaa javahá nyivi iyó ityi tsata.

5 Tyin zyóo ra cuví yuhu, ra Pablo? Tan zyóo ra cuví ra Apolos? tyin cañi tahan ndo tsaha ndi. ;A ñavin musu

Nyoo ñi cuví ndi? Juvín. Tan cahan ndi tuhun Nyoo tsihin ndo tan natsinü ñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi. **6** Yuhu tatsí tuhun Nyoo añima ndo, tan ra Apolos tyosó. Maa tyin Nyoo jacuahnu ra tuhun ra añima ndo. **7** Tan yacan cuenda ndi ra tsa tatsí tan ndi ra tsa tyosó, nduve ra cuví ra. Maa tyin Nyoo cuví ra tandihí tyin maa ra jacuahnú tuhun ra añima yo. **8** Ra tsa tatsí tan ra tsa tyosó, iin ñi ra cuví ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha. **9** Tan nyuhu, cuví ndi musu tan jahá tyiñu ndi tyiñu Nyoo. Tan nyoo cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo. **10** Tsañu Nyoo tsa vaha tsi yu tyin yuhu cuví yu tumaa iin ra cuví ityí nuu tsa samá vehe. Tyin tsaquin yu cuhva vehe can tan tyihí yu tsaha tsi tsitsi ñuhu. Tan inga ra tsa cua sama ityí siqui cuví ra jacuahá, tan cuñí tsi jahá ra cuenda nácaa jacuahá ra tuhun Nyoo. **11** Tan yoñi cuví caquin inga cuhva tyin tsa canyíi cuhva can. Tan yacan cuví ra Jesucristo. **12** Tan siqui cuhva can cuví sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama. **13** Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahá ra naha. **14** Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra. **15** Maa tyin tun ndihí tyiñu javahá ra naha cayu, nduve náa cua ñihi ra naha. Vasu cua cacu maa ra naha tumaa cacu iin ra tsa cuñí cayu tan tsinü ra nu cayú ñuhu.

16 ¿A ña tsitó ndo tyin vehe ñuhu Nyoo cuví ndo, tan iyó Tatyí li Nyoo tsitsi añima ndo? **17** Tatun iin nyivi jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

18 Ndi intuhun ndo tan ña jandavi ñaha ndo tsi ndo. Tyin tatun cuñí ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo. **19** Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvín ñi maa nu tsa nyityi javahá ra.” **20** Tan catyí tucu tsi: “Jutu Mañi yo tsitó ra tyin tsa tsicá ñi ra tsitó, nduve yahvi nyaá can.” **21** Yacan cuenda ndi intuhun ndo tan ña taahán tsi cu iyo ñi ndo nyehe ndo tsi iin ra jacuahá tsi ndo tyin maa Nyoo tsañu tsi ra naha tsa jacuahá ra naha tuhun vaha tsi ndo tan tsañu ndihí ra tandihí tsa iyó tsi ndo. **22** Yuhu ra Pablo, ra Apolos, ra Pedro, maa Nyoo tsañu tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihi, tan tsa cuví vityin, tan tsa cua cuvi nu cuahán ca tsi, tandihí maa tuhun ihya tsañu Nyoo tsi ndo. **23** Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

Ña jacahnu yo tsi yo tan ndi tsi yañi yo

4 **1** Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuaha ndi tuhun xeehe ra. **2** Tan ra tsa tava tyiñu Nyoo cuñí tsi tsa tyaá yahvi ra tandihí tsa caahán ra tsihin ra. **3** Yacan ña ndihí ñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná ñi yu cahan yu tun vaha yu o

ña vaha yu. **4** Vasu ndi maa tuví iñi yu tyin nduve cuatyí yu, maa tyin ña cuñí tsi catyi tyin nduve cuatyí yu nuu Nyoo. Tyin maa Jutu Mañi yo cua catyi tun iyó cuatyí yu o nduve. **5** Yacan cuenda, ña cahan ndo tsi yu. Cuatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo kuhva tsa taahán tsi.

6 Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehe ndo kuhva iyó yu, tan kuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo kuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihi nyivi. **7** Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

8 Tan cuñi ndo tyin tsa tsitó maa ndo tandihi tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu. **9** Nyuhu tsa cuví ndi ra tsicá tyiñu ra Cristo, tumaa tsa nacoñ Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi. **10** Nyivi tsicá iñi maa ñi tyin tsa cuenda ra Cristo tan ndusohó ndi. Tan nyooho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñi ndo tyin iyó tunyee iñi tsi ndo. Tun ndasi cuñi nyivi nyehé ñi tsi nyuhu, jaha xaan ca ñi tsa ñayivi tsi

nyooho. **11** Nda cuanda vityin nyehé ndi tundoho; tsisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi. **12** Tan tsitatú ndi tsa jahá tyiñu ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi. **13** Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuanda vityin ihya.

14 Tyaá yu tuhun ihya tsa cuenda ndo, maa tyin ñavin tsa cuñi yu kuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. **15** Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinu iñi ndo tsi ra. **16** Tan tsa cuenda tsehe tsicán yu tsi ndo tsa javaha ndo tumaa javahá maa yu.

17 Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nñi xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo kuhva iyó yu tsihin ra Cristo tan kuhva jacuahá yu tandihi ñi vehe ñuhu nu cuahán yu. **18** Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo. **19** Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha. **20** Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha. **21** ¿Náa cuñi

ndo javaha yu tsa quitsi yu? ¿A cuñí ndo tsa cuxaan yu tsi ndo, o cuñí ndo tsa cahan vii yu tsihin ndo?

Nu tava tyiñu ra Pablo tyin cutuñi iin ra tsicoo tsihin sihi quiin

5 ¹ Ñihí tuhun yu tyin iin ra nyíí tsihin ndo iyó ra tsihin sihi quiin ra. Tan yacan cuví cuatyí cahnu xaan, tyin ndi nyívi iyó ityi tsata tan ña javahá ñi tacan tyin tsitó ñi tyin ña vaha. ² Taahán tsi cuiihyá cuñí ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo. ³⁻⁴ Vasu nduve yu nyíí tsihin ndo, maa tyin tumaa tsa nyíí ñi yu tsihin ndo tyin ñuhú iñi yu tsi ndo, tan tsihin sivi Jutu Mañi yo Jesucristo jandaq yu tyiñu ra tsa javahá cuatyí can. Yacan cuñí tsi tsa ndu iin ndo. Tan jaha ndo tuhun tyin nyíí yu tsihin ndo. Tan cunyaa tunyee iñi Jutu Mañi yo Jesús tsihin ndo. ⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá tsa caquiñi ihya, tyin vasiqui tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añaíma ra.

⁶ Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñí yo cuví tucu yacan. ⁷ Tava ndo yutsan iya tsahnu tsa jatívi tsi ndo. Tacan tan cuvi ndo tumaa paan tsa tuhvá nyívi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuvi tucu nyooho tyin maa ra Cristo cuví mbee ticatyí luhlu tsa tsihi tsa cuenda cuatyí yo. ⁸ Yacan cuenda taahán tsi catsi coo yo tyin tsihi ra Cristo tsa cuenda yo. Tan jandoó yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa

nditsa tsihin tsa ñi iñi yo tyin cuví tsi tumaa paan tsa nduve yutsan iya yihí.

⁹ Nu inga carta tsa jaquitsi yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha. ¹⁰ Tan tsa caahán yu tyehen tsihin ndo, ñavin tsa cunu ndo nu nyívi tsa iyó ityi tsata, ñi tsa iyó tsihin rayi a ñaha, ñi tsa nyiyó iñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayívi ihya. ¹¹ Maa tyin tsa cuñí yu catyi yu tsihin ndo ña cunyaa naa ndo tsi nyívi tsa catyi: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayi, o nyiyó iñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi. ¹²⁻¹³ Tyin yoo ña taahán tsi tatsi tuñi yo tsi nyívi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñí tsi tatsi tuñi ndo tsi nyívi yihí cuenda Nyoo. Yacan cuenda tava ndo tsi ra iyó cuatyí nu yucú ndo.

Ña cua ndacan yo cuatyí tsaha iin yañi yo cuenda Nyoo nuu ra cumí tyiñu

6 ¹ ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyí? ² ¿A ña tsitó ndo tyin juvin ñi maa yo cua jandaa cuatyí tandihí nyívi iyó nu ñuhu ñayívi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya? ³ ¿A ña tsitó ndo tyin cua jandaa yo cuatyí nda cuanda ángel? Tun tacan, ¿a yíi jandaa yo cuatyí nyihi tsa iyó nu ñuhu ñayívi? ¡Ña yíi jandaa yo can! ⁴ Yacan cuenda tatun iyó tsihi nu yucú ndo, ¿nacuenta tyin cuahán ndo nuu ra

cumí tyiñu tsa ña yihí tuhun Nyoo? **5** Caahán yu tyeheh tsihin ndo na nducahan nuu ndo. ¿A nduve cuii vasu intuhun ra jandaa cuatyí yañi ndo nu yucú ndo? **6** Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

7 Ña vaha tsa iyó tsihi nu yucú ndo. Vaha taxin ca cunyee iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo. **8** ¡Maa tyin nyoocho javahá ndo tsa ña vaha tan suhú ndo nda cuanda tsa tsii yañi ndo!

9-10 ¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayii, ndi ñi jacahnú tsitoho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yii tan iyó inga rayii tsi ñi, ndi ra ndusihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit;o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi. **11** Tyin tacan javahá juhva nyoocho. Maa tyin tsa ndatsi cuatyí ndo tan ndu ii ndo tan nduvahá ndo nuu Nyoo jahá Jutu Mañi yo Jesucristo tan Tatyí Ii Nyoo.

Cuñu ñuhu yo cuví vehe ñuhu Nyoo

12 Catyí tsi tyin nuña maa javaha yo tandihí náa cuñi maa yo. Tan nditsa tucu maa, maa tyin ña tandihí tan vaha. Cuví javaha yo náa cuñi maa yo, maa tyin cuñi tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo. **13** Catyí nyivi tyin Nyoo javahá ra tsa tsatsí yo tsa cuenda tsitsi yo. Tan javahá ra tsitsi yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu

ñuhu yo ña nditsa tsa javahá ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. **14** Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

15 ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jativí yu tsihin iin ñaha tsicá nuu? Ña taahán tsi javaha yu tacan. **16** ¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduví ra tsihin ña? Tyin nu tutu Nyoo catyí tsi tyeheh: “Tsa nduvi ñi, iin ña nyivi cuví ñi.” **17** Maa tyin tatun iin nyivi tan nacuhva ñi añima ñi tsi Jutu Mañi yo, iin ñi cuví ñi tsihin ra tyin quihvi Tatyí Ii ra añima ñi.

18 Jandihí ndo tsa iyó ndo tsihin ñaha a tsihin rayii tun ñavin ñasihi ndo a ñavin yii ndo cuví. Tyin tandihí inga nu cuatyí tsa javahá nyivi ña jativí can cuñu ñuhu ñi. Maa tyin tsa tsicá nuu ñi tsihin ñaha a tsihin rayii, jativí can cuñu ñuhu ñi. **19** ¿A ña tsitó ndo tyin cuñu ñuhu yo cuví vehe ñuhu Tatyí Ii tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo. **20** Tyin Nyoo yahvi xaan jatá ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsii maa Nyoo cuví.

Nu tsahá cuenda ra Pablo nácaa taahán tsi coo nyivi tindahá

7 **1** Tan vityin cua cahan yu tsa tsicá tuhun ndo tsi yu nu carta tsa jaquitsi ndo tsi yu. Nditsa tyin vaha tsa ña tindaha yo. **2** Maa tyin

cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayi. Yacan cuenda cuñi tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yi tsa intuhun intuhun ñi. **3** Na javaha rayi cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yi ña. **4** Ñiñaha ña cuvi cundaca ñaha ñi maa ña cuñu ñuhu ña, tyin tsii yi ña cuvi cuñu ñuhu ña. Tacan tucu maa yi ña, ña cuvi cundaca ñaha ñi maa ra cuñu ñuhu ra tyin tsii ñasihi ra cuvi cuñu ñuhu ra. **5** Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayi inga ñaha o ñaha nducu ña inga rayi tan javaha ndo tsa ña vaha jaha nu ña vaha.

6 Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuvi tindaha ndo tatun cuñi ndo. **7** Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

8 Tsahá cuenda yu tuhun ihya tsi tandihi nyooho tsa ñaha ca tindaha tan nyooho ñi tsihi yi tyin vaha ca cuvi tsi ndo tun ña tindaha ndo tumaa maa yu. **9** Maa tyin tatun ña cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

10 Maa tyin caahán yu tsehe tsihin nyooho ñiñaha tsa tsa tindaha: ña ñacoo ndo yi ndo tyin tuhun caahán yu ihya, ñavin tsa cuñi maa yu cuvi, tyin maa Jutu Mañi yo tsahá itsi tyin cuhva cuenda yu tsi ndo. **11** Maa tyin

tatun iin ñaha tan nacoq ña yi ña, cuñi tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yi ña. Tan tacan tucu rayi, ña taahán tsi nacoq ra ñasihi ra.

12 Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoó ña vaha tsa cunyaa ña tsihin ra, nduve ndatu tsa nacoq ra tsi ña. **13** Tan tatun iin ña hermana, tan ña tsinú iñi yi ña tsi Nyoo, ndoó ra vaha tsa cunyaa ra tsihin ña, nduve ndatu tsa nacoq ña tsi ra. **14** Tyin tsa yahá nasocoq Nyoo tsi rayi tsa ña tsinú iñi can tsa cuenda tsa iin ñi cuvi ra tsihin ñaha tsa tsinú iñi. Tan tsa yahá nasocoq tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuvi ña tsihin ra tsinú iñi. Yacan cuenda sehe ñi ña cuvi tsi naha tsi tumaa cuvi sehe nyivi tsa ña tsinú iñi tsi Nyoo, tyin tsa nasocoq ndihi Nyoo itsi naha tsi. **15** Maa tyin tatun rayi an ñaha tsa ña tsinú iñi tsi Nyoo, tan cuñi ñi nacoq ñi tsi tahan ñi tsa tsinú iñi tsi Nyoo, na nacoq maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tsihi. **16** Tyin ña tsitó iin ñaha tatun cacu yi ña. Tan ndi rayi ña tsitó ra tatun cacu ñasihi ra.

17 Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quivi cana ra tsi ndo. Tan tsehe cuvi tsa jacuahá yu tandihi vehe ñuhu tan iin tan iin ñuu. **18** Tatun tsa yaha tsinyaa tuñi Nyoo cuñu ñuhu ndo tan cana Nyoo tsi ndo ña caca iñi ndo tsa cuenda yacan. Maa tyin tun ña tyaá ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can. **19** Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuvi tsa tyaá yahvi yo tuhun caahán Nyoo. **20** Tan intuhun intuhun ndo

taahán tsi jahá tyiñu ndo juvin ñi tyiñu tsa tuhvá ndo javahá quivi tsa cana Nyoo tsi ndo. **21** Tyin tatun musu cuví ndo quivi tsa cana Nyoo tsi ndo, ña caca iñi ndo. Maa tyin tatun tsahá tsi cuhva tsa ndoó nuña ndo, nducu ndo cuhva. **22** Iin ra tsa cuví musu tan quihvi ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihvi ra cuenda Jutu Mañi yo, vityin cuví ra musu tsa cuenda ra. **23** Nyoo yahvi xaan jatá ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo. **24** Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quivi cana Nyoo tsi ndo.

25 Tan tsa cuenda nyivi tsa ñaha ca tindaha, nduve tuhun tsaha Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsaha ra tucahnu iñi tsi yu tan maa ra yihí ndaha tsi yu. **26** Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. **27** Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo. **28** Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñi yu tsa nyehé ndo tundoho.

29 Yañi, cuñi yu cahan yu tuhun ihya tsihin ndo: Juhva cuii ña quivi iyó yo. Yacan vityin tan ityi nuu tandihi ra tsa iyó ñasihi cuñi tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó. **30** Tan nyooho tsa iyó tucuihya iñi, ña tyaa yahvi ndo tucuihya iñi can. Tan nyooho tsa sii cuñi, ña tyaa

yahvi ndo tusii iñi can. Tan nyooho tsa jatá ndaha tyiñu taahán tsi coo ndo tumaa tsa nduve ndaha tyiñu ndo. **31** Tan nyooho tsa iyó vaha nu ñuhu ñayivi ihya, cgo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayivi ihya.

32 Cuñi yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñi maa Jutu Mañi yo.

33 Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra. **34** Tan tacan tucu ñiñaha, siin siin cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jachanu ña tsi Nyoo tsihin cuñu ñuhu ña, tan tsihin tsa ñi iñi añima ña. Maa tyin ñaha tsa iyó yii, maa ñi cuhva coo vaha ña tsihin yii ña nducú ña.

35 Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayivi cuiti tsihin tsa nduve tsa jatyañu tsi ndo. Tan javaha ndo iin ñi tyiñu Nyoo.

36 Maa tyin ndaa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñi tsi; ñavin cuatyí cuví can. **37** Maa tyin ndaa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa. **38** Ñi tsa cuñi tindaha sehe ñi, vaha javahá ñi. Tan ñi tsa ña cuñi tindaha sehe ñi, vaha ca javahá ñi.

39 Maa tyin ley Nyoo catyí tsi na cundacá ñaha rayii tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yóo tsihin cuñi maa ña. Maa tyin tun cua tindaha ña, na tindaha ña tsihin ra yihí tuhun Nyoo.

40 Maa tyin sii xaan ca cua cuvi tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñí yu tyin maa Tatyí Ii Nyoo, tsahá tuhun ihya tsi yu, tan tsahá cuenda yu tsi ndo.

Nu jacuahá ra Pablo tyin ña vaha janacava yo tsi nyivi nu cuatyí

8 1 Tan vityin cua cahan yu tsihin ndo cuenda nyayu tsa jamañí nyivi nu tsitoho. Tandíhi yo tan cuñí yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñí yo tan nduyaá yo tsihin can. Tan ndi nduve nu jatyinyee can tsi yo. Maa tyin tsa cuñí tahan yo tsi yo jacuahnú tsi tsi yo tsihin Nyoo. 2 Ra tsa cuñí tyin tsitó xaan ra, nduve náa tsitó ra.

3 Maa tyin Nyoo tsitó ra ndáa nyivi cuñí tsi ra tsihin tsa ñi iñi añañima ñi.

4 Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó. 5 Vasu ndi maa juhva nyivi catyí ñi tyin iyó cuaha nyoo tsa ndacá ñaha nu ñuhu ñayivi ihya tan andívi, 6 maa tyin tsa cuenda yoo, intuhun ñi Nyoo Jutu yo iyó. Tan juvin ra javahá tandíhi cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandíhi maa tsa iyó, nda cuanda tsi maa yo.

7 Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho can. Tan cuñí ñi tyin nyayu, tsa jamañí nyivi tsi tsitoho can, ica tsi. Tan cuñí ñi tyin tun catsi ñi nyayu can cua coo cuatyí ñi nu Nyoo. 8 Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo. 9 Maa tyin nyooho tsa tsitó tyin nduve cuatyí tsa

catsi yo nyayu tsa jamañí nyivi nuu tsitoho, jaha ndo cuenda coto janacava ndo tsi ñi tsa ndi quihví tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañí nyivi nu tsitoho, cua coo cuatyí ñi nuu Nyoo.

10 Tyin tatun yooho tsa tsitó un tuhun ihya, tan cunyaa un catsi un tsa iyó vehe tsitoho, tan iin ra yañi yo tsa ndi quihví cuenda Nyoo tan nyehe ra tyin tsatsí un tsa jamañí nyivi nu tsitoho, cua cuñí ndíhi ra catsi ra. 11 Tan cua tiví añañima ra tyin cuñí maa ra tyin tsicoo cuatyí ra. Tan ra ican tsihi ra Cristo tsa cuenda ra. Tan yooho tsa tsitó un, siquí un cua cahun cuatyí can. 12 Tyin tun janacava yo tsi yañi yo tsa ndi quihví cuenda Nyoo, tsicoo cuatyí yo nuu ra Cristo. 13 Yacan cuenda tatun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñí yu tsa janacava yu tsi yañi yo nuu cuatyí.

Tsa taahán tsi javahá iin ra tava tyiñu ra Jesucristo

9 1 Ndisa tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacoto yu tsi ndo. 2 Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyooho taahán tsi tsinu iñi ndo, tyin juvin yu cahan tuhun ra tsihin ndo tan natsinú iñi ndo tsi ra. Yacan cuenda juvin ndo cuví tsandaa.

3 Tyehen cuví tsa cua cahan yu tsihin nyivi tsa caahán nya tsi yu. 4 Iyó ndatu tsa quihín yu tandíhi tsa tsahá ñi catsi yu tan tsa tsahá ñi coho yu. 5 Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandíhi ca ra tava

tyiñu ra Jesucristo. ⁶ ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiñi ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo? ⁷ Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa queé nu nducuaa ra. Tan ra tsa jahá cuenda indiquí tsihí ra letsí ti. ⁸ Tan ña cuñi ndo tyin tuhun ihya tsa tsiñi tuñi jiñi maa yu cuví, tyin nu ley Nyoo tsa tyaá ra Moisés catyí tsi tyehen: ⁹ “Ra tsa tatsí trigu ña taahán tsi tyihi ra yoho yuhu indiquí tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiquí ñi. ¹⁰ Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha. ¹¹ Tan tacan cuví tucu nyuhu, quítsi cahan ndi tuhun Nyoo tsihin ndo, tumaa tsa quítsi tatsí ndi tsiti tsitsi añima ndo cuví can. Tan taahán tsi tsa jatyinyeé ndo tsi ndi tsa cuenda tsa jacotó ndi tuhun Nyoo tsi ndo. ¹² Tatun jatyinyeé ndo tsi inga ra tsa ña quítsi tyihi tuhun Nyoo nu yucú ndo, taahán tsi tsa cuaha ca jatyinyeé ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandíhi. Ña tsicán ndi tsa tsiñi ñuhu tsi ndi tsi ndo tyin coto jandíhi ndo tsa tyaá yahví ndo tuhun ra Cristo tsa jacuahá ndi. ¹³ Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá sñin ra naha juhva cuñu quití tyin catsi ra naha. Tan tandíhi ca cuñu can cua cahmi ra naha tumaa catyí maa Nyoo tsihin ra naha. ¹⁴ Tan juvin ñi tacan caahán Jutu Mañi yo, tyin taahán tsi jatyinyeé ñi yihí cuenda Nyoo tsi ra caahán tuhun Nyoo tsihin ñi. ¹⁵ Maa

tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndíhi tsa sñi cuñi yu caahán yu tuhun ra Cristo tsihin ndo vasu ndi maa nduve náa jatyinyeé ndo tsi yu.

¹⁶ Ña cuví nduyaa yu tsihin tsa caahán yu tuhun Nyoo tyin maa ra Cristo tava tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya. ¹⁷ Yacan cuenda tatun cahan yu tsihin tsa ñi iñi yu, cua ñihi yu yahví yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsaha maa Nyoo tsi yu cuví tsi. ¹⁸ Tan tsa sñi cuñi yu caahán yu tuhun ra Cristo yacan cuví yahví yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

¹⁹ Vasu ñavin musu cuví yu, maa tyin nanduví yu musu tandíhi nyivi tyin tacan tan cuví jaha canaa yu cuaha ca nyivi cuenda ra Cristo.

²⁰ Tatun nyíi yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. ²¹ Maa tyin tatun cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaá yahví yu ley Nyoo tyin tyaá yahví yu ley ra Cristo.

²² Tatun nyíi yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyee ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi,

tyin tacan tan tyaa soho ñi tuhun Nyoo tsa caahán yu tsihin ñi tan cacu ñi. **23** Javahá yu tacan tyin tacan tan cacu nyivi tan nasoco ndíhi tucu maa Nyoo tsi yu.

24 Tsitó ndo tyin tatun cua cunu suuhva nyivi, tandíhi ñi tsinú, maa tyin intuhun ñi ñi jaha canaa. Tacan tucu maa yo, cuñí tsi tsa ñihi cunycun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo. **25** Tandíhi nyivi tsa tsinú suuhva, nacoó ñi tandíhi tsa jatyañú tsi ñi tyin cuñí ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa. **26** Tsa cuenda yuhu ña tsinú soho ñi yu, tan ndí ña cañí tahan soho ñi yu. **27** Maa tyin ñihi ndacá ñaha yu tsi cuñu ñuhu yu. Tan jañiñí yu tyaá yahvi yu tsi Nyoo, coto juven ñi maa yu tsa yaha jacuahá yu tsi inga nyivi, tan ndoo yu.

Nu jacuahá ra Pablo tyin ña vaha jacahnú yo tsitoho

10 ¹⁻² Yañi, ña cuñí yu tsa naa iñi ndo tsa cuví tsi tsii tsaahnu yo tahán tsanaha. Nyoo jacuhun ra iin vico ityi nuu ñi. Tan yahá sava ñi nu ndutya ñuhu iin caa ñi tsihin ra Moisés, ra cuví ityi nuu tsihin ñi. Tan tsa tacan, tumaa tsa tsicoondutyá ñi tsihin vico tan tsihin ndutya ñuhu tan ndu iin ñi tsihin ra Moisés. **3** Tan Nyoo tsahá ra iin ñi tsa tsatsí tandíhi ñi. **4** Tan tsihi ñi ndutya tsa quitá tsata cava tsa cuahán tsihin ñi tan cava can cuví ra Cristo, tan tandíhi ñi iin ñi ndutya can tsihi ñi. **5** Maa tyin vasu cuaha tsa iyo javahá Nyoo nyehe ñi, cuaha ñi ña tyaá yahvi ñi tuhun cahán ra tsihin ñi. Tan tsihi ñi nu tsiquí can.

6 Tandíhi tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can. **7** Yacan cuenda ña

jacahnu ndo tsitoho, tumaa javahá juhva ñi can, tyin catyí nu tutu Nyoo tyehen: “Tsinyecu ñi, tsatsí ñi, tan tsihi ñi. Yahá can tan nduvitá ñi, tsahan quitsahá tsañí ñi jacahnú ñi indiquí xuhun cuaan tsa javahá ñi.”

8 Ña cgo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayí tumaa javahá nyivi can. Tan tsihi oco uñi mil ñi tsa iin quivi.

9 Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihi ñi tsa caan coo tsi ñi. **10** Tan ña cahán ndo ndavaha ñi síqui Nyoo, tumaa tsa cahán juhva ñi can. Tan jaquitsí ra ángel ra tsahí tsi ñi.

11 Tandíhi yacan tahán tsii tsaahnu yo tsa tsicoq tahán tsanaha. Tan tsinyaa tsi nu libru Nyoo tyin tacan tan yoo tsa iyó yo nu cua ndíhi ñuu ñayivi ihya vityin coto yo tyin ña taahán tsi javaha yo tandíhi tsa javahá ñi can. **12** Tan nyooho tsa cuñí tyin vaha cuahán ndo tsihin Nyoo, jaha ndo cuenda coto nduva ndo jaha nu ña vaha. **13** Tundoho tsa nyehé ndo, cuñí maa ndo tyin intuhun ñi maa ndo nyehé can. Maa tyin inducu ñi nyehé tandíhi ca nyivi. Cuita iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyeet iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeet iñi ndo.

14 Yacan cuenda yañi, ña jacahnu ndo tsitoho. **15** Caahán yu tsihin ndo tumaa caahán yu tsihin ra tsa cutuñí iñi. Yacan cuenda jaha ndo cuenda tsa caahán yu tsihin ndo tan nyehe ndo tun nditsa a ña nditsa tsa caahán yu. **16** Quivi tsa nducuhún iñi yo tyin tsihi ra Cristo nu cruu, tsihí yo vinu tan tsatsí yo paan. Tan vinu can cuñí tsi catyí tyin iin ñi cuví yo tsihin ra Cristo tsa cuenda ñiñi ra. Tan paan can cuñí tsi catyí tyin iin ñi cuví yo

tsihin ra tsa cuenda cuñu ñuhu ra. **17** Tyin vasu cuaha yo, maa tyin tandihí yo tan tsatsí yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

18 Tyihí tuñi iñi ndo cuhva iyó nyivi Israel. Tsatsí ñi quití tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra.

19 Ñavin caahán yu tyin iyó yahvi nyaá tsitoho tsa jacahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. **20** Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. **21** Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha. **22** Ña cuhva yo tisihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javaha yo tsa cuenda tsa vaha tsi inga ca nyivi

23 Nditsa tsa caahán nyivi: “Cuví javaha yo náa cuñi maa yo.” maa tyin ña tandihí can tan jacuahnú can tsi yo tsihin Nyoo tan ndi ña cuví can tsa vaha tsi yo. **24** Ña cuví caca iñi yo tsa cuenda maa ñi maa yo, tyin cuñi tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

25 Çatsi nyoooho tandihí cuñu tsa cuyahví nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo. **26** Tyin ñuhu ñayivi tan tandihí tsa iyó nuu tsi, tsii maa Nyoo cuví.

27 Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo,

çatsi nyoooho tandihí tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

28-29 Maa tyin tatun ndáa nyivi caahán tyehen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña çatsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyivi? **30** ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsí yu”, catyí ndo. **31** Vaha maa, tun tsatsí ndo, tan tsihí ndo, o javahá ndo inga ca tsa javahá ndo; javaha nyoooho maa tyin cuhva taahán iñi Nyoo.

32 Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo. **33** Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu añima ñi.

11 ¹ Nyehe ndo tumaa javahá yu cuhva javahá ra Cristo, tacan taahán tucu tsi javaha nyoooho cuhva javahá yuhu.

Nacaa taahán tsi javaha ñiñaha nu iyó culto

2 Yañi, sñi xaan cuñi yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo.

3 Maa tyin cuñi yu tsa coto ndo tyin ra Cristo cuví jiñi tsihin intuhun intuhun rayi tyin juvin ra cuví ityi nuu tsihin ra, tan rayi cuví jiñi tsihin ñasihi ra, tumaa cuví Nyoo jiñi tsihin ra Cristo. **4** Tatun iin rayi tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra. **5** Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya

ndii jiñi ña cuví can. Tan tsahá ña ticanuu tsi yíi ña tyin juvin ra cuví jiñi tsihin ña. **6** Tatun iin ñaha tan ña tyasí ña jiñi ña, vaha taxin ca xatya ña tandíhi xixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña. **7** Ña taahán tsi tsa casi rayíi jiñi ra. Tyin cuhva caá Nyoo caá ra, tyin ndacá ñaha ra tsi ñasiíhi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yíi ña tsihin tsa tsahá ña tsa cundaca ñaha ra tsi ña. **8** Tyin quívi javahá Nyoo tsi rayíi, ña javahá ra tsi ra tsihin yíqui naha ñaha. Tyin tsihin yíqui naha rayíi javahá ra tsi ña. **9** Tan tsacatyí rayíi, tan tsinu ñaha, tan ñavin tsacatyí ñaha tan tsinu rayíi. **10** Yacan cuenda ñiñaha cuñí tsi tsa cundasi jiñi ñi. Tyin cuñí tsi catyí tyin ndacá ñaha yíi ñi tsi ñi. Tan cuví tsi tsa vaha tsi ra ángel naha ra. **11** Maa tyin tyaá Nyoo cuhva tyin tsiñí ñuhu rayíi tsi ñaha. Tan tsiñí ñuhu ñaha tsi rayíi. **12** Nditsa tyin ñaha tsinu ña tsihin yíqui naha rayíi jahá Nyoo. Maa tyin nda cuanda quívi can tan quitsahá tsahá Nyoo tsa coo sehe yíi ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayíi tan ñaha.

13 Tyíhi tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu? **14** Tsitó yo tyin ticanuu cuví tsi tsa cuenda rayíi tatun nañi jiñi ra. **15** Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi. **16** Maa tyin tatun yóo cuñí cañi tahan tsa catyí tuhun ihya, cuñí tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyívi Corinto tyin ña vaha cuhva tsatsí ñi Santa Cena

17 Yañi, inga tuhun cua cahan yu tsihin ndo tyin ña sii cuñí yu tsihin

ndo; tyin tsa javahá ndo nu ndu iín ndo, ña tsahá tsi tsa vaha tsi ndo, tan jatívi tsi tsi ndo. **18** Tyin catyí nyívi tsihin yu tyin cuhva tsa ndu iín ndo tsa cua coo ndo culto, tan natahví sava ndo. Tan tsicá tucu iñi yu tyin vasiquí nditsa tsa caahán ñi.

19 ¿Vasiquí cuñí maa ndo tyin tsihin tsa natahví sava ndo tan quituvi ndáa nyooho tsinú vaha iñi tsi Nyoo!

20 Maa tyin tatun tacan ñi iyó tsihi nu yucú ndo, ñavin Santa Cena cuví can. **21** Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iín tandíhi nyívi. Tan yíhí ndo cuaha tsatsí ndo, tan nda cuanda tsiñí ndo tsihin vinu. Tan yíhí nyívi ña ñihí ñi tsa catsi ñi jahá ndo. **22** ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñí ndo nyehé ndo vehe ñuhu Nyoo cuví can. Tan tsahá ndo ticanuu tsi nyívi nduve tsa iyó tsi. ¿A taahán tsi catyí yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26:26-29; Mr. 14:22-25;
Lc. 22:14-20)

23 Tyin Jutu Mañi yo jacuahá tuhun ihya tsi yu. Tan juvin yacan tsa yahá jacuahá yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihín ra iin paan. **24** Tan tsa yahá nacuhva ra tyahvi nyoo tsi Nyoo tan tsahnú ra paan can. Tan catyí ra: “Catsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyí ra Jesús. **25** Tan tsa yahá tsa cuxiñi ra naha tan quihín ra Jesús vasu vinu tan catyí ra: “Tsihin vinu ihya ndoó Nyoo tyiñu tsihin ndo vityin, tyin vinu tsa yíhí tsitsi vasu

ihya, niñi yu cuví. Tahan ñi tsaha tsa cua coho ndo, cōho ndo tsa cuenda tsa nducuhun iñi ndo tsi yu”, catyi ra Jesús tsacuaa can. **26** Tan tahan ñi tsa ndu iín yo tan tsatsí yo paan tan tsihi yo vinu jacotó yo tsi nyivi tyin tsacatyí cuatyí yo tsihi Jutu Mañi yo. Tan tacan jacotó yo tsi nyivi nda cuanda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

27 Tatun tsatsí yo paan tan tsihi yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihi ra Cristo nu cruu tan tsa tsati niñi ra. **28** Yacan cuenda cuñi tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu. **29** Tyin Nyoo tatsí tuñi ra tsi yo tun tsatsí yo tan tsihi yo tan ña tsicá iñi yo tsa cuenda tsa tsihi ra Cristo. **30** Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyivi tahan ndo tsa yahá tsihi ñi. **31** Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. **32** Maa tyin tatun tatsí tuñi Jutu Mañi yo tsi yo tacan, javahá ra tacan tyin tacan tan ña cuana yo tsihin nyivi iyó cuenda nu ñuhu ñayivi ihya.

33 Tan tacan nyooho yañi, tatun cua ndu iin ndo tsa cua catsi ndo Santa Cena, cyatu tahan ndo tsi ndo tan catsi ndo tan cōho ndo iin caa ñi. **34** Maa tyin tatun ndáa nyooho tsisocó ndo, catsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

Ndatu tsa tsahá Tatyí Ii Nyoo tsi yo

12 ¹ Yañi, cuñi yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quivi tsa ñaha ca

nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo. **3** Yacan cuenda cuñi yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyí ra tyin ra Cristo cuví Jutu Mañi yo.

4 Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo. **5** Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo. **6** Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyeé tsi tandihi yo tan javahá yo can. **7** Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihi ca nyivi yihí cuenda ra. **8** Tsi juhva yo tsahá Tatyí Ii Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. **9** Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí Ii ra tsahá tunyee iñi tsi inga yo tsa janduvaha yo tsi nyivi cuuhví. **10** Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí Ii Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi. **11** Tan tandihi yacan tsahá intuhun ñi maa Tatyí Ii Nyoo. Maa tyin siin siin tsa tsahá ra tsi tsa intuhun intuhun yo, nácaa cuñi maa ra.

Tandihí yo tan cuví yo intuhun ñi cuñu ñuhu tsihin ra Cristo

12 Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi

cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo. **13** Tan tacan tucu tandíhi yo, a cuví yo nyívi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutyá yo tan nanduví yo intuhun ña cuñu ñuhu ra Cristo tyin tsahá ra intuhun ñi maa Tatyí Ii ra coo tsihin tandíhi yo.

14 Tyin cuñu ñuhu yo ña cuví cuví tsi intuhun ñi maa tinuu tyin cuñí tsi tsa cunyecu tandíhi ca tsa cutahan tsihin tsi tan cuví tsi cuñu ñuhu ñi.

15 Tun tsatyin cuví cahan tsaha yo tan catyí tsi: “Yuhu nduve yahvi nyaá yo tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can.

16 O tun tsatyin cuví cahan soho yo tan catyí tsi: “Yuhu nduve yahvi nyaá yo tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can.

17 Tun tsatyin nanií cuñu ñuhu yo cuví tsi tinuu tan nduve soho yo, ¿nácaa cua cuñí yo? O tun tsatyin nanií cuñu ñuhu yo cuví tsi soho, ¿nácaa cua tahñi yo?

18 Maa tyin Nyoo tyaa ra tan iin tan iin can nu cuñí maa ra.

19 Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can. **20** Maa tyin tsa ndu iin soho, tinuu, jiñi, ndaha, tan tandíhi ca maa, tacan tan cuví tsi intuhun cuñu ñuhu.

21 Tinuu yo ña cuví catyi tsi tsihin ndaha yo: “Ña tsiñí ñuhu yooho tsi yu.” Tan ndí jiñi yo tan ña cuví catyi tsi tsihin tsaha yo: “Ña tsiñí ñuhu yooho tsi yu.” **22** Ña vaha tsa cahan tsi tacan tyin vasu iin tsa lihli tsa cuñí maa yo tyin ña tsiñí ñuhu tsi yo, yacan cuví tsa tsiñí ñuhu ca. **23** Tan nu cuñí yo tyin ña sñi caá, tyasí yo. Tan nu ña taahán tsi nyehé nyívi, yacan tyasí vaha ca yo. **24** Tan nu sñi caá, ña tyasí yo. Tacan javahá Nyoo cuñu ñuhu yo, tyin tacan tan jacahnú

ca yo nu cuñí maa yo tyin ña sñi caa.

25 Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusñin tsi. **26** Tatun luxu cuñu ñuhu yo nyehé tundoho, nyehé ndíhi tanií ca cuñu ñuhu yo tundoho. Tan tatun sñi cuñí luxu tsi, sñi cuñí tanií tsi.

27 Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. **28** Tan Nyoo natyísó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyísó ra tsi ra caca tyiñu ra. Tsa tsinu uvi, natyísó ra tsi ra cuví ndusu yuhu ra.

Tan tsa tsinu uñi, natyísó ra tsi ra jacuaha. Yahá can, tan natyísó ra tsi ra tsa javaha tsa iyo, tan natyísó tucu ra tsi ra tsa janduvaha nyívi cuuhví, tan ra tsa jatyinyee tsi nyívi, tan ra jaha cuenda vehe ñuhu, tan ra caahán inga yuhu tsa ña tsitó ra.

29 Ña tandíhi yo tan tsicá yo tyiñu ra Cristo. Ña tandíhi yo tan cuví yo ndusu yuhu ra. Ña tandíhi yo tan cuví yo ra jacuahá. Ña tandíhi yo tan javahá yo tsa iyo. **30** Ña tandíhi yo tan tsahá Nyoo tunyee iñi tsa janduvahá yo tsi nyívi cuuhví. Ña tandíhi yo tan caahán yo inga yuhu tsa ña tsitó yo. Ña tandíhi yo tan cuví nacotó yo tan nacatyí tuhun yo náa cuñí tsi catyí tsa caahán inga nyívi. **31** Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yo iin cuhva vaha ca tsi ndo.

Nu janahá ra Pablo nácaa taahán tsi cuñi yo tsi nyívi

13 **1** Tatun yuhu tan cuví cahan yo cuaha ñi yuhu tsa caahán nyívi iyó nu ñuhu ñayívi ihya, tan cuví cahan tucu yu yuhu tsa caahán ángel, maa tyin tatun ña cuñí yu tsi Nyoo tan ndí tsi nyívi, cuví yu tumaa tyombo tsa nañí ñi maa o iin caa tsa tsacú ndaxin ñi maa. **2** Tatun cuví cuhva cuenda yu tuhun caahán Nyoo,

tan cuví coto yu tandíhi tuhun xeehe, tan tsitó yu tandíhi tuhun, maa tyin tatun ña cuñí tucu yu tsi Nyoo tan ndi tsi nyívi, nduve náa catyí javaha yu tandíhi yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñí yu tsi Nyoo tan ndi tsi nyívi, nduve náa ra cuví yu. **3** O tatun cuhva yu tandíhi tsa iyó tsi yu tsi nyívi ndaahvi, tan cuhva yu nda cuanda ñayívi yu tyin cucayu cuñu ñuhu yu, maa tyin tatun ña cuñí yu tsi Nyoo tan ndi tsi nyívi, nduve náa cua jatyinyee can tsi yu.

4 Tatun nditsa tsa cuñí yu tsi Nyoo tan tsi nyívi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo. **5** Tatun nditsa tsa cuñí yu tsi Nyoo tan tsi nyívi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tsihi tsitsi añima yo. **6** Tatun nditsa tsa cuñí yu tsi Nyoo tan tsi nyívi, ña sihi cuñí yo náa ndíhi tsa ña vaha javahá ñi, maa tyin cusíhi iñi yo tsihin tsa vaha tan tsa nditsa. **7** Tatun nditsa tsa cuñí yu tsi Nyoo tan tsi nyívi, cunyeé iñi yo nyehe yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi cuhva iyó ñi, tan ña cundíhi iñi yo.

8 Tsa cuñí yu tsi Nyoo tan tsi nyívi ña cua cundíhi maa tsi, maa tyin coo quívi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo. **9** Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyívi, **10** maa tyin quívi quítsi nyico ra Cristo, cua cundíhi tsa tsitó yo luxu ñi tyin cua coto yo tandíhi maa.

11 Quívi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin

quívi tsahnú yu nacoq yu tsa yu cuhva javahá ra nyihi. **12** Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndíhi tsi yaa. Maa tyin quívi cua quítsi ra Cristo, cua coto yo tandíhi maa. Luxu ñi tsitó yo vityin, maa tyin quívi quítsi nyico ra, tandíhi cuii maa tan cua coto yu, tumaa nacotó maa ra tsi yu vityin. **13** Iyó uñi taahan tsa ña cua ndíhi maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandíhi tsa cahan Nyoo tyin cuhva ra tsi yo, tan tsa cuñí yo tsi Nyoo tan tsi nyívi. Tan tsitsi tsa nduñi taahan tsehe, tsa tsiñi ñuhu ca cuví tsa cuñí yo tsi Nyoo tan tsi nyívi.

Nu jacuahá ra Pablo nácaa cahan yo inga yuhu tsa ña tsitó yo

14 **1** Jañihi ca ndo cuñí ndo tsi Nyoo tan tsi nyívi. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyívi. **2** Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyívi. Tyin ndi intuhun ñi tan ña cutuñí iñi ñi, tyin tuhun xeehe caahán yo jahá Tatyí Ii Nyoo. **3** Maa tyin tun tsahá cuenda yo tuhun Nyoo tsi nyívi, cutuñí iñi ñi tan ñihi ca tsahnú ñi tsihin tuhun Nyoo. Tan ndu ín ca iñi ñi jahá yo tan ndunyeé ca iñi ñi. **4** Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyívi, tandíhi ñi tsahnú.

5 Yuhu cuñí yu tsa cahan tandíhi ndo inga yuhu tsa ña tsitó ndo. Maa tyin vaha xaan ca tun cuví cuhva cuenda ndo tsa caahán Nyoo, tyin jatyinyeé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatun iin ndo cuví nacoto ndo nácaa caahán inga ndo tsihin inga yuhu, ñacatyí tuhun ndo

tsihin ñi. Tacan tan cuví jatyinyee tsi tsi tandihí ñi. **6** Yacan cuenda yañi, tatun yuhu tan tsaá yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janahá Nyoo tsi yu, o tsa jacoto ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyee tsi tsi tandihí ndo.

7 Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. **8** Tan tatun nu iyó cuatyí tan ña vaha tiví ra cutu, yoñi cua coto náa cuhva cua cañi tahan ra naha. **9** Tan tacan tucu yoo, tatun caahán yo inga yuhu tsa ña cutuñí iñi nyívi, ña cua coto ñi náa caahán yo. Tan cua catyí ñi tyin jiñi yo ña vaha cuñí, yacan caahán maa yo. **10** Cuaha xaan yuhu caahán nyívi nu ñuhu ñayívi ihya. Tan intuhun intuhun nuu yuhu tan iyó iyó ñi tsa cuñí tsi catyí. **11** Maa tyin tun ña cutuñí iñi yu yuhu tsa caahán inga nyívi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyívi inga ñuu tsa cuenda yu. **12** Yacan cuenda nyooho tsa cuñí xaan naquihin ndatu tsa tsahá Tatyí Ii Nyoo, ndücu ndo cuhva naquihin ndo tunyee iñi tsa cuvi jatyinyee vaha ca tsi nyívi yucú vehe ñuhu.

13 Tacan tucu nyooho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyívi náa cuñí tsi catyí. **14** Tyin tatun tsicán tahvi yu tsi Nyoo tsihin iin yuhu tsa ña cutuñí iñi yu, añaíma yu tsicán tahvi tsi Nyoo, maa tyin tsa tsiñi tuñi jiñi yu ña cutuñí iñi tsi. **15** Yacan cuenda cuñí tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñí iñi yu. Tan cuñí tsi tsa cata yu yaa tsihin yuhu tsa ña cutuñí iñi yu. Tan cata ndihí tucu yu yaa tsihin yuhu tsa cutuñí iñi yu.

16 Tyin tatun jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñi iñi nyívi tsa ña tsitó náa cuví yacan. Tan ña cua cuvi jacahnú ñi tsi Nyoo tsihin un. **17** Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyee tsi tsi inga nyívi tyin ña cutuñí iñi ñi tsa caahán un. **18** Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihí nyooho. **19** Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsí mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñí iñi ndo.

20 Tsahnu çaca iñi ndo, yañi. Tan ña lee xaan çaca iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi. **21** Catyí Nyoo nu libru ley ra tyehen: “Cua cahan yu tsihin nyívi ihya tsihin yuhu nyívi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo. **22** Yacan cuenda tsa caahán yo inga yuhu cuví tsi tumaa iin seña tsa cuenda nyívi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyívi tsa tsinú iñi tsi ra. **23** Tyin tatun tandihí ndo caahán ndo inga yuhu nu ndu iin ndo, tan quíhvi iin nyívi tsa ña yíhí cuenda Nyoo, o ñi tsa ña cutuñí iñi tuhun Nyoo, cua catyí ñi tyin jiñi ndo ña vaha cuñí. **24** Maa tyin tatun tandihí ndo tsahá cuenda ndo tsa caahán Nyoo tan quíhvi iin nyívi tsa ña yíhí cuenda Nyoo, a ñi tsa ña cutuñí iñi tuhun Nyoo, cua coto ñi tyin iyó cuatyí ñi tsa cuenda tsa cutuñí iñi ñi tsa caahán ndo. **25** Tan tandihí tsa iyó tsitsi añaíma ñi cua nacoto ñi, tan cua cuñi tsiti ñi

jacahnu ñi tsi Nyoo. Tan cua catyi ñi tyin nditsa nditsa cuii tsa nyaá Nyoo tsihin ndo.

Nacaa javahá yo culto iin cuhva vaha

26 Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cūhva cuenda ndo itsi; a tsahá ra tsa cata ndo yaa, o tsa jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyi tuhun ndo naa cuñí tsi catyí inga yuhu can. Maa tyin tandihí yacan taahán tsi cuví tsi iin tsa tsahá tunyee iñi maa Nyoo tsi tandihí ndo tsa yihí ndo cuenda ra. **27** Tatun cua cahan ndo inga yuhu nu ndu iín ndo, cuñí tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña cahan tandihí ndo juvin ñi cuhva tsa caahán inga ndo. Tan inga tucu tuhun cuñí tsi tsa nacatyi tuhun inga ndo tsa caahán ndo. **28** Maa tyin tun yoñi cuví nacatyi tuhun tsa caahán ndo, vaha taxin ca, ña cahan ndo tsihin inga yuhu nu ndu iín ndo. Cahan ndo tsihin Nyoo tsihin inga yuhu tun cuñí ndo, maa tyin ndihí cuhva tsiñi ñi maa ndo. **29** Tacan tucu tatun tsahá cuenda yo tsa caahán Nyoo. Cahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo. **30** Maa tyin tatun jacoto Nyoo náa inga ca tuhun tsi inga nyivi tsa yucú tsiñi tuhun caahán ndo, tacan tan ra tsa nyaá caahán can, cuñí tsi jandihí ra tsa caahán ra tan cahan inga ñi. **31** Tan tacan tandihí nyooho tsa naquihín tuhun tsa tsahá Nyoo cuví nacatyi tuhun intuhun intuhun ndo, tyin tacan tan cutuhva tandihí nyooho tsa ndu iín vehe ñuhu tan ndu iin ca iñi ndo. **32** Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihí cahan inga nyivi, **33** tyin Nyoo ña cuñí ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iín nyivi yihí cuenda ra Cristo, **34** tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yñi ñi tumaa catyí ley Nyoo. Tan tacan taahán tucu tsi javaha nyooho. **35** Tatun náa cuñí ñi coto ñi, na ndaca tuhun ñi tsi yñi ñi nda yuvehe ñi, tyin ña vaha tsa cahan ñiñaha nu ndu iín ndo.

36 Tatun sñin cuhva tsicá iñi ndo, cuñí tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo. **37** Tatun ndáa nyooho cuñí tyin ndusu yuhu Nyoo cuví ndo, o cuñí ndo tyin Tatyí Ii Nyoo jaquihín ityi tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví. **38** Maa tyin tatun ña cuñí ndo naquihín ndo tuhun ihya, ndi nyuhu tan ña cua naquihin ndi tuhun caahán nyooho.

39 Tan tacan, yañi, nducu ndo cuhva cuhva cuenda ndo tuhun Nyoo tsi nyivi. Tan ña çasi ndo nu cahan nyivi inga yuhu. **40** Maa tyin javaha ndo tandihí tsihin tsa vii tan tsa catsi.

Nacaa nandoto ra Cristo

15 **1** Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihin ndo itsi tan ñiñi iñi añima ndo tsinú iñi ndo. **2** Tan juvin tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinu iñi ndo tsi ra Cristo.

3 Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyi yu tyin tsihi ra tsacatyí cuatyí yo, tumaa catyí nu libru Nyoo tyin cua cuví. **4** Tan quihvi cuñu ñuhu ra tsitsi ñuhu. Maa tyin tsinu uñi quivi

nandoto ra tumaa catyí nu libru Nyoo. ⁵ Tan tsa yahá tan quituví ra nuu ra Pedro tan quituví ndíhi ra nuu tandíhi ra tsicá tyiñu ra. ⁶ Yahá can tan quituví ra nuu yaha ca uhun cientu nyívi yíhí cuenda ra. Tan juhva ñi can tsa tsihi ñi, maa tyin ndi iyó cuaha ca ñi nda cuanda vityin. ⁷ Yahá can tan quituví ra nuu ra Jacobo. Tacan tan quituví ndíhi ra nuu tandíhi ra tsicá tyiñu ra.

⁸ Tan nu ndíhi ña quituví ndíhi ra nuu yuhu, tsa cuví yu tumaa iin lee tsa cacú yutya. ⁹ Tyin tsa nuu tandíhi ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaá ndaha xaan yu tsi nyívi yíhí cuenda ra. ¹⁰ Maa tyin Nyoo vaha iñi ra tsihin yu. Yacan cuenda tsahá ra ndatu tsa cuví yu ra tsicá tyiñu ra tan ña cuatu tsahá ra tyiñu tsi yu, tyin cuaha ca tyiñu javahá yu tsihin tsi tan ñavin ca tandíhi ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can. ¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

Nu jacuahá ra Pablo tyin nditsa tsa sua nandoto ndiyi

¹² Tsa caahán ndi tsihin ndo yacan cuví tsa nandoto ra Cristo tsa yahá tsihi ra tan ¿Nacuenda yíhí ndo catyí ndo tyin ña nandoto ndiyi? ¹³ Tyin tatun ña sua nandoto ndiyi, ndi ra Cristo tan ña nandoto ra quívi can. ¹⁴ Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra. ¹⁵ Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo

tsi ra Cristo. ¹⁶ Tyin tun ña sua nandoto ndiyi, ndi ra Cristo tan ña nandoto ra. ¹⁷ Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jahá ra tucahnu iñi cuatyí ndo.

¹⁸ Tan ndi nyívi tsa tsihi tsa yíhi cuenda ra ña cacú ñi tun ña nditsa tsa nandoto ra. ¹⁹ O tun nu ñuhu ñayivi ihya ñi jatinyeé ra tsi yo, tan ña sua quitsi ra inga tsaha, nduve yahvi nyaá tsinú iñi yo tan cuví yo nyívi soho ca tsa nuu tandíhi ca nyívi.

²⁰ Maa tyin tsitó vaha yo tyin nditsa tsa nandoto ra Cristo. Tan juvin ra cuví ra tsa nandoto jihna ca tsitsi tsa tandíhi ca ndiyi tsa sua nandoto. ²¹ Tyin tsacatyí cuatyí ra Adán tan tsicoo tuhun tsihi. Tan yacan tsihi nyívi nda cuenda vityin. Maa tyin tsa cuenda tsa nandoto ra Cristo sua nandoto tandíhi nyívi yíhi cuenda ra. ²² Tyin tumaa tsa tandíhi yo tsihi tyin cuví yo tata ra Adán, tacan tucu sua nandoto tandíhi yo tan coo yo ñayivi nyito tyin cuví yo nyívi ra Cristo. ²³ Maa tyin sua nandoto yo quívi taahán tsi tsi yo. Jihna ca ra Cristo nandoto. Tan quívi quitsi ra inga tsaha sua nandoto ñi yíhí cuenda ra. ²⁴ Yaha can tan sua naa ñuhu ñayivi ihya tan ña sua cundaca ñaha ca ra cumí tyiñu naha ra, tan ndi nu tatyí ña vaha nahnu ña sua cundaca ñaha ca nahnu. Tyin ra Cristo sua quihin nyaá ra tunyee iñi tsa iyó tsi tandíhi nahnu, tan sua nacuhva cuenda ra can tsi Nyoo Jutu ra. ²⁵ Tyin ra Cristo sua cundaca ñaha ra nda cuanda quívi cuhva Nyoo tsa cuví jaha canaa ra tsi tandíhi nu xaan iñi tsi ra nahnu. ²⁶ Tan nu tsa sua janaa ra nu ndíhi ña, nu ican cuví tuhun tsihi. ²⁷ Tyin tsa tsahá Nyoo tsa quíhi ndaha ra tandíhi maa tsa iyó. Maa tyin nu catyí tyin tandíhi nacuhva cuenda Nyoo tsi ra Cristo, ña cuñi tsi catyí tyin quíhi ndaha

ndihi ra tsi maa Nyoo tyin maa Nyoo cuví ra tsahá tsa quíhi ndaha ra tandíhi maa tsa iyó. **28** Maa tyin quívi jaha canaa ra Cristo tandíhi can, tacan tan maa ra, tsa cuví ra Sehe Nyoo, cua nacuhva cuenda nyico ra tandíhi tsa tsahá Nyoo tsi ra. Tyin tacan tan cundaca ñaha Nyoo tandíhi maa tsa iyó.

29 Tun tsatyin ña nandoto ndiyi, ¿nacuenda tyin juhva nyivi tsicoondutyá ñi tsa cuenda ndiyi? ¿Tan nacuenda javahá ñi tyeheh tun ña tsinú iñi ñi tyin coo quívi cua nandoto ndiyi?

30 Tan tacan tucu maa ndi, tun ña cua nandoto ndi, ¿nacuenda tyin ndoó ndi vaha tsa nyehé ndi tundoho ndíhi quívi ñi? **31** Tandíhi ñi quívi nducú nyivi tsi yu cahñi ñi, tan tsa nditsa cuví tsi, yañi, tumaa tsa nditsa tsa sií cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo. **32** Nduve náa catyí tsa nyehe yu tundoho tsa cuñi cahñi nyivi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyivi: “Catsi yo, cōho yo tyin tyaan isa cua cúu yo”, catyí ñi tsa ña tsitó.

33 Tan catyí tucu ñi tyin: “Tun cutahán yo tsihin nyivi caquiñi jativí ñi cuhva vaha iyó yo.” Tan tsehe cuví tsa nditsa. Yacan jáha ndo cuenda tsi ndo tan ña cuhva ndo tsa jandavi ñaha nyivi tsi ndo. **34** Jáha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyeheh tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quívi quitsi nyico ra Cristo

35 Maa tyin yihí ndo cua ndaca tuhun ndo: “¿Nacaa cuñu ñuhu ñi cua cuví?” **36** ¿Nacaa tsa soho xaan ndo? ¿A ña tsitó ndo tyin tatun tatsi yo iin

tsiti, cuñí tsi tsa tyahyu jihna tsi? Tacan tan cana nuu tsi. **37** Tyin tsa tatsí yo nuñi, ñavin tsa cuví maa tsi itu tan tatsí yo. Tyin nuñi cuví tsi tatsí yo tan tacan ñi cuñí tucu yo tsihin náa inga ca tsiti. **38** Nyoo javahá ra nácaa cuñí maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduvi tsi inga ca tsiti. **39** Tan tacan tandíhi cuñu ñuhu, ña inducu caá tsi, tyin cuñu ñuhu nyivi, siin caá tsi, tan cuñu ñuhu quiti nahnu, siin caá tucu can, tan cuñu ñuhu saa, siin caá tucu yacan, tan tyaca siin caá tucu can.

40 Tan tacan tucu tsa iyó andivi, siin caá tsi. Tan siin caá tucu tsa iyó nu ñuhu ñayivi ihya. Sií xaan caá tsa iyó nda andivi, tan siin tyaqui tucu tsa iyó nu ñuhu ñayivi ihya. **41** Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu. **42** Tan tacan tucu tuhun tsa cua nandoto ndiyi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo. **43** Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsiihí can. Maa tyin cua nandoto iin tsa sií caá tan iyó ca tunyee iñi tan ña cua cúu ca can. **44** Tsa tsiihí yo tsicutsí yo cuñu ñuhu tsa naquihin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

45 Catyí tutu Nyoo tyin ra Adán ra tsa tsicoo tsa jihna ñi, tsahá Nyoo ñayivi coo ra. Tan ra Cristo cuví ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juven ra cuví Tatyí Ii. **46** Tsa jihna ñi taahán tsi coo yo tsihin cuñu ñuhu cuatyí yo, yaha

can tan coo yo cuenda Tatyí Ii Nyoo. **47** Rayíi tsa tsinú tsa jihna ñi, tsihin nyaca ñuhu tsinú ra. Tan cuví ra cuenda ñuhu ñayívi. Maa tyin ra Cristo cuví ra tumaa rayíi tsa tsinu uvi tan cuví ra cuenda gloria.

48 Tandíhi yo iyó cuñu ñuhu yo tumaa tsicoo cuñu ñuhu ra Adán tsa tsinú tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andívi. **49** Tumaa ndacu yo tsi rayíi, ra tsa tsinú tsihin nyaca ñuhu, tacan tucu cua ndacu yo tsi ra Cristo ra iyó nda gloria.

50 Tan cuñí yu cahan yu tsihin ndo, yañi, tyin cuñu ñuhu yo ña cuví quíhvi tsi nu ndacá ñaha Nyoo, tyin iin tsa yatyi tiví ña cuví quíhvi can nu yíhí tsa ña tuhvá tiví. **51** Tan cuñí tucu yu tsa coto ndo iin tsa xeehe tsa yoñi maa tsitó. Ña tandíhi yo cua cúu, maa tyin tandíhi yo tan cua nasama cuhva caá yo. **52** Tan nu cua ndíhi tiví ángel trompeta, cua nandoto ndíyi iin yaha cuii ñi tumaa tsa ndaahvá tinuu yo. Tyin cua tiví ra trompeta tan cua nandoto nyívi tsihí tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo. **53** Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa. **54** Tan quívi cua nasama cuñu ñuhu yo tan cua ñihi yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jahá canaa ra tsi tuhun tsihí.”

55 Yooho, Tuhun Tsihí, ¿náa tunyee ñi tsa tsicoo tsi un tyin cahñi un tsi ndi?

¿Náa jahá canaa un, yooho Tuhun Tsihí?

56 Tyin cuatyí yo tsahá can tsa cahñi tuhun tsihí tsi yo, tyin ley tsahnu tsahá tunyee ñi tsi can. **57** Maa tyin tyahví nyoo tsi Nyoo, yañi, tyin jaquitsí ra tsi Jutu Mañi yo Jesucristo tan tsahá ra tunyee ñi tsi yo tsa jaha

canaa yo tsi nu tuhun tsihí can.

58 Yacan cuenda yañi, cunyaa naa vaha ndo tsi Nyoo tsihin tsa ñi ñi añima ndo. Tan jañihi ca ndo jaha tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

Nu tsahá cuenda ra Pablo tsi nyívi nácaa taahán tsi jatinyee ñi tsi inga ñi yíhí cuenda Nyoo

16 **1** Tan tuhun tsa jatinyeeé ndo xuhun tsi nyívi ndaahvi, ñi yíhí cuenda Nyoo, javaha ndo tumaa tsahá cuenda yu tsi nyívi tsicá vehe ñuhu ñuu tsa cayucú Galacia.

2 Jandu iin ndo xuhun tsa taahán tsi cuhva ndo tsi ñi tahan tahan una quívi nácaa tsahá maa Nyoo tsi ndo. Tan ña cuatu ndo nda tsaa yu. **3** Tan nacatsi ndo ndáa ra cuñí maa ndo tyin cundaca xuhun can. Tan tsa tsaa yu, cua javaha yu iin carta tyin cundaha ndíhi ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. **4** Tan tatun tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndíhi nu cua cahan ra tuhun ra Cristo

5 Tsa cua quitsi yu nu yucú ndo ñuu Corinto, cua yaha yu ityi Macedonia. **6** Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatinyeeé ndo luxu tsi yu tan cuhun yu inga ñuu. **7** Ña iin yaha ñi cua yaha yu nu yucú ndo tyin cuñí yu ndoo yu juhva quívi tsihin ndo tatun Jutu Mañi yo tan cuñí ra. **8** Maa tyin cua cunyí yu ñuu Éfeso ihya nda cuanda yaha quívi vico Pentecostés tsa jacahnú nyívi Israel. Tacan tan cua quitsi yu nu yucú ndo. **9** Cua ndoo yu juhva quívi ihya tyin tsahá xaan tsi cuhva caahán yu tuhun Nyoo tsihin nyívi vasu ndi maa cuaha ñi ña taahán ñi ñi tuhun ra.

10 Tatun tsaá ra Timoteo nu yucú ndo, na cunyi ra tsihin ndo. Tan vaha tyánuu ndo tsi ra tyin juvin ñi tyiñu Jutu Mañi yo jahá tyiñu ra tumaa maa yu. 11 Tan vaha cuñi ndo nyehé ndo tsi ra. Tan jatyiñyee ndo tsi ra na quitsi ra nu nyíi yu tyin ndatú yu tsi ra tsihin inga ca ra yañi yo naha ra.

12 Tan ra Apolos yañi yo, cañan ndaahvi xaan yu tsihin ra na quitsi ra nu yucú ndo tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

Nu tsahá ra Pablo nacumi tsi tandihi nyivi yihí cuenda Nyoo ñuu Corinto

13 Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo. 14 Tandihí tsa javahá ndo, javaha ndo tsa cuenda tsa cuñi ndo tsi Nyoo tan tsi nyivi yihí cuenda ra.

15 Yañi, tsitó ndo tyin jihna ca nyivi ra Estéfanos natsinú iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano. 16 Tan cuñi yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanos, tan tsi tandihí ca ñi tsa jatyiñyee tan jahá tyiñu cuenda Nyoo. 17 Tan sii xaan cuñi yu tyin

quitsi ra Estéfanos, ra Fortunato, tan ra Acaico. Tan jatyiñyee ra naha tsi yu tyin nyooño ña cuví quitsi ndo tyin cañi xaan ñuu ndo. 18 Maa tyin maa ra naha quitsi ra naha. Tan jandunyiye ca ra naha iñi yu tsihin tuhun Nyoo, tumaa tsa jandunyiye tucu ra naha iñi nyooño. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

19 Tan vatsí nacumi tsi ndo jahá tandihí nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi. 20 Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

21 Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

22 Tatun ndaa nyivi ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, ñaha!

23 Tan na nasoco Jutu Mañi yo Jesucristo tsi tandihí ndo. 24 Tan catyí yu tsihin ndo tyin yuhu cuñi yu tsi tandihí ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta cuenda nyivi yihí cuenda Nyoo ñuu Corinto

1 ¹ Yuhu ra Pablo, cuví yu iin ra tavā tyiñu ra Cristo Jesús tyin maa Nyoo nacatsi tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihi ca nyivi yihí cuenda Nyoo tsa iyó inga ñuu tsa cayucú nanií cahnu Acaya. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

Nu nyehé xaan ra Pablo tundoho nu tsicá ra caahán ra tuhun ra Cristo

³ Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihi ñi tsaha. ⁴ Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuvi jandusii ndi iñi nyivi nyehé tundoho tumaa jandusí maa ra iñi ndi. ⁵ Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi. ⁶ Yacan cuenda tatun nyehé ndi tundoho tsa cuenda tsa jacotó ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusii Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho

nyehé ndi. ⁷ Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñi ndi tsa coto ndo tyin cuaha xaan tundoho nyehé ndi tsa tsiyucú ndi ñuhu Asia. Ñihi xaan nducú cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican. ⁹ Tsa nyehé ndi tyin tsa cuñi cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñi tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi. ¹⁰ Nyoo jacacú tsi ndi quivi can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi, ¹¹ tun nyooho tan ña jandihí ndo tsa jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

Nu caahán ra Pablo nacuenda ña tsahan ra ñuu Corinto

¹² Iyó iin tuhun tsa tsahá tsa sii xaan cuñi ndi tan tuhun ihya cuví tsa cuiti iyó ndi, tan ndaa iyó ndi tsihin tandihi nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá

tsa vaha tsa iyó tsi ra tsi ndi.

13-14 Nu tutu tsa tsa yaha jaquitsi ndi tsi ndo, tyaq ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñi ndi tsa cutuñi vaha ca iñi ndo tandihi tuhun can tyin tacan tan sihi cua cuñi ndo tsihin ndi quivi quitsi Jutu Mañi yo Jesucristo. Tan sihi cua cuñi tucu nyuhu tsihin nyooho.

15-16 Tsa cuenda tsa tsitó vaha yu tyin tacan cua cuvi: tyaq yu kuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusii iñi ndo. Tan tsicá tucu iñi yu tyin yaha can tan cuvi jatinyee ca ndo tsi yu tan cuhun yu Judea. Tyehen tyaq yu kuhva javaha yu, maa tyin ña cuví. **17** ¿A cuñi maa ndo tyin ña tyaq yu kuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyí ñi tyin vaha, maa tyin tsitsi aña ñi catyí ñi tyin ña vaha. Caahán ñi nduvi tuhun can tsa iin ñi kuhva. **18** Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu. **19** Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra. **20** Tan tsa cuenda ra ñihí yo tandihi tsa vaha tsa catyí Nyoo tyin kuhva ra tsi yo. Yacan cuenda tsa jacahnú yo tsi Nyoo, catyí yo tyehen: “Na cuvi tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo. **21** Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihi tucu ra tunyee iñi tsi nyooho. Nacatsi ra tsi yo, **22** tan tsahá ra Tatyí li ra coo aña yo, tan cuví tsi tumaa iin tuñi tsa tyaq ra tsi yo tan janahá tsi tsi yo tyin cua ñihi yo tsa cua kuhva ra tsi yo.

23 Ñaha ca maa quitsi nyico yu nu yucú ndo, tyin ña cuñi yu janducuihya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu. **24** Caahán ndi tandihi tuhun ihya tsihin ndo tsa cuenda tsa cuñi ndi jatinyee tahan yo tsi yo tan coo ca tusii iñi Nyoo tsi ndo. Ña cuñi ndi quihí ndaha ndi tsi ndo tyin nyooho tsa tsinú vaha maa iñi ndo tsi Nyoo.

2 ¹ Yacan cuenda ña cuñi yu quitsi yu tyin tacan tan ña kuhva ca yu tucuihya iñi tsi ndo. ² Tyin tatun yuhu tan janducuihyá yu iñi ndo, yoñi cua jandusii iñi tsi maa yu. Tyin nyooho ña cuvi ca jandusii ndo iñi yu tun tsa yaha janducuihya yu iñi ndo. ³ Yacan cuenda carta ñi jaquitsi yu tsi ndo. Ña cuñi yu quitsi yu tyin ña cuñi yu janducuihya ndo iñi yu tsihin kuhva iyó ndo. Tyin taahán tsi jandusii ndo iñi yu. Tyin tatun sihi cuñi yuhu, tsitó yu tyin tandihi yo tan sihi cuñi yo. ⁴ Quivi tsa tyaq yu carta can tsa cuenda ndo, tsicá xaan iñi yu. Cuihya xaan cuñi yu tan nda cuenda tsacu yu. Jaquitsi yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

Nu tsahá cuenda ra Pablo tsi nyivi nácaa taahán tsi jaha ñi tucahnu iñi

5 Ra tsa tsahá tucuihya iñi, ñavin yuhu ñi janducuihya ra iñi. Tyin janducuihya tucu ra luxu iñi nyooho. Caahán yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan. **6** Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra. **7** Vityin taahán tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra. **8** Yacan cuenda cuñi yu tsa cahan ndo tsihin ra tan janaha ndo tsi ra

tyin ndi cuñí ndo tsi ra. ⁹ Jaquitsi yu carta can tsi ndo quivi can tyin cuñí yu coto yu tatun cua tyaa yahvi ndo tsa tsahá cuenda yu tsi ndo. ¹⁰ Tan vityin nyivi tsa jahá nyooho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo.

¹¹ Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñí nu jandavi ñaha nu tsi yo.

Ra Pablo ña ndoo ra ñuu Troas tyin ña nañihí ra tsi ra Tito

¹² Quivi tsaq yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo.

¹³ Maa tyin tuñu xaan cuñí yu, tyin ña nañihí yu tsi ra Tito, yañi yo. Yacan cuenda vatsí yu ityi Macedonia ihya tan ña ndoo yu ndacan cahan yu tsihin nyivi.

Nu caahán ra Pablo tuhun ra Cristo tsihin tsa ñi iñi añaima ra

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iin xico tami tsa caná tandihi ñi ityi nu cuahán ndi. ¹⁵ Tyin nyuhu cuví ndi tumaa xico tami ra Cristo tsa cuenda Nyoo. Tan tandihi ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu. ¹⁶ Maa tyin tsa cuenda nyivi tsa ña cua cacu, ndasi caná tsi, tan cuñí maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin ¿yóo cuví jaha

tyiñu tyiñu ihya? ¹⁷ Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñí ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi iñi añaima ndi tyin iin ñi cuví ndi tsihin ra tan maa Nyoo tava tyiñu tsi ndi tsa cahan ndi tyin cuenda ra Cristo yihí ndi.

Tuhun tsa tsa ndoo ra Cristo tsihin yo

3 ¹ Tsa caahán ndi tuhun ihya, ¿a cuñí maa ndo tyin caahán ndi tacan tsa cuñí ndi nduyaa ndi? Ñavin. ¿A cuñí tsi cuhva ndi iin carta tsa catyí tyin vaha nyivi cuví ndi? ¿O cuñí tsi ndacan ndi carta tsi ndo tumaa javahá juhva nyivi? ² Ña cuñí tsi. Tyin tsa tyaa Nyoo tsi ndo añaima ndi, tan maa ndo cuví carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. ³ Tan catsi nyehé ñi tyin cuví ndo carta tsa tyaa ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsitsi añaima ndo tsihin Tatyí Ii Nyoo nyito. Tan ñavin nu yuu tsinyaa tsi.

⁴ Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatinyeé ra Cristo tsi ndi. ⁵ Ña cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihi tsa javahá ndi tan maa Nyoo javahá can. ⁶ Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayivi tsa coo yo tyin iyó Tatyí Ii ra añaima yo. Ley tsa tsahá Nyoo tsi ra Moisés ña tsahá tsi ñayivi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

⁷ Ley tsahnu can tsinyaa nu yuu

tsihin letra, tan cahnu xaan cuví tsi. Yacan cuenda tsa tsaꝯ ra Moisés tsihin tsi nu yucú nyívi Israel, nayuhví xaan ñi nyehe ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quívi quítsi ley tsa tsahá tuhun tsiihí, 8 yaha ca cahnu cuví tuhun tsa ndoó Nyoo tsihin yo tsa tsahá Tatyí Ii ra tsi yo! 9 Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsa tsa ndoꝯ Nyoo tsihin yo tyin janduvahá tsi tsi yo nuu ra. 10 Nditsa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo. 11 Tyin tatun cahnu cuví tsa tsicoꝯ juhva ñi tyembu, yaha ca cahnu cuví tsa ña cua cundihi maa.

12 Tsitó vaha ndi tyin ña cua cundihi tsi. Yacan cuenda caahán ndi tsihin tsa ñi iñi añima ndi. Ña cahan nuu ndi tan ña yuuhví ndi caahán ndi. 13 Tan ña javahá ndi tumaa javahá ra Moisés. Tyin ra Moisés tyasí ra nuu ra tsihin jahma, tyin tacan tan ña nyehe nyívi Israel nu cua naa tsa xiñu nuu ra. 14 Quívi can ña cutuñi iñi ñi. Nda cuanda vityin tan ña cutuñi iñi ñi. Tyin tatun cahví ñi ley tsahnu ña cutuñi iñi ñi itsi tyin ndasí tsa tsiñi tuñi jiñi ñi tumaa tsindasí nuu ra Moisés quívi can. Yoñi maa cuví jatsiyo yacan tyin intuhun ñi maa ra Cristo cuví jatsiyo can. 15 Nda cuanda vityin tan ña cutuñi iñi ñi ley tsa tyaꝯ ra Moisés tun cahví ñi itsi. Tyin ndasí tsa tsiñi tuñi iñi ñi. 16 Maa tyin tatun nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi iñi ñi. 17 Tyin Jutu Mañi yo, Tatyí Ii cuví ra. Tan tatun iyó Tatyí Ii Jutu Mañi yo añima yo, tsitó yo tyin ña yihí ndaha ca ley tsahnu tsi yo. 18 Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehe nyívi tsa cahnu cuví Jutu

Mañi yo jahá yo. Tan cuahán nduvahá ca yo jahá Tatyí Ii ra.

4 ¹ Nyoo nyehe ndaahvi ra tsi ndi, tan tava tyiñu ra tsi ndi tsa cahan ndi tuhun ra tsihin nyívi yacan cuenda ña ndu uvi iñi ndi. ² Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyívi. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyívi, na jaha vaha ñi cuenda tyin tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi. ³ Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyívi ndasí tsa tsiñi tuñi iñi, ñi tsa cua cunaa. ⁴ Nu ña vaha, nu ndacá ñaha tsi nyívi iyó nu ñuhu ñayívi ihya, juvin nu tyasí tsa tsiñi tuñi iñi ñi, tyin tacan tan ña tsinu iñi ñi tsi Nyoo, tan ña nyehe ñi tsa nditsin ra, tan ña cutuñi iñi ñi nácaa jacacú ra Cristo tsi yo, ra iin ñi cuví tsihin Nyoo. ⁵ Ñavin tuhun maa ndi caahán ndi. Tyin tuhun ra Jesucristo caahán ndi tsihin nyívi tyin juvin ra cuví Jutu Mañi yo. Tan nyuhu musu ñi ndo cuví ndi tyin cuñi ndi tsi ra. ⁶ Nyoo catyí tyin ndunditsin nu naa quívi tsinu ñuhu ñayívi. Tan juvin ñi ra jandunditsín tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayívi tsa tsihin tsa tsinú iñi yo tsi Nyoo

⁷ Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihín yo itsi. Juvín tsi janahá tsi nyívi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi. ⁸ Yacan cuenda vasu ndi

maa nyehé xaan ndi tundoho tandihí ñi nu cuahán ndi, ña ndu uví ñi ndi. Yihí tsaha ña tsitó ndi nácaa quita ndi nu tundoho nyehé ndi, maa tyin nyitá ñi ndi tyin cua quita vaha ndi. **9** Vasu ndi maa nyaá ndaha nyivi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsiihí ndi. **10** Tandihí ñi nu cuahán ndi tan nyicún tuhun tsiihí tsi ndi tsa cuenda tsa caahán ndi tuhun ra Jesús. Tyin tacan tan nyehe nyivi tyin iyó ndi ñayivi ra. **11** Tsitsi tsa ndi iyó ndi nu ñuhu ñayivi ihya tandihí ñi quivi tan ndatú ndi tuhun tsiihí tyin tandihí ñi quivi tan nducú nyivi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayivi ra aña ndi. **12** Yacan cuenda nyuhu tandihí ñi tsaha nyicún tuhun tsiihí tsi ndi tyin caahán ndi tuhun ra Cristo tsihin nyivi. Maa tyin nyooho, iyó ndo ñayivi ra Cristo tsa cuenda tuhun ra tsa cahan ndi tsihin ndo.

13 Tsinú ñi ndi tsi Nyoo tumaa tsinú ñi ra David tsi ra. Tumaa catyí ra nu libru Salmos: “Tsinú ñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú ñi ndi tsi Nyoo, yacan cuenda caahán ndi tuhun ra. **14** Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria. **15** Tandihí tuhun ihya cuví tsa cuenda tsa vaha tsi nyooho tan tsa vaha tsi cuaha ca nyivi. Tyin tun cuaha ndo naquihin tsa vaha Nyoo, cuaha xaan ndo cua nacuhva tyahvi nyoo tsi ra, tan cua jacahnu ndo tsi ra.

16 Yacan cuenda ña ndu uví maa ñi ndi, vasu ndi maa cuahán ndutsahnú cuñu ñuhu ndi, tyin ñayivi tsaa tsa iyó ndi ndutsaa tsi tan iin tan iin quivi. **17** Tundoho tsa nyehé ndi nu ñuhu ñayivi ihya, tsa yahá ñi maa

cuví tsi. Tan tsahá tsi tsa coo cuii ndi tsihin Nyoo nda gloria. **18** Yacan cuenda ña tyaá ñi ndi tsa cuví nyehe yo. Tyin nyitá ñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihí maa tsa iyó tsi.

5 ¹ Tsitó yo tyin quivi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihí maa tsa cuenda intuhun intuhun yo. Tan ican cua cuyucu aña yo. Iyó can nda gloria tan ñavin ra ñuhu ñayivi ihya javaha can. **2** Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñí yo cuhun yo coo yo tsitsi cuñu ñuhu vaha tsa cua cuhva Nyoo tsi yo. **3** Cuhun aña yo tsitsi tsa tsahá Nyoo. Tan cua cunditsi yo itsi tumaa nditsí yo jahma tyin tacan tan ña cua cutandii aña yo. **4** Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñí yo. Maa tyin ña ndaahvi cuñí yo tsa cuenda tsa cuñí yo quita aña yo tsitsi cuñu ñuhu yo tan cutandii tsi. Ndaahvi cuñí yo tsa cuenda tsa cuñí yo coo aña yo tsitsi tsa ña cua cundihí maa, tyin tacan tan coo cuii yo. Tan cua cundihí tsa tañi ñi tsicoo jaha tsa ña cua cundihí maa. **5** Tan Nyoo tyaq ra cuhva tyin tacan cua javaha ra tsihin yo. Tan tsahá jihna ñi ra Tatyí li ra tsi yo tyin tacan tan cuita ñi yo tyin cua cuhva ra tandihí ca tsa cua cuhva ra tsi yo.

6 Yacan cuenda nyitá ñi ndi tsi Nyoo tsihin tsa ñi ñi aña ndi tsa nducuhún ñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria.

7 Vasu ndi maa ña cuví nyehe yo tsi ra, maa tyin iyó yo nu ñuhu ñayivi ihya tsihin tsa tsinú ñi yo tsi ra.

8 Nyitá ñi ndi tsi ra tan cuñí ndi quita ndi tsitsi cuñu ñuhu ihya tan

cuhun ndi coo ndi tsihin Jutu Mañi yo. **9** Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria. **10** Tyin tandíhi yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quivi tsicoo yo tsitsi cuñu ñuhu yo cuenda nu ñuhu ñayivi ihya.

Nu tsahá cuenda ra Pablo nácaa cuví coo vaha yo tsihin Nyoo

11 Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa caahán ra. Yacan cuenda nducú ndi cuhva cahan ndi tsihin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñi ndi tsa coto tucu nyooho. **12** Caahán ndi tyehen, maa tyin ñavin tsa cuñi ndi nduyaa ndi tyin caahán ndi tsa cuenda tsa cuñi ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihi ndo cuhva cahan ndo tsihin inga ca ra tsa nduyaá naha ra. Catyí ra naha tyin vaha iyó ra naha tsihin Nyoo, maa tyin tsitsi añima ra naha maa ñi tsa ña nditsa iyó. **13** Tatun caahán ndi tuhun Nyoo, catyí juhva nyivi tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñi ndi, tsa cuenda nyooho vaha cuñi ndi. **14** Tan tsitó ndi tyin intuhun ñi ra Cristo tsihi tsa cuenda tandíhi nyivi ñuu ñayivi. Tacan tan tsihi tandíhi yo. [Tsa tsihi yo cuñi tsi catyí tyin nacoó yo tsa javahá yo cuhva cuñi maa yo,] Tan tsa tyehen tsitó yo tsa tsihi ra Cristo tsa cuenda tsa cuñi xaan ra tsi yo, jañiñi tsi tsi yo tsa

cahan yo tuhun ra tsihin nyivi.

15 Ra Cristo tsihi ra tsa cuenda tandíhi yo tyin tacan tan coo yo cuhva cuñi maa ra tan ñavin cuhva cuñi maa yo tyin tsihi ra tan nandoto ra tsa cuenda tandíhi yo. **16** Vityin tan ityi nuu, ña caca ca iñi yo nyehe yo cuhva iyó nyivi tumaa tsicá iñi nyivi ña tsitó tsi Nyoo. Tsicoo quivi tacan tsicá iñi yo nyehe yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan.

17 Tyin quivi nacuhva cuenda yo tsi yo tsi ra Cristo, jandutsaa ra añima yo. Tan nanduvi yo nyivi tsaahá ra. Tan tandíhi tuhun tsa tsicá iñi yo nu quitsi ca tsi, ña tsicá ca iñi yo can vityin ihya tyin tsahá ra tsa tsiñi tuñi tsaahá tsi yo.

18 Maa Nyoo javahá tandíhi yacan tyin vityin iyó vaha yo tsihin ra jahá ra tsa cuenda ra Cristo Jesús. Tsahá cuenda ra tsi yo tyin cuñi tsi jacoto yo tsi nyivi nácaa javaha ñi tan cuví coo vaha ñi tsihin ra. **19** Tyin maa ra tsa yahá nduvahá iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi.

20 Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo. **21** Ra Cristo ña javahá ra ndi intuhun cuatyí. Maa tyin Nyoo jaquitsi ra tsi ra nu ñuhu ñayivi ihya; quitsi cúu ra tsa cuenda tandíhi cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvahá yo jahá tsa vaha Nyoo.

6 ¹ Yañi, iin caa ñi jahá tyiñu yo tyiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandíhi tsa vaha tsa tsahá ra tsi intuhun intuhun ndo.

2 Tyin catyí Nyoo nu tutu ra tyehen: Quiví tahañ tsi tsa jacacu yu tsi un, tsiñi yu tsa cahan un tan jatyinyee yu tsi un, catyí Nyoo.

Jaha ndo cuenda tyin vityin cuví quívi taahán tsi. Tan vityin cuví quívi jacacú Nyoo tsi yo.

3 Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyívi tyiñu Nyoo tsa javahá ndi. 4 Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé ñi ndi náa ndihí tsa taahán ndi, náa tundoho, tan náa tsihi. 5 Vasu ndi maa cañi nyívi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan ñi ndi. Tan ñihi xaan jahá tyiñu ndi nda cuanda tsicoó nyito ndi, tan tsisocó ndi. 6 Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan ñi ndi nyehé ndi tandihi maa nuu tundoho tan ña tsihi ndi tsihi. Vaha ñi ndi, tan cuñi xaan ndi tsi nyívi tyin iyó Tatyí Ii Nyoo aña ndi. 7 Caahán ndi maa ñi maa tuhun Nyoo tsa nditsa. Iyó tunyee ñi ra tsihin ndi. Tan tsatyíñu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha. 8 Yíhi quívi vaha cuñi nyívi nyehé ñi tsi ndi, tan iyó tucu quívi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yíhi tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi. 9 Iyó tsaha jahá ñi tyin ña nacotó ñi tsi ndi, tan yíhi tsaha jacahnú tucu ñi tsi ndi. Iyó quívi tsa yatyin ña cúu ndi, maa tyin ña tsihi ndi tan ndi iyó ca ndi. Iyó quívi tatsí tuñi nyívi tsi ndi, maa tyin ña tsahñi tucu ñi tsi ndi. 10 Vasu ndi maa cuiihya cuñi ndi iyó tsaha, maa tyin ña tsindihí tsa sihi

cuñi ndi. Iyó tsaha ndaahvi ndi, maa tyin cuaha nyívi janducucá ndi tsihin tuhun Nyoo. Vasu nduve náa iyó tsi ndi, maa tyin tandihi maa tsa iyó tan tsii maa ndi cuví.

11 Nyooho nyívi ñuu Corinto; caahán catsi ndi tsihin ndo tsihin tsa ñi ñi aña ndi tyin nditsa tsa cuñi xaan ndi tsi ndo. 12 Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi. 13 Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo aña ndo, tumaa tsa javahá maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

Vehe Nyoo nyito cuví yo tyin iyó ra aña ndi yo

14 Ña ndu iin ndo tsihin nyívi ña tsinú ñi tsi Nyoo tyin ña nacatsí tahan aña ndo tsihin aña ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa. 15 Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú ñi tsi ra, ña cuví ndu iin yo tsihin nyívi ña tsinú ñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi. 16 Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jacahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahañ tsanaha:

Cua coo yu aña ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi, tan maa ñi cua cuví nyívi yu, catyí ra.

17 Yacan cuenda catyí ra:

Quita ndo mahñu nyívi ña tsinú ñi tsi yu.

Ña cütahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

18 Tan cuví yu jutu ndo.

Tan cuví ndo sehe yu,
catyí Jutu Mañi yo, ra iyó
tandíhi tunyee iñi tsi.

7 1 Yañi, yacan cuví tsa tsahá
Nyoo tsi yo, yacan cuenda cuñí
tsi nducu yo cuhva nduvaha vaha ca
yo. Tan ña javaha ca yo tsa caquiñi
tan ña caca ca iñi yo tsa ña vaha.
Cūiti coo yo tyin tyaá yahvi yo tsi
Nyoo.

**Nu nacatyí tuhun ra Pablo nácaa
nasamā cuhva iyó nyivī yihí cuenda
Nyoo ñuu Corinto**

2 Yañi, caahán ndaahvi yu tsihin
ndo, vaha cuñi ndo nyehe ndo tsi ndi
tyin nduve maa náa javahá ndi tsi ndi
intuhun ndo. Tan ndi ña jatívī ndi tsi
ndi intuhun ndo. Tan ña jandaví ñaha
ndi tsi ndi intuhun ndo. 3 Tsa caahán
yu tyehen tsihin ndo ñavin tsa caahán
yu tsi ndo cuví. Tyin tsa yaha catyí
yu tsihin ndo nda nu quítsi ca tsi,
tyin nditsa tsa cuñí yu tsi ndo. Tyin
iin caa ñi iyó yo tsihin Nyoo. Tatun
iyó yo, iin ñi cuví yo tsihin ra; o tatun
cúu yo, iin ñi cua cuví tucu yo tsihin
ra. 4 Tsitó vaha yu tyin cua javaha
ndo tsa vaha, yacan cuenda sīi xaan
cuñí yu nyehé yu tsi ndo. Vasu ndi
maa nyehé xaan ndi tundoho, maa
tyin ndu iin ca iñi añima ndi. Tan sīi
xaan ca cuñí ndi.

5 Nda quivī tsaá ndi Macedonia
ihya, tan ñaha ca maa quitatū ndi.
Tyin cuaha xaan tsihī tan tundoho
nyehé ndi tandíhi ñi ityi cuahán ndi.
Cañī tahan nyivī tsihin ndi. Tan tsicá
xaan iñi ndi tyin ña tsitó ndi tun cua
quita vaha tyiñu jahá ndi. 6 Maa tyin
Nyoo, tacan ñi maa jandu iín ra iñi
yo tun cuiihya cuñi yo. Tan jandu iin
xaan ra iñi ndi quivī tsaá ra Tito nu
yucú ndi ihya. 7 Tan ñavin tsa cuenda
tsa tsaá ñi ra, maa tyin sīi cuñí tucu
ndi tsa cuenda tsa jandu iin xaan ndo
iñi ra. Nacatyí tuhun ra tsihin ndi
tyin cuñí xaan ndo nyehe ndo tsi ndi.

Tan catyí tucu ra tyin tsacú xaan ndo
tsa cuenda tsa cuiihya cuñí ndo. Tan
ñuhú xaan iñi ndo tsi yu. Tsa tsitó yu
yacan, sīi xaan ca cuñí yu cuví.

8 Quivī can tsicá xaan iñi yu tyin
tsahá yu tucuiihya iñi tsi ndo tsihin
carta tsa jaquítsi yu tsi ndo. Tan ndu
uvī iñi yu tsa jaquítsi yu carta can
tsi ndo. Maa tyin juhva ñi quivī
nducuiihya iñi ndo. Tan vityin ña
tsicá ca iñi yu tsa cuenda tucuiihya
iñi tsa tsahá yu tsi ndo. 9 Tan vityin
sīi xaan cuñí yu. Ñavin tsa cuenda tsa
tsicoo ndo tucuiihya iñi, tsa cuenda
tsa ndu uvī iñi ndo cuatyí ndo jahá
tucuiihya iñi can. Tan cunyeé xaan
iñi ndo nyehe ndo tucuiihya iñi
cuhva taahán maa iñi Nyoo. Yacan
cuenda vaha javahá ndi tsa tsahá ndi
tucuiihya iñi tsi ndo. 10 Tyin tun
cunyeé iñi yo nyehe yo tucuiihya iñi
cuhva cuñí maa Nyoo, cua nasama
cuhva iyó yo tacan tan cua cacu yo.
Yacan cuenda na sīi cuñi yo tun
nyehé yo tucuiihya iñi cuhva cuñí
maa Nyoo. Tyin tucuiihya iñi tsa iyó
tsi nyivī tsa ña tsitó tsi Nyoo maa ñi
anyaya ñihí ñi tsihin can. 11 Nyooho
cunyeé iñi ndo nyehe ndo tucuiihya
iñi tumaa cuhva taahán iñi maa
Nyoo. Tan vityin, nyehe ndo tyin
cuaha xaan tsa vaha ñihí ndo tsa
cuenda tucuiihya iñi can. Jandaá
vaha ndo cuatyí ra can. Cuxaán ndo
tsi ra. Tan nayuhvī tucu ndo tsi Nyoo.
Tsaá cuenda vaha ndo nácaa cuahán
tyiñu can. Yaha can tan nda cuanda
cuñi ndo nyehe ndo tsi yu. Tan tatsī
tuñi ndo tsi ra can. Tan tsa cuenda
tsa javahá ndo tumaa cuñí maa Nyoo,
cuñi tsi catyí tyin nduve cuatyí ndo
tsa cuenda yacan. 12 Yacan cuenda
quivī jaquítsi yu carta can tsi ndo ña
jaquítsi yu itsi tsa cuenda tsa tsicá
xaan iñi yu cuenda ra tsa javahá
cuatyí can. Tan ndi ñavin tsa cuenda
ra tsa tahán ticanuu can. Maa tyin tsa
cuenda maa ndo, tyin cuñi yu tsa coto
ndo nácaa ñuhú iñi ndo tsi ndi nuu

Nyoo tan nácaa cuñí ndo jatyinyeé ndo tsi ndi. **13** Yacan cuenda nduvahá cuñí añima ndi. Tan sîi xaan cuñí ndi tyin tsitó ndi tyin cuñí ndo tsi ndi.

Tsa nyehe ndi tyin sîi xaan cuñí ra Tito, ndusîi ca îni ndi tyin tsaḥa xaan ndo tunyee îni tsi ra. Tan vaha xaan naquihîñ cuenda ndo tsi ra. **14** Catyî yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquitsî yu tsihin ra. Tan vityin sîi cuñí yu tyin cundaa tsa caḥan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsa tsa caḥan yu tsihin ra. **15** Cuñí xaan ra tsi ndo tsa nducuhún îni ra tyin javahá ndo tandîhi cuii maa tsa caḥan ra tsihin ndo. Tan tsa tsaḥ ra nu yucú ndo, ndaahvi jahá ndo tsi ndo nuu ra. Tan vaha xaan caḥan ndo tsihin ra. Tan vaha xaan tyaa yahvi ndo tsi ra. **16** Tan sîi xaan cuñí yu tyin tsitó yu tyin tacan ñi javahá ndo tsa vaha.

Na jatyinyeé yo tsi nyivi yihí cuenda Nyoo tsihin tsa ñîi îni añima yo

8 **1** Vityin yañi, cuñí ndi nacatyî tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. **2** Vasu ndi maa cuaha xaan tundoho nyehé ñi, maa tyin sîi cuñí ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi. **3** Tan cuvî yu tsandaa tyin nyehé yu tyin tsaḥa ñi cuaha tsa iyó tsi ñi tsihin tsa ñîi îni ñi tan nda cuanda yaha ca tsahá ñi. **4** Caahán ndaahvi xaan ñi tsihin ndi na cuhva ndi ndatu tsa jatyinyeé ndîhi ñi tsi nyivi yihí cuenda Nyoo tsa iyó ñuu Jerusalén. **5** Cuaha ca javahá ñi tan ñavin ca tsa tsicá îni maa ndi. Tyin tsa jihna ñi, nacuhvâ cuenda ñi tsi ñi tsi Nyoo tsihin tsa ñîi îni añima ñi. Tacan tan nacuhvâ cuenda tucu ñi tsi ñi tsi nyuhu tsa quihî ndaha ndi tsi ñi

tumaa cuñí maa Nyoo. **6** Tsa nyehe yu tyin tacan javahá nyivi Macedonia, tacan tan catyî yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra. **7** Tyin nyooho vaha xaan javahá ndo tandîhi tyiñu. Tsinú xaan îni ndo tsi Nyoo. Vaha xaan caahán ndo tuhun ra. Vaha cutuñí îni ndo. Tan tsihin tsa ñîi îni añima ndo javahá ndo tyiñu ra. Tan cuñí xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

8 Ña jañiñî yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñí yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndîhi ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan îni ndo. **9** Tyin tsa tsitó maa ndo nácaa tsa vaha îni Jutu Mañi yo Jesucristo tsihin yo. Maa ra cuca xaan ra, maa tyin quitsî ra nu ñuhu ñayivi ihya tan jandundaahvi ra tsi ra tsa cuenda tsa cuñí ra tsi yo tyin tacan tan cuvî janducuca ra tsi yo.

10 Yuhu cuñí yu tsa vaha tsa cuenda ndo, yacan cuenda cua cahan yu tsihin ndo tsa tsicá îni yu tsa cuenda tuhun ihya. Nyooho cuvî nyivi tsa quitsahá jandu iin jihna xuhun cuyava. Ñavin nyivi tavâ tyiñu tsi ndo javaha ndo tacan. Javahá ndo tacan tyin tacan tsicá îni maa ndo. **11** Yacan vityin cuñí yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo. **12** Tyin tatun iin nyivi tan cuñí ñi cuhva ñi tandîhi cuhva iyó tsi ñi tan cuhva ñi can tsihin tsa ñîi îni añima ñi, Nyoo cua naquihîñ cuenda ra tsa cua cuhva ñi tyin Nyoo ña jañiñî ra tsi yo cuhva yo tun nduve náa iyó tsi yo.

13 Caahán yu tyehen tsihin ndo, maa tyin ñavin tsa cuenda tsa cuñi yu tsa jatyinyee ndo tsi nyivi tan ndoo ndaahvi ndo tan ñi ican coo tsa coo tsi ñi. 14 Tyin vityin tsa iyó luxu tsi ndo, taahán tsi jatyinyee ndo tsi nyivi ndaahvi tsihin can. Tyin tacan tan inducu ñi coo tandihi yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyee tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho. 15 Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tsi nu tutu Nyoo.

Nu tyaá ra Tito naha ra cuhva cuhun ra naha ñuu Corinto

16 Tyahvi nyoo tsi Nyoo tyin tsaha ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo. 17 Tsa cahan yu tsihin ra tyin quitsi ra nu yucú ndo, ndog ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

18 Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihi nyivi yihí cuenda Nyoo.

19 Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cuhun ndihi ra tsihin ndi cundaca ndi xuhun tsi nyivi ndaahvi iyó ñuu Jerusalén. Cuñi xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihi nyivi yihí cuenda Nyoo.

20 Tsihin cuenda xaan javahá ndi tyiñu ihya, tyin tacan tan ña cahan nyivi tsi ndi tsa cuenda tsa tavá ndi xuhun cuenda nyivi ndaahvi.

21 Tacan ñi nducú xaan ndi cuhva javahá ndi tyiñu. Tatun cua javaha

ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

22 Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, siñ cuñi ra tyin tsitó ra tyin cua javaha ndo tsa vaha nuu Nyoo. 23 Tatun yóo tsicá tuhun tuhun ra Tito, catyí ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatyinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyí ndo tyehen tsihin ñi:

—Maa nyivi yihí cuenda Nyoo jaquitsí tsi ra naha. Tan vaha xaan jahá tyiñu ra naha tyiñu ra Cristo —catyí ndo.

24 Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan coto tandihi nyivi yihí cuenda Nyoo tyin nditsa tsa caahán yu tyin vaha javahá ndo.

Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo

9¹ Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahan yu tuhun can tsihin ndo.

2 Tyin tsitó yu tyin cuñi xaan ndo javaha ndo tsa vaha. Yacan cuenda siñ cuñi yu nacatyí tuhun yu tuhun ndo tsihin nyivi iyó Macedonia, tyin nyooho tsa iyó ñuu Corinto tsa canyí Acaya, nda cuyava tan quitsahá cuñi ndo jatyinyee ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñi ndihi tucu maa ñi jatyinyee ñi tsi nyivi ndaahvi.

3 Vasu ndi maa tsitó yu tyin vaha tsicá ñni ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyi nyívi Macedonia tyin ña nditsa yu tsa caahán yu. 4 Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yahá catyi yu tyin cuñí xaan ndo jatyinyee ndo tsi nyívi ndaahvi. 5 Yacan cuenda tsicá ñni yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quívi quitsi yu tandíhi tsi tan tsa iyó vaha tsi. Tyin tsa cacú ñni maa ndo tan javahá ndo cuhva can, tan ñavin nyuhu jañiñi tsi ndo.

6 Ndūcuhun ñni ndo tuhun tsa catyi tyehen: Ra tsa tatsí luxu ñni, luxu ñni tsiti naquihín ra. Maa tyin ra tsa tatsí cuaha, cuaha tsiti naquihín ra. 7 Tan intuhun intuhun yo cuñí tsi cuhva yo cuhva iyó ñni maa yo. Ñavin uvi caca ñni yo tan cuhva yo o cuhva yo tsa cuenda tyin jañiñi nyívi tsi yo. Tyin Nyoo cuñí ra tsi nyívi tsahá tsihin tsa siñ cuñí ñni. 8 Nyoo cuví cuhva ra tandíhi nuu tsa vaha tsi ndo, tyin tacan tan ña cumañi náa cumañi tsi ndo. Tan cuvi jatyinyee tucu maa ndo tsi inga ca nyívi. 9 Tumaa catyi tuhun Nyoo tyehen:

Iin ra vaha tsahá ra, tsihin tsa ñni ñni ra, tsa iyó tsi ra tsi nyívi ndaahvi.

Tan tumañi ñni tsa javahá ra, ña tsinaá tsi nuu Nyoo, catyi tsi.

10 Nyoo, ra tsahá tsiti tatsí yo, tsahá tucu ra tandíhi tsa tsatsí yo. Tan cua cuhva tucu ra cuaha ca tsiti tsa tatsi

ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyívi. 11 Tan coo ca tandíhi nuu tsa cuca tsi ndo, tyin tacan tan cuvi jatyinyee ca ndo tsi nyívi yihí cuenda Nyoo tsihin yo. Tan maa ñni, cua nacuhva ñni tyahvi nyoo tsi Nyoo tsa cuenda xuhun tsa jacuhun ndo tsi ñni. 12 Tyin tsa jatyinyee yo tsi nyívi yihí cuenda Nyoo tsihin tsa tsahá yo tsa tsiñi ñuhu tsi ñni, tsahá tucu yo tsa nacuhva ñni tyahvi nyoo tsi Nyoo. 13 Tan cua jacahnu ñni tsi Nyoo. Tyin tsihin tsa jatyinyee ndo tsi ñni, nyehé ñni tyin nditsa tsa tyaá yahvi ndo tuhun ra Cristo. Tan juvin ñni cua jacahnu ñni tsi Nyoo tsa cuenda tsa jatyinyee xaan ndo tsi maa ñni tan tsi tandíhi ca nyívi. 14 Cua ndacan tahvi ñni tsi Nyoo tsa cuenda ndo. Tan cua cuñi xaan ñni tsi ndo tsa cuenda tsa vaha tsa tsahá ndo tsi ñni jahá Nyoo. 15 Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

Ra Pablo iyó ndatu tsi ra tsa jaha cuenda ra tsi nyívi tsa jacoto ra tuhun Nyoo

10¹ Yuhu ra Pablo tsihin tsa vaha ñni ra Cristo caahán ndaahvi yu tsihin ndo, tyin yihí ndo catyi ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyí yu tsihin ndo, ndaahvi xaan jahá yu tsi yu, catyi ndo. 2 Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quívi quitsi yu nu yucú ndo tyin tsitó yu tyin cuñí tsi tsa cuxaan ñihi yu tsi juhva ndo. Tyin yihí ndo catyi ndo tyin javahá yu tumaa javahá ra ña yihí cuenda ra Jesucristo. 3 Nditsa tyin ra ñuu ñayívi cuví ndi. Maa tyin ña cañi tahan ndi tumaa cañi tahan nyívi iyó nu ñuhu ñayívi ihya. 4 Tyin tsa xaan tsa tsatyíñu ndi tsa cañi tahan ndi, ñavin

tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihi ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. **5** Tan tacan cuví jaha canaa ndi tsi tandihi tsa caahán ndasi nyivi siqui tuhun Nyoo, tan tandihi tsa ña vaha tsa tyasí nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihi cuhva tsicá iñi ndi tyin tacan tan tyaá yahvi ca ndi tsi ra. **6** Qivi cutuhva tandihi nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaá ndi cuhva tsa tatsi tuñi ndi tsi ndo.

7 Nyooho jahá ndo cuenda cuhva iyó nyivi. Tan ña jahá ndo cuenda nácaa iyó añima ñi. Tatun tsitó vaha ndo tyin cuenda ra Cristo yihí ndo, taahán tsi coto ndihi tucu ndo tyin cuenda ra yihí tucu nyuhu. **8** Ña cahán nuu yu caahán yu tsa tsaha Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jativi yu tsi ndo. **9** Ña cuñi yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo. **10** Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu. **11** Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

12 Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve

yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñi ra naha tyin vaha tsa jandu inducú ra naha tsi ra naha tsihin inga nyivi. **13** Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo. **14** Tun tsatyin ña jihna ca maa ndi cahan tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindaca tuhun ra Cristo nu yucú ndo. **15** Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuví jacuaha cuaha ca ndi tuhun ra Cristo tsi ndo, maa tyin tandihi ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi. **16** Tan tsicá iñi ndi cuhun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

17 Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo. **18** Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña jandaví ñaha ra vatya naha ra tsi ñi

11 **1** Vaha xaan tun ña cundihí iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihí iñi ndo tsihin yu vasu ndi maa tuhun maa yu cuví tsi.

2 Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo,

tyin juvin yu caḥan tuhun ra Cristo tsihin ndo nda jihna. Tan cuñí yu tsa cuñí ndo tsi intuhun ñi maa ra tumaa cuñí iin ñaha yoco tsi ra tsa cua cuvi yí ña. Tyin iin ñaha yoco cuñí ña tsi intuhun ñi maa ra tsa cua cuvi yí ña. **3** Maa tyin tsicá xaan iñi yu tsa cuenda ndo, coto tahan ndo tumaa taḥan ña Eva. Tyin ña Eva jandaví ñaha nu coo tsi ña tsihin maña nu. Tan yuhu ña cuñí yu tsa jandaví ñaha nyívi tsi ndo tan nasama ndo cuhva tsicá iñi ndo tuhun ra Cristo, tan jandíhi ndo tsa jacahnú ndo tsi intuhun ñi maa ra. **4** Tyin nyooho yatyi xaan nasamá ndo cuhva tsinú iñi ndo tuhun ra Jesús tun siin cuhva caahán nyívi tuhun ra. Tyin ñavin tuhun ra Jesús tsa jacoto ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí Ii Nyoo tsa naquihín ndo nda jihna. Yatyi xaan natsinú iñi ndo tuhun caahán nyívi tan ñavin tuhun, tsa jacacú ra Cristo tsi yo, tsa caḥan ndi tsihin ndo. **5** Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnu ca cuví ra can naha ra tan ñavin ca maa yu. Tan nyooho nyicún ndo tsi ra naha. **6** Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandíhi cuhva javahá ndi.

7 ¿O cuñí maa ndo tyin ña vaha javahá yu tsa ña quihín yu yahvi quívi caḥan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnu xaan jaha ndo tsi yu tan nducahnu maa ndo nuu Nyoo. **8** Nyívi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyíñu yu can quívi quítsi yu quítsi caḥan yu tuhun ra Cristo tsihin ndo. **9** Vasu ndi maa yíhi tsaha cumañi tsa cumañi tsi yu tsa tsinyi yu tsihin ndo, maa tyin ña

tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandíhi tsa cumañi tsi yu. Tacan jahá cuenda yu tsi yu tyin ña cuñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu. **10** Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyívi iyó naniñ Acaya.

11 ¿Nacuenda caahán yu tyehen cuñí maa ndo? ¿A tsa cuenda tsa ña cuñí yu tsi ndo? Ñavin. Tyin nda maa Nyoo tan tsitó ra tyin cuñi xaan yu tsi ndo.

12 Ña cua jandíhi yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha. **13** Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha. **14** Tan tsa javahá ra ican naha ra ñavin tsa iyo cuñi yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu. **15** Yacan cuenda ña iyo cuñi yo tun ra nyicún tsi nu tan jahá ra naha tyin javahá ra naha tsa vaha. Coo quívi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

16 Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndíhi tucu yuhu luxu. **17** Caahán yu tumaa caahán ra sana iñi tyin tacan tan cuvi nduyaa yu. Ñavin maa Jutu Mañi yo catyí tsihin yu tsa javahá yu tyehen. **18** Cuaha

xaan ra naha catyí ra naha tyin cahnu cuví ra naha tan nduyaá ra naha tsihin tsa iyó nu ñuhu ñayivi ihya. Yacan cuenda cua jacahnu ndihi tucu yuhu tsi yu. **19** Nyooho catyí ndo tyin tsitó xaan ndo. Tun nditsa ndo, ¿nacuenta tyin yatyi xaan tyaá soho ndo tsa caahán ra sana iñi can naha ra? **20** Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñí ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasí cuñí ra naha nyehé ra naha tsi ndo. Tan nda cuanda cañí ndaha ra naha nuu ndo. **21** ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu. **22** Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. **23** Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyii yu vehe caa. Tan cuaha tsaha cuñi cúu yu, maa tyin ña tsihi yu. **24** Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu. **25** Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu

tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuaa. **26** Tandíhi ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahañ yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javahá nyivi inga ñuu tsihin yu. Cuaha tsa tahañ yu tsitsi ñuu, nu tsiquí, nu ndutya ñuhu. Cuaha tsa tahañ yu jahá ra catyí tyin yañi yo cuví tsi ra naha tan ña nditsa ra naha. **27** Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihi yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

28 Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandíhi nyivi yihí cuenda Nyoo, nyooho tan nyivi inga ñuu tucu.

29 Tyin tun iin ndo tan vita cuñi ndo, tacan vita cuñi tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñi yu.

30 Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu.

31 Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu.

32 Quivi tsinyii yu ñuu Damasco ra cumi tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tñin ra naha tsi yu tan cundaca ra naha tsi yu vehe caa.

33 Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumi tyiñu ñuu can.

**Tsa nyehe ra Pablo nda nu tsinu
uñi gloria jahá Nyoo**

12 ¹ Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehe yu jahá ra. ² Nacotó yu iin ra yihí cuenda ra Cristo tsa tsahan andívi. Tsa iyó utsi cumi cuiya tsa quihin Nyoo tsi ra tsahan ra nda nu tsinu uñi andívi. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. ³⁻⁴ Tsitó yu tyin tsindacá Nyoo tsi ra nda paraiso nu iyó nyívi tsihi tsa tsinu iñi tsi Nyoo. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyívi tsa nacatyí tuhun ñi tuhun can. ⁵ Cuví nduyaa yu tsihin tsa janahá Nyoo tsi yu quívi can. Maa tyin ña nduyaa yu tsihin tsa javahá yu tyin nduyaa yu maa ñi maa tsihin tsa nduve tunyee iñi maa yu iyó tsi yu. ⁶ Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñí yu cahan yu can coto cahnu xaan jaha nyívi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

⁷ Nyoo ña cuñí ra tsa nduyaa yu tsihin tsa janahá ra tsi yu. Yacan cuenda tsahá ra tsa nyehe xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu. ⁸ Tan tsican yu uñi tsaha tsi Jutu Mañi yo na quihin nyaa ra tundoho can síqui yu. ⁹ Maa tyin catyí Jutu Mañi yo tyehen tsihin yu: “Yuhu cuñí xaan yu tsi un, tan yacan ñi cuví tsa

tsiñi ñuhu tsi un. Tyin nyívi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyí ra. Yacan cuenda sñi xaan cuñí yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu. ¹⁰ Yacan cuenda sñi xaan cuñí yu tsa nduve tunyee iñi maa yu iyó tsi yu. Vasu ndi maa caahán nyívi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sñi xaan cuñí yu tsa nyehe yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

**Tsicá iñi ra Pablo tuhun nyívi yihí
cuenda Nyoo ñuu Corinto**

¹¹ Tsa caahán yu tuhun maa yu nanduví yu tumaa ra sana iñi. Maa tyin maa ndo cuñí tsa cahan yu tacan tyin ña jahá ca ndo tsa ñayívi tsi yu. Maa ndo taahán tsi vaha cahan tuhun yu, vasu ndi maa ña cahnu xaan cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñí maa ra naha tyin vaha xaan ca ra naha tan ñavin ca inga ra tsicá tyiñu Nyoo. ¹² Yuhu cunye xaan iñi yu nyehe yu tandíhi tundoho quívi tsinyi yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tavá tyiñu ra. ¹³ ¿A vaha ca tyaá nuu yu tsi inga nyívi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandíhi ndo. Intuhun ñi tsa ña javahá yu tsihin ndo tsa tsinyi yu tsihin ndo cuví tsa ña tsican yu xuhun cuita catsi yu tsi ndo. Ña taahán tsi ndacan yu tucahun iñi tsi ndo tyin tsitó ndo tyin vaha javahá yu.

¹⁴ Vityin tsa iyó vaha tandíhi tsa tsii yu, tsa quitsi yu nu yucú ndo tsa

tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatyyinee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu. **15** Siñi xaan cuñi yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñi yu tsi ndo, nyooho ña cuñi vaha ndo tsi yu.

16 Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda. **17** ¿O cuñi maa ndo tyin cahán yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu? **18** ¿A jandaví ñaha ra Tito tan inga ra naha tsi ndo quivi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí Ii Nyoo iyó tsi nduvi ndi?.

19 Vasiqui tsicá iñi maa ndo tyin tandihí tsa caahán ndi, tan caahán ndi can tsa cuñi ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñi xaan ndi tsi ndo. **20** Tsicá iñi yu coto ña cua tahan iñi yu cuhva yucú ndo quivi tsaa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan

cahan nyaa tahan ndo tsi ndo, tan nduyaa ndo. Tan yuuhví tucu yu coto tsaa yu nu yucú ndo tan ña cuiti ña ndaa yucú ndo. **21** Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihí ndo ña jandihí ndo tsa javahá ndo tsa ña vaha tsa quitsahá javahá ndo nu quitsi ca tsi tyin rayi ndi tsicá nuu ra tsihin ñaha tan ñaha ndi tsicá nuu ña tsihin rayi tan náa ndihí ca maa tsa ña vaha.

Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo

13 **1** Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuñi tsi uvi o uñi taahan ra cua cuví tsandaa. **2** Tyin quivi quitsi yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo. **3** Tacan tan cua coto ndo tsa cuñi xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra ñima ndo. Tyin iyó xaan tunyee iñi ra tsi ndo. **4** Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatyyinee ndi tsi nyooho. **5** Nducu cuhva ndo tsi ndo tun iin iñi ndo tsinú iñi ndo tsi ra Cristo.

¿A ña tsitó ndo tyin iyó ra Cristo
 añima ndo tun nditsa tsa tsinú iñi
 ndo tsi ra? **6** Maa tyin cuñi yu tsa
 coto ndo tyin nyuhu ña vatya ndi.
7 Tan tsicán tahvi xaan ndi tsi Nyoo
 tsa cuenda ndo, tyin tacan tan ña
 javaha ndo tsa ña vaha. Ña caahán
 ndi tyehen tyin cuñi ndi catyi nyivi
 tyin vaha ndi. Caahán ndi tyehen tyin
 cuñi ndi tsa javaha ndo maa ñi maa
 tsa vaha. Nduve cuenda ndi tun catyí
 nyivi tyin vaha ndi o ña vaha ndi.
8 Tyin nyaá tsi síqui ndi tsa javaha
 ndi tsa vaha. Ña cuví tyihi xeehe ndi
 tsa nditsa. Intuhun ñi tsa cuví javaha
 ndi, yacan cuví tsa jacuaha ndi tsa
 nditsa. **9** Yacan cuenda síi cuñi ndi
 tsa nduve tunyee iñi iyó tsi ndi, tan
 nyee cuñi nyooho tsihin tunyee iñi
 Nyoo. Tan tacan ñi tsicán tahvi ndi
 tsi Nyoo tsa cuenda ndo na cunyicun
 vaha ca ndo tsi ra nda cuanda ña
 cumañi ca tsa cumañi tsi ndo.
10 Jaquitsí yu carta ihya tsi ndo tsa
 ndi cumañi ca quitsi yu nu yucú ndo
 tyin janduvaha ndo tsi ndo. Tyin

tacan tan ña cua cuñi tsi cuxaan yu
 tsi ndo quivi tsaa yu nu yucú ndo.
 Tyin nditsa tsa tsahá Nyoo ndatu tsi
 yu tsa quihí ndaha yu tsi ndo. Maa
 tyin ña tsahá ra ndatu can tsi yu tsa
 janducuiya ndihí ca yu iñi ndo. Ñihí
 yu ndatu can tsa cuenda tsa jatyinyee
 yu tsi ndo.

11 Yañi, nu ndihí caahán yu ihya,
 catyí yu tsihin ndo, nducu ndo cuhva
 ña cumañi tsa cumañi tsi ndo nuu
 Nyoo. Síi cuñi ndo. Jandu iin ndo iñi
 ndo. Coo mañi tahan ndo. Tan Nyoo,
 ra cuñi xaan tsi ndo tan tsahá tsa
 taxin coo añima yo, na cunyaa ra
 tsihin ndo. **12** Cuhva tahan ndo
 nacumi tsi ndo tsihin tsa síi cuñi ndo
 nyehé ndo tsi ndo. **13** Tan jaquitsí
 tandihí nyivi yihí cuenda Nyoo ñuu
 ihya nacumi tsi ndo.

14 Naquihin ndo tsa vaha coo
 añima ndo jaha Jutu Mañi yo
 Jesucristo. Tan na coto ndo tyin Nyoo
 cuñi xaan ra tsi ndo. Tan nacoto tucu
 ndo tyin iyó Tatyí Ii ra tsihin ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Cayucú Galacia

Nu tyaá ra Pablo iin carta tsa cuenda nyivi yihí cuenda Nyoo ñuu cayucú Galacia

1 ¹ Yuhu ra Pablo cuví yu iin ra tsa tava tyiñu ra Jesucristo. Ñavin nyivi jaquitsi tsi yu tyin maa ra Jesucristo tan maa Nyoo Jutu yo jaquitsi tsi yu tan tsaha ra tyiñu ihya tsi yu. Tan juvin ra cuví ra tsa janandoto tsi ra Cristo tsa yaha tsihi ra. ² Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ñuhu iyó ñuu cayucú Galacia. ³ Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo añima ndo. ⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ñuhu ñayivi ihya. ⁵ Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

Nduve ca inga cuhva cuví cacu yo

⁶ Iyo xaan cuñí yu tyin nyooho numi xaan nacoq ndo tsi Nyoo. Juvín ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin siin tuhun tsinú iñi ndo. Cuñí maa ndo tyin cua jacacu yacan tsi ndo. ⁷ Maa tyin nduve ca inga cuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñí ra naha jatívi ra naha tuhun Nyoo tsa jacacú ra Cristo tsi yo. ⁸ Tun iyó yóo caahán

tuhun ra Cristo tsihin ndo tan ña nacatsí tahan can tsihin tuhun tsa cahan ndi tsihin ndo, na cahun ñi anyaya. Yoñi jaha, vasu maa ndi cuví, o iin ángel quee andívi cuví. ⁹ Tsa yaha cahan yu tuhun ihya tsihin ndo, maa tyin cuñí yu cahan nyico yu itsi tsihin ndo inga tsaha. Tatun yóo nyivi caahán tuhun Nyoo tsihin ndo tan siin cuhva caahán ñi, na jacahun Nyoo tsi ñi anyaya.

¹⁰ Ña caahán yu tacan tsihin ndo tsa cuenda tsa cuñí yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñí yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

Nacaa quitsaha tsicá ra Pablo tyiñu Nyoo

¹¹ Cuñí yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi.

¹² Ñavin nyivi tsaha tuhun ihya tsi yu. Tyin juvin ñi maa ra Cristo jacotó itsi tsi yu.

¹³ Nyooho tsiñi ndo nácaa javaha yu quívi can. Tan tsitó ndo tyin tsinyaq ndaha xaan yu tsi nyivi yihí cuenda Nyoo quívi tsa tsinyi yu cuenda ñi Israel ñuu yu. Tan nducú yu cuhva jandu uvi yu iñi ñi tsinú iñi tsi ra Cristo. ¹⁴ Tan tsicoq yu cuhva iyó ñi Israel, tan yuhu cuví ra cuahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu cuhva javaha tsii tsaahnu ndi. ¹⁵ Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin

cuñí xaan ra tsi yu. Tan nda tsa tsaq maa quívi tsa tyaá ra cuhva, tan nacana ra tsi yu. **16** Tacan tan janaha ra tsi Sehe ra tsi yu tan nacoto yu tsi ra, tyin tacan tan cuvi cahan yu tuhun ra nácaa jacacú ra tsi yo tsihin nyívi tsa ñavin nyívi Israel cuví. Tan quívi can ña nducú yu nyívi jacuaha tsi yu nácaa taahán tsi javaha yu. **17** Tan ndi ña tsahan yu ñuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahan yu nda Arabia. Tacan tan cuanuhú nyico yu inga tsaha nda ñuu Damasco.

18 Tsa yaha uñi cuiya tan tsahan yu nda Jerusalén, tan nacoto yu tsi ra Pedro. Tan ndoo yu tsihin ra tsahun quívi. **19** Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyehe yu. **20** Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

21 Tsa yaha tsa tsahan yu ñuu Jerusalén tan tsahan yu nda Siria tan nda Cilicia. **22** Tan ra yañi yo tsa yucú vehe ñuhu ra Cristo tsa iyó ñuu tsa cayucú Judea, ña nacoto ra naha tsi yu. **23** Maa tyin ñihí tuhun ra naha tsa caahán nyívi tuhun yu, tyin catyí ñi: “Ra tsa tsinyaá ndaha tsi yo quívi can, vityin caahán ndihi ra tsihin nyívi na tsinu iñi ñi tsi ra Cristo. Tan quívi can cuñí ra jatívi ra tuhun ra Cristo”, catyí ñi, ñihí tuhun ra naha. **24** Tan jacahnú ra naha tsi Nyoo tsa cuenda tsa javaha Nyoo tsihin yu.

Ra cuví ityi nuu tsihin nyívi vehe ñuhu ñuu Jerusalén, ndoo ra naha vaha cuhva jahá tyiñu ra Pablo

2 **1** Tsa yaha utsi cumi cuiya, tan tsahan yu ñuu Jerusalén inga tsaha tsihin ra Bernabé. Tan tsahan ndihi tucu ra Tito tsihin ndi. **2** Tsahan yu ndacan tyin maa Nyoo janaha tsi yu tyin taahán tsi tsa cuhun yu. Tan

ndacan quita siin yu tsihin ra cuví ityi nuu tsihin nyívi vehe ñuhu naha ra. Tan tsaha cuenda yu tsi ra naha nácaa tuhvá yu caahán tuhun ra Cristo tsihin nyívi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu. **3** Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra. **4** Nditsa tyin juhva ra naha cuñí ra naha tsa cunyaa tuñi can tsi ra Tito. Tan ra ican naha ra quihví xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñí ra naha tyin taahán tsi tsa cundaca ñaha ley tsahnu tsi yo. **5** Maa tyin ndi luxu tan ña tsaha ndi tsa cundaca ñaha ra can naha ra tsi ndi. Tyin ña cuñí ndi tsa jaña ndo tuhun nditsa tsa jacacú ra Cristo tsi yo.

6 Maa tyin ra cuví ityi nuu tsihin nyívi vehe ñuhu, nduve tuhun tsa tsaha ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yoñi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo. **7** Ra cuví ityi nuu vehe ñuhu naha ra, nduve inga tuhun tsaha cuenda ra naha tsi yu tyin nacoto ra naha tyin maa Nyoo jaquitsí tsi yu tyin cahan yu tuhun ra Cristo tsihin nyívi tsa ñavin nyívi Israel cuví. Tuma tsa jaquitsí ra tsi ra Pedro tyin cahan ra tsihin nyívi Israel. **8** Tyin juven ñi maa Nyoo tava tyiñu tsi ra Pedro tyin cahan ra tuhun ra Cristo tsihin nyívi Israel. Tan tava tyiñu tucu ra tsi yuhu tyin cahan yu tuhun ra tsihin nyívi tsa ñavin nyívi Israel cuví.

9 Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsahá ra tunyee iñi tsi yu tsa cahan yu

tuhun ra Cristo tsihin nyívi. Tan tsahá ra naha ndaha ra naha tñin ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyívi tsa ñavin nyívi Israel cuví, tan maa ra naha cahan tucu ra naha tsihin nyívi Israel. **10** Tan cahan ra naha iin tuhun tsihin ndi, na nducuhun iñi ndi tsi nyívi ndaahvi tan na jatyinyee ndi tsi ñi. Tan yacan cuví tsa nducú xaan yu kuhva javahá yu tandíhi ñi quívi.

Nu nduxaan ra Pablo tsi ra Pedro tyin ña vaha tsa javahá ra

11 Maa tyin quívi tsahan ra Pedro ñuu Antioquía, nuu nuu ra tan cuxaan yu tsi ra tyin ña vaha tsa javahá ra. **12** Tyin tsa jihna ñi vaha javahá ra tyin tsatsj ra tsihin ñi tsa ñavin nyívi Israel cuví. Maa tyin tsa tsaa juhva ra Israel naha ra tsa jaquitsj ra Jacobo, tacan tan quitsahá jatsiyó ra tsi ra tan ña cuñi ca ra catsi ra tsihin ñi ican. Javahá ra tacan tyin yuuhví ra coto cuxaan ra tsa tsaa can naha ra tsi ra tyin ndi nyitá iñi ra can naha ra tuñi Nyoo. **13** Tacan tan inga ra Israel tsa yihí cuenda ra Cristo, ndu ijin ra naha tsihin ra Pedro. Tan javahá ndíhi ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuenda ra Bernabé tan ndu ijin ra tsihin ra naha. **14** Tan nyehe yu tyin ña vaha javahá ra naha. Ñavin tumaa kuhva catyí tuhun ra Cristo. Yacan cuenda cahan yu tsihin ra Pedro nuu tandíhi ra yucú ican: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Nacaa tsa cuñi un jañiñi un tsi nyívi tsa ñavin nyívi Israel cuví na coo ñi kuhva iyó ñi Israel? Tan ndi maa un tan ña javahá un tacan,” catyi yu tsihin ra.

15 Maa yo nda ndi cacu yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin

nyívi Israel cuví. **16** Maa tyin tsitó yo tyin ña cuvi janduvaha yo tsi yo nuu Nyoo tsihin tsa nducú yo kuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo kuhva tyaa yahvi yo tsa catyí ley can. Tyin ndi intuhun yo tan ña nduvahá yo nuu Nyoo tsihin tsa nducú yo kuhva javaha yo kuhva catyí ley tsahnu can.

17 Maa tyin vityin tatun nducú yo kuhva nduvaha yo nuu Nyoo tsa cuenda ra Cristo, cuñi tsi catyí tyin nacoto yo tyin iyó tucu cuatyí yo tumaa iyó cuatyí ñi tsa ñavin nyívi Israel cuví. Tatun tacan, ¿a cuñi tsi catyí tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan. **18** Maa tyin tun cua cuita nyico iñi yo ley tsa tsa yaha nacoq yo, yacan nditsa cua coo cuatyí yo. **19** Tyin ley can janahá tsi tsi yu tyin taahán tsi cúu yu tsa catyí cuatyí yu, tan yacan cuenda ña nducu ca yu kuhva cacu yu tsihin ley can, tyin tacan tan cuvi coo yu tsa cuenda Nyoo. **20** Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó añima yu vityin. Tan kuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñi ra tsi yu, tan tsihi ra tsacatyí cuatyí yu. **21** Ña cuñi yuhu tyaa tsiyo yu tunyee iñi tsa tsahá Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

Naquihín yo Tatyi Ii Nyoo tsa cuenda tsa tsinú iñi yo tsi ra Cristo

3 ¹ ¡Náa tsa soho iyó nyoooho, nyívi Galacia! ¿Yóo tsa jatívi tsi ndo tan ña tyaa yahvi ca ndo tsa nditsa? Catsi xaan tsahá cuenda ndi tuhun ra

Jesucristo tsi ndo. Tan cutuñi vaha iñi ndo nacuenda tsihi ra nu cruu.

2 Intuhun ñi tsa cuñi yu nducu tuhun yu tsi ndo. ¿A naquihin ndo Tatyí li Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú iñi ndo tsi ra? **3** ¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee iñi Tatyí li ra. Tan vityin, ¿nácaa cuñi ndo coo ndo tsihin tunyee iñi maa ndo? **4** ¿A tsa cuatu ñi nyehe ndo nácaa jatyinyee Tatyí li Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñi yuhu. **5** ¿Nacaa tsahá Nyoo Tatyí li ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú iñi ndo tsa caahán ra.

6 Ra Abraham, tsinu iñi ra tsa cahan Nyoo tsihin ra, yacan cuenda Nyoo naquihin tsi ra tumaa tsatyin vaha ra. **7** Yacan cuenda taahán tsi coto ndo tyin nyivi tsa nditsa cuví tata ra Abraham, juven ñi cuví ñi tsa tsinú iñi tsi Nyoo. **8** Tan tsanaha ndoo tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyi Nyoo tsihin ra Abraham tsanaha: “Tandíhi maa nyivi cua nasoco yu tsi ñi tsa cuenda un”, catyi Nyoo tsihin ra. **9** Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinu iñi tutu maa ra.

10 Nyivi tsa nyitá iñi ley tsa tyaa ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandíhi nyivi tsa ña tyaa yahvi tandíhi ley tsa nyaá nu libru ley Nyoo, cua tatsi tuñi Nyoo tsi ñi.” **11** Tan nditsa tyin yoñi nduvahá jaha Nyoo tsa cuenda tsa

nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juven ra cua coo ñayivi tsa ña cua naa maa”, catyí tuhun Nyoo. **12** Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

13 Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tavá nuña ra tsi yo. Tan maa ra naquihin tandíhi cuatyí yo. Tyin catyí tuhun Nyoo: “Tandíhi maa ra tsa ticaá nu yutun, tatsi tuñi Nyoo tsi ra.”

14 Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyi ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyí li tsa catyi Nyoo tyin cuhva ra tsi yo.

Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

15 Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaac can. Tan yoñi ca cuví natyiso juhva ca siqui can. **16** Tan Nyoo catyi ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandíhi ra cuví tata ra, tyin intuhun ñi ra cua cuhva ra. Tan juven ra can cuví ra Cristo. **17** Tsa caahán yu, cuví tsehe: Nyoo natuhun tahan ra tsihin ra Abraham. Tan ndoo vaha ra tuhun tsihin ra. Tacan tan yahá cumi cientu oco utsi cuiya tan tsaa ley tsa tyaa ra Moisés. Maa tyin ña cuví caní ley can tuhun tsa ndoo Nyoo tsihin ra Abraham. Tan ña cuví casi tsi nu naquihín yo tsa catyi Nyoo tyin cuhva ra tsi yo. **18** Tun tsatyin

tsa cuenda ley ra Moisés tan naquihín yo tsa taahán tsi tsi yo, cuatu xaan ndoo Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsahá Nyoo tsa catyí ra tyin cuhva ra tsi ra.

19 Tatun tacan, ¿nacuenda vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yaha can tan tsahá ra ley can tsi ra Moisés tan janahá tsi tyin iyó cuatyí yo. Tan ángel Nyoo tsahá cuenda ley can tsi ra Moisés. Tan ra Moisés tsahá cuenda can tsi nyívi.

Tan ndoo tsi nda cuanda quívi tsa quítsi ra Cristo, ra cuví tata ra Abraham. Juvín ra cuví ra tsa catyí Nyoo tyin cua cuhva tsa vaha tsi yo.

20 Tan juvín ñi maa Nyoo cahán tsihin ra Abraham quívi can. Tan ña tsiñí ñuhu tsa nducu sñin ra iin ra nacatyí tuhun tsihin ra Abraham.

21 ¿A cuñí tsi catyí tyin ley tsa tyaa ra Moisés ña nacatsí tahan tsi tsihin tsa catyí Nyoo tyin cuhva ra tsi yo? Ñavin. Tun tsatyín cuví coo yo ñayívi nyito jaha ley can, cuví nduvaha yo nuu Nyoo tsa cuenda tsi. Maa tyin ña cuví. **22** Tyin catyí nu tutu Nyoo tyin iyó cuatyí tandíhi nyívi. Tyin tacan tan nyívi tsa tsinú ñi tsi ra Jesucristo cuví ñihí ñi ñayívi nyito tsa catyí Nyoo tyin cuhva ra tsi yo.

23 Tsa ndi cumañi ca tsinú ñi yo tsi ra Cristo, ley can yíhi ndaha tsi yo tumaa tsa tsinyí yo vehe caa. Tacan cuví nda cuanda janahá Nyoo tsi yo nácaa tan tsinú ñi yo tsi ra. **24** Tan ley can cuví tsi tumaa iin nyívi jahá cuenda tsa nyíhi. Tyin jahá cuenda tsi tsi yo nda cuanda quívi quítsi ra Cristo. Tan cuví tsinú ñi yo tsi ra tan nduvahá yo nuu Nyoo. **25** Tan vityín tsa tsaa quívi tsa tsinú ñi yo tsi ra Cristo, yacan cuenda ña jahá cuenda ca ley can tsi yo.

26 Tyin tandíhi yo cuví yo sehe Nyoo tyin tsinú ñi yo tsi ra Cristo Jesús. **27** Tan tandíhi yo tsicoondutya

yo tan ndu iin yo tsihin ra Cristo, tan nanduví yo tumaa maa ra. **28** Ña ñiñi xaan ca tsa cuví yo nyívi Israel, a cuví yo nyívi Grecia; a cuví yo musu, a ñavin musu cuví yo; a cuví yo rayíi, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, intuhun ña nyívi cuví yo tsihin ra.

29 Tan tatun cuenda ra Cristo yíhi ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

4 ¹ Cua cahan yu iin cuhva tsihin ndo. Tatun iin ra luhlu tan tsihi jutu ra, tan naco jutu ra tandíhi tsa cuca ra tsi ra, ra luhlu can cua cutyíñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandíhi tsa cuca jutu ra.

2 Iyó ra jahá cuenda tsi ra nda cuanda tsaa cuiya ra tsa catyí jutu ra tyin cua naquihín ra ndaha tyíñu tsa naco ra tsi ra. **3** Tan tacan cuví maa yo. Tsa ndi cumañi ca quítsi ra Cristo, cuví yo musu cuhva iyó nyívi iyó nu ñuhu ñayívi ihya. **4** Maa tyin quívi tahan tsi, Nyoo jaquítsi ra tsi Sehe ra. Tan jacacú iin ñaha tsi ra. Tan tsindacá ñaha ley tsahnu Nyoo tsi ra. **5** Jaquítsi Nyoo tsi ra tyin jacacu ra tsi yo tsa ña quíhi ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

6 Tan tsa cuenda tsa nanduví yo sehe ra, Nyoo jaquítsi ra Tatyí Ii ra Cristo cunyaa añima yo. Tan tsa cuenda Tatyí Ii ra caná tsaa yo tsi Nyoo tan catyí yo: “Tyatya”. **7** Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá ñi ra Pablo tsa cuenda nyívi yíhi cuenda Nyoo

8 Tan quívi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví. **9** Maa tyin vityín

tsa nacotó ndo tsi Nyoo. Vaha ca catyi yu, maa Nyoo nacotó ra tsi ndo. ¿Nacaa tsa cuñí ndo quihin nyico ndo tuhun ndaahvi tsa nduve tunyee iñi iyó tsi, tan cuvi nyico ndo musu?

10 Nyoooho ndi jacahnú ca ndo quívi vico, quívi nduyutyá yoo, tan vico tandíhi ñi cuiya. **11** Yuuhví xaan yu coto iin tsa cuatu ñi cuví tyiñu jahá yu tsihin ndo.

12 Yañi, caahán ndaahvi yu tsihin ndo cõo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñí yu tsa caca iñi ndo tyin jativí ndo tsi yu. **13** Tan tsa tsitó ndo tyin quívi quitsí jihna yu ñuu ndo iyó iin cuehe tsi yu, yacan cuenda ndoõ yu juhva quívi tsihin ndo, tan cahán yu tuhun ra Cristo tsihin ndo. **14** Tan vasu ndí maa tsa cuuhví yu tsihin cuehe can vaha naquihín cuenda ndo tsi yu tan ña tyaá tsiyo ndo tsi yu. Naquihín cuenda ndo tsi yu tumaa tun cuví yu iin ángel tan tumaa tun ra Cristo cuví yu. **15** Tan vityin ¿numaa cuahán tsa sñi xaan cuñí ndo tsihin yu quívi can? Tyin yuhu cuví yu tsandaa tyin quívi can, nda cuanda cuñí ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan. **16** Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

17 Nyívi can, cuñí xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñí ñi tsa cunyicun ndo tsi ñi tan ña tsinu ca iñi ndo tuhun caahán yu. **18** Vaha tsa cuñi yo tsi nyívi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyí ñi yu tsihin ndo. **19** Nyoooho ra cuatyí sehe yu, nyehé nyico yu tundoho tan tsa uhví tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi

nyaá ca cua nyehe yu tundoho nda cuanda cuahnu ndo tsihin tunyee iñi maa ra Cristo. **20** Vaha xaan tun tsatyin cuvi cunyí yu tsihin ndo vityin ihya. Tyin tacan tan cuvi nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

21 ¿A ñaha ca cahvi ndo tsa caahán ley tsa tsahá Nyoo tsi ra Moisés? tyin cuñí ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can. **22** Catyí tsi tyin ra Abraham tsicoõ uvi taahan sehe ra. Tsicoõ iin sehe ra tsihin ña Agar tsa cuví musu ñasihi ra. Tan tsicoõ inga sehe ra tsihin ña Sara ñasihi vaha maa ra. **23** Cacú sehe ñaha tsa cuví musu can tumaa cacú tandíhi ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuvi. **24** Tan tuhun can iyó tsa cuñí tsi catyí tsi tsihin yo. Nduvi taahan ñi ñaha can cuví ñi tumaa nduvi taahan tuhun tsa ndoõ Nyoo tuhun tsihin yo. Intuhun tuhun can cuví cuenda yucu Sinaí. Tan nyívi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña. **25** Tumaa ña Agar, tan tumaa yucu Sinaí tsa canyí Arabia, tacan cuví ñuu Jerusalén nda quívi vityin. Tyin nyívi ñuu can yihí ndaha ley tsahnu tsi ñi. Tan cuví ñi tumaa musu ley can. **26** Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sihi yo. **27** Tan catyí tuhun Nyoo tyehen:

Cusíi iñi yoooho, ñaha tsa ña cuví coo sehe. Yoooho tsa nduve sehe iyó.

Cána tsaa tsihin tsa sñi cuñí un, tyin ña tsitó un tsa uhví cacú sehe un.

Cusiñ iñi tyin cua cuhva cuaha
ca yu sehe un
tan ñavin ca ñaha iyó yñi, catyí
tuhun Nyoo.

28 Yañi, yoo cuví yo tumaa ra
Isaac, sehe ra Abraham tyin cacu ra
cuhva catyí maa Nyoo tsihin jutu ra.
29 Ra sehe ñaha tsa cuví musu can,
xaan iñi ra tsi ra Isaac sehe ñasiñi ra
Abraham. Tacan cuví tucu vityin
ihya. Ra tsa cuñi tyin javaha yo tsa
catyí ley, xaan iñi ra naha tsi yo tsa
cuví yo nyivi cacu tsa tsihin Tatyí Ii
Nyoo. 30 Tan çnáa catyí tuhun Nyoo?
Catyí tsi: “Tava tsiyo tsi ñaha tsa cuví
musu can tsihin sehe ña, tyin ña cuví
naquihin sehe ña tsa taahán tsi tsi
sehe ñaha tsa ñavin musu cuví”, catyí
tuhun Nyoo. 31 Yacan cuenda, yañi,
ña cuví yo tumaa cuví sehe ñaha tsa
cuví musu can. Tyin cuví yo tumaa
cuví sehe ñasiñi ra Abraham, tyin
ñavin musu cuví yo. [Tan Nyoo
naquihín cuenda ra tsi yo tyin tsinú
iñi yo tsi ra tan ñavin tsa cuenda tsa
tyaá yahvi yo ley tsahnu,

**Na tyaa yahvi yo tuhun ra Cristo
tan ña cuhva yo cundaca ñaha
ley tsahnu tsi yo**

5 1 Ra Cristo tsa yaha jacacu ra tsi
yo ndaha ley tsahnu can. Yacan
cuenda jaha ndo cuenda tsi ndo, coto
nanduvi ndo musu inga tsaha.

2 Tyaa soho ndo, yuhu ra Pablo
caahán tsihin ndo. Tatun cuhva ndo
tsa cunyaa tuñi Nyoo tsi ndo tan cuñi
ndo tyin cua jacacu yacan tsi ndo, ña
cua cuví jatyinyee ra Cristo tsi ndo.

3 Cuñi yu cahan yu tsihin ndo inga
tsaha tuhun ihya: Tandihí ra tsa cuñi
cacu tsihin tsa cunyaa tuñi Nyoo tsi
ra naha, cuñi tsi javaha ra naha
tandihí maa tsa catyí ley ra Moisés.

4 Tandihí nyooho tsa nducú nduvaha
nuu Nyoo tsihin tsa javaha ndo cuhva
catyí ley can, tsa quita tsiyo ndo nuu
ra Cristo. Tan jañá ndaha ndo tsa
vaha tsa tsahá Nyoo tsi ndo. 5 Maa

tyin yoo tsihin tsa jatyinyee Tatyí Ii
Nyoo tsi yo tan tsinú iñi yo tsi ra
Cristo, tan nyitá iñi yo nduvahá yo
nuu Nyoo. 6 Tyin tatun iin ñi cuví yo
tsihin ra Cristo Jesús, yoñi jaha tun
nyaá tuñi Nyoo tsi yo, o nduve. Tyin
cahnu ca cuví tsa tsinú iñi yo tsi ra
Cristo. Tan tsihin tsa tsinú iñi yo cuví
coo yo, tan cuñi tahan ca yo tsi yo.

7 Nyooho vaha xaan cuahán ndo
quivi can. ¿Tan vityin yóo jandu uvi
iñi ndo? Tan ña tyaá yahvi ca ndo tsa
nditsa. 8 Tuhun tsa janahá ñi can,
ñavin tuhun Nyoo, ra tsa cana tsi yo,
cuví can. 9 Tyin tumaa ndaa yutsan
paan jahá luxu ñi yutsan iya, tacan
cuví iin nyivi caquiñi, cuaha ca nyivi
cuví jativi ñi. 10 Nyoo cua tatsi tuñi
ra tsi nyivi jandu uvi iñi ndo. Nduve
cuenda ra yóo ñi cuví ñi. Maa tyin
yuhu tsitó vaha yu tyin Jutu Mañi yo
cua jatyinyee ra tsi ndo tan ña cua
tyaa iñi ndo inga cuhva tsa ña janaha
yu tsi ndo.

11 Tan tsa cuenda yuhu, yañi, tun
tsatyin catyí yu tyin ra tsinú iñi tsi ra
Cristo cuñi tsi tsa cunyaa tuñi Nyoo
tsi ra, ra Israel can naha ra ña cua
cunyaa ndaha ra naha tsi yu. Tan ña
ndasi cua cuñi ra naha tsa caahán yu
tuhun ra Cristo, ra tsa tsihi nu cruu
tsacatyí cuatyí yo. 12 Maa tyin ra tsa
cuñi jandu uvi iñi tsi ndo, vaha taxin
ca na quita tsiyo ra naha nu yucu
ndo, tyin tacan tan ña cua cuví ca
jandu uvi iñi ra naha tsi ndo.

13 Nyooho, yañi, cana Nyoo tsi
ndo tsa ña cundaca ñaha ca ley tsi
ndo. Tan ñavin tsa cuenda tsa iyó
nuña ndo tan cuví javaha ndo náa
ndihí tsa cuñi cuñu ñuhu ndo. Maa
tyin taahán tsi tsa jatyinyee tahan
ndo tsi ndo tsa cuenda tsa cuñi tahan
ndo tsi ndo. 14 Tyin iyó iin ley Nyoo,
tan catyí tsi: “Cuñi tahan ndo tsi ndo
tumaa cuñi ndo tsi maa ndo”, catyí
tsi. Tan tatun nditsa tsa cuñi tahan yo
tsi yo, tsa javahá ndihí yo tandihí ca
tsa caahán ley tsahnu. 15 Jaha ndo

cuenda tyin tatun caahán nyaa tahan ndo tsi ndo tan ndasi cuñí ndo nyehe tahan ndo tsi ndo, cua tiví nu yucú ndo.

Cuhva cuñí cuñu ñuhu yo tan cuhva iyó yo tsihin Tatyí Ii Nyoo

16 Tsa cuñí yu cahan yu tsihin ndo cuví tuhun ihya: Cqo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñí cuñu ñuhu ndo. 17 Tyin tsa javahá yo tsa ña vaha tsa cuñí cuñu ñuhu yo, ñavin cuhva cuñí Tatyí Ii Nyoo javahá yo. Tyin Tatyí Ii Nyoo cuñí tsi tsa javahá yo tsa vaha. Tan cuñu ñuhu yo ña cuñí tsi javahá tsi cuhva cuñí Tatyí Ii Nyoo. Tsa cuñí Tatyí Ii Nyoo cañí tahan can tsihin tsa cuñí cuñu ñuhu yo. Yacan cuenda yíi javaha yo tsa cuñí yo javaha yo. 18 Maa tyin tatun tsahá yo tsi yo tsa jaquihin ityi Tatyí Ii Nyoo tsi yo, ña cua cundaca ñaha ca ley tsahnu tsi yo. 19 Ña yíi nacoto yo tsi nyívi javahá cuhva cuñí cuñu ñuhu ñi. Yíhí rayíi, iyó ñasihi ra naha tan iyó inga ñaha tsi ra naha. Tan yíhí ñiñaha iyó yíi ñi tan iyó inga rayíi tsi ñi. Tan yíhí rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha. 20 Yíhí ñi jacahnú ñi tsitoho. Yíhí ñi tasi ñi. Yíhí ñi ndasi cuñí ñi nyehe ñi nyívi. Yíhí ñi cañí tahan ñi. Yíhí ñi cuiñu ñi. Tan yíhí ñi iin yaha ñi cuxaan ñi. Yíhí ñi tsicá iñi ñi maa ñi tsa vaha tsi maa ñi. Tan yíhí ñi natahví sava ñi nu yucú ñi tyin cañí tahan ñi. Tan tacan tan quita síñ ñi. 21 Tan yíhí ñi nyiyó iñi ñi tsa iyó tsi inga nyívi. Tan yíhí ñi tsahñí tahan ñi. Tan yíhí ñi tuhva ñi tsiñi. Tan yíhí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quívi can. Tyin tandíhi ñi tsa javahá yacan, ña cua cuví naquihin cuenda ñi nu ndacá ñaha Nyoo.

22 Maa tyin tsa tsahá Tatyí Ii Nyoo tsi yo, cuví tsa cuñí yo tsi Nyoo tan tsi nyívi, tsa síi cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyívi cuví yo, tsa ña cundihi iñi yo javahá yo tsa vaha tsihin nyívi, tsa tsinú iñi yo tsi ra Cristo. 23 Tan inga tsa tsahá Tatyí Ii Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandíhi tsa vaha ihya, ndi intuhun ley tan ña cua cuví catyi tsi tyin iyó cuatyí yo. 24 Tan yoo tsa yíhí cuenda ra Cristo Jesús, tsa yaha jandíhi yo tuhun tsa javaha yo tsa ña vaha tsa cuñí cuñu ñuhu yo. 25 Tan tumaa tsa iyó yo ñayívi nyito tsa cuenda Tatyí Ii Nyoo, tacan cuñí ndíhi tucu tsi tsa tyaá yahvi yo tsa janahá ra tsi yo.

26 Na ña cahnu jaha yo tsi yo. Tan ña jacañi tahan yo tsi nyívi. Tan na ña nyiyo iñi yo tsa tsii inga nyívi.

Taahán tsi jatyinyee tahan yo tsi yo

6¹ Yañi, tatun nyehé ndo javahá iin ra yañi yo cuatyí, nyooho tsa ñihi nyaá Tatyí Ii Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndíhi nu ña vaha tsi ndo. 2 Na jatyinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

3 Tatun ndáa yo cuñí maa yo tyin cahnu nyívi cuví yo, tan nduve náa cuví yo, juvin ñi tsi maa yo jandaví ñaha yo. 4 Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusíi iñi yo. Tan ña taahán tsi nyehe yo náa javahá inga nyívi. 5 Tyin intuhun intuhun maa yo tan taahán tsi cunyehe iñi yo cuiiso yo tsa taahán tsi tsi yo.

6 Tan cuñí tsi tsa jatyinyee ndo tsi

ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

7 Tan ña jandavi ñaha ndo tsi juvin ñi maa ndo. Tyin Nyoo yoñi cuví vacu nducu tsi ra. Tyin tandíhi tsa tatsí nyívi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi. 8 Tacan tucu tatun iin nyívi tan javahá ñi tsa ña vaha tsa cuñi cuñu ñuhu ñi, juvin ñi maa tsa javahá ñi cua jatívi tsi ñi. Maa tyin tatun javahá ñi cuhva cuñi Tatyí Ii Nyoo, Tatyí Ii Nyoo cua cuhva ñayívi nyito tsa ña cua naa maa coo ñi. 9 Yacan cuenda janyee ndo iñi ndo javaha ndo tsa vaha. Tyin tatun ña jandíhi yo tsa javahá yo tacan, cua naquihin yo tsa vaha na tahan tsi quívi. 10 Yacan cuenda tandíhi ñi tsaha tsa cuvi javaha yo tsa vaha, na javaha yo itsi tsihin tandíhi ñi nyívi. Tan tsa jihna ñi taahán tsi javaha yo tsa vaha tsihin nyívi yihí cuenda Nyoo.

Sii xaan cuñi ra Pablo tyin nyehé ra tundo ho tsa cuenda ra Cristo

11 Nyehe ndo tsa nahnu letra tyaá yu tsihin ndaha yu nu tutu ihya vityin. 12 Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñi ra naha na catyi nyívi tyin vaha xaan ra naha. Tan ña cuñi ra naha nyehe ra naha

tundo ho tsa cuenda ra Cristo, ra tsa tsihi nu cruu tsa cuenda yo. 13 Tyin ndi maa ra tsa nyisó tuñi Nyoo tan ña tyaá yahvi ra naha tandíhi tsa caahán ley. Cuñi ra naha tsa cunyaa tuñi Nyoo tsi nyoo ho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha.

14 Maa tyin yuhu ña cuñi yu cu iyo iñi yu tsi yu tsa cuenda náa ndíhi tuhun. Maa tyin cu iyo iñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñi ca yu tsa iyó ñuu ñayívi ihya tyin ña ndaca ñaha ca yacan tsi yu. 15 Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyívi tsa tsa cuenda ra. 16 Tandíhi nyoo ho tsa iyó tacan, naquihin ndo tsa taxin coo añima ndo. Tan na cundaahvi iñi Nyoo nyehe ra tsi tandíhi ndo, tyin nditsa tsa cuví ndo nyívi cuenda ra.

17 Vityin tan nu cuahán tsi ityi nuu, ndi intuhun ndo tan ña cua cuhva ca ndo tsihi tsi yu. Tyin tandíhi paa tsa nyecú cuñu ñuhu yu, cuñi tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

18 Yañi, na nasoco Jutu Mañi yo Jesucristo tsi tandíhi ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsahá javahá ra Pablo carta

1 ¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihya tsi ndo.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

**Tsa iin ñi cuví yo tsihin ra Cristo,
Nyoo nasocó xaan ra tsi yo**

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo. ⁴ Tsa ndi cumañi ca javaha ra ñuhu ñayivi tan nacatsí ra tsi yo tyin ndu iin yo tsihin ra Cristo. Tyin tacan tan cuítí coo yo nuu ra tan ña coo ca cuatyí yo. ⁵ Tsa cuenda tsa cuñí ra tsi yo, tyaa ra cuhva tahan tsanaha tyin nanduvi yo sehe ra tsa cuenda ra Jesucristo. Tacan javahá ra tyin tacan cacu iñi maa ra. ⁶ Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra. ⁷ Nyoo cuñí xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. ⁸ Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsiñi tuñi ra coo tsi yo. ⁹ Tan tsahá ra tsa nacotó yo tuhun tsa tyihí ra cuhva tahan tsanaha tyin javaha ra tsihin ra Cristo. Tan tandihí tuhun can tsicumí xeehe

ra tan ña jacoto ra can tsi nyivi tahan tsanaha. ¹⁰ Maa tyin tsa cua tahan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsí ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha. ¹² Javahá ra tyehen tyin nyuhu tsa natsinu jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra. ¹³ Tan tacan tucu nyooho natsinu iñi ndo tsi ra Cristo, tan ndu iin ndo tsihin ra quivi tsa tsiñi ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahá ra Tatyí Ii ra coo añima ndo, tumaa catyí ra tyin cua javaha ra tan yacan cuñí tsi catyí tyin cuví ndo nyivi yihí cuenda ra. ¹⁴ Nyoo jihna ca Tatyí Ii ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

**Nu tsicán ra Pablo tsi Nyoo na cuhva
ra tsa tsiñi tuñi tsi nyivi tsa tsinú iñi**

¹⁵⁻¹⁶ Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo. ¹⁷ Tsicán yu tsi Nyoo Jutu ra

Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí li ra, tacan tan nacoto vaha ca ndo tsi ra. **18** Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda caná ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyívi cuenda ra, sii xaan caá can tan cuca xaan can.

19 Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juvin ñi maa tsihin tunyee iñi cahnu can **20** Janandoto Nyoo tsi ra Cristo. Tan tyaá ra tsi ra xiin cuaha ra nda gloria. **21** Tan yacan cuví nu jacahnú xaan ca Nyoo tsi ra Cristo tan ñavin ca tandihi ca ra ndacá ñaha nu ñuhu ñayívi ihya tan nda andívi. Tyin yoñi yóo ra cahnu ca cuví ñuu ñayívi ihya tan ndi ñayívi tsa cua coo, tyin intuhun ñi maa ra Cristo cuví ra cahnu ca cuví. **22** Tan tandihi cuii maa tsa iyó tsañá Nyoo tyin cundaca ñaha ra Cristo. Tan tsañá Nyoo tsa cuví ra jiñi tsihin nyívi tsa yihí cuenda ra. **23** Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juvin maa ra janduní ra tandihi tsa iyó.

Jacacú Nyoo tsi yo tsa cuenda tsa cuñi ra tsi yo

2 **1** Nyoo tsañá ra ñayívi nyito coo ndo quívi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito añima ndo tyin ndi iyó cuaha cuatyí ndo. **2** Tan quívi can ndi javahá ndo cuhva javahá nyívi ña tsitó tsi Nyoo. Ndi tyaá yahví ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyívi tsa ña tyaá yahví tsi Nyoo. **3** Tan juvin ñi tacan tsicoq tucu yo quívi can, tyin javahá yo tsa ña

vaha tsa cuñi cuñu ñuhu yo tan cuhva tsicá iñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihi ca nyívi tsa javahá tsa ña vaha. **4** Maa tyin Nyoo cundaahví xaan iñi ra nyehe ra tsi yo tsa cuenda tsa cuñi xaan ra tsi yo. **5** Tan vasu tsa tsihi añima yo jahá cuatyí yo, Nyoo janandoto ra añima yo tan tsañá ra ñayívi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñi xaan Nyoo tsi yo. **6** Tan tsa janandoto ra tsi yo iin caa ñi tsihin ra Cristo Jesús tyaá ra tsi yo tsihin ra nda gloria. **7** Tan javahá Nyoo tyehen tyin tacan tan nu cuahán ca tsi ityi nuu cua coto tandihi ca tsa cua coo tyin vaha xaan iñi ra tsihin yo tan cahnu xaan tumañi iñi tsañá ra tsi yo tsa cuenda ra Cristo Jesús. **8** Tyin tsa cuenda tsa vaha tsa tsañá Nyoo tsi yo tan cacú yo. Tan ñihí yo tumañi iñi ihya jahá tsa tsinú iñi yo tsi ra Cristo. Tan ñavin tsihin tsa javahá yo tan ñihí yo can, tyin maa Nyoo tsañá can tsi yo. **9** Ñavin tsihin tsa javahá yo tsa vaha tan cuví cacú yo. Yacan cuenda ndi intuhun yo tan ña taahán tsi cu iyo iñi yo tyin cacú yo tsihin tsa javahá yo tsa vaha. **10** Nyoo janduvahá ra añima yo tsihin tsa ndu iin yo tsihin ra Cristo Jesús. Tacan javahá ra tyin tacan tan javaha yo tsa vaha, tyin nda tsanaha tan tyaá ra cuhva tyin coo yo tacan.

Cuví yo nyívi Israel, a cuví yo nyívi inga ñuu, maa tyin tsa cuenda ra Cristo iin ñi nyívi cuví tandihi yo

11 Catyí ra Israel naha ra tyin ña vaha nyooho tsa ñavin nyívi Israel cuví, tyin ña tsinyaá tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo. **12** Tan nducuhun tucu iñi ndo tyin nu quítsi tsi tahañ tsanaha, nduve ra Cristo iyó añima ndo. Tan ndi ña iin

ñi cuví ndo tsihin nyívi Israel. Tan ña tsitó ndo tuhun tsa ndoo Nyoo tsihin ra Abraham tan tsihin nyívi tata ra. Tyin iyó soho ñi maa ndo quívi can, tan nduve Nyoo nyaá tsihin ndo. Yacan cuenda nduve náa cua ñihi ndo. **13** Tyin ndi luxu tuhun Nyoo tan ña tsitó ndo tahan tsanaha, maa tyin vityin ndu iin ndo tsihin ra Cristo Jesús tyin quítsi ra tsatí ra ñíni ra tsa cuenda ndo. **14** Tyin juvin ra Cristo tsahá tsa taxin coo yo tan jandu iin ra tsi nyooho tsa ñavin nyívi Israel cuví tsihin nyuhu tsa cuví nyívi Israel. Vityin iin ña nyívi cuví yo, tyin jandíhi ra tsa xaan cuñi yo nyehé tahan yo tsi yo. **15** Tan tsa quítsi ra Cristo tsihi ra nu cruu, tsindíhi tuhun tsahnu tsa iyó ndi tsa tyasí nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyívi cuví yo nuu ra, tan iyó yo tsihin tsa taxin. **16** Tan tsihin tsa tsihi ra nu cruu tsindíhi tsa ña caahán tsihin tahan yo, tan nacoq vaha yo tsihin Nyoo jahá ra, iin ña nyívi cuví yo vityin.

17 Ra Cristo quítsi ra cahan ra tyin cuví coo vaha yo tsihin Nyoo tan tsihin tahan yo: Cahan ra tsihin ndi tsa cuví ndi nyívi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahan tsanaha. **18** Tan tsa cuenda tsa quítsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí li ra iyó añima yo: a cuví yo nyívi Israel, o ñavin nyívi Israel cuví yo. **19** Yacan cuenda nyooho ñavin ca nyívi inga ñuu cuví ndo, tyin iin ña nyívi cuví ndo tsihin nyívi yihí cuenda Nyoo. Tan cuví ndo nyívi maa ra. **20** Tan cuví ndo tumaa iin vehe. Tan nyecú ndo nu samá ra tavá tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús. **21** Tan tsata yuu tsa cuví ra Cristo, sñi xaan cua quita vehe tsa ndi cuahán tsinú, tyin tandíhi maa yo cuví nama vehe

tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. **22** Tan tacan tucu nyooho ndu iin ndo tsihin tandíhi nyívi yihí cuenda ra Cristo jahá Tatyí li ra, tyin tacan tan cua cuví ndo vehe nu coo Nyoo.

Nyoo tavá tyiñu tsi ra Pablo tyin cahan ra tuhun ra Cristo tsihin nyívi tsa ñavin nyívi Israel cuví

3 ¹ Yacan cuenda yuhu ra Pablo nyíi yu vehe caa ihya tyin jacotó yu tuhun ra Cristo Jesús tsi nyooho tsa ñavin nyívi Israel cuví. **2** Taahán tsi coto ndo tyin cahnu xaan tunyee iñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo. **3** Tan Nyoo janahá ra tuhun xeehe tsa tsicumí ra tsi yu, tan tyaá yu juhva tuhun can nu carta ihya tyin coto ndo. **4** Tan tsa cua cahvi ndo tuhun tsa tyaá yu ihya cua coto ndo nácaa tsahá Nyoo tyin cutuñi iñi yu tuhun ra Cristo tsa tsicumí xeehe ra. **5** Tyin nu quítsi tsi tahan tsanaha, ña janahá Nyoo tuhun xeehe can tsi nyívi, tumaa tsa janahá Tatyí li ra tuhun can tsi ra tavá tyiñu ra Jesucristo tan ra cuví ndusu yuhu Nyoo. **6** Tan tuhun xeehe can, cuñi tsi catyí tyehen: Nyívi tsa ñavin nyívi Israel cuví cua ñihi ndíhi ñi tsa cua ñihi nyívi Israel tyin iin ña cuñu ñuhu cuví yo vityin tsa cuenda tsa jacacú ra Cristo tsi yo. Tan cua ñihi yo tsa catyí Nyoo tyin cuhva ra tsi yo tyin natsinú iñi yo tsi maa ra Cristo Jesús.

7 Nyoo tsahá ra tsa vaha tsi yu tan jatyinyeé ra tsi yu tyin tacan tan jacoto yu tuhun vaha ihya tsi nyívi. **8** Yuhu luhlu xaan ra cuví yu tan ñavin ca tandíhi nyívi tsa yihí cuenda Nyoo. Maa tyin Nyoo tsahá ra tumañi iñi cahnu ihya tsi yu tyin cahan yu tuhun ra Cristo tsihin nyívi tsa ñavin ñi Israel cuví. Tyin na coto ñi tsa cuca tsa cua cuhva ra Cristo tsi ñi. **9** Tavá tyiñu Nyoo tsi yu na jacoto yu

tsi tandihi nyivi nácaa tyaa ra cuhva tsa cua javaha ra tsa ndi cumañi ca javaha ra tandihi tsa iyó, tyin tsanaha ña jacoto ra tuhun tsa tsicumí xeehe ra tsi nyivi. **10** Tacan cuví tan vityin tandihi ra ndacá ñaha nda andívi cua nyehe tsa vaha tsa javahá Nyoo tsihin yo tsa cuví yo nyivi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo. **11** Tandíhi tuhun ihya nacatsí tahan tsi tsihin tsa tyaa Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo. **12** Tan tsa cuenda tsa tsinú iñi yo tsi ra Cristo, tsahá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra. **13** Tan tsa cuenda tsa tsahá ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyivi tsi ra Cristo

14 Tan tsa cuenda tsa nducuhun iñi yu tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuiñí tsiti yu nuu ra. **15** Tyin juvin ra cuví Jutu tandihi nyivi: ñi tsa cuahán andívi, tan ñi tsa yucú nu ñuhu ñayivi ihya. **16** Tan tsicán yu tsi ra na jandunyeer xaan ra iñi ndo tsihin Tatyí Ii ra tsa iyó aña ndo. **17** Tan na coo ra Cristo aña ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihi nyivi, tyin nyanaá vaha ndo tsi Nyoo. **18** Tacan tan cua cutuñi vaha iñi ndo tsihin tandihi ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñi ra tsi ndo. **19** Tsiacán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

20 Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihi. **21** Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

Iin ñi cuví tandihi yo tsa yihí yo cuenda ra Cristo jahá Tatyí Ii Nyoo

4 **1** Yacan cuenda yuhu, tsa nyii yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyivi tsa nacana Nyoo. Tyin nacana ra tsi ndo na cuví ndo nyivi ra. **2** Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyxixín ndo tsihin ñi, tan ña cundihi iñi ndo nyehé ndo tsi ñi tyin tacan tan coto ñi tyin cuñi ndo tsi ñi. **3** Tyin tsa taxin tsa tsahá Nyoo coo aña yu jandu iin tsi tsi yo tan yacan cuenda nducu vaha ndo cuhva tan iin ñi cuví ndo tsihin tsa jatyinyee Tatyí Ii Nyoo tsi ndo. **4** Tandíhi yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihi yo intuhun ñi Tatyí Ii Nyoo iyó tsihin yo, tan catyí Nyoo tsihin tandihi yo tyin nditsa tsa cua ñihi yo ñayivi nyito coo yo. **5** Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutyá yo. **6** Iyó intuhun ñi Nyoo tan maa ra cuví ra Jutu tandihi yo. Tan ndacá ñaha ra tsi tandihi yo, tan iyó ra aña tandihi yo, tan tsatyíñú ra tsi tandihi yo, tan jahá tyiñu yo tyiñu ra. **7** Tan tsahá ra Cristo ndatu tsi tsa intuhun intuhun yo cuhva cuñi maa ra. **8** Yacan cuenda catyí tsi nu tutu

Nyoo tuhun ra Cristo tyehen:

Cunyeē ra jahā canaa ra tsi nu
 xaan iñi tsi ra, tan quihñ
 nyaa ra tsi nyivi tsa yihñ
 ndaha nu tan nandaā ra
 andivi tsihin ñi.

Tan tsahā ra ndatu tsi yo tsa
 jaha tyiñu yo tyiñu ra, catyí
 tsi.

9 ¿Tan náa cuñi tsi catyí tsa
 “nandaā ra”? Cuñi tsi catyí tyin nuu
 jihna ra nu ñuhu ñayivi. 10 Ra tsa
 nuu can, juvin ñi ra cuví ra tsa
 nandaā nda gloria. Tyin tacan tan
 janduniñ ra tandihñ maa tan cunyaa ra
 tsihin yo tandihñ ñi ityi. 11 Tan juvin
 ñi maa ra Cristo tsahā ndatu tsi yo.
 Tsi juhva yo tava tyiñu ra tsi yo tsa
 caca yo tyiñu ra. Tan tsi inga yo
 tsahā ra tsa cuví yo ndusu yuhu ra.
 Tan tsi inga yo tsahā ra tyin jacoto yo
 tsi nyivi nácaa jacacú ra tsi yo. Tan
 tsi inga yo tsahā ra tsa jaha cuenda
 yo tsi ñi yihñ cuenda ra, tan tsi inga
 yo tsahā ra tsa cuví jacuaha yo tuhun
 ra tsi ñi. 12 Tacan tsahā Nyoo ndatu
 can tsi yo tyin jatyinyee tahan yo tsi
 yo tan tsi inga ca nyivi tyin tacan tan
 cuahnu ca yo tsihin ra Cristo. 13 Nda
 cuanda ndu iin tandihñ yo jaha tsa
 tsinú iñi yo tsi Sehe Nyoo. Tan nacoto
 vaha yo tsi ra. Tan cutsa vaha yo nda
 cuanda tsa yo cuvi yo tumaa cuví
 maa ra Cristo. 14 Tacan tan ña cua
 cuvi ca yo tumaa tsa nyihi. Tyin tsa
 nyihi yatyi xaan tsinú iñi tsi náa luxu
 tsa ñihñ tuhun tsi. Tan na ña cuvi yoo
 tacan tyin coto jandavi ñaha nyivi tsi
 yo. 15 Maa tyin tyehen cua javaha yo:
 cua cuñi yo tsi nyivi tan cua cahan yo
 tsa nditsa tsihin ñi. Tan ndunyeē ca
 añima yo tsihin tandihñ tsa vaha tsa
 iyó tsi Nyoo. Tan cuahnu yo tan cuvi
 yo tumaa maa ra Cristo, ra cuví ityi
 nuu tsihin yo. 16 Tan tsa cuenda ra
 Cristo tandihñ yo tsa cuví yo cuñu
 ñuhu ra, iin ñi cuvi yo. Tumaa yihñ
 tahan iin cuñu ñuhu, tan tsa iin tsa
 iin nu yihñ tahan tsi vaha jahá tyiñu

tsi. Tan tacan jatyinyeē tsi tsi naniñ
 cuñu ñuhu can, na coo vaha tsi tan
 cuahnu tsi. Tan tacan tucu yoo,
 tsahnú yo tsihin tsa cuñi tahan yo tsi
 yo tan jatyinyeē tahan yo tsi yo.

Tsahá ra Cristo ñayivi nyito coo yo

17 Tuhun ihya cuví tsa tsahá
 cuenda yu tsi ndo, catyí Jutu Mañi
 yo. Ña coo ca ndo tumaa iyó nyivi ña
 nacotó tsi Nyoo. Tyin maa ñi maa tsa
 ña jatyinyeē tsi ñi tsicá iñi ñi. 18 Tan
 ña cutuñi iñi ñi, tyin ñavin ñayivi
 Nyoo iyó ñi. Tyin ña tsitó ñi, tsa
 cuenda tsa ndava añima ñi. 19 Ña
 cahán ca nuu ñi javahá ñi tsa ña
 vaha. Tan nacuhva cuenda ñi tsi ñi
 tsi tsa caquiñi. Maa ñi tsa ña vaha
 cuñi ñi javaha ñi. 20-21 Maa tyin
 tatun nditsa tsa tsiñi ndo tuhun ra
 Cristo, cua nducuhun iñi ndo tyin
 ñavin tacan taahán tsi coo ndo. Tyin
 tsiñi ndo tan cutuhva ndo tsa nditsa
 cuví tuhun maa ra Cristo. 22 Yacan
 cuenda ña coo ca ndo cuhva tsicoo
 ndo quivi can, tan ña javaha ca ndo
 tsa caquiñi tsa cuñi cuñu ñuhu ndo,
 tyin tsanaha, jandavi ñaha xaan can
 tsi ndo. 23 Nacuhva cuenda ndo tsi
 ndo tsi Nyoo na nasama ra cuhva
 tsicá iñi ndo. 24 Tan coo ndo ñayivi
 nyito tyin vityin nyivi tsa cuví ndo
 jahā Nyoo. Tan javaha ndo maa ñi tsa
 vaha na nyehe nyivi tyin iyó ndo
 ñayivi nyito tyin catsi tan cuiti iyó
 ndo.

25 Yacan cuenda ña cahan ca ndo
 cuendu. Cahán ndo maa ñi tsa nditsa
 tsihin nyivi tyin iin ña cuñu ñuhu
 cuví tsa tandihñ yo.

26 Tatun cuxaan ndo, jaha ndo
 cuenda coto javaha ndo tsa ña vaha.
 Juhva ñi cuhva cuxaan ndo. Tan ña
 quihñ tsihi tsi ndo nduvi. 27 Tan ña
 cuhva ndo ndatu tsi nu ña vaha tsa
 nducu cuhva nu tsi ndo.

28 Ra tsa tuhva suhu quivi can, na
 ña suhu ca ra vityin. Na jaha tyiñu ra
 tsihin ndaha ra. Tacan tan coo tsa tsi

ra, tan cuvi jatyinyee ra tsi nyivi tsa iyó tsa tsiñi ñuhu tsi ñi.

29 Ña cahan ndo tsa ndavaha ñi. Cahan ndo, maa ñi tsa vaha tsa cua jatyinyee tsi nyivi tsa tsiñi tsa caahán ndo. 30 Tan ña cuhva ndo tucuiihya iñi tsi Tatyí li Nyoo tyin Tatyí li ra cuví tuñi tsa tyaá ra añima yo nda cuanda ndihi jacacu ra tsi yo quivi cua quitsi ra.

31 Ña cahun iñi ndo tisihi. Tan ña cuxaan ndo. Tan ña cuvi ndo nyivi tyixin. Tan ña cahan nyaa ndo tsi nyivi, tan ndi ña cahan ndo tsa ndavaha ñi. 32 Maa tyin cuvi ndo nyivi vaha, tan cundaahvi iñi ndo tsi nyivi. Tan jaha ndo tucahnu iñi tsi ñi, tumaa jahá Nyoo tucahnu iñi tsi maa ndo tsa cuenda ra Cristo.

Nacaa taahán tsi coo nyivi yihí cuenda Nyoo

5 1 Ndücu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo. 2 Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javahá ra tacan.

3 Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya . 4 Ña cahan ndo tuhun tsa tsahá ticanuu tsi yo. Tan ndi ña cahan ndo tsa nduve yahvi nyaá. Tyin ña taahán tsi cahan yo tacan. Vaha ca cuhva ndo tyahvi nyoo tsi Nyoo. 5 Tyin tsa tsitó ndo tyin tandihi nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuví ña, a ñaha iyó tsihin rayi tan

ñavin yii ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo. 6 Ña cuhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihi tsa ña vaha can cua tatsi tuñi Nyoo tsi nyivi tsa ña tyaá yahvi tsi ra. 7 Yacan cuenda ña cutahan ndo tsihin ñi.

8 Nyooho tsicoo ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo. 9 Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan cahan ndo maa ñi maa tsa nditsa. 10 Jañiñi ndo cutuhva ndo cuhva taahán iñi Jutu Mañi yo. 11 Ña javaha ndo cuhva javahá nyivi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi. 12 Tyin cahan nuu yo cahan yo tsa javahá xeehe ñi. 13 Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihi tsa yihí xeehe. 14 Yacan cuenda iyó nu catyí tsi:

Ndoto yooho tsa quixí un,
nduvita mahñu nu yucú ndiyi.
Tan ra Cristo cua jandunditsin
ra ñuhü nu cuahán un, catyí
tsi.

15 Yacan cuenda jaha ndo cuenda cuhva iyó ndo. Tan ña coo ndo tumaa iyó ra soho. Coo ndo tumaa iyó ra tsitó. 16 Tan ndücu ndo cuhva cahan ndo tuhun Nyoo tsihin nyivi tandihi ñi cuhva tsa nuña ndo, cahan ndo tyin vityin maa ñi maa tsa caquiñi javahá ñi. 17 Yacan cuenda ña soho coo ndo. Ndücu ndo cuhva cutuñi iñi

ndo cuhva cuñí maa Jutu Mañi yo. **18** Ña cōho ndo nyixi tan cuvi ndo ra tsiñi tyin cuví jatívi yacan tsi ndo. Maa tyin cūhva ndo tsi ndo cundaca ñaha Tatyí Ii Nyoo. **19** Cahan ndo tsihin tahan ndo maa ñi tsa vaha, tan j̄acahnu ndo tsi Nyoo. C̄ata ndo salmo cuenda ra; c̄ata ndo yaa Nyoo; c̄ata ndo tsa tsahá Tatyí Ii tsi ndo; j̄acahnu ndo tsi Jutu Mañi yo tsihin tandíhi añima ndo. **20** Tacan ñi nacuhva ndo tyahvi nyoo tsi Nyoo Jutu yo tsa cuenda tandíhi maa, a siñ cuñí ndo, o nyehé ndo tundoho. Nacuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

Nacaa taahán tsi coo yo tsihin nyívi yo

21 Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaá yahvi ndo tsi Nyoo

22 Nyooho tsa iyó yíi, tyaa yahvi ndo tsa caahán yíi ndo tumaa tsa tyaá yahvi ndo tsa caahán Jutu Mañi yo.

23 Tyin rayíi cuví ityi nuu tsihin ñasiñi ra, tumaa cuví ra Cristo ityi nuu tsihin nyívi yíhí cuenda ra. Juvín ñi maa ra jacacú tsi yo tsa cuví yo cuñu ñuhu ra. **24** Yacan cuenda tumaa tsa cuví ra Cristo ityi nuu tsihin nyívi yíhí cuenda ra, tacan taahán tsi tyaá yahvi ñaha tsi yíi ña.

25 Tan nyooho rayíi, cuñi tsi tsa cuñí ndo tsi ñasiñi ndo tumaa cuñí ra Cristo tsi yo tsa yíhí yo cuenda ra, tan tsahá ra ñayívi ra tsa cuenda yo.

26 Tacan javahá ra tan jandundí ra añima yo tsihin tuhun caahán ra tsa cuví tumaa ndutya, tan nacatya ra tsi yo quívi tsa natsinú ñi yo tsi ra.

27 Ndogo añima yo tumaa ndoó iin jahma, ña nyayu ca tsi, ña tíyi ca tsi. Tyin ra Cristo jandundí ra tsi yo tsa cuví yo nyívi yíhí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo. **28** Tacan taahán tsi cuñi rayíi tsi ñasiñi ra, tumaa tsa cuñí ra

cuñu ñuhu maa ra. Tyin tatun cuñí ra tsi ñasiñi ra, cuñí ra tsi maa ra.

29 Tyin ndi intuhun yo tan ña cuví tsa ña cuñí yo cuñu ñuhu yo, tyin jacatsí yo tan jacunditsí yo cuñu ñuhu yo. Tan ra Cristo juven ñi tacan javahá ra tsihin nyívi yíhí cuenda ra.

30 Tyin cuñu ñuhu ra cuví yo. Tan intuhun intuhun yo cuví yo juhva cuñu ñuhu ra tan yíqui ra. **31** Catyí tuhun Nyoo: “Rayíi taahán tsi nacoo ra tsi jutu ra tan tsi siñi ra, tan ndu iin ra tsihin ñasiñi ra. Tan intuhun ña cuñu ñuhu cua cuví tsa nduvi ñi.”

32 Xeehe xaan tan cahnu xaan tuhun ihya, tan catyí yu tyin cuñí tsi catyí tyin ra Cristo ndu iin ra tsihin nyívi yíhí cuenda ra tumaa ndu iin iin rayíi tsihin ñasiñi ra. **33** Tan inga tucu tuhun, cuñí tsi catyí tyin intuhun intuhun ndo taahán tsi tsa cuñi ndo ñasiñi ndo, tumaa cuñí ndo tsi maa ndo. Tan nyooho ñiñaha, tyaa yahvi ndo tsi yíi ndo.

6 ¹ Nyooho tsa nyihi, tyaa soho ndo tsa caahán jutu ndo tan siñi ndo. Tyin tacan taahán tsi javaha ndo. **2-3** Tyin nu tutu Nyoo catyí tsi tyehen: “Jaha tsa ñayívi tsi jutu un tan siñi un”, tan tuhun ihya cuví tsa jihna ñi catyí Nyoo tyin javaha yo tan cua ñihi yo tsa cua cuhva ra tsi yo. Tyin tyaa ra cuhva tyin tun javaha yo tacan, siñ xaan cua coo yo tan cuaha xaan quívi cua coo yo nu ñuhu ñayívi ihya.

4 Tan nyooho tsa iyó sehe, ña javaha ndo tsa ña vaha tsi sehe ndo tan cuxaan ñi tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

5 Tan nyooho tsa cuví musu, tyaa yahvi ndo tsi ra yíhí ndaha tsi ndo nu ñuhu ñayívi ihya. Jaha ndo tsa ñayívi tsi ra naha tsihin tsa ñi ñi añima ndo. Tan nducu ndo cuhva tyaa yahvi ndo tsi ra naha tumaa tyaá yahvi ndo tsi ra Cristo.

6 Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyi tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñí Nyoo tsihin tsa ñiñi ñiñi añima ndo. 7 Jaha tyiñu ndo tsihin tsa siñi cuñí ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi. 8 Tyin tsitó ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuví ndo o ñavin musu cuví ndo.

9 Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña siñi caá iin nyivi tan inga ñi nuu ra.

Tunyee iñi tsa tsahá Nyoo tsi yo tsa yihí yo cuenda ra

10 Tan vityin cõo ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra.

11 Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. 12 Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuví nyehe yo. Tan nu ican yihí ndaha tsi nyivi caquiñi. 13 Yacan cuenda jaha cuenda vaha ndo tsi ndo tsihin tandihí tsa jatyinyee Nyoo tsi yo. Tyin tacan tan cunyee iñi ndo quivi nducu cuhva nu ña vaha tsi ndo. Tan ña cua nduva ndo jaha nu. 14 Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan çaça vaha

ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra.

15 Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi. 16 Tan çasi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo. 17 Ra andaru iyó iin caa ndasí jiñi ra tan jacacú can tsi ra, tacan cuví tsa jacacú Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí li Nyoo tsi ndo. 18 Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí li ra tsi ndo. Yacan cuenda ña ndu uvi iñi ndo tan cõo nyito vaha ndo, ndacan tahvi ndihí ndo tsi Nyoo tsa cuenda tandihí nyivi yihí cuenda ra. 19 Tan ndacan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi itsi. 20 Tan tsa cuenda tsa jacotó yu tuhun ra Cristo, nyíi yu vehe caa ihya vityin. Ndacan tahvi ndo tsa cuenda yu, na ña nayuhvi yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyivi yihí cuenda ra Cristo

21 Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Ñiñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra. 22 Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

23 Na cuhva Nyoo Jutu yo tan Jutu Mañi yo Jesucristo tsa taxin coo aña^{ma} tandi^{hi} ra yañi yo naha ra tan na tsinu ca iñi ra naha tsi ra tan na cuñi ra naha tsi nyivi. 24 Tan

na nasoco xaan Nyoo tsi tandi^{hi} nyoo^{ho} tsa cuñi tsi Jutu Mañi yo Jesucristo. Ña jand^{hi} ndo tsa cuñi ndo tsi ra.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Filipos,

Nyíi ra Pablo vehe caa, tan javahá ra iin carta tan jacuhun ra tsi nyivi yihí cuenda Nyoo ñuu Filipos

1 ¹ Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandíhi ndo tsa yucú ndo ñuu Filipos tan cuví ndo nyivi cuenda Nyoo tan iin ñi cuví ndo tsihin ra Cristo. Tan yacan jaquitsí ndi carta ihya tsi tandíhi ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

Nu tsicán tahvi ra Pablo tsa cuenda ñi yihí cuenda Nyoo ñuu Filipos

³ Tandíhi ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo. ⁴ Tan tandíhi tsa tsicán tahvi yu tsi Nyoo tan tsicán tahvi yu tsa cuenda tandíhi ndo tsihin tsa sii cuñi añima yu. ⁵ Tyin nda quivi jihna tsa tsiñi ndo tuhun ra Cristo tan nda vityin tan ña jandíhi ndo tsa jatyinyeé ndo tsi yu. Tyin iin caa ñi jacotó yo tuhun ra Jesucristo tsi nyivi. ⁶ Tsitó vaha yu tyin tumaa tsa quitsahá javahá Nyoo tsa vaha tsitsi añima ndo, tacan cua javaha ca ra nda cuanda quivi quitsi ra Jesucristo inga tsaha. ⁷ Taahán tsi tsa caca iñi yu tacan tsa cuenda ndo, tyin cuñi xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyíi yu vehe caa ihya, tan vasu ndi maa cuhun yu nuu ra cumí tyiñu naha ra, maa tyin jacotó yu

tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo. ⁸ Nyoo tsitó ra tyin cuñi xaan yu tsi tandíhi nyooho tumaa tsa cuñi maa ra Jesucristo tsi ndo. ⁹ Tan tsicán tahvi xaan yu tsi Nyoo na cuñi ca ndo tsi ra tan na cundahvi ca iñi ndo tsi nyivi. Tan nacoo ca tsa nyityi Nyoo tsi ndo, tan cutuñi ca iñi ndo, ¹⁰ tyin tacan tan cuví ñiñi ndo tsa vaha tsi Nyoo. Tan ña cua coo ca cuatyí ndo tan cuví coo vaha ndo tsihin tuhun Nyoo nda cuanda quivi quitsi ra Cristo. ¹¹ Maa ra cua jatyinyee tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

Maa ñi maa tyiñu Nyoo javahá ra Pablo tyin iyó ra Cristo añima ra

¹² Yañi, cuñi yu tsa coto ndo tyin tandíhi tundoho taahán yu, jatyinyeé xaan tsi tyin nducuaaha ca nyivi tsinú iñi tuhun Nyoo. ¹³ Tan tandíhi andaru tsa iyó vehe ra cuví rey tan tandíhi nyivi iyó ihya tsitó ñi tyin nyíi yu vehe caa tsa cuenda tsa nyicún yu tsi ra Cristo. ¹⁴ Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyeé Nyoo tsi yu nu nyíi yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

¹⁵ Tan nditsa tyin yihí ra naha, caahán ra naha tuhun ra Cristo tsa cuenda tyin cuñi ra cunyicun nyivi tsi

maa ra naha. Tan yihí tucu ra naha caahán ra naha tuhun ra Cristo tsihin nyívi maa tyin tsihin tsa ñi ñi ra naha. **16-17** Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsi tsi yu ihya. Tyin cahan yu tuhun ra tan jacotó yu tsi nyívi tyin nditsa tsa jacacú ra tsi yo. Tan tsa cuenda tsa cuñi ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa ñi ñi ra naha tan caahán ra naha tuhun ra Cristo, tyin cuñi ra naha na cunyicun cuaha nyívi tsi ra naha tan cuñi ra naha vacu nducu ra naha tsi yu nu nyíi yu vehe caa ihya. **18** Tan ña ndihi ñi yuhu tatun juhva ra naha caahán ra naha tuhun ra Cristo tsihin tsa ña ñi ñi ra naha. Maa tyin yuhu si xaan cuñi yu tyin tuhun ra Cristo caahán tandihi ra naha, cuví ñi tsa ñi ñi ra naha caahán ra naha o ñavin.

Tan ndusi ca cuñi yu **19** tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyeé xaan Tatyí Ii ra Cristo tsi yu. **20** Tsitó vaha yu tyin Nyoo cua jatyinyee ra tsi yu tan ña cua nducahan nuu yu, tan ña cua nayuhvi yu cahan yu tuhun ra Cristo tsihin tsa ñi ñi yu. Tan ña ndihi ñi yu, an coo ca yu ñayivi, o cúu yu, maa tyin cuñi yu cahan yu tuhun ra, tahan ñi cuhva tsa tuhvá yu caahán, na nyehe nyívi cuhva iyó yu tan coto ñi tyin ra Cristo cahnu xaan ra cuví ra. **21** Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñilhi yu tsa si caa tsa iyó gloria. **22** Tan tatun coo ca yu, vaha xaan. Tyin tacan tan cuví jañilhi ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin

nyívi, ña tsitó yu. **23** Yi xaan cuñi yu tan quihin yu ndáa ityi cahun yu tyin tsa cuñi yu cahun yu cunyaa yu tsihin ra Cristo. Tyin vaha ca yacan. **24** Maa tyin tsa cuenda nyooho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo tuhun Nyoo. **25** Yacan cuenda tsitó yu tyin cua ndoo yu juhva ca quivi ihya. Tyin cuñi tsi tsa jatyinyeé ca yu tsi ndo tan cuvi cahun ndo ityi nuu ca tan cusii ca ñi ndo tsihin tsa tsinú ñi ndo tsi Nyoo. **26** Tacan tan cua nyehe ndo tsi yu inga tsaha, tan si xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

27 Cuñi tsi tsa coo yo cuhva taahán tsi coo nyívi yihí cuenda ra Cristo. Vasu nyaá yu tsihin ndo, a cañi nyíi yu, maa tyin cuñi yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu ñi nyívi tuhun ra Cristo. **28** Maa tyin nyívi xaan ñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyooho jahá Nyoo. **29** Tyin tsahá ra ndatu tsa tsinú ñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo. **30** Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo nácaa nyehe yu tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

Cuca xaan ra Cristo, maa tyin quitsi cúu ra tumaa iin ra ndaahvi

2 ¹ Nditsa tyin ra Cristo jandu iin xaan ra ñi yo tsa iin ñi cuví yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí Ii Nyoo tsihin yo.

Tan nditsa tucu tsa ndaahvi cuñí yo nyehé yo tsi nyivi tahan yo. Tatun nditsa tandíhi yacan, **2** cūhva ndo tsa cusí ca íni yu tsihin tsa vaha iyó ndo. Tan cuñi tahan ndo tsi ndo tumaa tsa cuñí ra Cristo tsi yo. Tan iin ñi cuhva caca íni ndo. Tan iin ñi tsa vaha javaha ndo. **3** Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyivi tan ñavin ca maa yo. **4** Tan intuhun intuhun yo caca íni yo tsa cuenda tsa vaha tsi inga nyivi, tan ñavin tsa cua jatyinyee tsi maa ñi maa yo.

5 Caca íni yo tumaa tsicá íni maa ra Cristo Jesús. **6** Tyin nu quítsi tsi tsanaha tsa ndí cumañi ca quítsi ra nu ñuhu ñayivi, cuví ra tahan ñi maa cuví Nyoo. Maa tyin ña tsicá íni ra tsa nacoo ra yacan. **7** Tan tyaa tsiyo ra tandíhi tunyee íni ra tan tandíhi tsa cuca ra. Tan quítsi ra nanduví ra iin nyivi ndaahvi nu ñuhu ñayivi ihya quivi tsa cacu ra. **8** Tan tsa nanduví ra iin rayi, tan ndaahvi jahā ra tsi ra tan tyaa yahvi vaha ra tsi Nyoo nda cuanda tsahā ra tsa cahñi nyivi tsi ra nu cruu. Tumaa iin ra caquiñi, tacan jahā ñi tsi ra, tan tahan ra ticanuu tyin tsahñi ñi tsi ra nu cruu. **9** Yacan cuenda Nyoo jacahnú xaan ra tsi ra. Tan tsahá Nyoo iin sívi tsi ra, iin sívi tsa cahnu xaan ca cuví tan ñavin ca tandíhi sívi. **10** Tyin tatun tsiñi yo sívi ra Jesucristo, tandíhi yo tan cua cuiñi tsiti yo. Tan tandíhi tucu tsa iyó andívi, tan tsa iyó nu ñuhu ñayivi, tan tsitsi ñuhú, tandíhi yacan cua jacahnu tsi ra. **11** Tyin tandíhi tsa iyó, cua nacoto tan cua cahan tyin ra Jesucristo cuví ra ndacá ñaha tsi tandíhi maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

Nyivi yihí cuenda Nyoo cuví ñi tumaa iin ñuhu tsa jandunditsín nu ñuhu ñayivi ihya

12 Yacan cuenda, yañi tsa cuñí xaan yu, tumaa tsa tyaa yahvi ndo tsi yu quivi tsa tsinyi yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañi nyii yu vityin. Ndūcu ndo cuhva na nyehe nyivi tyin nditsa tsa jacacú Nyoo tsi yo. Tan jaha vaha ndo cuenda cuhva coo ndo tsihin ra. **13** Tyin maa Nyoo tyihí tsa vaha añima ndo. Tan jatyinyeé ra tsi ndo tyin tacan tan cuví tyaa yahvi ca ndo tsa caahán ra tan javahá ndo cuhva cuñí ra.

14 Tatun cua javaha ndo náa tsa cua javaha ndo, ndūcu jihna ndo cuhva tsa ña cahan yuhu tahan ndo. Tan ña cañi tahan ndo. **15** Tacan tan ña cua coo cuatyí ndo. Taahán tsi cuví ndo nyivi cuiñi iyó, taahán tsi cuví ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñí tsi tsa cuví ndo tumaa iin ñuhu tsa jandunditsín nu naa nu ñuhu ñayivi ihya. **16** Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi cua quítsi ra Cristo, yuhu ñi vaha cua cuñi yu tsa cuenda ndo, tyin ña jacoto cuatu yu tuhun Nyoo tsi ndo. **17** Tan vasu cahñi nyivi tsi yu tsa catyí tuhun Nyoo, maa tyin cua cuví tsi iin tsa cua jamañi yu tsi Nyoo tan tsihin tsa tsinú íni ndo tsi ra. Tan iin caa ñi cusí íni yo tsihin ra. **18** Tan yacan cuenda taahán tsi tsa cusí íni ndo tsihin yu.

Nu jacuhun ra Pablo tsi ra Timoteo tan ra Epafrodito ñuu Filipos

19 Tatun Jutu Mañi yo tan cuñí ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsaa ra inga tsaha nu nyii yu síi xaan cua cuñi yu. Tyin cua nacatyí tuhun ra tsihin yu nácaa yucú ndo. **20** Tyin intuhun ñi ra tsicá íni tumaa tsa tsicá

iñi yu tsa cuenda ndo. Tan yoñi inga ra tsa tsicá iñi tacan. **21** Tyin tandihi ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. **22** Maa tyin tsitó ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tsihin nyivi. **23** Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyiñu, tatun ña naha ca cunyii yu ihya. **24** Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

25 Tan ra Epafrodito, yañi yo tsa jaquitsi ndo tsa jatyinyee tsi yu tsihin tyiñu tsa javahá yu, iin caa ñi cuví ndi andaru ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo. **26** Cuñi xaan ra quitsi nuhu ra nu yucú ndo, tyin tsicá xaan iñi ra tsa tsitó ndo tyin nacuhvi ra. **27** Ndisa ñihi xaan nacuhvi ra tan tsa cua cúu maa ra cuví. Maa tyin Nyoo cundahvi iñi tsi ra, tan tsi tucu yuhu tyin na ña nducuihya xaan ca iñi yu. **28** Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan siñ xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra. **29** Yacan cuenda, naquihin ndo tsi ra tsihin tsa siñ cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayivi tsi ra yañi yo naha ra tsa iyó tumaa cuhva iyó ra. **30** Tyin tsa yatyin maa cúu ra tsa cuenda tsa javahá ra tyiñu ra Cristo. Tyin vasu ndi maa cuuhvi xaan ra, maa tyin ña cuñi ra jandihi ra tsa jatyinyeé ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi xaan yucú ndo.

Nu janahá ra Pablo nácaa nduvaha yo nuu Nyoo

3 ¹ Tan vityin yañi, cusii iñi ndo tsihin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi. **2** Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo. **3** Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi añima yo quivi nacuhva cuenda yo tsi yo tsi ra. Tan jacahnú yo tsi ra tsihin Tatyí Ii ra tsa iyó añima yo. Tan cusii iñi yo tyin cuenda maa ra Cristo Jesús yihí yo. Tan ña nyitá iñi yo tyin cacu yo tsihin náa cunyaa cuñu ñuhu yo. **4** Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yaha cacu tan ñavin ca tandihi ra tsa javaha yacan vityin. **5** Tyin una quivi yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihi yu. Juvin ñi tata nyivi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quivi can, tyin ra fariseo cuví yu. **6** Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yihí cuenda ra Cristo. Tan tyaa yahvi yu tandihi maa ley tsahnu, tyin nducu xaan yu cuhva tyaa yahvi yu tsa caahán ley can. **7** Maa tyin tandihi tsa cuñi maa yu tyin cahnu xaan cuví quivi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu. **8** Tan inga tucu tuhun, tandihi tsa javaha yu, tsitó maa yu tyin nduve ca yahvi nyaá yacan tyin tsa nacotó yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa

cuenda ra Cristo tandihí tsa javahá yu quívi quítsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñí yu coto vaha ca yu tsi ra Cristo. **9** Tan cuñí yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihín cuenda ra tsi yo. **10** Tsa coto vaha ca yu tsi ra Cristo, yacan cuví tsa cuñí yu. Tyin Nyoo janandotó ra tsi ra Cristo tsihin tunyee iñi ra. Tan cuñí yu tyin coo ca tunyee iñi can tsi yu. Tan cuñí yu cunyee iñi yu tundoho tsa taahán tsi nyehé yu tsa cuenda ra. Tan cuñí yu nacuhva cuenda yu tsi yu tumaa maa ra Cristo nacuhva cuenda ra tsi ra tan tsihi ra. **11** Tyin nducú xaan yu cuhva nandoto yu tsa yaha cúu yu.

Nacaa cunyicun ñihi ca yo tsi Nyoo

12 Ña catyí yu tyin nduve ca tsa cumañí tsi yu, tan vaha xaan yu. Maa tyin cuahán yu ityi nuu ca. Tyin cuñí yu naquihin yu tsa cahán ra Cristo tyin cuhva ra tsi yu. Tyin jihna ca maa ra cahán tsihin yu. **13** Yañi, ña catyí yu tsihin ndo tyin tsa ñihí yu tandihí tsa vaha can. Maa tyin iyó intuhun ñi tsa javahá yu; nacoó yu ityi tsata tandihí tsa javahá yu, tan jañiñí yu cuhun yu ityi nuu ca. **14** Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

15 Tacan taahán tsi caca iñi tandihí nyívi tsa ñihi nyaá tsihin Nyoo. Maa tyin tatun ñavin tacan

tsicá iñi ndaa nyoocho, Nyoo cua cuhva ra tsa cutuñí iñi ndo. **16** Maa tyin iyó iin tsa cuñí tsi tsa tyaa yahvi vaha yo, tuhun tsa tsa yaha jacotó Nyoo tsi yo.

17 Yañi, javaha ndo cuhva iyó yu tan cuhva caahán yu. Tan nyehé vaha ndo cuhva iyó nyívi iyó cuhva janahá ndi tsi tandihí nyívi. **18** Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihya cuñí yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihi ra Cristo nu cruu jahá ra naha. **19** Maa tyin quívi quítsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñí cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayívi ihya. **20** Maa tyin yoo nda gloria cuví nu iyó ñuu yo. Tan ndatú yo quívi quítsi nyico Jutu Mañi yo Jesucristo, ra jacacú tsi yo. **21** Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihí tsa iyó.

Tacan ñi maa na cusii iñi yo tsihin Jutu Mañi yo

4 **1** Yañi, cuñí yu tsi ndo. Tan cuñí xaan yu nyehé yu tsi ndo. Sii xaan cuñí yu tsihin ndo. Tan tsitó yu tyin ña cahán cuatu yu tuhun Nyoo tsihin ndo. Tyin ñi xaan iñi ndo nyicún ndo tsi ra. Tan jañihi ca ndo cunyicun ndo tsi ra.

2 Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñí Jutu Mañi yo. **3** Tan yooho, yañi, tsa iin caa ñi jahá tyiñu tsihin yu, cuñí yu tyin jatyinyee un tsi ñi

cuhva yo ihya. Tyin juvin ñi jatyinyee xaan tsi yu nu cah̄an yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndih̄i ñi tsi ra Clemente tan tsi tandih̄i ca ra tsa cutahán tsihin ndi. Tan sivi tandih̄i ñi tsa nyaá nuu tutu Nyoo nda gloria.

4 Cusīi ñi ndo tsihin Jutu Mañi yo tandih̄i ñi quivi. Tan caahán yu tsihin ndo inga tsaha, cusii ñi ndo tsihin ra. **5** Coo vaha ndo tyin tacan tan nyehe tandih̄i nyivi tyin nditsa tyin nyivi vaha cuví ndo. Tan nducuhun ñi ndo tyin tsa yatyin cua quitsi Jutu Mañi yo.

6 Tan ña caca ñi ndo náa taahán ndo. Iin nyita ñi ndacan tahvi ndo tsi Nyoo náa ndih̄i tundoho tsa iyó ndo. Tan ndacan ndo tsi ra nacuhva ra tandih̄i tsa tsiñi ñuhu tsi ndo. Tacan tan ña nacoo ndo tsa tsahá ndo tyahvi nyoo tsi ra. **7** Tan Nyoo cua cuhva ra tsa taxin coo añaima ndo. Tan cahnu xaan tsa vaha cuví yacan. Tan yoñi cuví cutuñi ñi nácaa tsa cahnu tsi. Tan tsa taxin iyó tsi Nyoo cua jaha cuenda añaima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca ñi yo maa ñi maa tsa vaha

8 Nu cua ndih̄i tuhun, yañi, caca ñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca ñi ndo tsa caquiñi. Caca ñi ndo tsa sīi caa, maa ñi tsa vaha, tan maa ñi cuhva cuvi jacahnu ndo tsi Nyoo.

9 Javaha ndo tsa jacuah̄a yu tsi ndo. Tuhun tsa cah̄an yu tsiñi ndo, tan tsa javah̄a yu nyehe ndo, yacan taahán tsi javaha ndo. Tan Nyoo ra tsahá tsa taxin coo añaima yo, cua cunyaa ra tsihin ndo.

Nu jatyinyee nyivi ñuu Filipos tsi ra Pablo tsihin tsa iyó tsi ñi

10 Sīi xaan cuñi yu. Tan jacahnú

yu tsi Jutu Mañi yo tsa cuenda tsa jatyinyee xaan ndo tsi yu inga tsaha. Tan tsitó yu tyin ndih̄i ñi tsaha tan cuñi ndo jatyinyee ndo tsi yu. Maa tyin tsicoo juhva quivi ña tsah̄a tsi cuhva tsa jatyinyee ndo tsi yu.

11 Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhv̄a maa yu tsa cusii ñi yu tsihin náa tsa iyó tsi yu. **12** Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha. **13** Tandih̄i tan cuví jaha yu tsihin tunyee ñi tsa tsahá ra Cristo tsi yu. **14** Tan nyooho yañi, vaha xaan tsa javah̄a ndo tyin jatyinyee ndo tsi yu quivi tsa tsicoo yu tundoho.

15 Tsa tsitó nyooho nyivi Filipos nácaa cuvi quivi quitsah̄a caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuvi nyivi tsa jatyinyee tsi yu tsihin xuhun, tyin vaha xaan cuñi ndo tsa cah̄an yu tuhun Nyoo tsihin ndo. **16** Tan tsitsi tsa nyí yu ñuu Tesalónica, ñavin intuhun ñi tsaha jatyinyee ndo tsi yu. **17** Ñavin tsa tsicá ñi yu tsa jatyinyee ndo tsi yu, tyin tsa cuñi yu tsa jatyinyee ndo tsihin tyiñu Nyoo, tacan tan cuaha ca cua nasoco Nyoo tsi ndo. **18** Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsah̄a ndo can cuví tsi tumaa xico tami, xico vaha tsa tsaá nuu Nyoo. Yacan cuví tsa taahán ñi ra. **19** Tan Nyoo cua cuhva ra tandih̄i tsa tsiñi ñuhu tsi ndo. Tan tandih̄i tsa cuca tsa iyó tsi ra Cristo nda gloria tandih̄i yacan tan cua cuhva ra tsi ndo. **20** Na jacahnu yo tsi Nyoo Jutu yo tacan ñi maa. Tan na

cuvi tsi tacan ñi.

**Nu jacuhún ra Pablo nacumi tsi
nyivi ñuu Filipos**

21 Tсахá yu nacumi tsi tandíhi ndo
tsa yíhí ndo cuenda ra Cristo ñuu
Filipo. Tan jaquitsí tucu ra yañi yo
tsa yucú tsihin yu ihya nacumi tsi

ndo. 22 Tan nyivi cuenda Nyoo tsa
yucú vehe ra ndacá ñaha ñuu Roma
ihya, tan tandíhi ca nyivi yíhí cuenda
Nyoo ñuu ihya jaquitsí ñi nacumi tsi
ndo.

23 Na nasoco maa Jutu Mañi yo
Jesucristo tsi tandíhi ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Colosas

Nu quitsahá javahá ra Pablo carta

1 1-2 Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu tsicán tahvi ra Pablo tsa cuenda nyivi yihí cuenda ra Cristo

3 Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. **4** Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo. **5** Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsahá nyitá iñi ndo tsi Nyoo. **6** Tan juvin ñi maa tuhun ra Cristo tsa cahān ra Epafra tsihin ndo, yacan nacutyá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsitō ndo tyin nditsa tsa cuñí Nyoo tsi ndo. **7** Yacan janahā ra Epafra tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo. **8** Tan juvin ra catyí tuhun tsihin ndi tyin cuñí xaan ndo tsi nyivi tahan

ndo, tyin maa Tatyí Ii Nyoo tsahá tsa vaha can coo añima ndo.

9 Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñí ra tyin javahá ndo. **10** Tacan tan cuví coo ndo tumaa taahān maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra. **11** Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundoho, tan na cusí iñi ndo. **12** Tan na cuhva ndo tyahvi nyoo tsi Nyoo Jutu yo, tyin maa ra tsa janduvahā ra tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catyí nyivi tsa cuiti iyó nuu ra. **13** Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo. **14** Tan jatā ra tsi yo tsihin ñiñi Sehe ra tan jahā ra tucahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvahā iyó yo tsihin Nyoo

15 Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo. **16** Tan maa ra javahā tandihí tsa iyó

andivi tan nu ñuhu ñayivi jahā Nyoo. Javahā ra tsa cuví nyehe yo tan tsa ña cuví nyehe yo. Javahā ra tandihi tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihi yacan javahā ra tyin cuatyínu ra cuhva cuñí ra. **17** Tan tsa iyó maa ra tsa ndi cumañi ca coo tandihi maa tsa iyó. Tan tandihi tsi jahá tyiñu vaha tsi jahá ra. **18** Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandotoḡ tsa jihna ca, tyin tacan tan quihí ndaha ra tandihi tsa iyó. **19** Tyin Nyoo cuñi ra tsa cuví ra Cristo tumaa cuví maa ra. **20** Tan tsahā ra tsi ra Cristo tsa cúu ra nu cruu tyin tacan tan cuví coo vaha tandihi tsa iyó tsihin ra, tahan ñi tsa iyó nu ñuhu ñayivi tan andivi.

21-22 Tahan tsanaha javahā ndo tsa ña vaha tan xaan cuñi ndo nyehe ndo tsi Nyoo. Maa tyin Nyoo jaquitsi ra tsi ra Cristo, Sehe ra tan tsahā cuenda ra cuñu ñuhu ra tan tsihi ra nu cruu. Tan janacoḡ vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra. **23** Yacan cuenda jañihi ca ndo tsinú iñi ndo. Tan cūita iñi ndo tyin cua tsa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha taniñi cahnu ñuhu ñayivi. Tan yuhu ra Pablo jatyinyeé yu caahán yu tuhun ihya tsihin nyivi.

Nu catyí ra Pablo tyin nyaá siqui ra tsa janahá ra tuhun ra Cristo tsi tandihi nyivi tsicá vehe ñuhu

24 Vityin sii cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra

cuaha xaan tundoho nyehe ra tsa cuenda yo tsa cuví yo cuñu ñuhu ra. Tacan tan cua jaquita ndihi yu tundoho tsa nyehe ra. **25** Yuhu cuví iin ra caahán tuhun ra Cristo tyin tacan jatyinyeé yu tsi tandihi nyivi yihí cuenda ra. Tyin maa ra Nyoo catyí tsa cahan yu tandihi tuhun ra tsa cuenda tsa vaha tsi ndo.

26 Jacuahá yu tuhun tsa tsicumí xeehe Nyoo tahañ tsanaha, tsa ndi cumañi ca javahā ra ñuhu ñayivi. Tan vityin tsahá ra tsa nacoto nyivi yihí cuenda ra itsi. **27** Tan nyooho tsa ñavin nyivi Israel cuví cuñi ndihi ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

28 Tuhun maa ra Cristo caahán ndi. Tan tsahá cuenda ndi tuhun ihya tsi tandihi nyivi. Tan jacuahá ndi tsi tandihi ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. **29** Tan tsa cuenda tsa cuñi yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

2 ¹ Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihi ndo tan tsa cuenda nyivi ñuu Laodicea, tan tsa cuenda tandihi nyivi tsa ñaha ca nyehe tsi yu. ² Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumí xeehe Nyoo tahañ tsanaha, tan vityin jacotó ra itsi tsi yo. ³ Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo. ⁴ Caahán yu tyehen tsihin ndo tyin

tacan tan ña jandavi ñaha nyivi tsi ndo tsihin tuhun tsa sii natuhún ñi. **5** Vasu nduve yu nyii tsihin ndo, maa tyin ñuhú xaan iñi yu tsi ndo. Tan sii xaan cuñí yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

6 Yacan cuenda tumaa natsinu iñi ndo tsi ra Cristo quivi nañihí ndo tsi ra, tacan cuñí tsi coo ndo tsihin ra. **7** Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvą ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

8 Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsinú iñi ñi cuhva tsicá iñi nyivi.

9 Yacan ña tsinu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi. **10** Tan tsitu ndo tsihin Nyoo tyin iin ñi cuví ndo tsihin ra Cristo. Tan maa ra ndacá ñaha tandihí tsa ndacá ñaha nu ñuhu ñayivi tan tandihí tatyí tsa ña nyehé yo. **11** Tan tsa iin ñi cuví ndo tsihin ra Cristo, nda quivi natsinu iñi ndo tsi ra, tan nanduví ndo nyivi ra. Maa tyin ña nanduví ndo nyivi ra tsa cuenda tsa tsinyaa tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaą ra Cristo tsi ndo: **12** Quivi tsicoondutyą ndo tsitsi ndutyá, tumaa tsa tsihi ndo tsihin ra Cristo tan quihví ndo tsitsi ñuhu cuví can. Tacan tan nandoto tucu ndo tsihin ra tyin tsinú iñi ndo tyin Nyoo janandoto tsi ra tsihin tunyee iñi ra. **13** Tahan tsanaha cuví ndo tumaa nyivi tsihi jaha cuatyí ndo, tyin nduve Nyoo nyaá ańima

ndo tan ña tsinyaa tuñi Nyoo cuñu ñuhu ndo. Maa tyin vityin Nyoo jaha ra tucahnu iñi tandihí cuatyí ndo. Tan tsahą ra tsa coo ndo ñayivi nyito tsihin ra Cristo. **14** Tyin ley tsahnu jaquituví tsi cuatyí yo. Tan catyí tsi tyin taahán tsi cuhun yo anyaya tyin ña tyaá yahvi yo itsi. Maa tyin ra Cristo tsihi ra nu cruu jaha Nyoo tan tsindihí tsa cuhun yo anyaya. **15** Tan tsa tsihi ra nu cruu jaha canaa ra tsi nu ña vaha tan tandihí ca tatyí ña vaha tsa ndacá ñaha. Tacan tan tsindaca ra tsi nu nuu tandihí nyivi tan nuu ángel tyin na nyehe ñi tyin cahnu ca cuví maa ra, yacan cuenda jaha canaa ra.

Na nanducú yo tsa vaha tsa tsahá Nyoo

16 Yacan cuenda ña taahán tsi tyaa nyivi cuatyí tsi ndo tsa cuenda tsa tsatsí ndo a tsa cuenda tsa tsihi ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi. **17** Tandihí tsehe ña jacacú can tsi yo tyin cuví can tumaa tixahnu tsa cua quitsi ra Cristo. Tan vityin tsa yaha quitsi ra, tan juvin ra jacacú tsi yo. **18** Ña cuhva ndo tsa casi nyivi nu naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can. **19** Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

20 Tumaa tsa tsihi cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenda tyin

iyó ca ndo tumaa iyó nyívi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu. **21** Tyin catyí ñi tsihin ndo tyeheh: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. **22** Maa tyin ña taahán tsi casí ñi nu javahá ndo yacan tyin tsa jacuahá ñi, maa ñi tsa tsicá iñi nyívi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo. **23** Ñi tsa javahá tandíhi can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3 **1** Tsaḥa Nyoo ñayívi nyito coo yo tyin nandotó ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo. **2** Caca iñi ndo yacan, tan ña caca xaan iñi ndo tuhun tsa iyó nu ñuhu ñayívi ihya. **3** Tyin vityin ña javahá ca ndo tsa javahá ndo taḥan tsanaha, tyin tsa tsihi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. **4** Tan quívi cua quítsi nyico ra Cristo, ra tsa tsahá ñayívi nyito tsa iyó yo, tacan tan cua nyehe nyívi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

Nacaa tsicoo yo nu quítsi tsi ityí tsata tan nácaa cuñí tsi coo yo tsihin Nyoo vityin

5 Yacan cuenda jandíhi ndo tandíhi tsa ña vaha tan tsa caquiñi tsa cuñí cuñu ñuhu ndo. Tan ña cusu ndo tsihin iin ñaha tun ñaha ca tindaha ndo, tahan ñi rayíi tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsitoho jacahnú ndo tan tyaá

tsiyo ndo tsi Nyoo cuví can. Tyin tacan javahá nyívi tsa ña yihí tuhun Nyoo, maa tyin nyooho ña taahán tsi javaha ndo tacan. **6** Tsa cuenda tandíhi tsa caquiñi ihya cuxaán xaan Nyoo tsi nyívi tsa ña tyaá yahvi tsa caahán ra. Tan cua tatsi tuñi ra tsi ñi. **7** Tan juvin ñi tacan javahá tucu maa yo quívi tsa ña nacotó yo tsi Nyoo. **8** Maa tyin vityin ña javaha ca ndo tandíhi tsa ña vaha can: ña cuxaan ca ndo. Ña xaan cuñi ndo nyehe ndo tsi nyívi tahan ndo, tan ña jacuñi nyaa ndo tsi ñi, tan ña caḥan ndo cuendu síqui ñi. Tan ña caḥan ca ndo tsa ndavaha ñi. **9** Ña caḥan tahan ca ndo cuendu síqui iin ndo tan inga ndo. Tyin tsa nacoo ndo tandíhi tsa ña vaha tsa javahá ndo taḥan tsanaha. **10** Tyin vityin tsa nanduví yo nyívi tsa tan iyó yo ñayívi nyito. Tan ndutsaá ca yo tumaa caá Nyoo, ra javahá tsi yo, nda cuanda coto vaha ca yo tsi ra. **11** Ña ñiñi tsa cuví yo nyívi Israel, o nyívi Grecia, o nyívi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyívi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandíhi yo tsihin ra Cristo, tyin maa ra cuví tandíhi tan iyó ra tsihin tandíhi yo.

12 Nyoo cuñí ra tsi yo tan nacatsí vaha ra tsi yo tyin cuví yo nyívi ra. Yacan cuenda coo ndo ñayívi nyito tumaa taahán tsi coo nyívi yihí cuenda ra; cundaahvi iñi ndo nyehe ndo tsi nyívi tahan ndo; cavi ndo nyívi vaha tan ndaahvi jaha ndo tsi ndo nuu Nyoo; ndumasu ndo; cunyeet iñi ndo nyehe ndo tandíhi tsihi tan tundoho tsihin tsa síi cuñí ndo. **13** Ña cundíhi iñi ndo tsihin nyívi tahan ndo. Jaha ndo tucahnu iñi tsi ñi tatun náa javahá ñi tsi ndo. Tumaa ra Cristo jahá ra tucahnu iñi tsi maa ndo, tacan cuñí tsi javahá tucu maa ndo tsihin nyívi. **14** Tyin tsa cuñí

tahan yo tsi yo, yacan cuví tsa ñíñi ca cuñí tsi. Tyin yacan cuví tsa jandu iín tsi yo. **15** Tan **cuhva** ndo tsa cundaca ñaha tsa taxin Nyoo **añima** ndo, tan na jaquihin ityi tsi tsi ndo. Tyin tsa **cuenda** yacan, **caná** Nyoo tsi ndo tan jandu iín ra tsi ndo tsihin ra Cristo. Tan **cuhva** ndo tyahvi nyoo tsi Nyoo.

16 Tan na **cutu** **añima** ndo tsihin **tuhun** ra Cristo, tan **jacuaha** tahan ndo **tuhun** ra tsi ndo. Tan **jandu** iin tahan ndo iñi ndo tsihin **tandíhi** tsa **tsiñi** tuñi tsa **tsahá** Nyoo tsi ndo. **Çata** ndo yaa tan **salmo**. Tan **çata** ndo yaa tsa **tsahá** **Tatyí** li Nyoo tsi ndo tsihin tsa **ñi** iñi **añima** ndo. Tan **tacan** ñi **naçuhva** ndo tyahvi nyoo tsi Nyoo. **17** **Tatun** **náa** **tyiñu** **cua** **javaha** ndo, o **náa** **cua** **cahan** ndo, **javaha** ndo can tsihin **sivi** **Jutu Mañi** yo **Jesús**. Tan **juvin** ñi **cuhva** can **naçuhva** ndo tyahvi nyoo tsi Nyoo tsa **cuenda** maa ra Cristo.

Nu tsahá cuenda ra Pablo nácaa nducú yo cuhva coo vaha yo tsihin nyivi

18 Nyooho tsa iyó **yí** **cuhva** ndo tsa **cundaca** ñaha **yí** ndo tsi ndo. **Tacan** **taahán** tsi **coo** ndo, **tyin** **yíhi** ndo **cuenda** **Jutu Mañi** yo. **19** Tan **nyooho** **rayí**, **cuñi** ndo tsi **ñasihi** ndo. Tan **ña** **cundihi** iñi ndo **nyehé** ndo tsi ñi. **20** Nyooho tsa **nyíhi** **tyaa** **yahvi** ndo tsi **jutu** ndo tan tsi **síhi** ndo, **tyin** **síi** **xaan** **cuñi** **Jutu Mañi** yo **tun** **javahá** ndo **tacan**. **21** Nyooho tsa **cuví** ndo **jutu** tan **síhi**, **ña** **yaha** **xaan** **jacuxaan** ndo tsi **sehe** ndo, **tyin** **coto** **nducuihya** **xaan** iñi tsi. **22** Tan **nyooho** tsa **cuví** **musu**, **tyaa** **yahvi** ndo tsi ra **yíhi** **ndaha** tsi ndo. **Ñavin** tsa **nyehé** ñi ra tsi ndo tan **tyaa** **yahvi** ndo tsi ra **naha**, tan **catyi** ra **naha** **tyin** **vaha** **xaan** ndo. **Tyaa** **yahvi** **nyooho** tsi ra **naha** tsihin tsa **ñi** iñi **añima** ndo **vasu** ña **nyehé** ra **naha**, **tyin** **Nyoo** **nyehé** ra. **23** **Tandíhi** ñi **tyiñu** **javahá** ndo, **javaha** ndo can tsihin tsa **síi** **cuñi** ndo **tumaa** tsa **jahá** **tyiñu** ndo

cuenda **Jutu Mañi** yo tan **ñavin** **cuenda** **nyivi**. **24** Tyin **tsitó** ndo **tyin** **maa** **Jutu Mañi** yo ra **Cristo** **cua** **cuhva** ra tsa **taahán** tsi tsi ndo **tyin** **maa** ra **cuví** ra **yíhi** **ndaha** tsi ndo tsa **nditsa**. **25** Tan **tatun** **javahá** ndo tsa **ña** **vaha**, **Nyoo** **cua** **tatsi** **tuñi** ra tsi ndo tsa **cuenda** tsa **ña** **vaha** tsa **javahá** ndo, **tyin** **ña** **síin** **caá** iin yo tan **inga** yo **nuu** **Nyoo**, **tyin** **tandíhi** yo tan **inducu** ñi **caá** yo.

4 **1** Nyooho tsa iyó **musu**, **cuñi** tsi **cuví** ndo **nyivi** **vaha** tsihin **musu** ndo. **Nducuhun** iñi ndo **tyin** **iyó** ra **yíhi** **ndaha** **tucu** tsi **maa** ndo **nda** **gloria**. Tan **maa** ra **nyehé** ra tsi ndo.

2 **Ndaçan** **tahvi** ndo tsihin tsa **ñi** iñi ndo. **Çoo** **nyito** ndo tan **nacuhva** ndo tyahvi nyoo tsi Nyoo tsa **cuenda** **tandíhi** maa. **3** **Ndaçan** **tahvi** ndo tsa **cuenda** **ndi**, **tyin** na **nuña** **Jutu Mañi** yo **añima** **nyivi** tan **tyaa** **soho** ñi **tuhun** **xeehe** ra **Cristo** tsa **caahán** **ndi** tsihin ñi. **Tsacatyí** **tuhun** **ihya** **nyíi** **yu** **vehe** **caa**. **4** **Ndaçan** **tahvi** ndo tsa **cuenda** **yu** na **cuví** **jacuaha** **yu** tsi **nyivi** **cuhva** **cuví** **cutuñi** **vaha** iñi ñi **tuhun** ra **Cristo**, **tumaa** **taahán** **maa** tsi **javahá** **yu**.

5 **Cuiti** **çoo** ndo tsihin **nyivi** tsa **ña** **yíhi** **tuhun** **Nyoo**, **tyin** **tacan** tan **cuví** **cahan** ndo **tuhun** **Nyoo** tsihin ñi.

6 Tan **maa** ñi **tuhun** **vaha** **cahan** ndo tsihin ñi. Tan **taahán** tsi **coto** ndo **nácaa** **cua** **nacahan** ndo **tatun** **nducu** **tuhun** ñi **náa** **nducu** **tuhun** ñi tsi ndo.

Nu tsahá ra Pablo nacumi tsi nyivi yíhi cuenda Nyoo ñuu Colosas

7 Ra **Tíquico**, ra **yañi** yo, ra **jahá** **tyiñu** **tyiñu** **Jutu Mañi** yo tsihin **yu**, **cua** **nacatyí** **tuhun** ra tsihin ndo **nácaa** **iyó** **yu**. **8** **Yacan** **cuenda** **jaquitsí** **yu** tsi ra **nu** **yucú** ndo na **jandu** iin ra iñi ndo tan **catyi** **tuhun** ra tsihin ndo **nácaa** **yucú** **ndi**. **9** Tan **vatsí** **ndíhi** ra **Onésimo**, ra **ñuu** ndo, tsihin ra. **Vaha** **xaan** **tsinú** iñi ra tsi ra **Cristo**, tan **cuñi** **xaan** yo tsi ra. **Cua** **catyi** **tuhun**

maa ra naha tsihin ndo tandihi tsa cuví nu nyíi yu ihya.

10 Ra Aristarco, ra nyíi tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun tsaa ra Marcos nu yucú ndo, vaha çahan ndo tsihin ra. **11** Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihi ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iín xaan ra naha iñi yu. **12** Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihi cuhva cuñi ra. **13** Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyívi tsa yucú ñuu Laodicea

tan ñuu Hierápolis. **14** Vatsí tucu nacumi tsi ndo jahá ra Lucas, ra tsa cuví doctor tsa cuñi xaan yo, tan ra Demas tucu.

15 Çuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan çuhva ndihi ndo nacumi tsi ña Ninfas tan tsi tandihi nyívi yihí cuenda Nyoo tsa ndu iín yuvehe ña. **16** Tatun ndihi cahvi ndo carta ihya, tan jacuhun ndo itsi tsi nyívi yihí cuenda Nyoo nda ñuu Laodicea na cahvi ndihi ñi itsi. Tan na cuhva ñi carta tsa jacuhun yu tsi ñi, cahvi ndo.

17 Çahan ndo tsihin ra Arquipo tan çatyí ndo: “Javaha vaha tyiñu tsa tsaha Jutu Mañi yo tsi un tyin javaha un.”

18 Yuhu ra Pablo tyaá yu nacumi ihya tsi ndo. Na ña naa iñi ndo tyin nyíi yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyag ra Pablo tan ra cutahán
tsihin ra iin carta cuenda nyivi
yihí tuhun Nyoo

1 ¹ Yuhu ra Pablo ra Silvano tan ra Timoteo, jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añima ndo.

Vaha xaan tsinú iñi nyivi
Tesalónica tsi Nyoo

² Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo. ³ Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñi ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua kuhva Jutu Mañi yo Jesucristo tsi ndo.

⁴ Tyin tsitó ndi tyin Nyoo cuñi xaan ra tsi ndo, nyooho yañi, tan maa ra nacatsi vaha tsi ndo. ⁵ Tyin quivi cahán ndi tuhun Nyoo, nácaa jacacú ra tsi yo, tsihin ndo, cahán ndi tuhun tsihin tunyee iñi Tatyí Ii Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoo ndi quivi tsiyucú ndi tsihin ndo. Tsicoo ndi tacan tsa cuenda tsa vaha tsi maa ndo.

⁶ Tan quitsahá iyó ndo kuhva iyó ndi, tan kuhva iyó Jutu Mañi yo. Tyin

naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin si xaan cuñi ndo tyin maa Tatyí Ii tsahá can tsi ndo. ⁷ Tan tsa tacan iyó ndo, jatyinyeé xaan ndo tsi tandihí nyivi yihí cuenda Nyoo tanií cahnu Macedonia tan tanií cahnu Acaya ihya, tyin nyehe ñi kuhva iyó ndo tsihin Nyoo. ⁸ Ñavin Macedonia tan Acaya ñi, maa tyin tandihí ñi ityi nu tsiñi nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuenda ña ñiñi ca cuñi tsi cahan ndi tuhun Nyoo tsihin ñi. ⁹ Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihi tucu ñi tsihin ndi nácaa jandihí ndo tsa jacahnú ndo tsitoho tan quitsahá jahá tyiñu ndo tyiñu Nyoo nyito. ¹⁰ Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andivi. Ra ican cuví ra tsa janandotó Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

Tyiñu jahá ra Pablo ñuu Tesalónica

2 ¹ Nyooho yañi, tsitó ndo tyin ñavin tsa cuatu quitsi ndi cahán ndi tuhun Nyoo ñuu ndo. ² Tyin tsitó ndo nácaa nyehe ndi tundoho jahá nyivi ñuu Filipo tsa ndi cumañi ca tsaq ndi ñuu ndo. Tan vasu nyehe xaan ndi tundoho ñuu can, maa tyin quivi tsaq ndi ñuu ndo cahán ndi

tuhun Nyoo tsihin ndo tsihin tsa ña yuuhví ndi. Tan vasu xaan xaan cuñi nyivi ñuu ndo, maa tyin jatyinyee xaan Nyoo tsi ndi tan ñi ñi ndi jacoto ndi tsi ndo cuhva jacacú ra tsi yo.

3 Tyin tuhun tsa tsaha cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsica ñi ndi. Tan ndi ñavin tsa cuñi ndi jandavi ñaha ndi tsi ndo. **4** Nduve tsa ña vaha cahan ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñi ndi tsa vaha cahan nyivi tuhun ndi, maa tyin cuñi ndi tsa vaha cahan Nyoo tuhun ndi, tyin maa ra nyehé ra cuhva iyó yo. **5** Tan tsitó ndo tyin ndi iin tsaha tan ña cahan ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cahan ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya. **6** Tan ndi iin tsaha ña nducu ndi cuhva jacahnu nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi. **7** Tan vita cahan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyinyee ndi tsi ndo. **8** Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuenda ñayivi iyó ndi tsa cuenda tsa cuñi ndi tsi ndo. **9** Nyooho yañi, nducuhún ñi ndo nácaa jahá tyiñu ndi tan tsatsi ndi quivi tsiyucu ndi tsihin ndo. Jahá tyiñu ndi tsinu cahñi tan tsacuaa tyin ña cuñi ndi jatyañu ndi tsi ndo tsitsi tsa caahán ndi tuhun Nyoo tsihin ndo.

10 Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javaha ndi quivi

tsiyucu ndi tsihin ndo tsa cuví ndo nyivi tsinú ñi tsi ra Cristo. Maa tyin maa ñi maa cuhva cuñi Nyoo javaha ndi, tan yacan cuenda ña cuví cahan ndo tsi ndi. **11** Tan tsitó tucu ndo nácaa jandu iin ndi ñi intuhun intuhun ndo tsihin tuhun tsa tsaha cuenda ndi tsi ndo. Tsaha ndi tunyee ñi tsi ndo tumaa iin rayi tsa iyó sehe tsahá ra tunyee ñi tsi sehe ra. **12** Tan catyi ndi tsihin ndo, catsi coo ndo tumaa taahán tsi coo nyivi yihí cuenda Nyoo. Tyin maa Nyoo cana tsi ndo tyin coo ndo nu ndacá ñaha ra, tan nyehe ndo tsa cahnú cuví ra.

13 Yacan cuenda iin nyita ñi tsahá ndi tyahví nyoo tsi Nyoo, tyin quivi tsiñi ndo tuhun ra tsa cahan ndi tsihin ndo, naquihin cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsaha tsinú ñi ndo tsi Nyoo tan nasama cuhva iyó ndo. **14** Yahá can tan nyehe tucu maa ndo tundoho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyivi Israel. **15** Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahañ tsanaha. Ñi Israel can tsinya ndaha ñi tsi ndi. Ñavin cuhva cuñi Nyoo iyó ñi. Tan xaan ñi ñi tsi tandihí maa nyivi. **16** Tatu cuñi ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahan ra Pablo tyin cuñi ra cunyehe ra nu yucú nyivi Tesalónica inga tsaha

17 Nyooho yañi, tsa yahá tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin

ñuhú xaan iñi ndi tsi ndo. Tan tsihin tsa ñi iñi ndi cuñi ndi cunyehe ndi nu yucú ndo inga tsaha. **18** Tan nducy ndi cuhva quitsi ndi, maa tyin ña cuvı. Yuhu ra Pablo, cuaha xaan tsaha nducy yu cuhva quitsi ndi, maa tyin tandihi ñi tsaha tsa cuñi ndi quitsi ndi, ña tsaha nu ña vaha. **19** Maa tyin ¿náa ndatú ndi? Tan ¿yóo cuenda cusii iñi ndi, tan vaha cuñi ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quivi quitsi ra inga tsaha? **20** Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahı tyiñu ndi. Tan sii xaan cuñi ndi tsa cuenda yacan.

3 ¹ Tan ña cunyeē ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaq ndi cuhva tsa ndoo intuhun ñi maa yu ñuu Atenas. ² Tan jaquitsı yu tsi ra Timoteo yañi yo, na quitsi nyehe ra nu yucú ndo. Ra ican cuvı musu Nyoo tyin inducu ñi jahı tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsı ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo. ³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehe yo tundoho. ⁴ Tyin nda ndi yucú ca maa ndi tsihin ndo, tan cahán ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuvı. ⁵ Ña cunyeē ca iñi yu tsa cuñi yu coto yu nácaa yucú ndo. Yacan cuenda jaquitsı yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhví yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuvı, tsa cuatu ñi jahı tyiñu ndi nu yucú ndo.

⁶ Maa tyin vityin tsa tsaq nuhu ra Timoteo tsa quitsı ra nu yucú ndo.

Tan nacatyı tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyı ra tyin ñuhú xaan iñi ndo tsi ndi tan cuñi xaan ndo nyehe ndo tsi ndi; tumaa tsa cuñi tucu maa ndi nyehe ndi tsi ndo. ⁷ Yacan cuenda, nyooho yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitö ndi tyin nyooho vaha tsinú iñi ndo tsi Nyoo tan ña nacoó ndo tsi ra. ⁸ Tyin tumaa tsa ndutsaq ñayivi iyó ndi cuñi ndi tsa tsitö ndi tyin nyooho vaha tsinú iñi ndo tsi Nyoo. ⁹ Ndi ña ñihı ca ndi cuhva cuhva ndi tyahvi nyoo tsi Nyoo tsa cuenda ndo. Tyin sii xaan cuñi ndi nuu Nyoo tsa cuenda tyin vaha cuahán ndo tsihin ra. ¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehe ndi tsi ndo. Tacan tan cuvı jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuvı quitsi ndi nu yucú ndo.

¹² Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihi ca nyivi tumaa tsa cuñi maa ndi tsi ndo. ¹³ Tyin tacan tan cuiti coo ndo tsihin ra tyin tsa yaha janduvaha ra añima ndo. Tan ña cua coo ca cuatyı ndo nuu Nyoo Jutu yo quivi quitsi Jutu Mañi yo Jesucristo tsihin tandihi nyivi yihı cuenda ra.

Nacaa taahán iñi Nyoo coo yo

4 ¹ Vityin nyooho yañi, tsihin sivi ra Jesús caahán ndaahví xaan ndi tsihin ndo tan tsicán ndi tsi ndo tsa ña jandihı ndo tsa iyó ndo tumaa

tsa janahā ndi tsi ndo. Jāñihi ca ndo nducu ndo cuhva coo vaha ndo nuu Nyoo tumaa taahán iñi maa ra.

2 Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. **3** Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yii ñi cuvi ra. **4** Tan nyooho yañi, intuhun intuhun ndo cuñí tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha. **5** Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyivi ña yihí tuhun Nyoo. **6** Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahān ndi tsihin ndo. **7** Tyin Nyoo canā ra tsi yo tsa coo yo cuhva cuñí maa ra, tan ña javaha yo tsa caquiñi. **8** Yacan cuenda nyivi ña cuñí tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí li ra tsi yo. **9** Maa tyin tuhun tsa cuñí tahan yo tsi yo ña tsiñí ñuhu tsa tyaa yu itsi nu carta ihya. Tyin tsa janahā maa Nyoo tsi yo nácaa taahán tsi cuñí tahan yo tsi yo. **10** Tan nyooho tsa tsitó maa ndo tuhun can tyin cuñí ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñí tahan ndo tsi ndo tsa intuhun intuhun quivi. **11** Nducu ndo cuhva coo taxin ndo. Tan ña tyihi ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu

ndo tsihin ndaha ndo tumaa cahān ndi tsihin ndo quivi can. **12** Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuvi quivi quitsi Jutu Mañi yo Jesús inga tsaha

13 Nyooho yañi, cuñí ndi tsa coto ndo nácaa taahán nyivi tsa tsa tsihi, tyin tacan tan ña nducuihya iñi ndo tumaa cuihya cuñí nyivi ña cua nandoto tsa ña cua coo tsihin Nyoo. **14** Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

15 Yacan cuenda catyí ndi tsihin ndo tumaa jacuahā Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan nacoo yo tsi nyivi tsa tsihi.

16 Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto.

17 Yahā can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuvi yo tsihin ra. **18** Yacan cuenda jandu iin tahan ndo iñi ndo tsihin tuhun ihya.

5 **1** Nyooho yañi, ña ñiñi cuñí tsi jacoto yu tsi ndo ama cua cuvi tandihi tsa tsa yahā cahān yu tuhun tsihin ndo. **2** Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihvi ñasuhu yuvehe yo tsa tsacuaa tacan cua cuvi. **3** Tyin quivi tsa catyí nyivi tyin taxin ñi caa, tan nduve maa tsa yuuhvi ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe,

sana iñi ña tan quitsahá cuuhví tsitsi ña. Tan tacan cua tahan nyívi quívi quitsi Jutu Mañi yo, tyin ña cua cuvi ca cunu xeehe ñi. **4** Maa tyin nyooho yañi, quívi quitsi Jutu Mañi yo ña cua tahan ndo tumaa taahán nyívi, tun sana iñi ñi tan quíhví ñasuhu yuvehe ñi tyin nyooho ñavin ca nu naa iyó ndo. **5** Tyin tandíhi yo tsitó yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyívi ña nacotó tsi Nyoo. **6** Yacan cuenda catsi cōo ndo cōonyito ndo tan ña cusu ndo tumaa iyó nyívi ña nacotó tsi Nyoo, tyin ñi ican ña tyaá yahvi ñi tsa cua quitsi Jutu Mañi yo inga tsaha. **7** Tyin nyívi quixí, quixí ñi tsacuaa, tan nyívi tuhva tsihí nyixi, tsiñí ñi tsacuaa. **8** Maa tyin yoo tsa cuví yo nyívi iyó tsinu cahñi, na catsi cōo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñí yo tsi tandíhi nyívi. Tan na jaha tucu yo cuenda tsi yo tumaa jahá cuenda andaru jíñi ra tsihin iin caa, tacan taahán tsi cuita iñi yo tyin cua cacu yo. **9** Tyin Nyoo ña nacatsí ra tsi yo tsa tatsi tuñi ra tsi yo, nacatsí ra tsi yo tyin jacacu Jutu Mañi yo Jesucristo tsi yo jahá ra. **10** Tyin ra Jesucristo tsihí ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihí yo, a nyito yo, maa tyin tandíhi yo cua coo yo iin caa ñi tsihin ra. **11** Yacan cuenda jandu iin ndo iñi nyívi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsahá cuenda ra Pablo tsi nyívi yihí cuenda Nyoo

12 Nyooho yañi, caahán ndaahvi xaan ndi tsihin ndo, jahá ndo tsa

ñayívi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tyiñu Jutu Mañi yo javahá ra naha. **13** Cuñí tsi tsa jaha xaan ndo tsa ñayívi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

14 Tavá tucu ndi tyiñu tsi ndo yañi, jacahan ndo tsi nyívi ña cuñí jaha tyiñu. Tan jandu iin ndo iñi nyívi tsa ndu uvi xaan iñi. Tan jatyinyee ndo tsi nyívi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyívi.

15 Jaha ndo cuenda coto javaha ndo tsa ndavaha ñi tsihin nyívi javahá tsa ña vaha tsihin ndo. Nducu ndo cuhva javaha ndo tsa vaha tsihin nyívi yihí tuhun Nyoo tsihin ndo tan tsihin tandíhi ca nyívi.

16 Cusiñ iñi ndo tandíhi ñi quívi. **17** Tan ña jandíhi ndo tsa tsicán tahvi ndo tsi Nyoo. **18** Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñí maa Nyoo javaha yo tsa cuví yo nyívi tsinú iñi tsi ra Cristo Jesús.

19 Ña ndahva ndo ñuhu Tatyí Ii Nyoo tsa iyó añima ndo. **20** Ña vacu nducu ndo tsa caahán ra cuví ndusu yuhu Nyoo. **21** Nyehé jihna ndo tun tandíhi tsa caahán ra tan vaha tsi tumaa tsa taahán tsi nyehe ndo tandíhi inga ca tuhun. Tan naquihin ndo tsa vaha. **22** Ña tyihi ndo tsi ndo nu iyó tsa ña vaha.

23 Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quívi quitsi Jutu Mañi yo Jesucristo inga tsaha. **24** Ra tsa caná tsi yo, cuví cuita iñi yo tsi

ra, tyin maa ra cua javaha tandihi
maa tsa caahán yu ihya.

**Nu ndihi cahan ra Pablo tan tsaha
ra nacumi tsi nyivi**

25 Yañi, ndacan tahvi ndo tsa
cuenda ndi.

26 Tan cuhva ndo nacumi tsi

tandihi nyivi yihí cuenda Nyoo.

27 Tavá tyiñu yu tsi ndo tsihin sivi
Jutu Mañi yo na cahvi ndo carta ihya
nuu tandihi nyivi tsa yihí cuenda
Nyoo.

28 Tan maa Jutu Mañi yo
Jesucristo nasoco tsi ndo.

Tan na cuvi tsi tacan ñi.

Carta Tsinú Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaá ra Pablo, tan ra cutahán tsihin ra, tsa tsinu uvi carta tsa cuenda nyivi yihí tuhun Nyoo ñuu Tesalónica

1 ¹ Yuhu ra Pablo, ra Silvano tan ra Timoteo jaquitsí ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo.

² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahán ra Pablo nácaa cua tatsi tuñi Nyoo tsi nyivi iyó cuatyí quiví quitsi ra Cristo

³ Nyooho yañi, cuñí tsi tsa nacuhva ndi tyahvi nyoo tsi Nyoo tsa cuenda ndo tandihí ñi quiví, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quiví, tan cuñí xaan ndo tsi nyivi yihí tuhun Nyoo tsihin ndo. ⁴ Yacan cuenda sñi xaan cuñí ndi caahán ndi tuhun ndo tsihin nyivi yihí cuenda Nyoo inga ca vehe ñuhu. Tyin nyooho cunyeé xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyivi. ⁵ Tandihí yacan janahá tyin Nyoo cuiti xaan jacutuñi ra tyin cua catyi ra tyin taahán maa tsi cahun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehe ra tundoho tsi nyivi tsa janyehé xaan tundoho tsi

ndo. ⁷ Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tsihin ndi quiví cua quitsi nyico Jutu Mañi yo Jesucristo tsa quee ra andiví tsihin ñuhú tan tsihin ángel tsa iyó tunyee iñi maa ra. ⁸ Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo. ⁹ Ñi ican cua janyehe Nyoo tundoho tan ña cua cundihi maa tsa nyehe ñi tundoho, ña cua nyehe ñi tsi Jutu Mañi yo Jesucristo tan ña cua nyehe ñi tsa cahu cuví ra tsihin tunyee iñi tsa iyó tsi ra ¹⁰ quiví cua quitsi ra. Tyin quiví can nyivi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehe ñi tsi ra. Tan tyañu nyivi can, cua cuyucu tucu nyooho tyin tsinú iñi ndo tuhun tsa cahán ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihí ñi quiví, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyivi caná maa ra. Tan tsicán tahvi tucu ndi tsi ra na jatyinyee ra tsi ndo tan cuvi javaha ndo tsa vaha tsa cuñi ndo javaha ndo. Tan na quita vaha tandihí tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra.

¹² Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

Ra tsa nduve ley Nyoo iyó ańima

2 ¹ Nyooho yańi, vityin cuńi yu cahan yu tsihin ndo tsa cuenda quivı quıtsı nyico Jutu Mańi yo Jesucristo tan ndu iin yo tsihin ra. Caahán ndaahvi xaan ndi tsihin ndo, **2** ńa numi xaan sama ndo cuhva tsicá ińi ndo. Tan ńa nayuhvi ndo tatun quita tuhun jaha tatyı ńa vaha tyin tsa tańan tsi quivı quıtsı Jutu Mańi yo; vasu ndi maa nyivı caahán can, a jaquıtsı ńi carta tsi ndo tan catyı ńi tyin yuhu jaquıtsı carta can tsi ndo. ńa tsinu ińi ndo tandıhi yacan. **3** Ndi iin tsaha tan ńa cuhva ndo jandavi ńaha nyivı tsi ndo. Tyin tsa ndi cumańi ca tahan tsi quivı quıtsı Jutu Mańi yo, cuaha xaan nyivı, xaan cua cuńi ńi nyehe ńi tuhun Nyoo, tan cua quituvi rayı tsa nduve ley Nyoo iyó ańima, ra tsa nyaá maa cahun anyaya. **4** Ra ıcan cuvı ra xaan ińi tsi Nyoo. Cua cańi tahan ra tsihin tandıhi tsa nyısó sıvi Nyoo; tan cua cańi tahan ra tsihin tandıhi tsa jacahnú tsi Nyoo. Tan nda cuanda tsıtsı vehe ńuhu cahnu Nyoo tan cua cunyaa ra tan cua cundaca ńaha ra, cua jaha ra tyin Nyoo cuvı ra. **5** ¿A ńa nducuhún ińi ndo tyin nda ndi nyıı ca yu tsihin ndo tan cahán yu tuhun ihya tsihin ndo? **6** Maa tyin nyooho tsıtó ndo náa tsa tyası tan ńaha ca quituvi ra. Nda tahan maa tsi quituvi ra tan cua quituvi ra. **7** Vityin tsa iyó tatyı tsa ńa tsahá tyaá yahvi nyivı tsi Nyoo, maa tyin ndi nyıı xeehe nu, tyin iyó iin ra tsa ńa tsahá quituvi nu. Maa tyin quivı cua quita ra tan cundıhi tsa tyası ra, tacan tan cua quituvi nu. **8** Tacan tan cua quituvi ra tsa nduve ley Nyoo iyó ańima, maa tyin Jutu Mańi yo Jesús cua cahńi ra tsi ra tsihin tuhun quıtá yuhu ra tan cua janaa ra tsi ra tsihin tsa xińu tsa cahnu cuvı ra quivı quıtsı ra inga tsaha. **9** Ra ńa vaha can, nu ńa vaha cua jaquıtsı tsi ra. Tan cua

cuhva nu tandıhi tsa nyityı nu, coo tsi ra, tan tsihin seńa tan tsa iyo cua javaha ra cua jandavi ńaha ra tsi nyivı. **10** Cua cuatyıńu ra tandıhi nuu tsa ńa vaha tan tsihin yacan cua jandavi ńaha ra tsi nyivı tsa ńa cua cacu. Tyin ńi can ńa cuńi ńi naquihin cuenda ńi tuhun Nyoo tsa ndıtsa tan cacu ńi. **11** Tan yacan cuenda cua cuhva Nyoo ndatu tsa jandavi ńaha tatyı ńa vaha can tsi ńi. Tan cua tsinu ińi ńi tsa ńa ndıtsa. **12** Tacan tan cua tatsı tuńi ra tsi tandıhi ńi tyin ńa cuńi ńi tsinu ińi ńi tuhun ndıtsa. Tyin taahán ca ińi ńi javahá ńi tsa ńa vaha.

Nu cahán ra Pablo tuhun nyivı tsa nacatsı Nyoo tyin cacu ńi

13 Maa tyin tandıhi quivı cuńi tsi cuhva ndi tyahvi nyoo tsi Nyoo tsa cuenda nyooho yańi. Tyin cuńi xaan Jutu Mańi yo tsi ndo. Tan nacatsı ra tsi ndo nda jihna, ńda ndi cumańi ca tsinu ńuhu ńayıvı, tyin tsihin tsa janduvahá Tatyı İi ra ańima ndo tan tsihin tsa tsınú ińi ndo tuhun ndıtsa cuvı cacu ndo. **14** Yacan cuenda cana Nyoo tsi ndo quivı tsa cahán ndi tuhun ra tsihin ndo tyin tacan tan ńihi ndo tsa cahnu cuvı Jutu Mańi yo Jesucristo coo tsi ndo.

15 Yacan cuenda nyooho yańi, jandu iin ndo ińi ndo. Tan ńa naa ińi ndo tandıhi tsa tsahá cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ńa ńaa ińi ndo tandıhi tuhun tsa tyaá ndi nu carta tsa jaquıtsı ndi tsi ndo. **16** Jutu Mańi yo Jesucristo tan Nyoo Jutu yo, juven ra cuńi tsi yo; tan tsahá ra tunyee ińi tsi yo tandıhi tyembu, tan tsahá ra naha tsa cuita ińi yo coo yo tsihin ra. Tandıhi yacan tsahá ra tsi yo quivı tsahá ra tsa vaha tsa iyó tsi ra tsi yo. **17** Na cuhva ra tsa sıı cuńi ańima ndo. Tan jandu iin ra ińi ndo, tacan tan cua cahan ndo tan javaha ndo tandıhi tsa vaha.

Nu tsicán ra Pablo na ndacan tahvi nyivi tsi Nyoo tsa cuenda ra naha

3 ¹ Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsa tuhun Jutu Mañi yo tandihi ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi.

² Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinú iñi ñi tsi Jutu Mañi yo. ³ Maa tyin Jutu Mañi yo javahá ra tsa catyi ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tiin nu ña vaha tsi ndo.

⁴ Tan nditá xaan iñi ndi tsi Jutu Mañi yo tyin tsitó ndi tyin jatyinyeé ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua jandihi ndo tsa javaha ndo tacan.

⁵ Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyeé ca iñi ndo nyehé ndo tundoho, tumaa tsa cunyeé iñi maa ra Cristo nyehé ra tundoho.

Taahán tsi tsa jaha tyiñu yo

⁶ Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa jacuahá ndi tsi ndo. ⁷ Tyin tsitó maa ndo nácaa taahán tsi coo ndo tumaa tsicoq maa ndi tsa tsiyucu ndi tsihin ndo. Tyin nyuhu ña tsicá nuu utsan ndi tyin jahá tyiñu ndi. ⁸ Tan tandihi tsa tsatsi ndi, maa ñi maa tyahvi ndi tsi ndo.

Tyin jahá tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo.

⁹ Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jahá tyiñu ndi tyin cuñi ndi janaha ndi nácaa taahán tsi coo ndo. ¹⁰ Tyin quivi tsiyucu ndi tsihin ndo, cahán ndi tsihin ndo tyin nyivi ña cuñi jaha tyiñu, na ña catsi ñi. ¹¹ Caahán ndi yacan tyin ñihí tuhun ndi tyin yihí ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo. ¹² Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jahá tyiñu ndo, tan coo tsa catsi ndo.

¹³ Nyooho yañi, ña cundihi iñi ndo javaha ndo tsa vaha. ¹⁴ Tatan iyó iin ra ña cuñi tyaa yahvi tuhun caahán ndi nu carta ihya, jahá ndo cuenda ndáa ra cuví ra, tan ña cunyanaa ndo tsi ra na nducahan nuu ra. ¹⁵ Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihi cahán ra Pablo

¹⁶ Jutu Mañi yo ra iyó tsa vaha tsi, juvin ñi maa ra cuhva tsa vaha coo añima ndo tandihi ñi quivi tan tandihi ñi tsaha vasu ndi maa nyehé ndo tundoho. Tan Nyoo ndoo tsihin tandihi ndo. ¹⁷ Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihi carta yu. Tan tyehen tyaá yu. ¹⁸ Tan na nasoco Jutu Mañi yo Jesucristo tsi tandihi ndo.

Tan na cuvi tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

**Nu tyaag ra Pablo iin carta tsa
cuenda ra Timoteo**

1 ¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo. ² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinü iñi un tuhun ra Cristo tsa jacotó yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

**Nu tsaha cuenda ra Pablo tyin jaha
cuenda yo tsi yo tan ña cunyiçun
yo tsa ña nditsa**

³ Quiví quita yu ñuu Éfeso tan vatsi yu Macedonia nu nyí yu ihya, tava tyiñu yu tsi un tsa ndoo un ñuu Éfeso tyin cahan un tshin nyivi jacuahá inga ca tuhun. Catyí yu tshin un tyin catyí un tshin ñi na ña jacuaa ñi tsa ña nditsa. Tan vityin juven ñi tacan caahán nyico yu tshin un. ⁴ Cahan tshin ñi na ña tyaá iñi ñi cuendu, na ña tyaá iñi ñi tuhun nyivi tsicoo tahan tsanaha. Tyin tun, maa ñi yacan tyaá iñi ñi maa cua cahan yuhu tahan ñi ñi. Tan ña cua jatyinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tshin tsa tsinu iñi yo tan cuví quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahan yo tsi yo, tshin tsa ñi iñi añima yo tsa janduvahá Nyoo. Cua cuñi yo tsi ñi tshin tsa vaha caca iñi yo tan tshin tsa nditsa tsinú iñi yo tsi

Nyoo. ⁶ Maa tyin yihí nyivi nacoó ihñi ñi yacan, tan tsinaag ñi jahá tsa caahán yuhu tahan ñi. ⁷ Cuñi ñi cuví ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi. ⁹ Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihi nyivi tsahñi nyivi. ¹⁰ Iyó ley can tsa cuenda nyivi iyó tshin rayi a ñaha tan ñavin yi ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juven ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo. ¹¹ Tuhun Nyoo ihya, iin ñi cuví tsi tshin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaa yu tuhun ihya tsi nyivi. Tan intuhun ñi maa ra taahán tsi jacahnú yo.

**Tsahá ra Pablo tyahvi nyoo tsi Nyoo
tyin nyehé ndaahvi ra tsi ra**

¹² Tsahá xaan yu tyahvi nyoo tsi Jutu Mañi yo Jesucristo tyin tsaha ra tunyee iñi tsi yu, tan nyehe ra tsi yu

tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

13 Tacan javaha ra tsihin yu, vasu ndi maa nu quitsi tsi quivi, yuhu cahan nyaa xaan yu tsi ra. Tan tsinyaa ndaha yu tsi nyivi yihí cuenda ra, tan tsacu nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu.

14 Tacan tsaha Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahá ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

15 Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyeheh: Ra Cristo Jesús quitsi ra nu ñuhu ñayivi ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandihi nyivi. **16** Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuanda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa. **17** Yacan cuenda na jacahnu yo tsi ra yihí ndaha tsi yo tandihi ñi quivi, ra nduve tuhun tsihi iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihi. Na cuví tsi tacan.

18 Yooho Timoteo sehe yu, tava tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsaha cuenda ra yañi yo naha ra tsi un quivi cahan ra naha tuhun un jahá Nyoo. **19** Ña jandihí un tsa tsinú iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha

tandihí yacan, yacan cuenda ña tsinú ca iñi ra naha tumaa taahán maa tsi.

20 Tacan javaha ra Himeneo tan ra Alejandro. Yacan cuenda tsaha cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

Nu jacuaha ra Pablo nácaa taahán tsi ndacan tahvi yo tsi Nyoo

2 ¹ Tshahá cuenda yu tsi tandihí nyivi yihí cuenda Nyoo tyin ñiñi xaan cuñi tsi ndacan tahvi yo tsi Nyoo tsa cuenda tandihí nyivi. Tan nacuhva yo tyahvi nyoo tsi Nyoo tsa cuenda ñi. **2** Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayivi vaha nuu Nyoo tan nuu nyivi. Tacan tan cua jaha ñi tsa ñayivi tsi yo. **3** Tyin tacan taahán iñi Nyoo, ra tsa jacacú tsi yo. **4** Tyin cuñi ra tsa cacu tandihí nyivi. Tan cuñi ra tsa coto ñi tuhun nditsa. **5** Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyivi tumaa maa yo. **6** Juvín ra Jesucristo tsihi tsa cuenda tandihí nyivi. Tyahvi ra tsa cuenda cuatyí tandihí yo tyin tacan tan cuví cacu yo. Tan cundaq can quivi tyaq maa Nyoo cuhva. **7** Tsa cuenda yacan, tava tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuaha yu tsi nyivi tsa ñavin nyivi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

8 Yacan cuenda cuñi yu tsa ndacan tahvi rayiñ naha ra tsi Nyoo tandihí ñi ityi. Tan coo vaha ra naha nuu ra. Tan cañihí ra naha ndaha ra tan jacahnu ra naha tsi Nyoo tsihin tsa

vaha caca iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. **9** Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. **10** Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhva cuenda tsi ñi tsi Nyoo. **11** Tan cunyecu taxin ñi tyaa soho ñi tuhun Nyoo. Tan jaha ñi tsa ñayivi tsi ra tsahá cuenda tuhun Nyoo tsi ñi. **12** Tyin ña tsahá yu jacuaha ñiñaha nuu nyivi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecu ñi. **13** Tyin jihna ca ra Adán javaha Nyoo, yaha can tan javaha ra tsi ña Eva. **14** Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoo cuaty ña. **15** Maa tyin ñiñaha nduve tsa cua tahan ñi tsa cua cacu sehe ñi, tatun jacuahnú vaha ñi tsi sehe ñi, tan tsinú vaha iñi ñi tsi Nyoo tan cuñi ñi tsi ra tan tsi nyivi, tan catsi coo ñi nuu Nyoo tan nuu nyivi.

Nacaa taahán tsi coo ra cuví ityi nuu tsihin nyivi vehe ñuhu

3 **1** Tuhun ihya tuhun nditsa cuví tsi: Tatun iin ndo cuñi ndo cuvi ndo ityi nuu tsihin nyivi vehe ñuhu, vaha xaan tyiñu cuñi ndo javaha ndo. **2** Maa tyin ñiñi cuñi tsi tyin ra cuví ityi nuu tsihin nyivi vehe ñuhu cuñi tsi cuvi ra iin ra catsi iyó tyin tacan tan ña cuví tyaa nyivi cuaty tsata ra. Tan cuñi tsi tsa coo intuhun ñi ñasihi ra. Tan cuñi tsi tsa cuvi ra iin ra tsitó vaha cuhva coo, iin ra vaha nuu nyivi. Tan cuñi tsi vaha cahan ra tsihin

nyivi tsaá yuvehe ra, tan cuví ra iin ra tsitó vaha jacuaha tsi nyivi. **3** Iin ra cuví ityi nuu tsihin nyivi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñi tsi tsa cuví ra iin ra vaha iñi, iin ra ña tuhvá cañi tahan. Tan cuvi ra iin ra ña nyiyo iñi xuhun. **4** Cuñi tsi tsa cuvi ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi vaha sehe ra tsi ra, tan jahá ñi tsa ñayivi tsi ra. **5** Tyin tatun ña tsitó ra cundaca ñaha ra nyivi vehe ra, ¿nácaa cua quihi ndaha ra nyivi tsicá vehe ñuhu Nyoo? **6** Tan iin ra ndi tsaa xaan tsihin tuhun Nyoo ña taahán tsi cuvi ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnu xaan jahá nu tsi nu. **7** Tan cuñi tucu tsi tsa cuvi ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuaty tyaa ñi tsata ra tan ña cuvi jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

8 Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuvi ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi. **9** Cuñi tsi tsa cutuñi vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo. **10** Tan cuñi tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu. **11** Tan tacan tucu ñiñaha, cuñi tsi cuví ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandihi tyiñu. **12** Ra jahá tyiñu vehe

ñuhu na coo intuhun ñi ñasihi ra.
Tan cuñi tsi tsa coto vaha ra cundaca ñaha ra tsi sehe ra tan nyivi vehe ra.
13 Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi iñi ra caahán ra tuhun Nyoo tyin tsinú vaha iñi ra tsi ra Cristo Jesús.

Nu caahán ra Pablo siqui tuhun xeehe cuhva tsinú iñi yo

14-15 Vasiqui numi ñi cua quitsi nyehe yu nu nyií un. Maa tyin tun ña cuvi quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo cuví vehe ñuhu Nyoo nyito. Tan cuñi tsi tsa jañihi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuví tsi.
16 Tsa nditsa tyin yaha xaan cahnu cuví tuhun xeehe tsa jaquituví Nyoo, tyin coo yo tumaa iyó maa ra:

Nyoo nanduví ra rayi tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.
Tan catyí Tatyí Ii Nyoo tyin ra nduve cuatyí cuví ra.
Tan nyehe ra cuví ángel naha ra tsi ra.
Tanií cahnu nu ñuhu ñayivi caahán nyivi tuhun ra.
Tan tsinú iñi nyivi tsi ra tanií cahnu nu ñuhu ñayivi.
Tan cuanuhú ra nda gloria.

Nu catyí ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo

4 ¹ Maa tyin caahán catsi Tatyí Ii tan catyí ra tyin nu cua ndihi tyembu yihí nyivi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha. ² Cua tyaa soho ñi tuhun caahán nyivi jandaví

ñaha. Tan ñi can ña tuví iñi ñi náa javahá ñi tyin tsa ndundavá xaan añima ñi. Tumaa tsa cayu añima ñi jahá iin caa ihñi tan ndundavá tsi.
³ Cua casi ñi nu tindaha nyivi. Tan cua catyí ñi tyin ña vaha catsi yo juhva nuu nyayu. Vasu tsitó yo tyin tandihí nuu tsa tsatsí yo, Nyoo javahá itsi. Tan tandihí yoo tsa tsinú iñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra. ⁴ Tyin tandihí tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandihí tsi tun tsahá yo tyahvi nyoo tsi Nyoo tsa cuenda tsi. ⁵ Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesucristo

⁶ Tatun jacuahá un tandihí tsa caahán yu ihya tsi tandihí nyivi yihí tuhun Nyoo tsihin yo, cua cuvi un iin musu vaha ra Cristo Jesús. Tan tuhun tsa tsinú iñi yo, tsihin tandihí tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo. ⁷ Maa tyin ña tyaa yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñi maa Nyoo. ⁸ Tsa jañiñi yo coo tunyee iñi cuñu ñuhu yo, juhva ñi jatyinyee tsi tsi yo. Maa tyin tsa jañiñi yo javahá yo tandihí cuhva cuñi Nyoo, jatyinyee tsi tsi yo iin cahnu ñi, tyin jatyinyee tsi tsi yo nu ñuhu ñayivi ihya. Tan jatyinyee tucu tsi tsi yo tsa coo vaha yo nu cua tsaa yo nda gloria. ⁹ Tan nditsa, tyin tsa nditsa cuví tsi tan tandihí yo taahán tsi tsa tsinú iñi yo itsi. ¹⁰ Tan juvin ñi tsa cuenda yacan jahá tyiñu yo tan nyehe yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihí nyivi, tan jihna ca yoo tsa tsinú iñi yo tsi ra jacacú ra.

11 Tuhun ihya j̄acuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi. 12 Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. J̄acuaha tsi ñi tsihin cuhva iyó un, tan tsihin cuhva caahán un. J̄acuaha tsi ñi tsihin tsa cuñí un tsi Nyoo tan tsi nyivi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha. 13 Tan tsitsi tsa ndi cumañi ca tsaa yu nu nyí un, cahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan j̄acuaha tsi ñi nácaa cunycun vaha ñi tsi Nyoo. 14 J̄aha cuenda vaha tunyee iñi tsa tsah̄a Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cah̄an ra naha tsa tsah̄a cuenda Nyoo tsi ra naha. 15 Tyaa vaha iñi tuhun can tan javaha cuhva catyí tsi. Tacan tan cua nyehe tandihi nyivi nácaa cuahán un ityi nuu ca tsihin Nyoo. 16 J̄aha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyaá soho tuhun jacuahá un.

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

5 1 Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha. 2 Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandihi tsa caahán yu ihya tsihin tsa vaha tsicá iñi un.

3 Jatyinyee tsi ñiñaha ndaahvi tsa tsihi yí tatun nduve nyivi ñi cuví jatyinyee tsi ñi. 4 Maa tyin tatun iyó

iin ñaha tsihi yí tan iyó sehe ña, a sehe yañi ña, cuñí tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jah̄a cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo. 5 Tan ñaha tsa tsihi yí tan ndo ndaahvi intuhun ña maa ña, iin ña Nyoo tyaá iñi ña tan tsicán tahvi ña tsi ra tsinu cahñi tan tsacuaa. 6 Maa tyin ñaha tsihi yí tsa cusí iñi tsihin tsa iyó nu ñuhu ñayivi ihya, vasu nyito ña maa tyin tsihi ña cuenda Nyoo. 7 J̄acoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi.

8 Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyeé yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

9 Nu tutu tsa nyaá sivi ñi tsihi yí, na cunyata sivi ñi tsahnu tsa iyó ndaahvi, tatun tsa yah̄a uñi xico cuiya ñi, tan intuhun ñi yí ñi tsicoo. 10 Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsah̄a ñi tsa catsi nyivi tsaá yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa ñi iñi añima ñi, tan jatyinyee ñi tsi nyivi nyehé tundoho. Tun tacan javah̄a ñi tandihi tsa vaha, cuví cunyata sivi ñi.

11 Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yí ñi tan cuñi ñi tindaha ñi inga tsaha tan jandhi ñi tsa jahá tyiñu ñi tyiñu ra Cristo. 12 Tan coo cuatyí ñi tyin ña javahá ñi cuhva cah̄an ñi tsa cua javaha ñi. 13 Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu

tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi. **14** Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyivi xaan iñi tsi yo tsi yo. **15** Caahán yu tandihí tuhun ihya tsihin un tyin yihí ñi tsa nacoó ñi tsi Nyoo tan nyicún ñi tsi nu ña vaha. **16** Tatun ñi yihí cuenda Nyoo tan iyó iin nyivi ñi tsa tsihí yihí, cuñí tsi tsa jatinyee maa ñi tsi ñi can, tan ña tyiso ñi itsi síqui vehe ñuhu. Tyin tacan tan cuví jatinyee vehe ñuhu tsi inga ñi tsihí yihí tsa nduve ca maa nyivi iyó.

17 Ra tsahnu ra nyisó tyiñu vehe ñuhu, cuñí tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi. **18** Tyin tuhun Nyoo catyí tsi tyehen: “Ña tyihí un yoho yuhu indiqui nu jahá tyiñu ti, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

19 Tatun tyaa nyivi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi. **20** Maa tyin nyivi tsa jañihí ca javahá tsa ña vaha, cuñí tsi tsa cahan ndo tsihin ñi nuu tandihí nyivi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha. **21** Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsi ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihí nyivi. **22** Ña numi xaan cuhva un tyiñu tsi iin ra cuví ra ityi nuu tsihin nyivi vehe ñuhu. Coto cuhun cuatyí javaha ra síqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

23 Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

24 Yihí nyivi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi. **25** Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

6 **1** Nyivi yihí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihí nyivi cuhva cahan ñi ndavaha ñi síqui Nyoo, tan síqui tuhun ra tsa jacuahá yo. **2** Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuaha yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusii iñi yo tsihin tsa tsaha ra tsi yo

3 Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo, **4** cuví ra iin ra nduyaa ñi maa, iin ra ña tsitó. Tan tsa caahán yuhu ra síqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihí tan nyiyo iñi nyivi tsa iyó tsi inga ñi, tan tsa caahán nyaa tahan ñi tsi ñi, tacan tan ndasi cuñi nyivi nyehe tahan ñi tsi ñi. **5** Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñi maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can. **6** Nditsa tyin tsa javahá yo cuhva

catyí Nyoo tan sii cuñí yo tsihin tsa tsahá ra tsi yo, cuví tsi tumaa iin tsa cuca iyó tsi yo. ⁷ Tyin nduve náa tsaq tsihin yo quivi cacú yo nu ñuhu ñayivi ihya. Tan nduve náa cuhun tsihin yo quivi cúu yo. ⁸ Maa tyin tatun iyó tsa catsi yo tan iyó jahma cunditsí yo, na cusii ñni yo, tan na ndoo yo vaha tsihin yacan. ⁹ Maa tyin nyivi cuñí nducuca, nducú cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñí ñi coo cuaha tsa coo tsi ñi. Tan jativí can tsi ñi. Tan nu ndihi tuhun cua tiví ndihi ñi tan cua cuhun ñi anyaya. ¹⁰ Tyin tsa cuñí xaan yo xuhun, yacan cuví yoho tandihi ca nuu tsa ña vaha. Tan yihí nyivi tsa cuenda tsa cuñí xaan ñi xuhun, tan jandihí ñi tsa tsinú ñni ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Nacaa cañí tahan yo tsihin nu ña vaha tsihin tsa tsinú ñni yo tsi Nyoo

¹¹ Maa tyin yooho cuví un iin rayii cuenda Nyoo. Quita tsiyo nuu tandihi tsa caquiñi. Coo cuiti vaha nuu Nyoo. Cuanycun tsi Nyoo tsihin tsa ñni ñni un. Cuiñi tsi nyivi. Cunyee ñni tsihin tsa vita ñni un nyehe un tandihi tsa cua tahan un. Tan ña cahnu jaha un tsi un. ¹² Cañi tahan vaha tsihin nu ña vaha tsihin tsa tsinú ñni un tsi Nyoo. Ña jaña ndaha un ñayivi nyito tsa ña cua naa maa tsa tsahá Nyoo tsi yo. Tyin tsa cuenda can, cana Nyoo tsi un, tan tacan catyí un quivi cahan catsi un nuu tandihi ra cuví tsandaa naha ra, catyí un tyin tsinú ñni un tsi Nyoo. ¹³ Tan vityin nuu Nyoo, ra tsa tsahá ñayivi coo tandihi tsa iyó, tan nuu ra Cristo Jesús ra tsa tsahá cuenda vaha tuhun nditsa nuu ra Poncio Pilato, caahán yu tsihin un, ¹⁴ javaha tandihi tsa catyí yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo

Jesucristo. ¹⁵ Nda tsa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñni maa ra cuví Nyoo, ra iyó xaan tunyee ñni. Rey cahnu cuví ra nuu tandihi ca ra cuví rey. Tan ra ndacá ñaha cahnu cuví ra nuu tandihi ca ra ndacá ñaha. ¹⁶ Intuhun ñni maa ra cuví ra tsa nduve tuhun tsiihí iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñni tsi ra. Na jacahnu yo tsi maa ra. Tan na cundaca ñaha ra tsi yo tandihi tyembu. Tan na ña cundihí maa tsa ndacá ñaha ra tsi yo. Na cuví tsi tacan. ¹⁷ Tan cahan tsihin nyivi tsa iyó tsa cuca ñuu ñayivi ihya, na ña cahnu xaan jaha ñni tsi ñi. Tan ña cuita ñni ñi tsa cuca tsa iyó tsi ñi. Tyin tsa cuca can cua ndihi can. Na cuita ñni ñi tsi Nyoo nyito, tyin maa ra cuví ra tsahá tandihi tsi yo. Tan cuví cusii ñni yo tsihin tsi. ¹⁸ Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa ñni ñni tan ñavin tsihin tsa cuihaya cuñí ñni. ¹⁹ Tacan tan coo tsa cuca tsa ña cuanaa maa tsi ñni, tan jatyinyee tsi tsi ñni nu cuahán quivi ityi nuu. Tan coo ñni ñayivi nyito tsa ña cua naa maa.

Nu ndihí tsahá cuenda ra Pablo tsi ra Timoteo

²⁰ Yooho Timoteo, jaha cuenda vaha tyiñu tsa tsahá Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Na tyaa yahvi un tuhun tsa catyí nyivi tyin tsitó xaan ñi tan ña nditsa.

²¹ Tyin tsa cuenda yacan, yihí nyivi tsa nacoo ihñi ñi tuhun Nyoo. Tan ña tsinú vaha ca ñni ñi tsi ra vityin.

Coo tsihin tsa vaha tsa iyó tsi Nyoo tsa tsahá ra tsi un.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

**Nu tyaq ra Pablo inga carta tsa
cuenda ra Timoteo**

1 ¹ Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo. Tyin cuñí ra tsa jacoto yu tsi nyivi tyin tsahá ra ñayivi nyito coo tandihi ñi tsa iin ñi cuví tsihin ra Cristo Jesús. ² Jaquitsí yu carta ihya tsi yooho Timoteo. Tan cuñí xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

**Nu caahán ra Pablo tsihin ra Timoteo
na catyi tuhun ra tsihin nyivi tyin
cuenda ra Cristo yihí ra**

³ Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsi saahnu yu tyiñu Nyoo tsanaha. Tan vaha cuñí añima yu tyin vaha iyó yu nuu ra. ⁴ Nducuhún xaan iñi yu nácaa tsacu un quivi quita yu nu nyí un. Tan vityin cuñí xaan yu nyehe yu tsi un inga tsaha tan cusii iñi yu. ⁵ Tan nducuhún xaan iñi yu tyin tsinú ñi vaha iñi un tsi Nyoo. Tumaa tsa tsinú iñi ña Loida tsitan un tan ña Eunice sñi un. Ñi ican vaha xaan tsinú iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

⁶ Yacan cuenda tsahá cuenda yu tsi un jandu iin ca iñi un tan cuatyíñu ndatu tsa tsahá Nyoo tsi un tsa cahan un tuhun ra. Yacan cuví ndatu tsa

tsahá ra tsi un quivi tyiso ndaha yu jiñi un. ⁷ Nyoo ña tsahá ra tatyí ña vaha tsa jayuhvi tsi yo. Tsahá ra Tatyí li ra tsi yo tyin coo tunyee iñi cahnu tsi yo, tan cuñí tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo. ⁸ Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyí yu vehe caa tsa cuenda ra. Cuatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí siqui yo tsa cuenda tuhun Nyoo. ⁹ Tyin juvin ra jacacu tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaq maa ra cuhva javaha ra nda ndi cumañi ca tsinú ñuhu ñayivi. Tyin nda quivi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. ¹⁰ Tan vityin tsitó yo tsa vaha can tyin tsa quitsi ra Jesucristo jacacu ra tsi yo. Tan quihñ nyaa ra tandihí tunyee iñi tuhun tsiihí. Cahán ra tuhun vaha, tan tava nditsin ra tuhun tsa coo yo ñayivi nyito tsa ña cua naa maa.

¹¹ Nyoo tava tyiñu ra tsi yu tsa cahan yu tuhun can tsihin nyivi. Tava tyiñu ra tsi yu tsa caca yu tyiñu ra, tan jacuaha yu tuhun can tsi nyivi tsa ñavin nyivi Israel cuví. ¹² Yacan cuenda nyehé yu tandihí tundoho. Maa tyin ña nducahan nuu yu tsa tacan nyehé yu tundoho, tyin tsitó yu yóo tsinú iñi yu. Tyin nacuhva cuenda yu tsi yu tsi ra, tan tsitó vaha yu tyin cuví jaha cuenda ra tsi yu nda cuanda quivi quitsi ra inga tsaha.

13 Cuanyicun tuhun vaha tsa tsaha cuenda yu tsi un. Tan coo tsihin tsa tsinú vaha iñi un tsi Nyoo. Cuñi tsi ra, tan tsi nyivi. Tyin tacan taahán tsi coo yoo tsa iyó iin caa ñi tsihin ra Cristo Jesús. 14 Tan na jatyinyee maa Tatyí li tsa iyó añima yo tsi un tan jaha cuenda vaha un tsa vaha tsa tsaha Nyoo tsi un.

15 Tsa tsitó un tyin nacoq ihñi ra Figelo tan ra Hermogenes tsi yu tan tandihí ca maa ra iyó ityi Asia. 16 Maa tyin ra Onesíforo na cundaahvi iñi Jutu Mañi yo tsi ra tan tsi nyivi ra tyin cuaha xaan tsaha quitsi ra jatyinyee ra tsi yu. Tan ña cahán nuu ra tsa tyehen nyí yu vehe caa. 17 Tan quivi tsinyij ra ñuu Roma ihya, ña jandihí maa ra tsa nanducú ra tsi yu nda cuanda tsa nañihí ra tsi yu.

18 Maa Jutu Mañi yo na cundaahvi iñi ra nyehe ra tsi ra quivi cua jacutuñi ra tsi yo. Tsitó maa un nácaa jatyinyee xaan ra Onesíforo tsi yo quivi tsiyucu yu ñuu Éfeso.

Iin andaru vaha ra Jesucristo

2¹ Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra. 2 Tuhun tsa tsiní un cahán yu nuu nyivi cuaha, jacuaha yacan tsi nyivi tsa ñi iñi tsinú iñi tsi Nyoo, ñi tsa cuví jacuaha tsi inga nyivi.

3 Tan cunyeer iñi nyehe tundoho tumaa iin andaru vaha ra Jesucristo. 4 Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra. 5 Tan tacan tucu ra jasiquí tsihin balón, ña cuví jaha canaa ra tatun ña cunyeer iñi ra jasiquí ra tumaa taahán maa tsi. 6 Iin ra jahá tyiñu tsitsi huhu, taahán tsi tsa jaha tyiñu jihna ra, tacan tan cuví catsi jihna ca maa ra tsa quitá nu jahá tyiñu ra. 7 Tyihi tuñi vaha iñi tsa

caahán yu tsihin un ihya, tan maa Jutu Mañi yo cua huhva tsa cutuñi iñi un tandihí tsi.

8 Nducuhun iñi tsi ra Jesucristo, ra tsa nandoto tsa yahá nyehe ra tundoho tan tsihi ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsaha cuenda ra tsi yu tyin cahan yu tsihin nyivi. 9 Tan tsa cuenda tuhun can cunyeer iñi yu nyehe yu tandihí tundoho nda cuanda nuuhñi yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi.

10 Yacan cuenda cunyeer iñi yu nyehe yu tandihí tundoho tsa cuenda tsa vaha tsi tandihí ca nyivi tsa nacatsi maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihí yo nu sií caá tsa ña cua ndihí maa coo yo. 11 Tuhun ihya tuhun nditsa cuví tsi tan cua cundaa tsi:

Tatun tsihi yo cuenda cuñu ñuhu yo, coo nyito tucu yo tsihin ra.

12 Tatun nyehe yo tundoho tsa cuenda ra, cua cundaca ñaha ndihí yo tsihin ra.

Tatun catyí yo tyin ñavin cuenda ra yihí yo, cua catyi tucu maa ra tyin ñavin nyivi yihí cuenda ra cuví yo.

13 Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

14 Janducuhun iñi tuhun ihya tsi ra jacuahá tuhun Nyoo, tan catyi tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu

tahan ra naha tacan, nduve maa ndáa tsiñí ñuhu can. Tyin tsihin yacan jatívi ra naha tsi nyívi tyaá soho tsa caahán ra naha. **15** Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñú vaha un tuhun nditsa cuhva taahán maa tsi, ña cua nducahan nuu un.

16-17 Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyívi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa taħan ra Himeneo tan ra Fileto.

18 Tyin quitá tsiyo ra naha ityi vaha tan catyí ra naha tyin tsa yaha nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyívi tsa tsinú iñi tsi Nyoo. **19** Vasu yihí juhva ñi tacan quitá tsiyo ñi, maa tyin Nyoo tsaquın ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyívi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

20 Tsitsi iin vehe cahnu, ñavin maa ñi maa ndaha tyiñu tsinú tsihin xuhun cuaan tan xuhun cuitsin iyó tsatyíñú nyívi. Tyin tsatyíñú tucu ñi tsa tsinú tsihin vitu tan tsihin ñuhu quisi. Yihí can tsatyíñú ñi can cuenda tyiñu nahnu, tan yihí can ndáa tahan ñi maa tsi tsatyíñú ñi can. **21** Tacan tucu maa yo tatun jahá vaha yo cuenda tsi yo, cuví yo iin nyívi tsa tsatyíñú Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyíñu ra tsi yo tsa cuenda tandihí tyiñu vaha.

22 Ña caca iñi un tumaa tsicá iñi ra cuatyí iyó nu ñuhu ñayívi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho cōo iin ñayívi cuiñi. Tsinu vaha iñi tsi Nyoo. Cuñi tsi Nyoo tan tsi nyívi. Cōo vaha tsihin tandihí nyívi

yihí cuenda Nyoo, tandihí ñi tsa tsicán tahvi tsi Jutu Mañi yo, ñi iyó ña anima vaha. **23** Tan ña tyaa soho un tsa nduve yahvi nyaá tsa caahán yuhu tahan nyívi. Tyin tsitó un tyin tsihin yacan nducuaaha ca tsihi.

24 Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyívi cuví ra tsihin tandihí nyívi. Tan cuñi tsi tsa ñiñi vaha ra cuhva jacuaha ra tuhun Nyoo tsi nyívi. Tan cuñi tucu tsi tsa cunyeet iñi ra tsihi tsahá nyívi.

25 Tan tsihin tsa vita iñi ra cuñi tsi janaha vaha ra cuhva coo nyívi ndava iñi. Tan cuatu ra tatun ndu uvi iñi ñi tan coto ñi tsa nditsa. **26** Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

Nacaa cua coo nyívi nu cua ndihí quívi

3 **1** Tan cuñi tucu tsi cōto un tyin nu cua ndihí tyembu cua coo quívi tsa yihí xaan cua coo yo. **2** Tyin cua coo nyívi nyiyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyívi ñi. Ña cua tyaa yahvi ñi tsi Nyoo. **3** Ña cua cuñi ñi tsi nyívi ñi. Ña cua cuhva maa ñi coo taxin nyívi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehe ñi tsa vaha. **4** Cua xico ñi tsi nyívi ñi. Tan cua cana iñi ñi javaha ñi náa ndihí tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo. **5** Cua cunycun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra.

Ña cutahan un tsihin nyívi javahá tacan. **6** Tyin tyañu ñi ican iyó ra tsa quíhví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñi ñi. **7** Cuahán ñi cua tyaa soho ñi tuhun tsaa, maa tyin ña cuví maa cutuñi iñi ñi tsa cuví tsa nditsa. **8** Tan nyívi cua coo, cua cuvi ñi tumaa ra Janes tan ra Jambres, ra tasi tsa tsicoq tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyívi cua coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca iñi ñi. Tan ña cua quita vaha ñi tsihin cuhva tsinu iñi ñi. **9** Maa tyin tsa cua janaha ñi, ña cua cuvi nducuaaha can tyin ña xeehe caa tyin iin tsa nduve yahvi nyaá cua cuvi can, tumaa tsa javahá tucu ra Janes tan ra Jambres.

Nu ndihí tavá tyiñu ra Pablo tsi ra Timoteo

10 Maa tyin yooho tsitó vaha un tyin yuhu ñavin tacan iyó yu. Tan nycún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyeé iñi yu tsa cuxaán nyívi tsi yu, tan nácaa cuñi yu tsi ñi. **11** Tan tsitó un nácaa cunyeé iñi yu nyehé yu tundoho tsa tsinyaq ndaha nyívi tsi yu. Tsitó un tsa tahan yu, tandíhi tundoho tsa nyehe yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandíhi tundoho can. **12** Tsa nditsa tyin tandíhi yoo tsa cuñi coo cuhva cuñi ra Cristo Jesús cua janyehe nyívi tundoho tsi yo. **13** Maa tyin nyívi caquiñi tan nyívi jandaví ñaha, quiñi xaan ca cua coo ñi. Tyin cua jandavi ñaha ñi tsi nyívi tan cua jandavi ñaha tucu maa nyívi tsi ñi.

14 Maa tyin yooho jañiñi tsi un tan

coo un tsihin tsa cutuhva un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhva un. **15** Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús. **16** Tandíhi tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. **17** Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuvi yo iin ra cuiti yihf cuenda Nyoo tan javaha yo tandíhi tsa vaha.

4 **1** Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyívi nyito tan nyívi tsihi quivi cua quitsi ra cundaca ñaha ra tsihin tunyee iñi tsa iyó tsi ra. **2** Cahan tuhun Nyoo tsihin nyívi. Tan ña jandíhi un tsa jañiñi un javaha un tacan. Cahan tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, cahan tsihin ñi tatun ña vaha javahá ñi, tyin tacan tan cunycun vaha ñi tsi ra Cristo. Tan cunyee iñi cuatu nda nasama ñi cuhva iyó ñi. Tan jacuahá tsi ñi nácaa taahán tsi coo ñi. **3** Tyin coo quivi ña cua cunyee ca iñi nyívi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi. **4** Tan cua tyaa tsiyo ñi tsa nditsa. Tan cua tyaa soho ñi tsa ña nditsa. **5** Maa tyin yooho jaha cuenda tsi un tsihin tsa vaha tsicá iñi un. Cunyee iñi nyehe tundoho. Cahan tuhun Nyoo tsihin nyívi. Vaha javaha un tyiñu tsa tsahá Nyoo tsi un.

6 Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu.

7 Tsa yaha cañi tahan yu tumaa taahán maa tsi, tan tsa ndihí javaha yu tyiñu tsa tsaha Nyoo tsi yu tumaa iin ra tsinú suuhva, tun tsa tsaa ra nu taahán tsi cucuiñi ra. Tan tacan ñi maa tsinú iñi yu tsi Nyoo. 8 Tan vityin nu cuahán ca quivi, ndatú vaha yu tsa taahán tsi tsi yu tsa cua kuhva Jutu Mañi yo tsi yu tsa cuenda tsa vaha tsicoo yu nuu ra. Tan ñavin maa ñi maa yu cua kuhva ra itsi, cua kuhva tucu ra itsi tsi tandihí ca nyivi tsa ndatú tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tava ra Pablo tsi ra Timoteo

9 Janumi tan quitsi ñi un, quitsi nyehe un nu nyíi yu. 10 Tyin ra Demas naco ihñi ra tsi yu tyin cuñi ca ra tsa iyó ñuu ñayivi ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. 11 Intuhun ña ra Lucas nyíi tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuví jatyinyee ra tsi yu tsihin tyiñu Nyoo. 12 Jacuhun yu tsi ra Tíquico ñuu Éfeso. 13 Quivi quitsi un yaha un naquihin un jahma vixin yu tsa naco yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñi tsi cundaha un, yacan cuví tandihí tutu yu.

14 Ra Alejandro, ra cañi caa, cuaha xaan tsa ña vaha javaha ra tsi yu. Maa Jutu Mañi yo cua natyahvi tsi ra tsa cuenda tandihí tsa javaha ra.

15 Jaha cuenda vaha tsi un coto náa

javaha ra tsi un. Tyin xaan xaan cuñi ra cuenda tuhun Nyoo tsa caahán yo.

16 Tsa jihna ñi jacacu yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha naco ihñi ra naha tsi yu. Na jaha Nyoo tucahnu iñi tsi ra naha tsa cuenda yacan. 17 Vasu ndi maa tandihí ra naha naco ihñi tsi yu, maa tyin Jutu Mañi yo jatyinyee xaan ra tsi yu. Tan tsaha ra tunyee iñi tsi yu tan cuví cahan catsi yu tuhun ra nuu nyivi. Tan tsiñi tandihí nyivi tsa ñavin ñi Israel cuví tsa cahan yu. Tan jacacu Nyoo tsi yu tan ña tsatsi ndicaha can tsi yu. 18 Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihí ñi tyembu. Tan na cuvi tsi tacan.

Nu ndihí cahan ra Pablo tan tsaha ra nacumi tsi nyivi

19 Cuhva nacumi tsi ña Prisca tan tsi ra Aquila tan tsi nyivi ra Onesíforo. 20 Tan jacotó ndihí yu tsi un tyin ndoo ra Erasto ñuu Corinto. Tan ndoo ra Trófimo ñuu Mileto tyin cuuhví ra. 21 Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihí ca nyivi yihí cuenda Nyoo tsihin yo.

22 Na quihí ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Tito

Nu tyaa ra Pablo carta tsa cuenda ra Tito

1 ¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo. ² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandaví ñaha ra. ³ Tan vityin tsa tahañ tsi quivi tsa tyaa Nyoo cuhva tyin coto yo tuhun ra. Maa ra cuví ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi. ⁴ Jaquitsí yu carta ihya tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo aña un. Tan na cundaahvi iñi ra nyehe ra tsi un.

Tyiñu tsaha ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoq yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuví ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un. ⁶ Tyin ra tsahnu cuví ityi nuu tsihin nyivi vehe ñuhu, cuñi tsi cuví ra iin ra iyó intuhun ñi ñasihi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña

tuhvá nyivi tyaa cuatyí siqui sehe ra. Tun tacan iyó ra, cuví cuví ra ityi nuu tsihin nyivi vehe ñuhu. ⁷ Tyin ra cuví ityi nuu tsihin ñi yihí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuví ra iin ra cuiti iyó nuu Nyoo. Iin ra cahnu jahá tsi ña cuví cuví ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa xuhun tsihin iin cuhva ña vaha. ⁸ Maa tyin cuñi tsi cuví ra iin ra sii cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuví ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra. ⁹ Cuñi tsi cunycun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuaha ra tsi nyivi caahán tyin ña nditsa tuhun caahán yo. ¹⁰ Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra. ¹¹ Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun. ¹² Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuví ñi tumaa cuví quití. Cuaha xaan tsatsí ñi tan jutsan xaan ñi”, catyi ra. ¹³ Tan nditsa tsa cahan ra. Yacan cuenda

cuñí tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. **14** Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñí coto tsa nditsa.

15 Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñí ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñí ñi, tyin nda cuanda cuhva tsicá iñi ñi tan tsa tsiñi tuñi iñi ñi tan ña vaha.

16 Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

Tuhun vaha tsa tsahá Nyoo tyin jacuaha yo

2 **1** Maa tyin yooho, jacuaha tsa vaha tsa nacatsí tahan tsihin tsa jacuahá Nyoo tsi yo. **2** Jacuaha tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñí tsi tsa cuñi ra naha tsi Nyoo tan tsi nyivi. Tan cunyeer iñi ra naha tandihi náa tundoho nyehé ra naha. **3** Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. **4** Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi. **5** Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuví ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuví cahan nyivi ndavaha ñi siqui tuhun Nyoo tsa cuenda cuhva iyó ñi.

6 Tacan tucu ra cuatyí naha ra.

Cuhva cuenda tsi ra naha na catsi coo ra naha. **7** Tan maa un cuñí tsi tsa janaha un maa ñi maa tsa vaha tsi ra naha tsihin cuhva iyó un. Jacuaha tsi ra naha tsihin tsa vii tan tsihin tsa vaha. **8** Maa ñi tuhun vaha cahan un tyin tacan tan yoñi cuvi tyaa cuatyí siqui un. Tan ra xaan iñi tsi ndo naha ra ña cua ñihi ra naha cuhva cahan ra naha ndavaha ñi siqui ndo tan cua nducahan nuu ra naha.

9 Cuhva cuenda tsi ra yañi yo, ra cuví musu naha ra, na tyaa yahvi ra naha tsi tsitoho ra naha. Na javaha ra naha tandihi tsa caahán tsitoho ra naha. Tan na ña nacahan ra naha nu caahán tsitoho ra naha. **10** Tan na ña suhu ra naha tsa tsii tsitoho ra naha. Na jaha vaha ra naha cuenda tandihi ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

11 Tyin Nyoo janahá ra tsa vaha tsa iyó tsi ra tsi nyivi tan cuñí ra jacacu ra tsi tandihi ñi. **12** Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñí ñi can. Tan cuiti coo yo nu ñuhu ñayivi ihya, na cundaca ñaha vaha yo tsi yo tumaa cuñí maa Nyoo. **13** Tan janahá tucu ra tsi yo nácaa cuatu yo tsa vaha tsa cua ñihi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuví Nyoo yo, ra cahnú cuví, ra jacacú tsi yo. **14** Tsahá ra ñayivi ra tsa cuenda yo tyin tacan tan jacacu ra tsi yo ndaha tandihi tsa caquiñi. Tan nacatyá ra tsi yo na cuví yo nyivi vaha, tan cuví yo tsii maa ra, tan javaha yo maa ñi maa tsa vaha. **15** Yacan cuñí tsi jacuaha un tsi nyivi. Jandu iin iñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñihi nyivi nácaa cahan nyaa ñi tsi un.

**Cuhva taahán tsi javaha nyívi
yíhí cuenda Nyoo**

3 ¹ Janducuhun iñi tsi nyívi yíhí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi. ² Tan ña cahan ñi ndavaha ñi siqui nyívi. Ña cañi tahan ñi tsihin nyívi. Na cuvi ñi nyívi vaha. Na masu jaha ñi añima ñi tsihin tandíhi nyívi.

³ Tyin nda cuanda maa yo tan ña vaha javahá yo nu quítsi tsi. Soho xaan tsicoo yo. Ndava xaan iñi yo. Ña tsica yo ityi vaha tyin jandavi ñaha xaan nu ña vaha tsi yo. Tan tsindaca ñaha tandíhi tsa ña vaha tsa cuñi cuñu ñuhu yo tsi yo. Tan javahá yo tandíhi cuhva cuñi maa yo. Tan cuñi yo coo tandíhi tsa iyó tsi inga nyívi tsi yo. Ndasí tsica iñi yo nyehe yo tsi nyívi yo. Tan tacan tucu maa nyívi ndasí cuñi ñi nyehe ñi tsi yo. ⁴ Maa tyin Nyoo vaha xaan iñi ra tan jacacu ra tsi yo. Tsihin yacan janahá ra tsi yo tyin cuñi ra tsi tandíhi nyívi.

⁵ Ñavin tsa cuenda tsa vaha javahá yo tan jacacu ra tsi yo, tyin jacacu ra tsi yo tsa cuenda tsa cundaahvi iñi ra nyehe ra tsi yo. Tan tsihin niñi ra Jesús nacatyá ra cuatyí yo, tan nacacu tsaá yo jahá Tatyí Ii ra, tan tsahá ra ñayívi nyito coo yo. ⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra añima yo. ⁷ Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayívi nyito tsa ña cua naa maa tsa ndatú yo. ⁸ Tandíhi tuhun ihya tuhun nditsa cuví tsi. Tan cuñi yo tsa jañiñi xaan un cuhva cuenda un tuhun ihya tsi nyívi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandíhi nyívi tatun

tyaá yahvi ñi itsi. ⁹ Maa tyin ña tyaa soho un nu caahán yuhu tahan nyívi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyívi. Ña tyíhi un tsi un tsihin nyívi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsiñi tuñi tsahá can.

¹⁰ Tatun iyó nyívi cuñi natahvi sava tsi nyívi tsicá vehe ñuhu, cãna tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, cãsi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tavá ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyíi un. Tan quívi tsaá ra, nducu cuhva tan cuhun un nda ñuu Nicópolis tyin ndacan cua ñihi tahan yo. Tyin tyaá yu cuhva tsa ndoo yu ndacan yoo vitsin. ¹³ Nducu cuhva jatyinyee un tsi ra Zenas ra tuhvá caahán ndaahvi tsaha nyívi, tan tsi ra Apolos. Tan cuhva tsa tsiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyívi yíhí cuenda Nyoo javaha ñi tsa vaha tan jatyinyee ñi tsi inga nyívi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndíhi cahãn ra Pablo

¹⁵ Tandíhi ra yucú tsihin yu, tsahá ra naha nacumi tsi un. Tan cuhva nacumi tsi tandíhi nyívi cuñi tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandíhi ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Filemón

Nu quitsahā tyaá ra Pablo carta cuenda ra Filemón

1 Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndíhi ra nacumi tsi un. Cuñí xaan ndi tsi un tsa cuenda tsa iin ñi tyiñu ra Cristo jahá tyiñu yo.

Nu quitsahā tyaá ra Pablo carta cuenda ra Filemón

2 Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandíhi nyívi ndu iín yuvehe un. 3 Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo añima ndo.

Ra Filemón tsinú xaan iñi ra tsi ra Jesús tan cuñí xaan ra tsi nyívi

4 Tandíhi ñi tsaha tsa tsicán tahvi yu tsi Nyoo tan nducuhún iñi yu tsi un, 5 tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandíhi nyívi yihí cuenda ra. 6 Tan tsicán yu tsi Nyoo tsa cuenda tandíhi nyívi tsa natsinú iñi tsi ra Jesús jahā un tsihin tsa tsinú iñi un, tyin na cutuñi iñi ñi tandíhi tsa vaha tsa iyó tsi yo tsa cuenda ra Jesucristo. 7 Tan sii xaan cuñí yu tan iin xaan cuñí yu tsa cuenda tsa cuñí xaan un tsi nyívi tsa yihí cuenda ra Cristo tan jandu iín xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

8 Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. 9 Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyíi yu vehe caa ihya tsa cuenda ra Cristo. 10 Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahān yu tuhun ra Cristo tsihin ra nu nyíi yu vehe caa ihya.

11 Tahān tsanaha cuví ra musu un tan ña jahā tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu.

12 Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra. 13 Tsicá tucu iñi yu tsa ndoo ra nu nyíi yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. 14 Maa tyin ña cuñí yu jandoo yu tsi ra tyin ña tsitó yu nácaa cua cahan un. Tan ña cuñí yu jañiñi yu tsi un tun ña cuhva un tsa cunyi ra. Vaha ca jaquitsi nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu. 15 Vasiquí maa Nyoo cuñí tsa cunu ra nuu un juhva quívi tan vityin cua tsaa nyico ra yuvehe un tan coo cuii ra tsihin un. 16 Tan vityin naquihin cuenda tsi ra tumaa yañi un tsa cuenda ra Cristo; tan

ñavin tumaa musu. Yuhu cuñí xaan yu tsi ra, yacan yooxo taahán tsi tsa cuñí ca un tsi ra tan ñavin ca yuhu, tyin vityin ñavin musu ñi un cua cuvi tsi ra tyin cuví tucu ra yañi un tsa cuenda ra Cristo.

17 Tun nditsa un tsa cuñí un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un. 18 Tatun javahá ra iin tsa ña vaha tsi un o nyaá cuenda ra tsi un, tyahvi maa yu can. 19 Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuenda ñayivi iyó un tsi yu. 20 Yañi, javaha tumañi iñi ihya tsi yu, tumaa ra yihí cuenda ra Cristo; na cusñi iñi yu tan na ndu iin iñi añaima yu tsihin tsa cua javaha un.

21 Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaaha ca tsa cua javaha un. 22 Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaá ra Pablo carta tsa cuenda ra Filemón tan tsahá ra nacumitsi ra tan jacuhún tucu inga ranaha nacumi tsi ra

23 Ra Epafra tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un. 24 Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu. 25 Na nasoco xaan Jutu Mañi yo Jesucristo tsi ndo.

Tan na cuvi tsi tacan ñi.

Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

Caahán Nyoo tsihin yo tsihin
yuhu Sehe ra

1 ¹ Tahán tsanaha cuaha xaan tsaha, tan cuaha xaan cuhva cahán Nyoo tsihin tsi tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsahá cuenda tsi nyivi tuhun caahán Nyoo. ² Tan vityín, nu cua ndíhi tyembu ihya tsatyíñu ra tsi Sehe ra tsa caahán ra tsihin yo. Iin ñi cuví ra tsihin Sehe ra tan javahá ra tandíhi tsa iyó. Tan nacuhvá cuenda ra tandíhi can tsi Sehe ra. ³ Tan maa Sehe ra janahá ra tsa sî caá ra, tyín juvín ra Sehe ra cuví tixahñu ra tyín juvín ñi cuhva caá maa ra caá ra Sehe ra. Tan tsihin tunyee iñi tuhun caahán ra, yíhí ndaha ra tandíhi tsa iyó. Tsa yahá tsa nacatyá ra cuatyí yo, tan tsinyaa ra xiin cuaha Nyoo nda gloria.

Cahnu ca cuví Sehe Nyoo tan
ñavin ca ángel

⁴ Sehe Nyoo cahnu xaan ca cuví ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel. ⁵ Tyín Nyoo ña catyí ra ndi iin tsaha tsihin ndi intuhun ángel tyehen:

Yooho cuví Sehe yu.
Tan tsahá yu ñayivi coo un
vityín.

Tan ndi ña cahán ra tuhun ndi intuhun ángel tyehen:

Yuhu cua cuvi Jutu ra.
Tan maa ra cua cuvi Sehe yu.

⁶ Maa tyín quívi jaquitsí Nyoo tsi Sehe mañi ra nu ñuhu ñayivi, catyí ra:

Tyín tandíhi ángel ra taahán tsi
jacahnu ra naha tsi Sehe ra.

⁷ Tan cahán tucu ra tuhun ángel tan catyí ra:

Ángel yu cuví ra naha tumaa iin tatyí jahá yu,
jahá tyiñu ra naha tyiñu yu, tan cuví tucu ra naha tumaa ñuhú, catyí Nyoo.

⁸ Maa tyín tuhun Sehe ra catyí ra tyehen:

Nyoo cuví un, tan ña cua cundíhi maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sî cuñí un, tan ñavin ca tsi ra cutahán tsihin un naha ra.

¹⁰ Tan catyí tucu Nyoo tsihin Sehe ra tyehen:

Yooho cuví Jutu Mañi tandíhi nyivi. Quívi jihna ñi juvín un javahá ñuhu ñayivi,
tan tsihin ndaha un javahá un andívi.

¹¹ Ñuhu ñayivi tan andívi tan tandíhi maa tsa iyó cua cundíhi tsi, maa tyín yooho, ña cua cundíhi un, tyín tacan ñi iyó maa un.

Tandíhi maa can cua ndutsahnu can tumaa ndutsahnú jahma.

¹² Tan cua quíhi tahnu can tumaa tyihí tahnu yo iin jahma.

Tan cua nasama can tumaa nasamá nyivi jahma ñi.

Maa tyín yooho iin ñi maa ra cuví un tan ña cua nasama un.

Tan ña cua cundíhi maa ñayivi

un tyin tacan ñi iyó maa un,
catyí Nyoo tsihin Sehe ra.

13 Nyoo ndi iin tsaha ña cahān ra
tsihin ndi intuhun ángel tumaa cahān
ra tsihin Sehe ra tyehen:

Cunyaa xiin cuaha yu ihya
tsitsi tsa nacuhva cuenda yu tsi
nu xaan iñi tsi un nahnu tsi un.

14 Tandihí ángel, tatyí cuví ra naha.
Tava tyiñu Nyoo tsi ra naha tsa caca ra
naha tyiñu ra tan jatyinyee ra naha tsi
nyivi tsa cua cacu.

Cahnu xaan cuví tsa jacacú Nyoo tsi yo

2 1 Yacan cuenda cuñí tsi tyaa
yahvi xaan ca yo tuhun nditsa
tsa tsiñí yo, coto nacoó ihñi yo itsi.

2 Tahān tsanaha tsahā cuenda ángel
ley Nyoo tsi ra Moisés. Tan janahā
Nyoo tyin nditsa tan taahán tsi tyaa
yahvi nyivi itsi. Tan nyivi tsa tsicoo
cuatyí tan ña tyaā yahvi ley can, tatsi
tuñi ra tsi ñi tumaa catyí maa ley can.

3 Tun tacan tahān ñi can quivi can
¿nácaa cua javaha yoo vityin, tan cuví
cacu yo tatun ña tyaa yahvi yo tsa
jacacú Nyoo tsi yo?, tan cahnu xaan
ca cuví tuhun ihya. Juvín ñi maa Jutu
Mañi yo Jesucristo cuví ra tsa cahān
jihna tyin cuví cacu yo. Yahā can tan
cahān nyivi tsa tsiñí tsa cahān ra.
Nyehe ñi tyin nditsa tan nacatyí tuhun
ñi itsi tsihin yo. 4 Tan siin tyin Nyoo
janahā catsi ra tsi yo tyin nditsa tsa
jacacú ra tsi yo. Janahá ra can tsi yo
tsihin tsa javahā ra cuaha tsa iyo. Tan
tsahā tucu ra Tatyí Ii ra tsi yo tyin
jatyinyee tsi tsi yo tsa javaha yo tyiñu
tsa cuñí ra javaha yo. Tan tsihin
tandihí yacan janahá ra tsi yo tyin
nditsa tsa jacacú ra tsi yo.

**Ra Jesucristo quitsi ra cuví ra rayii
nu ñuhu ñayivi ihya**

5 Nyoo ña tsahā ra tsa cundaca
ñaha ángel ñuhu ñayivi tsaa tsa cua
coo tsa caahán yo tuhun vityin.

6 Tyin iyó iin nu tyaā iin ra nu tutu
Nyoo tyehen:

Nyoo Jutu yu ¿yóo ra cuví rayii
nu ñuhu ñayivi ihya tyin
ñuhú iñi un tsi ra?

¿Tan yóo ra cuví ra tyin cutuñu
iñi un tsa cuenda ra?

7 Tyin ndaahvi ca jahā un tsi ra
juhva tyembu, tan ñavin ca ra
ángel naha ra.

Maa tyin jacahnū un tsi ra. Tan
jahā un tsa ñayivi tsi ra.

Tan tsahā un tsa quihí ndaha ra
tandihí tsa javahā un.

8 Tandihí can tyaā cuenda un
ndaha ra.

Tan nduve maa náa ña tsahā cuenda
Nyoo quihí ndaha ra. Tan ñaha ca
nyehé yo tyaa yahvi tandihí yacan tsi
ra. 9 Maa tyin nyehé yo tsi ra Jesús tyin
nduluhlū ra jahā Nyoo juhva tyembu
tan ñavin ca ra ángel naha ra. Tan
janduluhlū Nyoo tsi ra tsa cuenda tsa
cuñí xaan ra tsi yo. Tan tsahā ra tsi ra
Jesús quitsi ra quitsi cúu ra tsa cuenda
tandihí yo. Tan vityin jahá xaan Nyoo
tsa cahnu tsi ra tan jacahnú xaan ra tsi
ra tsa cuenda tundoho tsa nyehe ra
quivi can.

10 Tandihí maa tsa iyó, tsa cuenda
maa Nyoo cuví tsi. Maa ra javahā itsi.
Tan cuñí ra cuhva ra tandihí tsa sii
caá tsa iyó andivi tsi tandihí sehe ra.
Yacan cuenda janyehē ra tundoho tsi
ra Jesucristo, ra tsa jacacú tsi yo, tan
tsihin yacan janduvahā ra tsi ra.

11 Ra Cristo tsa jacacú tsi yo, Sehe
Nyoo tsi ra. Tan juvin ñi sehe Nyoo
nanduví yoo tsa tsinú iñi tsi ra. Yacan
cuenda ña cahán nuu ra Cristo tsa
caahán ra tyin yañi ra tan cuhva ra
cuví tsi yo, tyin iin ñi Jutu yo tsihin
ra. 12 Tyin catyí ra Cristo nu tutu
Nyoo tyehen:

Cua cahān yu tuhun un tsihin
yañi yu.

Tan cua jacahnū yu tsi un tsihin
yaa nu ndu iin yo.

13 Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsahá ra tsi yu, catyí ra.

14 Yoo tsa cuví yo nyívi ñuhu ñayívi, iyó cuñu ñuhu yo tan ñíni yo. Tacan cuví ra Cristo, tyin tun tsa ña tsicoo cuñu ñuhu ra tan ñíni ra, ña cua cuví cúu ra tan janaa ra tsi nu ña vaha, nu tsa tsahñí tsi nyívi. 15 Tacan javahá ra tan jacacu ra tsi nyívi tsa tsicoo yuuhví jahá tuhun tsihi. Cuví ñi tumaa musu nu ña vaha tyin tandíhi ñi quívi tsicoo yuuhví ñi. 16 Tan tsa nditsa vaha tyin ña quítsi ra quítsi jatyinyee ra tsi ángel. Tyin quítsi ra quítsi jatyinyee ra tsi nyívi tata ra Abraham. 17 Yacan cuenda ñíni cuñi tsi tsa cuví ra tumaa yoo tsa cuví yo yañi ra tan cuhva ra tyin tacan tan cuví ra iin ra cundaahvi ñi tsi yo, tan cuví ra jutu tsaahnu cuví ityi nuu tsa cuenda yo nuu Nyoo tyin jandaá ra tandíhi maa tan quihín nyaa ra cuatyí yo tsihin tundoho tsa nyehé ra. 18 Tan tsa cuenda tsa nyehé ra tundoho quívi nducu cuhva nu ña vaha tsi ra, tsitó ra nácaa cuñi yo tun nyehé yo tundoho. Yacan vityin nyaá ra tsa jatyinyee ra tsi yo tun nyehé yo tundoho tsa nducú cuhva nu ña vaha tsi yo.

Cahnu ca cuví ra Jesús tan ñavin ca ra Moisés

3¹ Nyooho, yañi, tsa jandu íí Nyoo, tan tsa nacatsi ra tyin coo ndo tsihin ra nda gloria, nyehé vaha ndo cuhva iyó ra Cristo Jesús, juven ra jaquítsi Nyoo tyin caca ra tyínu ra tan cuví ra jutu tsaahnu cuví ityi nuu tsa cuenda yoo tsa tsinú ñi tuhun ra. 2 Ra Cristo javahá ra tandíhi tsa cahán Nyoo tyin javaha ra, tumaa javahá tucu ra Moisés tyínu tsa tsahá Nyoo tsi ra tsa jaha cuenda ra vehe Nyoo tsa cuví nyívi Israel. 3 Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa

vehe tsa javahá ra. 4 Tyin maa ñi iyó ra javahá intuhun intuhun vehe, maa tyin Nyoo cuví ra tsa javahá tandíhi maa tsa iyó. 5 Ra Moisés tyaa yahvi ra tsi Nyoo tan javahá ra tyínu tsa tsahá Nyoo tsi ra tyin jahá cuenda vaha ra vehe Nyoo tsa cuví nyívi Israel, tan juven ñi jacoto tucu ra tsi nyívi tsa cua javaha Nyoo nu cuahán ca tsi. 6 Maa tyin ra Cristo, Sehe Nyoo, tyaa yahvi tucu maa ra tsi Nyoo tan juven ra cuví ra ndacá ñaha vehe Nyoo vityin. Vehe can cuví yoo tun iin ñi cuñi yo nyicún yo tsi Nyoo tan nyitá vaha ñi yo tsi ra nda cuanda nu ndíhi, tan tacan ñi sií cuñi yo ndatú yo tsa cua ñihi yo.

Nyívi tsinú ñi tsi Nyoo, quitatú ñi tsihin ra

7 Yacan cuenda cuñi tsi jaha cuenda vaha yo tsi yo tumaa catyí Tatyí Ii Nyoo tyehen: Tatun tsiñí ndo tsa caahán Nyoo tsihin ndo vityin, 8 ña jandava ndo añima ndo, tumaa javahá nyívi tsa ña tyaa yahvi tsi Nyoo quívi nducu cuhva ñi tsi ra nu tsicá ñi nuu tsiqui. 9 Tyehen catyí Nyoo: Tsii tsaahnu ndo nducu cuhva ñi tsi yu, vasu ndi maa nyehé ñi tsa javahá yu tsitsi tsa uvi xico cuiya. 10 Yacan cuenda cuxaan yu tsihin nyívi can, tan catyí yu tyehen: “Ña iin maa cuñi nyívi ihya tan ña cuñi ñi cunyicun ñi ityi janahá yu tsi ñi.” 11 Yacan cuenda cuxaan yu tsihin ñi, tan cahán catsi yu tsihin ñi, tyin ña cua quitatu ñi tsihin yu, catyí Nyoo. 12 Yacan cuenda yañi, jaha ndo cuenda tsi ndo tan ña caca uvi ñi

ndo tsitsi añima ndo coto jandihí ndo tsa tsinú ñni ndo tsi Nyoo nyito tan coto nacoo ndo tsi ra. **13** Maa tyin jandu iin tahan ndo ñni ndo tandihí ñni quivi, tsitsi tsa tsahá tsi cuhva tsi ndo vityin. Tyin tacan tan ña cua ndundava añima ndo, tan ndí intuhun ndo tan ña cua jandavi ñaha tsa caquiñi tsi ndo. **14** Tyin tun ña jandihí yo tsa nyitá ñni yo tsi Nyoo nda cuanda naa ñuhu ñayivi tumaa javahá yo nda quivi quitsahá yo, cua ñihi yo tsa vaha iin caa ñi tsihin ra Cristo tyin cunyeé ñni yo ndatú yo tsi ra.

15 Yacan tacan cuñí tsi jaha yo cuenda tsi yo tumaa catyí tutu Nyoo: Tatun tsiñí ndo tsa caahán Nyoo.tsihin ndo vityin Ña jandava ndo añima ndo, tumaa javahá nyivi tsa ña tyaa yahvi tsi Nyoo —catyí tutu Nyoo.

16 ¿Yóo nyivi cuví ñi tsiñi tsa cahán Nyoo tan ña tyaa soho ñi? Nyivi ihya cuví nyivi Israel tsa tava ra Moisés Egipto tahan tsanaha. Juvín ñi can ña tyaa soho. **17** Tan ¿yóo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoo cuatyí ñi. Tan tsihi ñi nu tsiqui, juvín ñi maa nu tsica ñi. **18** ¿Tan yóo tsihin cahán catsi Nyoo tyehen?:

—Ña cua quitatu ndo tsihin yu.

Juvín ñi tsihin ñi tsa ña tyaa soho can. **19** Ihya nyehé yo tyin ña cuví ñihí ñi quitatu ñi tsihin Nyoo tyin ña tsinú ñni ñi tsi ra.

4 **1** Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndí intuhun ndo tan ña cua ndoo ihñi ndo. **2** Vityin yoo tsiñí tucu yo tuhun Nyoo tsa jacacú ra tsi yo, tumaa tsa tsiñí tucu maa nyivi Israel can. Tsiñí ñi itsi, maa tyin nduve nacatyí tsa tsiñí ñi itsi tyin ña tsinú ñni ñi itsi. **3** Yoo tsa tsinú ñni tsi Nyoo, quitatú yo tsihin ra. Maa tyin ña quitatu nyivi tsa ña tsinú ñni tsi ra

tyin catyí ra:

Yuhu cuxaan yu tsihin ñi tan cahán catsi yu tsihin ñi tyin ña cua quitatu ñi tsihin yu, catyí ra.

Vasu ndi maa tacan cahán Nyoo tsihin ñi ican, maa tyin tsa iyó tuhun tsa cuví quitatu yo tsihin Nyoo nda quivi ndihí jahá tyiñu ra javahá ra ñuhu ñayivi.

4 Tyin yihí nu tutu Nyoo caahán tsi tyehen tuhun tsa tsinu utsa quivi nu ndihí vitya:

Tsa ndihí jahá tyiñu Nyoo, quitatú ra tsa tsinu utsa quivi.

5 Tan catyí tucu tsi tyehen:

Ña cua quitatu ñi tsihin yu, catyí Nyoo.

6 Nyivi tsa tsiñi jihna tuhun tsa jacacú Nyoo tsi yo ña cuví quitatú ñi tsihin ra, tsa cuenda tsa ña tyaa yahvi ñi tsa cahán ra tsihin ñi. Maa tyin vityin ndi iyó ndatu tsa quitatu inga nyivi tsihin ra. **7** Tsa yahá tsa ña tyaa yahvi nyivi Israel tsa cahán Nyoo, tan tyaa ra inga quivi cuví quitatu yo tsihin ra, tan quivi can cuví tyembu vityin. Tacan caahán Nyoo nu tutu ra nu tyaa ra David tyehen:

Vityin tatun nyooho tan tsiñí ndo tsa caahán yu,

Ña jandava xaan ndo añima ndo, catyí Nyoo.

8 Tun tsatyin tsahá ra Josué nu quitatu nyivi Israel, ña cua cahan Nyoo tsa cuenda inga quivi. **9** Yacan cuenda cuví quitatu nyivi yihí cuenda ra tsihin ra. **10** Tyin nyivi quitatú tsihin Nyoo, ña tsicá ñni ñi tsa cuenda tyiñu jahá ñi tyin quitatú añima ñi tumaa quitatú Nyoo quivi ndihí jahá tyiñu ra. **11** Cuñí tsi jañiñi yo nducu yo cuhva quitatu yo tsihin Nyoo, tyin tacan tan ndí intuhun yo tan ña javaha yo tumaa javahá nyivi tsicoo tsanaha tsa ña cuñi tsinu ñni tsi ra.

12 Tyin tuhun Nyoo, nyito tsi, tan iyó tunyee ñni itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiñ tsi tsa tsiñí tuñi jiñi

yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo. **13** Nduve maa tsa javahá Nyoo tan cuví cunu xeehe can nuu ra, tyin tandíhi maa tan nyehé ra. Tan juvin tsi ra cua cuhva cuenda yo tsa javahá yo.

Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo

14 Ra Jesús Sehe Nyoo, juvin ra cuví jutu tsaahnu cuví ityi nuu tsa cuenda yo, tyin quihví ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandíhi yo tsa tsinú iñi yo tsi ra. **15** Tyin ra tsa cuví jutu tsa cuenda yo cuví naquihin ndaahvi ra tsi yo tatun cuihya cuñí yo, tyin tsitó ra nácaa cuñí yo tun nyehe yo tundoho tyin maa ra nyehe tucu maa ra tandíhi nuu tundoho quivi nducú cuhva nu ña vaha tsi ra, maa tyin ña tsicoo cuatyí ra. **16** Yacan cuenda cuñí tsi nanducu yo tsi Nyoo tan ndacan yo tsi ra tsihin tsa ña yuuhví yo na cundaahvi iñi ra nyehe ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quivi nyehé yo tundoho.

5 **1** Tandíhi ñi jutu tsaahnu tsa cuví ityi nuu tsa nacatsí Nyoo tsitsi tsa tandíhi nyivi Israel, nacatsí ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quiti tsa cuenda cuatyí ñi. **2** Tan vatsí tsaha juvin ñi ndaahvi cuñí ra cuví jutu quivi nducú cuhva nu ña vaha tsi ra, yacan cuenda cuví cundaahvi iñi ra nyehé ra tsi nyivi ña cutuñí vaha iñi tuhun Nyoo tan nyivi ña nyicún vaha tsi Nyoo. **3** Tan yacan cuenda tsahñí ra quiti tan jamañí ra can nuu Nyoo tsa cuenda cuatyí maa ra tan tsa cuenda cuatyí nyivi.

4 Ndi intuhun maa nyivi tan ña cuví cuví ñi jutu tun ñavin maa Nyoo nacatsí tsi ñi. Tyin maa Nyoo cuví ra nacatsí tsi ra cua cuví jutu, tan tsahá ra ndatu tsi ra tsa cuví ra jutu, tumaa javahá ra tsihin ra Aarón tahañ tsanaha. **5** Tan tacan tucu ra Cristo, ñavin maa ra tyaá tyiñu can tsi ra, tyin maa Nyoo tsahá tsa cuví ra jutu tsaahnu tsa cuví ityi nuu, tumaa catyí ra:

Yooho cuví Sehe yu.

Yuhu tsahá yu ñayivi coo un vityin, catyí Nyoo tsihin ra Cristo.

6 Tumaa catyí tucu ra tsihin ra nu inga nu caahán tsi tyehen:

Ña cua cundíhi maa tsa cuví yooho jutu, tumaa cuví ra Melquisedec.

7 Quivi tsicoo ra Cristo nu ñuhu ñayivi ihya, tsicān tahvi ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsihi tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandíhi tsa catyí Nyoo tyin javaha ra. **8** Yacan cuenda vasu ndi maa Sehe Nyoo tsi ra Cristo, cutuhvá ra tyaá yahvi ra tsi Nyoo tsihin tsa nyehe ra tundoho. **9** Tsa yaha tsa javahá ra tandíhi cuhva cuñí Nyoo tyin javaha ra, tacan tan tsahá Nyoo tsi ra tsa jacacú ra tsi tandíhi nyivi tsa tyaá yahvi tsa caahán ra tyin tacan tan coo cuiñi ñi tsihin Nyoo. **10** Tyin maa Nyoo tava tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandíhi yo tsa tsinú iñi yo tsi Nyoo

11 Cuví cahan cuaha yo siqui tuhun ihya, maa tyin yíi xaan nacatyí tuhun yu nácaa cuahán tsi, tyin nyooho ña cuñí ndo cutuñi iñi ndo. **12** Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyooho cuví ndo tumaa cuví lee tsa tyaxín tsa ñaha ca

cuvi catsi tyin cuñí tsi tsa tyaa soho nyico ndo tuhun tsa tsiñi ndo tsa jihna ñi. **13** Tyin nyivi cuñí tyaa soho tuhun tsa ña yii cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo.

14 Maa tyin nyivi tsa cutuñí vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6 ¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. ² Tan na ña ndoo yo vaha tsihin tuhun tsa cutuhva yo cuenda tsa tsicoondutya yo, tan tsa tyisó ndaha yo siqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihi nyivi tsa yaha cúu ñi, tan tsa cuenda tucu tsa cua cutuñi tandihi nyivi nuu Nyoo tan yihí ñi cua cuhun cuii ñi anyaya.

Na ña ndoo yo vaha tsihin yacan ñi. **3** Nacuhun ca yo ityi nuu tatun Nyoo tsaha ra ndatu.

4 Tyin nyivi tsa tsa yaha naquihin cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí Ii Nyoo añima ñi. **5** Tan tsitó ñi tyin vaha tuhun Nyoo. Tan tsa nyehe ñi juhva nácaa cua cuví tsa cua coo yo nu ñuhu ñayivi tsaa, tyin ñihí ñi tunyee iñi tsa iyó tsi Nyoo. **6** Tatun tsa naquihin cuenda ñi tandihi yacan, yaha can tan jandihí ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi. **7** Añima nyivi cuví tsi tumaa ñuhu nu jahá tyiñu nyivi, tyin tandihi ñi tsaha tsa cuún savi, nacohó

ñuhu can ndutya savi can. Tatun vaha ñuhu can, vaha tsicoó tsa tatsí nyivi, tan nasocó Nyoo ñuhu can.

8 Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyivi tsa jandihí tsa tsinú iñi tsi Nyoo.

9 Yañi, vasu ndi maa caahán ndi tacan, maa tyin tsitó vaha ndi tyin nyoocho nasocó Nyoo tsi ndo tyin jacacú ra Cristo tsi ndo. **10** Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñí xaan ndo tsi nyivi yihí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin. **11** Cuñí ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihi ndo tandihi tsa ndatú ndo. **12** Ña cuñí ndi tsa jutsan xaan jaha ndo tsi ndo, maa tyin cuñí ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyi Nyoo tyin cuhva ra tsi yo.

13 Tyin quivi tyihí Nyoo cuhva tyin cuhva ra tsa cua cuhva ra tsi ra Abraham, tsatyinñu ra juvin ñi sivi maa ra, tyin ña cuví cuatyinñu ra náa inga ca sivi tyin nduve nyivi cahnu ca cuví tan ñavin ca maa ra. **14** Tan catyi ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catyi ra tsihin ra. **15** Ra Abraham ñihí ra tsa catyi Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatú ra can. **16** Iin nyivi tun tyihí ñi cuhva tsa cuhva ñi tsa cua cuhva ñi tsi yo, tsatyinñu ñi sivi iin nyivi cahnu ca cuví tan ñavin ca maa ñi. Tsihin yacan ndoó ñi tuhun tsihin yo.

17 Nyoo tsatyinñu ra juvin ñi sivi maa ra quivi catyi ra tyin cuhva ra tsa

cuhva ra tsi nyivi ra. Javaha ra tacan tyin cuñi ra tsa coto ñi tyin cua jandaa ra tsa cahan ra tsihin ñi tan ña cua nasamá tuhun cahan ra. **18** Tan iyó uvi taahan tsa ña cuvi nasama. Iin tsi cuví tsa cuhva Nyoo tsa catyí ra tyin cuhva ra tsi yo, tan inga tsi cuví tsa tsatyíñú ra juven ñi sivi maa ra. Nyoo ña vatya ra. Yacan cuenda tandíhi yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihi yo tsa catyí ra tyin cuhva ra tsi yo. **19** Tumaa iin yutun ndoo tsa tsicá nuu ndutya ñuhu nuuhñi tsi tsihin iin caa vee coto cahun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahvi sava jahá jahma. **20** Ican quihvi ra Jesús tyin tacan tan nuña ra ityi cahun yo nu nyaá Nyoo. Tan ña cua cundíhi maa tsa cuví ra Jesús jutu tsaahnu cuví ityi nuu, tumaa cuví ra Melquisedec.

Ra Jesús cuví ra jutu tumaa cuví ra Melquisedec

7 ¹ Ra Melquisedec tsa caahán yu tuhun ihya, juven ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandíhi tsa iyó. Quivi tsa vatsi nuhu ra Abraham naha ra tsa yahá tsaahan ra naha tsicañi tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasoco ra tsi ra Abraham. ² Tan cuaha tsa ñihi ra Abraham nu tsaahan ra tsicañi tahan ra. Tsitsi tsa utsi utsi nuu tsa ñihi ra, tsaahá ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juven ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsaahá tsa taxin.” ³ Ra Melquisedec nduve jutu ra tan sihi ra. Ña caahán tsi tun iyó

nyivi ra, tan ndi ña caahán tsi amacacu ra, tan ama tsihi ra. Yacan cuenda cuví jandu inducu yo tsi ra tsihin Sehe Nyoo, tyin ña tsindíhi maa tsa cuví ra jutu.

⁴ Nyehé yo ihya vityin tyin cahnu xaan cuví ra Melquisedec, tyin tsaahá ra Abraham juhva tsa ñihi ra nu tsicañi tahan ra tsi ra. ⁵ Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsaahá ra Abraham juhva tsa ñihi ra tsi ra, tyin tsa yahá cuaha cuiya tan tsaahá Nyoo ley tsi nyivi tata ra Abraham. Tan catyí ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyivi cuví ñi tsihin ra naha tyin juven ñi tata ra Abraham cuví ra naha. ⁶ Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihin cuenda ra juhva tsa ñihi ra Abraham. Tan nasoco ra Melquisedec tsi ra Abraham, ra tsa catyi Nyoo tsihin tyin cua cuhva ra tsa cuhva ra. ⁷ Tan tsitó catsi yo tyin cahnu ca cuví ra tsa nasoco, tan ñavin ca ra tsa nasoco ra. ⁸ Nyehé yo tyin cahnu ca cuví ra Melquisedec tan ñavin ca tandíhi ra tsa quihín cuenda intuhun intuhun tsitsi tsa utsi utsi tsa ñihí nyivi, tyin rayi ñuhu ñayivi ihya ñi cuví ra naha, tan tuhvá ra naha tsiihi. Maa tyin caahán tsi nu tutu Nyoo tan catyí tsi tyin ra Melquisedec nyito ra. ⁹ Ra Leví tsihin sehe ra, tata ra Abraham cuví ra naha. Juvin ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyivi. Cuví catyi yo tyin tandíhi ra can naha ra tyahvi ndíhi ra naha tsi ra Melquisedec quivi tyahvi ra Abraham tsi ra. ¹⁰ Cuví catyi yo tyin tyahvi ndíhi tata ra Leví tsi ra Melquisedec quivi ñihi tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quivi can.

11 Ra jutu tata ra Leví tsa cuví tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuví janduvahá ra jutu can naha ra tsi nyívi nyicún ley can, ña ñiñi cuñí tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec. 12 Tyin tun nasamá Nyoo tsi ra cuví jutu, nasamá tucu ra ley ra. 13 Jutu Mañi yo tsa caahán tutu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu. 14 Tsitó vaha yo tyin Jutu Mañi yo tata ra Judá tsi ra, tan ra Moisés ña cahān ra tuhun tata ra Judá quívi cahān ra tuhun ra cuví jutu naha ra.

15 Nditsa tsa nasamā Nyoo tsi ra jutu tyin jaquitsj ra iin jutu tumaa ra Melquisedec. 16 Ra jutu ihya ña quitsj ra tumaa catyí ley tsahnu, tyin ley can catyí tsi tyin maa ñi tata ra Leví taahán tsi cuví jutu, tan ra can ñavin tata ra Leví cuví ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsj Nyoo. 17 Tyin tyehen caahán Nyoo tuhun ra:

Yooho ña cua ndíhi maa tsa
cuví un jutu,
tyin cuví un jutu tumaa ra
Melquisedec.

18 Yacan cuenda nacoq Nyoo ley tsahnu can tyin ña cuví jatyinyeé tsi tsi nyívi, tan ña cuví cacu nyívi jahá tsi. 19 Ley can ña cuví janduvahá tsi tsi nyívi nu Nyoo. Yacan cuenda tsahā ra inga tsa vaha ca tsi yo. Tan tsa vaha ihya jatyinyeé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun can, tan tuhun can cuví ra Cristo.

20 Nyoo cahān catsi ra tyin tacan cua cuví, tan tacan cuví. 21 Tandíhi ca maa ra jutu tsa iyó vityin naha ra nduve náa cahān Nyoo tuhun ra naha. Maa tyin quívi tsahā Nyoo tsi ra Cristo tsa cuví ra jutu, cahān catsi

ra tsihin ra tumaa caahán nu tutu ra tyehen:

Cahān catsi Jutu Mañi yo, tan ña nasama ra tsa cahān ra nu catyí ra tyehen:

“Yooho ña cua ndíhi maa tsa
cuví un jutu,
tyin cuví un jutu tumaa ra
Melquisedec”, catyí Nyoo.

22 Tsa cuenda tsa javahā ra Cristo, tan tsitó yo tyin vaha ca tyiñu ndoq Nyoo tsihin yo tan ñavin ca tsa jihna ñi can.

23 Jutu tsa cuví tata ra Leví cuaha xaan ra naha tsa cuenda tyin tun tsihih iin ra, nacosó inga ra. 24 Maa tyin ra Jesús nduve tuhun tsihih iyó tsi ra, yacan cuenda ña tsindíhi tsa cuví ra jutu. 25 Tan tsa cuenda yacan cuví jacacu ra tsi nyívi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

26 Ra Jesús cuví jutu tsaahnu cuví ityi nuu tsa tsiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quitā tsiyo ra nu iyó nyívi iyó cuatyí tan nandaq ra ityi siquí andívi. 27 Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñí tsi cahñi ra naha quití tan jamañi ra naha nuu Nyoo tandíhi ñi quívi. Jihna ca jamañi ra naha quití tsa cuenda cuatyí maa ra naha, yaha tan jamañi ra naha tsa cuenda cuatyí tandíhi nyívi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandíhi yo. 28 Ley Nyoo tsa naquihin cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsj ley can, cahān catsi Nyoo tan ndoq ra iin tuhun tsa tsihin yo. Tan tsahā ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundíhi maa tsa vaha ra.

Quivi tsihi ra Jesús tsa cuenda yo tan ndoo Nyoo tuhun tsa tsihin yo

8 ¹ Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaá nu tyayu tsa nyaá xiin cuaha Nyoo nda gloria.

² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahá tan ñavin vehe ñuhu tsa javahá nyívi.

Tyin vehe ñuhu tsa javahá nyívi cuví tsi tixahñu tsa vaha tsa iyó nda gloria.

³ Tandíhi ra jutu naha ra, cuñí tsi cahñi ra naha quití tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyívi. Yacan cuenda cuñí tsi jamañi ra Jesucristo tsa jamañi ra nuu Nyoo.

⁴ Tun tsatyin nyíi ra nu ñuhu ñayívi ihya, ndi ña cuví cuví ra jutu. Tyin nu ñuhu ñayívi ihya, iyó ra jutu tsa jamañi nuu Nyoo tsa catyí

ley tsa tyaa ra Moisés tyin jamañi ra naha. ⁵ Ra jutu tsa iyó nu ñuhu ñayívi ihya naha ra, jahá tyiñu ra naha tsitsi

vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahán tsanaha quívi tsa cua javaha ra Moisés vehe ñuhu

jahma, catyí Nyoo tsihin ra tyehen: “Jaha cuenda vaha, tan javaha tandíhi tumaa janahá yu tsi un quívi tsahán un yucu Sinaí”, catyí Nyoo tsihin ra.

⁶ Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoo Nyoo

tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyin cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsa tsihin yo. ⁸ Maa tyin Nyoo nyehe ra tyin ña vaha javahá nyívi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsa quivi
cua ndoo yu tuhun tsa tsihin
nyívi Israel tan nyívi Judá.

⁹ Maa tyin ñavin tumaa tuhun tsa ndoo yu tsihin tsii tsaahnu ñi, quívi tñn yu ndaha ñi tan tava yu tsi ñi ñuhu Egipto.

Ña javahá ñi tuhun ndoo yu tsihin ñi,
yacan nacoq ihñi yu tsi ñi, catyí Nyoo Jutu yo.

¹⁰ Tuhun tsa tsa cua ndoo yu tsihin nyívi Israel nu cuahán ca tsi ityi nuu, cuví tsehe, catyí Nyoo Jutu yo:

Cua tyihi yu ley yu tsitsi tsa tsiñi tuñi jiñi ñi,
tan cua tyaa tucu yu itsi añima ñi.

Tacan tan cua cuví yu Nyoo ñi,
tan maa ñi cua cuví nyívi yu.

¹¹ Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuví yu Nyoo ñi.

Tyin tandíhi ñi tan cua nacoto ñi tsi yu,
ñi nyihi tan nda cuanda ñi tsahnu.

¹² Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyí Nyoo Jutu yo.

¹³ Quivi tsa cahan Nyoo tyin cua ndoo ra tuhun tsa tsihin yo, tsa jandutsahnu ra tuhun tsa jihna ñi can. Tan tuhun tsa ndutsahnú tsa cua cundihi tsi.

Nu janahá tsi nácaa iyó vehe ñuhu tsa iyó nu ñuhu ñayívi tan vehe ñuhu nu cuví nda gloria

9 ¹ Quivi ndoo Nyoo tuhun tsa jihna ñi tsihin nyívi, tsahá ra cuhva nácaa jacahnu ñi tsi ra, tsitsi vehe ñuhu tsa tsicoq nu ñuhu ñayívi ihya tahán tsanaha. ² Tyehen tsicoq vehe ñuhu can: Tsitsi vehe tsa jihna ñi nyaá candileru, tan nyaá mesa nu

yucu paan ii. Tan yacan tsinañi Vehe li. **3** Tan vehe tsa tsinu uvi tsinañi Vehe li Xaan. **4** Tsitsi vehe can tsinyaa altar xuhun cuaan nu tsahmi ra jutu cutu. Tan tsinyi tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyi yatsin xuhun cuaan nu yihí maná. Tan tsinyi yutun tsa tsindahá ra Aarón tsa quita ita nuu. Tan tsiyucu tucu yuu nu nyaá tsa utsi ley Nyoo. **5** Tan siqui tsatun can tsinyaa tsa caá tumaa caá ángel, tan cuñi tsi catyí tyin nyaá Nyoo ican. Nditsin ángel can tyasí nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

6 Tacan tsicoo vehe ñuhu can. Tandihí ñi quivi quihví ra jutu naha ra tsitsi Vehe li, tan jacahnú ra naha tsi Nyoo. **7** Maa tyin Vehe nu li Xaan, intuhun ñi maa ra jutu tsaahnu cuví ityi nuu cuví quihvi ican, tan iin tsaha ñi taahán tsi quihví ra tsa iin cuiya. Tsa cua quihvi ra, cuñi tsi cundaha ra ñiñi quiti tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí. **8** Tan tsa tacan tsicoo yacan Tatyí li Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe li cuñi tsi catyí tyin ñaha ca nuña ityi quihvi ndáa nyivi tahan ñi maa tsi tsitsi Vehe nu li Xaan. **9** Tandihí yacan cuví can tumaa tixahñu tuhun tsa tsa ndoo Nyoo tsihin yo vityin. Tahán tsanaha jamañi nyivi tsa jamañi ñi nu Nyoo maa tyin ña jatyinyee can tsi nyivi tsa jacahnú tsi Nyoo tsihin can, tsa caca vaha iñi ñi. **10** Tyin tandihí tsa javahá nyivi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsahá ra tsa javahá ñi tacan tsa numi ñi, nda tahan maa tsi quivi cuhva ra tsa vaha ca.

11 Vityin tsa yahá quitsi ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñi tsi catyí tyin ñavin vehe ñuhu iyó nu ñuhu ñayivi ihya cuví nu quihví ra. **12** Ra Cristo quihví ra tsitsi Vehe li Xaan. Maa tyin ña quihví ra tsihin tsa jamañi ra ñiñi mbee lee, o ñiñi indiqui lee. Quihví ra tsihin ñiñi maa ra, tan iin tsaha ñi quihví ra tan ña cuñi ca tsi tsa cuenda quihvi ñi ra tyin jamañi ra ñiñi maa ra. Tsihin yacan jacacú cui ra tsi yo. **13** Ra jutu naha ra tuhvá ra naha quití ñiñi toro, ñiñi mbee, tan nyaá nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi. **14** Tun tacan jatyinyee ñiñi quiti can tsi nyivi, cuñi tsi catyí tyin jamañi ra Cristo cahnu ca tunyee iñi iyó itsi! Tyin nduve cuatyí ra tsicoo tan jamañi ra juvin ñi tsi maa ra nuu Nyoo jahá Tatyí li tsa ña cua cúu maa. Tan ñiñi ra quihín nyaá tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsiihí tsi yo, tan cuví jaha tyiñu yo tyiñu Nyoo nyito.

15 Yacan cuenda ra Jesucristo cuví ra caahán ndaahvi tsaha yo tsa cuenda tuhun tsa tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quivi yihí ndaha tuhun jihna ñi can tsi yo. Tyin tacan tan yoo, tsa cana Nyoo cuví naquihin cuenda yo ñayivi tsa ña cua naa maa coo yo, tsa catyí ra tyin cuhva ra tsi yo. **16** Tun iin nyivi tsihi tan nacoo ñi iin tutu nu tsahá cuenda ñi yóo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñi tsi janaha ñi iin tutu cuví tsandaa tyin nditsa tsa tsa tsihi ra tsa

javahā tutu can. **17** Maa tyin tun ndi nyito ra jatsii ndaha tyiñu can, ña cuvi naha naquihin ñi ndaha tyiñu ra. **18** Yacan cuenda quivi ndoq Nyoo tuhun tsahnu can tsihin nyivi Israel, tsahñi ra jutu naha ra quitì tan tsatì ñiñi ti naha ti. **19** Tsa ndihi tsaha cuenda ra Moisés ley Nyoo tsi tandihi nyivi, tan quihin ra jahma cuaaha tsa tsinu tsihin xixi mbee ticatyi tan iin soco yutun luhlu tsa nañi hisopo, jatyi ra can tsitsi nu yihf ñiñi indiqui lee tan ñiñi mbee luhlu tsa saca nuu tsihin ndutya. Tacan tan quitì ra ñiñi can nu libru nu nyaá ley Nyoo tan quitì ndihi tucu ra can tsi nyivi. **20** Tacan tan catyí ra tsihin ñi tyehen: “Ñiñi ihya cuví tsandaa tsa cuenda tsa ndoq Nyoo tuhun tsihin yo”, catyí ra. **21** Tan juvin ñi quitì tucu ra Moisés ñiñi can vehe ñuhu jahma can tan tandihi ndaha tyiñu tsa tsatyíñu ra jutu naha ra tsa jacahnú ra naha tsi Nyoo. **22** Tacan javahā ra naha tyin catyí ley Nyoo tyin tsa yatyin tandihi tsa iyó tan cuñi tsi nduvaha can nuu Nyoo tsihin ñiñi. Juvin ñi catyí tucu tsi tyin tun ña cati ñiñi ña cua jaha Nyoo tucahnu iñi tsi nyivi.

Ñiñi ra Cristo nacatyá cuatyí yo

23 Javahā ra jutu naha ra tacan tyin cuñi tsi tsa nduvaha tandihi ndaha tyiñu tsa cuví tixahñu tsa iyó nda gloria tsihin ñiñi quitì. Maa tyin tandihi tsa iyó nda gloria, cuñi tsi nduvaha can tsihin ñiñi vaha ca, ñavin tsihin ñiñi quitì ñi. **24** Ra Cristo ña quihvi ra tsitsi vehe ñuhu tsa javahā nyivi tsa cuví tixahñu vehe ñuhu tsa nditsa. Tyin quihvi ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo. **25** Ra jutu tsaahnu cuví ityi nuu cuenda nyivi Israel quihvi ra naha tsitsi Vehe li Xaan iin tsaha ñi tsa iin iin cuiya tyin jamañi ra naha ñiñi tsa ñavin ñiñi maa ra naha cuví. Maa tyin ra Cristo,

ña cuñi tsi tsa jamañi ra tsi ra tañi tañi ñi nuu Nyoo. **26** Tun tsatyin tacan, cuñi tsi tsa cuenda quiti ñi ra nyehe ra tundocho tan cúu ra nda tsa tsinu ñuhu ñayivi tan nda cuanda vityin. Maa tyin vityin tsa tsa cuyatyin cundihi ñuhu ñayivi ihya, iin tsaha ñi quiti ra Cristo, tan jamañi ra tsi ra tyin tacan tan cuví quihin nyaa ra cuatyí yo. **27** Tumaa cua tahan yo: iin tsaha ñi cua cúu yo. Yaha can tan cua cutuñi yo. **28** Tacan iin tsaha ñi tsihi ra Cristo, tan quihin nyaa ra cuatyí cuaha xaan nyivi. Yaha can tan cua quiti ra tsinu uvi tsaha, ñavin ca tsa quiti jamañi ra tsi ra tsa cuenda cuatyí, tyin cua quiti ra quiti jacacu ra tsi nyivi ndatú tsi ra.

10 ¹ Ley Nyoo tsa tyaq ra Moisés cuví tsi tumaa iin tixahñu tsa vaha ca tsa cua quiti. Tsa catyí ley can, ña cuví janduvaha tsi tsi nyivi nanducú tsi Nyoo tyin maa ñi maa ñiñi quitì jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tsihin yacan. **2** Tun tsatyin cuví janduvaha ley can tsi nyivi, cua cundihi tsa jamañi ra jutu naha ra ñiñi quitì tandihi ñi cuiya. Tyin tun tsa nduvahā nyivi tsa tsahā quitì can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñi ca tsi tsa jamañi ra jutu ñiñi quitì tsa cuenda ñi inga tsaha. **3** Maa tyin tsa jamañi ra jutu naha ra ñiñi quitì tan iin tan iin cuiya, janducuhún iñi tsi tsi nyivi tyin iyó cuatyí ñi. **4** Tyin ñiñi indiqui tan ñiñi mbee lee, ña cuví nacatyá can cuatyí nyivi.

5 Yacan cuenda catyí tutu Nyoo tyin ra Cristo cahān ra tyehen tsihin Nyoo:

Ña cuñi un tsa jamañi nyivi quitì nuu un,
yacan cuenda tsahā un tsa coo cuñu ñuhu yu.

6 Tyin ña taahán iñi un tsa cahmi ñi quitì tan jamañi ñi nuu cun

tan quihin nyaa un cuatyí ñi.

7 Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñí maa un tumaa nyaá tuhun yu nu libru ley maa un”, catyí ra Jesucristo.

8 Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quití nuu ra. Ndi tsa cahmi ñi quití tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyivi quití nuu ra, catyí ra. **9** Yahá can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñí maa un.” Tuhun ihya cuñí tsi catyí tyin quítsi ra jatsiyó cuii ra tsa jamañi nyivi tan jamañi ra tsa vaha ca. **10** Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuvi tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

11 Tandíhi ñi quivi tan jamañi ra jutu cuenda nyivi Israel naha ra quití nuu Nyoo, tan cuaha xaan tsaha jamañi ra naha iin ñi maa nuu quití maa tyin ña cuví quihin nyaa can cuatyí nyivi. **12** Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaa ra nu tyayu nyaá xiin cuaha Nyoo.

13 Tan ndatú ra nda cuenda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu. **14** Tyin tsihin tsa jamañi ra tsi ra iin tsaha ñi tan janduvahá ra tsi nyivi yihí cuenda ra yoso cuahán quivi. **15** Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

16 Tuhun tsa tsa cua ndoo yu tsihin nyivi quivi can, tyehen cua cuvi tsi, catyí Jutu Mañi yo:

Cua tyihi yu ley yu tsitsi añima ñi,

tan cua tyaa yu itsi tsitsi tsa tsiñi tuñi iñi ñi, catyí ra.

17 Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

18 Yacan cuñí tsi catyí tyin tsa yahá jahá Nyoo tucahnu iñi tsi yo. Yacan cuenda ña cuñí ca tsi cahñi yo quití, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

19 Yacan cuenda yañi, vityin cuví quihvi yo tsitsi Vehe Ii Xaan nu nyaá Nyoo, tsa cuenda niñi ra Jesucristo tsa tsatí. Tsihin niñi can nacatyá ra cuatyí yo. **20** Tan nuñá ra ityi tsa, tan iin ityi cuhun yo nu coo nyito yo. Tyin cuhva tsa tsihi ra tan ndatá jahma tsa tyasí tsa ña cuví quihvi yo nu nyaá Nyoo. Tsa ndatá jahma can, cuví tsa tsihi ra Cristo, tyin tacan tan cuví cuhun yo nu nyaá Nyoo. **21** Ra Jesús cuví jutu tsaahnu cuví ityi nuu tsa ndacá ñaha tsi nyivi yihí cuenda Nyoo. **22** Yacan cuenda cuñí tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa ra janduvahá añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatyá ra cuñu ñuhu yo tsihin ndutya cuii, tan nduvahá yo nuu Nyoo. **23** Na ndu iin ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo. **24** Tan cuñí tsi nanducu yo cuhva jatyinyee tahan yo tsi yo, na cuñi tahan ca yo tsi yo tan javaha yo tsa vaha. **25** Ña taahán tsi jandíhi ndo tsa tsicá ndo tuhun Nyoo tumaa javahá inga nyivi tsa ña tsicá vaha. Tyin cuñí tsi jandu iin tahan yo iñi yo. Vityin tsa tsa nyehé yo tyin tsa cuyatyin quitsi nyico Jutu Mañi yo tan cua jacutuñi ra tandíhi nyivi, cuñí tsi tsa jatyinyee tahan ca yo tsi yo.

26 Tyin tun tsa tsitó yo tsa nditsa

tan javaha ca maa yo tsa ña vaha, nduve ca nácaa javaha yo tan cuvi jaha Nyoo tucahnu iñi tsi yo. **27** Cua tatsi tuñi Nyoo tsi yo. Tan cua tyihi ra tsi yo nu yucú nyivi xaan iñi tsi ra. Tan ican cua cayu yo iin caa ñi tsihin ñi. **28** Tatun iin nyivi tsa nyitá iñi ley Nyoo tsa tyaa ra Moisés tan ña tyaa yahvi ñi tsa catyí ley can, tan tatun iyó uvi o uñi ra cuví tsandaa tsa cuenda tsa javaha ñi, cua cúu ñi tsa cuenda cuatyí ñi, tan yoñi maa cua cundaahví iñi tsi ñi. **29** Tan yaha ca cua tatsi tuñi Nyoo tsi nyivi caahán ndavaha ñi siqui Tatyí Ii ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá niñi Sehe ra tsa janduvahá añima ñi. Tan tsihin niñi can ndo Nyoo tuhun tsihin yo. **30** Tsitó yo tyin catyí Jutu Mañi yo tyehen: “Maa yu taahán tsi tatsi tuñi tsi nyivi; tan juvin yu cua cahan náa taahán tsi tahan ñi.” Juvin ñi catyí tucu ra tyin maa ra taahán tsi jacutuñi tsi nyivi ra. **31** ¡Cahnu xaan tundoho cua nyehe nyivi yosó ica tsi Nyoo nyito tsa cuenda cuatyí ñi!

32 Maa tyin nyooho nducuhun iñi ndo nácaa cunyeé xaan iñi ndo nyehe ndo tundoho tsa yahá naquihin cuenda ndo tsa nditsin Nyoo tsitsi añima ndo. **33** Yihí nyooho cahan nyivi tsi ndo, tan janyehé ñi tundoho tsi ndo nu tuvi nyivi. Tan yihí ndo cundaahví iñi ndo nyehe ndo tsi nyivi vaha iñi tsi ndo tsa tahan juvin ñi tacan. **34** Tan cundaahví iñi ndo nyehe ndo tsi nyivi tsiyucu vehe caa. Cunyeé iñi ndo nyehe ndo tundoho tsihin tsa siñi cuñi ndo quivi quihin nyaa nyivi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihi maa can. **35** Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra. **36** Cuñi tsi coo tsa taxin añima ndo

tsitsi tsa cunyeé iñi ndo tyin tacan tan cuví javaha ndo cuhva cuñi Nyoo, tan naquihin ndo tsa catyí ra tyin cuhva ra tsi yo. **37** Tyin nu tutu Nyoo catyí tsi tyehen:

Ña naha ca

tan quitsi ra tsa nyaá quitsi, tan ña cua cucuee ca ra.

38 Tan catyí Jutu Mañi yo tyehen: “Nyivi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatun jandihí ñi tsa tsinú iñi ñi, ña siñi cua cuñi yu tsihin ñi”, catyí Nyoo.

39 Maa tyin yoo ña javahá yo tumaa javahá nyivi jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

Cuhva cuñi tsi tsa tsinu iñi yo tsi Nyoo

11 ¹ Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo. ² Juhva nyivi yo tsa tsicoq tahan tsanaha quitá vaha ñi nuu Nyoo tyin tsinu iñi ñi tsi ra.

³ Tsa cuenda tsa tsinú iñi yo tsi Nyoo, tan tsitó yo tyin javahá ra ñuhu ñayivi tsihin tuhun caahán ra. Tan tsitó yo tyin tahan tsanaha tsinu tandihí tsa nyehé yo vityin tsihin tsa ña nyehé yo.

⁴ Tsa cuenda tsa tsinu iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihin cuenda Nyoo tsi ra tumaa tsatyin vaha ra, tan naquihin cuenda tucu ra tsa jamañi ra. Vasu ndi maa ña nyito ca ra Abel, maa tyin tsiñi yo nácaa tsinu iñi ra.

⁵ Tsa cuenda tsa tsinu xaan iñi ra Enoc tsi Nyoo, tan naquihin Nyoo tsi ra tyin tacan tan ña nyehe ra tuhun tsihí. Tan ña nañihí ca nyivi tsi ra,

tyin cuanuhu ra tsihin Nyoo. Catyí tsi nu tutu Nyoo tyin tsa ndi cumañi ca naquihin Nyoo tsi ra, maa ñi maa cuhva taahán iñi Nyoo javaha ra.

6 Maa tyin ña cuvi javaha yo tsa taahán iñi Nyoo tatun ña tsinú iñi yo tsi ra. Tyin tatun cuñí yo nanducu yo tsi ra, cuñí tsi tsinu jihna iñi yo tyin iyó ra, tan tsahá ra tsa vaha tsi nyivi nanducú tsi ra.

7 Tahān tsanaha jacoto Nyoo tsi ra Noé náa cua cuvi ityi nuu. Vasu ndi maa ñaha ca coo can nyehé ra Noé, tsinú iñi ra tan javaha ra yutun ndoo tan ican cacú ra tsihin nyivi vehe ra. Nyivi tsa ña tyaā yahvi tsa cahān Nyoo, tatsí tuñi ra tsi ñi. Maa tyin jacacú ra tsi ra Noé tan nduvaha ra nuu ra tsa cuenda tsa tsinú iñi ra tsi ra.

8 Ra Abraham tsinú iñi ra tan tyaā yahvi ra tsi Nyoo quivi canā Nyoo tsi ra. Quitā ra nu ñuhu ra tan cuahán ra nu ñuhu tsa cua cuhva cuii Nyoo tsi ra. Vasu ndi maa ña tsitó ra nu maa cuahán ra, maa tyin quitā ra nu ñuhu ra tan cuahán ra. **9** Tsa cuenda tsa tsinú iñi ra Abraham tsi Nyoo, tsicoq ra nu ñuhu tsa ñaha ca nacuhva cuenda Nyoo tsi ra. Tsicoq ra tsitsi vehe jahma ñi. Juvín ñi tacan tsicoq tucu ra Isaac, sehe ra, tan ra Jacob, sehe ra Isaac. Tyin juvín ñi catyí tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha. **10** Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquín cuhva tsaha tsi tan samā itsi.

11 Tan juvín ñi tsa cuenda tsa tsinú iñi ña Sara tsa cahān Nyoo tsihin ña, tsicoq iin sehe ña. Vasu ndi maa tsa tsahnu xaan ña, cuví tsicoq sehe ña tyin maa Nyoo tsahā tunyee iñi ra tsi ña. Tacan cuví tyin tsinú iñi ña tyin cua cundaa tsa cahān Nyoo tsihin ña. **12** Yacan cuenda vasu ndi maa tsa cuñí cúu cuii ña ra Abraham,

maa tyin tsicoq sehe ñasihi ra. Yahā can tan tsicoq cuaha nyivi tata ra. Tan yoñi maa cuví nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

13 Tandihí nyivi can tan nyivi tata ñi tsihi ñi tsa ndi cumañi ca naquihin cuenda ñi tsa catyí Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinú iñi ñi tyin cua cuhva Nyoo can. Yacan cuenda sií cuñí ñi tyin tsitó ñi tyin coo quivi cua nyehe ñi can. Tan sií tucu cuñí ñi caahán ñi tyin yahá ñi maa ñi nu ñuhu ñayivi ihya. **14** Tan tsa caahán ñi tacan, cuñí tsi catyí tyin ndi tsicá ñi nanducú ñi iin nu vaha ca coo ñi. **15** Tun tsatyin ñuhú iñi ñi ñuu ñi nu quitā ñi, cuví cunuhu nyico ñi iin yaha ñi. **16** Maa tyin ña tsinuhu ñi ñuu ñi tyin cuñí ñi coo ñi ñuu vaha ca, tuhun ihya cuñí tsi catyí tyin cuñí ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuví ra Nyoo ñi tyin tsa janduvaha ra iin ñuu nu coo ñi.

17 Tsa cuenda tsa tsinú iñi ra Abraham tsi Nyoo, tyaā yahvi ra tsa cahān Nyoo tsihin ra tan jamañi ra tsi ra Isaac, sehe mañi ra, quivi nducu cuhva Nyoo tsi ra tun nditsa tsa tsinú iñi ra tsi ra. Javaha ra tacan vasu ndi maa catyí Nyoo tyehen tsihin ra:

18 “Tsa cuenda ra Isaac tan cua coo nyivi tata un.” **19** Vasu ndi maa cahān ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuví can tumaa tsa janandoto Nyoo tsi ra.

20 Juvín ñi tsa cuenda tsa tsinú tucu iñi ra Isaac tsi Nyoo, tan catyí ra tyin ra Jacob tan ra Esaú, sehe ra,

cua ñihi ra naha tsa vaha nu cuahán ca tsi. **21** Tsa cuenda tsa tsinú iñi ra Jacob tsi Nyoo, tan catyí ra tyin nduvi taahan sehe ra José cua ñihi ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnu ra tsi Nyoo tyin tsa tsahnu xaan ra. **22** Juvín ñi tsa cuenda tsa tsinú iñi ra José tsi Nyoo, catyí ra tsa tsa cuñí cúu ra tyin cua quita nyívi ra, ñi Israel, ñuhu Egipto. Tan tsaha cuenda tucu ra tsi nyívi tyin quívi quita ñi na quihin ñi yíqui ra cahun tsihin ñi.

23 Tsa cuenda tsa tsinú iñi jutu ra Moisés tan sihi ra tsi Nyoo, tyihí xeehe ñi tsi ra uñi yoo tyin nyehe ñi tyin sñi xaan caá ra. Ña nayuhví ñi tsa cahan ra rey tyin cuñí tsi cúu tandíhi sehe yí nyívi tsa cuenda tyin tsitó ñi tyin cua jacacu Nyoo tsi ra. **24** Tsinú tucu iñi ra Moisés tsi Nyoo. Yacan cuenda quívi tsahnu ra, ña cuñí ca ra cuví ra sehe ñaha cuví sehe ra rey ñuhu Egipto. **25** Tan nacoó ra ñuhu Egipto can tyin ña cuñí ra cusñi iñi ra tsihin tsa javaha ra tsa caquiñi. Tan nacatsí ra tsa cua nyehe ra tundoho tsihin nyívi Nyoo tan ñavin ca tsa cusñi iñi ra tsihin tsa tsindíhí ñi maa. **26** Tsa cuenda ra Moisés, vaha ca tsa cuca ra Cristo tan ñavin ca tandíhi tsa cuca tsa iyó Egipto. Yacan cuenda sñi cuñí ra nyehe ra ticanuu tsa cuenda ra Cristo tyin tsitó ra tyin cua ñihi ra tsa cua cuhva Nyoo tsi ra. **27** Juvín ñi tsa cuenda tsa tsinú iñi ra Moisés tsi Nyoo, ña nayuhví ra quita ra ñuhu Egipto, vasu ndí maa cuxaan ra rey tsi ra. Tan cunyeé xaan iñi ra tyin tumaa tsatyin nyehe ra tsi Nyoo tsa ña nyehé yo.

28 Juvín ñi tsa cuenda tsa tsinú iñi ra tava tyiñu ra na jacahnu tandíhi nyívi Israel vico tan cahñi ñi iin mbee ticatyí luhlu. Tan tava tyiñu tucu ra na cahyí ñi niñi mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu

nyívi Egipto, ña cahñi ra ndi intuhun sehe nuu maa ñi. **29** Tsa cuenda tsa tsinú iñi ñi Israel tsi Nyoo tan yaha sava ñi nu Nduya Ñuhu Cuaaha tumaa nu ñuhu ityi. Ra Egipto naha ra cuñí ndíhi tucu ra naha yaha ra naha, maa tyin ña cuví yaha ra naha tyin nacasí Nyoo ndutya ñuhu can siquí ra naha tan tsihi ra naha jaha ndutya can.

30 Juvín ñi tsa cuenda tsa tsinú iñi ñi tsico nduvi ñi utsa tsaha tsata ñuu Jericó, tan tandíhi cuii maa nu sama tsaha ñuu can taní. **31** Juvín ñi tsa cuenda tsa tsinú iñi ña Rahab, ñaha sñi iñi tsica nuu tsa tsicoó Jericó, tan ña tsihi ña quívi tsihi tandíhi nyívi ñuu ña. Ña tsihi ña tyin jatinyeé ña tsi ra Israel ra tsa tsahan naha ra tsinyehe ñuu ña. Tandíhi ca ñi tsihi ñi tsa cuenda tsa ña tyaa yahvi ñi tsi Nyoo.

32 ¿Náa ca cua cahan yu vityin? Tyin ña cuyatyí yu cahan yu tuhun tandíhi ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuví ndusu yuhu Nyoo naha ra tahan tsanaha. **33** Tsa cuenda tsa tsinú iñi ra naha tsi Nyoo, tan yihí ra naha jaha canaa ra naha tsi inga ñuu nahnu. Tan yihí ra naha vaha xaan tsindaca ñaha ra naha nyívi cuenda Nyoo. Yihí ra naha ñihí ra naha tsa catyí Nyoo tyin cuhva ra tsi ra naha. Yihí ra naha jatinyeé Nyoo tsi ra naha quívi nducú cahñi ndicaha tsi ra naha. **34** Yihí ra naha ña cayu ra naha jaha ñuhu tsitsi ono nu tyihí nyívi tsi ra naha. Yihí ra naha cacú ra naha tan ña tsahñi nyívi tsi ra naha tsihin mityi. Yihí ra naha tsaha Nyoo tunyee iñi tsi ra naha quívi nduve tunyee iñi tsicoó tsi ra naha, tan cuví cañi tahan ra naha tsihin nyívi xaan iñi tsi ra naha tan jaha canaa ra naha tsi ñi. **35** Tsicoó juhva ñiñaha, tsa nandoto nyívi.

Juhva nyívi tsinuhñi ñi tan ndoho

ñi jahá nyívi, maa tyin vasu ndi maa tacan tahan ñi, cunyeé xaan iñi ñi tan ña cuñi ñi ndoo nuña ñi. Nyívi can catyí ñi tyin tun nacoo ñi tsi Nyoo ña cua nyehe ca ñi tundoho, maa tyin ñi ican ña cuñi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayívi vaha ca. **36** Inga ñi nyehe ñi tundoho jahá nyívi tyin caahán nyaa nyívi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa. **37** Yihí ñi tsahñi nyívi tsi ñi tsihin yuu. Yihí ñi tsahnyá sava nyívi tsi ñi tsihin cierra. Yihí ñi nducu cuhva nyívi tsi ñi. Yihí ñi tsahñi nyívi tsi ñi tsihin mityi. Yihí ñi tsinditsi ñi ñi mbee ticatyí tan ñi mbee; nduve jahma vaha ñi tsicoo tan ndi nduve vehe ñi. Ndaahvi xaan tsicoo ñi, tan tsicoo xaan ñi tucuihya iñi, tan nyehe ñi tundoho jahá nyívi tsa ña tsitó tsi Nyoo. **38** Tan nyívi ndaahvi can vaha ca ñi nuu Nyoo tan ñavin ca inga ca nyívi. Tsica nuu ndaahvi ñi nu tsiqui tan nu iyó yucu. Tsicoo ñi tsitsi cava tan tsitsi ñuhu. **39** Tandíhi maa nyívi ndaahvi can vasu ndi maa vaha cahán Nyoo tuhun ñi tsa cuenda tsa tsinu iñi ñi tsi ra, maa tyin ña ñihí ñi tsa catyí ra tyin cuhva ra. **40** Tyin cuñi ra tsa ñihi ndíhi ñi tsa vaha ca tsa tyaa ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

Na cuita iñi yo tsi intuhun ñi maa ra Jesús

12 ¹ Tandíhi nyívi can quita vaha ñi nuu Nyoo tyin tsinu iñi ñi tsi ra. Tan vityin jandu iñ ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñi tsi nacoo yo tandíhi tsa jatyañú tsi yo, tan tandíhi cuatyí tsa tuhvá jandavi ñaha tsi yo. Tan na cunyeé iñi yo cuhun yo ityi nuu ca tsihin Nyoo tsihin tsa taxin iyó añima yo. ² Na nyehe yo tsi intuhun ñi maa ra

Jesús tyin juvin ra jatyinyeé tsi yo tsa tsinú iñi yo tsi ra, tan tsahá tucu ra tandíhi cuhva taahán tsi tsinu iñi yo. Ra Jesús cunyeé xaan iñi ra nyehe ra tundoho tan ña tyaa yahvi ra ticanuu tsa cua tahan ra tsa cúu ra nu cruu tumaa tsihí iin nyívi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumañi ca cúu ra, tan tsa tsitó maa ra tyin sii xaan cua cuñi ra tsa yaha cúu ra.

³ Jahá ndo cuenda cuhva tsicoo ra Jesús, tyin ra Jesús nyehe xaan ra tundoho jahá nyívi iyó cuatyí, maa tyin cunyeé iñi ra. Tacan tucu nyooho, ña cundíhi iñi ndo tan ña ndu uvi iñi ndo tsa nyicún ndo tsi ra.

⁴ Tyin nyooho ñaha ca nyehe ndo tundoho tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi. ⁵ ¿A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyeheh:

Sehe luhlu yu, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

⁶ Tyin yuhu jaquihín ityi yu tsi nyívi cuñi yu, tan tatsí tuñi yu tsi nyívi cuví sehe yu, catyí Nyoo.

⁷ Janyee ndo iñi ndo tan nducu ndo cuhva cutuhva ndo tun jaquihin ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandíhi nyívi iyó sehe, jaquihín ityi ñi tsi sehe ñi. ⁸ Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juvin sehe vaha ra cuví yo. ⁹ Tan inga tucu tuhun, tsa ndi nyihi yo, jutu yo nu ñuhu ñayívi ihya jaquihín ityi ra naha tsi yo, tan jahá yo tsa ñayívi tsi ra naha. Tan vihi ca cuñi tsi tyaa yahvi yo tsi Jutu yo Nyoo, tyin tacan tan cuví coo cuii yo. ¹⁰ Jutu yo

tsa iyó nu ñuhu ñayivi ihya, jaquihín ityi ra naha tsi yo tsa cuenda juhva ñi quivi, tan javahá ra naha can cuhva cuñí maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra. **11** Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaá yahvi yo tsa caahán Nyoo tsihin yo

12 Yacan cuenda ña ndu uvi iñi ndo tsa javaha ndo tsa cuñí Nyoo javaha ndo, tan ña nducuihya iñi ndo. **13** Ndūcu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuihya ca cua cuñi ndo.

14 Jañiñi ndo tsi ndo tan coo vaha ndo tsihin tandihí nyivi. Nacoo ndo tandihí tsa ña vaha. Tyin nyivi tsa ña nacoo tsa ña vaha ña cuvi nyehe ñi tsi Nyoo Jutu yo. **15** Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añima ndo tan ña cua tiví ndo nuu Nyoo, tyin jahá cuenda vaha ndo tsi ndo. **16** Nyooho rayii ndi intuhun ndo tan ña caca nuu ndo tsihin ñaha. Tacan tucu nyooho ñaha, ña caca nuu ndo tsihin rayii. Tan ña caca iñi ndo tyin nduve yahvi nyaá tuhun Nyoo, tumaa tsicá iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra. **17** Tsitó ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuví. Tsacu xaan ra, maa tyin ña ñihí ca ra cuhva nasama ra tsa tsa yaha javaha ra.

18 Nyooho ña taahán tsi javaha ndo tacan tyin tsaá ndo nuu Nyoo,

maa tyin ñavin tumaa tsaá nyivi Israel nuu Nyoo quivi tsahan ñi yucu Sinaí tsa cuví nyehe yo. Nyehe ñi cayu ñuhu, tan ñihi xaan yihí tatyí xaan, tan naa xaan cuví. **19** Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi **20** tsa cuenda tyin ña cunyeé iñi ñi tsa tsahá cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya cahñi ndo tsi ñi tsihin yuu o tsihin lanza, tahan ñi nyivi tan quití”, catyí Nyoo tsihin ñi. **21** Nayuhví xaan ñi tsa nyehe ñi yacan, nda cuanda ra Moisés tan catyí ra: “Ñihi xaan nihí yu jahá tsa yuuhví yu”, catyí ra.

22 Maa tyin nyooho ña nyehe ndo tsa yuuhví can tyin tsaá ndo yucu nañí Sión tsa cuví ñuu Nyoo nyito. Tuhun ihya cuñi tsi catyí ñuu Jerusalén tsa canyí nda gloria, nu iyó cuenda mil ángel. **23** Ndu iín ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhva ndo nuu Nyoo, ra cuví juee tsa jandaa cuatyí tandihí nyivi, tan natuhva ndo nuu tandihí añima nyivi vaha tsa janduvaha Nyoo. **24** Natuhva tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoo Nyoo tuhun tsaá tsihin yo. Tan niñi ra Jesús tsa tsatí tsahá tsa vaha ca tsi yo tan ñavin ca niñi ra Abel. Tyin niñi ra Abel tsican tsi cuatyí tsaha ra yañi ra. Maa tyin niñi ra Jesús, jahá tucahnu iñi cuatyí yo.

25 Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahan Nyoo quivi cahan ra yucu Sinaí nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuvi maa cacu yo. **26** Tahan

tsanaha jacanda Nyoo ñuhu ñayivi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihi yu nda cuanda andivi.” **27** Tsa caahán ra tyin cua jacanda ra inga tsaha, cuví cutuñi iñi yo tyin cua catsiyo tandihi tsa javaha ra tsa cuví nacanda. Tan cua ndoo tsa ña cuví nacanda. **28** Nu ndacá ñaha Nyoo nu tsahá ra cunyecu yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa ñi iñi aña yu, tan tyaa yahvi yo tsi ra, tyin yacan cuví tsa taahán iñi ra. **29** Tyin Nyoo yo cuví ra tumaa ñuhú tsa tsahmí, tan cua janaa ra tandihi maa tsa ña vaha.

Na coo yo cuhva taahán iñi Nyoo

13 **1** Ña jandihí ndo tsa cuñí ndo tsi tandihí nyivi yihí cuenda Nyoo tyin cuví ñi tumaa nyivi ndo. **2** Ña ña iñi ndo tyaa nuu vaha ndo tsi nyivi tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javaha juhva nyivi. **3** Ña ña iñi ndo tsi nyivi yucú vehe caa tumaa tsatyin yucú ndihí ndo tsihin ñi. Ndúchun iñi ndo tsi nyivi nyehé tundoho jahá nyivi. Cúndaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñí yo tun nyehe yo tundoho. **4** Nyooho nyivi tsa tsa tindaha, jaha tahan ndo tsa ñayivi tsi iin ndo tan tsi inga ndo. Tan cpo vaha ndo tyin Nyoo cua tatsi tuñi ra tsi rayi tsicá nuu tsihin naha tan rayi iyó ñasihi tun coo ra tsihin inga ñaha. Tan juven ñi cua tatsi tuñi tucu ra tsi ñaha tsicá nuu tsihin rayi tan ñaha tsa iyó yi tun coo ña tsihin inga rayi.

5 Ña caca iñi ndo nácaa javaha

ndo tan cuvi coo cuaha ca xuhun tsi ndo. Ndoo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra.

6 Tsa cuenda yacan cuví caahán yo tyehen tsihin tsa ñi iñi aña yu:

Jutu Mañi yu juven un jatyinyeé tsi yu,

Yacan cuenda ña yuuhví yu tun javahá nyivi náa javahá ñi tsi yu.

7 Ndúchun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cpanyicun ndo cuhva vaha tsinú iñi ra naha tsi Nyoo.

8 Ra Jesucristo ña nasamá ra.

Juvin ra iyó nda tsanaha, tan juven ra iyó vityin. Tan juven ra cua coo yoso cuahán quivi. **9** Ña cuhva ndo jandavi ñaha nyivi tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo aña yu, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatyinyeé can ndi tsi maa ñi.

10 Tsatiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha. **11** Ra jutu tsahnu cuví ityi nuu cuenda nyivi Israel tsindacá ra naha niñi quití tsitsi Vehe li Xaan tsa cuenda cuatyí nyivi, maa tyin cuñu ti tuhvá can cayú ityi tsata ñuu. **12** Tacan tucu ra Jesús, tava tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin niñi ra. **13** Na cunyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo. **14** Tyin tsa cuenda yoo nduve ñuu tsa ña cua cundihí maa nu ñuhu ñayivi ihya. Yacan

cuenda nanducú yo iin ñuu tsa cua
quitsi, tsa yaha naa ñuhu ñayivi ihya.

15 Yacan cuenda vityin tsa iyó ra
Cristo añima yo, taahán tsi jañiñi yo
tsi yo tan jacahnu yo tsi Nyoo tshin
tsa cata yo yaa ra, tan tshin tsa
caahán yo. **16** Ña naa iñi ndo javaha
ndo tsa vaha. Tan jatyinyee tahan
ndo tsi ndo tshin tsa iyó tsi ndo, tyin
yacan cuví tsa taahán iñi Nyoo.

17 Tyaa yahvi ndo tsi ra jaquihín
ityi tsi ndo naha ra; cuhva ndo tsi
ndo cundaca ñaha ra naha tyin juven
ra naha jahá cuenda añima ndo. Tan
coo quivi cua cuhva cuenda ra naha
tyiñu jahá ra naha tsi Nyoo. Nducu
ndo cuhva javaha ndo tsa vaha, tyin
tacan tan sii cua cuñi ra naha cuhva
cuenda ra naha tsi ndo tsi Nyoo. Maa
tyin tun ña javahá ndo tsa vaha, cua
cuhva cuenda ra naha tsi ndo tsi
Nyoo tshin tucuihya iñi, tan ña cua
quita vaha ndo nuu ra.

18 Ndacan tahvi ndo tsi Nyoo tsa
cuenda ndi tyin tsitó ndi tyin vaha
cuahán ndi tshin ra, tyin maa ñi maa
tsa vaha cuñi ndi javaha ndi. **19** Tan
tsicán yu tsa ndacan tahvi tucu ndo
tsa cuenda yu na cuhva Nyoo quitsi
yu inga tsaha tsa numi ñi nu yucú
ndo tan cunyi yu tshin ndo.

Nu ndihí cahán ra tan tsahá ra nacumi tsi ñi

20 Jutu Mañi yo Jesucristo tsa
janandoto Nyoo, ra tsahá tsa taxin
coo añima yo, juven ra jahá cuenda
tsi yo tsa cuví yo tumaa mbee jana
ra. Tshin niñi ra Cristo tsa tsati, ndo
Nyoo tuhun tsa tsa ña cua cundihi
maa tshin yo. **21** Tandihí tsa cuñi
Nyoo javahá ra tshin tandihí yo, maa
ra Jesucristo javahá can jahá ra. Tan
na javaha ra tshin yo tsa cuñi ra
javaha ra. ¡Na jacahnu yo tsi ra Cristo
yoso cuahán quivi! ¡Na cuví tsi tacan
ñi!

22 Yañi, caahán ndaahvi yu tshin
ndo; janyee ndo iñi ndo tan javaha
ndo tsa tsahá cuenda yu tsi ndo tshin
tsa taxin iyó añima ndo, tyin ña
cuaha xaan tuhun tyaa yu tsa cuenda
ndo. **23** Cuñi yu tsa coto ndo tyin ra
Timoteo, yañi yo, tsa quitá ra vehe
caa. Tatun yatyi tsa ra, cua quitsi ra
tshin yu na quitsi yu quitsi nyehe yu
nu yucú ndo.

24 Cuhva ndo nacumi tsi tandihí ra
jaquihín ityi tsi ndo, tan tsi tandihí
nyivi yihí cuenda ra Cristo. Nyivi
Italia nu nyí yu, tsahá ñi nacumi tsi
ndo.

25 Tan na nasoco Nyoo tsi tandihí
ndo. Na cuví tsi tacan ñi.

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

Nu tshá ra Santiago nacumi tsi nyivi

1 ¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandíhi nyoocho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

Tsa tsiñi tuñi tsa tshá Nyoo tsi yo

² Yañi, cusíi ñiñi ndo tun cuaha tundoho nyehé ndo. ³ Tyin tsitó ndo tyin tsihin tsa nyehé ndo tundoho tan cua cuahnu ca ndo tsihin tsa tsinú ñiñi ndo. Tan cua cunyeé ñiñi ndo nyehe ndo náa ndíhi ca tundoho vatsí síqui ndo. ⁴ Jañá ndo na quitsi maa tundoho can síqui ndo, tyin tun tsa cunyeé ñiñi ndo yahá ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandíhi maa tundoho tsa cua quitsi síqui ndo.

⁵ Ndáa nyoocho cumañi tsa tsiñi tuñi tsi, ndácan ndo itsi tsi Nyoo, tan Nyoo cua cuhva ra itsi tsi ndo, tyin maa ra tshá ra tsa tsicán tandíhi nyivi tan ña tuhvá ra tyicuhvá itsi, tan ndí ña cuxaán ra tsi ñiñi tun tsicán ñiñi náa tsicán ñiñi tsi ra. ⁶ Maa tyin cuñí tsi ndácan yo itsi tsihin tsa tsinú vaha ñiñi yo. Tan ña caca ñiñi yo tyin ña cua cuhva ra itsi tsi yo. Tyin tun caca ñiñi yo tyin ña cua ñiñi yo tsa tsicán yo, cuví yo tumaa ndutya ñuhu tsa tandahá tatyí ityí ihya tan ityí can. ⁷ Ra tsa javahá tacan, ña taahán tsi caca ñiñi ra tyin cua cuhva Nyoo tsa tsicán ra. ⁸ Tyin uvi xaan tsicá ñiñi ra. Ña tyaá ñiñi ra tsa tsicán ra, tyin ña

iin cuñí ra. Vityin cuñí ra tsa cuñí ra, tan inga tsa cuñi tucu ra tyaan.

⁹ Tatun iyó iin ra yañi yo, ndaahvi ra, na cusíi ñiñi ra tyin cahnu cuví ra jahá Nyoo. ¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusíi ñiñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñiñi cucuyó can. ¹¹ Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndíhi tsa síi caá can. Tan tacan cuví ra cuca, tyin cua quitsi tuhun tsihi tsi ra tan cua cundíhi tsa cuca ra.

Nacaa cunyeé ñiñi yo nyehé yo tundoho

¹² Síi xaan cuví tsi ra tsa cua cunyeé ñiñi nyehe tundoho tyin tsa yaha nyehe ra tundoho cua ñiñi ra ñayivi nyito tsa catyí Nyoo tyin cuhva ra tsi ñiñi tsa cuñí tsi ra. ¹³ Tatun ndáa nyoocho tsicá ñiñi ndo tsa javaha ndo tsa ña vaha, ña cuñi ndo tyin Nyoo tshá tsa caca ñiñi ndo tacan. Tyin Nyoo ña tsicá ñiñi ra javaha ra tsa ña vaha. Tan ndí ña tyuhú ra tsi yo tsa javaha yo tsa ña vaha. ¹⁴ Maa tyin nyoocho tsa javahá tsa ña vaha, javahá ndo can tyin cuñí ndo javaha ndo can. Tan yacan cuenda tsicoó cuatyí ndo.

¹⁵ Tatun cua cuhva yo tsa caca ñiñi yo tuhun ña vaha, coo quivi cua javaha yo cuhva tsicá ñiñi yo tan cua coo cuatyí yo. Tan tatun maa ñiñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

¹⁶ Yañi, cuñí xaan yu tsi ndo. Ña jandavi ñaha ndo tsi ndo. ¹⁷ Tandíhi tsa vaha tan tsa vii tsa ñiñi yo, queé

tsi ityi siqui tyin maa Nyoo Jutu yo tsahá itsi. Tan maa ra javahá ñuhú tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. **18** Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñí maa ra.

Ityi nditsa tsa taahán tsi cuhun yo

19 Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo. **20** Tyin nyivi tsa cuxaán, ña javahá ñi tsa taahán iñi Nyoo. **21** Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tñin cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. **22** Javaha ndo cuhva caahán tuhun Nyoo, tan ña tyaa soho ñi maa ndo itsi, tyin tatun tyaa soho ñi maa ndo itsi juvin ñi tsi maa ndo jandaví ñaha ndo. **23** Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu. **24** Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. **25** Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuví tsi ñi ican tan cua quita vaha tandihí tsa javahá ñi. **26** Tan nyivi tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi. **27** Tyin tsa cuenda Nyoo, nyivi tsa nditsa tsinú iñi tsi ra juvin ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihi yíi, tan jahá cuenda ñi tsi tsa nyihi tsa nduve

ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

Na inducu ñi cuñi yo tsi nyivi tyin ña siin caá intuhun ñi tan inga ñi

2 ¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi. **2-3** Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyyaa nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsí ra jahma tyaahnyá, tan catyi ndo tsihin ra, “cunyyaa nyityi juvin o cunyyaa nu ñuhu ihya”. **4** Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

5 Yañi tsa cuñi xaan yu, tyaa soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyivi tsa cuñi tsi ra. **6** Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu? **7** Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

8 Ley Nyoo tsa ñiñi ca catyí tsi: “Cuñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyí ley can, vaha javahá ndo. **9** Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyí ley Nyoo tyin iyó cuatyí nyivi javahá tacan. **10** Tyin tatun iin nyivi tsa tyaá yahvi tandihí ley, tan ña tyaa yahvi ñi intuhun tsi, cuví tsi tumaa tsa ña tyaá

yahvi ñi tandihi ley. **11** Tyin Nyoo catyí ra tyin ña coo inga ñaha tsi rayí, tun iyó ñasihi ra. Tacan tucu ñiñaha, tsa iyó yí, ña cuví coo inga rayí tsi ñi. Tan juvin ñi catyí tucu ra tyin ña cahñi yo nyívi. Yacan cuenda tatun iin ra nduve inga ñaha tsi ra, maa tyin tsahñi ra iin nyívi, juvin ñi ña tyaá yahvi ra tsa catyí ley. **12** Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo.

13 Tyin nyívi tsa ña cundaahví iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahví iñi tsi inga ñi, cua quita vaha ñi quívi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

14 Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? **15** Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahñan ra yuvehe, **16** Maa tyin yooho ña tsahñan un jahma ra tan ndi tsa catsi ra tan catyí un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahñan un tacan tyin ña tsahñan un tsa tsiñi ñuhu tsi ra. **17** Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyívi, nduve yahvi nyaá catyí yo tyin tsinú iñi yo.

18 Yihí ndo cua catyi ndo: “Yooho tsinú iñi un tsi Nyoo tan yuhu javahá yo tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyi yo tyin juvin ñi cahan cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yo tun ña javaha un tsa vaha. Maa tyin yuhu cuví janahá yo tsa tsinú iñi yo tsi

Nyoo tsi un tsihin tsa javahá yo tsa vaha. **19** Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda ñihí nahnu tsihin tsa yuuhví nahnu tyin ña cua cacu nahnu. **20** Ña soho xaan caca iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo. **21** Ra Abraham, tsi tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra. **22** Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyí ra tsihin ra tyin javaha ra. Tan tsa javahá ra yacan, quituví vaha tsa tsinú iñi ra tsi Nyoo. **23** Tacan tan cundañan tsa catyí nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

24 Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. **25** Tan tacan tucu ña Rahab tsa tsicá nuu tsihin rayí. Yahá tsa javahá ña cuatyí, javahá ña tsa vaha quívi tsahñan ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cuhun ra naha inga ityi. Tan tsa cuenda yacan, catyí Nyoo tyin vaha ña. **26** Tan tacan tucu cuví cuñi ñuhu nyívi. Tatun nduve ca tsa nyitó ñi iyó tsitsi cuñi ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

Nacaa jaha cuenda yo cuhva caahán yo

3 ¹ Nyooho yañi, ña yatyi xaan cuñi ndo cuví ndo ra cahan tuhun Nyoo. Tyin tsitó ndo tyin nyuhu tsa

caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo. **2** Tyin tandihi maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juven ra cuví ra vaha tyin cuví ndaca ñaha ra nanih cahnu cuñu ñuhu ra. **3** Tumaa ra tsa tyihí yoho yuhu cuayu cuví ndaca ñaha ra tsi tí, vasu ndi maa cahnu tí. **4** Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñí maa ra, vasu ñihi xaan yihí tatyí. **5** Tan tacan tucu yaa yo, luhlu xaan tsi. Maa tyin cuaha tsa caquiñi cuví cahan yo tsihin tsi. Tumaa nu natiñin iin ñuhú luhlu iin huhu cahnu tan cayu tandihi maa yutun. **6** Tacan tucu yaa yo cuví tsi tumaa iin ñuhú luhlu. Tan cuví tucu tsi tumaa iin tsa quiñi cahnu tsa jativí tsi nanih cahnu cuñu ñuhu yo tan tandihi cuhva iyó yo ñayivi ihya, tyin juven ñi maa nu ña vaha natyuhú itsi. **7** Nyivi cuví jandumasu ñi tandihi maa nuu quiñi tsa iyó: saa, coo, tan quiñi tsa iyó tsitsi ndutya ñuhu. **8** Maa tyin yoñi cuví jandumasu yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí tí venenu tí tsi nyivi, tan tsihih ñi. Tacan cuví yaa yo. **9** Tyin juven ñi tsihin yaa yo jacahnú yo tsi Nyoo Jutu yo. Tan juven ñi tsihin can caahán tucu yo ndavaha ñi siqui nyivi tsa javahá Nyoo tumaa caá maa ra. **10** Juvén ñi tsihin yuhu yo jacahnú yo tsi Nyoo. Tan juven ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan. **11** Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví. **12** Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

13 Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo. **14** Maa tyin tatun nyiyo iñi ndo tsitsi añima ndo tan cuñí xaan ndo nduvaha ndo nu nyivi, ña cahnu jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can. **15** Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyivi ña tsitó tsi Nyoo tan cuhva tsica iñi nu ña vaha cuví can. **16** Tyin tatun nyiyó iñi ndo tan cuñí ndo nduvaha ndo nuu nyivi, ticaña xaan tsicá iñi ndo. Tan iyó tucu tandihi inga nuu tsa ña vaha nu yucú ndo. **17** Maa tyin tatun iyó tsa tsiñi tuñi Nyoo tsi ndo, cuiñi iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha tsicá iñi ndo, tan cundaahví iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa ñi iñi ndo. **18** Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuiñi.

Ña taahán tsi javaha yo cuhva cuñi cuñu ñuhu yo

4 ¹ ¿Nacuenda iyó tsihih nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha. **2** Iyó tsaha nda cuanda tsahñi ndo nyivi tyin cuñí ndo tsa cuñí ndo tan ña ñihí ndo can. Tatun nyehé ndo náa cuví can nyehé ndo, nyiyó iñi ndo can tan tsa ña ñihi ndo can quitsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo. **3** Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jativí

ndo can tsihin tsa taahán iñi ndo.
4 ¿Nacuenda javahá ndo cuhva cuñi nyivi, nyooho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuñi nyivi, ñi xaan iñi tsi Nyoo cuví yo? **5** Tan yacan iyó cuenda catyí nu tutu Nyoo tyin Tatyí li tsa tsahá ra coo añima yo, cuñi xaan tsi tsi yo tan cuiñu xaan tsi tsi yo tyin cuñi tsi tsa jacahnu yo tsi intuhun ñi maa ra. **6** Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyí ra tyin jatyinyeé ca ra tsi nyivi ndaahvi tsa tsitó tyin tsiñi ñuhu ra tsi ñi. Tan ña cuñi ra nyehe ra tsi ra tsa cahnu jahá tsi.
7 Yacan nacuhva vaha ndo tsi ndo tsi Nyoo. Ña tyaa yahvi ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehe nu tsi ndo. **8** Ndūcu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyooho, nyivi iyó cuatyí, jandundii ndo tsi ndo. Tan nyooho tsa tsicá iñi tyin cuví javaha ndo tsa iyó nu ñuhu ñayivi ihya tan juvin ñi cuhva can tan jacahnu tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundii ndo nuu ra.
9 Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sii cuñi ndo, vacu ndo tsihin tsa cuiihya cuñi ndo. Tan tsa sii cuñi ndo na nanduvi tsi tucuiihya iñi.
10 Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

Ña cahan nyaa ndo tsi nyivi

11 Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa

tyaá yahvi yo tsa caahán ley can.
12 Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan ¿yooho yóo ra cuví un tyin cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuví tsi yo tyaan, yacan cuenda ña taahán tsi cahnu jaha yo tsi yo

13 Yihí ndo catyí ndo: “Vityin o tyaan cahun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaa soho ndo tsa cua cahan yu ihya:
14 Ñayivi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuví tyaan tan catyí ndo tyin cahun ndo. **15** Vaha ca cahan ndo tyehen: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.” **16** Maa tyin nyooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan. **17** Tyin yoo tsa tsitó javaha tsa vaha tan ña javahá yo can, tsicoó cuatyí yo.

Nu tsahá cuenda ra Santiago náa cua tahan nyivi cuca

5 ¹ ¿Tyaa soho ndo tuhun caahán yu ihya, nyooho nyivi cuca! Vacu ndo tsihin tsa cuiihya cuñi ndo, cana tsa ndo tsa cuenda tundoho tsa cua nyehe ndo. **2** Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsi tiquixin. **3** Xuhun cuaan tan xuhun cuitsin ndo tsa ndihi can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuví tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihi quivi ihya?

4 Tan ña tyahví ndo yahvi tsa taahán tsi tsi nyívi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandíhi ángel tsa cuví andaru cuenda ra. Tan maa Jutu Mañi yo tsiñí ra tuhun caahán ñi ndaahvi can. 5 Iyó vaha xaan ndo nu ñuhu ñayívi ihya tyin cuca ndo. Tan javahá ndo cuhva cuñí maa ndo. Tumaa tuhvá nyívi janduxaahán quíni tyin cuu ti, tacan javahá ndo tsihin ndo. Tan vityin tsa tsaa quívi tsa cua cuu ndo. 6 Tyin tyaa ndo cuatyí tsaha nyívi vaha tan tsahñi ndo tsi ñi. Tan ndi ña cahan ñi cuatyí siquí ndo.

Na cunyeé iñi yo cuatu yo tsi ra Cristo

7 Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi huhu ndatú ra nda cuun savi tsa jihna tan nda ndíhi cuun nyico tsi, tan naquihin ra tsa tatsí ra. 8 Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

9 Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñí quitsi ra. 10 Yañi, quihin cuenda ndo cuhva tsicoo ra cuví ndusu yuhu Nyoo tahañ tsanaha. Tyin ra ican naha ra cunyeé xaan iñi ra naha nyehé ra naha tundoho quívi tsaha cuenda ra naha tuhun Jutu Mañi yo. 11 Tsitó yo tyin sñi xaan cuñí ra tsa cunyeé iñi nyehé tandíhi nuu tundoho, tumaa tsa cunyeé xaan iñi ra Job nyehé ra tundoho. Tan nu ndíhi ña, cuaha xaan tsa vaha tsaha Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehé ra tsi yo. 12 Maa tyin yañi, ña cahan ndo:

“Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javahá ñuhu ñayívi”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” catyí ndo. Maa tyin tatun tsitó ndo tyin ña nditsa, catyí ndo tyin “ña nditsa”, coto tatsi tuñi Nyoo tsi ndo.

13 Tun ndáa nyoooho nyehé tundoho, ndacan tahvi ndo tsi Nyoo. Tan nyoooho tsa sñi cuñí, cata ndo yaa Nyoo. 14 Tan nyoooho tsa cuuhví, caha ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo. 15 Tan tatun tsinú iñi ra naha tsi Nyoo cuhva tsa tsicán tahvi ra naha, nyívi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoo ñi cuatyí, Nyoo cua jaha ra tucahnu iñi tsi ñi. 16 Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyívi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. 17 Tumaa ra Elías ra cuví ndusu yuhu Nyoo tahañ tsanaha. Cuví ra iin rayí tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. 18 Yahá can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsí nyívi.

19 Yañi, tatun iin nyívi tahan ndo nacoo ñi tuhun nditsa Jutu Mañi yo, tan cuanuhu ñi ñayívi inga tsaha, tan jatyinyeé ndo tsi ñi tsa nanducu nyico ñi ityi Nyoo, 20 coto ndo tyin tsa javahá ndo tacan tsihin ñi, jacacu ndo añima ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihí Cuenda Nyoo

Nu quitsahā tyaá ra Pedro carta tsa cuenda nyivi yihí cuenda Nyoo

1 ¹ Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví. ² Tyin nda tsanaha tan nacatsj vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsj ra tsi ndo, jatyinyee Tatyí Ii ra tsi ndo tan nacuhva ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tsihin ñiñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsa coo yo

³ Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsa yo inga tsaha tyin janandotó ra tsi ra Jesucristo. Yacan cuenda cuita iñi yo tyin cua ñihi yo ñayivi tsa tsa ña cua naa maa. ⁴ Tan tsa cuenda tsa nacacu tsa yo, Nyoo cua cuhva ra tandíhi tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita. ⁵ Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndíhi cacu yo. Tan cua janaha ra tsi yo náa cuñi tsi catyi tsa cacú yo nu cua ndíhi tyembu tyin tsa ndatú vaha can tsi yo.

⁶ Yacan cuenda sii cuñi ndo, vasu ndi maa nyehé ndo tandíhi nuu tundoho juhva quivi vityin. ⁷ Tyin tandíhi maa tundoho can tan taahán tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. Tyin tsa tsinú iñi yo cuví tsi tumaa xuhun cuaan, Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindíhi ñi maa can. Maa tyin tun ña jandíhi yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

⁸ Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sii xaan sii xaan cuñi ndo nda cuanda ña cuví ñihi ndo cuhva catyí ndo najava cuhva tsa sii cuñi ndo, ⁹ tyin nu ndíhi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

¹⁰ Ra ndusu yuhu Nyoo tsa tsicoo tahan tsanaha nducú tuhun ra naha nácaa cua cacu yo. Tan nducú ra naha cuhva coto ra naha náa cuví tsi. Tyaa ra naha nu tutu cuenda tsa vaha tsa cua cuhva Nyoo tsi yo. ¹¹ Tan Tatyí Ii ra Cristo tsa iyó tsihin ra naha jacotó tsi tsi ra naha náa ndíhi tundoho cua nyehe ra Cristo, tan nácaa cua jacahnu Nyoo tsi ra. Tan nducú xaan ra naha cuhva coto ra naha yóo ra cua cuví ra Cristo tsa cua tahan tacan, tan ama

cua cuvi tuhun tsa catyí Tatyí li tsihin ra naha. **12** Maa tyin jacoto Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandíhi tsa cahān ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahān tuhun ihya naha ra, maa Tatyí li Nyoo jacahān tsi ra naha. Tan ra ángel naha ra cuñí xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiti

13 Yacan cuenda jahā vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. **14** Coo ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoo ndo quivi tsa ndi cumañi ca nacoto ndo tsi Nyoo tyin tsanaha tsindacā ñaha tsa ña vaha tsa cuñí cuñu ñuhu ndo tsi ndo. **15** Maa tyin vityin coo ndo ñayivi cuiti tyin maa Nyoo, ra tsa canā tsi ndo, cuiti iyó ra. **16** Tyin tacan catyí ra nu tutu ra: “Cuiti coo ndo tyin maa yo cuiti iyó yu”, catyí Nyoo.

17 Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jahā cuenda ndo tsi ndo tan jahā ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuvi yo nyivi cuca, an nyivi ndaahvi. **18** Nyoo nasama ra cuhva tsa ña vaha tsicoo ndo, cuhva tsa janahā tsi saahnu ndo tsi ndo. Tan tsitó vaha ndo tyin ñavin tsihin xuhun cuan o xuhun cuitsin tsa tsindíhí ñi maa tyahvi ra tan cacú yo, **19** tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe tsa tuhvá nyivi Israel jamañi nuu Nyoo, tan tsihi ra

vasu ndi maa nduve cuatyí ra. **20** Tsa ndi cumañi ca tsinu ñuhu ñayivi tsinyaā cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuanda vityin nu cua ndíhi quivi, cuví tandíhi can tsa cuenda tsa vaha tsi maa yo. **21** Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yaha tsihi ra tan jacahnú ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

22 Tsihin tunyee iñi Tatyí iin Nyoo tyaá yahvi ndo tuhun nditsa. Tan tsa ndundíi ndo jahā Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa ñi iñi ndo, tan tsihin tandíhi tunyee iñi tsa iyó tsi ndo. **23** Tyin tsa nacacú tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacú ra naha jahā sihi ra naha tan tsihi ra naha. Tan nyooho vityin nacacú tsa ndo tsihin Nyoo tsa ña cua cundíhi maa, tyin tacan ñi cua coo maa tsi. **24** Tyin catyí tuhun Nyoo tyehen:

Tandíhi nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyó ita can. Tacan cuví nyivi, tyin iin yaha ñi tsihi ñi.

25 Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2 ¹ Yacan cuenda nacoo ndo tandíhi nuu tsa caquiñi. Ña jandavi ñaha ndo tsi nyivi, ña jahā ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi

inga nyívi, ña cahan ca ndo cuendu. **2** Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuanda ndíhi cacu ndo, **3** tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

4 Cunyaa naa ndo tsi Jutu Mañi yo. Tyin juvin ra cuví yuu nyito tsa ña cuñi nyívi cuatyíñu ñi. Maa tyin Nyoo nacatsi ra tsi Jutu Mañi yo tyin juvin ra cuví yuu sií caá tsa yahvi nyaá tsa cuenda ra. **5** Tatun nya naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nya naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sií xaan cua cuñi ra. **6** Tyin catyí tucu nu tutu ra tyehen:

Yuhu nacatsi yu iin yuu tsa tsiñi ñuhu ca tan sií ca caá, tan tsaquín yu yuu can nu cua javaha yu vehe yu nda Sión.

Tan nyívi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

7 Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyívi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyíñu ra, yacan cuví yuu tsa tsiñi ñuhu ca, catyí tsi.

8 Tan catyí tucu tsi:

Ra ican cuví yuu tsa cuaha xaan nyívi cua nañi tsaha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyívi can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

Nyívi yihí cuenda Nyoo

9 Maa tyin nyooho cuví ndo nyívi nacatsi maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyívi ii ityi nuu ra tan cuví ndo nyívi maa ra, tacan tan cahan ndo tuhun vaha tsa javahá ra. Tyin juvin ra tavá tsi yo nu naa tan tyihí ra tsi yo nu nditsin tan nu sií caá. **10** Tsa ndi cumañi ca cuví ndo nyívi Nyoo, nduve yahvi nyaá ndo. Maa tyin vityin nyívi Nyoo cuví ndo. Quiví can yoñi cundaahví iñi tsi ndo, maa tyin vityin Nyoo cundaahví iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

11 Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayívi cuví ndo, tyin nda gloria cuví ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo. **12** Jaha cuenda ndo tsi ndo nu iyó ndo tyañu nyívi tsa ña tsitó tsi Nyoo. Tyin vasu caahán ñi ndavaha ñi siquí ndo, tan catyí ñi tyin ña vaha ndo, maa tyin quívi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

13 Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca, **14** a iin ra jaquitsi ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha. **15** Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyívi soho tan nyívi ña tsitó náa cahan ñi siquí yo.

16 Coo ndo tumaa iyó nyívi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra. 17 Jaha ndo tsa ñayívi tsi tandíhi ñi nyívi. Cuiñi ndo tsi ñi yíhi cuenda Nyoo. Jaha ndo tsa ñayívi tsi ra ndacá ñaha, tyin Nyoo nyehé ra tandíhi tsa javahá yo.

Uvi taahan cuhva nyehé yo tundoho

18 Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha. 19 Tyin tatun cunyeé iñi yo nyehé yo tundoho tsa janyehé nyívi tsi yo tsa cuenda tsa javahá yo tsa vaha nu Nyoo, cua tsaa can nuu ra. 20 Maa tyin tatun tatsí tuñi nyívi tsi ndo tsa cuenda tsa javahá ndo tsa ña vaha tan cunyeé iñi ndo nyehe ndo tundoho, nduve náa catyi. Maa tyin tatun ña cundihi iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo. 21 Tumaa tsa nyehe maa ra Cristo tundoho tsa cuenda yo, tacan taahán tsi cunyeé iñi yo nyehe yo tundoho tyin tsa cuenda yacan cana Nyoo tsi yo. 22 Ra Cristo ndi intuhun cuatyí ña javaha ra. Tan ndi iin tsaha tan ña jandaví ñaha ra tsi nyívi. 23 Quívi jacuñi nyaa ñi tsi ra, ña jacuñi nyaa ra tsi ñi. Quívi tsa janyehé ñi tundoho tsi ra ña jayuhvi ra tsi ñi. Tyin intuhun ñi maa Nyoo cuví ra tuhvá jacutuñi tsi nyívi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo. 24 Tyin cuhva tsa ticaá ra Cristo nu cruu can, tsicoso tandíhi cuii maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayívi cuií. Tyin tsihin tsa ñicueehé ra, tan nduvahá yo. 25 Tyin quívi can tsicá nuu yo cuví yo tumaa mbee tsa ndoq ihñi, tsa nduve tsitoho. Maa tyin vityin nacuhvá cuenda yo

tsi yo tsi ra Cristo, tan jahá cuenda ra añima yo. Cuví ra ityi nuu tsihin yo.

Nacaa taahán tsi coo nyívi tindaha

3¹ Tacan tucu nyooho, ñiñaha tsa iyó yí. Tyaa yahvi ndo tsi yí ndo tyin tatun ña tsinú iñi ra tsi ra Cristo, cua tsinu ndíhi iñi ra tsi ra Cristo tsihin cuhva javahá ñi ndo tyin nyehe ra tyin vaha tsahá ndo tsa quíhi ndaha ra tsi ndo. Tan ña cuiñ tsi cuaha xaan cahan ndo tsihin ra, 2 tyin nyehé ra tyin catsi iyó ndo tan jahá ndo tsa ñayívi tsi ra. 3 Ña çaça xaan iñi ndo janduvaha ndo tsi ndo ityi tsata ñi, tyin ña ñiñi xaan cuiñ tsi tsa iyo xaan janduvaha ndo jiñi ndo, tan cuatyíñu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandíhi yacan. 4 Maa tyin jandutyacuí ndo tsi ndo tsihin tsa quitá añima ndo tyin tun cuií iyó yo tan vita iñi yo, tan taxin iyó yo, yacan cuví tsa sñ ca caá nuu Nyoo. Tan ña cua tiví maa can. 5 Tyin tsihin tsehe ndutyacuí ñiñaha tsa nacoto tsi Nyoo, ñi tsa tsicoq tahán tsanaha. Nyitá iñi ñi tsi Nyoo tan tyaa yahvi ñi tsi yí ñi. 6 Tumaa ña Sara, tyaa yahvi ña tsi ra Abraham yí ña. Tan catyí ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuví ndo tumaa maa ña.

7 Tan tacan tucu nyooho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayívi tsi ñi tsa cuenda tsa vita ca cuiñ ñuhu ñi tan ñavin ca cuiñ ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayívi iyó ndo. Javaha ndo tyehen tyin tacan tan tiin cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

8 Nu ndíhi tuhun, iin ñi cuhva çaça iñi tandíhi ndo. Cundaahvi tahan iñi

ndo tsi ndo. Cũñi tahan ndo tsi ndo tumaa tsa cuñí ndo tsi yañi ndo tsa cacu tsihin ndo. Vita cahan ndo tsihin tahan ndo, tan ña cahnu jaha ndo tsi ndo; cuvi ndo nyivi vaha. **9** Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña cahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo. **10** Tyin tuhun Nyoo catyí tsi tyeheh:

Nyivi tsa cuñí coo ñayivi tsihin tsa sii,
cuñí tsi jaha ñi cuenda yaa ñi,
tan ña cahan ñi tsa ndavaha ñi,
tan ndi ña cahan ñi cuendu.

11 Jandihí ndo tsa javahá ndo tsa ña vaha, tan javaha ndo tsa vaha.

Nducu ndo cuhva coo taxin ndo, tan coo ndo tacan.

12 Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñí ra nyehé ra tsi ñi.

13 Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo. **14** Cusiñi ñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo. **15** Jacahnu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caca ñi ndo tuhun Nyoo tyin tatun ndaca tuhun nyivi tsi ndo nacuenta tsinú ñi ndo tsi ra, cuvi cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi. **16** Catsi coo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda

tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa cahan ñi siqui ndo.

17 Vaha ca nyehé yo tundoho tsa cuenda tsa javahá yo tsa vaha tatun Nyoo cuñí, tan ñavin ca tsa nyehe yo tundoho cuenda tsa ña vaha. **18** Tyin ra Cristo nyehe ra tundoho tan tsihi ra iin tsaha ñi tsa cuenda cuatyin tandihí yo. Ra vaha cuví ra maa tyin nyehe ra tundoho tan tsihi ra tsa cuenda yo tsa cuví yo nyivi caquiñi, tyin tacan tan cuvi tsaá yo nu nyaá Nyoo. Tsihi cuñu ñuhu ra, maa tyin nandoto nyico ra tsihin Tatyí li ra.

19 Tacan tan tsihin Tatyí li ra tsahan ra tsicahan ra tsihin añima nyivi tsa yucú anyaya. **20** Tan ñi ican cuví ñi tsa ña tyaá yahvi tsi Nyoo quivi tsicoo ra Noé tahan tsanaha, tyin ñi tsinú yutun ndoo tacan tsa ndatu Nyoo tsa ndu uvi ñi ñi cuatyí ñi. Maa tyin ña cuaha ñi cacu quivi cuun savi cahnu tsa tsahñi ndutya ñuhu tsi ñi. Una taahan ñi ñi cacu tsitsi yutun ndoo tyin nandaá yutun ndoo can nu ndutya ñuhu. **21** Tan tacan tucu maa yo tumaa tsa cacu ñi ican, tacan cacu yo quivi tsicoondutya yo. Maa tyin ñavin nyahyu yo nacatya ndutya can tsa tsicoondutya yo. Yacan cuñí tsi catyí tsa tsicán tahvi yo tsi Nyoo na nacatya ra añima yo tan cacu yo jaha tsa nandoto ra Jesucristo. **22** Tan nandaá ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihí tatyí ña vaha tsa ndacá ñaha tsi nyivi.

Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

4 ¹ Yacan cuenda janyee ndo ñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyivi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñí cuñu ñuhu ñi. ² Tyin tacan tan tandihí

quivi coo ñi cua javaha ñi cuhva cuñí Nyoo, tan ñavin cuhva cuñí cuñu ñuhu ñi. **3** Vityin tsindihí tsa javahá ndo tsa caquiñi tsa taahán iñi nyivi tsa ña tsitó tsi Nyoo. Tsicoq ndo cuhva cuñí ndo, cuaha tsa caquiñi javahá ndo, tan javahá ndo tsa caquiñi tsa cuñí cuñu ñuhu ndo. Javahá ndo vico tan tsiñi ndo. Tan jacahnú ndo tsitoho tsa ña taahán tsi jacahnú ndo. **4** Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñí ñi. Tan caahán ñi ndavaha ñi siqui ndo. **5** Maa tyin tandihí tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi. **6** Yacan cuenda jacoto ra Cristo tuhun vaha tsi ndiyi. Tyin tacan tan cuvi coo aña ñi tumaa iyó Nyoo, vasu ndí maa tsihi ñi nu ñuhu ñayivi ihya tumaa tsihi tandihí ca nyivi.

7 Tsa yatyin cuii cundihí tandihí maa tsa iyó nu ñuhu ñayivi ihya. Yacan cuenda catsí coo ndo tan ña jandihí ndo tsa ndacan tahvi ndo tsi Nyoo. **8** Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu iñi tsi ñi. **9** Tatun tsaá iin nyivi vehe ndo, vaha tyanuu ndo tsi ñi tan ña caca iñi ndo tyin jatyañu ñi tsi ndo. **10** Tan cuñi tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyñu yo can tsihin tahan yo. **11** Tatun tsahá Nyoo tuhun cahan un tsihin nyivi, cahan, maa tyin maa ñi tuhun tsa tsahá ra tsi un. Tatun tsahá ra tyin javaha un tyiñu nuu nyivi, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnu nyivi tsi Nyoo tsa cuenda ra Jesucristo. Tyin intuhun ñi

maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

Sii cuñí ndo tun nyehé ndo tundoho tsa cuenda ra Cristo

12 Yañi tsa cuñi xaan yu, ña iyo xaan cuñi ndo tatun vatsí tundoho ñihí siqui ndo. Ña cuñi ndo tyin ña taahán tsi nyehe ndo tundoho. **13** Cú sii iñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnu cuvi ra. **14** Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyooho jacahnú ndo tsi ra. **15** Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javahá ndo tsa ña vaha, o tsa tyihí ndo tsi ndo nu ña taahán tsi. **16** Maa tyin tun nyehé ndo tundoho tsa cuenda tsa yihí ndo cuenda ra Cristo, ña nduçahan nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

17 Tyin tsa tsaq quivi tsa quitsaha jacutuñi Nyoo tsi tandihí nyivi. Tan jihna ca yoo tsa yihí cuenda ra cua cutuñi. Tatun tyehen tatsí tuñi Nyoo luxu ñi tsi yoo, ¿nácaa cua tatsi tuñi ra tsi nyivi tsa ña tyaá yahvi tuhun caahán ra? **18** Tatun yii cacú aña nyivi vaha, ¿nácaa cua cacu aña ñi quiñi iyó, ñi ña vaha? **19** Yacan cuenda tatun nyehé ndo tundoho cuhva cuñi Nyoo, cuñi tsi tsa jañihi ca ndo javaha ndo tsa vaha. Tan tyaa cuenda ndo aña ndo ndaha ra tyin maa ra javahá tsi yo, tan cua javaha ra tumaa caahán ra.

**Nu tsahá cuenda ra Pedro tsi
yo nácaa coo yo**

5 ¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihí tundoho tsa tahañ ra Cristo. Tan cua cutahan yu tsihin tandihí ca ra naha quívi quítsi ra Cristo inga tsaha tsihin tsa cahnu cuví ra. ² Jaha cuenda ndo tsi nyívi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa níi íñi añima ndo tan ñavin tsihin tsa ñíñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihí tyiñu javahá ndo, javaha ndo can tsihin tsa cacu íñi ndo. ³ Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihí ndo tsi ñi. ⁴ Tacan tan quívi cua quítsi ra cuví ityi nuu tsihin nyoocho tsa jahá cuenda mbee jana Nyoo, cua cuhva ra tsa síi caá tsa ña cua tívi maa tsi ndo.

⁵ Tacan tucu nyoocho, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jaha ndo tsi ndo tan tyaa yahvi tahan ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi
nyívi tsa yaa xaan,

Maa tyin jatyinyeé ra tsi ñi tsa
ña yaa.

⁶ Yacan cuenda ndaahvi jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee íñi tsa iyó tsi ra, tyin tacan tan cuvi jacahnu ra tsi ndo quívi cua tahan tsi. ⁷ Tyaa cuenda ndo tandihí tsa tsicá xaan íñi ndo ndaha Nyoo tyin maa ra jahá cuenda tsi ndo.

⁸ Catsi cūhun íñi ndo tan jaha

vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan íñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú tí tsa catsi tí. ⁹ Ñihi cūnyecu ndo tsihin tsa tsinú íñi ndo tsi Nyoo tyin tacan tan cuvi jaha ndo tsi nu ña vaha. Tyin juven ñi tundoho tsa nyehé nyoocho tan nyehé tucu tandihí ca nyívi yihí cuenda ra Cristo taniñ cahnu nu ñuhu ñayívi. ¹⁰ Maa tyin Nyoo jatyinyeé ra tsi yo, tan tsa yaha nyehe ndo tundoho juhva quívi, Nyoo cua jacutsa ca ra tsi ndo, ñihí cūnyecu ndo tsihin tsa tsinú íñi ndo, tan cua cuhva ca ra tunyee íñi tsa iyó tsi ra tsi ndo. Tan juven Nyoo cuví ra tsahá tandihí tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu síi caá tsihin ra tacan ñi maa. ¹¹ Na jacahnu yo tsi ra tan na cundaca ñaha maa ra tacan ñi maa. Tan na cuvi tsi tacan.

**Nu tsahá ra Pedro nacumi tsi
nyívi nu ndihí ña**

¹² Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin ñi xaan íñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñí xaan Nyoo tsi yo. Yacan cuenda ña naçoo ndo itsi.

¹³ Nyívi yihí cuenda Nyoo ñuu Babilonia tsa nacatsí Nyoo tumaa nacatsí ra tsi nyoocho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

¹⁴ Cūñi tahan ndo tsi ndo tan cūhva tahan ndo nacumi tsi ndo.

Na coo ca tsa taxin añima tandihí nyoocho tsa iin ñi cuví tsihin ra Jesucristo.

Tan na cuvi tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

Nu tyaá ra Pedro inga carta tsa cuenda nyivi yihí cuenda Nyoo

1 ¹ Yuhu ra Simón Pedro cuví yu musu ra Jesucristo, tan cuví yu iin ra tavā tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinū vaha iñi tsi Nyoo tumaa tsa tsinú iñi nyuhu. Inducu ñi tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo. ² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

Nacaa taahán tsi coo nyivi yihí cuenda Nyoo

³ Nyoo, tsihin tunyee iñi tsa iyó tsi ra, tsahā ra tandihí tsa tsiní ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahā ra tsa nacotó yo tsi ra tsa canā tsi yo. Tyin canā ra can tsi yo tsihin tsa cahnu cuví ra tan tsihin tsa iyo tsa javahá ra. ⁴ Tan tsihin tandihí tsa vaha can, tsahā tucu ra tsa catyí ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahā ra can tsi yo tyin tacan tan cuví coo yo tumaa maa ra tyin tsa nacog yo tandihí tsa caquiñi tsa javahā yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya. ⁵ Yacan cuenda cuñí tsi tsinú ca iñi yo tsi Nyoo tan ñavin yacan ñi tyin cuñí tucu tsi nducu yo cuhva coo cuiñi yo. Tan cuñí tucu tsi nducu yo cuhva cutuñi vaha iñi yo

cuhva cuñí Nyoo tsihin yo. ⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihi iñi yo. Yaha can tan nducu yo cuhva coo yo ñayivi iyó Nyoo. ⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñí maa Nyoo tsi tandihí yo.

⁸ Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. ⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñí iñi ñi tsa taahán tsi coto ñi. Tan tsa naq iñi ñi tyin ndatsj Nyoo cuatyí ñi tahan tsanaha. ¹⁰ Nyoo canā tsi ndo tan nacatsj ra tsi ndo. Yacan cuenda yañi, tun javahá ndo tandihí tsa caahán yu tuhun ihya, ña cua nduva ihñi ndo. ¹¹ Tacan tan ña yñi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuiñi ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñí ndo javahá ndo tuhun nditsa tsa cutuhvā ndo. ¹³ Tan cuñí yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu. ¹⁴ Tyin tsa jacotó Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya. ¹⁵ Tan cua jañiñi yu tsi yu tsa janducuhún iñi yu tuhun ihya tsi ndo

tyin tacan tan quiví cúu yu ña naa iñi ndo itsi.

Nu nacatyí tuhun ra Pedro nácaa nyehe ra naha tsa cahnu cuví ra Cristo

16 Ñavin tsa nandacū iñi ñi maa ndi tan cahān ndi tsihin ndo quiví jacotō ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacotō ndi tsi ndo tyin iyó xaan tunyee iñi tsi ra tan cua quitsi ra inga tsaha. 17 Tyin nyehe ndi nu jacahnū Nyoo Jutu yo tsi ra tan nyehe ndi nu janduxiñū ra kuhva caá ra. Tan sii xaan cuví nu cahān Nyoo tan catyí ra: “Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra”, catyí Nyoo tuhun ra Jesús quiví can. 18 Juvín nyuhu tsiñi ndusu Nyoo tsa quitsi ityi andiví quiví tsiyucū ndi yucu ii tsihin Jutu Mañi yo.

19 Tuhun ihya janahá tyin nditsa tsa tyaā ra cuví ndusu yuhu Nyoo nu tutu tañān tsanaha. Tatun tyaā yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhū tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo.

20 Maa tyin cuñí tsi coto ndo tyin ña cuví nacatyí tuhun tsa intuhun ñi maa yo tsa cuñí tsi catyí tsa tyaā ra ndusu yuhu Nyoo. 21 Tyin ra cuví ndusu yuhu Nyoo tañān tsanaha ña cahān ra naha kuhva cuñí maa ra naha. Maa tyin cahān ra naha kuhva cuñí Nyoo tyin maa Tatyí Ii Nyoo jaquihín ityi tsi ra naha.

Ra jacuahá tsa ña nditsa

(Judas 4-13)

2¹ Maa tyin tsicoō tucu ra cahān cuendu naha ra nu tsicoō nyiví Israel tañān tsanaha. Catyí ra naha tyin cuví ra naha ndusu yuhu Nyoo tan ña nditsa. Tan tacan cua coo tucu

ra vatya naha ra nu yucú ndo. Xeehe xaan cua jacuahā ra naha tsa ña nditsa tsa cuví jativí tsi ndo. Tan cua catyí ra naha tyin ña nditsa tuhun Jutu Mañi yo tan juvín ra jatā tsi ra naha. Yacan cuenda numi ñi cua cunaa ra can naha ra. 2 Tan cuaha xaan nyiví cua cunycun tsi ra naha tsihin tsa caquiñi tsa javaha ra naha. Tan cuaha xaan ñi cua cahān ndavaha ñi siqui tuhun tsa nditsa vaha ra Cristo. 3 Tan tsa cuenda tsa cuñi ra naha xuhun, cua nducu ra naha kuhva jandavi ñaha ra naha tsi ndo tsihin tsa jacuahā ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

4 Tyin ndi ña jahā Nyoo tucahnū iñi tsi ángel tsa tsicoō cuatyí tañān tsanaha. Jacuhūn ra tsi nahnu anyaya. Tsahñi ra tsi nahnu tsihin cadena, tan nacoō ra tsi nahnu nu naa nda cuanda tahan tsi jacutuñi ra tsi nahnu. 5 Tan ndi ña jahā ra tucahnū iñi tsi nyiví ña vaha tsa tsicoō tsanaha. Jacuūn ra savi xaan tsahñi tsi ñi. Maa tyin jacacū ra tsi intuhun ñi ra Noé tsihin utsa taahan nyiví ra. Ra ican cahān ra tsihin nyiví na nducu ñi kuhva coo vaha ñi tsihin Nyoo. 6 Tacan javahā tucu ra tsihin ñuu Sodoma tan ñuu Gomorra, janaā ra itsi. Tsahmí ra ñuu can tan nanduví tsi nyaa, tyin coto nyiví caquiñi tsa iyó vityin tan nyiví tsa cua coo náa cua tahan ñi. 7 Maa tyin jacacū ra tsi ra Lot tyin vaha iyó ra nuu ra. Cuiihya cuñi ra Lot nyehé ra kuhva iyó nyiví caquiñi can. 8 Tandihí quiví tsa tsicoō ra Lot ñuu can, cuiihya cuñi añima ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi. 9 Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyiví caquiñi nda cuanda tahan tsi quiví cutuñi ñi.

10 Yaha ca cua tatsi tuñi Nyoo tsi nyivi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha. 11 Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

12 Maa tyin ra vatya can naha ra cuví ra naha tumaa quití tsa ña cutuñí iñi tan javahá ti naha ti tsa cuñi maa ti naha ti. Tyin quití, ¿náa cuenda iyó ti? Iyó ti tyin tñin yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñí iñi ra naha, tan cua cúu ra naha tumaa tsihi quití can naha ti. 13 Cua nyehe ra naha tundoho tsa cuenda tsa janyehé ra naha tundoho tsi inga nyivi. Sií xaan cuñi ra naha tsihin tsa caquiñi javahá ra naha nu tuvi. Tсахá ra naha ticanuu nu yucú ndo nu iyó vico tatun cutahán ra naha tsihin ndo. Nyaá xaan ra naha tusi iñi. Maa tyin juvin ñi tsi maa ra naha jandaví ñaha ra naha.

14 Tandíhi ñaha tsa nyehé ra naha, cuñi ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. 15 Nacoq ra can naha ra ityi vaha tan naquihñin ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñi ra jaha canaa ra xuhun tsihin tsa ña vaha tsa javaha ra. 16 Tacan tan nacahán burru jana ra tsihin ra, tumaa caahán nyivi, tan tsa nacahán ti ña tsahá ti cahun ra

javaha ra tsa ña vaha tsicá iñi ra.

17 Tan tacan tucu maa ra can naha ra. Cuví ra naha tumaa iin soco ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cahun ra naha nu naa xaan tan ican cuví nu cua ndoo cuii ra naha. 18 Yaa xaan caahán ra naha. Maa tyin tandíhi tsa caahán ra naha nduve yahvi nyaá can. Tan tsihin tandíhi tsa ña vaha tsa javahá ra tan tsihin tsa ña vaha tsa cuñi cuñu ñuhu ra naha jandaví ñaha ra naha tsi nyivi tsa tsa yahá quitá mahñu nyivi tsa javahá tsa caquiñi. 19 Catyí ra naha tsihin ñi tyin cua coo nuña ñi. Maa tyin juvin ñi maa ra naha tsahá tsa cundaca ñaha tsa caquiñi tsi ra naha. Tyin tatun tsahá yo tsa cundaca ñaha tsa cundaca ñaha tsi yo, musu can cuví yo. 20 Tyin nyivi tsa nacotó tsi Jutu Mañi yo Jesucristo, ra jacacú tsi yo, tsa yahá nacoq ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnú ca cuatyí ñi cua coo nu Nyoo. 21 Vaha ca tun tsatyin ña nacotó ñi ityi vaha, tan ñavin ca tsa nacoq ihñi ñi tsa tsahá Nyoo tsi ñi tsa tsa yahá nacotó ñi tsi ra. 22 Maa tyin cundaq tsa tuhvá nyivi caahán: “Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu.” Tacan cuví ñi can tyin javahá nyico ñi tsa javahá ñi nda jihna.

Quivi cua quitsi nyico Jutu Mañi yo

3 ¹ Yañi, cuñi xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tsahá cuenda yu tsi ndo na caca vaha iñi ndo tan ña naa iñi ndo tsa cutuhvá ndo. ² Ndūcuhun iñi ndo tsa cahán ra cuví ndusu yuhu Nyoo tahañ tsanaha. Tan ndūcuhun tucu iñi ndo tsa jacuahá ndi tsi ndo. Tyin cuví ndi ra tavá tyiñu Jutu Mañi yo Jesucristo, ra jacacú tsi yo.

3 Coto jihna ndo tyin nu cua ndihí quívi cua quítsi nyívi cua vacu nducu tuhun Jutu Mañi yo. Tan cua coo ñi cuhva ña vaha cuñí cuñu ñuhu ñi.

4 Tan cua catyi ñi: “¿Náa ra Jesucristo tsa catyi tyin cua quítsi ra inga tsaha? ¿Numaa nyíi ra? Tyin nda quívi tsa tsihí tsi tsaahnu yo tan nda cuanda tsa tsinú ñuhu ñayívi tan nda vityin caá ñi maa tahan ñi caá”, cua catyi ñi. 5 Tyin maa ñi ña cuñí ñi coto ñi tyin nda tyembu tsahnu cahán Nyoo tan javahá ra andívi tan ñuhu ñayívi. Quitá ñuhu ñayívi tsitsi ndutya, tan tsihin ndutya tsinú tsi.

6 Tsa yahá javahá Nyoo ñuhu ñayívi juvin ñi maa tsihin ndutya naá ñuhu ñayívi quívi cuun savi xaan. 7 Maa tyin andívi tan ñuhu ñayívi tsa iyó vityin ndatú tsi tsa cayu tsi tumaa catyi maa Nyoo. Cua cayu andívi tan ñuhu ñayívi tsihin ñuhu quívi cua cutuñi nyívi tan cua naa nyívi caquiñi.

8 Maa tyin nyooho yañi yu tsa cuñi xaan yu, ña naa iñi ndo tyin tsa cuenda Jutu Mañi yo tsa iin quívi cuví tsi tumaa mil cuiya, tan tsa mil cuiya cuví tsi tumaa tsa iin quívi tsa cuenda ra. 9 Vasiquí yihí ndo tsicá iñi ndo tyin maa Jutu Mañi yo ña cuñi naha quítsi. ñaha ca quítsi ra tyin ndatú jihna ra nda ndu uví iñi tandihí nyívi tan nasama ñi cuhva iyó ñi tyin ña cuñi ra tsa cunaa ndi intuhun yo.

10 Maa tyin quívi cua quítsi Jutu Mañi yo, yoñi maa cua coto tyin cua quítsi ra quívi tsa ña ndatú yo tsi ra. Cua quítsi ra tumaa iin ñasuhu. Tan ñihi cunahma tan cua naa andívi. Tan cua janaa ñuhu tandihí tsa iyó ityi síquí. Tan ñuhu ñayívi cua cayu tsi tsihin ñuhu tsihin tandihí tsa iyó nuu tsi.

11 Tacan cua naa tandihí tsa iyó. Yacan cuenda cuñi tsi cui ti coo yo

tumaa iyó maa Nyoo. 12 Cuatu ndo quívi quítsi Nyoo. Ndūcu ndo cuhva quítsi ñi ra tyin quívi tsa cua quítsi ra cua naa andívi jaha ñuhu. Tan tandihí tsa iyó cua naa tsi tsihin tsa ihñi ñuhu can. 13 Maa tyin yoo ndatú yo andívi tsaa tan ñuhu ñayívi tsaa tsa catyi Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

14 Yacan cuenda yañi, tsitsi tsa ndatú yo tsi Jutu Mañi yo, ndūcu ndo cuhva coo vaha ndo tsihin Nyoo, tyin tacan tan quívi quítsi ra, sií cua cuñi yo tan cua coo taxin añima yo tyin nduve ca cuatyí yo iyó. 15 Coto ndo tyin Jutu Mañi yo ña cundihí iñi ra ndatú ra tsi yo tyin cuñi ra tsa cacu cuaha nyívi. Juvin ñi tyehen caahán tucu ra Pablo yañi yo nu carta tsa jaquitsi ra tsi ndo. Tyaá ra itsi tsihin tsa tsiñi tuñi tsa tsahá Nyoo tsi ra.

16 Tandihí ñi nu carta ra tan caahán ra tuhun ihya. Vasu yihí tsa yíi xaan cutuñi iñi yo. Tan nyívi tsa ña cutuñi iñi, ñi tsa ña ñihi nyaá tsihin Nyoo, siin cuhva cutuñi iñi ñi itsi. Juvin ñi tacan javahá ñi tsihin tuhun Nyoo tsa tyaá inga ca ra naha. Tan tsa tacan javahá ñi, juvin ñi tsi maa ñi jacunaá ñi.

17 Yacan cuenda yañi, vityin tsa tsitó ndo tuhun ihya tsa ndi cumañi ca cuví tsi, jaha ndo cuenda tsi ndo tan cuñi yu tsa coto ndihí ndo cuhva jandaví ñaha ra caquiñi can naha ra, tyin tacan tan ña nacao ndo cuhva vaha tsa cuahán ndo. 18 Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuví tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayivi nyito

1 ¹ Ihya tyaá ndi tuhun ra tsa iyó nda ndi cumañi coo tandihi tsa iyó. Tsiñi ndi tsa cahan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi iñi ndi yóo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaha ra ñayivi nyito iyó yo. ² Tan quivi tsaá ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaá tsi nu iyó yo.

³ Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuvi ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. ⁴ Tan tyaá ndi tuhun ihya tsa cuenda ndo tyin tacan tan coto ndo tandihi tsa tsahá Nyoo tsi ndo tan sih xaan cua cuvi tsi ndo.

Nyoo, ñuhu cuví ra

⁵ Vityin nacatyí tuhun ndi tsihin ndo tsa cahan ra Cristo tsihin ndi. Catyi ra tsihin ndi tyin Nyoo ñuhu cuví ra. Tan nduve tsa naa tsi ra, nduve tsa ña vaha tsicá iñi ra cuví cañ. ⁶ Tun catyi yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa. ⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihi cuatyí yo tsihin niñi ra.

⁸ Tatun catyi yo tyin nduve cuatyí yo, juvin ñi maa yo jandaví ñaha yo,

tan nduve tsa nditsa iyó aña yo.

⁹ Maa tyin tatun naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihi cuatyí yo tyin maa ra vaha ra tan javahá ra cuhva catyi ra tyin ña vatya ra. ¹⁰ Nyoo catyi ra tyin iyó cuatyí yo, tan tatun catyi yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó aña yo.

Ra Cristo cuví ra caahán ndaahvi tsaha yo

2 ¹ Sehe nyihi yu, caahán yu tandihi tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuvi ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuiti iyó. ² Juvin ra jahá tucahnu iñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihi cuii nyivi iyó nu ñuhu ñayivi.

³ Tatun tyaá yahvi yo tsa caahán Nyoo, nacotó yo tsi ra. ⁴ Maa tyin tatun iin ra tsa catyi tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó aña yo. ⁵ Nyivi javahá tsa caahán Nyoo, ñi ican cuví ñi cuñi tsi ra tsihin tsa ñi iñi aña ñi. Tan tsihin yacan tsitó yo tyin iin ñi cuví ñi tsihin ra. ⁶ Nyivi catyi tyin iin caa ñi iyó ñi tsihin Nyoo, taahán tsi coo ñi tumaa tsicoq maa ra Jesucristo quivi quitsi ra nu ñuhu ñayivi ihya.

Taahán tsi tsa cuñí tahan yo tsi yo

7 Yañi, ñavin tuhun tsaac jacotó yu tsi ndo, tyin cuví tsi tuhun tsahnu tsa tsa tsitó maa ndo nda quitsí ca tsi. Tan juvin tsi cuví tsa tsa yahá tsiñi ndo. **8** Maa tyin ña tsindihí tsa tsaac tsi tyin tyaá yahvi yo itsi tan tsa tyaá yahvi yo itsi, cuñí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsín ñuhu tsa nditsa.

9 Nyooho tsa catyí tyin iyó ndo nu nditsin, tan ndasi cuñí ndo nyehe ndo tsi nyívi yihí tuhun Nyoo tsihin ndo, ndi iyó ndo nu naa. **10** Maa tyin nyívi tsa cuñí tsi nyívi yihí tuhun Nyoo tsihin ñi, iyó ñi nu nditsin. Tan nduve maa cuatyí cuvi janduva tsi ñi.

11 Maa tyin nyívi ndasi cuñí nyehe tsi nyívi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehe ñi tyin tumaa tsa cuaá ñi jahá tsa naa can.

12 Jaquitsí yu tandihí tuhun ihya tsi nyooho tsa ndi nacuhvá cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo. **13** Nyooho tsa tsa tsahnú tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayívi. Tan tyaá tucu yu itsi tsa cuenda nyooho ra tsa ndi cuahan cutuñí vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhvá cuenda tsi ndo tsi Nyoo, tyin nacotó ndo tsi Nyoo Jutu yo. **14** Jaquitsí yu carta ihya tsi nyooho tsa tsa tsahnú tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayívi. Tan jaquitsí yu carta ihya tsi nyooho tsa ndi cuahan cutuñí vaha iñi tuhun

ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

15 Ña cuñi ndo tsa caquiñi tsa iyó nu ñuhu ñayívi ihya. Tyin nyívi cuñí tandihí yacan, ña cuñí ñi tsi Nyoo Jutu yo. **16** Tyin tandihí tsa ña vaha tsa iyó nu ñuhu ñayívi ihya, tsa cuñí cuñu ñuhu yo, tsa nyehé yo tan cuñí yo coo tsi yo, tan tsa cuñí yo nduyaa yo tsihin tsa iyó tsi yo, tandihí yacan tsahá ñuhu ñayívi ihya tsi yo, tan ñavin Nyoo Jutu yo tsahá can.

17 Ñuhu ñayívi ihya cua cundihí can, tan cua cundihí ndihí tucu tandihí tsa caquiñi tsa cuñí nyívi javaha ñi. Maa tyin nyívi tsa javahá cuhva cuñí Nyoo, cua coo cuii ñi tsihin ra.

Nu tsa ndasi cuñí nyehe tsi ra Cristo

18 Nyooho, tsa cuví ndo tumaa sehe yu, coto ndo tyin tsa cua ndihí quívi. Tan nyooho tsiñi ndo tyin vatsi nyívi tsa ña cuñí nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahan tsi cundihí quívi. **19** Nyívi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyívi yihí tuhun Nyoo tsihin yo cuví ñi.

20 Maa tyin nyooho tsa tsitó ndo tsa caahán Nyoo tyin tsahá ra Cristo Tatyí li Nyoo iyó añima ndo tan jacotó tsi tandihí tsi ndo. **21** Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

22 ¿Yóo cuví nyívi vatya? Nyívi vatya cuví ñi catyí tyin ra Jesús ñavin ra Cristo cuví ra. Tan juvin ñi ícan cuví ñi ndasi cuñí nyehe tsi ra Cristo.

Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra. **23** Tan tandiñi nyivi tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi iñi aña ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

24 Yacan cuenda naquihin vaha ndo tsitsi aña ndo tandiñi tsa tsiñi ndo nda quivi jihna ñi. Tyin tun naquihin vaha ndo itsi tsitsi aña ndo, cua coo ndo iin caa ñi tsihin Nyoo Jutu yo tan tsihin Sehe ra.

25 Tan ñayivi nyito can cuví tsa catyí ra Jesucristo tyin cuhva ra tsi yo.

26 Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandavi ñaha tsi ndo.

27 Maa tyin ra Jesucristo tsaḡa ra Tatyí li Nyoo iyó aña ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí li Nyoo jacuaha tandiñi maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí li Nyoo tsi ndo.

28 Tan vityin nyooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsa ra. **29** Vityin tsa tsa tsitó ndo tyin vaha ra Cristo, cuñi tsi coto ndiñi ndo tyin tandiñi nyivi javahá tsa vaha, sehe Nyoo tsi ñi.

Nyivi cuví sehe Nyoo

3 **1** Nyehe ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra. **2** Nyooho yañi, tsa cuví yo sehe ra vityin, maa

tyin ñaha ca coto yo náa cua cuví yo. Maa tyin tsitó yo tyin quivi quitsi ra Jesucristo, cua cuví yo tumaa cuví maa ra, tyin cua nyehe vaha yo tsi ra tan cua nyehe tucu yo náca caá ra.

3 Tandiñi yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

4 Tandiñi nyivi tsa tsicoó cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyí tyin ña tyaá yahvi yo ley Nyoo. **5** Nyooho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra. **6** Tandiñi yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehe ñi tsi ra, tan ñaha ca coto ñi tsi ra. **7** Nyooho, tsa cuví tumaa sehe yu, coto jandavi ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo.

8 Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jihna ñi. Yacan cuenda quitsi ra Jesucristo, Sehe Nyoo, tyin janaa ra tandiñi tsa javahá nu.

9 Tandiñi yoo tsa tsa yahá nacacu tsa jahá Nyoo, ña taahán ca iñi yo javahá yo tsa ña vaha, tyin iyó yo ñayivi tsaḡa Nyoo tsi yo. Yacan cuenda ña javahá ca yo tsa ña vaha, tyin tsa yahá nacacu tsa yo tan vityin cuví yo sehe Nyoo. **10** Cuví nacotó yo ndáa nyivi cuví sehe Nyoo, tan ndáa nyivi cuví sehe nu ña vaha, tyin tandiñi nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

11 Tyin tsa tsiñi ndo nda quivi jihna ñi cuví: Tsa cuñi tahan yo tsi

yo. **12** Ña taahán tsi javaha yo tumaa javahá ra Caín, tyin ra Caín cuví ra iin ra cuenda nu ña vaha. Tan tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

13 Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo. **14** Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihi. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihi. **15** Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua cuhva Nyoo ñayivi nyito coo ñi. **16** Tsitó yo náa cuví tsa cuñi tahan yo tsi yo tyin tsa yahá janahá ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuanda tsahá ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuanda ñayivi iyó yo tsa cuenda nyivi yihí tuhun Nyoo. **17** Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra. **18** Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñi iñi yo.

Nacaa javaha yo tan coo vaha yo tsihin Nyoo

19 Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. **20** Tatun tuví iñi tsitsi añima yo tyin iyó cuatyí yo, na ña cuita iñi yo yacan. Na cuita iñi yo tsi Nyoo tyin juvin ra tsitó

tandihí tsa iyó añima yo tan cahnu ca cuví ra tan ñavin ca añima yo.

21 Yañi, tatun tuví iñi yo tyin nduve cuatyí yo, na ña nayuhvi yo nyehe yo tsi Nyoo. **22** Tan tandihí tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra.

23 Tyin tyiñu tsa tsahá ra tsi yo yacan cuví tsa tsinu iñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tava tyiñu ra tsi yo.

24 Nyivi tyaá yahvi tyiñu tsahá ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyí li ra tsa tsahá ra tsi yo.

Tatyí li Nyoo tan tatyí nu ña vaha

4 ¹ Nyooho yañi tsa cuñi xaan yu, ña tsinu iñi ndo tsa caahán nyivi catyí tyin tuhun Nyoo caahán ñi. Nyehe jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi. ² Cuví nacoto ndo tsi nyivi tun juvin Tatyí li Nyoo jacahán tsi ñi o ñavin. Ñi tsa iyó Tatyí li Nyoo tsihin, catyí ñi tyin quee ra Jesucristo nda gloria tan quitsi ra nu ñuhu ñayivi ihya, tan cuví ra iin rayi tumaa maa yo. ³ Maa tyin tandihí nyivi tsa catyí tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

⁴ Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yahá jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihya. ⁵ Ñi ican, cuenda

nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican. **6** Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndáa nyivi iyó Tatyí li Nyoo tsihin, tan caahán ñi tsa nditsa tan ndáa nyivi yihí tatyí ña vaha tan jandaví ñaha ñi.

Nyoo cuñi xaan ra tsi tandihi nyivi

7 Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihi yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo. **8** Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihi nyivi. **9** Nyoo janahá ra tsi yo tsa cuñi ra tsi yo tsihin tsa tsaḥa ra Sehe mañi ra quitsi nu ñuhu ñayivi ihya, tyin cuhva ra ñayivi nyito coo yo. **10** Nyehe ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cúu ra tsa cuenda yo tan quinyaa ra cuatyí yo.

11 Nyooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo. **12** Ndi intuhun maa nyivi, tan ñaha ca maa nyehe ñi tsi Nyoo, maa tyin tatun cuñi tahan yo tsi yo, iyó Nyoo añaima yo. Tan ñi vaha ñi yo cuñi yo tsi ra tan tsi nyivi. **13** Tan tsitó yo tyin iyó vaha yo tsihin ra tan maa ra iyó ra añaima yo, tyin tsaḥa ra Tatyí li ra iyó añaima yo. **14** Nyuhu nyehe vaha ndi tan cuví ndi tsandaa tyin jaquitsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu

ñuhu ñayivi ihya. **15** Tandihi nyivi tsa tsinú ñi tan caahán tyin ra Jesús cuví Sehe Nyoo, iyó Nyoo añaima ñi. Tan iyó ñi iin caa ñi tsihin ra.

16 Yoo tsitó yo tan tsinú ñi yo tyin Nyoo cuñi ra tsi yo, tan cuñi ra tsi tandihi nyivi. Tan tandihi yoo tsa cuñi tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añaima yo. **17** Tyin tatun cuñi yo tsi Nyoo tsihin tsa ñi ñi añaima yo, ña cua nayuhvi yo nyehe yo tsi ra na tahan tsi quivi cutuñi tandihi nyivi nuu ra. Tyin tumaa iyó ra Jesucristo, tacan iyó yo nu ñuhu ñayivi ihya.

18 Nyoo cuñi ra tsi yo, tan tatun cuñi yo tsi ra, nduve tsa nayuhvi yo. Tatun ñi ñi yo cuñi yo tsi Nyoo ña nuña ca nu quihvi tuhun yuuhvi can añaima yo, tyin Nyoo jatsiyó ra tandihi maa yacan. Tyin tatun yuuhvi yo, yihí can tyin tuví ñi yo tyin iyó cuatyí yo. Tan yuuhvi yo tsa cua tatsi tuñi Nyoo tsi yo. Tyin tatun yuuhvi cuñi yo, yuuhvi yo tyin ñaha ca cuñi yo tsi Nyoo tumaa taahán maa tsi cuñi yo tsi ra.

19 Yoo cuñi yo tsi Nyoo tyin jihna ca maa ra cuñi tsi yo. **20** Tatun iin nyivi tan catyí ñi: “Yuhu cuñi yu tsi Nyoo”, tan ndasi cuñi ñi nyehé ñi tsi nyivi tahan ñi, nyivi vatya cuví ñi. Tyin tatun ndasi cuñi yo nyehé yo tsi nyivi tahan yo tsa tuhvá yo nyehé, ¿nácaa cua cuñi yo tsi Nyoo tsa ña cuví nyehe yo? Ña cua cuvi. **21** Tava tyiñu Nyoo tsi yo tyin tun cuñi yo tsi ra, tacan cuñi tsi tsa cuñi tahan yo tsi yo.

Tatun ñi ñi yo tsinú ñi yo tsi Nyoo cuví jaha canaa yo tsi tsa ña vaha

5 ¹ Tandihi nyivi tsa tsinú ñi tyin ra Jesús cuví ra Cristo ra queenda gloria jahá Nyoo, juvin ñi cuví sehe Nyoo. Tyin tatun cuñi yo tsi iin ra iyó sehe, cuñi ndihi yo tsi sehe ra. **2** Tatun cuñi yo tsi Nyoo tan javahá yo tsa caahán ra, cua cuñi ndihi yo

tsi nyivi cuví sehe ra. **3** Tyin tsa cuñí yo tsi Nyoo yacan cuví tsa tyaá yahví yo tsa tsahá cuenda ra tsi yo. Tan tandíhi tsa tsahá cuenda ra tsi yo, ña yíi javaha yo can. **4** Tyin tandíhi yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayivi ihya. Cuví jaha canaa yo can tyin tsinú iñi yo tsi Nyoo. **5** Maa ñi maa nyivi tsa tsinú iñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayivi ihya.

Tatyí li Nyoo cuví tsandaa cuenda ra Jesús Sehe Nyoo

6 Ra Jesucristo quítsi ra nu ñuhu ñayivi ihya. Tan tsa tsicoondutyá ra tsihin ndutyá tan tsa tsatí ñiñi ra janahá tyin Sehe Nyoo cuví tsi ra. Ñavin tsa tsicoondutyá ñi ra. tyin nda cuanda tsa tsatí ñiñi ra. Tan juvin ñi maa Tatyí li Nyoo cuví tsandaa tyin tacan cuví. Tan Tatyí li Nyoo ña jandaví ñaha tsi. **7** Nda andívi iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí li Nyoo. Tsa nduñi taahan ra naha, iin ñi cuví ra naha. **8** Tan nu ñuhu ñayivi ihya iyó tucu uñi tsandaa: Tatyí li Nyoo tsa iyó añima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyí Nyoo tyin juvin ra Jesús cuví Sehe ra. Tan tsa tsinu uñi cuví nu tsatí ñiñi ra Jesús. Tan tsa nduñi taahan yacan nacatsí tahan caahán can. **9** Yoo naquihín yo tsa caahán ra cuví tsandaa nu ñuhu ñayivi ihya. Tan Nyoo cahnu ca cuví ra tan ñavin ca ra ñuu ñayivi ihya. Yacan cuenda taahán tsi naquihín yo tsa caahán ra, tan juvin ñi maa ra catyí tyin Sehe ra cuví tsi ra Jesús. **10** Nyivi tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyivi tsa ña tsinú iñi tsi ra, jahá ñi tyin vatya Nyoo, tyin ña cuñí ñi tsinu iñi

ñi tsa caahán Nyoo tsandaa cuenda Sehe ra. **11** Tan tyeheh caahán Nyoo tsihin yo: Catyí ra tyin tsahá ra ñayivi nyito coo yo tan ñihi yo itsi tatun tsinú iñi yo tyin ra Jesucristo cuví Sehe ra. **12** Nyivi iyó Sehe Nyoo añima, iyó ñi ñayivi nyito. Tan nyivi nduve Sehe Nyoo iyó añima, ña iyó ñi ñayivi nyito.

Nu ndíhi cahan ra Juan tan nu tsahá ra tyíñu tsi nyivi

13 Tyaá yu tuhun ihya tsa cuenda nyooho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayivi nyito tsa ña cua naa maa.

14 Ndita iñi yo tsi Nyoo tyin tatun tsicán yo tsa tsicán yo tsi ra tan cuhva cuñí maa ra tsicán yo, tsitó yo tyin maa ra tsiñi ra tsa caahán yo.

15 Tan tsa tsitó yo tyin tsiñi ra tsa tsicán yo, tsitó tucu yo tyin tsa ñiñi yo tsa tsicán yo tsi ra.

16 Tatun iin nyivi tan nyehe yo tyin javahá ñi cuatyí tsa ña taahán tsi cúu ñi, taahán tsi cahan ndaahvi yo tsihin Nyoo tsa cuenda ñi na jaha ra tucahnu iñi tsi ñi tsa cuenda cuatyí can. Maa tyin tatun javahá ñi cuatyí tsa taahán tsi cúu ñi, ña ndacan tahvi yo tsa cuenda ñi. **17** Tandíhi tsa caquiñi tsa javahá nyivi, cuatyí cuví can. Tan iyó tucu cuatyí tsa ña jaha Nyoo tucahnu iñi.

18 Tsitó yo tyin nyivi tsa nacacu tsa jahá Nyoo, ña jañihí ca ñi javaha ñi cuatyí. Tyin jahá cuenda Sehe Nyoo tsi ñi tan ña tsahá ra tsa tñin nu ña vaha tsi ñi.

19 Yoo tsa tsitó yo tyin cuenda Nyoo yíhí yo. Tan tandíhi nyivi tsa taahán iñi tsa iyó nu ñuhu ñayivi ihya, nu ña vaha ndacá ñaha tsi ñi.

20 Tan tsitó tucu yo tyin quítsi Sehe Nyoo, tan tsahá ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo

Sehe Nyoo. Tan iyó yo iin caa ñi
 tsihin ra. Tan juvin maa ra cuví Nyoo
 tsa nditsa. Tan iyó ra ñayivi nyito tsa
 ña cua naa maa. **21** Nyooho tsa cuví

tumaa sehe yu, jaha cuenda ndo tsi
 ndo tsihin tsitoho tsa jacahnú nyivi,
 tyin ñavin Nyoo cuví can.
 Tan na cuvi tsi tacan ñi.

Carta Tsinu Uvi Tsa Tyaa Ra Juan

Nu caahán ra Juan tyin cuñí xaan ra tsi nyivi yihí cuenda Nyoo

1 Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñí xaan yu tsi ndo tsihin tsa ñi ñi añima yu. Tan cuñí ndihí tucu tandihí nyivi tsa tsitó tsa nditsa tsi ndo, yacan ñavin yuhu ñi cuñí tsi ndo. 2 Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo. 3 Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

4 Sii xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tavá tyiñu maa Nyoo Jutu yo tsi yo. 5 Hermana, caahán ndaahvi yu tsihin un vityin, na cuñí tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsahá Nyoo tsi yo cuví tsi. Tyin tsa iyó maa tsi nda nu quitsahá. 6 Tsa cuñí yo tsi Nyoo, yacan cuví tsa javahá yo tandihí tsa tavá tyiñu ra tsi yo. Tan yacan cuví tsa cahán Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyivi.

Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha

7 Caahán yu tyehen tsihin un tyin

cuaaha xaan nyivi jandaví ñaha iyó nanií cahnu nu ñuhu ñayivi. Catyi ñi tyin ña nditsa tsa quitsí ra Jesucristo cacu ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandaví ñaha cuví ñi. Tan ñi ndasi cuñi nyehé tsi ra Cristo cuví ñi. 8 Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihí ca ndo tandihí tsa cua cuhva Nyoo tsi ndo.

9 Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaa yahvi ñi itsi, iyó Jutu yo Nyoo tan ra Jesucristo Sehe ra tsihin ñi. 10 Tatun tsaá nyivi yuvehe ndo, tan cuñí ñi jacuaaha ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi. 11 Tyin tun cuhva yo nacumi tsi ñi, cuñí tsi catyi tyin javahá ndihí yo tsa ña vaha tsa javahá ñi.

Nu ndihí cahán ra Juan

12 Iyó cuaaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaa yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca ñi yo.

13 Ihya vatsí nacumi tsi un jahá sehe ña tahan un tsa nacatsí ndihí maa Nyoo.

Tan na cuví tsi tacan ñi.

Carta Tsinu Uñi Tsa Tyaa Ra Juan

**Nu caahán ra Juan tyin vaha cuahán
ra Gayo tsihin Nyoo**

1 Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñi xaan yu tsi un tyin iin caa ñi nyicún yo tsa nditsa.

2 Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un.

3 Yuhu sii xaan cuñi yu quivi quitsi juhva ra yañi yo naha ra nu nyí yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa.

4 Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

5 Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra.

6 Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha tumaa taahán iñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo. 7 Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha. 8 Yacan cuenda maa yo taahán tsi jatyinyee tsi ra naha tsihin tsa tsiñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

**Nu caahán ra Juan tyin ña vaha
javahá ra Diótfrefes**

9 Yuhu jacuhun yu iin carta tsi nyivi tsicá vehe ñuhu, maa tyin ra Diótfrefes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tsihin nyivi. 10 Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasi ra Diótfrefes tsi ñi, tan tavá ra tsi ñi vehe ñuhu.

11 Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

**Nu caahán ra Juan tyin vaha xaan
tsinú iñi ra Demetrio tsi Nyoo**

12 Tandihí nyivi tan vaha caahán ñi tuhun ra Demetrio. Tan vaha xaan tyaa yahvi ra tuhun Nyoo, tan juven ñi maa tuhun Nyoo janahá tyin ra vaha cuví ra. Tan juven ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahan ra Juan

13 Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tsihin carta. 14 Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo. 15 Na coo tsa taxin añima un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñi yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

**Nu tyaá ra Judas carta tsa cuenda
nyivi cana Nyoo**

1 Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo. **2** Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

**Nu caahán ra Judas tuhun nyivi tsa
jacuahá tsa ña nditsa**

(2 Pedro 2:1-17)

3 Tyihí yu kuhva tyaa yu iin carta tsa cuenda ndo yañi, tyin cuñí yu cahan yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñi yu tsi ndo na ña kuhva ndo tsa sama kuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi.

4 Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yahá jahá Nyoo tucahnu iñi tsi yo, tan yacan cuenda cuví ñi javaha maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

5 Vasu ndi maa tsa tsitó ndo tsa javahá Nyoo tahañ tsanaha, maa tyin

cuñí yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yahá can janaa ra tsi tandihí maa ñi tsa ña tsinú iñi tsi ra. **6** Tan juvin ñi tacan javahá tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoo nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi. **7** Tacan tucu nyivi ñuu Sodoma tan ñuu Gomorra, tan nyivi ñuu nyihi tsa tsicoo nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayí can naha ra tsicoo ra naha tsihin ñaha. Tan ñiñaha tsicoo ñi tsihin iin rayí tan inga ra. Tan cuaha ca tsa caquiñi javahá ñi tyin rayí tsicoo ra naha tsihin ra ndusihi. Tan tsa cuenda yacan, nyehe ñi tundoho nu cayú ñi quivi tsahmí Nyoo ñuu ñi. Tan yacan janahá tsi yo tyin nyivi javahá tsa caquiñi, cua cayú ñi tsihin ñuhú tsa ña cua ndahva maa.

8 Vasu ndi maa tacan cuví, vityin ndi iyó ra jandaví ñaha naha ra. Cuñí ra naha tyin vaha javahá ra naha. Maa tyin jatíví ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi síqui ra iyó ca tunyee iñi tsi tan ñavin ca maa ra naha. **9** Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi caní tahan ra tsihin nu ña vaha tsa cuenda cuñu ñuhu ra Moisés, ña

canā iñi ra caḥan ra ndavaha ñi siqui nu. Intuhun ñi tsa catyḯ ra tsihin nu: “Na tatsi tuñi Jutu Mañi yo tsi un” catyḯ ángel Miguel can tsihin nu ña vaha. **10** Maa tyin ra tsa jatyañú tsi ndo can naha ra, caahán ra naha ndavaha ñí tyin ña tsitó ra naha. Tan javahá ra naha tumaa javahá quitḯ, tyin quitḯ ña cutuñí iñi tí. Icó ñi maa tí naha tí tsa cuñí cuñu ñuhu tí naha tí. Tan tacan tucu ra can naha ra. Tsihin tsa caquiñi tsa javahá ra naha jativí ra naha juven ñi tsi maa ra naha.

11 ;Ndahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñí ra naha jaha canaa ra naha xuhun, nacoḡ ra naha ityi Nyoo tumaa javahá ra Balaam. Tan cua cunaa ra naha tumaa cunaḡ ra Coré, tyin tsihi ra can tsa cuenda tsa ña tyaḡ yahvi ra tsa caḥan ra cuvḯ ityi nuu tsihin ra. **12** Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsí ra naha tan tsihí ra naha tsihin tsa siḯ cuñí ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juven ñi tsi maa ra naha jahá cuenda ra naha. Cuví ra naha tumaa vico tsa yihí ityi siqui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuvḯ tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuii yoho tun. **13** Tan juven ñi cuvḯ tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuvḯ tucu ra naha tumaa tiñuu tsa iyó andivi tsa tsinaḡ. Tsa nyaá maa tsa cua ndoo cuii ra naha nu naa. Tacan ñi maa tsa cua tahan ra naha.

14 Tuhun ra can naha ra caḥan ra Enoc taḥan tsanaha. Ra Enoc tsa tsinu utsa tsa cuvḯ tata ra Adán. Caḥan ra tuhun tsa tsahá maa Nyoo tsi ra, tan catyḯ ra: “Nyeḥe yu nu vatsí Jutu Mañi yo tan cuenda mil ángel ra vatsí tsihin ra **15** tyin vatsí ra vatsí tatsí tuñi ra tsi nyivi caquiñi tsa cuenda tandihí tsa ña vaha tsa javahá ñi, tan nyivi caahán ndavaha ñi siqui ra”, catyḯ ra Enoc taḥan tsanaha. **16** Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyḯ ra naha: “Yii xaan, cahnu xaan tundoho nyehé yo.” Javahá ra naha tsa cuñí cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñí ra naha tsa cahan nyivi tyin vaha xaan iñi ra naha.

Nu tsahá cuenda ra Judas tsi nyivi yihí cuenda Nyoo

17 Yañi, ña tyaḡ yahvi ndo tsi ra can naha ra. Maa tyin nducuhun iñi ndo tuhun tsa caḥan ra tsa tavá tyiñu Jutu Mañi yo Jesucristo, **18** tyin catyḯ ra naha tyehen: “Nu cua ndihí quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.” **19** Ra tsa caḥan ra naha tuhun cuvḯ ra cuñí jasḯin tsi yo. Tyin tyaá yahvi ra naha cuhva cuñí cuñu ñuhu ra naha tan nduve Tatyí li Nyoo iyó tsihin ra naha.

20 Maa tyin nyoocho yañi, jandu iin ndo iñi ndo tsihin tsa tsinú iñi ndo tsi ra Cristo. Ndācan tahvi ndo tsi ra tsihin tunyee iñi Tatyí li maa ra.

21 Ndūcu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñí xaan ra tsi yo. Tan cūatu ndo quivi cuhun yo coo cuii yo tsihin ra. Tyin yacan cuvḯ tsa cua cuhva Jutu Mañi yo Jesucristo tsi yo tsa cuenda tsa cundaahví iñi ra tsi yo.

22 Cahān yuhu ndo tsihin nyivi tsa ña tsinú iñi, na tsinu iñi ñi. 23 Nducu ndo cuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

**Nu ndihi cahan ra Judas tan
jacahnḡ ra tsi Nyoo**

24-25 Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuví

ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quiví cua cuhun yo tsihin ra nu cahnu cuví nu nyaá ra. Tan sñi xaan cua cuñi yo.

Na coto yo tsa cahnu xaan cuví ra. Na jacahnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandihí. Tyin nda nu quitsí tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

1 Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuví musu ra. **2** Tan caahán yu tandihi tsa nyehe yu. Tan cuví yu tsandaa tsa cuenda tuhun Nyoo tsa jacoto ra Jesucristo tsi yu.

3 Sií xaan cuví tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nuu tutu ihya, tsa yatyin cuii cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

4 Yuhu ra Juan jaquitsi yu tutu ihya tsi nyooho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juven ra cuví Nyoo nda tsanaha, tan vityin, tan juven ra cua quitsi. **5** Tan naquihin tucu ndo tsa vaha jahá ra Jesucristo. Tyin ra ican cuví ra tsandaa tan tsa nditsa. Juvin ra cuví ra tsa nandoto tsa jihna ñi. Tan ndacá ñaha ra tsi ra cuví rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatyá ra tsi yo tsihin niñi ra. **6** Tan tsaha ra tsa cuví yo rey tan cuví yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihi maa tsa ndacá ñaha ra! Tan nacuvi tsi tacan.

7 ¡Nyehe jihna ndo! ¡Tsa vatsi ra Cristo nu vico andivi! Tandihi nyivi tsa jañicuehe tsi ra tan cua nyehe ñi tsi ra. Tan tandihi ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juven ñi maa ra cuví. Nditsa, tacan cua cuví, tan na cuví tsi tacan ñi.

8 Catyí Jutu Mañi yo:

—Yuhu cuví ra jihna ñi, tan yuhu cuví ra cua coo nu cua ndihi quivi, tumaa letra A tan Z —catyí Jutu Mañi yo, ra iyó tandihi tunyee iñi tsi. Tacan ñi iyó maa ra: Juvin ra cuví Nyoo nda tsanaha, tan vityin, tan juven ra cua quitsi.

Nu nyehe ra Juan tsa iyo caá ra Cristo

9 Yuhu ra Juan cuví yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunye xaan iñi yo náa cuví tsi yo tyin jatinyeé ra Jesucristo tsi yo. Nyíi yu vehe caa ñuhu Patmos tsa canyí mahñu ndutyá ñuhu. Nyíi yu vehe caa tsa cuenda tsa caahán yu tuhun Nyoo tsa jacuahá ra Jesucristo. **10** Tan iin tumbingu quivi jacahnú yo tsi Jutu Mañi yo, tuví iñi yu tsa nyaá Tatyí Ii Nyoo tsihin yu. Tan tsiñi yu iin ndusu ñilhi xaan ityi tsata yu, tumaa ndusu trompeta. **11** Tan catyí tsi tsihin yu tyehen:

—Yooho, Juan. Yuhu cuví ra jihna ñi, tan yuhu cua coo nu cua ndihi quivi. Tyaa nu iin tutu tandihi tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu

ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyi ndusu can tsihin yu.

12 Tacan tan nyico coo yu tyin cuñi yu nyehe yu yoo caahán tsihin yu. Tan nyehe yu utsa taahan candileru xuhun cuaan. 13 Tan mahñu tsa utsa taahan candileru can, nyehe yu nyaá iin ra tsa caá tumaa caá rayhi ñuhu ñayivi ihya. Nditsi ra jahma cañi nda nu tsaha ra. Tan yihí iin cinturón xuhun cuaan yiqui nyica ra. 14 Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyi. Tan tinuu ra caá tsi tumaa caá nu cayú ñuhu. 15 Tan xiñú xaan tsaha ra tumaa xiñú iin caa tsa nañi bronze tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. 16 Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehé ñicanyii.

17 Cuhva tsa nyehe yu tsi ra, nduva yu tsaha ra tumaa tsa tsihi yu. Maa tyin tyiso ra ndaha cuaha ra siqui yu, tan catyi ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihi quivi. 18 Yuhu nyito yu vasu tsihi yu, maa tyin vityin ña cua cundihí maa tsa iyó yu. Tan iyó ndatu tsi yu tsa catyi yu ama taahán tsi cúu nyivi, tan tatun cuhun ñi anyaya o ña cuhun ñi. 19 Tyaa nu libru tandihí tsa nyehe un, tan tsa iyó vityin, tan tsa cua coo nu cuahán ca tsi. 20 Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyi tsa utsa vehe ñuhu.

Nu quitsahá tsahá cuenda ra Cristo tsi nyivi tsicá tsa utsa vehe ñuhu: Tsa tsahá cuenda ra tsi nyivi tsicá vehe ñuhu ñuu Efeso

2 ¹ Jacuhun tutu tsi ra caahán tuhun yu tsihin nyivi tsicá vehe ñuhu ñuu Efeso. Tan catyi tsihin ra tyehen: “Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: 2 Yuhu tsitó yu tandihí tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñi ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. 3 Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo. 4 Maa tyin iyó iin tsa ña vaha javahá ndo, tyin ña cuñi ca ndo tsi yu vityin tumaa tsa cuñi ndo tsi yu quivi jihna ñi. 5 Yacan cuenda nducuhun iñi ndo numaa nda nduva ndo. Tan nasama ndo cuhva iyó ndo, tan javaha nyico ndo tumaa javahá ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi. 6 Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñi ndo nyehe ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan. 7 Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyi ra tyehen: Tatun cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito aña ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahá cuenda ra Jesucristo tsi nyivi tsicá vehe ñuhu ñuu Esmirna

8 'Jacuhun ndihi tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyehen: “Tyehen catyí ra cuví tsa jihna ñi, ra cua coo nu cua ndihi quivi, ra tsa tsihi tan nandotq: 9 Yuhu nyehé yu tandihi tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañi Satanás, cuví ñi. 10 Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cpanyicun vaha ndo tsi Nyoo nda cuanda cúu ndo. Tan yuhu cua cuhva yu ñayivi coo ndo tsihin Nyoo. 11 Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyí ra tyehen: Tatun cuvi jaha canaa ndo tsi nu ña vaha, ña cua cahun ndo anyaya, quivi cúu nyivi tsa tsinu uvi tsaha.”

Tsa tsahá cuenda ra Jesucristo tsi nyivi tsicá vehe ñuhu ñuu Pérgamo

12 'Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyi tsihin ra tyehen: “Tyehen catyí ra tsa ndahá mityi tsa xaan nduvi tsiyo yuhu: 13 Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuví tsandaa cuenda yu. 14 Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra

tsa ña cuñí jandihí cuhva tsa javahá ra Balaam, ra tsicoo tsanaha. Tyin ra Balaam natyuhu ra tsi ra Balac, na jacatsi ra cuñu quití tsa jamañi nyivi nu tsitoho tsi nyivi Israel. Tan natyuhu ra tsi ra na catyi ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindaha ñi, tan tacan tucu ñi rayi. 15 Tan juven ñi iyó tucu juhva nyivi tsa ña cuñí nacoo tsa jacuahá ra yihí cuenda ra Nicolás. Tan yuhu ndasi cuñí yu nyehe yu tsa jacuahá ra can naha ra. 16 Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi tsa cuví tuhun quitá yuhu yu. 17 Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu: Tatun cuvi jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyí xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsa tsa yoñi tsitó; intuhun ñi nyivi tsa cua naquihin yuu can cua coto sivi can.”

Tsa tsahá cuenda ra Jesucristo tsi nyivi tsicá vehe ñuhu ñuu Tiatira

18 'Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyi tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan. 19 Yuhu nyehé yu tandihi tsa javahá ndo. Tan tsitó yu tsa cuñí xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi. 20 Maa tyin iyó juhva tsa cuñí yu cahan yu tsihin ndo: Nyehé yu tyin tsahá ndo ndatu tsi ñaha tsa javahá tumaa javahá ña Jezabel tsa

tsicoo tahan tsanaha. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayii tsihin ñaha o iin ñaha tsihin rayii tun ña tindaha ñi. Tan jacuahá ña tyin cuví catsi ñi nyayu tsa jamañi nyivi tsi tsitoho.

21 Yuhu tsa ndatu xaan yu tsa nasama ña cuhva iyó ña, maa tyin ña cuñí ña javaha ña can. Ña cuñí ña jandihí ña tsa tsicá nuu ña tsihin rayii. 22 Tan vityin cua quihin cuehe tsi ña tan ña cua cuví nduvita ña. Tan nyivi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi. 23 Tan cua cahñi yu sehe ña. Tacan tan cua coto tandihí nyivi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyooho cua cuhva yu tsa taahán tsi tsi ndo tsa cuenda tsa javahá ndo. 24 Maa tyin tandihí ca nyooho tsa iyó ñuu Tiatora, nyooho tsa ña naquihjn cuenda cuhva jacuahá ña, ndi ña javahá ndo tsa catyí nyivi tyin cuví tuhun xeehe cuenda nu ña vaha, ña tyaá yu inga tsa yí siqui ndo. 25 Maa tyin jañihi ndo javaha ndo tsa vaha nda cuanda quitsi nyico yu. 26 Tan nyooho tsa jaha canaa tsi nu ña vaha, tan javahá ndo cuhva cuñí yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihya. 27 Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyivi. Tan cua tahvi cuatyí ndo tsi ñi tumaa tsa tahví cuatyí yo quisí. 28 Tan cua cuhva yu tyiñuu cahnu tsa caná tsa naa ca coo tsihin ndo. 29 Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

Tsa tsahá cuenda ra Jesucristo tsi nyivi tsicá vehe ñuhu ñuu Sardis

3¹ 'Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyivi tyin nyito ndo, maa tyin tsa cuenda yuhu, tsa tsihi ndo. 2 Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo. 3 Ndūcuhun iñi ndo tsa vaha tsa cutuhva ndo. Cūanyicun ndo can, tan nasama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu. 4 Maa tyin iyó juhva nyooho, nyivi Sardis, tsa ña janyahyu jahma; ña javahá ndo tsa caquiñi cuví can. Tan juvin nyooho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo. 5 Tan nyooho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nyecú sivi tandihí nyivi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo. 6 Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu.”

Tsa tsahá cuenda ra Jesucristo tsi nyivi tsicá vehe ñuhu ñuu Filadelfia

7 'Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuña yuvehé tan ndi intuhun nyivi tan ña cuví nacasi. Tan tatun nacasi ra, ndi intuhun ñi tan ña cuví nuña ñi. Tyehen catyí ra: 8 Yuhu nyehé yu tandihí tsa javahá ndo. Tan

nuñá yu iin yuvehe tsa cuenda ndo tan yoñi cuví nacasi itsi, tyin tsaḥá yu tsa cahan ndo tuhun Nyoo tsihin nyívi, tan yoñi cuví casi tsi ndo. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu. **9** Tan nyívi yihí cuenda nu ña vaha, ñi vatya, ñi catyí tyin nyívi Israel cuví ñi, maa tyin ñavin nyívi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñí yu tsi ndo. **10** Tyin cunyeé xaan iñi ndo tumaa catyí yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quívi cua jaquitsi yu tundoho cahnu síqui tandíhi nyívi, tyin cua nducu cuhva yu tsi tandíhi ñi iyó nu ñuhu ñayívi. **11** Yatyi cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyívi tsa vaha tsa cua ñihi ndo. **12** Nyooho tsa cua cuví jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaá yu sívi Nyoo yu tsi ndo, tan sívi ñuu Nyoo yu, ñuu Jerusalén tsa tsa cua quee nda andívi, tan juvin ñi cua tyaá tucu yu sívi tsa yu tsi ndo. **13** Nyooho tsa iyó soho, tyáa soho ndo tsa caahán Tatyí Ii Nyoo tsihin nyívi tsicá vehe ñuhu.”

Tsa tsaḥá cuenda ra Jesucristo tsi nyívi tsicá vehe ñuhu ñuu Laodicea

14 Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javahá Nyoo tandíhi maa tsa iyó: **15** Yuhu nyehé yu tandíhi tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu,

tan ndi ña jandíhi tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandíhi cuii ndo tsa tsinú iñi ndo tsi yu.

16 Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. **17** Tyin nyooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsi yu,’ catyí ndo. ¿A ña jahá ndo cuenda tyin cuiihya cuñí ndo nyehé ndo tundoho tsitsi añima ndo, ndaahvi ndo, cuaa ndo, tan tandíi ndo tsitsi añima ndo? **18** Yacan cuenda tsaḥá cuenda yu tsi ndo tyin tsi maa yu jata ndo xuhun cuaan tsa cayu tan naḡ tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandíi ndo. Tan jata ndo numeri quihví tinuu ndo tyin tacan tan cuví nyehe ndo. **19** Yuhu tsaḥá cuenda yu tan tatsí tuñi yu tsi tandíhi nyívi tsa cuñí xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha. **20** ¡Nyehe jihna! Yuhu nyaá yu yuvehe tan cañi ndaha yu. Nyívi tsa cua cuñi ndusu yu, tan nuña ñi yuvehe, cua quihví yu tan cuxiñi yu tsihin ñi. Tan maa ñi cuxiñi ñi tsihin yu. **21** Cua cuhva yu tsa cunyecú ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra. **22** Nyooho tsa iyó soho, tyáa soho ndo tsa caahán Tatyí Ii Nyoo tsihin nyívi tsicá vehe ñuhu” —catyí ra Jesucristo.

Tsa cuví nda gloria

4 ¹ Tsa yahá can, tan nyehe yu ticoho iin yuvehe nda andívi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Nd̄aa nyehe tan janaha yu tsi un tsa cua cuvi nu cuahán ca tsi —catyí ndusu can tsihin yu.

2 Tan juvin ñi cuhva can tan tuvi ñi yu tsa nyaá Tatyí Ii Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá. **3** Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan taniñ cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda. **4** Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinú nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha. **5** Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí ii Nyoo. **6** Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyí.

Ñi canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can. **7** Iin tsa nyito can caá can tumaa caá ndicaha. Tan tsa tsinu uvi tumaa caá indiquí lee. Tan tsa tsinu uñi, tumaa caá nuu rayiñ caá nuu can. Tan tsa tsinu cumi tumaa caá tasu tsa cuahán ndavá. **8** Tan iyó iñu nditsin tsa intuhun intuhun tsa nyito can. Tan taniñ cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihi tunyee ñi tsi un.

Tacan ñi iyó maa un, juvin un cuví Nyoo nda tsanaha tan

vityin, tan juvin un cua quitsi.

9 Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihi tyembu. Tan tahan ñi tsaha tsa javahá tsi naha tsi tacan, **10** tsa oco cumi ra tsahnu can naha ra tsicuiñí tsiti ra naha tan jacahnú ra naha tsi ra iyó tandihi tyembu. Tan tsaquin ra naha corona ra naha nu nyaá tyayu can. Tan catyí ra naha:

11 Jutu Mañi ndi, Nyoo ndi cuví un.

Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihi tsa iyó.

Tan tsa cuenda tsa iyó ñi maa un, tan tsicoo tandihi tsa iyó, catyí ra naha.

Nu nyehe ra Juan iin tutu tan Mbee Ticyi Luhlu tsa cuví ra Jesucristo

5 **1** Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu. **2** Tan nyehe yu iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

3 Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi. **4** Tan tsacú xaan yu, tsa tsito yu tyin yoñi maa cuví nacani tutu can tan cuví cahvi, tan cuví nyehe nuu tsi. **5** Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha o cuñi tsi catyí, ra ndacá ñaha, ra cuví tata ra Judá, tan tata ra rey David, ra ican jahá canaa tan juvin ra cua nacani tutu can tan

jocon tsa utsa sellu tsa ndasí tutu can —catyí ra.

6 Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyí Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiqui ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tanií cahnu nu ñuhu ñayivi. 7 Tan ra Mbee Ticatyí Luhlu can tsahan ra nu nyaá ra nyaá nu tyayu can tan quihin ra tutu tsa ndahá ra can nu ndaha cuaha ra. 8 Cuhva tsa quihin ra tutu can, tandihi tsa cumi tsa nyito can tan tandihi tsa oco cumi ra tsahnu can tsicuiñi tsiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitu cutu tsitsi copa xuhun cuaan ndahá ra naha. Tan cutu can cuví tandihi tsa tsicán tahvi nyivi yihí cuenda Nyoo. 9 Tan tsitá ra naha iin yaa tsaa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jatá un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó tanií cahnu nu ñuhu ñayivi, nyivi caahán siin siin yuhu, tan nyivi siin siin tata.

10 Tsaḥa un tsa cuví ndi rey tan jutu tsa cuenda Nyoo Jutu yo. Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

11 Yahá can tan tsiñi yu ndusu tan nyehe yu nyecú cuenda millón ángel tanií canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can. 12 Tan ñihi caahán

ángel can naha ra, tan catyí ra naha: Ra Mbee Ticatyí Luhlu tsa tsahñi nyivi, juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihi tunyee iñi.

Na jacahnu yo tsi ra tan na jacahnu tandihi nyivi tan tandihi tsa iyó tsi ra, tyin cahnu xaan cuví ra, catyí ángel can naha ra.

13 Tan tsiñi tucu yu tsa caahán tandihi tsa javahá Nyoo; tandihi tsa iyó andivi, tan nu ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyí Luhlu.

Tan tunyee iñi tsa iyó tsi ra naha ña cua cundihí maa tsa iyó tsi.

Tan taahán tsi tsa jacahnu yo tan tyaa yahvi yo tsi ra naha tacan ñi maa —catyí tandihi tsa javahá Nyoo.

14 Tan catyí tsa cumi tsa nyito can: —¡Na cuví tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacahnú ra naha tsi ra tsa ña cua cundihí maa.

Nu jocon ra Jesucristo tsa utsa sellu tsa ndasí tutu can

6 ¹ Tacan tan nyehe yu nu jocon ra Mbee Ticatyí Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Naha, tan nyehe un! —catyí tsi tsihin yu.

2 Tacan tan nanyehe yu tan nyehe

yu iin cuayu cuitsin, tan ra yosó tsi tí ndahá ra iin nduva. Tan ñihí ra iin corona yihí jiñi ra, yacan jahá canaa ra, tan ndi nyaá ca cua jaha canaa ca ra.

3 Tan tsa jocoñ ra Mbee Ticatyi Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—iNaha, tan nyehe un! —catyí tsi tsihin yu.

4 Tan quitá iin cuayu cuaaha. Tan ra tsa yosó tsi tí ñihí ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihí ndihí ra iin mityi cahnu cundahá ra.

5 Tan tsa jocoñ ra Mbee Ticatyi Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—iNaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi tí, ndahá ra iin ticatya. 6 Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyivi tsi iin musu tsa iin quivi, tacan yahví tsa intuhun ñi kilu nuñi. Tacan tucu ñi tsa uñi kilu cebada. Tan ña jativi ndo acetye tan vinu —catyí ndusu can.

7 Tan tsa jocoñ ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—iNaha, tan nyehe un! —catyí tsi tsihin yu.

8 Tan nanyehe yu, tan nyehe yu iin cuayu cuaan. Tan ra yosó tsi tí nañi ra Tuhun Tsihi. Tan tsata ra can vatsi inga ra tsa nañi Nu Yucú Añima Ndiyi. Tan ñihí ra naha tunyee iñi tsa cahñi ra naha tsa cuaha nyivi iyó nu ñuhu ñayivi. Tyin tsitsi tsa sava nyivi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan

tsihin quitá xaan iyó nu ñuhu ñayivi.

9 Tan tsa jocoñ ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyivi tsa tsihi tsa cuenda tsa jacoto ñi tuhun Nyoo. 10 Tan caná tsa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyivi tsa tsahñi tsi ndi tsa cuenda un? —catyí ñi.

11 Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quivi, nda cuanda cahñi nyivi tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihi tucu maa ñi.

12 Tan tsa jocoñ ra Mbee Ticatyi Luhlu can tsa tsinu iñu sellu can, nyehe yu tyin ñihi xaan taán. Tan ndutuñ ñicanyii tumaa tuun jahma nyivi iyó tucuihya iñi. Tan yoo nducuaaha tsi tumaa cuaaha ñiñi.

13 Tan tiñuu cucoyo tsi nu ñuhu ñayivi tumaa cucoyo tsiti yutya yutun tatun ñihi yahá tatyí. 14 Tan andivi tsiquihí tuvi tsi tumaa tyihí tuví yo iin ndaha tutu. Tan tandihí yucu tan ñuhu nyihi tsa cayucú mahñu ndutya ñuhu nasama nu cayucú tsi. 15 Tan tandihí rey tsa iyó nu ñuhu ñayivi tsihin ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyivi tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnu. 16 Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyi Luhlu can tsi ndi.

17 Tyin tsa tsaa quivi cahnu tsa cua tatsi tuñi ra tsi ndi, tan yoñi cunyee iñi can —catyí ñi.

**Nu ñihĩ nyivi Israel tuñi cunyaꝯ
nutyaan ñi**

7 ¹ Tsa yahaꝯ can tan nyeheꝯ yu nyecú cumi ángel tsa ndihĩ tsa cumi tutun ñuhu ñayivi ityi nu tuhvá taty queé tyin tacan tan ña yaha taty nu ñuhu ñayivi tan nu ndutya ñuhu tan nu yutun. ² Tan nyeheꝯ tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan canꝯ tsa ra tsi tsa cumi ángel tsa ñihĩ ndatu tsa jativi nu ñuhu ñayivi tan nu ndutya ñuhu. Tan catyí ra tsihin ra naha:

³ —Ña jativi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴ Tan catyí ra tsiñĩ yu tyin cientu uvi xico cumi mil cuví nyivi Israel tsa tsinyaꝯ tuñi can. ⁵ Utsi uvi mil nyivi tata ra Judá tsinyaꝯ tuñi, tan utsi uvi mil nyivi tata ra Rubén, tan utsi uvi mil nyivi tata ra Gad, ⁶ tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés, ⁷ tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar, ⁸ tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihĩ ñi can tan tsinyaꝯ tuñi Nyoo tsi ñi.

**Nu nyeheꝯ ra Juan tsi nyivi nditsí
jahma cuitsin**

⁹ Tsa yahaꝯ can tan nyeheꝯ yu yucú cuaha nyivi. Tan yoñi maa cuví nacahvi tsi ñi, tyin cuaha xaan ñi. Yucú nyivi quee tandihĩ ñuu nyihi tan ñuu nahnu tsa iyó taniñ cahnun nu ñuhu ñayivi. Tan yucú nyivi caahán siñ siñ yuhu. Tan yucú nyivi siñ siñ tata. Tan nyecú ñi nuu ra nyaá nu tyayu, tan nuu ra Mbee Ticatyi Luhlu. Nditsí ñi jahma cuitsin. Tan

ndahá ñi ndaha ndicaha. ¹⁰ Tan tandihĩ ñi caná tsa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyi Luhlu, juvin ra naha jacacú tsi yo —catyí ñi caná tsa ñi.

¹¹ Tan tandihĩ ángel naha ra nyecú ra naha taniñ canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsiñiñ tsiñiñ ra naha tan tsaquin ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. ¹² Tan catyí ra naha:

Tyehen taahán tsi jacahnun ndi tsi un, Jutu Mañi ndi tyin iyó xaan tsa tsiñiñ tuñi tsi un: Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihĩ tyembu, catyí ra naha.

¹³ Tacan tan tsicꝯ tuhun iin ra tsahnu can tsi yu tan catyí ra:

—¿Yóo nyivi cuví ñi nditsí jahma cuitsin ihya? ¿Tan ndáa ityi quee ñi? —catyí ra.

¹⁴ Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyivi ihya cuví ñi nyeheꝯ tundoho cahnun. Maa tyin nacatyaꝯ ñi jahma ñi tsihin niñi ra Mbee Ticatyi Luhlu tan nducuitsin tsi. ¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi. ¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi.

¹⁷ Tyin ra Mbee Ticatyi Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda

yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

Nu joçon ra Jesucristo tsa tsinu utsa sellu tan nu quitá iin ángel tsihin iin cuu xuhun cuaan

8 ¹ Tan tsa joçon ra Mbee Ticatyí Luhlu tsa tsinu utsa sellu tsa ndasí tutu can, ndutaxin nda andivi tumaa sava hora.

² Yahá can tan nyehe yu nyecú utsa ángel ityi nuu Nyoo. Tan intuhun intuhun ra naha quihin cuenda ra naha iin trompeta. ³ Yahá can tan tsaá inga ángel tsa ndahá iin cuu xuhun cuaan. Tan tsinyaa nyityi ra ityi nuu altar can. Tan quihin cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo. ⁴ Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuahán yuhma can nu nyaá Nyoo. ⁵ Tacan tan ángel can quihin ra cuu can tan jacutu ra can tsihin tuun ñuhu tsa quitá nu altar can. Tan tyoso ra can nu ñuhu ñayivi. Tan quitsaha caahán savi, tan iyo cuví. Tan ñihi tatsa, tan quitsaha taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsaha cuún savi tan cucoyó yuu savi, ñihi cayú ñuhu tan sacá nuu ñiñi tsihin can. Tan tsa yatyin cayu sava ñuhu ñayivi, tan tsa yatyin tucu sava cuhva nyaá huhu tsitsa tan tandihí cuhva nyaá huhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu

cayú tumaa iin yucu cahnu. Tan nacava can mahñu ndutya ñuhu. Tan tsa yatyin sava ndutya ñuhu can nanduví tsi ñiñi. ⁹ Tan tsa tandihí quití iyó tsitsi ndutya ñuhu can tsihi tsa yatyin sava ti naha ti. Tan tahvi cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

¹⁰ Tan tsa tiví tsa tsinu uñi ángel can trompeta tsa ndahá ra, nacava iin tiñuu cahnu. Cayú tsi tumaa cayú yiti. Tan nacava tsi siquí tsa yatyin ña sava yutya nahnu tan tsa yatyin ña sava nu ndohyo. ¹¹ Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uva tsi tumaa tsa uva xaan ajenjo can. Tan cuaha xaan nyivi tsihi tyin tsihi ñi ndutya tsa ndu uva can.

¹² Tan tsa tiví tsa tsinu cumi ángel can trompeta tsa ndahá ra, ndu na tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu nduna tsi naha tsi. Tan tsa cuenda tsa nduna juhva ñicanyii, nduna nu ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

¹³ Yahá can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyí ra:

—iNdahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

9 ¹ Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacava can nu ñuhu ñayivi. Tan quihin cuenda can ndaha tucu tsa cuenda yavi cunu tsa nduve maa nuu tsindihi. ² Tacan tan nuña can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasí yuhma can nuu

ñicanyii tan nasacá nuu can tsihin tatyí. Tan ndunaa nu ñuhu ñayivi.

3 Tan tsitsi yuhma can quitá tica xama. Tan ndavá ti naha ti nu ñuhu ñayivi. Tan ñihí ti naha ti ndatu tsa tyaa ti naha ti tsi nyivi tumaa tyaa tujuhma tsa iyó nu ñuhu ñayivi.

4 Quihín ti naha ti tuhun tyin na ña jatívi ti naha ti cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa ti naha ti tsi nyivi tsa nduve tuñi Nyoo nyaá nutyaan.

5 Ña ñihí ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihi xico ti tsi ñi uhun yoo. Tan xico uhvi can uhvi tsi tumaa uhví nyivi tsa tyaa tujuhma.

6 Quivi can nyivi cua nanducu ñi tuhun tsihi. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsihi cua cunu tsi nuu ñi tyin ña cua cúu ñi.

7 Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyivi. **8** Tan ixi jiñi ti naha ti caá tumaa caá ixi jiñi ñaha. Tan nuhu ti naha ti caá can tumaa caá nuhu ndicaha. **9** Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí. **10** Tan juhma ti naha ti caá tumaa caá juhma tujuhma, tyin yihí iñu can. Tan tsihin can cua tyaa ti naha ti tsi nyivi tsitsi tsa uhun yoo. **11** Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyí: Nu Janaá.

12 Tsa yahá iin tundoho, tan cumañi uvi taahan ca.

13 Tan tsa tiví tsa tsinu iñu ángel

can trompeta tsa ndahá ra, tsiñi yu iin ndusu tsa quitá tsitsi tsa cumi ndiquí tsa nyecú tutun altar xuhun cuaan tsa nyaá ityi nuu Nyoo. **14** Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrates —catyí ndusu can.

15 Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi.

16 Tan tsiñi yu tyin uvi cientu millón andaru tsa yosó cuayu.

17 Tacan nyehe yu cuayu jahá Nyoo. Tan ra yosó cuayu can naha ra nyaá caa cuaaha, azu tan cuaan yiquí nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre. **18** Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre. **19** Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nuu juhma ti naha ti caá tumaa caá jiñi coo. Tan tsihin yacan jañicueehé ti naha ti tsi nyivi.

20 Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñi, ndi ña cuví caca. **21** Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayi, tan rayi ña jandihí ra naha tsa tsicá nuu ra naha tsihin ñaha vasu ndi maa ña tindahá ñi. Tan ña jandihí ñi tsa suhú ñi.

Ángel tsa ndahá libru luhlu

10 ¹ Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. ² Tan ndahá ra iin libru luhlu nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi. ³ Tacan tan cana tsa ra, tumaa taná ndicaha tsa cuxaán ti. Tan cuhva tsa cana tsa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi. ⁴ Tsa yahá tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyí tsi tsihin yu:

—Naquihin xeehe tuhun tsa cahan tsa utsa ndusu can. Tan ña tyaa un can nu tutu —catyí ndusu can.

⁵ Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandaq ra ndaha cuaha ra ityi andivi. ⁶ Tan ángel can catyí ra:

—Na nyehe maa Nyoo ra ña cua cundihí maa, ra tsa javahá andivi tan ñuhu ñayivi tan ndutya ñuhu tan tandihí tsa iyó nuu tsi tyin nduve ca tsa cucuee. ⁷ Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyí Nyoo tyin javaha ra, tumaa cahan ra tsihin ra jahá tyiñu tyiñu ra, ra cuví ndusu yuhu ra —catyí ángel can.

⁸ Tan ndusu tsa quitá andivi, tsa cahan jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandica tsa ndahá ra ángel tsa tsañi nu ndutya ñuhu tan nu ñuhu ñayivi —catyí tsi.

⁹ Tacan tan tsahan yu nu nyaá ángel can tan tsican yu libru luhlu

can tsi ra, tan catyí ra tsihin yu:

—Juhun, catsi itsi. Vixi xaan tsi cua cuvi tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

¹⁰ Tacan tan quihin yu libru luhlu tsa ndahá ra, tsatsi yu. Tsa ndi nyii tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uva tsi tsitsi yu. ¹¹ Tacan tan catyí ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán siin siin yuhu, tan siqui ra cuví rey naha ra —catyí ra tsihin yu.

Nduvi ra tsa cuví tsandaa naha ra

11 ¹ Tacan tan tsahá ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tsihin. Tan catyí ra naha tsihin yu:

—Nduvita tan tyihi cuhva un vehe ñuhu Nyoo tan altar ra, tan cahvi najava taahan nyivi jacahnú tsi ra tsitsi vehe can. ² Maa tyin ña tyihi cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava. ³ Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

⁴ Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi. ⁵ Tan nyivi tsa cua cuñi jañicueehe tsi ra cuví tsandaa can naha ra, cua naa cuui nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihí nyivi xaan iñi tsi ra naha. ⁶ Tan iyó ndatu tsi ra naha tsa casi ra naha nu cuun savi tandihí quivi tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra

naha nĩnĩ ndutya. Tan iyó tucu ndatu tsi ra naha tsa janyehe ra naha tundoho tsi nyivĩ iyó nu ñuhu ñayivĩ tsihin tandihĩ nuu cuehe. Tan cuvĩ javaha ra naha yacan najava tsaha cuñi maa ra naha. **7** Maa tyin tsa cua ndihĩ cuhva cuenda ra naha tuhun Nyoo tsi nyivĩ, cua quita quitĩ xaan yavi cunu can, tan cua cañi tahan ti tsihin tsa nduvi taahan ra cuvĩ tsandaa can. Tan cua jaha canaa ti tsi ra naha. Tan cua cahñi ti tsi ra naha. **8** Tan cua cava cuñu ñuhu ra naha tsitsi calle ñuu nu tsahñi nyivĩ tsi Jutu Mañi yo tan tyaa ñi tsi ra nuu cruu. Tan cua cuvĩ ñuu can tumaa ñuu Sodoma tan ñuhu Egipto, tsa cuenda tsa ña vaha tsa cua javaha nyivĩ ñuu can. **9** Tan tsitsi tsa uñi quivĩ sasava, cua nyehe tandihĩ nyivĩ cuñu ñuhu ra naha; nyivĩ iyó tandihĩ ñuu nyihĩ, nyivĩ tandihĩ ñi tata, tan ñi caahán siñ siñ yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihĩ xeehe cuñu ñuhu ra naha tsitsi ñuhu. **10** Tan siñ xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa siñ cuñi ñi tsa cua cúu nduvi taahan rayiñ tsa cahan tuhun Nyoo tsihin ñi. Tyin cuñi maa ñi tyin tsahá xaan ra naha tundoho tsi ñi. **11** Maa tyin tsa cua yaha tsa uñi quivĩ sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihĩ nyivĩ tsa cua nyehe tyin cua nandoto ra naha, cua nayuhvi xaan ñi. **12** Tan tsa yahá tsa tsihĩ ra naha tan nyehe yu nandoto ra naha, tan catyĩ iin ndusu ityi andivĩ tsihin ra naha:

—Naha ndo nyehe

Tacan tan nandaá ra naha ityi andivĩ tsitsi vico. Tan nyehe nyivĩ xaan iñi tsi ra naha nu nandaá ra naha. **13** Tan ñihĩ xaan taan cuhva can. Tan tsitsi ñuu can tanĩ cuaha xaan vehe. Tsitsi tsa utsi utsi vehe, tanĩ intuhun intuhun tsi. Tan tsihĩ utsa mil nyivĩ

jahá tsa taan can. Tan nyivĩ tsa ña tsihĩ, jacahnũ ñi tsi Nyoo, ra nyaá andivĩ, tsa cuenda tsa yuuhví ñi.

14 Yacan cuvĩ tundoho tsa tsinu uvi tsa nyehe nyivĩ, maa tyin tsa vatsĩ tsa tsinu uñi.

Nu tivĩ tsa tsinu utsa ángel trompeta tsa ndahá ra

15 Tan tsa tivĩ tsa tsinu utsa ángel can trompeta tsa ndahá ra, tsiñi yu ndusu ñihĩ xaan ityi andivĩ, tan catyĩ tsi:

Tandihĩ nu ndacá ñaha rey nu ñuhu ñayivĩ, tsa yahá nduvĩ tsi tsa tsii Nyoo Jutu yo tan ra Cristo.

Tan ña cua ndihĩ maa tsa ndacá ñaha ra naha, catyĩ ndusu can.

16 Tacan tan tsa oco cumi ra tsahnu tsa nyecú nu nyaá Nyoo, tsicuiñi tsiti ra naha tan tsaquĩn ra naha nuu ra naha nda nu ñuhu. Tan jacahnú ra naha tsi Nyoo. **17** Tan catyĩ ra naha:

Jutu Mañi ndi Nyoo ndi. Ra iyó tandihĩ tunyee iñi tsi.

Tacan ñi iyó maa un. Juvín un cuvĩ Nyoo nda tsanaha tan vityin, tan juvín un cua quitsi.

Tsahá xaan ndi tyahvi nyoo tsi un,

Tyin tsa naquihĩn cuenda un tunyee iñi un.

Tan tsa quitsahá ndacá ñaha un.

18 Tan vasu ndi maa cuxaán nyivĩ iyó tandihĩ ñuu nahnu.

Maa tyin tsa tsaa quivĩ tatsi tuñi un tsi ñi.

Tan tsa tsaa quivĩ tsa jacutuñi un tsi ndiyi.

Tan cuhva un tsa vaha tsa taahán tsi tsi nyivĩ jahá tyiñu tyiñu un, ñi tsahá cuenda tuhun caahán un,

ñi tsa nacuhvá cuenda añima ñi tsi un, tan jacahnú ñi sivĩ un.

Vasu ndi maa cahnu cuvĩ ñi o ndaahvi ñi.

Tan tsa tsaa cuhva tsa janaa un

tsi nyivi jatívi tsi nyivi iyó nu ñuhu ñayivi, catyí ra naha.

19 Tacan tan nuñā yuvehe ñuhu Nyoo tsa iyó gloria, tan tsitsi vehe ñuhu can quituvj tsatun cuenda tsa ndoq ra tyiñu tsihin yo. Tan quihvi tatsa. Tan ñihí cuvaá tan caahán savi. Tan taq̄n. Tan ñihi xaan cucoyo yuu savi.

Nu nducú coo xaan tsa iyó ndaha tsi ñaha

12 ¹ Tacan tan quituvj tsa iyo cahnu ityi andívi. Quitā iin ñaha tan nditsí ña ñicanyii tumaa nditsí yo jahma. Tan tsañí ña nu yoo. Tan yihí iin corona tsa utsí uvi tiñuu jiñi ña. ² Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundoho. ³ Tacan tan quitā inga tsa iyo ityi andívi. Tan nyehé yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndíqui ti. Tan yihí corona intuhun intuhun jiñi ti. ⁴ Tan tsihin juhma ti jacoyo ti tsa yatyin sava tiñuu tsa iyó andívi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin cuñi ti catsi ti sehe ña náa cuhva cacu ñi maa tsi. ⁵ Tan ñaha can jacacú ña iin rayi. Tan juvin ra cua cundaca ñaha tandíhi nyivi iyó nu ñuhu ñayivi. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yahā cacú ra, naquihjñ Nyoo tsi ra cuahán ra nu nyaá ra nu tyayu ra. ⁶ Tan cuahán ñaha can tsinú xeehe ña ñuhu ityi, nu janduvahā Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quívi.

⁷ Yahā can tan tsicoq cuatyí nda andívi, cañi tahan ángel Miguel tan tandíhi ángel tsa cutahán tsihin ra tsihin coo xaan can. Tan coo can tsihin tandíhi tatyí ña vaha tsa cutahán tsihin ti, cañi tahan ti tsihin ángel Miguel. ⁸ Maa tyin ña cuví jaha

canaa ti tsa cañi tahan ti. Tan ña ñihí ca ti nu ndoo ti nda andívi tsihin tatyí ña vaha tsa cutahán tsihin ti.

⁹ Tacan tan tavā Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandíhi nyivi iyó nu ñuhu ñayivi. Maa nu tan tatyí ña vaha tsa cutahán tsihin nu cucoyo nahnu nda nu ñuhu ñayivi.

¹⁰ Tacan tan tsiñi yu iin ndusu ñihi xaan ityi andívi, tan catyí tsi:

—Vityin tsa tsaq̄ quívi tsa jacacú Nyoo tsi nyivi. Tsa jahā canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tavā ra naha tsi nu tsa tyaq̄ xaan cuatyí siqui ñi nuu ra naha nduvi tan ñiñu.

¹¹ Tan jaha canaq̄ ñi tsi nu tsihin niñi ra cuví Mbee Ticatyi Luhlu, tan tsihin tuhun Nyoo tsa cahān ñi tsihin nyivi. Ña nayuhvi ñi cúu ñi tan tsaq̄ cuenda ñi ñayivi ñi. ¹² Yacan cuenda cusii iñi nyoocho tsa iyó andívi. Maa tyin jndahvi nyivi tsa iyó nu ñuhu ñayivi tan nu ndutyá ñuhu! Tyin nu ña vaha nacavā nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaha ca quívi tan cundihi tsa jandaví ñaha nu tsi ñi.

¹³ Tan tsa nyehé nu coo xaan tsa iyó ndaha can tyin nacavā nu nu ñuhu ñayivi, quitsahā nyaá ndaha nu tsi ñaha tsa tsicoq sehe yii can.

¹⁴ Maa tyin tsicoq uvi nditsin nahnu ñaha can tan caá can tumaa caá nditsin tasu. Tsicoq can tyin tacan tan cuví ndava ña tan cuhun ña cunu xeehe ña nu tsiqui nu ña cuví ñihi coo can tsi ña. Ican cuví nu cua ñihi ña tsa catsi ña tsitsi tsa uñi cuiya sasava. ¹⁵ Tan nu coo can tavā nu ndutyá tsihin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayivi jatyinyeē tsi tsi ña, tyin ndatā tsi tan nanyee yutya tsa javahā nu coo tsihin ndutyá tsa quitā yuhu nu. ¹⁷ Tan tsa ña cuví jaha canaa nu tsi ña, quitsahā

cañi tahan nu tsihin nyivi cuvi tata ña, ñi tsa tyaá yahvi tuhun caahán Nyoo, tan nyicún ñi tsihin tsa ñi ñi ñi ñi ñi tsa nditsa tsa caahán ra Jesucristo.

Nu nyehé ra Juan uvi quití caquiñi

13 ¹ Tan tsinyaá nyityi yu nu nyiti yuhu ndutya ñuhu, nyehé yu quitá iin quití caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo. ² Quití caquiñi can caá ti tumaa caá cuiñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsahá nu ndatu tsi quití caquiñi can tsa cunyaa ti nu tyayu nu. Tan tsahá nu ndatu tsi ti tsa cundaca ñaha ti. ³ Tan nyaá iin nu caahvi tsa cua cahñi tsi ti jiñi ti, maa tyin ndahá nu caahvi can. Tan tsa nyehé nyivi iyó nu ñuhu ñayivi ihya can, iyo xaan cuñi ñi. Tan quitsahá nyicún ñi tsi ti. ⁴ Tan jacahnú ñi tsi nu coo xaan can, tyin tsahá nu ndatu tsi quití can. Tan jacahnú tucu ñi tsi quití can, tan catyí ñi:

—¿Yoñi maa cuvi tumaa cuvi quití ihya? ¿Tan yoñi cuvi cañi tahan tsihin ti? —catyí ñi.

⁵ Tan ñihí tucu quití can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo. ⁶ Tacan javahá ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andivi. ⁷ Tan tsicoq tucu ndatu tsi ti tsa cañi tahan ti tsihin nyivi yihí cuenda Nyoo nda cuanda cuvi jaha canaa ti tsi ñi. Tan ñihí ndatu tucu ti tsa quihí ndaha ti tsi nyivi ndihi ñi tata, nyivi caahán siin siin yuhu, nyivi iyó tandihí ñi ñuu nyihi, tan ñuu nahnu. ⁸ Tan nyivi tsa ña cua coo ñayivi tsa tsihin ra cuvi Mbee Ticatyi Luhlu, ra tsa tsihi, ña cua coo ñi

ñayivi tsa can tsa cuenda tyin ña tsinyaá sivi ñi nu libro ra tsa ndi cumañi ca tsinu ñuhu ñayivi. Tandihí maa ñi can cua jacahnu ñi tsi quití caquiñi can.

⁹ Tatun yihí ndo iyó soho ndo, tyaa soho ndo tuhun ihya: ¹⁰ Nyivi tyihí tsi inga nyivi vehe caa, cua cuhun tucu maa ñi vehe caa. Tan nyivi tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyeé iñi ndo tan tsinu iñi ndo tsi ra.

¹¹ Yahá can tan nyehé yu quitá inga quití caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyi luhlu. Maa tyin caahán ti tumaa caahán coo xaan tsa iyó ndaha can. ¹² Tan ndacá ñaha ti tumaa ndacá ñaha inga quití caquiñi can. Tan nyehé inga quití can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnu ñi tsi inga quití caquiñi tsa cuñi cúu jahá tsa caahvi tsa tsinyaá tsi ti.

¹³ Tan cuaha xaan tsa iyo javahá ti nda cuanda quitá ñuhu andivi tan janacavá ti can nu ñuhu ñayivi tyin nyehé nyivi. ¹⁴ Tan jandaví ñaha ti tsi nyivi iyó nu ñuhu ñayivi tsihin tsa iyo tsa cuvi javaha ti nuu quití caquiñi tsa jihna ñi. Tavá tyiñu ti na javaha ñi iin tsitoho quití caquiñi tsa tyahnya caahvi tsihin mityi, tan ña tsihi ti.

¹⁵ Tan quití caquiñi tsa tsinu uvi can tsicoq ndatu tsi ti tsa cuhva ti tsa coo nyito tsitoho quití caquiñi tsa jihna can tyin tacan tan cuvi cahan tsi tan cahñi tsi tsi tandihí nyivi tsa ña cua jacahnú itsi. ¹⁶ Tan siin tyin catyí tsi tyin cunyaa tuñi tsi tandihí nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi. ¹⁷ Tan yoñi maa cuvi jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi. ¹⁸ Tuhun ihya cuñi xaan

tsi tsa tsiñi tuñi. Nyivi cutuñi iñi, na jaha cuenda ñi número quití caquiñi can. Tyin número rayii cuví can. Tan número can cuví iñu cientu uñi xico iñu.

Nu tsitá cientu uvi xico cumi mil nyivi iin yaa tan jacahnú ñi tsi Nyoo

14 ¹ Yahá can tan nyehe yu tsi ra cuví Mbee Ticatyí Luhlu, nyaá nyityi ra jiñi yucu Sión. Tan yucú cientu uvi xico cumi mil rayii tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan. ² Tacan tan tsiñi yu cucayú ityi andívi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha. ³ Tan tsitá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandíhi ra tsahnu naha ra. Tan yoñi maa cuví cutuhva yaa can, maa ñi maa tsa cientu uvi xico cumi mil rayii tsa cacú nu ñuhu ñayivi cuví tsitá can. ⁴ Ra ihya naha ra cuví ra tsa ña tsicá nu tsihin ñaha, tyin ii ra naha. Tan nyicún ra naha tsi ra cuví Mbee Ticatyí Luhlu tandíhi ñi ityi cuahán ra. Cacú ra naha tan juven ra naha jamañi tsi ra naha nuu Nyoo tan nuu ra cuví Mbee Ticatyí Luhlu tsa jihna ñi. ⁵ Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andívi. Tan nyisó ra tuhun Nyoo tsa ña cua cundíhi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandíhi ñi nuu nahnu, tan nuu nyihi, nyivi tandíhi ñi tata, tan nyivi caahán siin siin yuhu. ⁷ Tan ñihi xaan cañan ra tan catyí ra:

—Nayuhvi ndo tsi Nyoo, tan

jacahnu ndo tsi ra. Tyin tsa tahañ tsi cuhva tsa cua cutuñi nyivi. Jacahnu ndo tsi ra javahá andívi tan ñuhu ñayivi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduvá nuu Babilonia tsa cuví nuu cahnu, tsa tani tsi. Tyin nyivi iyó nuu can jacuahá ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jahá ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cañan ra tan catyí ra:

—Tatun ndáa nyivi jacahnu tsi quití caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi, ¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacoho ra vinu xaan tsi ñi nuu ángel tan nuu ra cuví Mbee Ticatyí Luhlu cuví can. ¹¹ Tan ña cua cundíhi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quití caquiñi can tan tsi tsitoho ti, tan tsahá ñi tsi ñi cunyaa tuñi sivi ti. ¹² Yacan cuenda nyivi yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeé iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa quee nda andívi, tan catyí tsi tsihin yu:

—Tyaa tuhun ihya: “Vityin tan ityi nuu, siñ xaan cua cuví tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, siñ xaan cua cuví tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyivi

¹⁴ Tacan tan nyehe yu iin vico cuitsin. Tan nu vico can nyaá iin ra

caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan. **15** Tan quitá inga ángel tsitsi vehe ñuhu tan ñihi xaan cana tsa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaá cuhva, tan tsa iyó nu ñuhu ñayivi tsa tsityí tsi —catyí ra.

16 Tacan tan ra tsa nyaá nu vico can jayahá ra mityi ra nu ñuhu ñayivi, tan naquihin ra tsa iyó nuu tsi.

17 Tacan tan quitá inga ángel tsitsi vehe ñuhu tsa iyó andivi. Tan juven ñi ndahá tucu ra iin mityi yacua tsa xaan. **18** Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan cana tsa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juven, tan cahnya cuenda ndoco yucu vixi tsa nañi uvas tsa iyó nu ñuhu ñayivi, tyin tsa tsityí tsi —catyí ra.

19 Tan jayahá ángel can mityi ra nu ñuhu ñayivi tan tsahnya ra uvas can. Tan tyihí ra itsi iin nu tyihí ra tyin cua cuhni ra itsi tan quita ndutya tsi. Tan yacan cuñi tsi catyí tsa cua tatsi tuñi Nyoo tsi nyivi. **20** Tan nacuhni ra uvas can ityi tsata ñuu, tan cuñi tsi catyí tyin cuaha xaan nyivi tsihi, tan nu cuví can, cuaha xaan cuaha xaan niñi ñi tsati. Tan tsaá tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

Nu quitá ndihi utsa taahan ña tundoho tsa cua nyehe nyivi

15 ¹ Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsí ndacá utsa taahan ña tundoho. Tsihin

tundoho ihya cua cundihi tsa xaan cuñi Nyoo nyehe ra tsi nyivi tsa ña tyaá yahvi tuhun caahán ra.

2 Tan nyehe tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasaca ñuhu tsihin tsi. Tan nyivi tsa cunyeé jahá canaa tsi quitá caquiñi can tan tsi tsitoho ti, tan ña tsinyaá número sivi ti tsi ñi, tandihi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi. **3** Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen:

Cahnu tan iyo xaan caá tandihi maa tsa javahá un,
Nyoo, Jutu ndi, iyó tandihi tunyeé iñi tsi un.

Ndoo xaan tan nditsa xaan ityi un,

Yoocho Rey cuenda tandihi nyivi iyó nu ñuhu ñayivi.

4 ¿Yoo ña cua nayuhvi tsi un, yoocho Jutu Mañi ndi?

¿Yoo ña cua jacahnu tsi un?

Tan intuhun ñi maa un cuví ra ii.

Tan cua quitsi nyivi quee tandihi maa ñuu, tan cua jacahnu ñi tsi un, tyin nyehe ñi tsa vaha tsa javahá un, catyí yaa tsitá ñi.

5 Tacan tan nyehe yu nuña yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu. **6** Tan quitá utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha. **7** Tacan tan iin tsa nyito can, tsahá can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitu maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihi maa tsa iyo ra. **8** Tan tsitu

maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee ñi tsa iyó tsi ra. Tan yoñi maa cuví quihvi tsitsi vehe ñuhu can tsitsi tsa ndi cumañi ndihí tsa utsa tundofo tsa vatsí ndacá tsa utsa ángel can.

Coho tsa yihí tundofo tsa cua jaquitsi tsa utsa ángel

16 ¹ Tacan tan tsiñi yu iin ndusu ñihí xaan tsa quitá tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cucacoyo ndo tsa yihí tsitsi coho ndahá ndo juvin siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

² Tacan tan tsahan iin ángel can tsicoyo ra tsa yihí tsitsi coho ra siqui nyivi tsa nyaá tuñi quití caquiñi can tan jacahnú ñi tsitoho ti. Tan quitá nu caahvi xaan tan uhvi xaan tsi ñi.

³ Tacan tan coyó tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduvi tsi ñiñi tumaa ñiñi ndiyi, tan tandihí tsa nyito tsa iyó tsitsi ndutya ñuhu can tsihi tsi.

⁴ Tacan tan coyó tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduvi tsi ñiñi. ⁵ Tacan tan tsiñi yu tsa caahán ángel cuenda ndutya tan catyí ra:

—Jutu Mañi yu, yoocho vaha xaan un tyin tatsi tuñi un tsi nyivi tyehen. Jutu Mañi yu, Nyoo ii cuví un tyin nda nu quitsaha tandihí tan nda cuenda vityin tacan ñi iyó maa un.

⁶ Tatsi tuñi un tsi ñi tyin maa ñi tsatí ñi ñiñi nyivi yihí cuenda un tan ñiñi ra cuví ndusu yuhu un. Tan vityin yoocho tumaa tsa jacohó un ñiñi tsi ñi tyin tacan taahán maa tsi tsi ñi —catyí ángel can.

⁷ Tan tsiñi tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandihí tunyee ñi tsi, vityin tsa tatsi tuñi un tsi nyivi tsihin tsa nditsa tan tsihin tsandaa —catyí ndusu can.

⁸ Tan coyó tsa tsinu cumi ángel can tsa yihí tsitsi coho ra nu ñicanyii. Tacan tan tsicoo ndatu tsi ñicanyii can tsa cahmi tsi tsi nyivi tsihin ñuhu tsi. ⁹ Tan tandihí nyivi ndasi xaan cayú ñi jaha ñicanyii can. Maa tyin vasu ndi maa tacan tahañ ñi, ña nasama ñi cuhva tsicoo ñi, tan ndi ña jacahnú ñi tsi Nyoo. Tan cahañ ñi ndavaha ñi siqui Nyoo, ra tsa jaquitsi tundofo can siqui ñi.

¹⁰ Tan coyó tsa tsinu uhun ángel can tsa yihí tsitsi coho ra siqui tyayu quití caquiñi can. Tan ndunaq nu ndacá ñaha ti. Tan nyivi cuenda ti, nda cuanda tsatsi yihí ñi yaa ñi tsa cuenda tsa nyehé xaan ñi tsa uhvi.

¹¹ Maa tyin vasu ndi maa tacan cuví, ña jandihí ñi tsa javahá ñi tsa ña vaha. Tan cahañ ñi ndavaha ñi siqui Nyoo, ra nyaá andivi, tsa cuenda tsa uhvi nu caahvi ñi.

¹² Tan coyó tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. ¹³ Tacan tan nyehe yu quitá tatyí ña vaha tsa caá tumaa caá sahva yuhu tsa intuhun intuhun quití. Iin can quitá yuhu quití caquiñi, inga can quitá yuhu coo xaan tsa iyó ndaha inga can quitá yuhu tsa cuví ndusu yuhu vatya. ¹⁴ Tatyí ña vaha can cuví tatyí nu ña vaha, tan nahnu tsa nyityi javahá nahnu. Quitá nahnu, jandu iin nahnu tandihí rey tsa iyó nu ñuhu ñayivi, tyin cañi tahan ra naha quivi tsa quivi janaha Nyoo tyin iyó tandihí tunyee ñi tsi ra. ¹⁵ Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana ñi ndo tan quihvi ra tsitsi vehe ndo tacan yuhu. Siñ xaan cua cuví tsi

nyivi ndatú quivi quitsi yu tan tsa iyó vaha jahma ñi tyin quivi cua tsa yu ña cua nducahan nuu ñi tyin ña tandiñi ñi —catyí ra Cristo.

16 Tan cua ndu iin ra cuví rey naha ra nu nañi Armagedón tsihin yuhu hebreo.

17 Tan coyó tsa tsinu utsa ángel can tsa yihí tsitsi coho ra nu tatyí, tacan tan quitá iin ndusu nu nyaá tyayu Nyoo tsitsi vehe ñuhu tsa nyaá nda andívi. Caná tsa tsi tan catyí tsi:

—Tsa iyó vaha vityin.

18 Tacan tan vaa ña maa cuví tan caahán savi tan cañi tatsa. Tan ñihi xaan taan nu ñuhu ñayivi. Tan ña tuhvá maa taán tacan tsa ndi quitsaha iyó nyivi nu ñuhu ñayivi. 19 Tan uñi nu ndatá ñuu cahnu Babilonia can, jahá tsa taan. Tan tandiñi ca ñuu tsa cayucu nu ñuhu ñayivi taní tsi. Nyoo ña naá maa iñi ra tsa javahá nyivi Babilonia. Yacan cuenda janyehé xaan ra tundoho tsi ñi. 20 Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaá. 21 Tan cucoyó cuaha yuu savi nahnu xaan tsa quee andívi siqui nyivi. Vee xaan tsi. Tuma vee uvi xico kilu, tacan vee tsa intuhun intuhun yuu savi can. Tan nyivi cahán ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

Nu cua tatsi tuñi Nyoo tsi ñuu ña vaha

17 1 Tacan tan quitá iin ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tsihin yu:

—Naha tyin janaha yu tsi un nácaa cua cutuñi ñaha ña vaha tsa tsicá nuu tsihin rayiñi, ña tsa nyaá nu ndutya cuaha. 2 Tyin ra cuví rey nu ñuhu ñayivi tsicoo ra naha tsihin ña, tan tsa cuenda ña tiví tandihí nyivi iyó nu ñuhu ñayivi —catyí ra tsihin yu.

3 Tacan tan nyehe yu iin tsa janahá Tatyí li Nyoo tsi yu, tan tsindaca

ángel can tsi yu nu tsiqui nu nduve maa nyivi iyó, tan juvin ñi ican nyehe yu iin ñaha yosó iin quitá cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiqui ti. 4 Tan ñaha can nditsí ña jahma tijinda tan cuaaha. Tan cuaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. 5 Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihí ñiñaha tsa tsicá nuu tsihin rayiñi tan sihi tandihí tsa ña vaha tsa iyó nu ñuhu ñayivi.” 6 Tacan tan nyehe yu tyin tsiñi ñaha can jahá tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahán ñi tuhun ra Jesús. Tsa nyehe yu tsi ña, iyo xaan cuñi yu. 7 Tacan tan catyí ángel can tsihin yu:

—¿Nacuenda iyo xaan cuñi un?

Cua jacoto yu tsi un náa cuñi tsi catyí tuhun xeehe ñaha ihya tan quitá caquiñi tsa yosó ña, quitá tsa iyó utsa jiñi tan utsi ndiqui. 8 Quitá caquiñi tsa nyehe un can, juvin ti cuví quitá tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihi. Ican nyí ti tsa ndi cumañi ca cuhun ti nu cua cundihi cui ti. Nyivi iyó nu ñuhu ñayivi, ñi tsa nduve sivi nyaá nu libru Nyoo nda quivi tsinu ñuhu ñayivi, iyo xaan cua cuñi ñi nyehe ñi tsi quitá can. Libru can catyí yoo nyivi cua coo cuii.

9 Tuhun ihya cuñi tsi tsa cutuñi iñi yo itsi: Tsa utsa jiñi quitá can cuñi tsi catyí tsa utsa yucu tsa nyaá ñaha can nuu. 10 Tan juvin ñi cuñi tucu tsi catyí can utsa rey. Uhun ra naha tsa yahá tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra. 11 Tan

quiti caquiñi tsa tsicoq tan vityin nduve ca ti iyó, juvin ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cuhun ti nu cua cundihi cuii ti.

12 Tan tsa utsi ndiqui tsa nyehe un can, cuñi tsi catyi utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quiti caquiñi can. 13 Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quiti caquiñi can. Tan tandihi ndatu tsa iyó tsi ra naha cua nacuhva ra naha tsi ti. 14 Tan cua cañi tahan ra naha tsihin ra Mbee Ticatyí Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihi ra ndacá ñaha. Tan yihí ndaha tucu ra tsi tandihi ra cuví rey naha ra. Tan nyivi yihí cuenda ra, maa Nyoo cana tsi ñi tan nacatsi ra tsi ñi. Tan ñi xaan cuñi ñi nycún ñi tsi ra.

15 Tan catyí tucu ángel can tsihin yu:

—Ndutya cuaha tsa nyehe un can, nu nyaá ñaha tsicá nuu can, yacan cuví nyivi iyó tandihi ñuu nyihi tan ñuu nahnu, ñi caahán siin siin yuhu. 16 Rey tsa cuví tsa utsi ndiqui quiti caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo ihñi ra naha tsi ña. Tan cua jatandi ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña. 17 Tyin Nyoo tsaha ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha ndatu tsi quiti caquiñi can tsa cundaca ñaha ti tumaa rey nda cuanda cundaa tuhun caahán maa Nyoo. 18 Ñaha tsa nyehe un can, juvin ña cuví ñuu cahnu tsa ndacá ñaha tsi tandihi ra cuví rey nu ñuhu ñayivi.

Nu naá ñuu Babilonia

18 ¹ Tsa yaha yacan tan nyehe yu quee inga ángel ityi andivi tan iyó xaan tunyee iñi tsi ra. Tan ndunditsin ñuhu ñayivi jaha tsa nditsin ra. ² Tan cana tsaa ra tsihin tsa ñihi ndusu ra, tan catyí ra:

—Tsa tsindihi nuu ñuu Babilonia cahnu. Nanduví tsi nu iyó tatyí ña vaha, vehe tandihi nuu tatyí ña vaha, tan taca saa ña vaha tsa ña taahán iñi nyivi. ³ Tyin tandihi nyivi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayivi naha ra tumaa tsa tsicoq ra naha tsihin ñaha tsa cuví ñuu Babilonia can. Javaha ra naha cuatyí tsihin ña. Tan nyivi ñuhu ñayivi nducuca ñi tsihin tsa cuaha xaan tsa yahvi tsa jata nyivi ñuu can.

⁴ Tacan tan tsiñi yu ndusu Nyoo ityi andivi, tan catyí tsi:

—Quita ndo ñuu ihya, nyooho tsa cuví nyivi yu, ña cutahan ndo tsihin nyivi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehe maa ñi. ⁵ Tyin tsa canyí tucuiti cuatyí nyivi iyó ñuu can, nda cuanda tsaa can nu nyaá yu. Tan ñuhú iñi yu tsa ña vaha javahá ñi. ⁶ Cuhva ndo juvin ñi maa tsa tsaha ñi tsi inga nyivi tsi ñi; cuhva ndo uvi ca tsaha siqui tsa javaha ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsaha maa ñi tsi inga nyivi. ⁷ Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahnú xaan ñi tsi ñi tan cusí xaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñi ñi, tsicá iñi ñi. ⁸ Yacan cuenda iin quivi ñi cua quitsi tundoho siqui ñuu can, cua quitsi tuhun tsihi,

tucuihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyivi ñuu can —catyí Nyoo.

9 Ra cuví rey nu ñuhu ñayivi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuihya cua cuñi ra naha na nyehe ra naha yuhma tsa cayu ñuu can. **10** Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyi ra naha:

—¡Ndahvi yooho, ñuu cahnu Babilonia, ñuu tsa tsicoo cuaha tunyee iñi tsi! Tyin iin yaha ñi tsaq tundoho nyehé un —cua catyi ra naha.

11 Tan ra tsa xicó ndaha tyiñu naha ra, juven ñi cua vacu xaan ra naha tan cuihya cua cuñi ra naha tsa cuenda ñuu can. Tyin yoñi ca cua jata tsa xico ra naha. **12** Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandihi nuu vitu tami tan náa ndihi tsa tsinu tsihin yiqui nuu landa, tan vitu sii caá, tan caa tsa cuví bronce, tan caa tsa cuví hierro, tan yuu tsa cuví mármol.

13 Tan xicó tucu ra naha canela, náa ndihi ca yucu tsa quihví tsihin tsa tsatsí yo, tan tsa tami tumaa cutu, tumaa mirra, tan tumaa ndutyá tami. Tan xicó tucu ra naha vinu, acetye, yutyi paan vaha, tan trigu. Tan juven ñi xicó tucu ra naha quití cuenda carga, tan mbee, cuayu, carreta, tan nda cuanda nyivi tsa cuví musu tan xicó ra naha. **14** Tan catyi ra naha tsihin nyivi ñuu can tyehen:

—Nduve ca tsa sii caá tsa tsicoo tsi un, tsa taahán xaan iñi un. Tan tsa tsindihí tandihi tsa cuca un. Tan ña cua ñihi ca maa un tandihi yacan —catyí ra naha.

15 Ra tsa xicó tandihi can, nducuca ra naha tsa cuenda tsa jatá nyivi ñuu

Babilonia can tsa xicó ra naha. Nda sava cua cunyecu ra naha tsa cuenda tsa yuuhví ra naha tsa cua nyehe nyivi can tundoho. Tan cua vacu xaan ra naha tan cuihya cua cuñi ra naha.

16 Tan cua catyi ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla. **17** ¡Tan iin yaha ñi ndihí tsa cuca xaan can! —cua catyi ra xicó can naha ra.

Tan tandihi ra cuví capitán tsa jacacá yutun ndoo nu ndutyá, tsihin nyivi yucú tsitsi can tan tandihi ra jahá tyiñu nu ndutyá ñuhu naha ra, nda sava cua ndoo ñi. **18** Tan tsa cua nyehe ñi yuhma tsa cayú ñuu can, cua cana tsa ñi, tan cua catyi ñi:

—¿Náa inga ñuu tsicoo tumaa ñuu cahnu ihya? Nduve —cua catyi ñi.

19 Tan cua coso ñi nyaca jiñi ñi, tan cua vacu xaan ñi. Tan cuihya cua cuñi ñi, cua cana tsa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducuca tandihi yoo tsa tsicá nuu nu ndutyá ñuhu tsihin yutun ndoo. ¡Tan vityin iin yaha ñi naq tsi! —cua catyi ñi.

20 Maa tyin nyooho cusii iñi ndo nyehe ndo tsa taahán ñuu can, nyooho tsa iyó andivi, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihi ca nyooho tsa yihí cuenda Nyoo. Cusii iñi ndo tyin tsa cuenda tsa javahá ñi tsa ña vaha tsihin ndo tan tatsí tuñi Nyoo tsi ñi.

21 Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutyá ñuhu, tan catyí ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. **22** Yoñi ca cua cata yaa tsitsi ñuu can, tan

yoñi ca cua javacu arpa, tan yoñi ca cua tivì tyiyo, tan ndi caa. Tan ndi ña cua coo ca ra jahá tyiñu náa ndihì ca tyiñu. Tan ndi ña cua cucayu ca molino. **23** Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyivi nu iyó vico tindaha. Tacan cua cuvi vasu ndi maa ra xico tsa tsicoo ñuu can naha ra, cahnu xaan tunyee iñi tsicoo tsi ra naha, tan jandavì ñaha xaan nyivi iyó ñuu can tsi tandihì nyivi iyó nu ñuhu ñayivi tsihin tuhun tasi.

24 Tyin cuaha xaan niñi ra cuvi ndusu yuhu Nyoo canyivi tsitsi ñuu can tyin tsañi ñi tsi ra naha. Tan canyivi tucu niñi inga ca nyivi yihí cuenda Nyoo, tan niñi tandihì nyivi tsa tsañi nyivi naniñi cahnu nu ñuhu ñayivi.

19 ¹ Tsa yahá yacan, tan tsiñi yu ndusu nyivi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

2 Tyin tsihin tsa vaha tan tsandaa tan tsa nditsa jacutuñi ra. Tatsi tuñi ra tsi ñaha tsicá nuu tsa cuví ñuu Babilonia tsa jativi xaan tsi nyivi iyó nu ñuhu ñayivi tsihin tsa caquiñi tsa javahá ña tsihin ñi.

Tan tatsi tuñi ra tsi ña tsa cuenda tsa tsañi ña tsi nyivi jahá tyiñu tyiñu ra.

3 Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihì maa tsa ndaa tsi ityi siqui —catyí ñi.

4 Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na

cuvi tsi tacan! —catyí ra naha.

5 Tan nu nyaá tyayu Nyoo, nacahán iin ndusu, tan catyí tsi:

Jacahnu ndo tsi Nyoo Jutu yo tandihì nyooho tsa jahá tyiñu tyiñu ra,
tan tyáá yahvi ndo tsi ra,
nyooho nyivi nyihi tan nyivi tsahnu.

Nu iyó vico tindaha ra Mbee Ticatyi Luhlu tan nyivi tsinú iñi tsi ra

6 Tan tsiñi tucu yu ndusu tumaa cuví nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihì tunyee iñi tsi!
Tyin tsa quitsahá ndacá ñaha ra.

7 Na cusii iñi yo tan na cutu yo tsihin tsa sii. Na jacahnu yo tsi ra,
Tyin tsa tsaqá cuhva tsa coo yo vico tindaha ra Mbee Ticatyi Luhlu.

Tan yoo cua cuvi yo tumaa ñasihi ra, tan ndatú yo quivi tindaha yo tsihin ra.

8 Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyi tsa vaha tsa javahá nyivi yihí cuenda ra.

9 Tacan tan quitsahá catyí ángel can tsihin yu:

—Tyaa tyehen nu tutu: “¡Sii xaan cuví tsi nyivi tsa cua cahun nu tindaha ra Mbee Ticatyi Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

10 Tacan tan tsicuiñi tsiti yu nuu ángel Nyoo can tsa cua jacahnu yu tsi ra. Maa tyin catyí ra tsihin yu:

—Ña jacahnu un tsi yuhu, tyin yuhu musu Nyoo ñi cuví tucu yu

tumaa yooho, tan tumaa tandihi ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahán tsi jacahnu yo —catyí ra tsihin yu.

Tyin tsa cahan ra Jesús, yacan cuví tsa jandu iin iñi tsi ra cuví ndusu yuhu ra, ra tsahá cuenda tuhun caahán Nyoo tsihin yo.

Nu nyehe ra Juan tsi ra tsa yosó cuayu cuitsin

11 Tacan tan nyehe yu tichó andivi. Tacan tan quituví iin cuayu cuitsin. Tan ra yosó tsi ti nañi ra Ra Nditsa Tsa Nii Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyivi, tan ndaa javahá ra tsa cañi tahan ra. 12 Tan tumaa caá nu cayú ñuhú, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra. 13 Tan nditsí ra jahma cahyi tsihin niñi. Tan nañi ra Tuhun Nyoo. 14 Tan nyicún andaru andivi tsi ra, nditsí ra naha jahma vaha tsa cuví linu, cuitsin tsi tan ña nyahyu tsi. Tan yosó ra naha cuayu cuitsin. 15 Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñi tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihi tunyee iñi tsi. 16 Nu jahma ra tan nu sihin ra can nyaá letra tsa catyí tyehen: “Ra ihya cuví ityi nuu tsihin tandihi rey. Tan juvin ñi ra cuví ityi nuu tsihin tandihi ra ndacá ñaha naha ra.”

17 Tacan tan nyehe yu nyaá nyityi inga ángel nu ñicanyii. Tan ñihi xaan cana tsaa ra tsi tandihi saa tsa ndavá ityi andivi, tan catyí ra tsihin ti naha ti:

—Nuu ndo tan ndú iin ndo tan cuxiñi ndo tsa tsaha Nyoo catsi ndo.

18 Cua catsi ndo cuñu ra cuví rey naha ra tan ra cuví ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandihi ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyí ra tsihin saa can naha ti.

19 Tacan tan nyehe yu quití caquiñi can tsihin ra cuví rey tsa iyó nu ñuhu ñayivi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra. 20 Tñin ra yosó cuayu cuitsin can tsi quití caquiñi can iin caa ñi tsihin ra cuví ndusu yuhu vatya can, tyin nuu quití caquiñi can javahá ra vatya can tsa nyityi, tan tsihin yacan jandavi ñaha ra tsi nyivi tsa tsaha cunyaa tuñi quití caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhú tsa cayú tsihin azufre. 21 Tan tandihi ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandihi maa saa, tsatsi xaan ti naha ti cuñu ñi.

Nu nyehe ra Juan tsa cuenda tsa mil cuiya

20¹ Tsa yaha can tan nyehe yu quee iin ángel ityi andivi, ndahá ra ndaha tucu yuvehe yavi cunu tsa nduve maa nu tsindihi. Tan ndahá tucu ra iin cadena cahnu. 2 Tñin ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tsihin cadena iin mil cuiya. 3 Tan jacuhun ra tsi nu tsitsi yavi cunu xaan can. Nacasí ra yuhu yavi can, tan tyaa ra iin sellu yuhu can tyin tacan tan ña jandavi ñaha ca nu tsi nyivi iyó nu ñuhu ñayivi, nda yaha mil cuiya. Tsa

yaha mil cuiya can, cua ndatsi nyico nu juhva ca quivi.

4 Yahā can tan nyehe yu nyecú cuaha tyayu. Tan nuu can nyecú nyivi tsa ñihī ndatu tyin tatsi tuñi ñi tsi nyivi. Tan nyehe tucu yu añima nyivi tsahnyā nyivi jiñi tsa cuenda tsa cahān ñi tuhun Nyoo tsa tsahā cuenda ra Jesús tsi ñi. Nyivi ihya ña jacahnū ñi tsi quitī caquiñi can, ndi tsi tsitoho ti, tan ndi ña tsahā ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindaca ñaha ñi tsihin ra Cristo tsitsi tsa mil cuiya can. 5 Ñi ihya cuvī ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can. 6 ¡Siī xaan cuvī tsi ñi tsa nandoto jihna tyin nacatsī Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuvī ñi tumaa jutu tan cua cundaca ñaha ñi tsihin ra Cristo mil cuiya.

7 Tsa yaha mil cuiya can, cua ndatsi Satanás nu nyií nu nuuhñi nu. 8 Cua quita nu, jandavi ñaha nu tsi nyivi Gog tan Magog, ñi xaan iñi tsi Nyoo tsa iyó naniñi cahnu nu ñuhu ñayivi. Cua jandu iin nu tsi andaru ñi can tyin cuhun ra naha cuatyī. Cuaha xaan ra naha, tumaa cuaha nyiti yuhu ndutya ñuhu. 9 Tacan tan nyehe yu quee ra naha naniñi cahnu nu ñuhu ñayivi. Tan tyasi nduvi ra naha nu iyó nyivi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andivi tan tsahmī tsi tsi tandihī ra naha. 10 Tan nu ña vaha tsa jandavi ñaha tsi ñi, jacuhun Nyoo tsi nu anyaya nu cayú ñuhu tsihin azufre, nu jacuhun ra tsi quitī caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

Nu cutuñi nyivi ityi nu nyaá tyayu cuitsin nu nyaá Nyoo

11 Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehé ra nu naq ñuhu ñayivi tan andivi. Tan ña ñihī tsi numaa cava tsi. 12 Tan nyehe yu tandihī añima nyivi tsihī, tahan ñi nyivi tsahnu tan nyivi nyihi, nyecú nyityi ñi ityi nuu Nyoo. Tacan tan nuñā libru tsa nyaá tandihī tsa javahā ñi quivi tsicoo ñi. Tan nuña tucu inga libru nu nyecú sivi nyivi tsa cua coo nyito tsihin Nyoo. Ndiyī can cua cutuñi ñi tsa cuenda náa ndihī ca tsa javahā ñi tsa nyaá nu libru can. 13 Tan ndutya ñuhu nacuhvā cuenda tsi añima nyivi tsa tsihī tsa cumí tsi. Tan nu yucú añima nyivi tsihī tan Tuhun Tsiihí, nacuhvā cuenda nahnu añima nyivi tsa yihí ndaha nahnu. Tan tandihī ñi cua tahan ñi nácaa javahā maa ñi. 14 Tacan tan Tuhun Tsiihí can tan nu yucú añima nyivi tsihī can cua jacuhun ndihī Nyoo nduvi taahan can anyaya cahnu nu cayú ñuhu. Tan tsehe cuvī tuhun tsiihí tsa tsinu uvi. 15 Juvín ñi ican jacuhun ra tsi nyivi tsa nduve sivi nyaá nu libru nu nyecú sivi nyivi cua coo nyito tsihin Nyoo tacan ñi maa.

Nu nyehé ra Juan andivi tsaa tan ñuhu ñayivi tsaa

21 1 Yahā can tan nyehe yu iin andivi tsaa tan iin ñuhu ñayivi tsaa, tyin andivi tan ñuhu ñayivi tsa tsicoo jihna naq tsi. Tan tacan tucu ndutya ñuhu naq tsi. 2 Yuhu ra Juan nyehe yu ñuu ii tsa cuvī Jerusalén tsaa tsa quee nda nu nyaá Nyoo andivi, nyehe yu nuu tsi. Tan siī xaan caā cucutu tsi tumaa cucutú iin ñaha cua tindaha. 3 Tan tsiñi yu iin ndusu ñihi tsa quitā nda andivi, tan catyí tsi: —¡Nyehe jihna! Iyó Nyoo mahñu nyivi. Cua coo ra tsihin ñi. Maa ñi cua cuvī ñi nyivi ra. Tan cua cunyaa ra tsihin ñi, tan cua cuvī ra Nyoo

cuenda ñi. **4** Juvín ñi maa ra cua nacuhva ndutya nuu ñi. Ña cua coo ca tuhun tsiihí tan ndi tucuiihya iñi. Ña cua vacu ca nyívi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandihí tsa tsicoo, tsa tsindihí tsi —catyí ndusu can.

5 Tacan tan ra nyaá nu tyayu cahnu can, catyí ra:

—Nyehe jihna. Jandutsaꞓ yu tandihí maa tsa tsicoo.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cuiṭa iñi tuhun ihya tyin cua cundaa tsi —catyí ra tsihin yu.

6 Tsa yahá cahán ra yacan tan catyí tucu ra:

—Tsa iyó vaha tandihí vityin. Yuhu cuví ra jihna ñi, tan yuhu cuví ra cua coo nu cua ndihí quivi: tumaa letra A cuví tsi letra jihna ñi tan tumaa letra Z cuví tsi letra nu ndihí ña. Nyívi tsa na ityi iñi cua kuhva yu ndutya coho ñi; tuhun ihya cuñí tsi catyi: Ñi cuñí tyaa soho tuhun yu, cua kuhva yu ñayívi tsa ña cua naa maa coo ñi, tan nduve yahvi tsi cua coo. **7** Nyívi jahá canaa tsi nu ña vaha, cua ñihí ñi tandihí tsa caahán yu tuhun ihya, tan cua ndoo ñi tsihin can. Tan yuhu cua cuvi yu Nyoo ñi tan maa ñi cua cuvi ñi sehe yu. **8** Maa tyin nyívi yuuhví xaan, ñi ña tsinú iñi, ñi quiñi iyó, ñi tsahñí, ñiñaha tsicá nuu tsihin rayíi, tan rayíi tsicá nuu tsihin ñaha, ñi tasi, ñi jacahnú tsitoho, ñi vatya; tandihí maa nyívi ihya taahán tsi cahun ñi anyaya cahnu nu cayú ñuhú tsihin azufre, nu cuví tsa tsinu uvi tuhun tsiihí, nu tatsí tuñi Nyoo añima ña vaha.

Nu nyehé ra Juan nácaa cua cuvi ñuu Jerusalén tsaa

9 Tacan tan tsitsi tsa utsa ángel tsa ndahá coho tsitú tsihin tundoho, quitá iin ra tan natuhvá ra nu nyaá yu tan catyí ra:

—Cohon tsihin yu tan janaha yu nyívi yihí cuenda ra Cristo tsi un, ñi tsa cuví tumaa ñasihi ra Mbee Ticatyí Luhlu —catyí ra tsihin yu.

10 Tan janahá Tatyí Ii Nyoo tsi yu tyin tsindaca ángel can tsi yu iin yucu sucun tan cahnu. Tan janahá ra ñuu ii, ñuu Jerusalén cahnu can tsi yu. Juvín ñi kuhva tsa vatsí nuu tsi tsa quee tsi andívi nu nyaá Nyoo.

11 Xiñu xaan ñuu can tsihin tsa sií caá Nyoo. Xiñu xaan tumaa iin yuu vaha tan sií caá, tumaa yuu jaspe, tumaa nyehé yo tsa nyaá inga tsiyo tsihin yutyí, tacan caá tsi. **12** Nii canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sívi tsa utsi uvi sehe ra Israel ra cuví tsi tsaahnu yo naha ra.

13 Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii.

14 Utsi uvi yuu yihí nu cacú tsaha tsi. Tan nuu yuu can nyecú sívi tsa utsi uvi ra tsa tavá tyiñu ra Mbee Ticatyí Luhlu.

15 Tan ángel tsa cahán tsihin yu, ndahá ra iin metru tsa tsinú tsihin xuhun cuaan, tsihin yacan tyihí kuhva ra ñuu can, tan yuhu cora can tan nanií canduvi cora ñuu can. **16** Iyó cumi taahan tutun ñuu can. Tan inducu ñi tsa quiihin tan tsa cañi tsi. Tan tyihí kuhva ángel can ñuu can tsihin metru xuhun cuaan can. Tan quitá uvi mil uvi cientu kilómetro. Iin ñi kuhva tsa cañi tan tsa sucun tan tsa quiihin. **17** Tacan tan tyihí kuhva ra cora ñuu can. Tan quitá uñi xico cumi metru tsa quiihin, tyihí kuhva ra tumaa tyihí kuhva nyívi.

18 Tsihin yuu jaspe samá cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyí tun ndoo vaha tsi. **19** Tan tsaha cora can samá tsi tsihin tandihí ñi

nuu yuu s̄i caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda; **20** tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndíhi ña cuví amatista. **21** Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

22 Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandíhi tunyee iñi tsi, tan ra Mbee Ticatyi Luhlu cuví vehe ñuhu ñuu can. **23** Ña tsiñi ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin ñi maa tsa nditsin Nyoo tan tsa nditsin ra Mbee Ticatyi Luhlu jandunditsín tsitsi ñuu can. **24** Tandíhi nyivi tsa cacu añima, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandíhi tsa cahnu cuví ra naha ñuu can. **25** Ña cua cundasi yuhu cora tsa tsinu cahñi, tan ña cua coo tsacuaa ñuu can. **26** Tan tandíhi tsa cuca, tan tsa cahnu, tsa iyó nu ñuhu ñayivi cua tsa tsi ñuu can. **27** Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyi Luhlu cua cuví quihvi, tan cua coo nyito tsihin ra tacan ñi maa.

22 ¹ Tacan tan janahá ángel can iin yutya cuui xaan tsi yu. Ndutya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee

Ticatyi Luhlu. **2** Mahñu tsitsi ityi cahnu ñuu can tan nduvi tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi.

3 Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyi Luhlu. Tan cua jacahnu nyivi yihí cuenda ra tsi ra.

4 Tan cua nyehe tsihin nuu ñi tsi ra.

Tan cua cunyaa sivi ra nutyaan ñi.

5 Ña cua coo ca tsacuaa ican. Tan nyivi tsa cua coo ican ña tsiñi ñuhu ñuhú candili tsi ñi, ndi ñuhú ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatyin quitsi ra Cristo

6 Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahán tsihin ra cuví ndusu yuhu ra tahán tsanaha, juvin ra jacuhun ángel ra, tyin janaha ra tsi nyivi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

7 —¡Tsa cuyatyin quitsi yu! —catyí ra.

¡S̄i xaan cuví tsi nyivi tsa javahá cuhva caahán tuhun Nyoo tsa nyaá nu libru ihya!

8 Yuhu ra Juan, tsiñi yu tan nyehe yu tandíhi tuhun ihya. Tsa yaha nyehe yu tan tsiñi yu itsi, tsicuiñi tsiti yu tsaha ángel tsa janahá itsi tsi yu, tyin jacahnu yu tsi ra. **9** Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandíhi ca ra yañi un tsa

cuví ndusu yuhu Nyoo, tan tumaa tandihí ca nyívi tyaá yahvi tuhun nyaá nu libru ihya. Intuhun ñi Nyoo taahán tsi jacahnu yo —catyí ra tsihin yu.

10 Tan catyí tucu ra tsihin yu:

—Ña tyíhi xeehe un tuhun Nyoo tsa nyaá nu libru ihya, tyin tsa yatyin cuii cundaa tsi. 11 Maa tyin jaña ndaha tsi nyívi caquiñi, na javaha maa ñi cuhva cuñi maa ñi. Tan nyívi iyó cuatyí, na coo ca cuatyí ñi. Maa tyin nyívi javahá tsa vaha, na jañihi ca ñi javaha ñi tsa vaha. Tan nyívi tsa jandu íi Nyoo, na cunycun vaha ca ñi tsi ra —catyí ra tsihin yu.

12 Tan Jutu Mañi yo catyí ra:

—Nyēhe ndo. Tsa cuyatyin quitsi yu. Tan tyahvi yu tsi intuhun intuhun nyívi tsa cuenda tsa javahá ñi, a javahá ñi tsa vaha o tsa ña vaha.

13 Yuhu cuví ra jihna ñi, tan yuhu cuví ra cua coo nu cua ndihí quívi, tsa iyó maa yu nda nu quitsaha tandihí tan tacan ñi maa cua coo yu nu cua ndihí tumaa letra A cuví tsi letra jihna ñi tan letra Z cuví tsi letra nu ndihí ña —catyí Jutu Mañi yo.

14 Sii xaan cuvi tsi nyívi tsa nacatyá jahma, ñi janduvahá añima, tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quíhvi ñi yuhu cora ñuu can. 15 Maa tyin nyívi javahá tsa caquiñi, tumaa ñi tasi, rayii tsa tsicá nuu tsihin ñaha tan ñiñaha tsa tsicá nuu tsihin rayii, tan ñi tsahñí, tan ñi jacahnú tsitoho, tan tandihí ñi vatya, tan ñi jandaví ñaha; tandihí maa ñi can, ña cua quíhvi ñi tsitsi ñuu can.

16 Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya

tsi nyívi tsicá vehe ñuhu. Yuhu cuví nyívi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

17 Tatyí Ii Nyoo tan nyívi yíhí cuenda ra, ñi tsa cuví tumaa ñasihi ra Mbee Ticatyi Luhlu, catyí ñi tyehen:

—Ñaha ñi, Jutu Mañi yu —catyí ñi.

Tan nyívi tsa tsiñí tuhun ihya, na catyi ndihí ñi:

—Ñaha.

Tan nyívi na ityi iñi tan tandihí nyívi cuñi quitsi, na quitsi ñi tan coho ñi ndutyá tsa tsahá tsa coo nyito añima yo, tan nduve náa cua tyahvi ñi.

18 Tan tandihí nyooho tsa tsiñí tuhun Nyoo tsa nyaá nu libru ihya, cuñi yu catyi yu tsehe tsihin ndo: Nyívi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqui ñi. 19 Tan nyívi tsa cua quinyaa juhva tuhun Nyoo tsa nyaá nu libru ihya, Nyoo cua quinyaa ra tsa taahán tsi tsi ñi tsa nyaá nu libru tsa caahán yóo nyívi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun. 20 Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuvi tsi tacan. Ñaha ñi, Jutu Mañi yu, Jesús —catyí yu.

21 Na naquihin tandihí ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñi.

